

IRINEANE TASORENTSI
oquenquetsatacotaqueri
Avincatsarite Jesoquirishito

El Nuevo Testamento en el idioma asháninca
de los ríos Ene, Tambo y bajo Perené
Perú



Sociedad Bíblica Peruana, A. C.

El Nuevo Testamento en el idioma asháninka
de los ríos Ene, Tambo y bajo Perené
Perú

Primera edición, 1972
Segunda edición, 2008

Publicado por
© Sociedad Bíblica Peruana, A. C. 2008

Usted es libre de copiar, distribuir y comunicar públicamente
la obra bajo las condiciones siguientes:

- Reconocimiento. Debe reconocer los créditos de la Sociedad Bíblica Peruana (pero no de una manera que sugiera que tiene su apoyo o apoyan el uso que hace de su obra).
- No comercial. No puede utilizar esta obra para fines comerciales.
- Sin obras derivadas. No se puede alterar, transformar o generar una obra derivada a partir de esta obra.

ÍNDICE

Yora Mateo Isanquenatacotaqueri Jesoquirishito, Jaoca Icanta Iriori Yoavisacotanti	5
Yora Maricoshi Isanquenatacotaqueri Jesoquirishito, Jaoca Icanta Iriori Yoavisacotanti	68
Yora Irocashi Isanquenatacotaqueri Jesoquirishito, Jaoca Icanta Iriori Yoavisacotanti	105
Yora Joa Isanquenatacotaqueri Jesoquirishito, Jaoca Icanta Iriori Yoavisacotanti	170
Yantayetiniri Itiancaneni Jesoshi	215
Yora Pavoro Isanquenatiniri Oromasati	271
Ijivataque Pavoro Isanquenajeitaqueneri Corintosati	296
Yora Pavoro Yapiitajiniri Aisati Isanquenatajiniri Corintosati	320
Yora Pavoro Isanquenatiniri Carashiasati	336
Yora Pavoro Isanquenajeitiniri Ejesosati	346
Yora Pavoro Isanquenatiniri Jiriposhisati	356
Yora Pavoro Isanquenatiniri Corosashisati	363
Ijivataque Pavoro Isanquenajeitiniri Yora Tesaronicasati	370
Yapiitajiro Pavoro Isanquenajeitiniri Tesaronicasati	376
Ijivataque Pavoro Isanquenatiniri Timoteo	379
Yapiitajiniri Pavoro Isanquenatajiniri Aisati Timoteo	387
Yora Pavoro Isanquenatiniri Tito	392
Yora Pavoro Isanquenatiniri Iriori Jiremona	395
Isanqueneetiniri Ijorioririnte	397
Isanquenatiri Santiaco	419
Ijivataque Petero Isanquenatiniri Iyemisantaririnte	427
Yapiitajiro Petero Isanquenatiniri Iyemisantaririnte	435
Ijivataque Joa Isanquenatiniri Iroamere	440
Yapiitajiro Joa Isanquenatiniri Iroamere	446
Mavatapaaque Isanquenatiniri Joa Iroamere	448
Mavatapaaque Isanquenatiniri Joa Iroamere	450
Icamantiri Tasorentsi Joa Paitarica Irantayeteri Jesoquirishito	453

YORA MATEO ISANQUENATACOTAQUERI JESOQUIRISHITO, JAOCA ICANTA IRIORI YOAVISACOTANTI

**Isanquenataquero ivajiropee
ishanincapeeni Jesoshi.**

(Ir. 3.23-38)

1 ¹Meeca nosanquenajeitempiro ivajiropee icharinepeeni Jesoquirishito. Tempa irio ishanincani Iravirini aisati Avaramani.

²Ari itimini Avarama. Iri itomi iriori: Isaca. Iri itomi iriori Isaca: Jacovo. Iri itomipee iriori Jacovo: Jora aisati irirentipee. ³Iri itomipee Jora: Jareshi aisati Sara. Iro irinironi Jareshi opajitani Tamara. Iri itomi Jareshi: Eshiromo. Iri itomi Eshiromo: Arama. ⁴Iri itomi Arama: Aminarava. Iri itomi Aminarava: Naso. Iri itomi Naso: Saramo. ⁵Iri itomi Saramo: Voso. Iro irinironi Voso opajitani Arava. Iri itomi Voso: Overe. Iro irinironi Overe opajitani Oroti. Iri itomi Overe: Jese. ^{6,17a}Iri itomi Jese: Iraviri, yora pincatsari-tatsiri. Ari icarajeitaque iriori 14 shirampari.

Impoiji itimi itomi Iraviri: Saromo. Iro iriniro Saromo ora yaaveitaniri Oriashi. ⁷Iri itomi Saromo: Orovoama. Iri itomi Orovoama: Aviashi. Iri itomi Aviashi: Asa. ⁸Iri itomi Asa: Josavata. Iri itomi Josavata: Jorama. Iri itomi Jorama: Oshiashi. ⁹Iri itomi Oshiashi: Joatama. Iri itomi Joatama: Acasa. Iri itomi Acasa: Eshequiashi. ¹⁰Iri itomi Eshequiashi:

Manasheshi. Iri itomi Manasheshi: Amo. Iri itomi Amo: Joshiashi. ^{11,17b}Iri itomi Joshiashi: Jeconiashi, aisati irirentipee. Ari icarajeiti iriori aisati 14 shirampari. Itimantari Jeconiashi, yora soraropee poneachari Vavironiaqui yaajeitanaqueri maaroni joriopee anta inampiqui.

¹²Impoiji itimi itomi Jeconiashi: Saratiyeri. Iri itomi Saratiyeri: Sorovaveri. ¹³Iri itomi Sorovaveri: Aviori. Iri itomi Aviori: Eriaquimi. Iri itomi Eriaquimi: Asoro. ¹⁴Iri itomi Asoro: Saroco. Iri itomi Saroco: Aquimi. Iri itomi Aquimi: Erioro. ¹⁵Iri itomi Erioro: Erisara. Iri itomi Erisara: Mata. Iri itomi Mata: Jacovo. ^{16,17c}Iri itomi Jacovo: Jose. Iri Jose ojimetsori Maria, ora iriniro Jesoshi. Ipajitiri aisati Quirishito. Ari icarajeiti maaroni iriori shirampari 14.

Itimapaaque Jesoshi.

(Ir. 2.1-7)

¹⁸Meeca noncamantempi jaoca ocantari itimantacari peerani Jesoshi. Ainiro yora Jose ijinatsori, opajita Maria. Isareacaro irayero, iro cantaincha tequera irineero. Iro cantaincha otsomontetaque: iro otsomontetantacari otasoncaquero Ishire Tasorentsi. ¹⁹Iro iotantacari Jose otsomontetaque, iquenqueshireaca iriori: “Te oncameetsateji tsinane. Timatsiata oneayetiri. Eiro nairotsi”. Iro cantaincha

icameetsataque, icoaque incavintsayero Maria, te irininteji iroashiventayero; iquenqueshiretanaca: “Eiro nocamantajeitiritsi oshanincapee, ishirontimentarocari. Apaniro noncantero irointi: ‘Eiro meeca naimpitsi’”.²⁰ Irootaque iquenqueshiretanakeri, irosati imapocantacari inampire Tasorentsi, ineamainetaqueri. Icantapaaqueri:

—Jose, tempa aviro ishanincani Irvirini, eiro piquenqueshireatsi. Tecatsi onee shirampari pijinatsori. Iro otsomontetantacari otasoncaquero Ishire Tasorentsi.²¹ Coajica ontimeri otomi, pimpajiteri iriori Jesoshi. Iro pimpajitanteariri Jesoshi iroavisacojeiteri antayetirori caari cameetsatsati.

²²Iro intimanteari iriori omoncaratan-teari isanquenatiniri peerani camantantatsiniri Isayashini. Irio Avincatsarite sanquenatacaqueriri. Jero oca icantineri:²³ “Coajica ontsomontetashitanaquea caari neiri shirampari, ontimeri otomi. Impajiyeeeteri Emanoe”. Iro Emanoe ocantaneanequi arori: “Itsipajeitaquee Tasorentsi”.

²⁴Ari itinaanaca Jose, iquemisantaquero icantaqueriri. Ijatashitaquero Maria, icantaquero:

—Ari coajica naasanotempi.

²⁵Iro cantaincha tequera irineeroji: iro caariquera ineantaro, tequera intimeji otomi. Itimantacari, ipajitaqueri Jesoshi. Impojiquea yaasanotaquero.

Ipoqui ioyevetariri impoquiro irineeri Jesoshi.

2¹Ari itimapaque Jesoshi anta Verequi. Otimi Vere anta Joreaqi. Itimantacari Jesoshi, irio pincatsariventantatsiri Eroreshi. Ari yareetapaaca Jerosarequi poneajeitachari pashiniqui quipatsi, anta arejiqui. Iquenapaque anta iquenapainta catsirincaiteri. Ishiavetari saserotepee, ioyevetari impoquiro-

pee, paitaricapee.² Isampitapaaqueri jerosaresati:

—¿Jaoca yora ivincatsarite joriopee, yora iroaquera timaintsiri? Noneaqueri anta nonampiqui impoquiro iotacaanari itimaque. Meeca nopoqui nompincatsateri.

³Iquemantacariri yora pincatsari Eroreshi, iquenqueshireanaca, aisati iquempejeitaca maaroni jerosaresati.

⁴Impoiji yora Eroreshi icajemacantajeitaqueri maaroni jivatacaajeitaqueriri saserotepee aisati maaroni yora oametantajeitirori sanquenarentsi. Isampijeitaqueri:

—¿Paita ocantiri Sanquenarentsi? ¿Jaoca intimapeeri yora Quirishitotatsiri?⁵ Yacajeitanaqueri:

—Ocantiri Sanquenarentsi intimapaque Verequi, aca Joreaqi. Irootaque isanquenatacotitacariniri peerani yora quenquetsatantantatsiniri pajitachaniri Miqueashi:⁶ “Otimi Vere anta Joreaqi. Eiro itseencajeitirotsi ora nampitsi. Tempa imponeaquea anta Pincatsarisanori. Impincatsariventajeiteri maaroni joriopee”.

⁷Impoiji imanaquero Eroreshi icajemacantaqueri yora coatsiri irineeri Jesoshi. Isampijeitaqueri:

—¿Jaoca ocaratiri pineantacariri impoquiro pioletantacari itimapaque pincatsari? Pincamantasanotena niotasannotantearori itimantacari.

⁸Ari icamantaqueri. Impoiji icantaqueri aisati:

—Cameetsa pijajeite meeca Verequi, pamenaiteri jaocarica isavicasanotaqueri yora jananequi. Ariorica pineapaaqueri, pimcocaaje aisati aca, pincamantapeena. Nocoaque noneeri narori, nompincatsatanteariri.

⁹Ari ijajeitanaque. Nianqui inejiriri aisati impoquiro ineaqueri chapiniqui anta iponeacanta. Ijivatanaqueri

impoquiro anta itimaquenta jananequi, impoiji yaratincapaaque anta, iojeitan-tapaacarori ivanco. ¹⁰Iquimoshireimetasanotacari impoquiro iotacaajeitaqueriri. ¹¹Impoiji ijatanaque pancotsiquinta, iqueapaaque. Ineapaaqueri Jesoshi, aisati iriniro. Itiyeroashitapaacari Jesoshi, ipincatsatapaqueri. Impoiji itatareapaajiro itsivoote, yaajiro ashirotsatsiri pajitachari oro. Opinatasanotaca. Aisati yaajiro casancayetatsiri, ipajeitapaqueri. ¹²Impoiji imaajeitanaque irioripee. Ineamainetaqueri Tasorensi, icantaqueri:

—Eiro pipianajatsi anta Eroreshiqui; ariorica pimpianaje piipatsitequi, pinquenanafe pashiniqui avotsi.

Ishiajeitanaca Ejipitoqui Jose, jero Maria; yaanaqueri Jesoshi.

¹³Ari ipiajeitanaja yora iovetariri impoquiropee. Impoiji aisati yora Jose ineamainetaqueri inampire Avincatsarite. Icantapaaqueri:

—Meece pijajeite: avrori, yora jananequi, aisati iriniro. Pishiajeitanaque Ejipitoqui. Pisavicajeitapaaque anta irosati noncantantempiri. Irotaintsi incoayeteri Eroreshi yora jananequi. Icoaque iroyeri.

¹⁴Irosati ijajeitantanaca, nianquitiensiteneri. Yaanaqueri jananequi anta Ejipitoqui, itsipatanacaro iriniro. ¹⁵Ari osamanitanaque isavicajeitapaaque anta. Impoiji icamaque Eroreshi. Iquemacotaqueri icamaque, irosati ipiajeitantaja anta iipatsitequi. Irootaque peerani isanquenatacotaque-niri oca yora quenquetsatataantatsiniri pajitachari Oseashi. Iriotaque Avincatsarite sanquenatacairiri. Isanquena-tini: “Icanti Tasorensi: ‘Intimavetea notomi anta Ejipitoqui, noncajemajeri impiaje aisati’”.

Yora Eroreshi yoacantaqueri jananequipee.

¹⁶Impoiji ionirotanaque Eroreshi yamatavitaqueri yora iovetariri impoquiropee: te impiajeji aisati. Ari iquisasano-tanaca, itiancaqueri soraropee, icantiri:

—Pijajeite anta Verequi, poajeiteri maaroni jananequipee, pintsoncajeiteri maaroni shirampari: iroaquera timayeta-tsiri, maaroni; aisati poajeiteri moncaraanchari apite irosarintsite, maaroni.

Ja, icantaqueri chapiniqui yoranquiqui tequera irimoncarateroiji Jesoshi apite irosarintsite. ¹⁷Aisati isanquenatacotaque-roni oca yora quenquetsatataantatsiniri pajitachaniri Jeremiashi: ¹⁸“Oncajemacotasanoteri aramasato otomipee, oshequiraacojeiteri. Ompajitea Araquere iraacoterineri otomipee. Iro oashiretan-teari iroteetero otomipee, maaroni”.

Ipianaja Jose Nasaretequi, yaanajiri Jesoshi aisati iriniro.

¹⁹Ari impoiji icamaque Eroreshi, ainiroquera isaviqui Jose iriori anta Ejipitoqui. Impoiji ineamainetajiri aisati inampire Avincatsarite, icantaqueri:

²⁰—Tsame pimpianaje anta piipatsitequi, paanajeri jananequica aisati iriniro. Camaque meece coavetachari iroyerime.

Ari ipajijeitirori iipatsite Jose iipatsiteni Ishiraerini. ²¹Ari ijatanaji, yaajeitanajiri anta iipatsitequi. ²²Iro cantaincha yareetantajari Jose, icaman-teetiri:

—Irio pincatsariventajeitiriri meece joreasati yora Arequero. Ipoyeetajari iririni: yora Eroreshini.

Ari aisati itsaroacaapaacari Jose yora pincatsaritajantsiri, aisati ineamaineta-queri Tasorensi, icantiri:

—Paamayeariyea yora Arequero.

Irosati yovaantanaja Jose anta Carireaque. ²³Yareetapaaca, isavicaapaque nampitsiqui pajitachari Nasarete.

Irootaque omoncaratantacari isanquena-tacotiteetacariniri Jesoshi: “Imponeaquea Quirishito Nasaretequi”.

**Yora Joa vaotisantantsiri
iquenquetsatacantapiniti anta
caaraiteriqui.**

(Mr. 1.1-8; Ir. 3.1-18; Joa 1.19-28)

3¹Ari impoiiji ijataque Joa, yora vaotisantantsiri ora caaraiteriqui: ora carireaquiniri. Iquenquetsatacaapinitiri ishaninca, ²icantapinitiri:

—Pinquenqueshirejaitanaquea, eiro piquempejeitajatsi peerani: paventajeiteari meeca Tasorentsi, irotaintsi impincatsariventajitee.

³Ari peerani iquenquetsatacotaquerini Joa yora quenquetsatacaantatsiniri pajiveitachaniri Isayashi. Jero oca isanquenatacotaqueriniri Joa: “Coajica inquenquetsatacaajeiteri ishaninca anta caaraiteriqui, incanteri: ‘Paamayeariyea Avincatsarite, pincameetsatanaque paacameetsatavacaajeitanteari”.

⁴Irio iquitsaataru Joa tijachari iviti cameyo. Irio ishiticatsaquitari meshinantsitsa. Yoapinitari quentori aisati irapinitiri ija pitsi. ⁵Ijatashijeitaqueri maaroni jerosaresati iquemisantajeitavaqueri, aisati maaroni joreasati aisati maaroni savicajeitatsiri Joriraniqui.

⁶Icantajeitapaaqueri:

—Ainiro nantayetiri caari cameetsatsi. Nocoaque incavintsayena Tasorentsi, iroavisacotajena.

Impoiiji ivaotisajeitavaqueri Joa Joriraniqui.

⁷Aisati ipocajeivetaca variseopee aisati saroseopee, icoajeivetaca irivaotisajeiteame, iro cantaincha iquisatsatavaqueri Joa. Icantavaqueri:

—Te pincameetsajeitejive, quempejeitaquempi maranque. ¿Pijitashijeivetampa eiro yoasanquejeitimpitsi Tasorentsi?

⁸Picoajeitaquerica novaotisajeitempi, ari

cameetsa pisavicajeite niotanteari pojocasanotaquero caari cameetsatsi pantapiniijeitiri. ⁹Picantajeivetaca: “Narojeitaque ishanincani Avaramani, aitaque irineacameetsataquena Tasorentsi”. Pamatavitaja avisati. Incoaquericame Tasorentsi, impeajerome oca mapi ishanincani Avaramani, iro cantaincha eiro ojatitsi inquitequi. Aisati piquempejeitaca avirori: patsipetashijeitacaro pishanincavetacari Avaramani. ¹⁰Tempa achaquitapinitiro inchatopee caari timatsi oitsoqui, impoiiji ataaajeitajiro. Aisati inquempetea Tasorentsi, irotaintsi iroasanquejeiteri maaroni caari antiniri icoacaajeivetariri. ¹¹Ariorica niotaque yojocajeitiro atiripee caari cameetsatsi yantajeitaqueri, novaotisajeitaqueri nijaqui. Iro cantaincha timatsi impoitapeeneneri: intiancajeiteneri iriori quemisantajeiterineri Ishire Tasorentsi, irinti tseencantatsiri iroasanquejeiteri. Oshequi ipincatsaritaque irinti impoiteneneri. Oshequi nopincatsataqueri; notseencaja narori catsini. ¹²Ariorica aviitero aroso, impoiiji antincaiquitero. Otaqui antayero, irointi oitsoqui anquempoyeajero onantariqui. Aisati inquempetea Avincatsarite, irinashitacaajeitajeari atiripee: incavintsayeri quemisantajeiterineri, irintiquea caari cameetsatsine irojocajeri paamariqui, ora caari tsivacanetatsi.

Ivaotisataca Jesoshi.

(Mr. 1.9-11; Ir. 3.21-22; Joa 1.31-34)

¹³Impoiiji ijataque Jesoshi Joriraniqui, iponeanaca Carireaquei. Ijatashitaqueri Joa, irivaotisatantavaqueariri. ¹⁴Te incoaveteaji Joa irivaotisateri, icantavaqueri:

—Eiro novaotisatimpitsi avinti. Aviroquea vaotistapeenane avinti. ¿Paita picoantari novaotisatavaquempi avirori? Oshequi pipincatsaritaque.

¹⁵Yacanaqueri Jesoshi:

—Nocoasantaque pivaotisatavaquena. Irootaque icoacaquenari Tasorentsi.

Icantaqueri:

—Ari, novaotisataquempi.

¹⁶Ari ivaotisataqueri, impoiji yaatanaji. Impoiji iriori Jesoshi, ineavaquero Ishire Tasorentsi, oponeaca inquitequi, aniireashitapaqueri, oshiavetapaacari sampaquiti. Aatapaqueri. ¹⁷Impoiji iquemajeitaqueri Tasorentsi anta inquitequi, icanti:

—Iriotaque yoca notomi nonintasanotaqueri. Oshequi noveshireimentacari.

**Yora camaari icoavetaca irantacayerime
Jesoshi caari cameetsatatsi.**

(Mr. 1.12-13; Ir. 4.1-13)

4 ¹Impoiji Ishire Tasorentsi aanaqueri Jesoshi anta ocaraitapai. Aitaque ocoaqueri irineantaveteari camaari. Icoavetaca camaari irantacayerime Jesoshi caari cameetsatatsi. ²Ari itimaque Jesoshi anta ocarataque 40 quitaiteri, te iroyeaji catsini. Aasanotaqueri itashe. ³Impoiji yora camaari ijatashitaqueri Jesoshi, irineantapeempariri. Icantaveta-paacari:

—Avirosanotaquerica Itomi Tasorentsi, jentsite, pimpeero mapica pitantane, poantearori.

⁴Yacanaqueri Jesoshi:

—Te apaniro oncoiteimotee atantane, irointi acoaque anquemisantero maaroni icantaqueeri Tasorentsi.

⁵Impoiji yaanaqueri camaari anta Jerosarequi: anta ochoviinaquiitapaaque ivanco Tasorentsi. ⁶Icantavetacari:

—Avirorica Itomi Tasorentsi, pisapocanaque oshaavijinta quipatsiqui. Pinquencheshireero ocantiri Sanquenarentsi: “Intianquempiri Tasorentsi inampire inquempoyempi. Irancatsatavajempi eiro pipariantatsi mapiqui”.

⁷Yacanaqueri:

—Aisati ocanti Sanquenarentsi: “Eiro pineantaritsi Pivincatsarite, tempa irio Tasorentsi”.

⁸Aisati yapiivetajari camaari, yaanajiri antearoqui toncaari. Ijicotapainiri maaroni quipatsi, icantavetari:

—Pineajeitaqueri maaroni savicajeitatsiri, aisati tempa ocameetsajeitaque maaroni imajeitaqueri. ⁹Ariorica pimpincatsatena narori, noncamantajeiteri maaroni impincatsajeitempi avirori.

¹⁰Yacanaqueri aisati:

—Pijanerotaje. Avironiro Satanashi. Tempa ocanti Sanquenarentsi: “Pimpincatsatanoteri Avincatsarite, tempa iriotaque Tasorentsi. Apaniro irinti catsini pinquemisanteri”.

¹¹Irosati ijatantanaja camaari. Impoiji ipocaque inampirepee Tasorentsi, intacojeitacari.

Ijataque Jesoshi Carireaquei.

(Mr. 1.14-15; Ir. 4.14-15)

¹²Impoiji iquemaque Jesoshi yoyeetaqueri Joa caravosoqui, irosati ipiantanaja Carireaquei. ¹³Iro cantaincha te irisavicapeeji Nasaretequi, ainti ijataque Caperenaoui, isavicapaaque anta. Otimi Caperenaoui anta otsapijaqui antearoja incajare. Otimi quempeji Savorono aisati Nejatari. ¹⁴Aisati isanquenatacotaqueroni oca yora Isayashini peerani: ¹⁵“Otimi Savorono aisati Nejatari otsapijaqui incajare, anta Joriraniqui intatiquero, anta Carireaquei. Anta itiminta oshequi itsipapee atiri, caari inajeiti jorio. ¹⁶Oquempetimojeivetacari itimini tsiteniriqui, te iriojeiveitearini Tasorentsi. Irijajeiteme Sharincaveniqui, iro cantaincha meca oquempetaca itimi quitaitetacojeitiriri, iotacaajeitiriri”.

¹⁷Ari intanacarori Jesoshi iquenquetsatacaajeitaqueri atiri anta, icantajeitaqueri:

—Pinquencheshirejeitanaquea, eiro piquempetajatsi peerani. Irotaintsi impincatsariventajitempi Tasorentsi.

Icoyeaqueri Jesoshi aparopee iroamere.*(Mr. 1.16-20; Ir. 5.1-11)*

¹⁸Ari ishiteatanaca Jesoshi anta otsapijaqui incajare: ora timatsiri Carireaq. Ineapaaqueri apite shirampari, yora Shimo Petero, jeri aisati irirenti, yora Antirishi. Irio quitsatapinitiriri shima. Ineapaaqueri Jesoshi, iquitsajeti, ¹⁹icantapaaqueri:

—Tsame poijatanaquena. Nocoaque pinquemisantacaapiniteri atiri.

²⁰Irosati yojocajeitantanacaro iitsarite, yoiijajeitanaqueri. ²¹Ari yavishimatanaque irosati ineantapaacari Santiaco aisati Joa. Iriojeitaque itomipee Severeo. Isavicajeiti ivitoqui, ishiticajeitiro iitsarite. Icajemapaaqueri Jesoshi, ²²irosati yoiijajeitantanacari. Yojocajeitanaqueri iriri apaniro anta ivitoqui.

**Iquenquetsatacantayeti
Jesoshi anta Carireaq.***(Mr. 1.39; 3.7-8; Ir. 4.40; 6.17-19)*

²³Iquenaquenayetanaque Jesoshi anta Carireaq. Maaroni nampitsiqui iquenquetsatacaajeitaqueri atiri anta pancotsiqui yapatotapinijeitantari. Icantiri atiri jaoca icanta Tasorentsi ipincatsariventajeitaquee. Yoavisaacojeitaqueri oshequi mantsiaripee: onashiyetaca aayetiriri imantsiare. ²⁴Iquemacojeitaqueri Jesoshi yora savicajeitatsiri anta arejiqui: iotacotaqueri maaroni shiriasati. Yaajeitanaqueneri Jesoshi oshequi ishaninca mantsiyetatsiri iroavisacojeiteri. Yojoquiiyetaca, icatsiyetaque, icamanatapiniyetaque, iquisoporoquietaque. Aisati yaanaqueneri neayetiriri camaari. Ari yoavisacojeitavaqueri Jesoshi. ²⁵Yoiijajeitaqueri oshequi carireasati, tecaporishisati, jerosaresati, joreasati, poneayetachari Joriraniqui intatiquero.

Iquenquetsataque Jesoshi anta toncaariqui: iquenquetsatacotaqueri quimoshirejeitatsineri.*(Ir. 6.20-26)*

5 ¹Ineajeitaqueri Jesoshi icarajeitaque oshequi apatotimentajeitariri, ari ijataque toncaariqui, isavicaapaque anta. Yora iroamerepee yapatojeitaqueri atiri, maaroni. Icantajeitaqueri ishoncajeitapaacari. ²Impoiji yoamejeitaqueri, icantajeitaqueri:

³—Inquimoshiretacaajeiteri Tasorentsi maaroni caari shemetatsi, impincatsariventajeiteri. ⁴Inquimoshiretacaajeiteri Tasorentsi maaroni oashirejeivetainchari, iroimoshirencajeiteri. ⁵Inquimoshiretacaajeiteri Tasorentsi maaroni ashinoncaincari, incavintsaajeiteri. ⁶Inquimoshiretacaajeiteri Tasorentsi maaroni coasanotatsiri intime cameetsa, iramitacojeiteri. ⁷Inquimoshiretacaajeiteri Tasorentsi maaroni cavintsaajeitiriri ishaninca, incavintsaasanojeiteri iriori.

⁸Inquimoshiretacaajeiteri Tasorentsi maaroni cameetsashirejeitatsiri, irineajeitajeri. ⁹Inquimoshiretacaajeiteri Tasorentsi maaroni oimajerentajeitaqueriri quisachari, intomintajeitari. ¹⁰Ariorica pincameetsatanaque, irootaque inquisantempiri, ari pinquimoshiretanaque: aviro savicasanotatsineri anta ipincatsaritinta Tasorentsi.

¹¹Iriotempirica atiri piquemisantajeitaquena, incantimatempi, inquisaquempi, intseeyacotaquempi. Ari pinquimoshirejtanaque.

¹²Pinquimoshirejtanaque, piveshireajeitanaque: impinatasanojeitempi Tasorentsi anta inquitequi. Eiro pipeacotarotsi: tempa peerani iquisheetirini iriori yora camantantatsineri.

**Yora quemisantatsiri ishiaquero
tivi aisati tsiomentotsi.***(Mr. 9.50; Ir. 14.34-35)*

¹³Aisati icantajeitaqueri Jesoshi:
—Tempa ativitapinitiri ivatsa eiro ishititantatsi. Irompa terica ompoteate,

ontimaite: tempa ari ajocajero, tecatsi coyeroneri. Piquempejeivetacaró tivi: avirojeitaque oameetsajeiterineri atiri. ¹⁴Ariorica otimi nampitsi anta toncaariqui, otsiota maaroni pancotsipee tsiteniriqui. Tecatsi ancantero nampitsi amanero, tempa oconijatasanoti. Aisati piquempejeitacaró, aviro oamejeiterineri maaroni atiri: eiro pimanirotsi piojeitiri. ¹⁵Aisati, ariorica pintsiotero pitsiomento, te pimanapiniteroji otapinaqui cantiri. Tempa poapinitiro anta onantariqui yamenajeitantari maaroni savicajeitatsiri pancotsiqui. ¹⁶Aisati aviroripee, cameetsa pisavicajeitanaque irineajeitantempiri maaroni pishaninceapee oameetsataque maaroni pantajeitaqueri. Impoiji irineacameetsajeitantariri Apa savicatsiri inquitequi.

**Iquenquetsatacotaquero Jesoshi
isanquenareni Moishishini aisati yora
quenquetsatacaantatsiniri.**

¹⁷Aisati icantajeitaqueri:
—Eiro pijitashijeitatsi nocoaque nojocacaajempiro piquemisantiro isanquenare Moishishi aisati icantajeitiniri yora quenquetsatacaantatsiniri. Iro cantaincha nocoaque noamejeitempiro icantasanojeitaqueri. ¹⁸Queariotaque oca noncamantempiri: ontsoncajearica quipatsi aisati inquite, iro cantaincha eiro otsonquimatatsi catsini isanquenajeitaqueri. Omoncarataquea maaroni icantaqueri. ¹⁹Eirorica piquemisan-tasanotiro isanquenatiniri, aisati ariorica poameteri pishaninca eiro iquemisantasano-tiro, eiro inecameetsatasanoimpitsi Tasorentsi anta ipincatsaritinta. Iro cantaincha ariorica pinquemisantasano-ta-queri maaroni isanquenajeitiniri, aisati ariorica poamejeiteri pishaninca inquemisantasanojeitero, ari pimpincatsariventasa-notantapaaaje anta ipincatsaritinta Tasorentsi. ²⁰¿Pijitashijeitacarimpa icameetsajeita-que yora oametantirori sanquenarentsi aisati yora variseopee? Meecca noncamantempi: te

irimoncarajeiteroiji icoacaajeivetariri Tasorentsi. Eirorica panaacojeitiritsi pincameetsatasanote, eiro pijatitsi anta ipincatsaritinta Tasorentsi.

**Icantajeitaqueri Jesoshi:
“Piquisavacaacariya”.
(Ir. 12.57-59)**

²¹Aisati icantajeitaqueri:
—Piojeitaquero icantiniri yora intacaro-niri: “Eiro poanti. Ariorica poante, iroasanquetayempi Tasorentsi”. ²²Iro cantaincha noncamantempi: eiro piquishiritsi pishaninca: yoasanquetaimpicari Tasorentsi. Eiro picantiritsi: “Te pioteji”: iquishimpicari yora oametavacainchari. Eiro picantimatiritsi pishaninca: pitaacari anta Sharincaveniqui. ²³Pamene, ariorica pijate anta ivancoqui Tasorentsi poaqueneri pivira pimpanteariri; iro cantaincha otimirica iquishimentaquempi pishaninca, ²⁴aritsita icantavacatsita pivira, pijatashiteri yora quisaquempi. Pincamanteri: “Eiro napiitajirotsi caari cameetsatsi. Pincavintsayena aacameetsatavacaajeitantajeari”. Ariorica cameetsa paacameetsatavacaajea, ari pimpianaje ivancoqui Tasorentsi, irosati pimpantapeempariri pivira. ²⁵Ariorica intime quishempineri aanaquempineri anta joeshiqui. Ari pishintsite pincantajeri: “Eiro piquisajanatsi, tsame aacameetsatavacaajea aisati”. Ariorica irareetacaapaquempi joeshiqui, incanteri variria: “Paanaqueri yoca”, impoiji iroiminqeacquempi anta caravosoqui. ²⁶Impoiji eirorica pipinatasano-tiri maaroni pirevitiriri, eiro yoimisoquija-cantajimpitsi aisati.

**Icantajeitiri Jesoshi: “Paimentarocari
pijina; paimentaricari pijime”.
(Mt. 19.9; Mr. 10.2-12; Ir. 16.18)**

²⁷Aisati icantajeitaqueri:
—Piojeitaquero icantaqueri intacaroniri: “Eiro paimentarotsi pijina, eiro paimentaritsi pijime”. ²⁸Noncamantempi nainti: ariorica

piniveatearo tsinane aisati pinquenqueshiretero pantero, ainiro pantane; aitaque pinquenqueshiretaquea paimentearo pijina. ²⁹Noshiacantempiro: ariorica antacayempi poquisanori caari cameetsatsi, pinquitsoreero, pojocajero. Te pininteji catsini ojatacayempi Sharincaveniqui. Tempa ocameetsati pijanaroquitashitea anta inquitequi. ³⁰Ariorica antacayempiro pacosanori caari cameetsatsi, pimpesajero, pojocajero. Te pininteji catsini ojatacayempi Sharincaveniqui. Tempa ocameetsati pijacaraquitana je anta inquitequi. Pineaquero, te oncameetsateji catsini pampitapinitero caari cameetsatsi. ³¹Aisati icantaqueni yora intacarori: “Ariorica pincoaque pojocajero pijina, pisanquenatenero paperi pojocantajea-rori, ari moncarataca”. ³²Iro cantaincha noncantempi nainti: eiro catsini pojocajirotsi pijina. Ariorica pojocajero pijina, aisati paaje pashini, aitaque paimentaquearo pijinasanori: paavioncaque pijina. Aajerica aisati pijina ontime antane: aimenteari ojimesanori. Aisati yora aajeroneri, ontime irantane. Irointiquea apatiro ocameetsaveta pojocajero ariorica aimentaquempi, tecatsi pashini.

Icanti Jesoshi: “Eiro pamatavirititsi pishaninca catsini”.

³³Aisati icantaqueni Jesoshi:

—Piojeitaque ocantini Sanquenarentsi. Oametaquerini ashanincani: “Pintseeyarica, eiro picantashitatsi: ‘Ioti Avincatsarite nomoncaratempiro maaroni nocantaquempiri. Ariorica namatavitimpi, iroyenata’. Ariorica pincante: ‘Ioti Avincatsarite nomoncaratero maaroni nocantaqueni’, ari pimoncaratero, maaroni”. ³⁴Irotaque isanquenatiniri peerani. Iro cantaincha nocantimpi nainti: ¿paita pincoanteari pincante: “Ioti Avincatsarite queario oca nocantaqueni”? Ocameetsataque pimoncaratasanotaquero maaroni picantaqueni. Eiro aisati picantitsi: “Tempa ocantani otimi inquite, aisati noquempeta narori, nocantani tampatica noneanati”. Noncantempi nainti: iro inquite isavicantari

Tasorentsi; iotimpi, ioti queariorica picantaqueni. ³⁵Aisati eiro picantitsi: “Tempa ocantani otimi quipatsi, aisati narori nocantani tampatica noneanati”. Noncantempi narori: itsoteiro Tasorentsi quipatsi, iotimpi; ioti queariorica picantaqueni. Eiro picantitsi: “Tempa ocantani otimi Jerosare, aisati narori nocantani tampatica noneanati”. Noncantempi: ipincatsariventajetitiri Tasorentsi jerosaresati, iriotaque pincatsarisanori. Ioti queariorica picantaqueni. ³⁶Eiro picantitsi: “Eiro notseeyatsi, irosati noncamantaquea, noncanteani tampatica noneanate”. Tempa irio Tasorentsi cantatsine jaocarica oncarate ancame. Pimpincatsateri irinti, irio iotimpiri pitseeyanirica. ³⁷Eiro pitseeyatsi, eiro pamatavitantitsi. Queariorica pantero paitapeerica, pincante: “Je, nantero”. Eiorica pantirotsi, pincante: “Eiro nantirotsi”. Moncarataca. Te oncameetsateji pishequiyero pineane pamatavitanteariri itsipapee.

Icantiri Jesoshi: “Eiro pipiataritsi quishepineri”.

(I. 6.29-30)

³⁸Jero aisati icantajeitaqueririri Jesoshi:

—Aisati icantaqueniri iriori yora intacaroniri: “Ariorica pinquitsoreero iroqui itsipa, ocameetsati impiatacoventajeari inquitsoreitempiro poqui avirori. Ariorica pijireiteri pishaninca iraji, ocameetsati impiatacoventajeari, irijireitempiro paji avirori”. ³⁹Iro cantaincha noncantempi nainti: eiro pipiataritsi quisajeitaquempiri, irointi ariorica impasavorotempi acaqueroca, pishineteri aisati otsipa pivoro impasatero aisati. ⁴⁰Ariorica incoaque atiri iraitempiro piitsaare, pimpavaqueni aisati poicoro. ⁴¹Ariorica imperanatempi paanajeneri irovaararo aparoni quirometero, poavisa-yeneri apite quirometero. ⁴²Ariorica incantapeempi pishaninca: “Pimpenaro”, ari pimpavaqueni. Aisati, ariorica incantempi: “Pimpashitavaquenarota

oca”, ari pimpashitavaqueari, eiro pitsaneapitsataritsi.

Icantiri Jesoshi: “Pinintajeiteri quisajeitaquempiri, pincavintsaajecteri”.

(*Ir. 6.27-36*)

⁴³Aisati icantajeitaqueri:

—Aisati icantaqueni yora intacaroniri: “Pininteri pishanincasanori, pincavintsayeri. Irintiquea quisaquempiri, pinquisaqueri iriori”. ⁴⁴Iro cantaincha noncantajeitampi nainti: pinintajeiteri maaroni quisajeitaquempiri, pincavintsayeri, pincerteri Tasorentsi incavintsayeri, maaroni. ⁴⁵Irootaque icoacaajeitaqueriri Tasorentsi maaroni quemisantajeitiriri itomintajeitacari. Tempa iriotaque vetsiquiriri catsirincateri: yovoreacojeitaqueri maaroni atiri, cameetsajeitatsiri aisati caari cameetsajeitatsi. Aisati incani, yoariajeitaqueneri maaroni atiri: yora quemisantatsiri aisati caari quemisantatsi. ⁴⁶Ariorica pincavintsayeri apaniro yora cavintsaimpiri, ¿píjítimpa irineacameetsatempí Tasorentsi? Tempa ioti tseencantatsiri icavintsavacaajeita iriori. ⁴⁷Ariorica pincavintsayeri apaniro yora shanincatanajojeitimpíri, ¿páita pishemanteari? Aitaque iojeiti maaroni caari ioterine Tasorentsi icavintsavacaajeita iriori. ⁴⁸Pincameetsatanotanaque catsini, pinquempejitanavaqueari Apa Tasorentsi: tempa icameetsatanotaque irinti catsini.

Yoamejeitaquee Jesoshi jaoca ancanteari ancavintsaaente.

6 ¹Aisati icantajeitaqueri Jesoshi: —Eiro pishiacantanirotatsi piquemiantani, eiro piquemiantamempeatsi pamatavitantearirime atiripee. Ariorica irineaquempi Apa Tasorentsi pishiacantata, eiro inecameetsatimpitsi iriori. ²Ariorica pimpashiteari ashinoncaincari coiteimojeitacariri, eiro picamantajeitiri-

tsi itsipapee. Irootaque yamenirojeitari yora shiacantavetachari iquemiantani. Ariorica ipiri ashinoncaincari paitarica, icamantajeitaqueri quemisantajeitatsiri, aisati savicajeitatsiri anta nampitsiqui. Icoanrojeitaque iriori irineacameetsajeteri ishaninca. Ariorica irineacameetsaveteari ishaninca, iro cantaincha moncarataca: eiro inecameetsatiritsi iriori Tasorentsi, tecatsi impinateri. ³Ariorica pincavintsayeri ashinoncaincari, pimanaquero: eiro piotacaajeitiritsi itsipapee. ⁴Ari iriotaque Tasorentsi irinti, impinatempí irinti.

Yoamejeitaquee Jesoshi jaoca ancanteari anquenquetsatocayeri Tasorentsi.

(*Ir. 11.2-4*)

⁵Aisati icantajeitaqueri:

—Ariorica pinquenquetsatocayeri Tasorentsi, eiro piquempetaritsi shiacantavetachari: icoaque iriori incatiye anta yapatojeitanta atiripee, aisati anta nampitsiqui nianqui, irineantanirojeitavaqueariri ishanincapee. Queario oca noncamantempiri: moncarataca. Ariorica irineacameetsajeteri ishaninca, iro cantaincha eiro inecameetsatiritsi Tasorentsi. ⁶Ariorica pinquenquetsatocayeri, pijate apaniro pivancoqui, pashitacotanaquea tsompoina, impoiiji pinquenquetsatocayeri Apa. Irineaquempi apaniro irinti, irineacameetsatempí, impinatempí. ⁷Ariorica pinquenquetsatocayeri, eiro pineanatashiveeta, vero, vero, vero. Aitaque yametaró caari iotiri Tasorentsi, ineaveetashita. Ijítashiveeta ariorica irineanatashiveeta, ari inquemiantaqueri. ⁸Queariyea, piquempejitaricari avirori. Iotasanotiro Tasorentsi maaroni coiteimojeitaquempiri. Tequerata pincerteri, iotitacaro coiteimotaquempiri. ⁹Ariorica pinquenquetsatocayeri Tasorentsi, ari pinquempejitaricari avirori oca: Apa, savicatsiri inquitequi,

oshequi nopincatsatasanojeitaquempi.

¹⁰ Pimpincatsariventajeitena narori.
Nocoajeitaeque aca quipatsiqui nomajei-
tempiro maaroni pincoacaajeitenari,
nonquempeteari pinampirepee anta
jenoqui:
tempa imajeitaquempiro iriori
maaroni picoacaajeitaqueriri.

¹¹ Pimpapinijeitena noyeari coiteimota-
quenari.

¹² Ainiro nantajeitiri caari cameetsayetatsi,
iro cantaincha eiro poasanquetimen-
tanarotsi,
iroidinti nocoajeitaeque pincavintsaajei-
tena.

Aisati narori noncavintsaajeiteri
noshaninca
antanajeitenaneri paitapeerica, eiro
noquishiritsi iriori.

¹³ Eiro pishinetiritsi yora camaari
irineantajeitena,
eiro pishinetiritsi irantacaajeitena
caari cameetsatatsi.

Pincantaitiyempani pimpincatsari-
ventajeitena.
Pincantaitiyempani pintasoncaven-
tajeitena.

Aisati narori, noncanteani nompinca-
tsajeitempi, maaroni.

Irootaeque nocantaquempiri, ari.

Icantiri Jesoshi:

“Pincavintsaajeiteri itsipapee”.

¹⁴ Aisati icantajeitiri:

—Ariorica pincavintsayeri quisajeita-
quempiri, incavintsaajeitempi avirori Apa
savicatsiri inquitequi. ¹⁵ Iro cantaincha
eirorica picavintsairitsi pishaninceapee,
eiro icavintsaajeitimpitsi Apa.

**Yoamejeitaqueri Jesoshi jaoca incanteari,
ariorica intitimenteari Tasorentsi.**

¹⁶ Aisati icantajeitiri:

—Aisati, ariorica pintitea pinquenqueshi-
retanteariri Tasorentsi, eiro piotacaajeitiritsi

itsipapee. Eiro piquempetaritsi yora
shiacantachari iquemisanti: ariorica
ititapinita, yoashirevorotashitaca iriojeitan-
teari ishaninca itita. Yatsipetashitacaro, te
inquenqueshireteriji Tasorentsi, iroidintiquea
icoaque incavintsaajeiteri ishaninca. Eiro
ipinatiritsi Tasorentsi. ¹⁷ Ariorica pintitimen-
teari Tasorentsi pinquenqueshiretanteariri,
cameetsa pinquishitea, pinquivavorothea
aisati, ¹⁸ oncanteata eiro iotanta pishaninca
pitita. Apaniro iriotempi irinti Piri
jenoquiniri, impinatempi irinti.

Icantiri Jesoshi:

**“Pimpiotero pivaararo anta inquitequi,
pinquenqueshireteri Tasorentsi”.**

(Ir. 11.34-36; 12.33-34)

¹⁹ Aisati icantajeitiri Jesoshi:

—Eiro pipiotiroti pivaararo aca quipatsi-
quica: opatsaaranticari, aisati icoshiyeetim-
picari. ²⁰ Aintiquea pimpiotero pivaararo
anta inquitequi: eiro ainti opatsaitsi, aisati
eiro ainti icoshiyeetajimpitsi. ²¹ Ariorica
ontime pivaararo aca quipatsiqui, pinquen-
queshiretapinitero timajeitatsiri aca
quipatsiqui; iro cantaincha ontimerica
pivaararo inquitequi, pinquenqueshiretapi-
niteri Tasorentsi. ²² Otimi poqui pamenan-
tari, otimantari piotantari. Oshiaquero
tsiomentotsi pitsiotapinitantari tsiteniriqui
pineantari. Ariorica ocameetsataque,
piojeitanaque, ²³ iro cantaincha eirorica
ocameetsati, eiro pamenitsi, eiro piotitsi,
pintime tsiteniriqui. Aisati oquempetaca,
ariorica pinquenqueshiretapinitero caari
cameetsatatsi, eiro piotiritsi Tasorentsi, ainti
pintime tsiteniriqui.

**Icanti Jesoshi: “Ariorica pantaveetanontea
avisati, tecatsi pincantea panteneri
Tasorentsi icoacaquempiri”.**

(Ir. 16.13)

²⁴ Pashini aisati icantiriri Jesoshi:

—Tecatsi pincantea pintsameeteneri
apite pivatorote, aisati oquempetaca:

ariorica panteneri Tasorentsi icoacaa-quempiri, irompa ariorica pantaveetanontea avisati paantearori pivaararo. Tecatsi pincantero apite. Pineaquero, ariorica pinintasanoteri Tasorentsi, eiro picoitsi pivionquero pivaararo. Aisati, ariorica pincoaque pivionquero pivaararo, eiro picoitsi pinquemisanteri Tasorentsi.

Icantiri: “Eiro piquenqeshiretatsi, irinti pinquenqeshireteri Tasorentsi”.

(Ir. 12.22-31)

²⁵Aisati icantajeitiri Jesoshi:

—Meeca noncamantajeitempi: eiro piquenqeshiretapinitirotsi paitapeerica poayeteari, pirayeteri, pinquitsaatapiniteari, paitapeerica. ¿Irompa pitimantari poapinitearo poari? Te iro pintimantea, tempa iro pitimantari pinquenqeshireteri vetsicanaquempiri. ¿Irompa otimantari pivatsa pinquitsaatero, poaneenquero? Te iro ontimantea. Irointi pitimajeitanta piojeiteri Tasorentsi, aisati panteneri icoacajaiteaquempiri. ²⁶Pamenajeiteri yora tsimeripee: te impanquitanonteaji, aisati te irantanonteaji ivanco irivioncantearori ivanquire. Iro cantaincha ipapinitiri Apa Tasorentsi yoari maaroni quitaiteriqui. Ari icavintsairi maaroni quitaiteriqui; tempa avinti icavintsasaanotaquempi, eiro yoashinoncaimpitsi. ²⁷Ariorica pinquenqeshirete, ¿arimpa pimatero pishequiajero pisarintsite? Eiro. Patsipetashita piquenqeshiretashita. ²⁸¿Paita piquenqeshiretantarori piitsaare, paitarica pinquitsaateari? Pamenajeitero oteapee tojari, te onquenqeshireteaji irointi: “¿Paita nonquitsaateari?” Te onquiriqueji, aisati te ontijeji, ²⁹iro cantaincha, oshequi oaneencaca. Pamene, peerani oshequi yoaneencaveitani yora pincatsariveitachaniri Saromoni, iro cantaincha te inquempetasanotearoji oteaquee: oshequi oaneencasanota

irointi. ³⁰Tempa irio Tasorentsi oaneenquirori oteaquee tojari, iro cantaincha eiro osamanititsi ontime, impoji tempa itaapinyeetiro, pomei. Irompa avinti, pintimajeiteni peerani: tempa iroaneencasanotempi avinti. Pishireteari, eiro pitseenquiritsi. ³¹Eiro picantashiretitsi, eiro picantitsi: “¿Paita ayeari? ¿Paita ireri? ¿Paita anquitsaateari?” ³²Icoajeitiro ocapee yora tseencajeitantatsiri. Iro cantaincha iojeitimpi Piri jenoquiniri, iojeitiro coiteimojeitaquempiri. ³³Irioquea pijivate pimpincatsateri, aisati pincanteri iroameetsashiretempi, impoji-quea impainijeitempiro coiteimojeitaquempiri. ³⁴Ari eiro piquenqeshiretirotsi osaitequera, paitarica panteri. Irintacotempi osaitequera, aisati maaroni quitaiteriqui. Timatsi aquenqeshiretaqueri meeca quitaiteriqui, te oncameetsateji anquenqeshiretero aisati osaitequera.

Icantajeitiri Jesoshi:

“Eiro picantimatiritsi itsipapee”.

(Ir. 6.37-42)

7 ¹Aisati icantajeitiri Jesoshi: —Eiro picantimatiritsi pishaninca. Ariorica pincantimateri itsipapee, icantimpicari Tasorentsi: “Ainiro pantane avirori”. ²Ariorica anquisaqueri itsipapee, ari inquisavaquee arori; aisati oquempetaca, ariorica ancavintsayeri itsipapee, incavintsayee arori. ³Otimirica pantayetiri avirori, te oncameetsateji pincanteri pishaninca avirori: “Ainiro pantane”. Jero oca noshiaaventempiri: ariorica pitijaquitaca quimota avinti, ¿arimpa pineaquero itijaquiro pishaninca ovane quipatsi capichaji? ⁴¿Ocameetsatimpa pincanteri: “Jentsite, naajempiro pitijaquiro”? Eiro pineirotsi. ⁵Oshequi picantashitaca. Pijivate pojoquero inchatora jocaquempirira avirori, impoji pamenaje paantajanariri itijaquiro pishaninca. Aisati pincoaquericapincanteri pishaninca

irojocajero yantayetiri, pijivate pojocajero caari cameetsatatsi pantayetiri avirori. ⁶Te pimpapiniteriji otsiti cameetsatanotatsiri ivatsa. Aisati te pimpapiniteriji chanco marereatatsiri mapi iroyearo, eiro icoitsi iroyearo. Tempa ari iraticavaquerome, irovitsintavaquerome, impoiji inquisacotaquearo iroyeari, irantsiquimentaquempiro. Aisati oquempetaca, ocameetsati irineane Tasorentsi. Ocameetsati pinquenquetsatacayeri itsipapee ashaninca, iro cantaincha ariorica inquisishmentempiro, incanteata.

Icantiri Jesoshi: “Te pantsipetashiteaji piquenquetsatacairi Tasorentsi”.

(*lr. 11.9-13*)

⁷Aisati icantiri Jesoshi:

—Ariorica pincerteri Tasorentsi, irimatempiro paitarica pincerteriri. Pincoayetajero paitarica, impoiji pineajero. Ariorica pareetea pancotsiqui, pincantapaaqueri savicatsiri: “Pashitareenaro”, ari irashitareaquempiro. ⁸Aitaque ipapinjeyitiri Tasorentsi maaroni coacotiriri. Aisati ariorica pincoayetanaque, iramenacayempiro. Ariorica pincerteri: “Pashitareenaro”, ari irashitareaquempiro. ⁹Ariorica incantempi pitomi: “Apa, pimpena noyeyari”, çarimpa pimpaqueri mapi? ¹⁰Ariorica incantempi: “Pimpena shima noyeyari”, çarimpa pimperi maranque iroyeyari? ¹¹Pineaquero, te pincameetsatanoyejeyi, iro cantaincha piojeiti picavintsapinitiri pitomipee. Irinti Apa savicatsiri inquitequi icameetsatanotaque, ioti irinti catsini icavintsaajectaqueri maaroni quenquetsatacaajeyitiriri.

**Icantajeyitiri Jesoshi:
“Pincavintsaajectaajeyitea”.**

(*lr. 6.31; 6.43-46*)

¹²Aisati icantajeyitiri:

—Ariorica pincoaque incavintsaajectemipi pishanincapee, ari pincavintsaajecteri avirori. Pincoaquecame iroashinon-

caajeyitempime, ari poashinoncaajeyiterime avirori. Irootaque isanquenatiniri yora Moishishini aisati maaroni camantantatsiniri.

Iquenquetsatacotiro Jesoshi apite avotsi.

(*lr. 13.24*)

¹³Jero aisati ishiacantiniri Jesoshi:

—Pincoaquericca pinqueapaaquero ivanco Tasorentsi, pinqueapaaquero orijani omoro. Ainiro pashini avotsi, antearo irointi, te ompomerentsiteaji anquenantearo, aisati anta ocaratapainta otimi omoro antearo. Iro cantaincha maaroni quenayetanaintsine anta irashinoncaajeyitea anta Sharincaveniqui. Icarajeyiti iriori oshequi. ¹⁴Iro cantaincha timatsi ora orijani avotsi, aisati orijani omoro. Oshequi opomerentsitaca irointi, itimi aparopee quenantarori. Iro cantaincha irareetea irinti Tasorentsiqui, incantaitiyempani intime irioriqui.

**Iquenquetsatacotiri Jesoshi
amatavitantatsiri.**

(*lr. 6.43-44*)

¹⁵Aisati icantajeyitiri Jesoshi:

—Queariompia, yamatavijeyitimpicari shiavetariri quenquetsatacotiriri Tasorentsi. Pishiacantiricari ovisha, pijiticari tecatsi incantempi; iro cantaincha noquempetacantaqueri nainti maniti: oshequi icovencati. ¹⁶Pamenasanoteri yantayetiri, piotanteariri icameetsatarica. ¿Otimantarompa tojari ova? Teve, te ontimantearoji. ¿Otimantarompa iyera? Aisati te omateroji. Aisati iquempejeita yora amatavitantatsiri: tecatsi incantero irimatero cameetsayetsitiri. ¹⁷Inchato cameetsari otimi oitsoqui cameetsari, ari avaquearo. Iro cantaincha terica oncameetsateji inchato, te ontimeji oitsoqui cameetsari. ¹⁸Ora inchato cameetsari, tecatsi oncantero ontimero oitsoqui caari cameetsatatsi. Aisati caari

cameetsatatsi inchato, tecatsi oncantero ontimero cameetsatatsiri oitsoqui. ¹⁹Tempa achaquitapinitiro inchato caari oitsoquitatsi, ataapinitiro. ²⁰Aisati piojeiteri maaroni coatsiri iroamejeitempi. Piotaque ocameetsatirica yantayetiri, ari cameetsa aisati yoametantiro irineane Tasorentsi. Irompa terica oncameetsateji yantayetiri, te oncameetsateji aisati yoametanti.

Jaoca icantari iotasanotiriri Jesoshi.

(Ir. 6.47-49; 13.25-27)

²¹Pashini aisati icantiriri Jesoshi:
—Ainiro inaveta oshequi cantashitanari: “Aviro novincatsarite, oshequi nopincatsatimpi”. Iro cantaincha eiro ijajeititsi iriori anta nompincatsaritentia. Irinti jatasanotatsineri anta inquitequi maaroni yora antasanotiniriri Apa icoacaajeitaqueriri. ²²Ariorica nompincatsaritanotanaque nampatojeiteri maaroni atiri noncantacoventajeitantee-riri. Intime oshequi cantashitenaneri: “Novincatsarite, oshequi noquenquetsatacotaquempi. Nocantaqueri neiriri camaari: ‘Paventeari Jesoshi pavisacotantajeiri’. Aisati nocantaqueri noshaninca: ‘Irio Jesoshi matacaanarori notasoncantayeti’”. ²³Iro cantaincha noncanteri narori: “Te niotempiji, te noshanincatempiji. Tsame pijate arejiqui, oshequi pantayetiro caari cameetsatatsi”. ²⁴Pamene, ariorica pinquenqueshiretero maaroni nocantaquempiri, aisati ariorica pantenaro maaroni nocoacaquempiri, ocameetsati. Ontime piotanteari, pinquempeteari vetsiquirori ivanco mapiqui. ²⁵Opariaque incani, ooncanaca. Aisati otimi antearo tampea otatsincavetanacaro, iro cantaincha te aaveeroji. Iro caari aaveantaro, yovetsiquiro mapiqui, oquisotasanotaque. ²⁶Aisati oquempetaca avirori, eiorica piquenqueshiretiro maaroni nocantaquempiri, aisati eiorica

pantanaro maaroni nocoacaavetimpiri, te oncameetsateji. Eiro otimitsi piotanteari. Pinquempeteari vetsiquirori ivanco anta impanequiqui. ²⁷Opariaque incani, ooncanaca. Aisati otimi antearo tampea, otatsincanaquero. Ojaraaquero, jaran; otsoncanaquero, aanaquero, poyere. Tempa yatsipetashitacaro yora vetsicavetarori. Eiro patsipetashitarotsi avirorirjei piquemajeitaquena, irointi pantasanotero nocoacaajeitaquempiri.

**Yovecarataquero Jesoshi
iquenquetsatacaajeitiri
apatotimentajeitariri.**

(Mr. 1.22)

²⁸Irootaque icantajeitaqueriri apatotimentajeitariri anta toncaariquiqui, ari yoajeitanaqueri cavaco maaroni. Icantajeiti:

²⁹—Oshequi ioti irinti, oshequi ipincatsariti, cameetsa yoamejeitaquee; te inquempeteariji yora oametantavetarori Sanquenarentsi.

Yoavisacotiri Jesoshi patsaatsiri.

(Mr. 1.40-45; Ir. 5.12-16)

8 ¹Ari iquenquetsatacanti Jesoshi anta toncaariquiqui, impoiji yoirincapaaja, yoijsajeitaqueri oshequi atiri. ²Ari ijatashitaqueri aparori shirampari patsaatsiri, itonquiotavacari, icantavaqueri:

—Novincatsarite, pincoaqueric poavisacotajena, niotaque aitaque pimatajenaro.

³Ari yacotanaque, ipamitaqueri, icantiri:

—Aitaque nocoaque. Aitaque pavisacotanaje meeca.

Irosati yavisacotantanaja. ⁴Ari icantaqueri Jesoshi:

—Eiroya picamantitsi, irointiquea pantero icantiniri peerani Moishishi: pijatashiteri saserote, pincamanteri irinti: “Nopatsaaveitani, iro cantaincha pamena-

jenate, avisacotajana: te aneajeroji meeca novatsaaro”. Ari iramenavaquempi, impoiji iroyeri pivira, intayeneri Tasorentsi, iriojeitanteari ashanincapee pavisacotaji.

Ari ijatanaque.

**Yora Jesoshi yoavisacotiri
inampire capitano.**

(*lr. 7.1-10*)

⁵Ari yovaanaja Jesoshi, aisati yora oijajeitiriri, impoiji yareejeitapaaca Caperenaoqui. Itonquiotavacari aparoni capitano, yora ivincatsarite oshequi soraro. Caari ini jorio yora capitano.

⁶Icantavaqueri:

—Novincatsarite, ainiro nonampire anta novancoqui, te irimatajeaji irishevatajea, aisati oshequi icatsitaque. Catsiqueti oanaqueri. Nocoaque poavisacoteri.

⁷Ari yacanaqueri:

—Aitaque nojataque noavisacotajeri.

⁸Iro cantaincha icantiri:

—Oshequi nopincatsataquempi: te noncameetsateji, eiro pintsipatapaanatsi anta novancoqui. Ariorica pincante iravisacotanaje, niotaque ari iravisacotanaje: patsipetarocari pijate novancoqui. Oshequi pipincatsariti. ⁹Timatsi peranatanari, aisati itimi soraro noperanajeitacari narori. Ariorica noncanteri soraro: “Pijate”, ari irijataque. Ariorica noncanteri itsipa: “Pimpoque”, ari impoque. Ariorica noncanteri nonampire: “Jerocha panteri”, ari irimataquero. Aisati onquempetaquea avirori, aitaque onmoncarataquea paitarica pincanteri.

¹⁰Ari yoanaqueri Jesoshi cavaco, icantajeitiri oijajeitiriri:

—Queario oca noncamantempiri: oshequi catsini iquemisantasannotaque yoca, yanaacojeitaqueri maaroni jorio iquemisanti. ¹¹Coajica anta ipincatsarintinta Tasorentsi intime oshequi itsipapee

atiri poneayetachaneri otsipapeequi quipatsi. Incarajeiteri Avarama, Isaca, Jacovo, maaroni. ¹²Iro cantaincha eiro itimitsi oshequi jorio anta. Icoacaavetacari Tasorentsi intsipajeitearime anta ipincatsarintinta, iro cantaincha oshequi itseencajeitaqueri, irootaque intiancajeitanteariri anta otsitenitasantintinta. Oshequi anta iroashinoncaajeitea, oshequi inquematsicatearo.

¹³Ari icantiri yora capitano:

—Meeca pijataje pivancoqui. Piquemisantari, irootaque iravisacotantajeiri pinampire.

Irosati yavisacotantanaja inampire.

Yoavisacotiro Jesoshi irairo Petero.

(*Mr. 1.29-31; Ir. 4.38-39*)

¹⁴Ari ijatanaque Jesoshi ivancoqui Petero. Ineapaquero irairo, ojoquiitaca, aaquero catsiirentsi. ¹⁵Ipamitapairo acoqui, irosati avisacotantaja. Otinaanaja, irosati opantavacariri iroapeempari.

**Yoavisacojeitiri Jesoshi oshequi
pashinipee atiri.**

(*Mr. 1.32-34; Ir. 4.40-41*)

¹⁶Ari ishaavijiitanaque catsirincaiteri, irosati yamantajeitapaacari oshequi neiriri camaari. Ari iquenquetsatacaavaqueri, irosati yavisacojeitantajeri. Aisati yoavisacojeitaqueri oshequi joquiijeitachari. ¹⁷Aitaque itsataaquero Jesoshi maaroni iquenquetsatacotiniri peerani Isayashini: “Coajica iroavisacojeiteri Quirishito oshequi mantsiyetatsiri, oshequi incavintsaaajeiteri”.

**Icantajeitiri Jesoshi atiripee:
“Poijajeitanaquena”.**

(*lr. 9.57-62*)

¹⁸Ari inaejeitavaqueri Jesoshi oshequi catsini apatotimentajeitacariri, irosati icantantariri iroamerepee:

—Tsame ajajeite intatiquero incajare.

¹⁹Ari icantiri oametantirori Sanquenarentsi:
—Oametanari, jaocarica pijateri,
nocoaque noijatanaquempi.

²⁰Yacanaqueri:

—Yorari parari aiinro imoro imaantari,
aisati yora tsimeripee aiinro yaatantari
imaantari. Noponeaca narori anta inquitequi,
natiritapaaque, iro cantaincha te aneroji
novanco nainti nomaanteari. Patsipetashita-
cari poijatanaquena, pashinoncaacari.

²¹Icantiri pashini iroamere:

—Novincatsarite, nocoavetaca nojatem-
pime, iro cantaincha incamaquetsita apa:
impoiijuea quiso noanaquempi.

²²Iro cantaincha icantaqueri:

—Pojjatenata, impoiji ariorica incame
piri, aiinro tijerineri itseencaririnte: yora
caari iotiri Tasorentsi.

Yora Jesoshi ipeaquero antearo tampea.

(*Mr. 4.35-41; Ir. 8.22-25*)

²³Ari itetanaca Jesoshi pitotsiqui, icarajeita-
queri iroamerepee. ²⁴Ari imaanaque Jesoshi.
Nianquijaqui omapocashijeitacari iroamerepee
antearo tampea, otejatapaaca omotoncane.

²⁵Ari ijatashitaqueri, yoisaaquireaqueri,
icantaqueri:

—Novincatsarite, jentsinocanti ampiin-
quenive: poavisacojeitena, aisati poavisa-
cotajea avirori.

²⁶Ari itinaanaca, yacanaqueri:

—¿Paita pitsaroantacari? ¿Paita caari
piquenqueshiretasanotantana?

Impoiji ipeajiro tampea, aisati ipeajiro
omotoncane. Opeasanotanaja tampea,
opeasanotaja omotoncane. ²⁷Ari yoajeita-
naqueri cavaco, icantavacaanaca:

—¿Jaoca icantari yoca? Pineaquero ipeajiro
tampea, aisati ipeajiro omotoncane, maa.

**Yoavisacojeitiri Jesoshi
pashinpee neiriri camaari.**

(*Mr. 5.1-20; Ir. 8.26-39*)

²⁸Ari yareejeitanaca intatiquero,
yaatocotapaaque. Opajita nampitsi

Carara. Ari iponeaca tijaariqui apite
neiriri camaari, itonquiotavacari Jesoshi.
Yora camaari, oshequi iquisacaacari
neiriri, irootaque itsaroacaajeitancari
ishaninca, te inquenantajeero tijaariqui.

²⁹Icantavaqueri camaari:

—¿Aviro? Niotaquempi, aviro Itomi
Tasorentsi. ¿Paita pipocashitantanari?
¿Irompa pipocashitantanari meeca
poashinoncayena? Tequera omoncara-
teaji nonquematsicatantearori anta
ishaaviji.

³⁰Ari itimi anta oshequi chanco,
yoajeitanta. ³¹Icantiri camaari:

—Ariorica poavisacoteri neanarica,
pintianquena anta chancoqui,
nonijapeempari iriori.

³²Ari icantiri:

—Pijate, pinijapeempari iriori.

Ari ijatanaque, ineavaqueri iriori
chancho, irosati ishajeitantanaca
imperitaqui, ipiincajeitanaque incajare-
qui, tsapo, tsapo, tsapo, tsapo. Itsitiajeita-
naque, pomiririri, poyere. ³³Ari
ineavaqueri shentajeivetariri, ishajeita-
naca. Ijatanaque nampitsiqui, icamanta-
paaqueri ishaninca maaroni oca
ineaqueri. ³⁴Ari ijatashijeitaqueri
maaroni savicajeitatsiri, icantapaaqueri
Jesoshi:

—Tsame pijataje: eiro pipocajitsi aca
nonampiqui.

Yoavisacotiri Jesoshi caari shevatacha.

(*Mr. 2.1-12; Ir. 5.17-26*)

9 ¹Ari itetanaja aisati Jesoshi
pitotsiqui, icarajeitiri iroamerepee.
Ipiajeitanaja inampisanoriqui. ²Ari
yameetaqueneri caari shevatacha,
yamacotaqueri shitashintsiqui. Iotaque
Jesoshi oshequi iquemisantaque,
irootaque icantantavacari:

—Piveshireanaquea, noshaninca, meeca
noavisacotempi; eiro noquishimentimpirotsi
caari cameetsatatsi pantayetiri.

³Ari iquemajeitaqueri oametantirori Sanquenarentsi, icantavacaajeitanaca: —Ijitasorentsitacateemi Jesoshi.

⁴Ari iotaque iriori iquenqueshirejeitiri, icantajeitiri:

—¿Paita piquisashirejeitananari?

¿Paita pitseencajeitananari? ⁵Ariorica noncantaqueri yoca: “Meeca noavisacotempi, paniitanaje”, tempa ari pamenajeitavaqueri, sorerere. Eirorica nomatirotsi, ari pishirontimentena. Iro cantaincha pijitashijeitaca nocantashitari: “Noavisacotempi, eiro noquishmentimpirotsi caari cameetsatatsi pantayetaqueri”.

⁶Nocoque piojeite te noncantashiteaji. Noponeaca narori inquitequi, natiritapaaque. Icantaquena Apa: “Poavisacotenari antirori caari cameetsatatsi, impoiji eiro aquishmentajiritsi aisati yantayetiri”. Nocoque piojeite ainiro notasorenca.

Ari icantiri caari shevatacha:

—Pincatianaje, paanajero pishitashi, pijataje pivancoqui.

⁷Ari icatianaja, cati; ijatanaji ivancoqui.

⁸Ineajeitavaqueri maaroni apatojeitainchari, yamenajeitavaqueri sorerere. Itsaroajeitanaque, aisati icantajeiti:

—Tempa icameetsati Tasorentsi, imatacaaqueeri yoca yoavisacotajiri mantsiaripee.

Icantaqueri Jesoshi Mateo:

“Poijatanaquena”.

(*Mr. 2.13-17; Ir. 5.27-32*)

⁹Ari yovaanaja Jesoshi anta nosaviquinta narori. Ineapaaquena naitayetiri noshaninca iirequite nompan-teariri oromasati. Icantapaaquena:

—Tsame, poijatanaquena avirori.

Ari nocatianaca, noijatanaqueri.

¹⁰Impoiji naanaqueri anta novancoqui, noacaapaacari. Ari nocajemiri Jesoshi, itsipa iroamerepee, yora notsipajeitari napatojeitiniri oromasati iirequite, itsipapee caari quemisantatsi, maaroni.

Ari noajeitaca. ¹¹Ari ipocashitaquena yora variseopee, icajemiri itsipapee iroamere Jesoshi, isampijeitiri:

—¿Paita yantiri yora oamejeitimpiri?

Jeri yoacaajeitacari apatotiniriri oromasati quirequi, aisati icarajeitiri caari cameetsajeitatsi. Te oncameetsateji.

¹²Ari iquemaque iroamere, impoiji ijatashitaqueri Jesoshi, icamantapaaqueri; impoiji icantanaque iriori:

—Yora caari mantsiatatsi te incoyeji iravintea, irintiquea mantsiyetatsiri coatsiri iravintea. ¹³Tsame pijajeite pinquenqueshirejeitero icantiri Tasorentsi: “Te noncoyeji poapinitenari pivira, pintaapinitenari; irointiquea nocoasantaque pincavintsaajeiteri pishaninca”. Te iro nompocantea nonquemisantacaajeiteri cameetsayetatsiri, irintiquea caari cameetsajeitatsi.

Irootaque icantiriri Jesoshi variseopee.

Icantantiri Jesoshi paita caari ititanta iroamerepee.

(*Mr. 2.18-22; Ir. 5.33-39*)

¹⁴Impoiji ipocaraantaque iroamerepee Joa, isampitapaaqueri Jesoshi:

—Pamene, notitapinita noquenqueshiretantariri Tasorentsi, aisati iquempetaca yora variseopee; irintiquea poamerepee avirori, te intitimateaji. ¿Paitaquea?

¹⁵Ari yacanaqueri:

—Piojeitaque yamejeitari yora iroaquera aatsi ijina: icajemajeitaqueri ishaninca, yoacaajeitacari, iveshireimentajeitacari iriori. ¿Paita iroashiretanteariri icajemacantiri? Iro cantaincha, ariorica irijatanaque arejiqui, impoijiquea iroashirejeitanaquea, intijeitanaquea. Aisati narori, coajica nojataje, impoijiquea iroashirejeitanaquea, intijeitanaquea noamerepee. ¹⁶Aisati, otimirica piitsaare iroaquerari, te pintsereroji pimpataquero peesatotaintsiri pimaatsara. Ariorica poavitajero, eiro omoncaratavacaatsi. Aisati ariorica

pinquivajero oshirincamaotanaque
 iroaquerari, antsivianaquea peesatotaintsiri,
 ontsereanaque. ¹⁷Tempa apeantantaro
 iroaquerajari pearentsi imeshinaqui
 iroaquerari, impoiji antsitacotaquero eiro
 aparajatanta. Ariorica oshimoretanaque,
 aravoncanaque, ontapiaqueri imeshina.
 Iroaquerarica ini, eiro ipesacotitsi, aisati eiro
 aparajatatsi: tempa iroaquera ini. Irooricame
 ampeantantajearome pearentsi iroaquerajari
 peesatitatsiri imeshina, tempa ari iraravon-
 canaqueme, intoncanaqueme, ton. Aitaque
 intsereanaqueme, aisati amparajatana-
 queame iroaquerajari, chararara. Iroaquera
 oni oca noamejeitimpiri, te oncameetsateji
 onconyearo peeraniniri poamejeitiriri
 avirori.

Irootaque icantaqueriri Jesoshi.

**Yoavisacotiro Jesoshi irajatatsiri
 aisati yoitinaajiro camaintsiri.**

(*Mr. 5.21-43; Ir. 8.40-56*)

¹⁸Irosati ipocashitantacari pincatsarita-
 tsiri, itiyeroashitapaacari Jesoshi,
 ipincatsatapaqueri; icantapaqueri:

—Camaque nishintio, iro cantaincha
 nocoaque pijate novancoqui pimpamita-
 peero aneantajeari.

¹⁹Ari yojatanaqueri Jesoshi, nocarajei-
 tanaqueri narori, maaroni iroamerepee.
^{20,21}Ari anta nianqui avotsi onevaquena
 tsinane, ocarataque 12 osarintsu ashinon-
 caaca: ocantani irajataquenive.
 Oquenqueshiretaca: “Ariorica nantita-
 queri iitsaare Jesoshi, ari navisacotanaque”.
 Ari oquenapaaque itapiiqui, antitaqueri
 ovarashiqui iitsaare. ²²Ari ipitsocanaca,
 ineaquero, icantaquero:

—Piveshireanaquea, noshaninca,
 piquemisantaque, irootaque pavisacotan-
 tajari.

Ari avisacotaji.

²³Ari novaajeitanaja, nareejeitapaaca
 ivancoqui pincatsari, noneapaaqueri
 shiovitacoventirori camaintsiri, aisati

oshequi ashaninca, icajemajeitanaque.

²⁴Ari icantajeitiri Jesoshi:

—Pijajeitanaque. Te oncameji oca
 piraacojeitiri, irointi omai.

Ari ishirontimentajeitacari, iji, iji, iji.

²⁵Ari isoquijajeitanaque, irosati iqueanta-
 paaca Jesoshi. Yajiricavacotapaquero,
 irosati otinaantanaja. ²⁶Irosati iquenque-
 tsatacojeitantacari maaroni savicajeita-
 tsiri.

**Yamenacaajiri Jesoshi
 apite caari amenatsi.**

²⁷Ari novaajeitanaja aisati, itimi anta
 apite caari amenatsi. Yoijatanaqueri
 Jesoshi, icantajeitiri:

—Tempa aviro ishanincani Iravirini.

Pincavintsaaajena.

²⁸Ari noqueajeitapaaque pancotsiqui,
 aisati iriori yora caari amenatsi. Ipocashi-
 jeitaqueri Jesoshi, impoiji icantavaqueri:

—¿Paamaacampa ari nomatero

namenacaajeitajempi?

Icantiri:

—Je, novincatsarite; nioti ari pimata-
 jena.

²⁹Irosati ipamijaquitantacari,
 icantaqueri:

—Pishiretaquena, irootaque noavisaco-
 tantempiri.

³⁰Irosati yamenajeitantanaja, iro
 cantaincha icantasanotaqueri:

—Eiroyea picamantiritsi itsipapee:

“Yamenacaajana Jesoshi”.

³¹Iro cantaincha ijajeitanaque, icaman-
 tajeitaqueri maaroni inaejeitaqueri:

—Yamenacaajana Avincatsarite.

Ineanatacaajiri Jesoshi caari neanatatsi.

³²Ari impoiji, jeri ipocapaaque neiriri
 camaari, te irimateroji irineanate. ³³Ari
 itianquiri Jesoshi yora masontitacaaveita-
 riniri, ineanatacaajiri. Ari yoajeitanaqueri
 cavaco maaroni amenajeitaqueriri,
 icantajeiti:

—Peerani, te aneapiniteriji quempetearine yoca.

³⁴Iro cantaincha icantanrojeiti yora variseo:

—Yamitacotiri ivincatsarite camaari, irootaque imatantacariri iamaaririnte itianquiri.

Oshequi icavintsaajeitaqueri Jesoshi atiripee, icoaque inquemisantajeite.

³⁵Ari oshequi iquenaquenayetanaque Jesoshi maaroni nampitsipeequi, yoametapinijeitiri noshaninca anta yapatotapinijeitanta. Iquenquetsatocotapinitiri Tasorentsi, jaoca icanta ipincatsariventanti. Yoavisacojeitiri maaroni: tecatsi ompomerentsitimoteari, imataquero maaroni mantsiarentsipee.

³⁶Ari ineaqueri oshequi catsini atiri yapatotimentajeitacari, oshequi icavintsaajeitaqueri. Icanti:

—Oshequi yashinoncaajeitaca, tecatsi intacotearine. Iquempejivetacari ovisha yora caari ishenteeti.

³⁷Impoiji icantajeitana:

—Oquempetaca otimi oshequi oitsoqui panquirentsi, iro cantaincha te intimeji oshequi aviiteroneri. ³⁸Pincantajeiteri Pivincatsarite intiancajeitanteari oshequi quenquetsatacaajeiterineri ashaninca, quemisantacaajeiterineri.

Imatacaajeitaqueri Jesoshi iroamere yoavisacojeitaqueri neiriri camaari aisati mantsiyatatsiri.

(Mr. 3.13-19; Ir. 6.12-16)

10 ¹Ari icajemajeitaquena Jesoshi, maaroni itsipapee iroamerepee, nocarajeiti 12. Imatacaajeitaquena noavisacojeitaqueri neiriri camaari, nojocacoventajeitaqueri iamaarite. Aisati imatacaaquena noavisacojeitaqueri maaroni mantsiyatatsiri.

²Ari itiancajeitaquena nomayetero imatacaajeitaquenari. Ari nocarajeitiri

Shimo, irosati ivajiro aisati Petero; jeri Antirishi, irirenti Petero; Santiago, yora itomi Severeo; Joa, yora irirenti Santiago; ³Jeripi; Varitorome; Tomashi; aisati narori: narotaque apatoveitanariniri oromasati iirequite; Santiago itomi Arejeo; Tareo; ⁴Shimo, icantiri aisati Sheraroro; jeri aisati yora Jorashi Ishicariote, yora aacaanrerineri coajicani Jesoshi.

Itiancajeitaqueri Jesoshi iroamerepee inquenquetsajeite.

(Mr. 6.7-13; Ir. 9.1-6; 10.3-11)

⁵Ari itiancajeitaquena Jesoshi, icantavaquena:

—Eiro pijatashitiritsi yora itsipapee atiri, aisati eiro pijatitsi anta itiminta samariasati. ⁶Irintiquea pijatashijeite maaroni ajorioririnte. Noshiantajeitaqueri ovisha yora caari ishenteeti. ⁷Jaocarica pinquenayetanaqueri, pinquenquetsatacaajeiteri atiripee. Pincamantajeiteri: “Irotaintsi impincatsariventajeitee Tasorentsi”. ⁸Poavisacojeiteri mantsiaripee, pointinaajeitajeri camayetatsiri, poavisacojeiteri patsaayetatsiri aisati neayetiriri camaari. Oshequi nocavintsaajeitaquempi, iro cantaincha tecatsi noncoacojeitempi. Meeca pincavintsaajeiteri itsipapee, iro cantaincha tecatsi pincoacojeiteri avirori. ⁹Eiro paanaqueritsi piirequite, ¹⁰pitsarate, otsipa piitsaare, pisapatote, piotiquiro, tecatsi catsini. Tempa ocameetsati incavintsaajeitempi maaroni yora pincavintsaajeiteri avirori: ocameetsati impashijeitempi maaroni coiteimojeitaquempiri. ¹¹Ariorica pareetea nampitsiqui, pincoapeeri quemisantanotatsiri; pisaviquimoteri iriori irosati povaantana-jeari otsipapeequi nampitsi. ¹²Ariorica pareetapaaquea, pineacameetsajeitapeeri savicajeitatsiri. ¹³Ariorica irineacameetsajeitavaquempi iriori, pincanteri Tasoren-

tsi incavintsasaanoteri. Iro cantaincha terica irineacameetsatemp, eiro picantiritsi incavintsayeri. ¹⁴Eirorica ineacameetsatavaquemp, aisati eirorica iquemisantavaquemp, ari povaanajea. Pincantanaqueri: “Te pinquemisantavaquena, ari coajica iroasanquejeitempi Tasorentsi”. ¹⁵Queariotaque oca noncantempiri: coajica, ariorica incantacoventajeiteri Tasorentsi maaroni atiri, iroasanquetaajeiteri maaroni soromasatini aisati maaroni comorasatini. Iro cantaincha iroasanquetaasanojeiteri catsini maaroni caari neacameetsajeitempine, oshequi irashinoncaajeitanaquea. ¹⁶Meeca nontiancajeitempi, iro cantaincha oquempetaca notianquiri ovisha anta itiminta covencari: oshequi iroashinoncaajeitempi tseencantatsiri. Pinquenqueshirejeitanaquea, eiro catsini poashinoncairitsi pishaninca.

Irootaque icantajeitavaquenari Jesoshi.

Icamantajeitiri Jesoshi iroamerepee:
“Coajica oshequi inquisajeitempi itsipapee”.

(Mr. 13.9-13; Ir. 21.12-19)

¹⁷Aisati icantajeitanaquea Jesoshi:

—Queariompia, yoashinoncaimpicari ashaninca. Iraajeitanaquemp anta yoametavacaajeitanta pincatsaripee iroasanquetaacantantempiri. Aisati irajeitanaquemp ashanincapee anta yapatojeitanti, impasanatapinitemp.

¹⁸Iriojeitempirica piquemisantajeitanaquea, iraanajemp anta itiminta ivincatsaritepee itsipapee ashaninca, impoiji pinquenquetsatacaajeiteri iriojeitantenari itsipapee ashaninca.

¹⁹Ariorica irajeitanaquemp, eiro piquenqueshireatsi, eiro picantitsi: “¿Paitampa noncanteriri?” Narotsitaquea nainti oamejeitempineri paitarica pincanteriri. ²⁰Eiro piotashitatsi avirori pinquenquetsatayeri, irointi Ishire

Tasorentsi oametasanotempineri pinquenquetsatayeri. ²¹Coajica oshequi inquisavacamentajeitanaquea atiripee. Aparo iroacanteri irirenti, pashini iroacanteri itomi, aisati itsipapee iroacantayeri ashiyetariri. ²²Piquemisantajeitanaquea, irootaque inquisajeitantempiri pishanincapee, iro cantaincha eiro poipacairotsi piquemisanti. Ariorica pincanteani pinquemisantena, noavisacajeitempi, cameetsa pisaviquimojeitena anta inquitequi.

²³Ariorica inquisajeitempi savicajeitatsiri aparoni nampitsiqui, ari pishianaque, povaanajea otsipaqui nampitsi. Queario oca noncantantempiri: eirotsitarica pitsoteiro maaroni nampitsi isavicantari ajorioririntepee, aisati nompiapaaje narori. Tempa noponeaca narori inquitequi, natiritapaque. ^{24,25}Ariorica irimoncaraveteari iroamere oametiriri iriote, iro cantaincha eiro yanaacotiritsi. Aisati ariorica irimoncaraveteari nampirentsi yora nampitariri ipincatsariti, iro cantaincha eiro yanaacotiritsi. Ari meeca oshequi iquisajeitanaquea ashaninca, ijitashijeitanaquea naro ivincatsarite camaari. Piquemisantajeitanaquea, tempa irootaque inquisajeitantempiri avirori, ²⁶iro cantaincha, eiro pitsarocaaajeitaritsi. Meeca te iriojeiteji maaroni nopincatsaritaque, iro cantaincha coajica iriotasanojeitanaque maaroni; irineajeitanaquea nompincatsaritanotanaque, aisati pincarajeitena avirori. ²⁷Meeca apaniro nocamantajeitanaquemp, te iriojeiteji yora tseencantatsiri, iro cantaincha coajica notacaajeiteri. Meeca nomanavetacaro, iro cantaincha coajica noncamantasanojeiteri maaroni. ²⁸Irimajeivetearo iriori iroajeitanaquemp, iro cantaincha eiro pitsarocaaaritsi: tecatsi incantemp intianquemp Sharincaveniqui. Irinti pimpincatsatanoteri Tasorentsi: incoaquericari iriori irimatajeru

iroajempi aisati intianquempi Sharincaveniqui. ²⁹Pamene, te impinateaji tsimeripee, iro cantaincha terica incoacayeri Apa incame, eiro icamitsi aparoni, catsini. ³⁰Iotiro jaoca ocaratiri piishi, iotasannotimpi catsini. ³¹Pineaquero, oshequi panaacojeitiri tsimeripee, oshequi iquenqeshiretaquempi. Meeca eiro pitsaroitsi. ³²Ariorica pincerteri ashaninca: “Nopincatsataqueri Jesoshi”, aitaque anta inquitequi noncanteri Apa: “Ipincatsataquena iriori, noshanincatacari”. ³³Iro cantaincha pincerteririca ashaninca: “Te nompincatsateriji Jesoshi”, ari anta inquitequi noncanteri Apa: “Te impincatsatenaji yora, te nioteriji narori”.

³⁴Aisati icantana Jesoshi:

—Eiro pijitashitanatsi nopoqui iraacameetsatavacaajeitanteari maaroni savicajeitatsiri. Te iro nompocantea iraacameetsatavacaajeitanteari, irointi inquisavacaajeitanteari. ³⁵Irointi nopocanta inquisanteariri shirampari iriri, onquisantearori tsinane iniro, onquisantearori tsinane airo, ³⁶inquisanteariri shirampari ishanincasanori. ³⁷Tempa ocameetsati pinintajeiteri piri aisati piniro, iro cantaincha ocameetsasasanti pinintasanajeitena narori. Eirorica pinintasanotanatsi narori, eiro noneacameetsatimpitsi avirori. Aisati, ocameetsati pinintajeiteri pitomi aisati pishinto, iro cantaincha ocameetsasasanti pinintasanotena narori. Eirorica pinintasanotanatsi narori, eiro noneacameetsatimpitsi avirori. ³⁸Nocoaque pinquearioventenaro maaroni nocoacaaquempiri. Ariorica inquishimentetempiro, iro cantaincha nocoaque pimpomerentsiventenaro. Eirorica pipomerentsiventanarotsi, eiro noneacameetsatimpitsi narori. ³⁹Ariorica pincavintsaasanotajea avisati meeca, pashinoncaasanotanaquea coajica. Iro cantaincha pinguemisantasannotenarica

meeca, ariorica iroashinoncaajeivetempipishaninca, iro cantaincha eiro patsipetarotsi: coajica paneajeitanaje anta ocameetsaitetasanotinta catsini. ⁴⁰Maaroni aacameetsajeitempineri, yaacameetsajeitaquena narori. Aisati maaroni aacameetsajeitanari, yaacameetsajeitaqueri Apa iriori: yora tiancaquenari. ⁴¹Ariorica irioyeetempi aviro quenquetsatacotiriri Tasorentsi, irootaque iraacameetsatantempiri, ari pimoncaratavacaajeitea impinajeitempi Tasorentsi: avirori, aisati yora aacameetsajeitempineri. Aisati oquempetaca, irioyeetempirica picameetsati avirori, irootaque iraacameetsatantempiri, ari pimoncaratavacaajeitea impinajeitempi Tasorentsi. ⁴²Ariorica irioyeetempi piquemisantana, irootaque impacotantempirori pireri, irioteri Tasorentsi, impinatasanoteri yora cavintsaimpiri.

Irootaque icantajeitanari Jesoshi.

Itianquiri Joa iroamere irineeri Jesoshi.

(*lr. 7.18-23*)

11 ¹Ari ivecarataquero yoamejeitaquena Jesoshi, yovaanaja anta otsipapeequi nampitsipee, yoamejeitaqueri savicajeitatsiri, iquenquetsatacaajeitaqueri. Noijatanajiri narori, aisati nocarajeitaqueri itsipapee iroamerepee, nocarajeiti 12. ²Chapinqui yoiminqeetaqueri Joa, yora vaotisatantatsiri. Meeca ari inaqueri caravosoqui, iro cantaincha iquemacotaqueri yantayetaqueri Quirishito, irosati itiancantacariri iroamerepee iriori:

³—Pijatashijeiteri Jesoshi, pisampitaiteri: “¿Avirompa Quirishito naamaajetari? Terica aviro, ari naamayea pashini”.

⁴Ari yareejeitapaacari Jesoshi, isampitapairi. Ari yacavaqueri:

—Pimpiajeitanaje, pincamantapeeri Joa maaroni piquemaquenari aisati maaroni pineacotaquenari. ⁵Namenacajeitajiri caari amenajeivetacha, naniita-

caajeitajiri caari shevajeivetacha, noavisacojeitaqueri maaroni patsaaiveitachari, noquemacaajeitajiri caari quemaveitachani, noitinaajiri aisati camavetainchari, niotacaajeitaqueri ashinoncaajeivetachari jaoca incanteari iravisacotantajeari. ⁶Inquimoshirejeitanaque maaroni caari tseencana. Irootaque pincamantapaaqueriri Joa.

Yora Jesoshi inecameetsataqueri Joa.
(*Ir. 7.24-30*)

⁷Ari ipiajeitanaja iroamerepee Joa, impoji iquenquetsatacaajeitaqueri Jesoshi yora apatotimentajeitacariri:
—Ari peerani pijatapinijeiti anta caaraite-riqui, piquemisantapinijeitiri Joa. ¿Paita pijatashijeitantariri? Tempa piojeitiri iotiri iriori Tasorentsi, irootaque pijatashitantariri. ⁸¿Pineaquerimpa iquitsaata cameetsa? Teve. Yora quitsaatarori iitsaare cameetsari isavicajeiti anta ivancoqui pincatsari. ⁹Tempa piojeitaqueri iriotaque quenquetsatirori irineane Tasorentsi. Queariotaque, iro cantaincha yanaacotasantirori itsipapee quenquetsatocotiriri Tasorentsi. ¹⁰Iquenquetsatocotaquerini peerani Tasorentsi, icantitanani: “Notiomi, nontianqueri coajica jivatempineri, inquenquetsatacaapaaqueri ishaninca, incanteri: ‘Pinqueshirejeitea, paamaajeiteari Avincatsarite’”. ¹¹Meeca noncamantempi, queariotaque: tempa itimi oshequi catsini atiri, iro cantaincha yanaacojeitaqueri Joa, yora vaotisantantsiri. Yanaacotasanojeitaqueri itsipapee, iotasano- taqueri Tasorentsi. Iro cantaincha maaroni neajeitaquerineri Tasorentsi impincatsarita- paaje, iranaacotasano-teri Joa, iriotsanojei- tanaque irinti. ¹²Peerani iquenquetsatacaite- quempini Joa, meeca noquenquetsatacajei- taquempini narori, piojeitancariri Tasorentsi. Ari impincatsariventajeiteri maaroni coasanojeitatsiri iriojeiteri. ¹³Peerani maaroni yora camantantsiniri iquenque- tsatocotiri Quirishito, aisati iquempetani

Moishishini. Aisati icantajeiti: “Irotaintsirica impoque Quirishito, irijivatapaaqueri Iriashi”. Impoiniji meeca ipocaque iriori Joa, ¹⁴ariorica noncantempi: iriotaque Joa iquenquetsatocotiri, ¿arimpa pijitaque namatavitaquempini? ¹⁵Otimirica piyempita piquemantari, pinquemaquena.

Irootaque icantajeitiriri maaroni apatotimentajeitariri.

ICantiri Jesoshi: “Te piotacotasanojeitenaji”.
(*Ir. 7.31-35*)

¹⁶Jero oca aisati icantajeitaqueriri Jesoshi:

—Piquempejeitacariri jananequipee, savicajeitatsiri saiteriqui, cantiriri itsipapee: ¹⁷“Notamporovetaca, iro cantaincha te poijatanaquenaji; nosonca- vetaca, iro cantaincha aisati te poijatana- quenaji. Nomaninquevetaca, te poijatana- quenaji”. ¹⁸Pineaquero, picoajeiveta irantajeiterome pishaninca paitarica picoacaajeivetacariri. Pineavetari Joa, itivetaca aisati te irireroji cachojari, ari picantashijeitari: “Oo, ineaqueri Joa camaari, ititancariri”. ¹⁹Ari noponeaca narori inquitequi, natiritapaaque; te nontiveteaji nainti, aisati niriro cachojari nainti. Ari picantimajeitaquena: “Jeri yonta oashenti, shinquinarinti. Ishaninca- tacari aitaqueeriri airequite aisati itsipapee caari cameetsayetatsi”. Iro cantaincha ioti Tasorentsi, ocameetsata- que maaroni icoacaquenari; aisati maaroni quemisantariri, iojeitaque ocameetsataque icoacaquenari Apa. Irootaque icantajeitaqueriri.

Irashinoncaajeitanaquea maaroni tseequiriri Jesoshi.
(*Ir. 10.13-15*)

²⁰Impoji iquenquetsatacojeitaqueri Jesoshi yora neajeivetacariri itasoncanti, iro cantaincha itseencajeitaqueri. Icanti:

²¹—Irashinoncaajeitanaquea maaroni coraseisati, aisati vetsairasati. Oshequi ineaajeivetaquena notasoncantayeti, iro cantaincha te inquenqueshireteaji, te inquemisanteji. Irineaquename notasoncantayeti yora tirosatini peerani, aisati yora shirosatini, inquenqueshirejeitanaqueame irinti, irojocajeitakerome caari cameetsatsi yantajeitiniri, inquemisantajeiteme. ²²Coajica, ariorica incantacoventajeiteri Apa, iroashinoncaajeiteri yora tirosatini aisati yora shirosatini: oshequi te incameetsajeiteni. Iro cantaincha iroashinoncaasanojeitaqueri catsini yora coraseisati aisati vetsairasati: tempa ineaajeivetaquena notasoncantayeti, iro cantaincha te inquemisantenaji. ²³Aisati iriori caperenaosati, ijtashijeiveta irijate inquitequi, iro cantaincha itseencantajeiti: irootaque irijajeitanteari iriori ishaaviji. Irineaquerome yora soromasatini maaroni ineaajeitaqueri caperenaosati, inquenqueshirejeitanaqueame, eiro itsoncajeitirime peerani Tasorentsi, ontimeme meeca inampi. ²⁴Coajica iroashinoncaajeitajeri aisati Tasorentsi soromasatini, iro cantaincha iroashinoncaasanojeiteri catsini yora caperenaosati. Irootaque icantaqueriri Jesoshi.

Yora Jesoshi iquenquetsatacairi Iriri.
(*Ir. 10.21-22*)

²⁵Impoiji iquenquetsatacairi Jesoshi Tasorentsi, icantiri:

—Apa, aviro pincatsariventajeitiriri maaroni inquiresati aisati maaroni quipatsisati, oshequi nopasonquitimpi. Airo cantashitachari: “Niotasanoti nainti”, iro cantaincha pimanapitsajeitaqueri piotiri. Irintiquea piotacaajeitiri itsipapee, yora itseenqueetiri. ²⁶Pineshinoncaajeitaqueri irinti, picoacaajeitaqueri iriote.

²⁷Irootaque icantaqueriri iriri, impoiji icantaajeitaqueri ashaninca:

—Irio Apa iotacaanari maaroni. Apaniro iotasannotaque irinti naro itomi, te iriotacotenaji itsipapee. Apaniro niotiri narori, tempa narotaque itomi; yorari itsipapee, te iriotasanojeiteriji Apa. Irintiquea iotasanojeitaqueri yora noamejeitaqueri. ²⁸Ariorica pashinonca-yea, ariorica ompomerentsitimotempi paitapeerica, pimpocashitena pincaman-tena; ari noncavintsayempi, nintacotempi eiro opomerentsitimotantajimpitsi aisati. ²⁹Pinquemisantena narori, pincoajeite noamejeitempi; oshequi nocavintsanti, oshequi noneshinoncatanti. Ariorica pinquemisantena, noveshireacaajeitempi. ³⁰Pamene, eiro noperanatimpitsi, eiro noashinoncaimpitsi, irointi namitacotapinijeitempi.

Yora Jesoshi irio cantatsiri paitapeerica antayeteri saavaroqui.

(*Mr. 2.23-28; Ir. 6.1-5*)

12 ¹Ari pashini saavaro noijajeitanaqueri Jesoshi, ijvajeitanaquena anta oantsipeequi. Narotaque iroamerepee. Ari aajeitaquena notashe, irootaque naviiantanacarori oitsoqui tirico, noajeitaro. ²Ari ineaajeitaquena variseopee, irosati icantantacari Jesoshi:

—Pamenerite poamerepee. Meeca saavaro, te oncameetsateji meeca iraviitantearo.

³Ari yacanaqueri:

—Tempa pineanatapinivetaro Sanquena-arentsi quenquetsatacotiriri Irvirini. Aajeivetacarini peerani itashe, aisati aajeivetacarini maaroni oijajeitiriri. ⁴Ari iqueapaaque ivancoqui Tasorentsi, icantapaaqueri yora saserote: “Aajeitaquena notashe”. Ari otimaveta anta tanta yoashiyeetanariri Tasorentsi. Te oshinetanteaji iroajeitearo ashanincapee, apaniro irinti yoaro saserote. Iro cantaincha icavintsajeitavaqueri, te incoyeji iroashinoncayeri, irootaque ipajeitantaca-

riri Iravirini, aisati itsipajeitari. Yoajeitaca. Meeca te pincanteji: “Te oncameetsateji yantiniri Iravirini”, ari ħpaġta picantantari meece: “Te oncameetsateji yantiri yoca”? ⁵Aisati isanquenatini Moishishi: “Eiro pantaveetantarotsi saavaro”. Iro cantaincha maaroni saavaro ijatapiniti saserote ivancoqui Tasorentsi, yantaveetapiniti. Te pinquishimenterini, tempa pineacameetsataquero yantayetiri. ⁶Tempa atiri yanaacojeitaquero ivanco Tasorentsi, ocameetsati ancavintsajeiteri irinti, eiro avashinoncairitsi. ⁷Pineaquero, isanquenatini peerani: “Icanti Tasorentsi: ‘Te noncoyeji poapinitenari ovisha, pintaapinitenari; irointiquea nocoasano-taque pincavintsajeiteri pishaninca’”. Pinquemasanoterome oca icantiri Tasorentsi, eiro picantimentirime yoca aviitirori tirico, te aneroji irantane. ⁸Noponeaca narori inquitequi, natirita-paaque. Narotaque nainti cantatsine paitarica antayeteri saavaroqui.

**Yoaviascoteri saavaroqui
Jesoshi tsiricoipacori.
(Mr. 3.1-6; Ir. 6.6-11)**

⁹Ari novaajeitanaja, noqueajeitapaquero pancotsi yapatojeitantari. ¹⁰Itimi anta tsiricoipacori. Ari yora variseopee isampijeitavaqueri Jesoshi:

—ĤOcameetsatimpa poaviascoteri saavaroqui tsiricoipacori?

Icoajeitaque iroaviascoteri saavaroqui, irootaque incantajeitanteari: “Yantaveeniroti Jesoshi saavaroqui, te incameetsateji”. ¹¹Ari yacanaqueri:

—Pamene, ariorica saavaroqui impariaque omoroqui povishate, tempa paajeri, poisoquijajeri. Ocameetsati picavintsairi.

¹²Tempa atiri yanaacotiri ovisha icameetsatasanotaque. Ocameetsataque ancavintsayeri saavaroqui.

¹³Impoiji icantiri yora tsiricoipacori:

—Pancotaje.

Ari yacotanaji, cameetsatanaji iraco, omoncarajaro otsipa iraco. ¹⁴Iro cantaincha iquisajeitanaca variseopee. Ijajeitanaji, yoametavacaajeitanaca, icantajeiti: —ĤJaoca ancanteriri Jesoshi, avacantanteariri?

**Oquenquetsatacotaquerini Jesoshi
sanquenarentsi peerani.**

(Mr. 3.7-12; Ir. 6.17-19)

¹⁵Iotaque Jesoshi icoajeitaque iroyeri, irootaque yovaantanajari. Ari noijajeitanaqueri, nocarajeitiri oshequi itsipapee atiri. Itimi oshequi mantsiyetatsiri, iro cantaincha yoavisacojeitaqueri maaroni, ¹⁶impoiji icantajeitaqueri:

—Eiroyea picamantitsi: “Yoavisacojeitakuena Jesoshi”.

¹⁷Ari itsoteajiro Jesoshi maaroni iquenquetsatacotaqueriniri peerani Isayashi. Jero oca irineane Apa Tasorentsi isanquenatiniri: ¹⁸“Jeri yoca Quirishito nocoacaaqueri irantenaro maaroni nocoacaaqueri. Oshequi nonintaqueri, oshequi noneacameetsataqueri. Nontianqueneri noshire, quiso oanaqueri, amitacotapiniteri. Incamantajeiteri itsipapee atiri jaoca noncanteari noameetsatanteariri maaroni. ¹⁹Eiro icantavacaimentarotsi paitapeerica, eiro iquenquejairitsi itsipapee. Eiro icajemacotapinitiritsi itsipapee. ²⁰Eiro yoashinoncairitsi oashiretachari. Eiro yamatavitiritsi coatsiri iriotena. Aitaque, incanteani incavintsante, aisati impincatsariventantasanote. ²¹Iriotaque oavisacojeiterineri itsipapee atiri, te intimeji pashini oavisacojeiterine”. Irootaque icantiri Tasorentsi peerani.

**Yora variseopee icantimajeitaquero
Ishire Tasorentsi.**

(Mr. 3.20-30; Ir. 11.14-23)

²²Impoiji yameetaqueneri Jesoshi neiriri camaari: te irameneji, aisati te

irineanateji. Ari yoavisacotajiri: yamena-caajiri aisati ineanatacaajiri. ²³Ari yoajeitanaqueri cavaco maaroni neacojeitaqueri. Isampitavacaajeitaca:

—¿Iriompa yoca Quirishito aamaajeitacari?

²⁴Ari cantaincha icantajeiti variseopee:

—Irio Satanashi, yora ivincatsarite camaari, amitacotiriri itiancajiri iyamaaririnte.

²⁵Ari iotaque Jesoshi iquenqeshirejiriti, icantajeitiri:

—Ariorica irimanatavacaajeiteame savicajeitatsiri quipatsiqui, tempa ari impoyereavacaajeiteame. Aisati iquempe-taca yora savicajeitatsiri nampitsiqui, ariorica inquisavacaajeiteame, tempa ari inteentareavacaajeiteame. Aisati iquempejeita maaroni atiri, ariorica inquisaqueri ishanincasanori, eiro quiso yoajiritsi.

²⁶Pamene: irioricame Satanashi amitacotenaneme notianquiri noyamaaririnte, tempa nompoyereavacaajeiteame. ²⁷Aisati irioricame amitacotenaneme notianquiri camaari, ¿irisatimpa camaari amitacojeitiriri pishanincapee iriori yojocantariri camaari?

²⁸Iro cantaincha irootaque Ishire Tasorentsi amitacotanari notiancantajariri camaari. Tempa irootaque piotanteameri ainiro icarajeitaquempi Tasorentsi, icoaveta impincatsariventajetempime. ²⁹Intimerica coatsiri incoshiteri shintsitatsiri, tempa irijivateri irayeri, shepi; iroisoteri, oiso, oiso. Impoiji incoshiteri ivaararo, eiro imatirotsi implateari yora ashivetarori ivaararo. ³⁰Yora caari quemisantana, iriotaque quisaquenari. Aisati, iquisaquena maaroni caari amitacotana.

Iquenquetsatacotaqueri Jesoshi yora cantimajeitirori Ishire Tasorentsi.

(Mr. 3.28-30; Ir. 12.10; 6.43-45)

³¹Aisati icantiri Jesoshi variseopee:

—Yora Tasorentsi icavintsaajeitiri maaroni caari cameetsajetatsi aisati

maaroni cantimajeivetariri, eiro iquishimentajeitiritsi yantayetiri. Iro cantaincha eiro icavintsaajeitiritsi yora cantimajeitirori Ishire. ³²Noncamantempi: noponeaca nainti inquitequi, natiritapaaque, iro cantaincha incavintsaajeiteri Apa maaroni cantimajeive-tanari. Eiro icavintsaajeitiritsi irinti cantimaitirori Ishire. Eiro icavintsaajiritsi meeca, aisati coajica eiro icavintsaajiritsi, irointi iroasanquetaasanojeiteri. ³³Ariorica ocameetsati inchato, ocameetsati oitsoqui iroori; terica oncameetsateji inchato, aisati iroori oitsoqui, te ocameetsateji. Ariorica pineero oitsoqui, tempa piotaque ocameetsatirica inchato. ³⁴Pishiajeitaqueri camaari, te pincameetsajeiteji: tecatsi pincantea poametante cameetsa. Te oncameetsateji piquenqeshirejiriti, irootaque caari ocameetsatanta picantajeitiri. ³⁵Irinti cameetsatatsiri shirampari iquenqeshiretapi nitiro cameetsayetatsiri, irootaque ocameetsatantari yantayetiri. Yora caari cameetsayetatsi iquenqeshiretapinitiro caari cameetsatatsi, irootaque caari ocameetsatanta yantayetiri. ³⁶Coajica incantacoventajeitaquempi Tasorentsi: inquenqeshiretacaajempiro maaroni picantajeitiri meeca. ³⁷Ocameetsajeitirica picantajeitiri, ari irineacameetsatempi, iro cantaincha terica oncameetsayetaji, incantempi: “Ainiro pantayetiri, oshequi pinquematsicatim-tearo”.

Irootaque icantiriri Jesoshi variseopee.

Iquenquejaajeitaqueri Jesoshi yora tseencajeitantsiri.

(Mr. 8.12; Ir. 11.29-32)

³⁸Impoiji icantajeivetari variseopee aisati oametantayetirori Sanquenarentsi:

—Oametanari, nocoaque namenempi pintasonquero paitapeerica, niotantempiri avirotaquerica Quirishito.

³⁹Yacanaqueri Jesoshi:

—Te pincameetsajeiteji, oshequi pitseencaqueeri Tasorentsi, irootaque

picantantanari. Eiro notasonquimojeitim-pitsi piotantenarime. Otimi yantayetiniri Jonashi: pishiretearome ishiacantaquenari, ari pinquemisantaquenename.

⁴⁰Peerani iniaquerini anteari omani, ocarataque mava quitaiteri inaqueri isheitoqui. Aisati narori, noncamaque, oncarataque mava quitaiteri nonaque narori omoroqui tsoompoina. ⁴¹Coajica incantacoventajeitempi Tasorentsi, incantajeitempi: “Ainiro pantanejei avirorije. Peerani yora ninivesati iquemisantajeitaquerini yora Jonashi, iquenqueshirejeitantacari. Avintije, pineajeivetacari Quirishito, oshequi yanaacotasannotiri Jonashi, ipincatsaritananoti irinti, iro cantaincha te pinquemisantajeiteriji”. ⁴²Aisati incantajeitempi: “Ainiro pantayetiri avirorije. Peerani ora ivincatsaroteni savasatini oquemaque oshequi iotaque Saromo, irootaque ojatantacari arejiqui oquemisantantacari. Jeri isaviquimojeivetimpi avinti anaacotiriri Saromo, iro cantaincha te pimpincatsateriji”. ⁴³Noshiacantempiro aisati: oquempvetaca yora camaari itimantacari ishirequi shirampari, ipeaquero ishire ivanco. Ari yojoqueetiri camaari, yavisacovetaja yora itimantari. Ijataque camaari anta caaraiteriqui, anta opirijaiteaque. Icoaveta irimaoreeme, iro cantaincha te irimateroji. ⁴⁴Impoiji icantaniroto: “Nompianajeta novancoqui noponeacanta”. Ari ipianaja, ineapaaquero opishitaca, ocareniiteanaque, ovetsicayetaca isavicamentopee, imaamento, maaroni. ⁴⁵Ari ijatashitanacari pashini iamaaririnte, icarati 7. Oshequi yanaacojeitiri icamaaritasanojeiti. Icantiri: “Tsame pisavicajeite novancoqui”. Ari, peerani yashinoncaavetaca capichaji yora itimantari camaari; meeca irampiitajea irashinoncaasanotajea catsini. Aisati pinquempejeitea avirorije. Pashinoncaajeivetaca, te

piojeiteniji. Meeca pineajeivetaquena, iro cantaincha te pimpincatsajeitenaji, irootaque pampiitajea, pashinoncaasanojeitajea.

Irootaque icantajeitaqueriri Jesoshi.

Ishanincajeitacari Jesoshi maaroni quemisantajeitiriri.

(*Mr. 3.31-35; Ir. 8.19-21*)

⁴⁶Ari iquenquetsatacaajeitaquena Jesoshi, aisati yora apatojeitachari anta pancotsiqui. Irosati opocantapaacari iriniro Jesoshi, jeri irirentipee, ocatiapaaca saiteriqui, ocajemacantaqueri. ⁴⁷Icamanteetaqueri:

—Areetapaaca piniro, jeri pirentipee, ocoapaquempi. Ocoaque onquenquetsatayempi.

⁴⁸Yacanaqueri:

—¿Janicampa ina? ¿Janicampa iyepee?

⁴⁹Ari ijicojeitaquena, icantiri:

—Jeri yoca noamerepee, iriojeitaque iyepee, aisati iroojeitaque ina. ⁵⁰Iriotaque noshanincatasanojeitacari maaroni antiniriri Apa Jenokiniriri icoacaajeitaqueriri: nocantajeitaqueri iye, tsio, jero ina.

Iquenquetsatacotaqueri yora panquiveetatsiri.

(*Mr. 4.1-9; Ir. 8.4-8*)

13 ¹Irosati isoquijantanaja Jesoshi, ijatanaque otsapijaqui incajare. Noijajeitanaqueri, ²aisati yapatotimenta-jeitacari oshequi atiri. Ineaquero pitotsi, otsatacotaca; ari itetapaacaro, isavicapaaque. Ari nocatijajectaca narori otsapijaqui. ³Impoiji, oshequi iquenquetsatacaajeitaquena, ishiacantiri panquiveetatsiri, icanti:

—Ijati panquiveetatsiri yojocaitiro oitsoqui tirico iroanequi. ⁴Opariaarantapaaque aparopee oitsoqui avotsiqui, impoiji ipocapaaque contsaro, yoitapaacari oitsoqui. ⁵Otsipapee oitsoqui

opariaarantapaaque mapiqui. Te anta ontimasanoteji quipatsi, ari jentsipaite oshiocavetanaca, aisati jentsipaite otsoancavetapaaca. ⁶Iro cantaincha te ontimasanoteji ovaritsa. Ijenoquitapaaque catsirincaiteri, oshimpetanaque, impoji ocamanaque. ⁷Pashini pariapain-tsi quitotsequishiqui: anaanaquero irointi, oshioaque, ajaanaquero panquirentsi. ⁸Orari pashinipee oitsoqui opariapaaque quipatsisanoriqui cameetsari. Oquimotanaque, oitsoquitanaque. Aparopee timanaintsi oitsoqui ocarataque 100, iro otsipapee ocarataque oitsoqui 60, iro otsipapee ocarataque oitsoqui 30. ⁹Otimirica piyempita piquemantari, pinquemavaquero oca nocantajeitaquem-piri.

**Yoametaqueri Jesoshi iroamerepee
ishiacaaventiniriri.**

(Mr. 4.10-12; Ir. 8.9-10)

¹⁰Impoji notsipajeitanacari pashinipee iroamere, nocantajeitaqueri Jesoshi:
—¿Paita pishiacantantarriri yora itsipapee? Te inquemajeiteroji picanta-queriri.

¹¹Ari yacanaquena:

—Nocoacaajeitaquempi piojeitanaquero caari iojeiti itsipapee. Nocoaque piojeite jaoca icanta Tasorentsi ipincatsariventajempiti, iro cantaincha te noncoacayeriji yora itsipapee iriojeitanaque.

¹²Itimirica iovetachari, ari niotacaasanteri. Iro cantaincha itsipapee, te incoyeji iriote, irotaque caari iotanta irinti; eiro noametiritsi irinti, aisati nompeapitsa-queri iotantavetari. ¹³Irotaque noshicantantanariri iriroripee, te incoyeji iriojeite. Yamenajeiveta, iro cantaincha tecatsi irinee. Iquemajeivetavacaro iro cantaincha te inquemavaqueroji, te iriotavaqueroji nocantavetarari.

¹⁴Aitaque iquenquetsatacotitarini peerani Isayashi, icantini: “Pinquemajeivetea, iro

cantaincha eiro piojeitavaquerotsi. Pamenajeivetea, iro cantaincha eiro pineasanojeitirotsi. ¹⁵Te pincoajeiteji piojeitanaque, irotaque caari piquenqueshireajeitanta. Te pincoyeji pinquemajeite, irotaque povitantacarori piyempita. Te pincoajeiteji pamenasanojeite, irotaque pimatsiocantacari. Te pincoyeji catsini noavisacojeitempi”. Irotaque iquenquetsatacotiriniri peerani Isayashini. ¹⁶Iro cantaincha pamenajeitana- naji avinti, piquemisantajeitajana, irotaque pinquimoshiretasanojeitanteari. ¹⁷Queario oca noncamantempiri: icoajeiveitani peerani yora quenquetsatacantantsiniri aisati cameetsajeitatiniri irineerome oca pineajeitaqueri avirori. Icoajeiveitani inquemerome oca piquemajeitaqueri meeca. Iro cantaincha te irineajeitenaji, te inquemajeitenaji. Irotaque icantaquenari Jesoshi.

**Yora Jesoshi yoamejeitaqueri paita
ishicantininiriri.**

(Mr. 4.13-20; Ir. 8.11-15)

¹⁸Ari icantajeitaquena Jesoshi:

—Meeca noamejeitempiro oca noshicantajeitaqueneriri incaranqui.

¹⁹Ari nocamantapinitiri itsipapee jaoca icanta Tasorentsi ipincatsariventanti, iro cantaincha terica inquemero, iquempetacaro oitsoqui pariaintsiri avotsiqui. Ipoqui camaari, yojocacaqueri iquenqueshirevetacaro noneane.

^{20,21}Aisati itsipapee iquemavetavacaro nocantavetarari, iveshirementavetacaro, irotaque iquisantacariri ishaninca.

Iro cantaincha te iriotasanoteji, te inquemisantasanteji, irotaque yojocantajarori iquemisantaveta. Ari ishiaquero iriori oitsoqui pariapaintsiri mapiqui.

²²Iojeiveta itsipapee noamejeivetari, iquemavetaro noneane, iro cantaincha oshequi iquenqueshireyetro paitapeerica, aisati oshequi iveshirementaro

irovaararo, irootaque caari iquenqueshi-retantaro noneane. Te inquemisanteji. Ishiaquero iriori oitsoqui pariapaintsiri quitotseequishiqui. ²³Iro cantaincha ainiro itsipapee quemisantasannotirori noneane, quemasanotirori. Oshequi iquemisantaquena, iquearioventaquero maaroni nocoacaaqueriri. Ishiaquero oitsoqui pariapaintsiri quipatsiqui cameetsari, ora shequianaintsiri oitsoqui: aparopee timayetanaaintsiri oitsoqui 100, iro otsipapee otimaque oitsoqui 60, iro otsipapee aisati otimaque oitsoqui 30. Irootaque icantaquenari.

Iquenquetsatacotiri Jesoshi yora quishiriri panquitirori tirico.

²⁴Pashini aisati ishiacantaquenari Jesoshi, icantaquena:

—Aitaque icanta ipincatsariventanti Tasorentsi, iquempetacari yora panquitirori oitsoqui tirico. Ocameetsataque oitsoqui ipanquitiri. ²⁵Impoiiji tsiteniriqui imai, aisati imajeiti iratiritepee. Ipocaque tsiteniriqui quisaqueriri, yamaquero oitsoqui tiriconiro. Oshiavetaro tirico, iro cantaincha oquepiati. Ipanquitiro anta ivanquirequi ashitarori iroane, iconoaitiniri tirico. Impoiiji ijatanaji. ²⁶Ari impoiiji aisati oshiocanaque tirico, oitsoquitanaque. Aisati oshiocanaque tiriconiro, oconoanacaro. ²⁷Ineaquero iratiritepee, ijatashitaqueri, icantaqueri: “Tempa ocameetsati oitsoquipee apanquijeitiri anta poanequi. ¿Paita oshiocantacari tiriconiro?”

²⁸Yacanaqueri: “Irioyeata quisaquenari panquitaitirori”. Ari isampijeitiri: “¿Picoaquempa nojajeite nontsocayetajero tiriconiro?” ²⁹Icantiri: “Aitanaque. Pitsocacotirocari tiricosanori. ³⁰Ocantavacata. Oshiocacoterota meeca. Coajicaquea amenavaquero oitsoquitanaquetsita tirico. Impoiijiquea, noncantajeitempi: ‘Pimpesajeitero tiriconiro, paajeitero,

pintayero. Impoiijiquea paviitero tiricosanori, poajero anta pancotsiqui noquem-poyeantaroriqui’”.

Irootaque ishiacantajeitaquenari Jesoshi.

Ishiacantiro Jesoshi oitsoqui moshitasa.
(*Mr. 4.30-32; Ir. 13.18-19*)

³¹Jero oca pashini ishiacantajeitanari Jesoshi, icanti:

—Aitaque icanta ipincatsariventanti Tasorentsi, ishiacantiro oitsoqui moshitasa ipanquiyeeitiri oantsiqui. ³²Orijaniqui onaveta oitsoquijaniqui, iro cantaincha oshiocanaquerica, antearotanaque, anayetanaquero otsipapee panquiyetachari, aitaque irimencotantaquearo tsimeripee ojempequiqui.

Ishiacantiro Jesoshi tapiacaarori tanta.
(*Mr. 4.33-34; Ir. 13.20-21*)

³³Jero pashini ishiacantaquenari:

—Aitaque icanta ipincatsariventanti Tasorentsi, iquempevetaro tsinane ovetsiquiro tanta. Aaquero ovane tirico oshequi, aisati oconoiro tapiacaarori capichaji. Oconoasanotiro, impoiiji otapiaquero maaroni.

³⁴Aitaque icanta Jesoshi, ishiacaaventapinijeitiniri apatotimentajeitariri, iotaca ishiacantiniri. ³⁵Imoncarataquero isanquenatiniri peerani yora quenquetsatantatsiniri: “Icanti Tasorentsi: ‘Oshequi noshiacanteneri atiripee; noncamanteri caari iojeitini peerani’”.

³⁶Impoiiji ijatanaque Jesoshi, yojocajeitanajiri yora apatotimentajeitariri, ijatanaque pancotsiqui. Narotaque iroamerepee, noijajeitanaqueri. Nocantaqueri:

—Poametasanotenaro oca pishiacantajeitiniriri yora apatotimentajeitimpiri. ¿Paita oshiacantiri tiriconiro ipanquiyeeitiri tiricomashiqui?

³⁷Ari yacanaquena:

—Noponeaca narori inquitequi, natiritapaaque. Naro shiaqueriri panquitorori tirico cameetsari. ³⁸Ora oantsi oshiacantaquero quipatsi asavicajeitan-tari. Ora oitsoqui cameetsari oshiacanta-queri pincatsatiriri Tasorentsi. Irointi tiriconiro oshiacantaqueri pincatsatiriri camaari. ³⁹Yora quisantsatsiri, panquitorori tiriconiro, ishiacantaqueri camaari. Ora yaviitaqueri oitsoqui oshiacanta-queri ontsoncanteari quipatsi. Yora iratiritepee ishiacantaqueri inampirepee Tasorentsi. ⁴⁰Pineaquero, yapatotacanta-queri tiriconiro, itaasanoquero, pomein. Oca oshiacantaquero nanteri coajica nontsoncantajearori quipatsi. ⁴¹Nontiancajeiteri oshequi nonampirepee, nampatocantajeiteri maaroni caari cameetsajeitatsi; te nonintacayeriji incarajeiteri maaroni pincatsajeitanari. ⁴²Nojocantajeiteri anta paamariqui: oshequi irashinoncaajeitaaque anta, oshequi inquematsicatearo. ⁴³Impoiji irishipaquireajeitanaque maaroni cameetsajeitatsiri, inquempejeiteari catsirincaiteri. Incarajeiteri Apa anta ipincasaritinta. Otimirica iyempita atiripee, ocameetsati inquemisantajeitena.

**Iquenquetsatacotaqueri Jesoshi
quirequi imaneetiri.**

⁴⁴Aisati icantaquena Jesoshi:

—Aitaque icanta Tasorentsi ipincatsariventanti, ishiaqueri oshequi quirequi imaneetiri quipatsiqui. Ari ineashitacari quirequi pashini shirampari. Imanaqueri iriori, te incamanteji. Iquenqueshiretaca: “Namananterota quipatsi, nashitanteariri timatsiri quipatsiqui”. Impoiji ijataque ipimantajeitaquero maaroni yashijeitari iraanteariri quirequi. Irootaque yamanantacarori quipatsi itimantari oshequi quirequi. Impoiji iquimoshireventaqueri oshequi quirequi, yoca yamanantacota-

queri. ⁴⁵Aisati iquempetacari coatsiri iramanantero marereatatsiri mapi, cameetsatasanotatsiri. ⁴⁶Ineaquero aparoni, ocameetsatasanotaque, opinatasaanotaca. Icoasanoquero, irootaque ipimantantarori maaroni timimojeitiriri yaantariri quirequi. Impoiji itsoncaqueri iirequite yamanantantarori aparoni mapi cameetsari.

Iquenquetsatacotiro Jesoshi quitsari.

⁴⁷Aisati icantajeitaquena Jesoshi:

—Pashini aisati noshiacantempiro jaoca icantari Tasorentsi ipincatsariventanti. Oquempetaca iquitsati shirampari incajarequi. Yojocaquero iitsarite nijaqui, impoiji inoshicacotaqueri shimayetatsiri; icaantana-cave, monquire, monquire. Inashiyetaca. ⁴⁸Ijaacaro quitsariqui, inoshicacotaqueri otsapijaqui. Impoiji isavicaque, icoyeayeta-queri cameetsayetatsiri. Irintiquea yora caari cameetsayetatsi yojocaqueri. ⁴⁹Aisati onquempetajea ariorica nompocaje. Nontianqueri nonampirepee irinashitacaajeiteari cameetsajeitatsiri aisati caari cameetsajeitatsi. ⁵⁰Irojocajeiteri caari cameetsajeitatsi anta paamariqui. Oshequi irashinoncaajeitanaque, inquematsicatasanojeitearo paamari. ⁵¹¿Piquemajeitaquerompa oca nocamantajeitaquempiri?

Nacajeitanaqueri:

—Je, noquemajeitaaque.

⁵²Ari icantaquena:

—Ariorica inquemisantena yora oametan-tirori Sanquenarentsi, iriojeitanaquero oshequi: tempa meeca iotiro maaroni isanquenayeetiniri peerani: aisati, inquemisantenarica, iriotoero iroaqueratatsiri noamejeitiriri meeca. Iriotanaquero jaoca icantari Tasorentsi ipincatsariventanti.

Iplanaja Jesoshi Nasaretequi.

(Mr. 6.1-6; Ir. 4.16-30)

⁵³Ari ivecarataquero Jesoshi ishiacanta-jeitaquenaro, impoiji ijatanaque,

⁵⁴ipianaja anta iipatsitequi iponeacanta. Noijajeitanaqueri narori. Ari yoametantapaaque anta yapatojeitanta ashanincapee. Yoajeitanaqueri cavaco maaroni quemajeitavaqueriri, icantajeiti:

—¿Janica oametiriri yoca otimantacari iotantari? ¿Paitaquea matacaqueriri itasoncantayeti? ⁵⁵Tempa iriotaque itomi vetsiquirori inchato. Tempa irootaque iriniro Maria. Tempa iriotaque irirentipee yora Santiago, Jose, Shimo, jeri Jorashi.

⁵⁶Tempa aisati acarajeitaquero irisiropee. ¿Paita ipincatsanirotantacari?

⁵⁷Ari iquisajeitaqueri, itseencajeitaqueri, irootaque icantantarori:

—Timatsi pincatsatiriri quenquetsatirori irineane Tasorentsi, iro cantaincha itseencajeitiri ishanincasanori.

⁵⁸Ari oshequi itseencajeitaqueri ishanincasanori, irootaque caari itasoncantayetanta oshequi anta inampisanoriqui.

Yora Eroreshi yoacantaqueri Joa, impoiji ijitashitajari itinaanaja, ijitajiri irio Jesoshitajantsiri.

(Mr. 6.14-29; Ir. 9.7-9)

14 ¹Irosati yora Eroreshi iquemaco-
taqueri Jesoshi. Yora Eroreshi
ipincatsariventajeitiri maaroni carireasati.
²Icantajeitiri ishanincapee:

—Irioyeata Joa Jesoshitajantsiri. Noacantavetacari, iro cantaincha amaashiteari tinaanajaitatsi ini, irootaque imatantarori itasoncantayeti.

³Ari chapiniqui yora Eroreshi yaapitsataqueri irirenti Jeripe ijina, opajita Eroriashi. Yora Joa icantavetacari: “Te oncameatsateji paapitsateri pirenti ijina”. Irosati yaacantantacari, yoiminqueacantaqueri. Yoisoeyeataqueri carenatsaqui.

⁵Ari icoavetaca iroacantitearime, iro cantaincha oshequi ipincatsajeitaqueri atiri Joa, iojeitiri iquenquetsatacotiri Tasorentsi. Ijivetaca Eroreshi: “Arriorica

noacanteri, inquisacojeitanaqueari atiripee”. ⁶Impoiji omoncarataca quitaiteri itimantacari peerani Eroreshi. Yapatojeitaqueri oshequi ishaninca, iquimoshireimentajeitacari. Aisati omaninquetacotimentaqueri oshintio Eroriashi. Oshequi inecameetsataquero, ⁷irootaque icantantarori:

—Paitarica pincoacotaquenari, aitaque nompaquempiro. Ioti Tasorentsi eiro namatavitimpitsi.

⁸Ocantiro iniro:

—Pincanteri iroacanteri Joa.

Irosati ocantantarori:

—Nocoaque poacanteri Joa, impoiji pimpacotenaro matitaku iitoni, iotanteari ina queario icamasanotaque.

⁹Ari yoashiretanaca Eroreshi. Te incoaveteaji, iro cantaincha iquemajeitaqueri maaroni ishaninca icantaquerori irishintotsori. ¹⁰Irootaque ipesacantantacariri Joa. ¹¹Impoiji yameetaquenero matitaku iito Joani. Aavaquero, aanaquenero iniro. ¹²Irinti iroamereni yaajeitanaqueri, itijaitiri. Impoiji ijajeitanaque, icamantapaaqueri Jesoshi: —Yoyeetaqueriyea Joa.

Ijivitaquero itasoncaquero

Jesoshi tanta, yoshequiaquero.

(Mr. 6.30-44; Ir. 9.10-17; Joa 6.1-15)

¹³Iquemantacari Jesoshi icamaque Joa, ijatanaque apaniro anta tenta intimeji atiri. Itentajeitanaquena, iro noquenajeitantacari pitotsi. Iro cantaincha iquemacojeitaqueri atiripee, iponeayetanaca nampitsipeequi, ishiteajeitanaca, yojijajeitanaquena.

¹⁴Ari naatacojeitapaaque, noneajeitapaaqueri oshequi apatojeitainchari. Oshequi icavintsajeitapaaqueri, yoavisacojeitaqueri mantsiaripee. ¹⁵Ari ishaavijitanaque catsirincaiteri. Nocarajeitaqueri pashini iroamere, nocantajeivetacari:

—Pamene, caraiteitaque aca, aisati ishaavijiteanaque catsirincaiteri. Pintian-

cajeiteri yocapee irijajeite nampitsipeequi iramanantajeite iroyeari.

¹⁶Yacanaquena:

—¿Paita irantsipetashitanteari irijate? Jentsite, pimpajeiteri avirori iroajeiteari.

¹⁷Nocantajeitaqueri:

—Te ontimeji nompajeiteriri. Jero oca ocarataque tanta apapacoroni. Jerica aisati apite shima.

¹⁸Icantaquena:

—Pamaquenaro.

Ari nopaqueri. ¹⁹Impoiji icantajeita-queri:

—Pisavicajeite saveshishiqui.

Ari isavicajeitanaque. Impoiji yaavaquero tanta aisati shima. Ari yamenanaque jenoqui, icantiri iriri:

—Irove, Apa, pipaquenaro oca noyearica.

Impoiji icarajaquero, ipaquenaro.

Novaaajeitaqueneri yora apatojeitainchari. ²⁰Yoajeitacaro maaroni, iquemajeitanaca.

Impoiji napatojeitajiro timaarantapaajan-tsiri, nojaayetajiro cantiriqui, ocarataque 12. ²¹Naamaaca ari icarajeiti yora oajeitacarori 5,000 shirampari, aisati tsinaneppee, jeri aisati jananequpee.

**Yora Jesoshi yaniijatiro incajare,
te intsitiaquiteji.**

(Mr. 6.45-52; Joa 6.16-21)

²²Impoiji icantajeitaquena:

—Noamerepee, pintejeitanajea pitotsiqui, pijivajeitanajena intatiquero.

Impoiji aisati icantajeitaqueri apatojeitainchari:

—Pijajeitanaje pivancopeequi.

²³Impoiji ijatanaque apaniro toncaariqui, iquenquetsatacairi iriri. Ari otsitenitanaque, itimi apaniro iriori anta. ²⁴Narojeiquea nainti, noquenacojeitanaque nianquijaqui.

Antearo omotoncane, aisati oipiacotajana tampea. ²⁵Irotajantsi onquitaitetaje noneajeitavaqueri, yaniijatapaquero incajare, te intsitiaquiteji. Te niojeitavajeriji,

²⁶irootaque notsarooaajeitantariri, nocajemajeitanaque:

—Jee. Coraqueve camaarira.

Oshequi notsarooaajeitacari. ²⁷Iro cantaincha icantajeitapaajana:

—Narotaque pocajantsi, piveshireimen-tajeitavajena, eiro pitsarooaajeitanatsi.

²⁸Ari icantiri Petero:

—Avirorica novincatsarite, pincaje-
mena nanijjatashitanajempi nijaqui.

²⁹Ari icantiri:

—Caatequeti.

Irosati imitajantanaca, yaniijatanaque anta Jesoshiqui. ³⁰Iro cantaincha impoiji iquenque-shiretaquero tampea, aisati itsarooanaque.

Ineavaitia itsitianaque, icajemanaque:

—Novincatsarite, paavajena.

³¹Irosati yacotashitantavajari, yaavajiri. Icantiri:

—Capichaji pishiretaquena, çpaita pitseencantanari?

³²Ari itetanajaro pitotsi, irosati opeantanaja tampea. ³³Oshequi nopinca-tsajeitaqueri, nocantajeitaqueri:

—Queariotaqueteemi, aviro Itomi Tasorentsi.

**Yoavisacojeitiri Jesoshi mantsiyatetsiri
anta Jenesaretequi.**

(Mr. 6.53-56)

³⁴Ari nomonteajeitanajaja, nareejeita-paaja Jenesaretequi. ³⁵Yora savicajeita-tsiri iojeitavaqueri Jesoshi, itiancajeita-queri ishaninca, yamacantajeitaqueri mantsiyatetsiri. ³⁶Ari yantitapaqueri iitsaare ocaratapai. Yavisacojeitanaji maaroni antitajeitaqueriri.

**Icantavacaimentajeitaro paita caari
acameetsashirejeitanta.**

(Mr. 7.1-23)

15 ¹Impoiji ipocashijeitiri Jesoshi variseopee aisati oametantirori Sanquenarentsi. Iponeajeitaca iriorijeji Jerosarequi. Isampitapaqueri:

²—Tempa arojeitaque jorio. Amejeive-tacaro tequeratsitarica avajeitea, ajivati aquivacotasana. Irootaque yoamejeita-queeri yora peeraniniri. ¿Paita caari iquempejeitanta poamerepee? Yoashini-rotaca, te inquivacoteaji.

³Yacanaqueri:

—Oshequi pimncaratashiyetacaro icantashiyetacaniri peeraniniri, irootaque caari pimatantaro yoamejeivetimpiri Tasorensi. ⁴Tempa icanti irinti: “Pimpincatsateri piri aisati piniro”. Aisati icanti: “Incameta yora cantimatiriri iriri aisati iriniro”. ⁵Iro cantaincha aviroripee, picantajeitiri pishaninca: “Pincanteri ashitimpiri ‘Nompempime quirequi, noncavintsayempime, iro cantaincha nojivataque nocantaqueri Tasorensi nomperiri iriori’”. Poameniroteitiri eiro icavintsairitsi ashitariri, eiro ipincatsatiritsi. ⁶Pineaquero, poametashinirojeitacari icantashiyetacari pishaninca, te poamejeiteriji irineane Tasorensi. ⁷Pishiaccantave-taca piquemisantiri Tasorensi, iro cantaincha te pinquemisanteriji. Queario oca iquenquetsatacotimpiri peerani Isayashini: ⁸“Icanti Tasorensi: ‘Icantashijeitaca ipincatsataquena, iro cantaincha te irishirejeitenaji. ⁹Yatsipetashitacaro yapatotimentashitana, te iroametanteroji noneane, irointi yoametantiro irineane iriori’”.

¹⁰Impoiji icajemajeitiri yora apatotimentajeitariri, icantajeitiri:

—Pinquemajeitena, piojeitavaquero oca noncamantempiri: ¹¹ora ayeari, tecatsi oncantero ashire ompeacayearo. Irointiquea oca aneaveetashiyetari, irootaque matirori ashire ompeacayearo.

¹²Impoiji nojatashitiri Jesoshi, nocarajeitiri itsipapee iroamerepee, nocantajeitiri:

—¿Tempa piote iquishmentajeitimpiro variseopee oca picantiriri?

¹³Yacanaquena:

—Coajica intsocajero Apa jenoquiniri maaroni caari ipanquiti iriori. ¹⁴Ari inaji yora variseopee: te irioteji, iquempejeitacari caari amenatsi. Oquempetaca icoaque irijate jaocarica, icoaque irancatsatanajeri itsipapee caari amenajeitatsi iriori. Aitaque impariajeitaque omoroqui maaroni, terocn.

¹⁵Icantiri Petero:

—Te nonquemempiji, poametenaro oca pishiacantiri.

¹⁶Icantiri:

—¿Tequerampa onttime piotantari?

¹⁷¿Tempa piote paitarica ayeari ojataque asheitoqui, impoiji ashitajero? Tecatsi oncantero ashire. ¹⁸Iro cantaincha pineanantantaro paitarica piquenqueshiretiri: terica oncameetsateji, eiro picameetsashiretitsi. ¹⁹Tempa piojeitiro piquenqueshiretiro caari cameetsatsi, poanti, paimentaro pijina, pantiro caari pai, picoshiti, pitseea, picantimatiri pishaninca. ²⁰Irootaque caari picameetsajeitanta. Iro cantaincha terica pinquiva-coteaji, tecatsi oncantero pishire.

Yoavisacotiro Jesoshi oshinto canasato.

(*Mr. 7.24-30*)

²¹Irosati ijatantanacari Jesoshi Tiroqui aisati Shiroqui. Itentajeitanaquena maaroni iroamerepee. ²²Ojatashitaqueri cananasato, caari oni jorio. Ocantiri:

—Novincatsarite, tempa aviro ishanincani pincatsari Iravirini. Nocoaque pincavintsayena, aisati noshinto. Yataanaquero iroori camaari, catsiqueti yoanaquero.

²³Iro cantaincha imajeretanaque, te iranqueroji. Nocantajeivetari narori:

—Pincantajero ojatajeta, oshequi ashereaajeitae.

²⁴Icantiro:

—Itiancaquena Apa noncavintsayeri joriopee.

²⁵Iro cantaincha opocashitiri, otiyeroa-shitacari, aiquero ocantatiiri:

—Novincatsarite, pincavintsayena.

²⁶Icantiro:

—Te oncameetsateji aapitsateri atomi yoari ampanteariri otsiti. Te aviro jorio, çpaita noncavintsaantempiri?

²⁷Acanaqueri:

—Queario, novincatsarite, oca picantiri. Iro cantaincha, tempa yoaro otsiti iroaritsopequi yora ashitariri.

²⁸Yacanaquero:

—Tsinane, cameetsa pishiretaquena. Aitaque nomataquempiro oca picoacotaquenaarica.

Irosati avisacotantanaja oshinto.

Yoavisacojeitiri Jesoshi oshequi mantsiaripee anta incajarequi.

(*Mr. 7.31-37*)

²⁹Ari yovaanaja aisati Jesoshi, iquena-naque otsapijaqui incajare anta Carireaque. Impoiji itoncaanaque toncaariqui, isavicapaaque. Noijajeitanaqueri narori, aisati iriori maaroni iroamerepee.

³⁰Ijatashjeitakeri oshequi atiripee, yaajeitanaqueneri oshequi mantsiyatsiri: choritatsiri, caari shevatacha, caari amenatsi, caari neanatatsi, maaroni. Ari yoavisacojeitiri. ³¹Ari yoajeitanaqueri cavaco maaroni neajeitakeriri. Ineajeitajiri ineanataji caari neanaveitachani, ishevajeitanaja caari shevaveitachani, yaniiyetanaji caari aniiveitachani, yamenanaji caari amenaveitachani. Icantajeiti:

—Tempa icameetsataque Tasorentsi, yora pincatsariventajeitiriri maaroni joriopee.

Yapiitajiro Jesoshi itasoncapiro tanta, yoshequiajiro aisati.

(*Mr. 8.1-10*)

³²Impoiji icajemajeitaquena Jesoshi, aisati iriori maaroni iroamerepee. Icantajeitaquena:

—Oshequi nocavintsaajeitakeri maaroni yora apatotimentajeitanari.

Ocarataque meeca mava quitaiteri icarajeitakeri: tecatsi meeca iroajeitakeri. Oshequi aajeitakeri itashe meeca. Ariorica nontiancavetakeri meeca, aitaque ajaajeitanaqueri itashe, eiro yaaveajatsi irareejeitajea ivancoqui.

³³Nocantajeitakeri:

—Pamene, caaraiteitakeri aca. ¿Jaoca ayerori tanta avacaajeitakeri? Oshequi icarajeiti catsini.

³⁴Isampitaquena:

—¿Jaoca ocaratiri tanta timatsiri?

Nacanaqueri:

—Ocarataque 7, aisati timatsi shivajaniqui aparopee.

³⁵Ari icantajeitiri apatojeitainchari:

—Pisavicajeite quipatsiqui.

³⁶Irosati yaantacaro tanta aisati shivajaniqui. Icantiri iriri:

—Ariove apa, pipaquena noyeari.

Impoiji icarajaquero, ipajeitakenaro. Naajeitavaquero, impoiji novaajeitakeri iriori apatojeitainchari. ³⁷Yoajeitanaca, iquemajeitanaca. Impoiji napatojeitajiro timaarrantapaajantsiri, nojaajiro cantiriqui ocarataji 7. ³⁸Icarajeiti oajeitainchari 4,000 shirampari. Aisati oajeitainchari oshequi tsinane aisati jananequipee. ³⁹Impoiji itiancajeitajiri Jesoshi:

—Meeca pijajeitanaje pivancopeequi.

Irosati notejeitantanaja pitotsiqui, nomonteanaja anta Macataraku.

Icoaveta saserotepee irineerime Jesoshi intasoncanteme.

(*Mr. 8.11-13; Ir. 12.54-56*)

16 ¹Impoiji ipocashitakeri variseopee aisati saroseopee: icoajeive-taca irantacayerime Jesoshi caari cameetsatsi ontimanteameri inquisantearimeri. Icantavetapaacari:

—Jentsite, namenempi pintasoncante, notianteari piponeacarica inquitequi.

²Yacanaqueri Jesoshi:

—Pamene, ariorica ishaavijiiteanaji, pineaquerorica opotsonaiteanaji, tempa picantajeiti: “Eiro oparii incani”.³Iro cantaincha, oquitaitetamani, pineamane-ririca iquiteriteamaniro catsirincaiteri, aisati otsiteniiteamani, ari picantajeiti: “Ompariye meeca incani”. Piojeitaque jaoca ocanta inquite, pioti ompariaquerica incani. Iro cantaincha te piojeiteroji maaroni pineaqueri meeca quipatsiqui.⁴Te pincameetsajeiteji, oshequi pitseenca-jeitaqueri Tasorentsi: picoajeiveta pineena nontasoncante, iro cantaincha eiro nonijaimpirotsi. Apatiro pineaqueru coajicani oca ishiacantiri Jonashi.

Irotaque icantaqueriri Jesoshi, irosati ijatantanaja.

**Ishiacantiniri Jesoshi tapiacaarori
itantane variseo aisati saroseope.**

(Mr. 8.14-21)

⁵Ari nareejeitanaca intatiquero, nocarajeitiri itsipapee iroamere. Impoiji noquenqueshirejeitaquero tanta: tecatsi namaque. ⁶Icantajeitaquena Jesoshi:

—Paamayearoyea tapiacaarori itantane variseopee aisati saroseopee.

⁷Ari nosampitavacaaca:

—¿Paita icantanteeri: “Paamayearoyea tapiacaarori itantane”? Te amejí tanta, iroitatsi icantantaqueeri.

⁸Iotashitaca Jesoshi nocantajeitaqueri, icantajeitana:

—Te pishiretasanojeitenaji. ¿Paita picantantari: “Te amejí atantane”? ¿Paita piquenqueshiretantacari? ⁹¿Tequerampa piojeiteji? Chapinqui otimaveta tanta apacoroni, iro cantaincha noacaajeitacari 5,000 shirampari. Paajeitajiro timaarantapaajantsiri: ¿jaoca ocaratiri cantiriqui pijaajiri timaarantapaajantsiri?

Nocantiri:

—Ocarati 12.

¹⁰Aisati impoiji ocarati tanta 7, noacaajeitacari 4,000 shirampari. ¿Jaoca

ocaratiri cantiriqui pijaajiri timaarantapaajantsiri?

Nocantiri:

—Ocarati 7.

¹¹Icantana:

—¿Paita caari piojeitanta meeca? Te nonquenqueshireteroji tanta pipeacotanacari. Queariompia, paamayearoyea tapiacaarori itantane variseopee aisati saroseopee.

¹²Impoiji niojeitanaque te inquenqueshireteroji tapiacaasanotarori tanta, irointi ishiacaventiro maaroni yoametan-tayetiri variseopee aisati saroseopee. Te irininteji Jesoshi iramatavijeitee yora variseo aisati saroseo.

Icantiri Petero Jesoshi:

“Avirotaque Quirishito”.

(Mr. 8.27-30; Ir. 9.18-21)

¹³Impoiji nojajeitanaque anta Sesareaqui: ora nampitsi yovetsicantaqueri Jiripo. Ari icantaquena Jesoshi:

—Noponeanaca narori inquitequi, natiritapaaque, iro cantaincha ¿paita yaamaajeitaquenari atiri, janicana?

¹⁴Nacanaqueri:

—Icanti aparopee: “Irioyeata Jesoshi Joani, yora vaotisantantaveitachaniri, itinaanaja”. Icanti itsipapee: “Irioyeata Iriashini, yonijantaja”. Icanti itsipapee: “Irioyeata Jerimiashini, yonijantaja”. Irio itsipa ijijeitimpi aviro quenquetsatcantatsiniri, pitinaanaja.

¹⁵Ari isampitana:

—Avirojei, ¿paita picantajeitiri avirori?

¹⁶Yacanaqueri Shimo Petero:

—Avirotaque Quirishito naamaajeitari. Aviro Itomi Tasorentsi, yora Aneasanotatsiri.

¹⁷Icantiri:

—Queario picantaque, Shimo itomi Jonashi. Te irio oamejeitempirone atiri, irinti Apa jenoquiniri oamempirori.

¹⁸Nopajitimpi Petero: ocanti pivajiro

“Mapi”. Nocoacaaquempi poamejeiteri atiri noamejeitaquempiri avirori. Eiro imatiritsi camaari iroashinoncaajeiteri quemisantajeiteroneri pincamanteriri.¹⁹Noametempi paitarica irantajeiteri atiri irineanteariri Tasorentsi anta ipincatsarintina. Eirorica piquemisantacairi atiri aca quipatsiqui, eiro ijatitsi inquitequi; irinti maaroni pinquemisantacaaajeiteri irisavicajeite anta inquitequi.

²⁰Impoiji aisati icantajeitana:

—Eiroyea picamantiritsi atiri: “Iriotaque Jesoshi Quirishito”.

Yora Jesoshi icamantitacari iroamere incame.

(*Mr. 8.31-33; Ir. 9.22*)

²¹Impoiji icamantaquena Jesoshi:

—Irotaintsi nojate Jerosarequi. Anta oshequi iroashinoncaajeitena yora savicacantatsiri, yora jivatacaajeitiriri saserotepee, yora oametantirori Sanquenarentsi, maaroni. Aitaque oncanteari iroyeetena, iro cantaincha oncarate mava quitaiteri, ari nontinaanaje aisati.

²²Iro cantaincha ipiatsatacari Petero:

—Novincatsarite, te oncameetsateji oca picantaqueri. Eiro pashinoncaatsi, eiro picamitsi.

²³Ari ipitsocashitanacari Jesoshi, icantiri:

—Pijate, piquempetacari Satanashi. ¿Paita pitseencantaquenari? Te pioteroji icoacaaquenari Tasorentsi, irointi pioletaque icoacaaquenari atiri.

Icamantiri Jesoshi paita icoacairiri maaroni oijajeitirisi.

(*Mr. 8.34-38; 9.1; Ir. 9.23-27*)

²⁴Impoiji icantajeitana:

—Picoasanotirica pinquemisantasano-tena, eiro pantanontatsi avisati, irointi pimpomerentsiventenaro paitarica noncoacaaquempiri narori. Ariorica iroashinoncaimenteetempio, iro cantain-

cha pinquemisantasano-tena.²⁵Yora coavetachari incavintsayea irisati irashinoncayea; irintiquea yora caari cavintsaachane irisati irineeri Tasorentsi irinti.²⁶Ariorica intime ashiyetarori maaroni timayetatsiri quipatsiqui, iro cantaincha eirorica ijati inquitequi, tempa yatsipetashitacar maaroni. Pineaquero, tecatsi pincantea pimpinateri Tasorentsi irisavicacantempiri anta inampiqui.²⁷Noponeaca narori inquitequi, natiritapaaque. Coajica nompiaje aisati aca, nontsipatapaaqueari nonampirepee, nompincatsaritapaaque, nonquempeteari Apa. Nompinajeiteri maaroni quearioventanarori nocoacairiri. Irinti maaroni caari quemisantana, noashinoncaajeiteri.²⁸Queario oca noncamantempiri: eirotsitarica picamajeititsi avirori, pineajeitavajena nompocaje, nompincatsaritasanotapaaje.

Ipashinitanaque Jesoshi.

(*Mr. 9.2-13; Ir. 9.28-36*)

17¹Ari 6 nomaajeiti, impoiji yora Jesoshi yaajeitanaqueri Petero, Santiago, jeri Joa, yora irirenti Santiago. Yaajeitanaqueri anta antearoqui toncaari.²Ineajeitavaqueri ipashinitimojeitanacari. Ishipaquireavorotanaque, iquempetancari catsirincaiteri; aisati iitsaare, oquitamarotasano-tena catsini.³Imapocaqueri Moishishini, jeri Iriashini: iquenquetsatacapaaqueri Jesoshi.⁴Yora Petero, icantiri Jesoshi:

—Novincatsarite, aitanaquempaqueea nompocajeitaque naroripee aca, noneajeitatuempiri nainti. Pincoaquericca, novetsiquempiro mava pancotsijaniqui: aparoni pashi, aparoni irashi Moishishi, iro otsipa irashi Iriashi.

⁵Irosati omapocantapaacari omaaroncapaca mencori, oshipaquireapaaque iroori. Isavicaque Tasorentsi mencoriqui, icanti:

—Iriotaque yoca notomi nonintasanotiri, oshequi noveshireimentasanotacari. Pinquemisantajeiteri.

⁶Iquemajeitantacarori iroamerepee oca, itarecajeitanaca, oshequi yoajeitanaqueri cavaco. ⁷Iro cantaincha ipocashitaqueri Jesoshi, ipamijeitaqueri. Icantiri:

—Pincatijeitanaje, eiro pitsaroajeititsi.

⁸Ari yamenajeitanaji: tecatsi irineaje, apaniro inaji Jesoshi. ⁹Impoiji yoirincajeitanaja, icantajeitiri:

—Eirotata picamantitsi oca pineaqueri.

Arioricaquea noncamaque aisati nontinaanaje, irosatiquea pincamantanta-yetaqueari itsipapee atiri. Tempa noponeaca inquitequi, natiritapaaque.

¹⁰Ari nocantajeitaqueri:

—Yora oametantirori Sanquenarentsi icantajeiti: “Irotaintsirica impoque Quirishito, irijivatapaaque ironijantapaa-jea Iriashini”. ¿Paita icantajeitantarori oca?

¹¹Yacanaquena:

—Queario icantaqueri: “Ironijantapaa-jea Iriashini, irovetsicajeitaqueri maaroni”. ¹²Noncamantempi: nijantaja inaji Iriashini, iro cantaincha te iriojeitavaqueriji atiripee, oshequi yoashinoncaajeitaqueri. Aisati narori, oshequi iroashinoncaajeitena.

¹³Impoiji niojeitanaque iquenquetsatacotaqueri Joa, yora vaotisantantsiri.

**Yoavisacotiri Jesoshi evancari
camanatatsiri.**

(*Mr. 9.14-29; Ir. 9.37-43*)

¹⁴Ari narejeitapaaca anta itiminta oshequi atiri yapatojeitaca. Irosati ipocashitantacari Jesoshi shirampari. Itiyoashitapaacari, icantapaaqueri:

¹⁵—Novincatsarite, pincavintsayeri notomi: oshequi icamanatapiniti, oshequi yashinoncaapinitaca. Ipariapiniti paamariqui, itaapinita, pomein: aisati ipiincapiniti ojaqui, pocn, pocn. ¹⁶Naave-

tanacanari poamere, nocantavetari: “Poavisacotajenari”, iro cantaincha te irimateriji.

¹⁷Ari icantajeitana Jesoshi:

—Te pinquemisantajeiteji, te pincameetsajeiteji. ¿Jaoa oncarate nontsipajei-tempi piotanteari? Oshequi pitseencajeitacuena.

Impoiji icantiri ashitariri itomi:

—Jentsite, pamaquenari pitomi.

¹⁸Ari iquisatsataqueri camaari, irosati ijatantanaja. Irosati yavisacotantaja yora evancari. ¹⁹Impoiji nomanacaacari nosampijeitiri:

—¿Paitaquea caari nomatantaro noavisacojeiteri narori?

²⁰Icantajeitacuena:

—Iro caari pimatantaro te pinquemisanti-mateji capichaji. Queario oca noncamentempiri: pinquemisanterica capichaji ari pincantero oca toncaari: “Povaanajea anta”, ari ovaanajea. Pinquemisantasanoterica, tecatsi pomerentsitimotempine. ²¹Iro cantaincha pincoaquera pojoqueri camaari quempetariri yoca, ocameetsati pinquenque-tsatacaasanoteri Tasorentsi aisati pintitea.

**Yapiitajiniri aisati Jesoshi, icantajiri
iroamere: “Irotaintsi noncame”.**

(*Mr. 9.30-32; Ir. 9.43-45*)

²²Ari notsipajeitacari Jesoshi anta Carireaquei: narori aisati maaroni itsipapee iroamere. Icantajeitana:

—Noponeaca narori inquitequi, natiritapaaque. Irotaintsi irayeetena, ²³iroyeetena. Oncarate mava quitaiteri nontinaanaje aisati.

Noquemajeitantacariri, oshequi noashirejeitanaca.

**Ipinataquero Jesoshi yovetsicantayetarori
ivanco Tasorentsi.**

²⁴Impoiji nojajeitanaque Caperenaoqui. Ainiro anta itimi yora quempoyeiriri quirequi yoameetsatantayetarori ivanco

Tasorentsi. Ari ijatashitiri Petero, isampitiri:

—¿Ipashitapinitarimpa oametimpiri iirequite, yoameetsatantayetarori ivanco Tasorentsi?

²⁵Yacashitanacari:

—Je, ipiri.

Impoiji ipianaja Petero pancotsiqui. Isampitavaqueri Jesoshi:

—Shimo, ¿paita piquenqueshiretiri?

Yora pincatsaripee, ¿janica icoacotapinitiri iirequite? ¿Icoacotirimpa ishanincasanori? Terica, ¿irintimpa icoacotiri itsipapee atiri?

²⁶Yacanaqueri:

—Tempa icoacotiri itsipapee atiri.

Ari icantiri:

—Queario, tecatsi incoacoteri ishanincasanori. Aisati oquempetaca narori, tecatsi incoacotena Apa: tempa noshanincatacari. ²⁷Iro cantaincha te noninteji onttime inquishimentenari yora quempoeyeriri quirequi. Meeca pijate incajarequi, pimpitasate. Ariorica paaque shaori, pinquirancaqueri, pineaqueri ivantequi quirequi. Paavaqueri, impoiji paanajeneri yora quempoeyeriri quirequi, pimpapaaqueri. Iriotaque avinarojei, avirori aisati narori.

Iquenquenquetsatacotaqueri Jesoshi pincatsatachaneri anta inquitequi.

(Mr. 9.33-37; Ir. 9.46-48)

18 ¹Impoiji, nocarajeitaqueri itsipapee iroamere, nojatashijeitaqueri Jesoshi, nosampijeitiri:

—Anta ipincatsaritinta Tasorentsi, ¿janica intsipateari impincatsaritanote?

²Ari icajemaqueri jananequi, isatecaqueri nianqui, ³icantajeitana:

—Queariotaque oca noncamantempiri: pinquenqueshirejeitea, paventajeiteari Tasorentsi; nocoaque pinquempejeiteari yoca jananequi, pishiretasanotena. Eirorica pishiretasanotanatsi, eiro

pineirotsi ipincatsaritinta Tasorentsi. ⁴Te irishemeteji yoca: maaroni quempeteareine impincatsaritanotanaque anta inquitequi. ⁵Ariorica paacameetsateri quempetariri yoca jananequi, paacameetsajeitena narori. ⁶Iro cantaincha ariorica pantacayeri caari cameetsatsi, noasanquetasanotempi. Oncameetsateme pijivateme pincameme eiro pantacantarime caari cameetsatsi. Tecatsi noasanquetimentempimeri. ⁷Queario intime antayeterone caari cameetsatsi, iro cantaincha oshequi irashinoncaajeitanaquea yora antacairiri.

Icantiri Jesoshi:

“Pantirocari caari cameetsatsi”.

(Mr. 9.42-48; Ir. 17.1-2)

⁸Aisati icanti Jesoshi:

—Meeca noshiantempiro. Ariorica antacayempi paco caari cameetsatsi, pimpesajero, pojocajero; aisati pinquempetero piiti antacayempirica caari cameetsatsi. Ocameetsaveta pinqueapontoquitapaaje anta inquitequi, te oncameetsateji onttime apite paco, irootaque pijatanteari Sharincaveniqui, aisati te oncameetsateji onttime apite piiti, irootaque pijatanteari Sharincaveniqui. Ainiro anta paamari caari tsivacanetatsi: quearioya piquemaatsicatarocari. ⁹Aisati ariorica antacayempiro poqui caari cameetsatsi, pinquitsoreero, pojoquero. Ocameetsati pinqueanaraquitaje inquitequi; te oncameetsateji onttime apite poqui, irootaque pijatanteari Sharincaveniqui pinquematsicatantearori paamari. Pineaquero, te oncameetsateji catsini pantero caari cameetsatsi.

Icanti Jesoshi: “Eiro pitseenquiritsi jananequipee”.

(Ir. 15.3-7)

¹⁰Aisati icanti Jesoshi:

—Aisati eiro catsini pitseenquiritsi jananequipee. Ainiro inampirepee Apa

quempeyaveantajeitaqueriri jananequipee, camantacoventapinitiriri. ¹¹Noponeaca narori inquitequi, natiritapaaque. Nopocashitaqueri jatatsinemer Sharinca-
veniqui, noavisacotantajeiriri.

Ishiacantiri Jesoshi ovisha peainchari.
(*Ir. 15.4-7*)

¹²Aisati icantajeitana Jesoshi:
—Noshiacantempro aisati. Ariorica
intime ashtariri 100 irovishate.
Impeaquearica aparoni, tempa irashitaco-
tanaqueri yora 99 irovishate iramenanta-
jeariri yora peainchari. ¿Paita piquenque-
shirejeitiri avirori? ¹³Irineajeririca aisati,
¿iriompa irivshireimetea yora apatojei-
tainchari caari peacha? Te, irintiquea
irivshireimetea yora peavetainchari.
Tempa queario. ¹⁴Aisati iquempea yora
Apa jenoquiniri: te incoyeji irijate
Sharincaveni qui aparoni jananequi.

**Icantaqueri Jesoshi: “Poameteri pishaninca
eiro yantantarotsi caari cameetsatsi”.**
(*Ir. 17.3*)

¹⁵Aisati icantaquena Jesoshi:
—Ariorica irantero pishaninca caari
cameetsatsi, irotaque poashiretacotan-
teariri, ocameetsati pijatashiteri,
pincanteri. Apaniro pijatashiteri, eiro
picamantiritsi itsipapee. Ariorica
inquemisantempro cameetsa irisavicanta-
jeari, ari pinquempetacantajeri pirenti,
paacameetsatavacaajea aisati. ¹⁶Iro
cantaincha eirorica iquemisantimpitsi,
pijatashitajeri aisati, paanaqueri itsipa
piyemisaririnte: ariorica aparo,
ariorica apite. Intsipajeitempro iriotanteari
paitarica pincanteriri, aisati intsarojeita-
peeri iriori. ¹⁷Eirorica iquemisantajei-
timpi, ari pincamantajeiteri maaroni
piyemisaririnte, intsarojeiterita iriori.
Eirorica iquemisantajeitiri, ari pinquem-
petacaajeari tseencantatsiri, antirori caari
cameetsatsi; eiro picantajiritsi

quemisantatsiri. ¹⁸Paitarica pincantajeite-
riri incanteri aisati iriori Tasorentsi.
Pincantajeiteririca ainiro irantane, aisati
incanteri iriori Tasorentsi. Pincantajeite-
ririca te aneroji irantane, aisati inquem-
petea iriori Tasorentsi. ¹⁹Nampiitajem-
piro: irosatirica pincantajeiteriri avirori
Apa jenoquiniri; ariorica pincarajeite
apite, ari inquemisantasanojeitempro.
²⁰Jaocarica irampatotimentenari apite
quemisantanari, ariorica mava, aisati
narori noncarajeitaqueri.

Yoamejeitiri Jesoshi: “Pincavintsante”.

²¹Impoi ji yora Petero isampitiri
Jesoshi:
—Novincatsarite, inquishenarica
noshaninca, tempa ocameetsati noncavin-
tsayeri, eiro nopiataritsi. Iro cantaincha
irampiitapinitenarica inquisaquena,
¿jaoca oncarate noncavintsapiniteri?
¿Ariompa oncarate 7?

²²Yacanaqueri:

—Irosati pincanteani pincavintsayeri:
eiro pipiataritsi catsini. ²³Noshiacantem-
piro jaoca icanta Tasorentsi ipincatsari-
ventanti. Itimi pincatsari coatsiri
impinatajeri iratiritepee. ²⁴Icajemaqueri
aparoni, irevitiriri oshequi quirequi
catsini. Icantavetari: “Pimpinatajena”.
²⁵Yacanaqueri: “Tecatsi noncantea
nompinatajempiro”. Ari icantiri pincatsari
itsipapee: “Payeri yoca. Pimpimanteri,
pimpimantero ijina, itomipee, irovaararo,
maaroni, naantajeari quirequi
irevitanari”. ²⁶Iro cantaincha itiyeroa-
naca quipatsiqui yora irevitiriri, icantiri:
“Eirotsita pipimantanatsi. Coajica
nompinatajempiro, maaroni”. ²⁷Ari
oshequi icavintsairi ivatorote, icantiri:
“Aitanaji, moncarataca, eiro nocoacota-
jimpitsi”. ²⁸Ari ijatanaque yora irevitan-
tavetachari. Iquenanaque avotsiqui,
itonquiotavacari irevitiriri iriori
capichaji. Icaticavaqueri itsanoqui,

icantiri: “Pishintsite pimpinatajena ora pivevitanari”. ²⁹Ari itiyeroavetanaca iriori, icantavetari: “Eirotsita picoacotanatsi, coajica nompinatajempí maaroni”. ³⁰Iro cantaincha te incavintsayeriji irinti. Yoiminqueacantaqueri, icantiri: “Ariorica pimpinatajena maaroni, noncanteri iroimisoquijajempí”. ³¹Ari ineantacariri itsipapee, yoashirejeitanaca. Ijatashitaqueri ivatorote, icamantaqueri: “Noneaqueri yoranqui picavintsairi, te incavintsanteji irinti. Yoiminqueacantaqueri irevivetariri irinti capichaji”. ³²Ari icajemacantaqueri ivatorote, icantiri: “Picantaquena: ‘Eirota pipimantanatsi’, irootaque nocavintsasaanotantaquempiri, nocantimpi: ‘Aitanaji, eiro pipinatajana-tsi’. Iro cantaincha te pincameetsateji avinti. ³³Tempa oncameetsateme pincavintsayerime avoriri yora irevivetimpiri capichaji, pinquempete-name narori nocavintsaaquempí”. ³⁴Ari iquisaqueri, yoiminqueacantaqueri, icantiri: “Meecaquea aviroriniro, ariorica pimpinatasanotajena maaroni, ari noimisoquijajempí”. ³⁵Ari piojeitaquero oca noshicantimpiri. Eirorica picavintsanti, iroasanquetasanotempi Apa jenoquiniri, pinquempeteari yora noquenquetsatocotiri.

Ijataque Jesoshi Joreaqui.

19 ¹Ari iquenquetsatacana Jesoshi chapinqui anta Carireaquei. Impoiji yovaanaja Joreaqui, anta Joriraniqui intatiquero. Noijatanaqueri narori, aisati itsipapee iroamere. ²Aisati yoiyajeitaqueri oshequi itsipapee atiri. Aisati oshequi yoavisacojeitaqueri mantsiyetatsiri.

Iquenquetsatocotiri Jesoshi joquirori ijina.

(Mr. 10.1-12; Ir. 16.18)

³Aisati ijatashitaqueri Jesoshi variseo-pee. Icoavetaca incomitacayearime, irootaque isampitantavetariri:

—¿Ocameetsatimpa irojocajero shirampari ijina?

⁴Yacanaqueri:

—Tempa pineanatapinivetaro Sanque-narentsi. Peerani yovetsicaqueri Tasorentsi shirampari aisati tsinane, ^{5,6}aisati icanti: “Ariorica irayero shirampari ijina, inteentareanaqueri iriri aisati iriniro, iro cantaincha te noncoacayeriji irojocajero ijina. Nocoaque quiso iroanaquero. Peerani inashiveitani shirampari aisati ijinatsori, iro cantaincha ariorica iraaquero, onquempetaquea apaniro irinaque, eiro yojocavacaajatsi”. Tempa aitaque itsipatacaacari Tasorentsi, te oncameetsateji irojocacajeri atiri.

⁷Ari isampitiri aisati:

—¿Arimpa? ¿Paita icantantariri Moishishi peerani: “Pisanquenatenero pijina paperi pojocantearori, impoiji ocameetsati pojocajero”?

⁸Yacanaqueri:

—Te pincameetsashireteji, irootaque icantantimpiri Moishishi ocameetsati pojocajero pijina. Iro cantaincha te incoacayempiji Tasorentsi pojocajero. Icoacaaquempí eiro pojocajirotsi catsini. ⁹Nocantimpi narori, ariorica pojocajero pijina impoiji paaje pashini, aitaque paimentaquearo pijinasanori. Apatiroti ariorica ojivate aimentempi, ocameetsaveta pojocajero.

Iquenquetsatocotiri Jesoshi caari aatsi ijina.

(Mr. 10.1-12)

¹⁰Impoiji, nocarataqueri pashini iroamere, nocantaqueri Jesoshi:

—Ariompa, jaata eirota naitame nojina narori.

¹¹Icantaquena:

—Eiro pimajeitirotsi pinquemajeitero oca nocantaquempiri. Apaniro inquemero yora yoametasanotiri Tasorentsi. ¹²Tima-tsi caari matiro iraye ijina: irosati

itimapaaque. Timatsi itsipa yaitsoquiyee-tiri, caari yaanta ijina. Timatsi pashini caari coatsi iraye. Icoaque intimashitea inquearioventeneri Tasorentsi paitapeerica iranteneriri. Pimaterorica pinquemero oca, ari pinquenqueshiretero.

Ipamijeitiri Jesoshi jananequipee.

(Mr. 10.13-16; Ir. 18.15-17)

¹³Impoiji yamaqueneri Jesoshi jananequipee, icantajeitiri:

—Pimpamiteri notomipee, pincanteri Tasorentsi incavintsaajectenari.

Nocantajeivetari:

—Eiro pashereiritsi Avincatsarite.

¹⁴Iro cantaincha icantana:

—Eiro picantiritsi: nocoaque iramajeitenarita jananequipee. Iojeiti iriori ipincatsajeitaquena. Maaroni quempetariri yoca irisavicajeite anta ipincatsarintinta Tasorentsi.

¹⁵Irosati ipamijeitantavacari, icantiri Tasorentsi:

—Apa, nocoaque pincavintsaajecteri yoca jananequipeeca.

Impoiji ijatanaji.

Jero oca icamantiriri Jesoshi ashitaarantachari.

(Mr. 10.17-27; Ir. 18.18-27)

¹⁶Impoiji ijatashitaqueri Jesoshi aparoni evancari, isampitapaqueri:

—Oametantatsiri, picameetsataque. ¿Paita cameetsatsiri nanteri narori nosavicanteari anta inquitequi, noncantaitiyempani?

¹⁷Ari icantiri:

—¿Paita picantantanari: “Picameetsataque”? Itimi aparo cameetsatsiri: yora Tasorentsi. Iro cantaincha pincoaquericapijate inquitequi, pantajeitero maaroni icantiniri Moishishini.

¹⁸Icantiri:

—Otimi oshequi icantayetiniri: ¿paita picoaqueri nanteri?

Yacanaqueri:

—Eiro poantitsi, eiro pantirotsi caari pai, eiro picoshititsi, eiro pitseeyacotaritsi pishaninca, ¹⁹pimpincatsateri piri aisati piniro; oquempetaca pininta avisati, aisati pinintajeiteri itsipapee iriori.

²⁰Icantaqueri:

—Aitaque nomatitacaro nojananequitapaini, irosati meeca. ¿Paita pashini nanteri?

²¹Yacanaqueri:

—Picoaquericapintsoteaquero maaroni, pijate pimpimantero maaroni timimojeitimpiri, pimperi ashinoncachari maaroni ovaro; impoiji impinatempit Tasorentsi, ontime pivaararo inquitequi. Ariorica pimpimantero maaroni, tsame poijatanaquena narori.

²²Iquemavaitihiro oca, ijatanaque, yoashiretanaca. Otimi oshequi irovaararo, te incoyeji impimantero.

²³Impoiji icantajeitana Jesoshi:

—Queario oca noncamantempiri: opomerentsitimotari ashitaarantachari irijate anta inquitequi. ²⁴Nampiitajempiro: tempa opomerentsitaca inqueero cameyo omorojaniqui quitsapi. Iro cantaincha opomerentsitasanotaca catsini irijate ashitaarantachari anta ipincatsarintinta Tasorentsi.

²⁵Noquemajeitantarori oca noajeitanakeri cavaco. Nosampitiri:

—¿Ariompa? ¿Janica meeca materone iravisacotaje?

²⁶Yamenaquena, icantaquena:

—Eiro imatirotsi atriri, iro cantaincha irinti Tasorentsi irimataquero maaroni. Tecatsi ompomerentsitimoteari irinti.

Te irantsipetashitearoji quemisantatsiri yojatasanotanaqueri Quirishito.

(Mr. 10.28-31; Ir. 18.28-30)

²⁷Icantaqueri Petero:

—Pamene, nocoasanojeitaque noijatanaquempi, irootaque nojocajeitantacarori

maaroni timimojeivetanari. ¿Paita naayetajeri coajicani aisati?

²⁸Icantajeitana Jesoshi:

—Queario oca noncamantajeitempiri, tempa noponeaca inquitequi, natiritapaaque: coajica ontime quipatsi iroaquerari. Narori, nosavique anta novincatsarimentequi, nompincatsatasanoaque. Aisati avirorijeji, pincarajeitena pimpincatsarijeitanaque, ontime 12 pivincatsarimentopee pisavicajeitanteari aviroripee. Pimpincatsariventajeiteri maaroni joriopee. ²⁹Ariorica pojajeitanaquena, tecatsi pantsipejeitea. Ariorica pojocanaquero pivancopee, pirementee, pitsiropee, piripee, piniropee, pitomipee, piipatsite, paitapeerica. Iro cantaincha ariorica pojatasanoatanaquena, te pantsipetashijeitearoji. Ariorica pojocanaquero aparato, impajempi Tasorensi 100. Aisati irajeitanaquempi inampiqui pisaviquimojeitanteariri iriori, pincantaitatitempani. ³⁰Itimajeiti meeca oshequi pincatsarijeitatsiri aca quipatsiqui, iro cantaincha eiro ipincatsarijeitajitsi inquitequi: ariorica aparopee pincatsaritanajantsine. Aisati itimajeiti meeca oshequi ashinoncaajeitachari, iro cantaincha coajica anta inquitequi impincatsaritaarantapaaje.

Iquenquetsatacaqueri tsameejeitatsiri anta ovamashiqui.

20 ¹Pashini aisati icanti Jesoshi: —Noshiantempiro aisati jaoca icanta Tasorensi ipincatsariventanti. Itimi ashitarori irovamashite. Tsiteniquera ijatamani nampitsiqui irameneri tsameetenerine. ²Ineapaaqueri coatsiri intsameeteneri, icantiri: “Ariorica pintsameetena meeca, irosati ishaaviniji, nompinajeitempi aparoni quirequi: yora pajitachari tenario”. Icantajeiti: “Ari cameetsa”. Ari icantiri: “Meeca pijajeite, pintsameejeite”. Ijajeitanaque, itsameejeiti. ³Impoiji ijenoquitapaaque catsirin-

caiteri, ijatanaji aisati nampitsiqui yora ashitarori irovamashite. Ineapaaqueri itsipapee shirampari, icatiashijeitaca anta, tecatsi irantajeite. ⁴Icantiri: “Ariorica pintsameejeite anta novamashitequi, cameetsa nompinajeitaquempi”. Icantajeitiri: “Ari”. Irosati ijajeitantanaca, itsameejeiti. ⁵Aisati tampatica ijati nampitsiqui, itsameetacaajeitiri itsipapee. Aisati ishaavijini itsameetacaajeitiri itsipapee aisati. ⁶Impoiji aisati antoo ishaavijiteanaji, ijatanaji nampitsiqui. Ineapaaqueri caari tsameejeitatsi. Icantajeitiri: “¿Paita pantsipetashijeitantari picatiashijeitaca? Te pintsameejeiteji”. ⁷Yacajeitanaqueri: “Tecatsi tsameetacaajeitenane”. Icantiri: “Pintsameejeite novamashitequi, pincarajeiteri yora jivajeitanaintsiri incaranqui”. ⁸Ari otsimancaiteanaji, yora ashitarori icantiri quempeyiniriri iirequite: “Pincajemajeiteri maaroni tsameetacotanarori novamashite, pimpinajeiteri. Pijivateri pimpinajeiteri yora impoitatsiri itsameejeiti. Impoiji pimpinajeiteri jivajeitatsiri itsameejeiti oquitaitetamani”. ⁹Ari ipocajeiti yora impoitatsiri itsameejeiti: capichaji itsameejeiti iriori, iro cantaincha ipinajeitaqueri aparoni tenario. Aisati imoncaratavacaajeitaca ipinajeitaqueri maaroni. ¹⁰Impoijiniquee ipocajeiti iriori yora intamanarori itsameejeitamani. Ijtitashijeivetaca iranaacojeiteri impinajeiteri. Iro cantaincha ipinajeitaqueri aisati aparoni tenario. ¹¹Ineatiiri iirequite, iquisatsataqueri yora tsameetacairiri, ¹²icantiri: “Yora impoitatsiri itsameejeiti capichaji, iro cantaincha imoncaratanaquena pipinataquena. Nainti nojatitamana oquitaitamani notsameeti, opomerentsivetaca, oshequi nomasavitaque. Oncameetsateme nanaacoterime nayeri quirequi”. ¹³Ari icantiri: “Noshaninca, te namatavijeitempiji. Tempa nontanimpji oquitaitetamani: ‘Nompina-

tempi aparoni tenario'; picantajeivetana: 'Ari, cameetsa'. ¹⁴Paanajeri meeca piirequite, pijajeitaje pivancoqui. Nopinatashitacari yora impoitatsiri itsameeti aparo tenario imoncaratantaquempiri. ¹⁵Tempa ocameetsati nopashitacari noirequite. ¿Paita caari picoanta noncavintsayeri?" ¹⁶Aisati noncaman-tempi: anta inquitequi impincatsarijeitanaque yora caari pincatsarijeitatsi aca quipatsiqui. Yorari irinti pincatsarijeive-tachari aca, eiro ipincatsarijeitajitsi anta inquitequi. Aisati icantajeivetari Tasorentsi oshequi atiri: "Pinquemisantena", iro cantaincha te inquemisantajeiteji, irootaque caari irijajeitanea iriori inquitequi.

Yapiitajiro aisati Jesoshi, icanti:
"Noncame, aisati nontinaanaje".

(*Mr. 10.32-34; Ir. 18.31-34*)

¹⁷Ari impojji ijatanaque Jesoshi Jerosarequi, itentajeitanaquena narori, aisati itsipapee iroamere. Apaniro icantajeitanaquena:

¹⁸—Meeca ajajeite Jerosarequi. Ari noponeanaca narori inquitequi, natirita-paaque. Irotaintsi irayena jivatacaajeitiriri saserotepee aisati yora oametantirori Sanquenarentsi, incantena: "Te pincameetsateji". ¹⁹Incantari oromasati: "Payeri Jesoshi, poyeri". Irishirontimentajeitena iriori, impasanajeitena, impajacojeitena coroshiqui, noncame. Oncarataque mava quitaiteri irointinaajena aisati Apa.

Ojatashitiri Jesoshi ijina Severeo.

(*Mr. 10.35-45*)

²⁰Impojji ojatashitiri Jesoshi ijina Severeo, otsipatari otomipee: yora Santiago aisati Joa. Otiyeroashitapaacari, ocantapaaqueri:

—Nocooaque pincavintsayena.

²¹Isampitiro:

—¿Paita picoiri?

Ocantiri:

—Coajica, ariorica pimpincatsaritasanotanaque, nocooaque irisaviquimotempi notomipee: aparo irisavique pacosanoriqui, irio itsipa irisavique pampatequi. Pincantari incarajeitempi impincatsarijeitanaque.

²²Icantiro, aisati icantiri otomipee:

—Te pioteji paitarica picoacotanari.

Oshequi nonquematsicayeteoro paitapeerica. ¿Tempa pintsaroacayearo pinquematsicatearo avirori?

Yacanaqueri:

—Te nontsaroacayearoji, ari nomata-queru narori.

²³Ari icantiri:

—Queario pinquematsicajeitearo. Iro cantaincha te naro cantatsine janicarica saviquimotenaneri coajica: irio cantatsine Apa, irinti.

²⁴Noquemajeitantarori oca icantajeitiriri, noquisajeitaqueri yora Santiago aisati Joa; iro noquisantacariri, icoaveta impincatsariteme. ²⁵Iro cantaincha icajemajeitanaquena Jesoshi, icantajeitanaquena:

—Piojeitanaque yora ivincatsaritepee itsipapee atiri yamejeitaca iperanajeitacari ishanincapee. ^{26,27}Iro cantaincha eiro piquempejeitaritsi. Eiro picoajeititsi avirori pimperanajeiteari pishanincapee. Pincoaquericapimpincatsariventante pintacojeiteari pishaninca, eiroquea piperanayetaritsi. Pantajeiteneri pishaninca paitarica incoacaajeitempiri. ²⁸Noponeaca narori inquitequi, natiritapaaque, iro cantaincha te iro nompocantea nomperana-jeitempi, irointi nopocanta nintacojeitempi aisati noncamentajeitempi, maaroni.

Yoavisacotiri Jesoshi apite caari amenatsi.

(*Mr. 10.46-52; Ir. 18.35-43*)

²⁹Ari noponeajeitanaca Jericoqui, noquenajeitanaque avotsiqui. Yojajeita-

naquena oshequi atiri. ³⁰Ari isaviqui otsapiqui avotsi apite caari amenatsi. Icamanteetiri:

—Coraque Jesoshi.

Ari icajemajeitanaque:

—Pincavintsajeitapeena: tempa aviro ishanincani Iravirini.

³¹Ari iquisatsaqueri yora apatojeitain-chari, icantajeitiri:

—Pimajerete.

Aiquero icajemajeitanaque:

—Novincatsarite, pincavintsayena: tempa aviro naamaajeitacari, aviro ishanincani Iravirini.

³²Icatiapaaca Jesoshi, icantiri:

—¿Paita picoiri nantempiri?

³³Icantiri:

—Novincatsarite, nocoaque namenaje.

³⁴Ari icavintsairi, ipamititaqueri iroqui. Irosati yamenantanaja, aisati yoijajeitana-queri.

**Ijataque Jesoshi Jerosarequi,
ipincatsajeitavaqueri atiri.**

(Mr. 11.1-11; Ir. 19.28-40; Joa 12.12-19)

21 ¹Ari narejeitapaaca Vetejajequi, oquempjitaro toncaari ipajiyeetiro Orivomashi. Irotapaajantsi Jerosare.

Itianquiri Jesoshi apite iroamere, ²icantiri:

—Pijivatanaque anta nampitsiquinta.

Pineapaaquero voro, otsatacotaca; otsipatacari orijani. Pintsatacoreapeero, pamaquenaro. ³Irisampitempirica

ashaninca: “¿Paita pitsatacoreantarori?” Ari pincanteri: “Irio coirori Avincatsarite”. Ari incantempi: “Paanaqueneri”.

⁴Iro yantantarori oca, imoncaratiro isanquenatacotiqueriniri peerani yora camantantsiniri pajitachari Sacariashi:

⁵“Pincamantajeiteri jerosaresati: ‘Coraqueta-queri pivincatsarite. Icameetsataque, te irishemeteki. Inquijacotapeempari vorojani-qui”’. ⁶Ari ijatanaque apite, ineapairo voro, yamaqueneri. ⁷Apite yamaque: tsinane, aisati orijani. Yoanquetaqueneri imititsaqui

quitsaarentsi, impoji iquijacotacari Jesoshi.

⁸Ari itimi oshequi atiri anta avotsiqui, yoayetaqueneri iroicoropee anta avotsiqui iraaticantanaquearori voro. Aisati yoayeta-queri ojempequijaniqui inchatoshi. ⁹Ari ijivajeitanaqueri oshequi atiri anta avotsiqui, aisati impojjeitanaqueri oshequi pashini. Icajemajeitanaque:

—Jeriqueti ishanincani Iravirini, tsame ampincatsajeitavaqueri. Itiancaqueri Avincatsarite, tsame aneacameetsajeiteri. Tempa ineacameetsatiri iriori Tasorentsi.

¹⁰Ari yareetapaaca Jerosarequi. Isampitavacaajeitaca maaroni jerosaresati:

—¿Janicampa yoca?

¹¹Yacajeitakeri itsipapee:

—Iriotaque Jesoshi, poneachari Nasaretequi, ora timatsiri Carireaque. Oshequi iquenquetsatacotiri Tasorentsi.

**Yojocajeitapairi Jesoshi pimantayetatsiri
anta ivancoqui Tasorentsi.**

(Mr. 11.15-19; Ir. 19.45-48; Joa 2.13-22)

¹²Ari ijataque Jesoshi ivancoqui Tasorentsi, iquisajeitapaqueri maaroni amanantatsiri aisati pimantatsiri, yojocajeitapaqueri. Aisati iquempjeitakeri yora pinaavacaariri iirequite, aisati yora pimantiriri paroma: itatsinquitapaaqueri imesatepee aisati isavicamentopee. ¹³Icantajeitakeri:

—Ocanti Sanquenarentsi: “Icanti Tasorentsi: ‘Ocameetsati pinquenquetsatacapinijeitena aca novancoqui’”. Iro cantaincha avirojei te pinquenquetsatacaajeiteriji, irointi picoshitapinijeitiri pocajeitatsiri.

¹⁴Impoji ijatashitakeri oshequi caari amenatsi aisati choriyetatsiri. Yoavisacajeitakeri. ¹⁵Ari ineajeitakeri yora jivatacaajeitiriri saserotepee aisati yora oametantirori Sanquenarentsi, iquisajeitana. Ocameetsati yantayetiri, aisati icantajeiti atiripee:

—Tsame ampincatsajeiteri ishanincani Iravirini.

Irootaque iquisajeitantacariri yoranqui, ¹⁶aisati icantajeitaqueri Jesoshi:

—¿Piquemaquerompa oca icantajeitiri atiripee? Te oncameetsateji impincatsajeitempi.

Yacanaqueri:

—Je, noquemaqueri. Tempa pineanatiro Sanquenarentsi cantatsiri: “Impincatsajeiteri Quirishito yora jananequipee”.

¹⁷Ari ijatanaji Jesoshi, quiso noanjiri narori, aisati itsipapee iroamere. Nojajetanaque Vetaniaqui, aitaque nomaajeitapairi.

Yoamaaqueru Jesoshi iyera.

(Mr. 11.12-14, 20-26)

¹⁸Ari oquitaitetamanaji nopiajeitanaja Jerosarequi. Nianqui itasheanaque Jesoshi. ¹⁹Ineapaaqueru avotsinampiqui iyera. Icoavetapaacaro oitsoqui, te ontimeji; irointi iotaca oshi. Icantiri:

—Meeca eiro otimajitsi aisati oitsoqui iroajeitantajarori atiri.

Irosati oshimpeshitanaca, ocamaque iyera. ²⁰Noneantacarori, nosampitiri:

—¿Jaoca ocantanacari oshintsitantanacari oshimpeshitanaque?

²¹Yacanaquena:

—Queario oca noncamantempiri: ariorica pishiretasanoteari Tasorentsi, pimatero avirori quempetarori pineaqueri meeca. Aisati pinceririca Apa: “Povaa-jero oca toncaari, pojoquero anta incajarequi”, aitaque irimatacaquempiro. Iro cantaincha, eiro pitseenquiritsi.

²²Ariorica pishiretasanoteari, irimatacaquempiro paitapeerica pincoacoteriri.

Icantavacaimentari Jesoshi:

“¿Janicarica tianquiriri?”

(Mr. 11.27-33; Ir. 20.1-8)

²³Ari nareejaitapaaja ivancoqui Tasorentsi, yoametantapaaji Jesoshi.

Irosati ijatashitantapaacari yora jivatacaajeitiriri saserotepee aisati yora jivatacantantatsiri, isampijeitiri:

—¿Janicampa tianquimpiri pantayetanrarori ocapee? ¿Janica nintacaimpiri pipincatsaritantacari?

²⁴Yacanaqueri:

—Aisati narori, aparo nosampitempi: ariorica pancaquena, noncamantempiri janica tiancaquenari. ²⁵¿Janicampa tianquiriri Joa ivaotisantayetariri ashanincapee? ¿Irimpa tianquiriri Tasorentsi? ¿Irimpa tianquiriri atiri?

Ari icantavacaajeitanaca:

—Ancanteririca: “Irio Tasorentsi tianquiriri”, icanteecari: “¿Paita caari piquemisantantari?” ²⁶Iro cantaincha ariorica ancantari: “Irio tianquiriri atiri”, iquisajeiteecari atiripee. Tempa ijitashijeitari irio Tasorentsi tianquiriri Joa iquenquetsati.

²⁷Ari icantajeitiri:

—Te noteteji janicarica tianquiriri.

Icantiri:

—Aisati narori, eiro nocamantimpitsi janicarica tiancaquenari nantantarori ocapee.

Ishiacantiriri yora saserotepee ashitachari itomi apite.

²⁸Aisati icantajeitiri Jesoshi:

—Meeca noshiacantempiri ashitachari itomi apite: ¿paita piquenqueshiretacotiriri? Icantiri intarori itimi: “Notiomi, pijate meeca pintsameete anta ovamashiqui”.

²⁹Yacanaqueri: “Eiro notsameetsi”, iro cantaincha impoji ijati itsameeti. ³⁰Aisati icantiri itsipa itomi: “Notiomi, pijate meeca pintsameete anta ovamashiqui”. Ari icantiri: “Ari, apa, nojataque”. Iro cantaincha te irijateji. ³¹Meeca nosampitempi: ¿janica antasanotiniriri iriri icoacairiri?

Yacanaqueri:

—Yora jivatatsiri itimi, jatatsiri itsameeti.

Icantiri aisati:

—Queario oca noncamantempiri: irijivajeitempi irijajeitanaque inquitequi yora coshitantatsiri aisati ora antapiniyetiriri shirampari caari ai. ³²Ipocapaaque Joa icamantavetimpi jaoca pincantajeameri pincameetsatantajeameri, iro cantaincha te pinquemisantavaqueriji. Irinti iquemisantajeitaqueri yora apatotiniriri oromasati iirequite, aisati oquemisantaqueri antapiniyetiriri shirampari caari ai. Pineajeivetacari iquemisantajeiti icameetsatantajari, iro cantaincha te pinquenqueshirejiteaji avirorijeji; te pinquemisantavaqueriji Joa. Irijajeite irinti inquitequi: aviroriqua avinti, eiro pijajeititsi.

Iquenquetsatacotaqueri Jesoshi amenirori ovamashi.

(*Mr. 12.1-12; Ir. 20.9-19*)

³³Jero oca pashini icantiriri Jesoshi:

—Pashini aisati noshiacantempiro: pinquemajeitavaquero. Itimi shirampari panquitirori ovamashi. Itantacotiro otsapiqui. Aisati yovetsiquiro intsinacaintearori oitsoqui, aisati onanteari oja. Yovetsiquiro pancotsi jenoquitatsiri yamenacotantarori savicatsiri ora panquirentsi. Impoiji icantiri pashini ishaninca: “Meeca nocol pamenenaro novamashite, aisati pintsameetacotenaro”. Icantiri: “Ari”. Impoiji ijatanaque yora ashitarori ovamashi pashiniqui quipatsi. ³⁴Peeranitanaque omoncarataca otimanaque oitsoqui. Itiancavetacari iratiritepee: “Pijajeite pincanteri yora amenirori novamashite impacantena nashitari narori”. Ari ijajeivetanaca. ³⁵Ineajeitavaqueri yora amenirori ovamashi: ipasatavaqueri aparo, tac, tac; pashini yoavaqueri, shemi; irio itsipa ipichavaqueri, pitse, pitse. ³⁶Ari yora ashitarori, ari itiancavetaca pashini iratiritepee, icarajeiveta oshequi. Iro

cantaincha yoashinoncaajeitavaqueri yora amenirori ovamashi. ³⁷Impoiji iquenqueshiretaque yora ashitarori: “Meeca nontianqueri notomi. Iriitatsi impincatsatavaque irinti”. Ari itiancavetacari iriori. ³⁸Iro cantaincha ineajeitan-tavacariri, icantanirotavacaaca: “Coraquetaqueni yora itomi ashitarori iroamashite. Ariorica incame iriri, iriotaque ashitajearoneri ovamashi. Tsame avavaqueri, impoiji ashijeitajearo arori ovamashi”. ³⁹Ari yajeitavaqueri, shepi; yaanaqueri anta otsapiqui, yoaqueri, shemi. ⁴⁰Ariorica impocaque yora ashitarori iroamashite, aamaaca, çjaoca incantapeeriri yora amenavetanariri iroamashite?

⁴¹Icantajeitiri:

—Tempa iraanrojeiteri, iroashinoncaajeteri, iroajeiteri. Impoiji iramenaje pashinipee cameetsatsiri, amenajenerine iroamashite, yora paananterineri irinti oitsoqui irovate.

⁴²Ari icantiri Jesoshi:

—Tempa pineanatiro ocantiri Sanquenarentsi: “Itseencaquero mapi yora vetsiquirori pancotsi, iro cantaincha ipeaquero Tasorentsi otincamiaro pancotsi. Tempa icameetsataque Avincatsarite, tempa avajeitanaquero cavaco maaroni yantajeitiri”. ⁴³Irotaque nocantajeitantimpiri: eiro pineajeitiritsi Tasorentsi impincatsariventajeitempi. Irintiquea irinti impincatsariventajeiteri pashinipee: yora pincatsasanojeiterineri, quemisantasanojeiterineri. ⁴⁴Naro shiacantachari mapi nocantaquempiri: terica piotavaquena, pashinoncaeya; terica pinquemisantena, pijate Sharinca-veniqui.

⁴⁵Ari iquemajeitavaqueri yora jivatacaajetiriri saserotepee aisati yora variseopee. Iojetaque irio iquenquetsatacotaqueri Jesoshi. ⁴⁶Icoajeivetaca iraacanterime Jesoshi, iro cantaincha

itsaroacaajeitacari atiripee. Iotaqueri atiripee queario iquenquetsatacotaqueri Jesoshi Tasorentsi.

Iquenquetsatacotaqueri Jesoshi cajemacantavetariri ishaninca iroajeitea.

22 ¹Pashini aisati ishiacantiniri Jesoshi, icantajeitiri:

²—Noshiacantempro jaoca icanta Tasorentsi ipincatsariventanti. Itimi pincatsari itomi aatsineri ijina. Impoiji icoaque pincatsari iriveshireimentajeiteari ishanincapee itomi. Icajemacantajeivetacari iroacaajeitearime. ³Itiancavetacari inampirepee, icajemacantajeivetacari ishaninca, iro cantaincha, te impocajeiteji. ⁴Itiancavetaja aisati, icantiri: “Pincamanteri yora nocajemacantaqueri: ‘Vetsicayetaca maaroni. Yoayetaqueri vaca aisati vacajaniqui. Caate piveshireimenteari itomi aatsineri ijina’”. ⁵Iro cantaincha te inquemisantavaqueriji, irointi ijajeitanaque jaocarica. Ijati aparo iroanequi, irio pashini ijati iomparita. ⁶Irio pashinipee yaajeitavaqueri itiancane, shepi; yoshinoncaavaqueri, impoiji yoajeitavaqueri, shemi. ⁷Ari iquisanaca yora pincatsari. Itiancaqueri soraro, yoapaaqueri yora oaqueriri itiancane aisati itaitaqueri ivancopee. ⁸Impoiji icantiri itsipapee inampirepee: “Vetsicayetaca maaroni, iro cantaincha te incameetsateji yora nocajemacantajeiveitacari”. ⁹Pijajeite meeca anta nampitsiqui, pincantajeiteri maaroni pineajeitacari: “Caate avinti avincatsaritequi, piveshireimenteari itomi aatsineri ijina”. ¹⁰Ari ijajeitanaque, yapatojeitacari maaroni inajeitacari: cameetsayetatsiri, caari cameetsayetatsi, maaroni. Ijaajeitapaacaro pancotsi. ¹¹Ari ijataque yora pincatsari ivetsajeitavacari pocajeitaintsiri. Ineaqueri aparani shirampari caari quitaatacha cameetsa. ¹²Icantiri: “Noshaninca, nopajeivetaquempi quitaata-

rentsi cameetsari pinquitsaamentearimeri notomi. ¿Paita caari piquitsaantantaro?” Te iranqueji. ¹³Ari icantiri inampire: “Poisoteri iracoqui aisati iitiqui. Pojoqueri anta otsitenitaquenta, anta itiminta irajeitachari aisati cavintsaajeitachari”. ¹⁴Pineaquero: icajemacantavetacari oshequi, iro cantaincha te irishequiteji yora icoyeasannotaqueri.

Yoametiri Jesoshi variseopee iranteneri pincatsari icoacairiri.

(*Mr. 12.13-17; Ir. 20.20-26*)

¹⁵Impoiji ijajeitanaque variseopee, yoametavacaajeitaca:

—¿Jaoca ancanteneri Jesoshi ancomitacanteariri? Ariorica incomitacanea, irosati anquisacantanteariri.

¹⁶Impoiji itiancajeitacari iroamerepee, itsipajeitacari oijatiriri Eroreshi. Isampijeitapaqueri Jesoshi:

—Oametanari, niojeiti queario poameantacanea. Cameetsa poametanaro irineane Tasorentsi, te pintsaroacayeariji itsipapee atiri, aisati te pimpincatsateriji.

¹⁷Meeca pincamantena paitarica piquenqueshiretiri: ¿ocameetsatimpa amperi Sesari airequite? ¿Tericampa oncameetsateji?

¹⁸Iro cantaincha iotaque Jesoshi icoajeiveitaca iramatavijeiterime. Isampitiri:

—¿Paita picoantacari pamatavitena? Te pincameetsateji. ¹⁹Pinijayenari quirequi pipapinitiriri oromasati.

Ari yamaqueneri apamentaqui, ipajiyetiri tenario. ²⁰Ari isampitiri:

—¿Janicampa ashitarori ishiacantaro oca? ¿Jaoca opajitari ivajiro oca sanquenataincharica?

²¹Yacanaqueri:

—Tempa Sesari.

Ari icantiri:

—Panteneri Sesari icoacaimpiri, aisati panteneri Tasorentsi icoacaimpiri iriori.

²²Iquemajeitavaqueri, irosati yoajeitan-tanacari cavaco. Ari ijajeitanaji.

Icantiri Jesoshi saroseo: “Queario, antinaajeitanaje”.

(*Mr. 12.18-27; Ir. 20.27-40*)

²³Impoiji yora saroseopee ipocashita-queri Jesoshi, ijitashijeitaca iriori eiro atinaajeitajatsi, eiro ajajeititsi inquitequi. Ari isampitapaaqueri:

²⁴—Oametanari, icantini peerani Moishishi: “Ontimerica shirampari ijina, iro cantaincha te intimacayeroji itomipee. Impoiji incamaquerica, ocameetsati irraajero irirentini ijinani, intimacayero otomi, iro cantaincha irishiacanteri itomini irirentini”. ²⁵Ari itimi shirampari aisati irirenti, icarajeiti 6. Yaavetajaro ijina, iro cantaincha te intimacayeroji itomi. Impoiji icamaque iriori, torein. Yaavetajaro aisati irirentini, te intimacayeroji aisati, impoiji icamaque. ²⁶Aisati iquempejeitaca irirentipee, maaroni aajeivetajarori: te intimacayeroji itomipee. ²⁷Impoiji ocamaque iroori tsinane, torein. ²⁸Ariorica intinaajeitanaje, ¿janicampa aajeroneri? Pamene, ijinantajeiveitaroni maaroni.

²⁹Ari yacanaqueri:

—Oshequi picomijeitacaro. Te piojeite-roji Sanquenarentsi, aisati te pioteji itasorentsitasanoti Tasorentsi. ³⁰Ariorica antinaajeitanaje, tecatsi aajantsineri. Maaroni tinaajantsineri inquempejeita-jeari inampirepee Tasorentsi: eiro yaajeitapaajitsi ijina. ³¹Intinaajeitanaje maaroni camajeitatsiri, tempa pineana-tiro icantimpiri Tasorentsi: ³²“Narotaque Tasorentsi: ipincatsataquena Avarama, ipincatsataquena Isaca, ipincatsataquena Jacovo”. Te incanteji: “Ipincatsaveitani”, pineaqueri, aneatsi meeca inajeiti: irootaque ipincatsajeitancarari. Aisati, aneatsi inajeiti, irootaque ipincatsariventariri iriori Tasorentsi.

³³Noquemajeitancarori oca, noajeitanaqueri cavaco, nocantajeiti:

—Tempa cameetsa yoametanti Jesoshi.

Icamantiri Jesoshi paita ocoacaasanoteeri Sanquenarentsi.

(*Mr. 12.28-34*)

³⁴Iquemajeitacae variseopee cameetsa yacanaqueri Jesoshi saroseopee, irootaque itsaroacantajeitanacarari iriori irineanatajeri aisati. Ari ipocashitaqueri iriori variseopee Jesoshi. ³⁵Icoajeivetaca incomitacayearime. Icarajeitiri aparoni oametantirori Sanquenarentsi, isampitiri:

³⁶—Oametanari, ainiro oshequi oamejeitacae Sanquenarentsi: ¿paita cameetsatasanotatsiri anquemisantajeitiri?

³⁷Yacanaqueri:

—Iro cameetsatasanotatsiri oca: “Pinintasanoteri catsini Tasorentsi, yora Avincatsarite: pinquearioventero pinintasanoteri, pincantaitatiyempani”. ³⁸Irootaque anaacotantatsiri isanquenajeitiri. ³⁹Otimi otsipa, quempetarori: “Oquem-peta picavintsaaja avisati, pincavintsaajeitiri pishanincapee”. ⁴⁰Ariorica pimajeitacaro oca, ari pimocarajeitacaro maaroni isanquenatiniri Moishishi, aisati maaroni isanquenatiniri yora quenquetsacantatsiniri.

Icantavacamentajeitacari Quirishito: “¿Janica ishanincatacari?”

(*Mr. 12.35-37; Ir. 20.41-44*)

⁴¹Ari Jesoshi isampijeitiri yora variseopee apatotimentajeitariri:

—¿Paita piquenqueshiretacotiriri Quirishito? ¿Janica irishanincateari?

⁴²Yacajeitanaqueri:

—Irishanincateari Iravirini.

^{43,44}Icantiri:

—Peerani osanquenatacaqueri Ishire Tasorentsi Iravirini, icantantariri Quirishito: “Novincatsarite”. Tempa

piotiro isanquenare: “Yora Tasorentsi icantiri Novincatsarite: ‘Pisavique, notiomi, nacosanoriqui, pincaratena ampincatsariventante. Aitaque pisavique irosati nontsoncajeitantariri maaroni quisajeitaquempiri’”. ¿Paita icantantariri Iravirini: “Novincatsarite”? ⁴⁵Iriorica Quirishito ivincatsarite Iravirini, ¿paita picantantariri irio ishanincani? Tempa amejeita apincatsajeitiri jivajeiteeri itimi. ⁴⁶Tecatsi incantajeitea irancanaqueri. Aisati itsarocajaicitacari itsipapee irisampiterime iriori.

Yoamejeitiri Jesoshi atiri jaoca icantari oametantirori Sanquenarentsi aisati variseopee.

(Mr. 12.38-40; Ir. 11.37-54; 20.45-47)

23 ¹Impoiji icantajeitaqueri Jesoshi apatotimentajeitariri, aisati icantaquena narori, aisati icantajeitaqueri iriori itsipapee iroamere:

²—Yora oametantirori Sanquenarentsi aisati yora variseopee ijitashijeivetaca iquempetacari Moishishi: oshequi iperاناتashijeitaquempi. ³Ocameetsaveta pantayetero paitapeerica icantayetimpiri, iro cantaincha eiro pantirotsi yantashiyetari iriori. Icantajeivetimpi: “Cameetsa pintime”, iro cantaincha te intimeji iriori cameetsa. Te irimateroji iriori icantajeivetimpiri. ⁴Oshequi opomerentsitimojeitaquempi pantajeitaquero icantajeitaquempiri, iro cantaincha te impomerentsiventearoji iriori. ⁵Yantashiyetaro paitapeerica pineanteariri, pineacameetsatanteariri. Imavacotacarero irineane Tasorentsi iracoqui aisati yamatseetacotacarero ivancainaqi; antearo oni, pincantajeitantariri: “Pineaqueri, quemisantincari ini”. Aisati oshequi yoanencashitacarero iitsaare ocaratapai. ⁶Ariorica yoajeita, icoasantaque intsipatapiniteari pincatsatsiriri. Aisati anta yapatojeitanta icoasantaque savicamentotsi cameetsari.

⁷Icoaque cameetsa pivetsajeiteari anta nampitsiqui, icoaque pincantajeiteri: “Oametanari”. ⁸Iro cantaincha avinti, eiro piquempetaritsi: eiro picoitsi incanteetempi: “Oametanari”. Iriotaque Tasorentsi oamejeitimpiri; avirojei, pimocaratavacajaicitaca. ⁹Aca quipatsiqui eiro picantashitaritsi itsipapee: “Apa”. Itimi Piri apaniro anta inquitequi. ¹⁰Aisati eiro pishinetiritsi incanteetempi: “Novincatsarite”. Itimi pivincatsarite apaniro, yora Quirishito. ¹¹Pincoaquericapimpincatsaritanaque, pijivate pintacojeiteari itsipapee. ¹²Ariorica pincantajeiteri: “Nompincatsariventempi”, ari pishemetaque catsini, iro cantaincha iroashinonca-yempi Tasorentsi. Impeajeri pincatsaritanajantsine maaroni caari shemejeitatsi.

Iquenquejairi Jesoshi oametantirori Sanquenarentsi aisati variseopee.

¹³Icantiri Jesoshi yora oametantirori Sanquenarentsi aisati variseopee:
—Oshequi pamatavitantajeiti, coajica irootaque oshequi pashinoncaajeitanteari. Eiro pijatitsi anta ipincatsaritinta Tasorentsi, aisati te pincoacayeriji itsipapee irijate iriori. ¹⁴Oshequi pamatavitantajeiti, coajica irootaque oshequi pashinoncaajeitanteari. Picoshitaquero camajimentaaro ovanco; pishiaccantave-taca piquenquetsatacari Tasorentsi, pisamaninirotashitacarero, vero, vero, vero. Aitaque iroasanquetasanojeitempi Tasorentsi. ¹⁵Oshequi pamatavitantajeiti, coajica irootaque oshequi pashinoncaajeitanteari. Oshequi pipomerentsiventacacari itsipa atiri pipeantacariri jorio. Impoiji poametiri yamatavitanti, inquem-petantempiri irijatanteari Sharincaveniqui. ¹⁶Oshequi pamatavianti: piquempetacari caari amenatsi yora acatsatiriri iyamarajaquiririnte. Pashinoncaajeitanaque. Picantashinirota: “Ariorica ancante: ‘Tempa otimi ivanco Tasorentsi,

piotanteari eiro namatavitimpitsi', ari ocameetsati amatavitante. Iro cantaincha ariorica ancante: 'Tempa otimi oro anta ivancoqui Tasorentsi, piotanteari eiro namatavitimpitsi', ari eiro amatavitanti".¹⁷ ¿Paitasa picantantari? Te pionirojeiteji catsini. Oshequi pineaveetashita. ¿Paita cameetsatasanotatsiri? ¿Irompa oro cameetsatasanotatsiri? ¿Irompa ivanco Tasorentsi cameetsatasanotatsiri? Tempa irootaque ocameetsatantari oro otimi ivancoqui Tasorentsi.¹⁸ Aisati picantashinirojeita: "Ariorica ancante: 'Tempa otimi atantanariri Tasorentsi avira, piotanteari eiro namatavitimpitsi', ari ocameetsati amatavitante. Iro cantaincha ariorica ancante: 'Tempa itimi avira avaqueneri Tasorentsi, antaaqueneri, piotanteari eiro namatavitimpitsi', ari eiro amatavitantitsi catsini".¹⁹ ¿Paitasa picantantari? Te pionirojeiteji catsini. ¿Paita cameetsatasanotatsiri? ¿Iriompa pivira? ¿Irompa pitaantanariri Tasorentsi pivira? Tempa irootaque icameetsatantari pivira pitaqueneri Tasorentsi.²⁰⁻²² Pamene, oshequi picanti: "Tempa otimi ataantanariri Tasorentsi", "Tempa otimi ivanco Tasorentsi", "Tempa otimi inquite", paitapeerica. Picantashinirotarro, impoiji pijitashiniroveta ocameetsati pamatavitanti. ¿Pijitimpa te intimeji Tasorentsi? Noncamantempi: itsoteaquero itasorenca maaroni. Iojeitiro pantajeitiri, iroasanquetimentempiro maaroni pamatavitanti.²³ Oshequi pamatavitantajeiti, coajica irootaque oshequi pashinoncaajeitanteari. Pamene, timatsi pimayevetacarri. Ariorica paaque piirequite 10, pipaqueri Tasorentsi aparoni; ariorica paaque 10 oshi pipanquitiri, jero pipavetacarri aparoni oshi. Iro cantaincha te pinquenqueshireteroji icoacaasanovetaquempiri Tasorentsi: icoaveta pintimeme cameetsa, icoaveta pincavintsayerime pishaninca, icoaveta pinquemisanterime. Oncamee-

tsateme pimajeiterome maaroni ocapee, impoiji ariorica paaque paitapeerica oncarate 10, aparoni pimpaqueri Tasorentsi.

Yovaajiniri, icantajiri aisati:

²⁴—Te pioteji catsini, iro cantaincha picoajeiveta poamejeiterime itsipapee. Oshequi piquearioventavetacarro pipomentsiventasanovetacarro caari icoacaasanotimpi Tasorentsi; iro cantaincha te pinquenqueshiretimateroji capichaji oca icoacaasanovetimpiri.²⁵ Oshequi pamatavitantajeiti, coajica irootaque oshequi pashinoncaajeitanteari. Piquivasanovetaro piramento otapiiqui, iro cantaincha te pinquiveroji osantequi: oshequi oshititaque. Aisati piquempejeita avirori, poameetsantashita inecameetsajeitanti-pimpiri ashanincapee, iro cantaincha pishirequi te pincameetsateji catsini: oshequi picoshitapiniti aisati oshequi pinevetaro vaararontsi.²⁶ Te piojeiteji catsini. Pijivate pinquivasanotero osantequi, impoiji eiro ouqipatsitajitsi aisati otapiiqui. Arioricame pincameetsashiretaqueme, irineacameetsajeitempime ashanincapee.²⁷ Oshequi pamatavitantajeiti, coajica irootaque oshequi pashinoncaajeitanteari. Piquempejeitacarro yoanteetariri camatsiri, ipotsotiro quitamarori. Ocameetsavetaca saiteriquica, iro cantaincha tsoompoina oshititaque, ojaacaro itonqui camatsiri.²⁸ Inecameetsajeivetaro ashanincapee pantayetiri, iro cantaincha te pincameetsashireteji: oshequi pamatavitanti aisati oshequi pantapinitiro caari cameetsatatsi.^{29,30} Oshequi pamatavitantajeiti, coajica irootaque oshequi pashinoncaajeitanteari. Peerani yora pishanincapeeni yoajeitakeri quenquetsajeitironiri irineane Tasorentsi, yora cameetsatatsiniri. Meeca povetsicajeitiro pancotsipee pinquenqueshirejeitanteariri yora quenquetsatacantatsiniri. Poanencayetaquero cameetsa.

Picantanirojeiti: “Nontimitaqueame nainti peerani, eiro noajeitirime, eiro noquempetarime nainti noshanincani oajeitaqueriniri”. ³¹Picanti avirori: “Noshanincajeitacari yora peeraniniri”. Queario oca picantanirojeitiri. ³²Aisati piquempejeitacari, avirojeitaque oayeri. Tempa iriojeitaque intacaroniri, meeca aviro vaajeitajirori poantaji. ³³Piquempejeitacari maranque, te pincameetsajeiteji catsini. ¿Pijijeitimpa eiro pijajeititsi Sharincaveniqui?

Icantajeitaqueri Jesoshi:
“Iroasanquetaajeitaquempi Tasorentsi”.
(Ir. 13.34-35)

³⁴Aisati icantajeitaqueri Jesoshi:
 —Nontianquempiri coajica itsipapee quenquetsatacotineri Tasorentsi, iotasanoiriri, oametanteroneri irineane. Niotaque povaaranteri, pashinipee pimpajacotaaranteri, itsipapee pimpasanataaranteri anta papatojeitanta, itsipapee aisati pinquisaaranteri jaocarica irijayetanaqueri. ³⁵Ainiro pantanejei avirori, picoacaajeitaqueri incamajeitaque maaroni cameetsatsiri: yora Averini, maaroni. Aisati yora Sacariashi, yora itomini Verequiashini: iquemisanta-caavetacari ashanincani anta ivancoqui Tasorentsi, iro cantaincha yoajeitaqueri. Pintimitaqueame avirori, pamijeitaquerime poajeitaquerime avirori. Pashi poajeitiro poantajeiti. ³⁶Aitaque iroasanquetimentajeitaquempiri Tasorentsi maaroni picoacaajeitaqueri incame. ³⁷Jo, aviro jerosaresati. Oshequi poapinitiri quenquetsatacotiriri Tasorentsi, pipichaa-vaqueri maaroni itiancayevetimpiri. Oquempeta teapa osaramonquitari orijanipee, ocavintsairi, nocoaveta nonquempetearome narori, noncavintsaa-jeitempime. Iro cantaincha te pincoajeiteji. ³⁸Jero ivanco Tasorentsi pineaca-meetsajeitaqueri: eiro nopiashitajarotsi

aisati. Aisati Apa, eiro ipocashitajirotsi iriori. ³⁹Eiro pineapinijeitajanatsi aisati. Apanivani pineajeitavajena aisati, pincantajeite: “Icameetsataque Jesoshi, iriotaque Avincatsarite tianquiriri”.

Icanti Jesoshi: “Coajica intireetajero ivanco Tasorentsi”.
(Mr. 13.1-4; Ir. 21.5-7)

24 ¹Ari iponeaca Jesoshi ivancoqui Tasorentsi, irotajantsi irijataje. Ari nojatashitaqueri, nocarajeitaqueri itsipapee iroamere, namenacaajeitaqueri ivanco Tasorentsi aisati otsipapee pancotsi. ²Ari icantaquena:

—Ari pineamempeajeivetacar oca pancotsipeeca. Queario oca noncamantempiri: coajica intireetajero maaroni, irovarayeetajero maaroni mapipee.

³Ari nojajeitanaque toncaariqui ipajiyeeitiro Orivomashi. Isavicapaaque Jesoshi, ari nojatashitaqueri, nosampijeeitaqueri:

—Pincamantajeitena: ¿jaoca oncarate intireetantajejarori pancotsipee? ¿Paita iotacayenane jaoca oncarate pimlocanta-jeari? ¿Jaoca oncarate omoncaratantajeari maaroni picantaquenari?

Icantaqueri Jesoshi: “Coajica oshequi inquematsicayetearo atiri”.
(Mr. 13.5-8; Ir. 21.8-11)

⁴Yacanaquena:

—Queariompiya, yamataviyeetimpicari. ⁵Intime oshequi pocatsine, cantapaatsine: “Narotaque nainti Quirishito”. Iramataviyetapeeri oshequi atiri. ⁶Pinquemapiniteri incante: “Imanatavacaajeita atiripee anta”. Incante itsipa: “Coajica irimanatavacaajeitea anta”. Iro cantaincha eiro piquenqueshirejeitatsi. Aitaque oncanteari irimanatavacaajeitea, iro cantaincha tequeratsita omoncarateaji maaroni nocantaquempiri. ⁷Aitaque

oncanteari yora atiri inquisajeitanaqueri itsipapee atiri; intime pashinipee quemajeiterone itashe, iro cantaincha eiro otimanajitsi iroanajeari; aisati onicapinitea quipatsi; ⁸iro cantaincha eirotsita iquematsicaatasanotarotsi.

Icantiri Jesoshi: “Oshequi inquisanayeeteri quemisantatsiri”.

(Mr. 13.9-13; Ir. 21.12-14)

⁹Pashini aisati icantaquena:

—Ariorica iriojeitanaque atiri piquemisanajeitanaque, iroashinoncaapinijectempi, iroarantempi, inquisajeitempi maaroni atiri. ¹⁰Intime oshequi jocayeteroneri iquemisanti, impoiiji inquisaqueri quemisantasanotaintsiri, iraacantayeteri, paitapeerica. ¹¹Intime amatavitantatsineri, incantavetea: “Nonquemisantacayempi”, iro cantaincha iramatavijeiteri maaroni quemisantavetavaquearine. ¹²Oshequi irantajeitero atiri caari cameetsatatsi, oshequi catsini, impoiiji irijocajeitajero inintavacaajeitani. ¹³Iro cantaincha noavisacojeiteri maaroni quearioventanarori nocantaqueriri. ¹⁴Pijajeitanaque maaroni quipatsiqui, pincamantajeiteri maaroni atiri nocoaque nompincatsariventajeiteri; impoiijiquea onmoncaratea maaroni nocantaquempiri.

Icanti Jesoshi: “Irashinoncaajeitea coajica joreasati”.

(Mr. 13.14-18; Ir. 21.20-24)

¹⁵Aisati icamantajeitana Jesoshi:

—Peerani isanquenatini yora Iranieri, yora camantantatsiniri, icantini: “Intime coajica anta ivancoqui Tasorentsi caari cameetsatatsine, iramparajeitero maaroni”. Tempa piotiro oca noquenquetsatcotiri. Ariorica pineaqueri yoca nocamantacotiri, ¹⁶aisati pintimerica Joreaqi, pishiajeitanaque toncaariqui. ¹⁷Ariorica pisavique saiteriqui, eiro pijatapapanajantitsi pivancoqui paantapa-

najantearori pivaararo, irointi pishiasanotanaque. ¹⁸Aisati pintimerica oantsiqui, eiro pipiashitapaintarotsi otsipa piitsaare. ¹⁹Oshequi ashinoncaajeitanaquea tsinane tsomontetatsineri aisati antsotayerine ojananequite: eiro omatirotsi oshiasanotanaque. ²⁰Aitaque coajica pishiajeitanaque, iro cantaincha pincanteri Tasorentsi eiro pishiantatsi incaniniqui aisati quitaiteriqui pimaoreajeitantari.

Icanti Jesoshi: “Oshequi catsini irashinoncaajeitea maaroni savicajeitatsineri”.

(Mr. 13.19-23)

²¹Aisati icanti:

—Aitaque oshequi iroashinoncaajeitempi. Pashinoncaasanojeitanaquea, panaacojeiteri maaroni peeraniniri aisati maaroni timajantsineri coajica. ²²Arioricame osamanitanaqueme iroashinoncaajeitempime, pintsoncaajeiteame maaroni; iro cantaincha incavintsaajeiteri Tasorentsi maaroni quemisanterineri incoyeajeiteri, irootaque eiro osamanitanta iroashinoncayeetempi. ²³Ariorica incanteetempi: “Pamene, jeri yoca Quirishito”, eiro pishiretavacarotsi incantempiri. Aisati, incanteetempirica: “Nijaantapaaja anta Quirishito”, eiro pishiretavacarotsi. ²⁴Intime oshequi amatavitantatsineri, incante: “Naro Quirishito”, irio itsipa: “Naro quenquetsatcotiriri Tasorentsi”. Oshequi intasoncantayete, iramatavijeiteri oshequi savicajeitatsineri, iro cantaincha eiro imatiritsi yora quemisantasanotatsineri. ²⁵Piquemaquena nocamantitaquempiro jaoca oncanteari coajicani. ²⁶Incantempirica: “Timatsi Quirishito anta caariteriqui”, eiro patsipetashitatsi pijatashitena. Ariorica incantempi: “Ainiro Quirishito anta pancotsiqui tsompoina”, eiro pishiretarotsi. ²⁷Ari noponeaca narori inquitequi, natiritapaaque. Tempa

imapocapinitimpi iporequi, porec, impoiji otsoteapaintiro inquitequi: aisati nonquempetapaaajea narori, ariorica nompocaje. Nomapocajeitapaajempi, iro cantaincha pineajeitavajena, maaroni. ²⁸Jaocarica icamapinitiri camatsiri, aitaque ipocashitapinitiri tisoni. Aisati oquempetaca, oshequi itseencanti joriopee, irootaque impocashitantariri oshequi amatavijeiterineri.

Aitaque oncanteari impocantajeari Jesoshi.
(*Mr. 13.24-27; Ir. 21.25-28*)

²⁹Aisati icanti Jesoshi:

—Ari oshequi ompomereentsitimojeiteri atiri, maaroni: irashinoncaajeitanaquea. Impoiji intsipaite intsivacanaque catsirincaiteri, aisati yora cashiri; impariajeitanaque impoquiropee, irishevajeitanaquea maaroni inquiresati. ³⁰Impoiji nonconijatapaaje anta inquitequi, irosati iroashirejeitanaqueari maaroni tseencajeitanari. Irineajeitavaquena maaroni atiri nonquenapaaje mencoriqui: nompincatsaritananotapaaque, noshipaquireasanotapaaque. ³¹Nontiotapaaque iriojeitanteari maaroni nonampire impocajeitantapeempari iramajeitantapeempariri maaroni quemisantajeitanari, maaroni nocoyeajeitaqueri. Intsoncajeitanaqueri savicajeitatsiri pashinipeequi quipatsi, maaroni.

Ishiacantajeitiniri Jesoshi iyera.
(*Mr. 13.28-31; Ir. 21.29-33*)

³²Pashini icantajeitaquena Jesoshi:

—Meeca noshiacantempro iyera: pinquenqueshiretasanotero. Ariorica oshiocajempequitanaaje, aisati oshitanaje, ari piojeitanaque irotimatajantsi onquimojantsitaje. ³³Aisati oquempetaca: ariorica pineajeitavaquero oca nocantaquempiri, piojeitanaque irotajantsi nompocaje. ³⁴Eirotsitarica picamajeiti, ario pineajeitavaquero maaroni oca nocamantaquempiri. ³⁵Ompeanaquea

inquite aisati quipatsi, iro cantaincha eiro opeatsi irointi noneane. Omoncaratajea maaroni nocantaquempiri.

Te ayojeiteji jaocarica oncarate impocantajeari Jesoshi.
(*Mr. 13.32*)

³⁶Pashini aisati icantajeitaquena Jesoshi:

—Iro cantaincha tecatsi iotatsine jaocarica oncarate: te irioteji inampirepee Apa, aisati te nioteji narori. Irinti Apa apaniro ioti. ³⁷⁻³⁹Peerani itimaveitani Noeni, yoapinijeita ishaninca, ishinquitapinijeita, yaapinijeitiro ijina, maaroni. Te inquenqueshirejeteroiji icamantavetariri: “Coraquetaque oonquea”. Impoiji itetacaro pitotsi, yashitacotanaca, tarocn. Impoiji aisati omapocajeitaqueri atiri incani, ooncanaca, itsoncajeitanaca, itsitiajeitanaque. Aisati inquempejeitanaquea maaroni atiri, ariorica omoncaratapaaquea nompocantajeari narori: eiro iquenqueshirejeitatsi, nomapocajeitapaajeri. Impoiji irashinoncaajeitanaquea maaroni tseencajeitatsiri. ⁴⁰Intimerica apite tsameetatsineri anta oantsiqui: naanajeri aparoni nontsipatanaqueari, irio itsipa eiro naanajiritsi. ⁴¹Ontime apite tsinane tononqueroneri tirico: naanajero aparoni nontsipatanaquearo, iro otsipa eiro naanajirotsi.

ICantiri Jesoshi iroamere:
“Paamaajeitajena”.

(*Mr. 13.33-37; Ir. 12.41-48; 21.34-36*)

⁴²Aisati icantana:

—Paamaajeitena, pinquenqueshiretapinijeitena: te piojeiteji jaoca oncarate nompocantajeari. Nomapocapaimpicari. ⁴³Oquempetaca yora ashitarori ivanco icoshiyeetiri: irioteme irotaintsi impoque coshiterineri, irisaaquiteme, eiro ishinetirime incoshiteri, irointi iroimpiavajerime.

⁴⁴Aisati narori, paamaajeitena: nomapocuimpicari. ⁴⁵Pinquempejeiteari nampirentsi cameetsari, yora iotasannotatsiri. Icantiri nampitariri: “Aviro vetsicapiniteroneri iroajeiteari notomi, pimpapiniteri cameetsa”. ^{46,47}Ariorica irineaqueri cameetsa yovetsicapinitiro yoari, ari incanteri: “Cameetsa pantayetaquero nocoacayetaquempiri. Meeca aviro quempeyeajenarone maaroni timimojeitanari. Cameetsa nompinatempi, nioti eiro pamatavitanatsi”. Tempa ari inquimoshiretanaque inampire. ⁴⁸Iro cantaincha intimerica itsipa inampire, caari quemisanterine yora nampitariri. Incante irinti: “Meeca jataque ini nampitanari, eirotsita ipiajatsi”. ⁴⁹Iquisaqueri itsipa nampirentsi, icapojapiniyeteri, ishinquitapinitaca. ⁵⁰Impoiji imapocapaajiri yora nampitariri: te iraamaajeariji. ⁵¹Ari yoasanquetapaqueri, itiancaqueri arejiqui itsipajeitanta-peempariri yora amatavitantatsiri. Ari anta yoashiretasanotanaca aisati oshequi icavintsaanaca. Eiro piquempejeitaritsi avinti, irintiquea pinquempejeitea quemisantasannotiriri nampitariri.

**Iquenquetsacotiro Jesoshi
ora 10 evancaro.**

25 ¹Pashini aisati icamantaquena Jesoshi:
—Meeca noshiantempiro aisati jaoca icanta Tasorentsi ipincatsariventanti. Otimi 10 evancaro, coatsiri amenavaqueri ojimetsori impoque. Otsitenitanaque, irosati aantayetacaro otsioro. ²Ari ocarataque evancaro iotasannotaintsiri apapacoroni, aisati ocarataque caari iotatsi iroori apapacoroni. ³Aavetacaro iroori otsioro, iro cantaincha te ayeji oja orivo. ⁴Irointi ora iotatsiri, aacotanaque oja, ontsiotantearori. ⁵Ari osamanitanaque, tequera impoque. Impoiji aajeitaquero ovochoquine, omaajeitana-

que. ⁶Ari nianquiite oquematii icanteetaquero: “Coraquetapaaque pijimetsori, pijate pamenajeitavaqueri”. ⁷Ari otinaajeitanaca, ovetsicajeivetaro otsioro. ⁸Ocantavetaro caari iotatsi: “Pimpena narori oja, irotaintsi ontsivaque notsioro”. ⁹Iro cantaincha acanaquero ora quenqueshiretainchari: “Eiro nopimpirotsi, eiro onarotsi oja. Nompempirica, tecatsi nontsiotanaqueari narori. Pijajeite pamanantanontapaintea avirori”. ¹⁰Ari ojatanaque amanantavetapainta. Jentsipaite yareetapaaca ojimetsori, iqueanaque anta yoajeitana, icarajeitaquero ora vetsicajeitainchari, yashitacajeitanaca. ¹¹Impoiji opiavetaja caari quenqueshireacha, ocantavetapaacari: “Pashitareajenaro narori, noneapaa-jempi”. ¹²Iro cantaincha yacanaquero: “Te niotempiji, janicampirica. Te noncoyeji pimpcashitena aca”. ¹³Pinquenqueshiretero oca noshiantempiri: paamayena, te piojeiteji jaocarica oncarate nompocantajeari.

**Ishiantiniri Jesoshi yora iomparitachari.
(Ir. 19.12-27)**

¹⁴Icantaquena aisati:
—Pashini noshiantempiro jaoca icanta Tasorentsi ipincatsariti. Oquempetaca ijatanaque ashitaarantachari pashiniqui nampitsi. Ijivataque icajemajeitaqueri maaroni inampirepee, icantaqueri: “Nocoaque pinquempeyeajeitenari noirequite”. ¹⁵Icantiri aparo: “Jeri S/.200,000, pinquempeyeajenari”. Irio icantiri itsipa: “Jeri S/.80,000, pinquempeyeajenari”. Irio itsipa aisati ipaqueri S/.40,000 inquempeyeanteariri. Irio anaacotaintsiri ioti yora ipasanotaqueri oshequi. Yora caari ipasanoti, irio caari iotasannotatsi. Ari ipajeitaqueri, impoiji ijatanaque pashiniqui nampitsi. ¹⁶Yora aasantiriri quirequi oshequi ijatanaque iomparita. Yoshequiasanota-

queneri iirequite ivatorote, icaratiri S/.200,000 aisati. ¹⁷Aisati iomparita yora airiri S/.80,000. Yoshequiaqueri aisati, yaantacari aisati itsipa S/.80,000. ¹⁸Iro cantaincha irinti aavetariri S/.40,000, yaanajiri quirequi, itijiri omoroqui quipatsi. ¹⁹Impoiji ipiaja yora ivatorote, icantapari: “Pimpajeitena meeca noirequite”. ²⁰Ari ipocaque yora aaqueriri S/.200,000, yamaqueri aisati itsipapee S/.200,000. Icantiri: “Jeri quirequi pipaquenari. Oshequi niomparitaca, noshequiasanotaqueri. Jeri itsipa quirequi, icarati aisati S/.200,000”. ²¹Ari icantiri ivatorote: “Cameetsataque, pimatasanotaquero nocoacaquempiri. Chapinqui piquempoyeajanari capichaji, nocoaque meeca pinquempoyeajanari oshequi aisati. Nocoaque oshequi noveshireacayempi”. ²²Impoiji ipocapaaque yora airiri S/.80,000. Icantiri ivatorote: “Jerica quirequi pipaquenari. Oshequi niomparitaca, noshequiasanotaqueri. Jeri itsipa quirequi, icarati aisati S/.80,000”. ²³Icantiri ivatorote: “Cameetsataque, pimataquenaro nocoacaquempiri. Chapinqui piquempoyeajanari capichaji, nocoaque meeca pinquempoyeajanari aisati oshequi. Oshequi noveshireacayempi”. ^{24,25}Impoitapaaque yora aavetariri S/.40,000, icantapaaqueri: “Niotaquempi avirori, te pincavintsante, oshequi notsarocaimpi. Nojiti ariorica noshequiaquerime piirequite, ari paapitsatenarime maaroni, irootaque caari niomparitanta. Notijaqueri piirequite, maaroni. Jerica, noipiajimpiri”. ²⁶Yacanaqueri: “Te pincameetsateji, oshequi piperataca. Piovetaca nocoave-taca narori irishequianaqueme noirequite. ²⁷¿Paita caari pipantari yora itsipa quempoyepinitiriri quirequi? Pimpaje-rime iriori, impinataquenane, naantajea-meri aisati. Aisati iroimpiajenarime maaroni nashisanori”. ²⁸Ari icantiri itsipa

inampire: “Paapitsatajeri noirequite, pimpajeri yora ashitasanotariri meeca S/.400,000. ²⁹Nompasanoteri yora ashitaarantachari. Irintiquea yora caari ashitaarantacha, naapitsatajeri ora capichaji timimovetariri. ³⁰Meeca paanajeri yoca anta otsiteniitetinta: te incameetsateji. Nocoaque incarajeiteri maaroni yora oashirejeitachari aisati ashinoncaajeitachari”.

**Icanti Jesoshi: “Coajica
nontantacoventajeiteri atiri”.**

³¹Impoiji icantajeitana Jesoshi:

—Noponeca narori inquitequi, natiritapaaque. Coajica nojatanaje, impoiji nompijaje aisati; oshequi nompincatsaritapaaque, noncarajeitapaaqueri oshequi nonampirepee. Nompincatsaritasanotapaaque, impincatsatasanojeitavaquena maaroni savicajeitatsiri.

³²Nampatojeiteri maaroni atiri, jaocarica isavicajeitiri. Nonquempeteari yora ashitariri ivira inashitacaari: irovishate aisati yora iyavarate; aisati narori nonashitacayeari quemisantajeitanari aisati tseencajeitanari.

³³Nontantajeiteri maaroni quemisantajeitanari: “Pimpocajeite aca nacosanoriquica”. Irinti tseencajeitanari nontantajeiteri: “Pimpocajeite avirori aca nampatequica”.

³⁴Impoiji noncamantajeiteri savicajeitatsiri nacosanoriqui: “Caatanaque, maaroni, oshequi iriveshireacaajeitempi Apa maaroni. Peerani, catsini yovetsicajeitaquempiro pisavicajeitan-teari anta inampiqui. Meeca pijajeite pincarajeiteri. Cameetsa impincatsariventajei-tempi. ³⁵Aavetaquenani notashe, pipajeitaquenaro noari. Aavetaquenani nomire, pipajeitaquenaro niraqueri. Te piojeivetenaji, iro cantaincha pineshinoncajeitaquena anta pivancopeequi. ³⁶Te ontimaveiteani noitsaare, ari pipajeitaquenaro. Nojoquiveitani, ari pijatashijeitana pineajeitana. Yoiminqueetaquenani caravosoqui, ari pijatashijeitana, picavintsaaajeitaquena”. ³⁷Impoiji icantajeitena yora cameetsajeitatsiri: “¿Arimpa

novincatsarite? ¿Jaocampa ocaratiri aantavetaquempiri pitashe nopantaquempiri poari? Te nonquencheshiretajeroji. ¿Jaocampa ocaratiri aantavetaquempiri pimire nopantaquempiri piraqueri? ³⁸¿Jaocampa ocaratiri noneshinoncatantaquempiri novancoqui? ¿Jaocampa ocaratiri nopantaquempirori piitsaare? ³⁹¿Jaocampa ocaratiri nojatashitantimpiri noquivantantimpiri?”

⁴⁰Ari nancanaqueri: “Queario oca noncamentempiri: ariorica picavintsaqueri aparoni quemisantinari picavintsaquena narori”.

⁴¹Impoiji noncanteri yora catiajeitainchari nampatequi: “Tsamempi pijajeitanaque anta Sharincaveniqui, pinquematsicajeitearo anta paamariqui yovetsicaqueri Tasorentsi peerani. Yovetsiquiniri camaari aisati maaroni oijajeitiriri. Meeca pincarajeiteri anta, oshequi pashinoncauya. ⁴²Peerani aaquena notashe, iro cantaincha te pimpenaji noyeari. Aaquena nomire, iro cantaincha te pimpenaji nireri. ⁴³Nojatashivetimpi noneempime, iro cantaincha te pineshinoncatavaquenaji, te poisavicavaquenaji pivancoqui. Te nonquitsaaveiteani, iro cantaincha te pimpenaji noitsaare. Nojoquitacani aisati yoiminguetaquena caravosoqui, iro cantaincha te pijatashitenaji pineena”. ⁴⁴Impoiji irancajeitena: “Novincatsarite, ¿jaocampa ocaratiri noneantavetaquempiri pashinoncauca, iro cantaincha te noncavintsayempiji?” ⁴⁵Ari noncanteri: “Queario oca noncamentempiri: te pincavintsaajeiteriji yora quemisantajeitanari, irootaque caari picavintsantana narori”. ⁴⁶Ari iroashinoncaajeiteri Tasorentsi anta Sharincaveniqui, incantaitatiyempani. Irinti cameetsajeitatsiri irisavicajeitaje inquitequi, incantaitatiyempani.

Icanti joriopee: “¿Jaoca ancantiriri Jesoshi avacantanteariri?”

(Mr. 14.1-2; Ir. 22.1-2; Joa 11.45-53)

26 ¹Impoiji icamantajeitaquena Jesoshi, narori aisati itsipapee iroamere:

²—Piojeiti ocarati apitenivani quitaiteiri omoncaratantajeari quitaiteiri apajitiri Yavisantaniri. Noponeaca narori inquitequi, natiritapaaque, iro cantaincha coajica impajacotacanteetaquena.

³Ari yapatojeitaca yora jivatacaajeitiriri saserotepee aisati yora savicacaajeitantsiri. Yapatojeitaca anta ivancoqui yora ivincatsarite saserotepee. Ipajita iriori Caijashi. ⁴Yoametavacaajeitaca, icanti:

—¿Jaoca ancantiriri Jesoshi aanteariri aisati avacantanteariri? Iro cantaincha te ancoyeji iriojeitanaque atiripee: iquisacoventaricari.

⁵Ari icanti itsipapee:

—Irotaintsi quitaiteiri Yavisantaniri: inquimoshirejeitanaque atiripee. Eiro amatiritsi ayeri meece Jesoshi, iquisacoventajeitaricari.

Osaitiri vetaniasato Jesoshi.

(Mr. 14.3-9; Joa 12.1-8)

⁶Impoiji yovaanaja Jesoshi Vetaniaqui, noijajeitanaqueri. Nojajeitanaque maaroni, irosati ivancoqui Shimo, yora patsaaveitachaniri peerani. ⁷Noajeitapaaca, irosati opocantacari tsinane amacotaquero casancajari. Oshequi ovinaro casancajari. Ari osaitapaaqueri iitoqui. ⁸Noneajeitantarori oca, noquisajeitanaquero, nocantajeiti:

—¿Paitaquea aparajatantarori?

⁹Ompimanterome casancajari, ayeme oshequi quirequi, impoiji oncavintsayerime oshequi ashinoncaajeitachari.

¹⁰Yacanaquena Jesoshi:

—¿Paita picantimentantarori oca tsinaneca? Ocameetsataque oca antaqueri. ¹¹Incantaitatiyempani incarajeitempi ashinoncaajeitachari, pincantaitatiyempani pincavintsaapinijetiri irinti. Irompa nainti, eiro nocantani nosavique aca. ¹²Iotaque noncame, irootaque osaitantanari. ¹³Queario oca noncamantempiri: coajica pinquensetsa-

tacaajeiteri maaroni savicajeitatsiri quipatsiqui, pintsoteaquero maaroni nampitsi, aisati pincarajeiteri oshequi itsipapee. Jaocarica pijajeiteri pincaman-tajeiteri atiripee antaquerica oca tsinane, iriojeitanteari ocavintsaquena.

Icantiri Jorashi saserotepee:
“Namitacotempi payeri Jesoshi”.

(*Mr. 14.10-11; Ir. 22.3-6*)

¹⁴Impoiji ijatanaque itsipa iroamere, yora pajitachari Jorashi Ishicariote. Ijatashijeitaqueri yora jivatacaajeitiriri saserotepee, ¹⁵icantapaaqueri:

—Ariorica noncamantajeitempi jaoca pincanteriri Jesoshi paanteariri, çpaita pimpinajeitenari?

Yacanaqueri:

—Nompinatempi quirequi.

Ari ipajeitaqueri imentaqui quirequi, icarati 30. Iro yovetsiqueetiri imentaqui perata. ¹⁶Irosati ipiantaja Jorashi, yamenasantiriri Jesoshi iriotanteari jaoca iraacanteriri.

Ivecaratantacarori Jesoshi yoa.

(*Mr. 14.12-21; Ir. 22.7-23; Joa 13.18-30*)

¹⁷Ari moncarataca noajeitantarori tanta caari tapiacha. Nojatashijeitaqueri Jesoshi, nosampijeitiri:

—¿Jaoca picoaqueri nojajeiteri novetsi-cantempirori poyeari pinquenqueshire-tantearori Yavisantaniri?

¹⁸Icantaquena:

—Pijajeite Jerosarequinta, pincantapaaqueri yora pineapaaqueri: “Icanti oamejeiteeri: ‘Irotaintsi nomoncaratero. Nocoaque noyea anta pivancoqui, noncarajeiteri noamerpee’”.

¹⁹Ari nojajeitanaque, nocantapaaqueri. Yonijaquenaro ivanco, irosati novetsicantacaro noajeiteari. ²⁰Ari tsitenijencaiteanaque ipocapaaque Jesoshi, isaviquimo-jeitapaaquena, ²¹noajeitanaca. Impoiji icantajeitaquena:

—Queario oca noncamantajeitempiri: meeca, aca picarajeitica, timatsi aacantenaneri.

²²Ari noashirejeitanaca, irosati nosampijeitantariri:

—¿Narompa, novincatsarite, aacantempineri?

Irio itsipapee aisati icantiri:

—¿Narompa, novincatsarite, aacantempineri?

²³Yacajeitaquena:

—Iriotaque yoca quitacotaquenarica meeca nomatitatequi. ²⁴Noponeaca inquitequi, natiritapaaque. Oquenquetsatocotanani Sanquenarentsi peerani, aitaque nomoncaratero maaroni oquequetsatocotanari. Iro cantaincha oshequi irashinoncaasanotanaquea yora aacantenaneri. Oncameetsateme eiro itimime iriori, impoiji eiro yashinoncaame.

²⁵Impoiji isampitiri Jorashi:

—¿Narompa, oametanari, aacantempineri?

Yacanaqueri:

—Je, avirotaque.

Yoamejeitee Jesoshi avajeitimenteari aisati irajeitimenteri.

(*Mr. 14.22-25; Ir. 22.19-20; I Cor. 11.23-26*)

²⁶Ari tequera nontsoncajeitero noyea, ari yaaquero Jesoshi tanta, yajiricaquero, ipasonquitiri Tasorentsi. Impoiji icarajaquero, ipajeitaquena, icantajeitaquena:

—Paajeitavaquero, poajeitearo. Tempa narotaque camimentajeitempineri.

²⁷Impoiji yaaquero aisati nirajeitantari, ipasonquitajiri Tasorentsi. Ipacojeitaquenaro, icantajeitaquena:

—Pirajeitero, maaroni. ²⁸Tempa irootaque niraja amparajatimentajeitempineri, incavintsaajeitantempiri Tasorentsi. Ariorica paventajeitena, eiro iquenqueshiretajirotsi Tasorentsi caari

cameetsatsi pantajeitiri. Iroaquera oca nocantajeitaquempiri piojeitanteari jaoca pincantajeiri pavisacojeitantajeiri: avirorije, aisati maaroni timajeitatsiri. ²⁹Eiro meeca nirajirotsi aisati ovaja. Ariorica nirajero aisati, noncarajeitempi irajeitero anta ipincatsaritinta Tasorentsi.

Icantiri Jesoshi iroamere: “Meeca tsiteniri pojocajeitanaquena”.

(*Mr. 14.26-31; Ir. 22.31-38; Joa 13.36-38*)

³⁰Ari nopampoyeaventajeitiri Tasorentsi, impoiiji nojajeitanaque anta toncaariqui pajitachari Orivomashi. ³¹Nareejeitantacari, icamantajeitana Jesoshi:

—Meeca tsiteniri pojocajeitanaquena. Tempa oquenquetsatacojeitimpini Sanquenarentsi: “Incamaquerica shentajeitiriri irovishate, irishiajeitanaque irovishate, irovaraajeitanaquena”.

³²Iro cantaincha ariorica nontinaanaje aisati, nojivajeitanajempi Carireaqi.

³³Ari icantiri Petero:

—Arioricampa irojocajeitanaquempiri irinti yocapee, iro cantaincha nainti, eiro nojoquimpitsi.

³⁴Yacanaqueri:

—Queario oca noncamantempiri: meeca tsiteniri, tequerarica irineaje teapa, ari oncarataque mava pincante: “Te nioteriji Jesoshi”.

³⁵Icantiri:

—Ariorica nontsipatempiri ancamaajeite, iro cantaincha eiro nocantitsi: “Te nioteriji Jesoshi”.

Aisati nocantajeivetacari narorije, maaroni.

Iquenquetsatacairi Jesoshi Iriri anta Jetsemaniqui.

(*Mr. 14.32-42; Ir. 22.39-46*)

³⁶Impoiiji ijatanaque Jesoshi Jetsemaniqui, nojajeitanaqueri: narori, aisati maaroni itsipapee iroamere. Icantaquena:

—Pisavicajeitavaquetsita aca: nojate anta nonquenquetsatacaavaquerita Apa.

³⁷Ari yaanaqueri Petero, jeri itomipee Severeo apite. Oshequi yoashiretanaca, iquenqueshiretanaca. ³⁸Impoiiji icantiri:

—Oshequi catsini noashiretanaca.

Pisavicajeitavaqueta aca, pisaaquiteyeca.

³⁹Ari yavisaque capichaji, impoiiji itarecapaacaro quipatsi, iquenquetsatacaqueri Iriri:

—Apa, te noncoaveteaji nonquemaatsicatarome, iro cantaincha eiro nantirotsi nocoavetari narori, irointi nantempiro picoacaaquenari avinti.

⁴⁰Impoiiji ipiashitacari iroamere, ineajeitapaaqueri imajeitaque. Icantiri Petero:

—Tempa pamavetimatero pivochoquine, te pimateroji pisaaquitimate capichaji.

⁴¹Pisaaquite, pincerari Tasorentsi iramitacotantempiri eiro pantantarotsi caari cameetsatsi. Picoavetaca pimatasanotearome maaroni nocoacaaquempiri, iro cantaincha te pimateroji.

⁴²Ari ipianaja, icantajiri aisati:

—Apa, picoacaasanotaquenarorica nonquemaatsicataro, aitaque cameetsa: nononcaratero maaroni picoacaaquenari.

⁴³Ipijanaja aisati, ineajeitakeri iroame-repee, imajeitaque: oshequi aajeitakeri ivochoquine. ⁴⁴Ari ipianaja aisati, iquenquetsatacaajiri. Irosati yapiitaque icantaqueriri incaranqui. ⁴⁵Ipiashitajari aisati iroamere, icantiri:

—¿Maajimpimpa aisati? Meeca moncarataca. Noponeaca inquitequi, natiritapaaque; meeca icantacoventaquena, meeca irayena caari cameetsajetatsi. ⁴⁶Pintinaajeitanaje, tsame ajataje. Jeri, yocatapaaque aacantenaneri.

Yayeetaqueri Jesoshi.

(*Mr. 14.43-52; Ir. 22.47-53; Joa 18.2-11*)

⁴⁷Irosati ipocashitantapaacari Jorashi, yora yoamevetari Jesoshi: ijivajeitapaaqueri oshequi atiri. Yamayetaque ivesamentopee, ivasamentopee, maaroni.

Ipocajeitapaaque aisati yora jivatacaajei-tiriri saserotepee aisati itsipapee savicacantajeitatsiri. ⁴⁸Icamentanerotitacari Jorashi incaranqui:

—Nonintavorotapaaqueri Jesoshi, piojeitantariri. Impoijiquea pajiricapeeri avirori.

⁴⁹Irosati ijatashitantacari, icantapaaqueri:

—¿Ainirompi, oametanari?

Inintavoronirotapaaqueri. ⁵⁰Icantava-queri Jesoshi:

—Noshaninca, ¿paita pipocashitiri aca?

Irosati ipocashijeitantapaacariri maaroni, yaajeitapaaqueri, tapi. ⁵¹Irosati yaantacaro itsipa iroamere ivesamento iriori, ipesavetacari inampire ivincatsarite saserote. Ipeshita-queri iyempita. ⁵²Icantiri Jesoshi:

—Poajero pivesamento, ipiatimpicari.

Tempa impesheetajeri iriori pesantapini-tatsiri. ⁵³Tempa piote noncoaquericame, noncanterime Apa, impoiji intianquenarime oshequi catsini inampire inquisacovenenaricame, iroavisacotenaricame, eiro nomoncaratirome ocamantacotitananiri Sanquenarentsi.

⁵⁵Impoiji icantajeitiri yora pocashijeita-queriri:

—¿Paita pamashitantanari pivesamento aisati pivasamento? ¿Narompa coshinti piquisantanari? Pineapinitana maaroni quitaiteriqui anta ivancoqui Tasorentsi, noametanti; ja, payenaniqueti. ⁵⁶Iro cantaincha irootaque paajeitantaquenari omoncaratantajeari oquenquetsacotitananiri Sanquenarentsi.

Irosati narori notsaroantanaca, noshianaca. Aisati iquempejeitaca maaroni iroamerepee.

**Yayeetanaqueri Jesoshi anta
inaquenta oametavacainchari.**

(*Mt. 14.53-65; Ir. 22.54-71; Joa 18.12-24*)

⁵⁷Ari yayeetanaqueri Jesoshi anta ivancoqui Caijashi: yora ivincatsarite

saserotepee. Yapatojeitanta yora oametantirori Sanquenarentsi aisati yora savicacantajeitatsiri. ⁵⁸Ari impoitana-ji Petero anta otsapiqui iipatsite saserote. Iqueapaaquero otantacota quipatsi, isaviquimotapaaqueri yora soraropee. Yamenapaaque iriotanteari jaocarica incanteeteri Jesoshi. ⁵⁹Ari yora oameta-vacaajeitainchari icoayetanaque tseeyacotearineri Jesoshi, ontimanteari iroacantantariri. ⁶⁰Ari itimi oshequi tseeyacovetacariri, iro cantaincha tecatsi incanteri iroacanteri. Impoiji ipoqui apite pashini tseeyacotapaariri, ⁶¹icantapaaque iriori:

—Icanti yoca: “Nontireajero ivanco Tasorentsi: oncarate mava quitaiteri novetsicajero aisati”.

⁶²Ari icatianaca ivincatsarite saserote, icantiri Jesoshi:

—¿Tecatimpa pincanteri avirori? ¿Paita ojita oca icantacojeitaquem-piri?

⁶³Imajeretaque Jesoshi, te iranqueriji. Yapiitajiri aisati:

—Tempa ineaquempi Tasorentsi, yora aneasanotatsiri. Pincamantasanotena: ¿avirompa Quirishito, Itomi Tasorentsi?

⁶⁴Yacanaqueri:

—Narotaque. Noponeaca inquitequi, natiritapaaque. Coajica pineajena nosavique iracosanoriqui Tasorentsi-sa-nori, aisati pineavajena nonquenapaaje mencoriqui, nompiaje aca quipatsiqui.

⁶⁵Irosati iquisantanacari saserote, irosati itsereantanacaro iitsaare. Icanti:

—Pinquemaniroteriqueti: ijitasorentsi-tacateemi. ¿Paitampa acoantacari intime pashini camantacoterineri? ⁶⁶¿Paita piquenqueshirejeitiri avirorijeji? ¿Jaoca ancantiriri?

Yacajeitanaqueri:

—Cameetsa incame.

⁶⁷Impoiji iquitiojavorojeitaqueri ivoroqui. Impoiji icapojanajeitaqueri, aisati ipasanajeita-queri, tac, tac, tac; ⁶⁸icantaqueri:

—Quirishito, pincamantena: ¿janica capojanataquempiri?

Icanti Petero: “Te nioteriji Jesoshi”.

(Mr. 14.66-72; Ir. 22.55-62; Joa 18.15-27)

⁶⁹Ainiroquera isaviqui Petero anta saiteriqui. Oneaqueri nampirentsi, ocantiri:

—Aviro oijatiriri Jesoshi, yora carirea-sati.

⁷⁰Icanti Petero:

—Te nioteji paitarica picantaquenari.

⁷¹Ari ijavetanaca anta iqueavetapaaca, otimi pashini nampirentsi, oneavaqueri iroori, ocanti:

—Jeri yoca oijatiriri Jesoshi, yora nasaretasati.

⁷²Icantanaquero:

—Te nioteriji yoca picantaquenari.

Terica ontampaticate oca nocantaquem-piri, nocoaque iroasanquetenata Tasorentsi.

⁷³Impoiiji capichaji, jeri pashini cantapairiri:

—Queario, avirotaque oijatiriri: noquemaquero pineanataque, avirotaque carireasati.

⁷⁴Yacanaqueri:

—Teve, te nioteriji yora shirampari picantaqueri. Ioti Tasorentsi queario nocantaquempiri. Terica ontampaticate nocantaquempiri, nocoaque iroasanquete-nata Tasorentsi.

Irosati ineantanaca teapa. ⁷⁵Ari iquenque-shiretanaquero icantaqueriri Jesoshi: “Eirotstarica ineaji teapa, oncarate mava pincante: “Te nioteriji Jesoshi””. Ari isoquijajaji, irapaaca jii, jii.

Yayeetanaqueri Jesoshi anta Piratoqui.

(Mr. 15.1; Ir. 22.66-23.1; Joa 18.28-32)

27 ¹Ari iroaquera oquitaitetamani, yoametavacaajeitaca yora jivata-caajeitiriri saserotepee aisati savicacaajeitantsiri:

—¿Jaoca ancantiriri meeca Jesoshi avacantanteariri?

²Ari yoisoeyetaqueri, yayeetanaqueri anta itiminta pincatsari, yora pajitachari Pirato.

Ishiticaja irisati Jorashi.

(Yan. 1.18-19)

³Yora Jorashi, yora aacantiriri Jesoshi, iotaque yoacantashitacari Jesoshi. Oshequi iquenqueshiretanaca, irosati yoipiantajantanari yora 30 imentaqui: yora peratatatsiri. Icantapaaqueri yora jivatacaajeitiriri saserote aisati yora savicacaajeitantsiri:

⁴—Jeriniro piirequite. Te oncameetsateji oca nantaqueri. Tecatsi irante Jesoshi, naacantashitacari.

Yacajeitanaqueri:

—Jm, aviroyeca.

⁵Ari ipishoncanajiniri quirequi anta ivancoqui Tasorentsi, iquenaitaji, ipianaja. Impoiiji ijatanaque, ishiticaja irisati. ⁶Yora jivatacaajeitiriri saserote yaajeitajiri quirequi, icantajeiti:

—Te oncameetsateji aca anquempoyeajeri yoca quirequica. Tempa iriotaque apinataqueriri iroacantanteariri.

⁷Ari yoametavacaajeitaca:

—¿Jaoca ancantajeriri quirequica?

Icanti:

—Tsame amanantero quipatsi antijan-teariri camatsiri caari aneapinijeiti.

Iro yamanantaqueri quipatsi ora yaapiniyeetiri quipatsi yovetsiqueetiri coviti. ⁸Meeca ipajiyetaquero oca quipatsi: “Ivinaro Jesoshi yoacantantacari”. ⁹Imoncarataquero isanquenatitacari Jeremiashi: “Irayeri 30 imentaqui quirequi, yovetsicanteariri perata. Iriotaque ivinaro iraacantanteariri Quirishito. Eiro ishequititsi quirequi impinatantaveteariri. ¹⁰Iriotaque iramanantantearori quipatsi anta yaapiniyeetiri quipatsi yovetsiqueetiri coviti.

Iriotaque Avincatsarite canterineri iramanantero quipatsi”. Irootaque isanquenataqueniri Jeremiashini.

Ari icantacoventiri Pirato Jesoshi.

(*Mr. 15.2-15; Ir. 23.2-25; Joa 18.28-19.16*)

¹¹Ari icatiimotacari Jesoshi yora pincatsari pajitachari Pirato. Isampitiri iriori:

—¿Avirompa ivincatsarite joriopee?

Yacanaqueri:

—Je, narotaque.

¹²Impoiiji iquishimanataqueri yora jivatacaajeitiriri saserotepee aisati yora savicacantantsiri, iro cantaincha tecatsi incante iriori, imajeretashitaca. ¹³Isampitiri Pirato:

—¿Tempa pinquemeru icantacotaquem-piri? ¿Paita caari pineanatanta avirori?

¹⁴Tecatsi incante, te impiateariji. Ari yoanaqueri cavaco pincatsari, oshequi iquenqueshireanaca.

¹⁵Ari maaroni osarintsi, ariorica omoncarataca Yavisantaniri, yora Pirato isampitapinijeitaqueri savicajeitatsiri: “Timatsi oshequi pishaninca anta caravosoqui. ¿Picoaquempa noisoquijajempiri aparoni?” Aitaque icantapinita maaroni quitaiteri Yavisantaniri, yoimisoquijapinitiri aparoni, janicarica icoiri joriopee. ¹⁶Itimi caravosoqui meeca shirampari iquemacojeitaqueri joriopee, ipajita Varavashi: oshequi yoanti irinti. ¹⁷Ari meeca yapatojeitaca oshequi atiri, irootaque icantajeitancariri:

—Piojeiti nametaca noimisoquijimpiri aparoni timatsiri caravosoqui.

¿Janicampa picoajeitiri noimisoquijajejempiri meeca? ¿Iriompa Varavashi?

Terica pincoyeriji Varavashi, ¿irioricampa picoajeitaque noimpacajempiri Jesoshica, yoca picantiri Quirishito?

¹⁸Iotaque Pirato oshequi iquisashitacari Jesoshi yora jivatacantantsiri, te incoacaajeiteriji ashanincepee inquem-

santajeiteri. Ijivetaca Pirato incantajeiterime ashaninca: “Nocoaque poimpacajenari Jesoshi”. ¹⁹Aisati incaranqui otianquiniri ijina camantiriri: “Ocanti pijina: ‘Eiro poacantiritsi Jesoshi, icameetsatasanotaque. Nomishitacari incaranqui, oshequi noquenqueshiretacaqueri’”. Irootaque caari icoantaveta iroacante-rime. ²⁰Iro cantaincha yora jivatacaajeitiriri ashanincepee icantajeitiri:

—Pincantajeiteri: “Poimisoquijajeri Varavashi, irinti Jesoshi, pimpajacotacanteri”.

Icantajeitaqueri:

—Aviroyeampa, paitarica picoaqueri avirori.

²¹Ari yapiitajiri Pirato, isampijeitiri:

—Jeri icarataque apite: ¿janicampa picoaqueri noimpacajempiri?

Icantajeitaqueri:

—Varavashi.

²²Isampijeitiri:

—¿Jaoca noncanteriri Jesoshica: yoca ipajiyeetiri Quirishito?

Yacajeitanaqueri:

—Pimpajacotacanteri.

²³Isampijeivetari:

—¿Paitampa yantaqueri nompajacotacantanteariri?

Aiquero icajemajeitanaitiri:

—Pimpajacotacanteri. Pimpajacotacanteri.

²⁴Ari iotanaque yatsipetashitaca isampinajeivetacari, aisati oshequi iquisajeitanaca atiripee. Icantiri inampire:

—Pamacotenarota nija.

Yamacotaqueneri, impoiiji iquivacotaca, iriotanteari atiri te incoaveteaji iroacanteri Jesoshi. Ineajeitaqueri atiripee, aisati icantajeitiri:

—Te naro coatsine noacanteri. Picoajeitacuerica avinti, aviroyeampa.

²⁵Yacajeitanaqueri:

—Nocoasanojeitaque, tempa narojeitacue cantacuem-piri. Inquishenata nainti

Tasorentsi, aisati ocameetsati inquisheri notomipee narori.

²⁶Ari yoisoquijajiri Pirato Varavashi.

Icantiri soraro:

—Paanajeri Jesoshica, pimpasateri, impoji pimpajacoteri.

Yora soraropee

ishirontimentajeitacari Jesoshi.

(*Mr. 15.16-20; Joa 19.1-3*)

²⁷Ari yaanaqueri soraro Jesoshi anta ivancoqui pincatsari, icajemajeitaqueri itsipapee soraro. ²⁸Ari isapocaqueri Jesoshi iitsaare, impoji iquitsaatiri otsipa quitsaarentsi, quiraanirori. ²⁹Yovetsica-queri iramatseere totsequi, yamatseeta-queri. Aisati ipaqueri chacopi, icantiri:

—Pajiriqero opirico chacopi.

Yora pincatsari peerani iquitsaatapinitaro quiraanirori, yamatseetaro iramatseere pinatasanotachari, aisati yajiricapinitiro iotiquiro cameetsari. Ari itiyeroashinirojeitacari soraropee Jesoshi, ipincatsatamempeacari, ishirontimentajeitacari, icantajeitiri:

—Aviro, novincatsarite. ¿Pipincatsariventajeitirimpa maaroni joriopee? Iji, iji, iji, iji.

³⁰Iquitiojajeitaqueri, impoji yaapitsatajiri chacopi, ipasatantajari iitoqui. ³¹Oshequi yapinataqueri ishirontimentanatacari, iji, iji, iji. Impoji isapocajiri quitioncanirori, iquitsaatajiri aisati iitsaasesanori. Yaajeitanaqueri impajacoteri.

Ipajacojeitaqueri Jesoshi coroshiqui.

(*Mr. 15.21-32; Ir. 23.26-43; Joa 19.17-27*)

³²Ari yaajeitanaqueri Jesoshi impajacotanteari. Anta avotsiqui itonquiotavacari shirenesati, ipajita Shimo. Iperanatavacari soraro:

—Jero oca coroshica, paanaqueneri yoca.

Ari yaanaqueneri. ³³Yareejaitapaaca Coricotaqui. Iro apajitiro aneanequi:

iitontsini. ³⁴Ari ipeevetacari Jesoshi ovaja, oconoajata quepishijatatsiri. Ineantavetavacaro, te incoyeji irirero. ³⁵Ari ipajacojeitaqueri soraropee coroshiqui, impoji ineatsajeitaca iriojeitanteari janica aajeroneri iitsaare. ³⁷Isanquenajeitaquero paperiqui: “Jerica Jesoshi. Iriotaque ivincatsarite joriopee”. Impoji ipajacotaquero coroshiqui, ivatitotacaro Jesoshi.

³⁶Impoji isavicajeitaca, yamenajeitaqueri.

³⁸Impoji aisati ipajacojeitaqueri apite coshinti: aparo yoatiacotaqueri iracosanoriqui Jesoshi, irio pashini yoatiacotaqueri irampatequi. ³⁹Ari ainiro avisayetatsiri avotsiqui, ishirontimentajeitacari Jesoshi. Itecainajeitaca, ⁴⁰ishirontajeitaca, iji, iji, iji. Icantajeitiri:

—Pintireerome ivanco Tasorentsi, aisati oncarate mava quitaiteri povetsicajerome aisati. Jentsite, poavisacotajea avisati. Avirorica itomi Tasorentsi, jentsite paniireashitaja.

⁴¹Aisati iquempejeitaca yora jivatacaajetitiri saserotepee, yora oametantirori Sanquenarentsi, jeri yora savicacantatsiri: ishirontimentajeitacari. Icantajeiti:

⁴²—Ijitashiniroveitani yoavisacojeitirini ashanincapee, iro cantaincha meeca te irimatajeaji iriori iroavisacotajea irisati. Jentsite, amenavaqueritsita: iriorica avincatsarite, iraniireapaaje. Ariorica iraniireapaaje, ari ampincatsatanaqueri arori. Iji, iji, iji. ⁴³Ari ipincatsarivetari Tasorentsi iriori: ariorica iroavisacoteri irinti. Aamayea ari incoaque iroavisacoteri itomi, tempa icanti meeca yoca: “Narotaque Itomi Tasorentsi”. Iji, iji, iji.

⁴⁴Aisati iquempejeitaca yora coshitanatsiri ipajacoyeetaqueri: ishirontajeitaca iriori.

Icamaque Jesoshi.

(*Mr. 15.33-37; Ir. 23.44-46; Joa 19.28-30*)

⁴⁵Ari icarataque catsirincaiteri tampatica, omapocanaca otsiteniiteana-

que, otsimoiroтанаque: irosati ishaaviniji.

⁴⁶Ari ishaaviniji antearojenca icanti
Jesoshi:

—Eri, Eri, arama savacatani.

Iro acantiri aneanequi: “Apa Tasorentsi,
¿paita pojocantanari?” ⁴⁷Iquemantacariri
yora savicajeitaintsiri, icanti:

—Pinquemerite, icajemaqueri Iriashi.

⁴⁸Ari ishianaca aparoni, yovincaquero
pioncashinganari ovajaqui quepishijari.
Isataaquero inchaquiiqui, ijicotacovetaca-
nari Jesoshi, irantsimicantearorime, ⁴⁹iro
cantaincha icantiri itsipapee:

—Eiro pantiritsi: tsame amenavaque-
rita, impocashiteririca Iriashi iroavisaco-
teri. Iji, iji, iji.

⁵⁰Ari icajemanaji aisati Jesoshi, impoiji
icamanaque, toreni.

**Iquenquetsatacotiri yora
neajeitaqueriri Jesoshi icamanaque.**

(Mr. 15.38-41; Ir. 23.45-49)

⁵¹Icamantacari Jesoshi, otsereanaque
oticaashiro ivanco Tasorentsi: intanaca
jenoqui otsereanaque, tsererere, irosati
ishaaviji. Aisati onicanaca quipatsi, nica,
nica, nica; ocotareanaque antearo
mapipee. ⁵²Yashitareacotanaca tijaari,
itinaajeitanaja oshequi quemisantatsiri,
tinare. ⁵³Impoiji, itinaantajari Jesoshi,
ijajeitanaque yora itsipapee tinaajeitajan-
chari Jerosarequi. Ineajeitaqueri oshequi
atiri.

⁵⁴Ari yora capitano aisati yora
soraropee ineajeitaquero onicanaca
quipatsi, aisati ineajeitaqueri yora
tinaajeitajanchari, ineaquero otseniitana-
naque, maaroni. Impoiji yoajeitanaque
cavaco, aisati icantajeiti:

—Queariotaque: iriotaque Itomi
Tasorentsi.

⁵⁵Otimi anta nijanteaji oshequi tsinane-
pee, amenajeitaqueri Jesoshi. Iroojeita-
que oijaveitariniri, oponeajeitaca Carireaq-
ui. Quiso oapinitirini, opapinitirini

yoari. ⁵⁶Ocarajeitaquero Maria maquita-
rasato; jero otsipa Maria: ora iriniro
Santiago aisati Jose; jero aisati iriniro
itsipa Santiago aisati Joa. Ari oneajeita-
queri Jesoshi, icamanaque.

Yoiminueetaqueri Jesoshini omoroqui.
(Mr. 15.42-47; Ir. 23.50-56; Joa 19.38-42)

⁵⁷Ari ishavijiiteanaque. Itimi aparoni
iroamereni Jesoshi, ipajita Jose. Iponeaca
iriori Arimateaqui; ashitaarantincari ini.

⁵⁸Ijatashitaqueri Pirato, icantapaqueri:

—Camaque Jesoshi. Nocoaque pishine-
tenari naanajeri noiminquajeri
omoroqui: onta yovetsiqueetiniriri
camatsiri.

Ari icantiri iriori soraro:

—Pishineteri yoca iraanajeri.

⁵⁹Ari ijataque, yaanaqueri, yampinaica-
cotaqueri tocoyaqui caari pitsitatsi.

⁶⁰Impoiji yoaqueri omoroqui mapi
iroaquera imoqueetiro. Itivironquiro
antearo mapi omoroqui, yashitacotanta-
cariri. Impoiji ijatanaji Jose. ⁶¹Ainiro
osavicaque anta Maria maquitarasato
aisati otsipa Maria. Oneacotaqueri
yoiminueaqueri.

**Ijati soraro ishentajeivetaro omoro
inaquenta Jesoshi.**

⁶²Iro quitaiteri ipajacotantariri Jesoshi
opajita Yavisantaniri. Oquitaitetamana-
que ijatashijetaqueri Pirato yora
jivatacaajeitiriri saserote aisati yora
variseopee. ⁶³Icantajeitapaqueri:

—Novincatsarite, noquemajeitaqueri
icantaqueri chapinqui yora amatavitanta-
tsiri: “Noncamaque, impoiji oncarataque
quitaiteri mava, ari nontinaanaje”.

⁶⁴Nocoaque pintianque soraro meeca
irishentasanotero omoro anta
yoiminueaquerinta. Iramenasanotero
irosati omoncaratanteari mava quitaiteri.
Ijatashitiricari iroamereni, yaanajiricari.
Impoiji icantajeitiricari ashaninceapee:

“Tinaanaja inaji Jesoshi”. Peerani oshequi yamatavitantini iriori, iro cantaincha ariorica iraanajeri, yamatavitasanojeitiricari iroamereni ashanincepee, icanticari: “Tinaanaja inaji Jesoshi”.

⁶⁵Icantiri Pirato:

—Jeri yoca soraropee, pijajeite pamenasanojeitero.

⁶⁶Irosati ijajeitantanaca, yashitacotasanotaqueri, impoiji ishentajeitiro soraro.

Itinaamanaja Jesoshi.

(Mr. 16.1-8; Ir. 24.1-12; Joa 20.1-18)

28 ¹Ari avisanaque quitaiteri imaoreajeitanti, meeca otomin-cotapaaque. Tsiteniquera ojatamanaque Maria maquitarasato, aisati otsipataro omariaroronte. Ojataque amenamanajero omoro yoyeetaquerinta Jesoshini.

²Omapocanaca antearo onicanaca quipatsi aisati. Jeri aisati itimi inampire Avincatsarite: iponeanaca inquitequi, ipocaque itivironcapaaquero mapi, irootaque isavicantapaacari. ³Oshequi ishiquairepaaque, iquempetacaro iporequi. Oquitamarotasanotaque iitsaare, oquempetacaro sharaca.

⁴Oshequi catsini itsaroocajeitavacari soraropee, te irimatajeaji irishevatajea: iquempvetanaca incamaquerica. ⁵Ari icantiro tsinane:

—Eiro pitsaroitsi avinti. Niotaque irio pipocashiveta Jesoshi. ⁶Te aneajeriji meeca, tinaanaja ini. Tempa icamantitaquempini. Caatanaque, pamenero aca yoyeevetarica. ⁷Impoiji pishintsitanaje pijatanaje pincamantajeitapeeri iroamere: “Tinaanaja Avincatsarite, irijivajeitanaquempi Carireaque. Aitaque pineajeitapaajeriri anta”. Irootaque nocamantaquempiri.

⁸Ari oasanotanaque cavaco, aisati oshequi oquimoshiretanaque. Ojatanaque, oshiashitanacari iroamere, oncamanteri. ⁹Nianqui imapocaquero Jesoshi,

ivetsatacaro. Ojatashitaqueri, otiyeroashitacari, ajiricapairi iitiqui. Oshequi opincatsatapaacari. ¹⁰Impoiji icantaquero:

—Eiro pitsaroitsi. Pijajeite meeca pincamantajeiteri noamereni irijajeiteta anta Carireaque. Aitaque irineajeitapaajenari anta.

Ijtashijeivetaca joriopee yaanajiri iroamereni Jesoshi.

¹¹Ari ojatashitaqueri iroamereni tsinane. Irinti yora soraro shentavetarori omoro ijataarantaji nampitsiqui, icamantajeitapai yora jivatacaajeitiriri saserotepee. ¹²Yapatojeitiri iriori yora savicacantantatsiri. Yoametavacaajeitaca: —¿Jaoa ancantadori meeca amanacotanteariri?

Ari icajemajeitaqueri soraro, icantajeitaqueri:

—Jeri yoca quirequica, nocoli nompinatemp. ¹³Pincantashijeiteari atiripee: “Nomaajeitaque nianquiiteni. Ipocaque iroamereni Jesoshi, yaanajiri”. ¹⁴Ariorica inquemacovetaquempi yora pincatsari, pincantaque: “Nomaaque”, noncamanteri narori: “Eiro piquishiriti soraropee. Te irimayaji. Narotaque cantaqueeriri: ‘Pintseea’”. ¹⁵Ari yaajeitaqueri quirequi, icamantajeitaqueri atiri: “Nomaajeitaque, impoiji yaajeitajiri iroamereni Jesoshi”. Ainirotatsi meeca icantajeiti joriopee meeca.

Ineajeitajiri Jesoshi anta Carireaque.

(Mr. 16.14-18; Ir. 24.36-49; Joa 20.19-23)

¹⁶Ari nojatanaque Carireaque, notsipaajeitacari itsipapee iroamere. Aparoni peaincha, yora Jorashi. Nojajeitanaque toncaariqui icantaquenari chapinqui Jesoshi. ¹⁷Noneajeitapaajiri, nopincatsajeitapaajiri. Iro cantaincha aparopee tseencavetapaincha. ¹⁸Ari ipocashijeitana Jesoshi, icantaquena:

—Icantitaquenani Apa peerani:
 “Pimpincatsaritanote meeca aca
 inquitequi aisati pimpincatsariventasano-
 jeiteri maaroni quipatsisati”. ¹⁹Irootaque
 nocantantimpiri: pijajeite maaroni
 nampitsipeequi, pinquemisantacaajeiteri
 maaroni atiripee, pintsoteaqueri maaroni.
 Ariorica inquemisantajeitaque, pivaotisa-
 jeiteri: irootaque icoacaqueriri Apa,

aisati nocoacaajeitaqueriri narori, aisati
 ocoacaajeitaqueriri Ishire Tasorentsi.
²⁰Pincamantajeiteri atiri irimajeitero
 maaroni nocamantaquempiri. Quiso
 noajeitanaquempi, noncanteani, irosati
 nompocantajeeri nompincatsaritantapaa-
 jeeri.

Ari ocarati. Narotaque sanquenatirori:
Mateo

YORA MARICOSHI ISANQUENATACOTAQUERI JESOQUIRISHITO, JAOCA ICANTA IRIORI YOAVISACOTANTI

Yantayetiri Joa vaotisantatsiri.
(Mt. 3.1-12; Ir. 3.1-18; Joa 1.19-28)

1 ¹Meeca noncamantempro cameetsatsiri. Noncamantempro yoavisacotanti Jesoquirishito. Tempa iriotaque itomi Tasorentsi. ²Peerani isanquenatini camantantatsiniri pajiveitachaniri Isayashi. Jero oca isanquenatiniri: “Icantiri Tasorentsi itomi: ‘Pinquemena, notiomí. Nontianqueri quenquetsatocotempineri, irijivatanaquempi. Incantajeiteri atiri: Paamaajeiteari Quirishito, pincameetsashirejeitanaque. ³Inquenquetsatocotajeiteri ishaninca caaraiteriqui. Incantajeiteri: Pincameetsashirejeitanaque oncanteata ariorica impoque Avincatsarite, irineacameetsajeitanta-peempiri’”. ⁴Ari moncaratapaaca icantiniri peerani Isayashini. Yareeta-paaca caaraiteriqui Joa, yora vaotisantatsiri. Icantajeitaqueri ishaninca:

—Pinquenqueshireempa, eiro piquempetajatsi peerani. Ariorica pojocasanajeitajero pantajeiveitaniri, ari novaotisajeitaquempi, impoiji iriojeitanaque atiri icavintsaajeitaquempi Tasorentsi, eiro iquenqueshireacotajimpirotsi pantaveitaniri.

⁵Ari ijatashijeitaqueri maaroni joreasati, aisati maaroni jerosaresati, icamantajeitapairi:

—Ainiro nantayetiri caari cameetsatsi. Nocoaque navisacotaje.

Ari ivaotisajeitavaqueri Joa Joriraniqui. ⁶Irio iquitsaatarí tijachari iviti cameyo. Ishiticatsaquitari meshinantsitsa. Yoapinitari quentori aisati ija pitsi. ⁷Ari icamantapinitiri ishaninca:

—Coraque impoitapeenaneri, yanaacotacuena, ipincatsaritanoti irinti. Nopincatsatanotaqueri catsini, narori notseencaja narosati. ⁸Novaotisajeitaquempi nijaqui, iro cantaincha intianquempiro irinti Ishire, ontsipajeitantempro.

Ivaotisatapaaca Jesoshi.
(Mt. 3.13-17; Ir. 3.21-22)

⁹Ari pashini quitaiteri yareetapaaca Jesoshi. Iponeaca Nasaretequi, timatsiri Carireaque. Ivaotisatavaqueri Joa Joriraniqui, ¹⁰impoiji yaatanaji. Yamenanaque jenoqui, irosati ineantavacaro Ishire Tasorentsi. Omapocapaaca aniireashitapaaqueri, oshiaqueri sampaquiti.

¹¹Iquematiiri Tasorentsi icantiri:

—Avirotaque notomi nonintasanotiri. Oshequi noquimoshireventasanotaquempi.

Ijatanaji Jesoshi caaraiteriqui.
(Mt. 4.1-11; Ir. 4.1-13)

¹²Impoiji aanaqueri Ishire Tasorentsi caaraiteriqui. ¹³Itimaiti anta ocarataque 40 quitaiteri. Yora Satanashi ineantaveta-

cari, irantacayerime caari cameetsatsi. Aisati tecatsi ishaninca intsipateari, irinti timatsi covencayetsiri, iro cantaincha intacojeitacari inampirepee Tasorentsi.

Iquenquetsataque Jesoshi.

(Mt. 4.12-17; Ir. 4.13-15)

¹⁴Ari pashini quitaitei yashitacoyeeta-queri Joa caravosoqui. Impoiji ijatanaji Jesoshi Carireaquei. Icamantajeitaqueri ishaninca jaoca icanta Tasorentsi yoavisa-cotanti. ¹⁵Icantajeitaqueri:

—Irotaintsi impincatsariventajeitajee Tasorentsi. Pinquenqueshireempa, eiro piquempetajatsi peerani: te pincameetsavei-teani. Pinquemisantajeite pavisacotantajeari.

Icoyeaqueri Jesoshi iroamerepee.

(Mt. 4.18-22; Ir. 5.1-11)

¹⁶Ari pashini quitaitei ishiteatanacaro Jesoshi incajare timatsiri Carireaquei. Ineapaaqueri Shimo, aisati irirenti, Antirishi. Iquitsati incajarequi: aitaque icantapinita, iquitsatapinitiri shima.

¹⁷Icantapaaqueri Jesoshi:

—Pojatanaquena, nocoaque pinquemi-santacaapiniteri atiri.

¹⁸Irosati yojocantanacaro iitsarite, yoiyatanaqueri. ¹⁹Capichaji yovaavetanaca aisati, ineapaaqueri Santiago, Joa, apite: iriotaque itomipee Severeo. Isavicajeiti ivitoqui, ishiticayetiro iitsarite. ²⁰Icajema-paaqueri, yoiyajaitanaqueri. Yojocanaqueri iriri, isavicaque irinti pitotsiqui, icarajeita-queri amitacojeitiriri.

**Iqueapaaque Jesoshi
yapatojeitanti joriopee.**

(Ir. 4.31-37)

²¹Impoiji yareetapaaja Jesoshi Caperena-qui, icarajeitiri iroamerepee. Irootaque saavaro, imaoreajeitanti, iqueajeitapaaque pancotsiqui yapatojeitanti. Yoametanta-paaque. ²²Yora atiripee, yoajeitanaque cavaco, icantajeiti:

—Pineaqueri, cameetsa yoametantasa-notaque, iotasanoti irinti. Te inquempe-tearigi yora oametapinijeiveteerori sanquenarentsi: te iriotasanoteji irinti.

²³Aisati itimi anta pancotsiqui aparoni shirampari neiriri camaari. ²⁴Icajemaco-tavaqueri Jesoshi, icantavaqueri:

—Niotaquempi: aviro nasaretetsati, aisati aviro itomi cameetsari Tasorentsi. ¿Paita pipocashitantanari? ¿Arimpa pintsoncajeitapaaquena?

²⁵Icantiri Jesoshi camaari:

—Pimajereiteteve. Pinijantareanajeri noshaninca.

²⁶Ari yampitsiitacaanacari ashaninca, antearoquema icajemanaque, irosati inijantareantanajari camaari. ²⁷Aisati yoajeitanaque cavaco ishaninca, maaroni. Isampitavacaanaca:

—¿Pineaquerompa imataqueri? Iroaquera aquemaquero oca yoameta-queeri. Aisati imataqueri camaari, itiancaqueri: itsaroacaitacariteemi.

²⁸Irosati iquenquetsatocotantajeitacari maaroni carireasati.

Yoavisacotiro Jesoshi irairo Petero.

(Mt. 8.14-15; Ir. 4.38-39)

²⁹Ari iponeajeitajari pancotsiqui yapatojeitanti, ijajeitanaque ivancoqui Shimo, jeri Antirishi. Yoiyajaitanaqueri Santiago aisati Joa.

³⁰Icamantiri Jesoshi:

—Ojoquiitaca irairo Shimo, aaquero catsiirentsi. Jero onta nariainchari.

³¹Ari ijatashitanaquero, yacatsavacotapaa-queri, yoisavicapajiro. Irosati opeantanaja ovatsiire, irosati opajeitantacari iroyeari.

**Iro saavaro yoavisacoyetantacariri
Jesoshi mantsiyetatsiri.**

(Mt. 8.16-17; Ir. 4.40-41)

³²Iqueanaji catsirincaiteiri, irotanaintsi ontsitenijencaitaanaje, yamayetaqueneri Jesoshi maaroni mantsiyetatsiri, aisati

maaroni yatajeaoncayetiri camaari.

³³Maaroni nampitsiquiniri yapatojeita-paaca omoroqui pancotsi. ³⁴Isavicajeitapaaque maaroni mantsiyetatsiri, onashiyetaca imantsiarepee. Yoavisacojeitajiri. Aisati icantaqueri camaari:

—Pinijantareajeitanajeri yora patajeaonquiri, aisati pimajerejeite.

Yora camaari, iojeitaqueri Tasorentsi ini Jesoshi, irootaque caari icoanta Jesoshi incamanteri atiri.

Imananaja Jesoshi, ijatanaji.

(Mt. 4.23; Ir. 4.42-44)

³⁵Oquitaitetanaque, tsiteniquera itinaamanaja Jesoshi. Ijatamanaque anta tecatsi timatsine, iquenquetsatacairi iriri.

³⁶Icoacoayetajiri Shimo aisati itsipajetari. ³⁷Ineantapaajariri, icantapaaqueri:

—Icoacoajeitaquempi maaroni ashaninca.

³⁸Ari icantavaqueri irirori:

—Ari inajini. Tsame avaanajea otsipapeequi nampitsi. Aitaque anta nonququetsatacaajeiteri itsipapee atiri, irootaque nopocantacari quipatsiquica.

³⁹Iquenaquenayetanaque, itsoteajeitaquero nampitsipee anta Carireaque. Iquenquetsatacaapinitaqueri ishaninca anta yapatotapinijeitanta, yoavisacojeitaqueri maaroni neiriri camaari.

Yoavisacotaqueri Jesoshi patsaatsiri.

(Mt. 8.1-4; Ir. 5.12-16)

⁴⁰Pashini quitaiteri ijatashitaqueri patsaatsiri, icantapaaqueri:

—Tempa aviro pincatsari, pincavintsayena. Ainiro pitasorena: pinintirica poavisacotajena, ari pimataquero.

⁴¹Oshequi icavintsasaanotavaqueri. Ari yacotashitavaqueri, ipamitavaqueri. Icantavaqueri:

—Je, noninti: aitaque pavisacotaje.

⁴²Irosati opeantanaja ivatsaaro, yavisacotanaji. ⁴³Itiancajiri, icantasano-tiri:

⁴⁴—Noncantempi: eiro picamantayetiri-tsi itsipapee, irinti pijatashiteri saserote. Pinijaapaajeri pavisacotaji. Pimoncara-terero icantiniri Moishishini: poyeneri Tasorentsi pivira iriotanteari pishaninca pavisacotaji.

⁴⁵Ari ijatanaque, iro cantaincha icamantacoyetaquero, yovaraaquero. Iotacojeitaqueri Jesoshi, irootaque caari ijatanta nampitsiqui. Itimaiti anta ocaraiteti. Ijatashijeitaqueri atiri poneayetachari otsipapeequi nampitsi.

Yoavisacotaqueri Jesoshi choritatsiri.

(Mt. 9.1-8; Ir. 5.17-26)

2¹Pashini quitaiteri ipianaja Jesoshi Caperenaquero. Iquemacojeitajiri areetaja ivancoqui. ²Yapatojeitaca oshequi atiri, ijaapaaca pancotsiqui. Tecatsi inquenapee pashini inquempejitantapeemparori omoro. Iquenquetsatacaajeitaqueri Jesoshi. ³Ari icompitacotapaaqueri choritatsiri. Icarati amiriri itsipasati. ⁴Tecatsi inquempejitantapeempariri Jesoshi, yojocaajeitavaqueri atiripee. Ari yataitacaanaqueri otataroqui pancotsi. Itatareapaaquero, itampaticataquero inaquenta Jesoshi. Imataquero omoro, ari yoaniitacotaqueri inareantariqui. ⁵Iotavaqueri Jesoshi ishirejeitacari, irootaque icantantacari:

—Noshaninca, ainiro pantayetiri, iro cantaincha eiro noasanquetimentimprotsi, aitaque noavisacotajempi.

⁶Ainiro anta isavicaiti oametantirori sanquenarentsi. ⁷Icantashiretaque irirori:

—¿Paita icantashinirotantarori oca?

Ijitasorentsinerotacateemi. ¿Jaoca incanteriri iroavisacotanteariri? Tempa apaniro yoavisacotanti irinti Tasorentsi.

⁸Ioshiretashitaca Jesoshi icantashiretaqueri, icantiri:

—¿Paita picantashiretantari? ⁹¿Paita pomerentsitasanotachari? ¿Pomerentsinimpa nontaniriri yoca choritatsiri: “Eiro

noasanquetimpitsi, irointi noavisacota-jempi"? Te ompomerentsiveteaji: eiro piojeititsi nomaterorica. Irointi pomerentsivetacha noncanteri yoca: "Pincatianaje, paajero pinariantavetari, paniitanaje". Tempa onconijatasannotanaque nomaterorica. ¹⁰Aca quipatsiquica nocavintsaajectiri caari cameetsatatsi, aisati noavisacojeitaqueri. Nocoaque piojeite ainoro notasorenca noavisacotanteariri.

Ari icantaqueri choritatsiri:

¹¹—Nocantimpi, pincatianaje, paanajero pinariantaniri, pijataje pivancoqui.

¹²Irosati icatiananaja, yaanajiro inariantaniri, isoquijanaji. Ineajeitavajiri ishaninca, yoajeitanaque cavaco. Icantajeitanaque:

—Tempa icameetsatasanoti Tasorentsi, te aneapiniteroji peerani quempetarori oca.

Ari icantavacaaca.

(Mt. 9.9-17; Ir. 5.27-39)

¹³Iplanaja Jesoshi aisati otsapijaqui incajare. Yapatotashijeitapaajari aisati atiri, yoametavajiri. ¹⁴Impoiji yovaanaja aisati. Ineapaaqueri Irevi, yora itomi Arijeo, isavicaiti pancotsiqui yapatotapinitiri quirequi: yapatotapinijeitiniroomasati. Icantapaaqueri:

—Tsame, poijatanaquena.

—Ja, tsamequeti.

Ari icatianaca, yoijatanaqueri. ^{15,16}Ari ijajeitanaque ivancoqui Irevi. Yoacaajeitapaacari oshequi oijajeitiriri Jesoshi, iroamere, apatotapinitiriri quirequi, maaroni. Jeri aisati yoacaacari caari cameetsayetatsi. Yareejeitapaaca oametantirori sanquenarentsi, variseo ini. Ineacotapaaqueri Jesoshi yoimojeitacari caari cameetsayetatsi. Isampitapaaqueri iroamere:

—¿Paita itsipajeitantariri yocapee, yoajeita? Te incameetsajeiteji.

¹⁷Ari iquemavaqueri iriori Jesoshi, icantiri:

—Yora caari mantsiatatsine te incoyeji aavinterineri, irintiquea mantsiatatsiri. Te iro nompocantea noncajemeru cameetsatatsiri, irintiquea caari cameetsatatsi.

¹⁸Ari itijeita iroamerepee Joa aisati iroamerepee variseo. Yora atiri ipocashitiri Jesoshi, icantapaaqueri:

—Jeri meeca itijeita iroamerepee Joa, aisati iquempejeita iroamerepee variseo. ¿Paita caari ititanta poamerepee avirori?

¹⁹Ari icantavaqueri Jesoshi:

—Oquempetaca ariorica iraye shirampari ijina, incajemajeiteri ishaninca inquimoshireventajeiteri. Ariorica irareejeitapeempa, çarimpa intijeitapeempa iriori? Eiro. Tempa iriveshireimentapeempari. Pineaquero, meeca nocarajeitiri noamerepee: ¿paita nontitacanteariri? ²⁰Aisati, ariorica irojocajeitanajeri ishaninca aatsiri ijina, impoijini-quea intijeitanaquena. Aisati coajica, nojocanajeririca noamerepee, iroashireta-cojeitanaquena, irosati intijeitanaquena. ²¹Tempa ajacapinitiro quitsaarentsitsara, irootaque oshiricamaotantari. Impoiji, te oncameetsateji impataqueetero nianqui iroaquerari: tequera oshiricamaoteji irointi. Impataqueeterome, impoiji ariorica inquiveetajerome aisati, oshiricamaotanaqueme iroori iroaquerari, antsiviacaquerome maatsarantsi. Impoiji ontsereacaquero iroaquerari. ²²Ariorica ampeantantajearime pearentsi iroaquerajari peesatitatsiri imeshina, tempa ari intapianaqueame, intoncanaqueme. Aitaque intseanaqueme, aisati amparajatanaqueame iroaquerajari, chararara. Tempa apeantantapinitaro iroaquerajari imeshinaqui iroaquerari. Pineaquero: iroaquerari oca noamejeitimpiri, te oncameetsateji onconoyearo ora yoametapinijeitimpiniri intaroniri.

Icantavacaimentacaro saavaro.*(Mt. 12.1-8; Ir. 6.1-5)*

²³Ari pashini saavaro iquenanaque Jesoshi panquirentisiqui, itsipajeitari iroamerepee. Ari nianqui yaviitapairo iroamere oitsoqui tirico, itaquireiro otaqui, yoajeitaro oitsoqui.

²⁴Ari icantiri variseo:

—Paitateemi yaviitantarori oitsoqui, itaquireitantacaro quitaiteri amaorean-tari. Te oncameetsateji. ¿Paita yantanta-rori?

²⁵Ari yacanaquero Jesoshi:

—¿Tempa pinquencheshireeroji sanquenarentsi quenquetsatacotiriri peerani Iravirini? Te ontomeji iroyeari, aaquero itashe, aisati itsipajeitari.

²⁶Ainero onaveitani tanta yovetsiqueetini-riri Tasorentsi: te irishineyeeteriji iroajeitearo atiri, apaniro yoaro saserote, irinti. Iro cantaincha aavetacari itashe Iravirini. Ijatashitiri Aviatara, yora ivincatsarite saserote, icantiri: “Notashea-jeitaque. Tecatsi noajeiteari”. Ari ipavaquero tanta: “Jero oca, poyea”. Ari yoacaro, aisati yoacajeitacari itsipajei-tari. Caari inajeiti saserote, iro cantain-cha te irininteji Tasorentsi iroashinoncaa-jeiteri. ²⁷Pamene, yovetsiquiniri Tasoren-tsi atiri quitaiteri imaoreajeitanti. Te iro irovetsicanteanari atiri irineapincatsa-tearo quitaiteri. ²⁸Narotaque cantacaan-taquerori quitaiteri amaoreantajeitari: tempa noponeaca narori inquitequi, natiritapaaque.

**Yora Jesoshi yoavisacotiri
quisoporoquitatsiri iracoqui.**
(Mt. 12.9-14; Ir. 6.6-11)

3 ¹Yora Jesoshi ijatanaji aisati pancotsiqui yapatojeitanti. Aitaque isaviquiri shirampari quisoporoquitatsiri iracoqui. ²Yamenashijeitavaquero atiri, sorerere: icoaque iriote ariorica iroavisa-

cotajeri saavaroqui. Icoajeitaque incanta-jeite: “Te oncameetsateji oca yantiri Jesoshi”. ³Yora Jesoshi icantiri quisopo-roquitatsiri:

—Pincatiaje, caate aca nianqui.

⁴Impoiji isampijeitaquero maaroni amenajeitantsiri:

—¿Cameetsampa aneshinoncateri atiri quitaiteri amaoreajeitanti? ¿Ariompa avashinoncayeri? ¿Ocameetsatimpa avavisacoteri? Tericampa, ¿picoaquempa ayeri?

Iro cantaincha imajerenrojeitanaque.

⁵Iquisanaca Jesoshi, yamenajeitaquero, aisati iquenqueshireanaca. Iro iquenqueshireantanacari te incavintsaantajeiteji atiri. Icantiri shirampari:

—Pancotaje.

Ari yacotanaji, irosati yavisacotanta-naja. ⁶Isoquijajeitanaque variseopee, ijatashijeitanaquero ishaninca Eroreshi. Yoametavacaajeitaca:

—¿Jaocasa ancantierri Jesoshi, avanteariri?

Yoavisacotanti Jesoshi anta incajarequi.

(Mt. 4.24-25; 12.15-21; Ir. 6.17-19)

⁷Yora Jesoshi aisati iroamerepee ijajeitanaji incajarequi, yojajeitanaquero oshequi carieasati, aisati joreasati, ⁸jerosaresati, romeasati, intatiquerosati Jorirani, maaroni savicajeitatsiri Tiroqui, Shiroqui, maaroni. Iquemacojeitaquero itasoncanti, irootaque ijatashijeitanta-riri oshequi atiri. ⁹Icantiri iroamere:

—Pamaquenarota pitotsi, nontetearo: ishenacajeitapaanacari ashanincapee.

¹⁰Ari iquenquetsatacaajeitaquero, impoiji yaniireapaaji aisati quipatsiqui. Oshequi yoavisacojeitavaquero. Yora mantsiyetatsiri iteencareayetaquero ishanincapee, impamitantapeempariri Jesoshi. ¹¹Yora atiri yatajeonquiri camaari ipincatsajeitaquero. Antearojenca ineanatacaquero icantajeitaquero:

—Jesoshi, avirotaque itomi Tasorentsi.

¹²Icantasantotiri Jesoshi:

—¿Paita picantantanari? Pimajerete, eiro picamantacotanatsi.

Icoyeaqueri Jesoshi iroamerepee.

(Mt. 5.1; 10.1-4; Jr. 6.12-16)

¹³Ari impoji itoncaanaque toncaariqui. Icajemaqueri yora icoyeaqueri, ari ijtashijetaqueri. ¹⁴Icoyeasanotaqueri 12 shirampari, intsipatasanojeitantariri.

Impoji intiancajeiteri inquenquetsatacaajeiteri ishaninca irineane Tasorentsi.

¹⁵Aisati imatacaaque itasoncantajeitaque irojocanteariri camaari. ¹⁶Ari icoyeaqueri iroamere 12. Icoyeaqueri Shimo, ipajitajiri aisati Petero. ¹⁷Aisati icoyeaqueri Santiaco itomi Severeo.

Icoyeaqueri Joa irirenti Santiaco: ipajiyetajiri aisati Voaneriji, acantiro aneanequi “Shintsiri”. ¹⁸Aisati icoyeaqueri Antirishi, Jeripi, Varitorome, Mateo, Tomashi, Santiaco itomi Arijeo, Tareo, Shimo. Iriotaque Shimo shintsyeytirori paitaricapee. ¹⁹Aisati icoyeaqueri Jorashi Ishicariote: iriotaque aacanterineri coajica Jesoshi.

Ijiyvetari yatajeonquiri camaari Jesoshi.

(Mt. 12.24-32)

²⁰Impoji ipianaja Jesoshi pancotsinentsiqui. Yapatojeitajiri aisati oshequi atiri. Tecatsi incantea iroyea. ²¹Iquemacotaqueri Jesoshi ishanincasanori, ijtashive-tajiri iraanajerime ivancosanoriqui. Icantavacaanaca:

—Te irineacoteaji Jesoshi, tsame aanajeri.

²²Ario ipocashitiri aisati jerosaresati, oametantirori sanquenarentsi. Icantacotashitapaacari:

—Iriotaque Satanashi atajeonquiriri Jesoshi. Tempa Satanashi iriotaque ivincatsarite camaari: iriotaque amitacotiriri itianquiri iamaaririnte, irootaque imatantacariri.

Yacanaqueri iriori Jesoshi.

(Mt. 12.22-32; Jr. 11.14-23; 12.10)

²³Icajemavaqueri Jesoshi, icantavaqueri:

—¿Queariompa yatajeaoncaquena camaari? Pamene: ¿jaoca incanteari Satanashi irojocajea irisati? ²⁴Oquempetaca ariorica inquisavacaajeitea savicatsiri nampitsiqui, irojocavacaajeitea, ¿arimpa irisavicajeitanaje cameetsa? ²⁵Aisati oquempetaca ariorica inquisavacaajeitea savicatsiri pancotsiqui, ¿arimpa inquisoavacaajeitea? ²⁶Aisati iquempetaca, ariorica Satanashi inquiserime iamaaririnte, irojocavacayeame, eirome itimime: aitaque impoyereavacayeame. ²⁷Aisati iquempetariori coshitantatsiri: itsaroacaari shintsitatsiri inqueavancoteri incoshitanteariri irovaararo. Ariorica impocashiteri, irijivatapeeri irapeeri, iroisotapeeri shintsitatsiri, impojiquea incoshiteri paitaricapee yoayetiri ivancoqui. ²⁸Queariotaque oca noncamantasanotempiri: icavintsaajeitajiri Tasorentsi maaroni antirori caari cameetsatatsi. Aisati, ariorica incantimajeiveteari, incavintsaajeiteri aisati. ²⁹Iro cantaincha, eiro icavintsaajeitiritsi irinti cantimatirori Ishire: incantaitatimpani intime iriori Sharincaveniqui. Eiro catsini yavisacotajitsi.

³⁰Irootaque icantaqueriri Jesoshi.

Pineaquero, icantashinirojeivetaca incaranqui: “Irio camaari amitacotiriri Jesoshi”. Tempa irootaque Ishire Tasorentsi amitacotiriri, caari ini camaari.

Icamantiri Jesoshi janica ishanincatasanotacari.

(Mt. 12.46-50; Jr. 8.19-21)

^{31,32}Ari isaviqui Jesoshi pancotsiqui, isaviquimojeitapaqueri arejeitapaariri. Impoji areetapaaca iriniro, otsipajeitapaari irirentipee. Ocatiapaaca saiteriqui, ocantiri oneapaqueri:

—Pincantenari notomi.

Ari iqueashitanaqueri, icantapaaqueri:
—Areetapaaca piniro, pirentipee, aisati
pitsiropee. Osavicapaaque saiteriqui,
ocoapaaquempi.

³³Ari yacavaqueri:

—¿Jaoca ocantari inatatsiri? ¿Jaoca
icantari iyetatsiri?

³⁴Irosati ijicotantanacari saviquimojei-
taqueriri. Icantanaque:

—Jeroca inatatsiri. Jerica iyetatsiri.

³⁵Janicarica antapinitirori icoacairiri
Tasorentsi: iriojeitaaque iyetatsiri,
tsiotsatsiri, inatatsiri. Noshanincajeitacari
maaroni quemisantajeitanari.

Ishiacantiri panquiveetatsiri.

(Mt. 13.1-23; Jr. 8.4-15)

4 ¹Yoametantaji aisati Jesoshi anta
otsapijaqui incajare. Yapatotimenta-
pajari oshequi atiri catsini. Irosati
itetantaca pitotsiqui, itiancaquero
nianquija capichaji, isavicaque. Icatiasi-
jeitapaacari otsapijaqui maaroni
ashaninca. ²Yoameyetaqueri paitaricapee,
aisati ishicaaventiniri, icantiri:

³—Meece noncamantempi. Ijataque
panquiveetatsiri yojocaitiro oitsoqui
tirico. ⁴Yojocaitiro, opariaarantapaaque
avotsiqui. Ipcapaaque contsaro, yoapaa-
caro, itsonquitapaaqueri. ⁵Pashini
pariapaintsi oitsoqui mapiqui. Te ontima-
sanoteji oshequi quipatsi, jentsipaite
oshiocavetanaca. ⁶Ari ijenoquitapaaque
catsirincaiteri, irosati oshimpeshitana-
naca. Te omparitsatasanoteji, irootaque
ocamantanacari. ⁷Opariapaaque pashini
oitsoqui quitotseequimashiqui, oquimota-
naque quitotseequi. Irootaque ajaanaque-
rori, caari oitsoquitanta panquirentsi.

⁸Pashini pariapaintsi quipatsiqui
cameetsari. Oquimotanaque, otimayeta-
naque oitsoqui. Aparo oitsoquitanaitsi
ocarati oitsoqui 30. Pashini otimanaque
aisati oitsoqui ocarati 60. Iro otsipa
ocarati oitsoqui 100. ⁹Piquemavaquero-

rica oca nocantaquempiri, piotavaquero,
pinquenqueshiretavaquero.

¹⁰Impoiji ijajeitanaji atiripee, itimanaji
apaniro Jesoshi, itsipajeitari aparopee
oijatiriri, aisati iroamere caratatsiri 12.
Isampijeitiri:

—¿Jaoca ocantari oca pishiacaaventini-
riri?

¹¹Icantanaqueri:

—Meece noncamantempi caari
piojeitini: aitaque piojeitero jaoca
icantari Tasorentsi ipincatsariventanti.
Irompa irinti yontapee, eiro nocamanta-
sanotiritsi, irointi noshiacantini
oncanteata ¹²iramenavetea, iro cantain-
cha eiro ineesanotitsi, inquemavetea, iro
cantaincha eiro iotasannotitsi. Eiro
iquenqueshireatsi, eiro icavintsaajiritsi
Tasorentsi.

¹³Aisati icantaqueri:

—¿Tempa pinquemavaquero oca
noshiacantimpiri? Ariorica noshiacantem-
piro aisati, ¿jaoca pincanteari piotantea-
rori? ¹⁴Yora jocaiyetirori oitsoqui
ishiaqueri ovaayetirori irineane Tasoren-
tsi. ¹⁵Aparopee jocaiyetapaincha
avotsiqui oshiaqueri quemisantavetavaca-
rori irineane Tasorentsi, iro cantaincha
yora Satanashi yojocapitsatajiri
iquenqueshireantavetacari: te inque-
santanajeji. ¹⁶Aisati oca jocaitapainchari
mapiqui, oshiaqueri quemavetavacarori
irineane Tasorentsi. Intsipaiite iquimoshi-
reventavetavacaro. ¹⁷Ishiaquero
panquirentsi caari timatsine ovaritsa.
Intsipaiite ocamaque. Iquemisantavetaca,
irootaque yoashinoncanteetarari, aisati
iquisanentanteetarari. Intsipaiite
yojocanajiro iquemisantaveta. ¹⁸Oca
jocaitainchari quitotseequimashiqui
oshiacaaventiri quemavetavacarori
irineane Tasorentsi. ¹⁹Iro cantaincha
iquenqueshiretapinitiro timayetatsiri aca
quipatsiqui, iquimoshireventajeitiro
yashiyetari. Aiquero iconaitii irashije-

tearo paitaricapee, irootaque yojocantajarori iquemisantavetari. Ishiaquero caari timatsi oitsoqui. ²⁰Iroquea oca irointi jocaitapainchari quipatsiqui cameetsari, oshiaaaventiri quemasanotavaquerori irineane Tasorentsi. Aitaque ishiretasano-tacaro, iriotaque shiaaaventainchari panquirentsipee timanaintsiri oitsoqui. Aparo oitsoquitanaitsi ocarati oitsoqui 30. Pashini otimanaque aisati oitsoqui ocarati 60. Iro otsipa ocarati oitsoqui 100. Oca oitsoqui oshiaquero amajeita-queneriri Tasorentsi, aparato iranaacota-queri itsipapee.

Ishiacantiniri Jesoshi tsiomentotsi.

(Ir. 8.16-18)

²¹Aisati icantaqueri:

—Ancoaqueric aantsiotea, çarimpa avajero tsiomentotsi covitiqui tsoompoina? çArimpa amanaquero tsiomentotsi? Tempa acoiro antsiojeitearo maaroni amenajeitanti. ²²Coajica onconijatanaque maaroni amanavetari, iriojeitanaque maaroni antajeitaqueri. ²³Otimirica piquemantari, pinquemavaquero oca nocamantaquempiri.

²⁴Pashini icantaqueri aisati:

—Pinquencheshiretero oca piquema-queri. Ariorica capichaji pinquemisanta-vaquero nocamantimpiri, ari capichaji piotavaquero. Ariorica pinquemisantasano-tavaquero, ari oshequi piotavaquero, noametasanotaquempiro catsini. ²⁵Yora iotavaquerori noametaqueriri, aiquero noametasanoteri catsini. Yora caari iotavaquero nocamantavetacariri, eiro iotitsi catsini.

Ishiacantiniri Jesoshi panquitirori oitsoqui.

²⁶Aisati icanti:

—Tempa ipincatsariventajeitaquee Tasorentsi. Ishiaqueri shirampari jatatsiri ipanquitiro oitsoqui quipatsiqui.

²⁷Imaapiniti tsiteniriqui, isaaquitapiniti

quitaiteriqui. Ocontetsoaquitanaque ivanquire, oquimotanaque. Te iriotacote-roji jaoca ocananacari oshiocantacari.

²⁸Oshioaque quipatsiqui: ojivati otsoaqui, impoiji ominca, impoiji opa, impoiji antaiquitanaque oitsoqui.

²⁹Ariorica osampaquitanaque oitsoqui, intotacoyeetero, tempa omoncaratapaaca iraantearori.

Ishiaaaventiniri moshitasa.

(Mt. 13.31-32; Ir. 13.18-19)

³⁰Aisati icanti Jesoshi:

—çJaoca noncantempirori noshiaa-ventempiro jaoca icanta Tasorentsi ipincatsariventanti? çJaoca ancanterori anquenquetsatacotantearori? ³¹Oshiaquero oitsoqui moshitasa. Irointi oitsoqui, te onquempetearoji pashinipee oitsoqui-yetatsiri: quiripequिताque oni catsini. Ariorica ampanquitero, ³²oshiocanaque. Onquimotanaque, anayetanaquero otsipapee panquirentsiyetatsiri. Antearo-yetanaque ojempequipee, aitaque iramampeapinitearo vanquiyetachari.

³³Aitaque icantapinita Jesoshi, ishiaaaventapinitiniri atiri iroametante-ri irineane Tasorentsi. Ariorica capichaji iquemaquero, ari capichaji yoametaqueri: oshequirica iquemavaquero, ari oshequi yoametaqueri. ³⁴Iotaca ishiaaaventapini-tiniriri. Irintiquea iroamere, itsoteajeita-queneri yoametasanojeitiri.

Yoimajerentaquero Jesoshi tampea.

(Mt. 8.23-27; Ir. 8.22-25)

³⁵Iqueanaji catsirincaiteri. Icantajiri iroamere:

—Tsame amonteanaje intatiquero.

³⁶Itiancanajiri apatotimentajeitariri:

—Tsamajempi pijajeitanaje pivanco-peequi.

Irosati inaque iriori pitotsiqui, isavica-que. Itejeitanaja iroamere, yoimontejajiri. Aisati imontecotanaja yora apatotimen-

tariri otsipapee pitotsi. ³⁷Omapocava-
queri nianquija antearo tampea catsini.
Ora omotoncane otejatapaacaro pitotsi,
irovetaincha ojaayeame. ³⁸Imaaque
Jesoshi anta opataquiqui, itiinataca.
Yoisaaquireaqueri iroamere, icantaqueri:
—Oametanari, ¿paita caari pinquen-
qeshireanta? Irotanaintsi ampiincajeite.
³⁹Itinaanaja, icajemacotaquero tampea,
aisati icantiro incajare:
—Pimajerete, pimajerejate.
Opeanaja tampea. Omajerejatasanota-
naji incajare. ⁴⁰Icantiri:
—¿Paita pitsarointari? ¿Paita caari
pishirejeitanti Tasorentsi?
⁴¹Oshequi catsini isaroasanojeitana-
que. Icantavacaanaca:
—¿Janicampa yoca, oquemisantantaca-
riri tampea? Aisati incajare, oquemisanta-
queri.

Yoavisacotiri Jesoshi neiriri camaari.
(Mt. 8.28-34; Ir. 8.26-39)

5 ^{1,2}Yarejeitanaca intatiquero,
yamatscapaaque quipatsiqui:
irootaque iipatsite jerasesati. Intsipaita
itonquotavacari neiriri camaari,
iponeanaja anta tijaarimashiqui, ³aitaque
isaviquiri. Tecatsi aaveerineri iroimaje-
reneri. ⁴Yoisotapiniyeevetari iracoqui
carenatsa, aisati iitiqui, iro cantaincha
ipesayetaquero, peti, peti. Tecatsi
anacoterine ishintsiti. ⁵Icantatiani:
tsiteniriqui, quitaiteriqui, iquenayeti
tijaariqui aisati toncaariqui. Icajemayeti,
itoyetaró mapi. ⁶Yoca shirampari
ineitavacari arejiquinta Jesoshi, ishiashi-
tanacari, itiyoashitapaacari. ^{7,8}Icanta-
vaqueri Jesoshi camaari:
—Pinijantareanajeri yoca shirampari.
Antearojenca icajemacotapaaqueri:
—¿Paita pashereantanari? Aviro
Jesoshi, itomi Tasorentsi inquitequiniri,
tempa ineajeitaquee. Nocantasanotimpi
catsini, eiro poashinoncaanatsi.

⁹Ari isampitiri Jesoshi:

—¿Jaoca pipajitari?

Yacanaqueri:

—Nopajita Oshequianti. Iro nopajitan-
tari, oshiquianti noni catsini. ¹⁰Eiro
pitiancanatsi pashiniqui nampitsi.

Aitaque icantasanotapinivetacari catsini.

¹¹Ari anta itimi oshequi chanco, yoajeita
tioncaiquiji. ¹²Yora Oshequianti icantiri:

—Ari pintianquenari anta chancoqui,
irineavaquena iriori, quiso noapaajeri.

¹³Ari ishinetaqueri; injantareanajiri
camaari shirampari, yojocanajiri.

Ineavaqueri irinti chanco. Icarajeiti
chancho 2,000. Ishiajeitanaca imperitaite-
qui, ipiincajeitanaque incajarequi, pocn,
pocn, pocn; itsitajeitanaque, pomiririri.

¹⁴Itsaroajeitanaque shentajeivetariri,
ishiajeitanaca, icamantapairi savicajeitatsiri
nampitsiqui, aisati oantsipeequi. Otsotea-
naca neantsi. Ipocajeitanaque atiri irameneri
jaocarica icantacari chanco. ¹⁵Ijatashijeitiri
Jesoshi, ineajeitapairi yora neaveitariniri
camaari. Isavicaji, iquitsaataja, timanaji
iquenqeshiretantari. Ari ineajeitapaaqueri,
itsarocaaajeitapaacari. ¹⁶Yora neasanotaque-
riri incaranqui icamantajeitaqueri:

—Pineakeri, yoavisacotajiri Jesoshi
yora neaveitariniri camaari. Aisati
yoviincacantaqueri chanco.

¹⁷Impoiji icantasanojeitiri:

—Pijataje, eiro pipocajitsi aisati
nonampiqui.

¹⁸Ari itetanaja Jesoshi pitotsiqui.

Icantasanovetari yora yoavisacotiri:

—Nocoaque noijatanaquempi.

¹⁹Iro cantaincha, icantiri Jesoshi:

—Eiro pojatanatsi, ainti pijataje pinampi-
qui, anta pishanincaqui. Pincamantapeeri:
“Ineshinoncatajana novincatsarite”.

²⁰Ari ijatanaque neaveitariniri camaari
Tecaporishiqui. Icamantajeitapairi
maaroni atiri:

—Yoavisacotajana Jesoshi.

Yoajeitavaqueri atiri cavaco.

Yoavisacotiro Jesoshi irajashetatsiri.*(Mt. 9.18-26; Ir. 8.40-56)*

²¹Ari imonteanaja Jesoshi intatiquero.

Yapatojeitavacari oshequi atiri anta otsapijaqui. ²²Yareetapaaca shirampari pajitachari Jairo, yora jivatacaajeitiriri atiri anta pancotsiqui yapatotantari.

Ineapaaqueri, itiyeroashitapaacari Jesoshi. ²³Icantasanotapaaqueri:

—Irotaintsi oncame noshinto.

Pimpoque pimpamitapeero avisacotantajeari iroori, eiro ocamantatsi.

²⁴Ari yojatanaqueri, aisati yojijaitanaqueri oshequi catsini apatotimentariri, yovetacajeitanaqueri. ²⁵Ocarajeitakeri tsinane irajashetatsiri. Ocaratacotaque osarintsite 12 irajashetantacari.

²⁶Oshequi yaavinteenayevetaro, aiqero yoatsiyetaquerori. Atsipetashitacaro opinaventayevetacaro maaroni ashivevetari. Te avisacotimateji, aiqero ojatatii irajatanaque catsini. ^{27,28}Oquemaque icantacoyeeriri Jesoshi: “Oshequi yoavisacotanti”. Osatecanacari oijajeitiriri, oquenapaaque itapiiqui. Oquenque-shiretanaca:

—Ariorica nantiteri iitsaare, aitaque navisacotanaje.

Ari antitaqueri iitsaare, ocaratanaji irajaveitani. ²⁹Oquemavaitia maaririri, avisacotanaji. ³⁰Aisati iriori Jesoshi, iquemashitavaitiaro itasorenca. Ari ipitsocashitanacari oijajeitiriri, icantiri:

—¿Janicampa antitaquenarori noitsaare?

³¹Yacanaqueri iroamere:

—Tempa pineeriji yoshequitaque oijajeitimpiri. Yovetacayetaquempi. Aiqero picanti: “¿Janicampa antitaquenarori noitsaare?”

³²Yamenamenayetanaque irineero antitaqueriri iitsaare. ³³Iroori tsinane, oshequi otsaronaque, opioncanaque, pio, pio. Iotanaque avisacotaji. Otiyeroashita-

paacari, opincatsataqueri. Otsoteaquero ocamantasanotaqueri maaroni. ³⁴Icantiro:

—Tsinane, pishiretaquena, irootaque pavisacotantajari. Meeca pijataje, pinquimoshiretanaje. Aitaquenea pavisacotajiri.

³⁵Tequerata intsonquerome ineanatiro, ipocajeitapaaque inampirepee Jairo. Icantapaaqueri:

—Camanaque pishinto. ¿Paita pantsipetacanteariri pashereaqueri yoca oametantatsiri?

³⁶Iquemavaquero Jesoshi oca icantapaaqueriri. Icantiri Jairo:

—Eiro picantashiretitsi, nainti pishiretea.

³⁷Tecatsi irishinete oijatanaquerine. Irinti ishinetaque yora Petero, Santiago, Joa. Iriotaque Joa irirenti Santiago.

³⁸Yareejeitapaaca ivancoqui Jairo.

Ineapaaqueri atiripee: icajemajetaque, iraashiretacojeitacaro, iracojeitacaro.

³⁹Iqueapaaque, icantapaaqueri:

—¿Paita picajemacojeitantarori? ¿Paita piraacojeitantarori? Te oncamasanoteji evancaro, irointi omai.

⁴⁰Ishirontimentajeitavacari, iro cantaincha yoisoquijajeitapairi. Yaanaqueri irini, jero inironi, aisati iroamere, iqueanaque anta onaquenta evancaroni. ⁴¹Yajiricavacotapaaquero acoqui. Icantiro:

—Tarita comi.

Acantiro aneanequi arori: “Evancaro, pintinaanaje”. ⁴²Otinnaanaja evancaro, tancore, aniitanaji. Ocarataque osarintsite 12, irootaque omatantajari aniiveetaji. Yoasanojeitanaque cavaco oshaninca.

⁴³Icantasanotiri:

—Eiroya picamantayetiritsi atiri.

Meeca pimpero oyeari.

Ijtaque Jesoshi Nasaretequi.*(Mt. 13.53-58; Ir. 4.16-30)*

6 ¹Ari ijatanaji Jesoshi, yareetapaaja iipatsitequi iriori. Yojijajeitajiri iroamere. ^{2,3}Impoiji quitaiteri imaoreajei-

tantari, yoametantapaaji anta yapatotapinijeitacanta joriopee. Yoajeitavaqueri cavaco oshequi quemavaqueriri. Itseencajeitaqueri Jesoshi, icantajeiti:

—Tempa iriotaque ashanincasanoriarori. ¿Jaoca oponeimotacariri oca yoametantiri? ¿Jaoca icantacari itasoncantayetantacari? ¿Caarimpa yocavetsicapinitirori inchato? Iriotaque otomi Maria, tempa iriotaque irirentipee Santiago, Jose, Jorashi, aisati Shimo. Aisati iritsiropee, tempa osaviquimojeitaquee aca.

⁴Icanti Jesoshi:

—Ari inecameetsajeivetacari atiripee camantantsiri. Iro cantaincha iriorica camantantsiri ishanincasanori, ari intseenqueri.

⁵Ari itseencajeitaqueri, irootaque caari itasoncantapinitanta anta inampiqui. Aparopee ipamiyetiri mantsiyetatsiri, yoavisacoyetiri. ⁶Iro cantaincha te inquemisantajeiteriji ishaninca, irootaque yoantanacari cavaco:

—¿Paita caari iquemisantajeitantana?

Yantayetiri iroamerepee Jesoshi.

(Mt. 10.1-15; Ir. 9.1-6)

Iquenaquenayetanaque Jesoshi nampitsipeequi, yoametantayetanaque. ⁷Aisati icoyeaqueri iroamere 12. Imatacaqueri iroavisacotenteariri neiriri camaari. Impoiji itiancajeitaqueri; itsipatavacayaetanaca, apitepee ijayetanaque nampitsipeequi.

⁸Icantasanotavaqueri:

—Ariorica pijatanaque, tecatsiyeapaanaque. Eiro paanaquetsi poyeari, eiro paanaquerotsi pitsarate. Aisati eiro paanaqueritsi piirequite. Irointiqueapaanaque piotiquiro. ⁹Aisati pisapatotanaque, iro cantaincha eiro piquitsaatarotsi poicoro.

¹⁰Aisati icantavaqueri:

—Jaocarica pisavicapaaqueri, aitaque pintaamaanitapaqueri, irosati pijatanta-

jeari pashiniqui nampitsi. ¹¹Eirorica yaacameetsajeitavaquempi nampitsiqiniri, aisati eirorica iquemisantajeitavaquempi, ari povaanajea, iriotanteari pishemacari, eiro pipiashitaritsi aisati.

¹²Ari ijajeitanaque iroamere. Icamantajeitiri atiripee:

—Pinquenqueshirejeitea, eiro pantapinitirotsi aisati caari cameetsatsi.

¹³Yoavisacojeitiri oshequi yatajeaoncane camaari. Itiritantayetari quejitsi oshequi mantsiaripee, yoavisacoyetiri.

Yora Eroreshi yoacantaqueri Joa.

(Mt. 14.1-12; Ir. 9.7-9)

¹⁴Oshequi quemacojeitiriri Jesoshi, irootaque iquemacotantacariri aisati pincatsari pajitachari Eroreshi. Icantayeti atiripee:

—Iriotaque Joa vaotisantantsiri, camavetainchari: itinaanaja. Iro itinaanajari itasorentsiti.

¹⁵Timatsi pashini cantayevetachari:

—Irioyeata Iriashini: itinaanaja.

Pashini cantayetatsiri aisati:

—Iriotaque camantantsiri. Ishiajiri camantantaveitachaniri.

¹⁶Ari iquemacotaqueri Eroreshi, icanti:

—Iriotaqueteemi Joa. Nopesacantavetacari itsanoqui iro cantaincha itinaanaja aisati.

¹⁷⁻¹⁹Ari peerani Eroreshi yaapitsataqueri irirenti ijina. Ipajita irirenti Jeripi, iro ijinantaveitaniri, Eroriashi.

Yora Joa icantapinivetacari Eroreshi:

—Te oncameetsateji paapitsateri pirenti ijina.

Oquisanaqueri Eroriashi, ocoasanoveta oacanterime, iro cantaincha te irininteji yora ojimentajari. Oshequi ashereapinitaqueri, irootaque yaacantantacariri Joa, yoiminquiacantaqueri caravosoqui tsoompoina. ²⁰Ipinca-tsavetacari iriori Joa, iotiri icameetsatsanoti, iquemisansasanotiri Tasorentsi. Te irishinevetaroji ijina oacanteri. Itsaroacaapinivetari Joa,

iquenquetsatacapinitiri. Ineacameetsatiro icantiriri Joa, iro cantaincha te irioteji jaoca incanteari. ²¹Omoncarataja itaiterite itimantacari peerani Eroreshi. Yoacaajeitari ivincatsaririnte, ivincatsarite soraro, aisati ivincatsarite carireasati. Irootaque quitaiteri oacantantacarriri Eroriashi Joa. ²²Oqueapaaque oshintoto Eroriashi anta yoajeitanta omaninquetsaveetapaaque apaniro. Ineacameetsatavaquero Eroreshi aisati itsipajeitari. Icantiro evancaro:

—Pincoacotena paitarica picoaqueri.

Aitaque nompaquempiro. ²³Ineaquena Tasorensi, ioti eiro namatavitimptisi. Paitaricapee pincoacotaquenari, aitaque nompaquempi. Picoaquerica nompaaantempi noipatsite, aitaque nompaquempi cashetani.

²⁴Osoquijanaji iroori, osampitapaaquero iniro:

—¿Paita noncoacoteriri?

Acavaquero iroori:

—Iro pincoacoteriri iito Joa vaotisanatatsiri.

²⁵Intsipaite opianaja aisati, opiashitanajari pincatsari. Ocoacotapaaqueri, ocantiri:

—Nocoi meeca pimpacotenaro matitaqui iito Joa.

²⁶Oshequi yoashiretanaca. Tempa aitaque icantaquero incaranqui: “Eiro namatavitimptisi”. Aisati iqumajeitavaqueri maaroni itsipajeitacari. Te meeca incoajeji iramatavitero. ²⁷Ari itiancaqueri oantatsiri, icantavaqueri:

—Pamaquenaro iito Joa.

Ari ijatanaque anta yoiminqueaque-rinta, ipesapaaqueri itsanoqui. ²⁸Yamacotaquero matitaqui itoni, ipapaaquero evancaro. Iroori, ovaaquenero iniro.

²⁹Iquemacotaqueri iroamereni Joani, ari ijatashijeitavaqueri. Yaanajiri, itijajiri.

Yoacaacari Jesoshi oshequi atiri.

(Mt. 14.13-21; Jr. 9.10-17; Joa 6.1-15)

³⁰Ipiajeitanaja itiancane Jesoshi. Icamantajeitapaajiri maaroni yantayetaqueri. Aisati icamantacoyetapairo

maaroni yoametantayetaqueri. ³¹Irosati icantani oshequi atiri ipocashitapinitiri Jesoshi, aisati ijajeitanaji. Te irinijantareeriji, tecatsi incantea iroyea. Icantajeitavaqueri itiancane:

—Tsame ajate ayojeitanaquea anta tecatsi timatsine. Amaoreajeitavaqueta capichaji.

³²Ari ijajeitanaque, iquenanaque pitotsiqui. ³³Ari ineajeitavaqueri oshequi atiri, iojeitavaqueri. Iponeajeitanaca ivancopeeque, ishianaca, ishitejeitanaca. Ishianaca, yanaaajeitavaqueri, yapatotimentajeitavacari. ³⁴Imitajanaque Jesoshi, ineapaatiiri oshequi apatojeitainchari. Irosati ineshinonajeitantapaacari ishiacaantapaaqueri ovisha caari timatsine amenerineri. Oshequi yoamejeitapaaqueri paitapeerica. ³⁵Ari ishaavijitanaji catsirincaiteri. Ipocashitiri iroamere, icantiri:

—Meeca anajeitaque aca caaraiteriqui, tecatsi avajeiteari. Aisati ishaavijitave catsirincaiteri. ³⁶Pintiancajeiteri atiri irijajeitajeta oantsiqui, nampitsiqui quempejiniri. Iramanantajeitapeeta iroyeari.

³⁷Yacanaqueri, icantiri:

—Pimperita avinti iroyeari.

Icanti iroamere:

—¿Picoavetampa nojate namanantaite tanta nompantajeiteariri? Oshequi ompinatea noacantajeiteariri maaroni, eiro imoncaratarotsi airequite.

³⁸Yacanajiri:

—¿Jaoca ocaratiri pitantane timatsiri? Pijate, pamenaitero.

Ari ineaitiro, icantaqueri:

—Apapacoronni ocaratit tanta, aisati apite shima.

³⁹Icantiri:

—Poisaviqueri atiripee ara saveshishiqui. Pampatoyeteri, aisati pinashitacaayeteri.

⁴⁰Ari yapatojeitavaqueri, isavicajeitanaque. Aparoni apatojeitainchari icarati

100 atiri. Itimi oshequi itsipapee apatojeitainchari aisati. Inashiyetaca pashinipee apatojeitainchari, icarayetaque 50. ⁴¹Ari yaaquero Jesoshi tanta aisati shima, yamenanaque jenoqui.

Icantiri iriri:

—Ariove, Apa, aviro paquenarori oca noyearica.

Icarajaquero tanta. Ipaqueri iroamere irovayeteneri apatojeitainchari. Aisati shima, yovayetaqueneri maaroni atiri, ⁴²ari yoajeitanaca. Iquemajeitanaca, te intsonqueroji. ⁴³Yaayetajiro timaarantapaajantsiri, ijaayetajiro cantiriqui ocarati 12. ⁴⁴Icarajeiti oacarori 5,000 shirampari.

Yaniijatiro Jesoshi incajare.

(Mt. 14.22-33; Joa 6.16-21)

⁴⁵Impoiji itianquiri Jesoshi iroamere, icantiri:

—Pintetanahea pitotsiqui. Pijivajeitanacuena intatiqueronta, anta Vetsairaqu: nontiancajeitajerita ivancopeequi yoca apatojeitainchari.

⁴⁶Impoiji ijatanaque Jesoshi toncaariqui, iquenquetsatacairi iriri. ⁴⁷Otsitenijencaiteanaji, inianquijatacotanaque iroamere incajarequi. Itimaiti Jesoshi apaniro quipatsiqui. ⁴⁸Inequeri iroamere, icomacomajeiveta, iotaqueri imaojempequitaque. Aiquero oipiacotajiriri tampea. Ari oquitaitemataji ijatashitajiri iriori Jesoshi. Yaniijatanajiro incajare, te intsitiyeji. Iro iravisanaquerime, ⁴⁹iro cantaincha ineajeitavajiri, yanijatapajiro incajare. Ijijeivetavacari irio camaari. Ari icajemajeitanaque:

—Eeeee. Coraquenive camaari.

⁵⁰Ari ineajeitavaqueri maaroni. Itsaroejitanaque. Ineanatapaajiri:

—Pinquimoshirejeitaje. Narotaque pocajantsiri. Eiro pitsaroashijeitatsi.

⁵¹Itetapaaja pitotsiqui, itsipajeitapaajari, opeanaja tampea. Yoajeitanaque cavaco catsini. ⁵²Ineajeivetacari incaran-

qui itasonquiro tanta, iro cantaincha tequera inquenqueshireimateaji.

Yantayetiri Jesoshi anta Jenesaretequi.

(Mt. 14.34-36)

⁵³Ari imonteanacaro, yareejeitapaaca Jenesaretequi. Yaatacojeitapaaque. ⁵⁴Imitajajeitapaaque, intsipaite iojeitavaqueri atiri. ⁵⁵Ishiashijeitapaacari. Yamacojeitavaqueri mantsiyetatsiri inarentariqui. Jaocarica itimapairi Jesoshi, aitaque anta yaacotanaqueneriri.

⁵⁶Iquenaquenayeti nampitsijaniquiqui, nampitsiqui antearo, aisati oantsiqui. Jaocarica iquenavaqueri Jesoshi yoayetaqueneri mantsiyetatsiri. Yoayetaqueneri nianqui nampitsiqui, icantajeitavaqueri: —Pishinetenaro nompamititavaquempiro ocaratapai piitsaare.

Ari yavisacojeitaji maaroni pamititajeitavaqueriri iitsaare.

Yamejeitari joriopee.

(Mt. 15.1-20)

7 ¹Ari ipocapaaque variseopee, aisati aparopee oametantirori sanquenarentsi, iponeaca Jerosarequi. Yapatotimentapaacari Jesoshi. ²Ineajeitapai iroamere, yoajeita iriori: te inquivacoteaji. Icantajeiti intacaroniri: “Ariorica ayea, ajivate anquivacotea ancameetsashiretanteari”. ³Yora variseo yamejeitaro tequeratarica iroyeata, iquivacotasanta. Tempa yamejeitaro maaroni joriopee. Irompa eiorica iquivacotita, eiro yoatsi. Aitaque imoncaratajiro yoametantapinitiniri intacaroniri. ⁴Ariorica imponeajea anta nampitsiqui nianqui, eiorica iquivacotasantapaajatsi, eiro yoapaajatsi. Aisati imoncaratashiyetaro oshequi paitarica yoameyetiriri ishanincani. Iquivajeitapinitiro pajo, onero, oya, maaroni. ⁵Ari isampijeitapaqueri Jesoshi:

—¿Paita caari imoncaratantaro poamere yoametantapinitiniri intacantaqueeniri? Jeri yoca meeca oainchari, te inquivacoteaji: ainiro irantane.

⁶Icantavaqueri Jesoshi:

—Oshequi pamatavitantayeti. Aitaque icamantacotitaquempini peerani Isayashini. Isanquenatini: “Icantashive-tana yoca atiri: ‘Picameetsati’, iro cantaincha te inquenqeshiretenaji. ⁷Yatsipetashitaro itiyeroimentavetana; ipincatsatashivetana. Pamatavitashiyeta-cari pishaninca: picantanirovetari oca poametantavetari irootaque irineane Tasorentsi”. Queario oca icantaqueniri Isayashi.

⁸Aisati icantiri Jesoshi:

—Pojocashitacaro icantavetimpiri Tasorentsi, irointi piquemisantashitacaro yoametantapinitiri atiri. ⁹Aitaque pitseencaquero icantiri Tasorentsi, irointi picoaque pimincaratajero yoametantapinitiri intacantaroniri. ¹⁰Icantini Moishishini: “Pimpincatsateri piri, aisati piniro”. Aisati icanti: “Aitaque iroasan-queteri Tasorentsi yora cantimatiriri iriri aisati iriniro”. ¹¹Iro cantaincha picantashinrojeivetari ashaninca: “Ariorica pincashiacayeri Tasorentsi piirequite, ari pimpasanoteri. Irashinoncayearica piri, piniro, pincanteri: ‘Eiro nomatirotsi noncavintsayempi: nocashiacaqueri Tasorentsi noirequite nomperir’”.

¹²Aitaque meeca te pishineteriji pishaninca irintacoteari iriri, iriniro. ¹³Picoacaaqueri inquemisantero poameta-pinitiriri, aisati poametaqueri intseen-quero icantiri Tasorentsi. Aitaque picantanirotapinitari: pojocacaayetiri ashaninca iquemisanti.

**Icamantiri Jesoshi paita caari
icameetsatanta atiri.**

(Mt. 15.10-20)

¹⁴Ari icajemajiri aisati apatojeitain-chari, icantajeitiri:

—Pinquemajeitavaquena maaroni. Piojeitavaquero oca. ¹⁵Ocameetsati avajeitearo paitapeerica, eiro otimitsi

antane: tecatsi oncantero avari ashire. Piquenqeshiretiro caari cameetsatsi, irootaque pantapinitantarori. ¹⁶Otimirica piyempita piquemantari, pinquemava-que.

¹⁷Ari ijajeitanaji apatotimentariri, iqueapaaji Jesoshi pancotsiqui. Isampitiri iroamere:

—¿Jaoca ocantari pishiacaaventiniriri?

¹⁸Icantiri:

—Aisatimpa avirori, ¿tempa pinquema-vaquena? Paitapeerica iroyeari ashaninca, ocameetsati, eiro otimitsi irantane. Tempa piotavaquero. ¹⁹Eiro omatirotsi ishire, ainti ojataque isheitoqui, impoiiji ishitajiro.

Irootaque yoamejeitiriri ocameetsata-que paitarica yoyeeyetari. ²⁰Aisati icantiri:

—Oca iquenqeshiretiri antacairiri ashaninca caari cameetsatsi. ²¹Te iroyearoji caari cameetsatsi, irointi iquenqeshiretiro. Irootaque yantajeitan-tarori maaroni: yantavintsatiro tsinane caari yai, antavintsatiri shirampari caari ai, icoshiti, yoanti. ²²Yaimentaro ijina, aimentari ojime. Inevetaro yashiyetari pashini atiri. Icamaritanti, yamatavitan-ti, imayempitantapiniti, imashitsati, icantimatanti, ishemeti. Te ontimeji iojeitanti. ²³Iquenqeshiretiro atiri caari cameetsatsi, irootaque yantanta-rori: impoiiji otimi irantanepee.

**Yoavisacotajiro Jesoshi oshinto
shirojenishiasato.**

(Mt. 15.21-28)

²⁴Impoiiji ijatanaji Jesoshi Tiroqui. Isavicapaaque pancotsiqui, te incoaveteaji irioyeeterime. Iro cantaincha tecatsi incantea irimanea. ²⁵Otimi anta tsinane, yatajeaonquiro oshinto camaari. Oquemacotavaqueri tsinane Jesoshi, ojatashitavaqueri, otiyeroashitapaacari. ²⁶Caari oni jorio, oponeaca Shirojenishiaqui. Ocantapaaqueri:

—Yatajeaoncaquero noshinto camaari, poavisacotajenaro.

²⁷Icantavaquero:

—Nojivatavaquerita noshanincasanori nintacoteari. Te oncameetsateji aapitsatajari yoari ajananequite, amperi otsiti iroyeari.

²⁸Iroori acanaqueri:

—Je, queario. Aitaque iniri otsiti nijanteaji. Yoatsopequititayetari atomi.

²⁹Icantajiro:

—Je, cameetsa; queario picantaqueri. Cameetsa pijataje meeca, avisacotanaji pishinto.

³⁰O pianaja ovancoqui. Oneapaajiro oshinto, onariaca omaamentoqui, avisacotaji.

**Yora Jesoshi yoavisacotiri
mayempivetachaniri.**

³¹Impoiji yovaanaja aisati Jesoshi, iquenana ji Tiroqui, Shiroqui aisati Tecaporishiqui. Ari yareetapaaja incajarequi Carireaquiniri. ³²Yameetapaaqueneri aparo shirampari imayempiti, aisati imasantiti. Icantapaaqueri:

—Pimpamitavaquero, poavisacotajeri.

³³Yora Jesoshi yojocanjari apatotimentariri, apaniro itsipatanacari mayempiri. Yoiminquiaqueneri iracotsapaqui iyempitaqui. Iquitiojaquero iracotsapaqui, ipantaqueri inenequi. ³⁴Yamenanaque jenoqui, yaneencanaque, icantiri:

—Epeta.

Acantiri arori aneanequi: “Ovitareanajea”.

³⁵Ovitareanaja iquemantari. Opeanaja iniconeneveitani, cameetsajencatanaji ineaветеaji. ³⁶Yapiitapinivetari:

—Eiroyea picamantacotanatsi.

Iro cantaincha te inquemisanteriji, aiquero catsini icamantacotaquereri.

³⁷Aiquero catsini yoajeitanaqueri cavaco Jesoshi. Icantajeitiri atiripee:

—Paitaquea, ocameetsasananoti yantayetiri. Imatasanotaquero Jesoshi

maaroni yantayetiri. Iquemacaayetajiri mayempiveitachaniri, aisati yora masontiveitachaniri, ineaветеacaayetajiri.

Yapiitajiro Jesoshi yoshequiajiro tanta.

(Mt. 15.32-38)

8 ¹Pashini quitaiteri yapatojeitaca aisati oshequi atiri, tecatsi iroajeiteari. Yora Jesoshi icajemiri iroamere, icantavaquero:

²—Nocavintsaajeitaqueri yocapee. Iro nocavintsaajeitantariri mavataque quitaiteri itsipajeitacuena, te iroajeiteaji meeca. ³Aajeitaqueri itashe. Timatsi aparopee poneainchari paricoti: ariorica nontiancavetajeari meeca ivancoqui, ari irimaoshirejitanaque nianqui avotsiqui, irimaotsajeitanaque.

⁴Yacanaqueri iroamere:

—¿Jaoca ancanteari anquemacaajeitantariri tanta? Aca caaraiteriqui.

⁵Isampitiri:

—¿Jaoca ocaratiri pitantane?

ICanti:

—Ocaratiri 7.

⁶Icantajeitiri apatotimentajeitariri:

—Pisavicajeite quipatsiqui.

Yaaquero tanta, ipasonquitiri iriri.

Icarajaquero, ipajeitaqueri iroamere, yovaajeitaqueneri apatojeitainchari.

⁷Itimaque aisati shivajaniqui aparopee.

Ipsonquitacotaqueri aisati. Impoiji icantiri iroamere:

—Pimpajeiteri aisati shivajaniqui.

⁸Ari yoajeitaca, iquemajeitanaca. Yaayetajiri timaarentapaintsiri, yoajiro cantiriqui.

Ocaratiri jaajanchari 7. ⁹Icarajeiti oainchari 4,000. Impoiji itiancajeitajiri:

—Pijajeitaje pivancopeequi.

Icoaveta variseo irineerime

Jesoshi intasoncantayete.

(Mt. 15.39; 16.1-4; Ir. 12.54-56)

¹⁰Itsipajeitanajiri iroamere, itejeitanaja pitotsiqui. Ijajeitanaji anta Tarimanota-

qui. ¹¹Ari ipocapaaque variseo. Iquisatsa-tiri, icantiri:

—Jentsite, pintasoncantayete notantempiri avirotaque Tasorentsi, impoijiquea ariorica nonquemisanan-iro-tempi.

¹²Oshequi catsini ocantimoneentacari Jesoshi. Icantiri:

—¿Paita icoajeitanti maaroni atiri nonijayeri nontasoncante? Quearotaque oca noncamantasanotempiri, eiro ineanatsi nontasoncantayete.

¹³Ari ijatanaji Jesoshi, itetanaja aisati pitotsiqui. Ijatanaji, imonteanaja intatiquero.

Icantiri Jesoshi:

“**Yamatavitimpicari variseo**”.

(Mt. 16.5-12)

¹⁴Ipeacojeitanacaro iroamere iraaniquerome tanta pitotsiqui, aparo yaanaque. ¹⁵Icantiri Jesoshi:

—Paamaventearo tapiacaarori tanta, yashitari variseo, aisati yashitari Eroreshi.

¹⁶Ari icantavacaanaca, icantajeiti:

—Tecatsi atantane, irootaque icantan-taqueeri: “Paamaventearo tapiacaarori tanta”.

¹⁷Iotacotaqueri Jesoshi, icantiri:

—¿Paita picantavacaantari: “Tecatsi atantane”? ¿Paita caari piquemanta? ¿Paita caari piotanta? ¿Paita caari piquenqueshiretanta? ¹⁸Otimaveta poqui, ¿paita caari pineanta? Otimaveta piquemantari, ¿paita caari piquemanta? ¿Paita caari pinquenqueshiretantajaro

¹⁹noshequiantacarori tanta? Ocaraveta apapacoroni tanta, icarati ocarori 5,000 shirampari. Ari paajiro timaaranantapaajan-tsiri. ¿Jaocampa ocarati jaajanchari cantiriqui?

Yacajeitanajiri:

—Ari ocaratiri 12.

²⁰Icantiri Jesoshi:

—Aisati pashini, ocaratiri tanta 7, icarati aisati ocarori 4,000. Paajiro aisati timaaranantapaajantsiri. ¿Jaoca ocaratiri cantiri pijaajiri?

Icantajeitiri:

—Ocaratiri 7.

²¹Icantiri:

—¿Tequerampa meeca piotavaquero? Te iro nonquenquetsacote tanta incaranqui, irointi noquenquetsacoti yoametantiri variseo aisati Eroreshi.

Yoavisacotajiri Jesoshi quitapoajaquiri.

²²Ari ijajeitanaji Vetsairaqui. Yameeta-paaqueneri quitapoajaquiri. Icantapaa-queri:

—Pimpamitavaqueri iramenantajeari.

²³Ari yacatsatanaqueri quitapoajaquiri, yaanaqueri otsapitapaaca nampitsi. Iquitiojaqueri iroquiqui, ipamijaquit-aqueri. Isampitakeri:

—¿Amenavetajimpimpa?

²⁴Yamenanaji, icanti:

—Je, namenavetaja, noneavetajari shiramparinta, iro cantaincha te inconija-tasanoteji, ishiavetacaro inchato, aniitaintsiri.

²⁵Yapiitajiri aisati, ipamijaquitajiri iroquiqui. Impoiji yamenasanotanaji, yavisacotasananaji. Yamenanaji, conijaitetasananaji maaroni. ²⁶Icantiri Jesoshi:

—Eiroyea piquenanajitsi nampitsiqui, apatiroyea povaanajero pivancoqui.

Iotiri Petero Quirishito ini Jesoshi.

(Mt. 16.13-20; Ir. 9.18-21)

²⁷Ari yovaanaja Jesoshi, itsipatanajari iroamere. Ijajeitanaque nampitsipeequi anta Sesareajiripoqui. Inianquitanaque avotsiqui, isampijeitaqueri iroamere:

—¿Paita yaamaajeitaquenari atiripee?

²⁸Yacanaqueri:

—Aparopee aamaayetaingha aviro Joani vaotisantantsiniri. Irio itsipa

yaamaaquempi aviro Iriashini. Itsipapee aisati icanti aviro camantantatsiniri, pitinaanaja.

²⁹Isampijeitaqueri:

—Avirojei, ¿paita piquenqueshirejeitiri?

Yacanaqueri Petero:

—Avirotaque naamaajeitacari peerani: aviro Quirishito.

³⁰Icantasanotiri:

—Eiroyea picamantacotanatsi.

Icantajeitiri Jesoshi:
“Noncamimentajeitempi”.

(Mt. 16.21-23; Jr. 9.22)

³¹Ari yoametajiri aisati:

—Noponeaca narori inquitequi, natiritapaaque. Coajica oshequi nonquemaatsicamentajeitempi. Queario, intseencaquena pincatsaripee, aisati jivatacaajeitiriri saserotepee, aisati oametantirori sanquena-rentsi: intseencajeitaquena, iroacantajeitaquena. Noncamaque, iro cantaincha oncarataque mava quitaiteri, irosati nontinaantanajeari.

³²Aitaque icantasanojeivetacari. Yora Petero yaanaqueri quempequetiji ara, icantaqueri:

—¿Paita picantantarori oca? Te oncameetsateji poamaimatea.

³³Ari ipitsocashijeitacari Jesoshi iroamerepee, yamenajeitanaqueri. Irosati ishintsatsatantacariri Petero:

—Piquempetacari Satanashi. Pijate, te pincameetsateji. Piquempejeitacari atiri, te pinquenqueshireempa. Te piateroji icoacaquenari Tasorentsi.

Jaoca ancantajeiteari aijatanteariri Jesoshi.
 (Mt. 16.24-28; Jr. 9.23-27)

³⁴Impoiji icajemiri Jesoshi apatojeitachari aisati iroamere. Icantiri:

—Ariorica picoaque poijajeitena, eiro pantirotsi caari cameetsatsi picoashiyevertari avirori. Poijajeitanaquena, pinqueario-

ventajeitenaro maaroni noncoacaquempiri: piojeite ariorica pincamimentena. ³⁵Terica pincoyeji pincamimentena, patsipetashita pitimi, ainti pijate Sharincaveniqui. Iro cantaincha ariorica pincamimentena, aisati ariorica pinquemisantacayeteri atiri, eiro patsipetashitarotsi: pincantaitatiyempani panee anta inquitequi. ³⁶Ariorica pashijetearo maaroni timayetatsiri aca quipatsiqui, aintiquea pijate Sharincaveniqui, tempa patsipetashitearo pashiyetearo. ³⁷Ariorica pijate Sharincaveniqui, ¿jaoca pincanteari pijatanteari inquitequi? ³⁸Tseencantatsiri inajeiti maaroni timajeitatsiri, aisati yantapinijeitiro caari cameetsatsi. Noponeaca inquitequi, natiritapaaque. Coajica nojataje inquitequi: meeca, ariorica pipashiventacaana, aisati ariorica pipashiventacaaro noneane, coajica nompiapaajerica, nompashiventacaapeempi avirori. Aisati ariorica nompiaje nompincatsaritanotapaaque, nonquempetapaaqueari Apa, aisati nontsipajeitapaaqueari inampirepee.

Ipashinitimotanaqueri Jesoshi iroamere.

(Mt. 17.1-13; Jr. 9.28-36)

9 ¹Aisati icantajiri Jesoshi:

—Queariotaque oca noncamantasantotempiri. Pamene, acarajeitaque meeca aca. Eirotarica picamajeititsi, ari pineavaqueri Tasorentsi impoque, impincatsaritapaaque, intasorentsitapaaque.

²Avisanaque 6 quitaiteri. Yaanaqueri Jesoshi yora Petero, Santiaco, aisati Joa, ijivatanaqueri anta antearoqui toncaari. Ari itimajeitapaaque apaniro. Ipashinitanaca Jesoshi, ipashinitimotanaqueri oijajeitiriri. ³Oshipaquireanaque iitsaare. Oquitamarotanaque catsini. Aca quipatsiqui te aneroji catsini quempetearoneri.

⁴Imapocapaaca, iconijatimotapaaqueri Iriashini aisati Moishishini, iquenquetsatacapaaqueri Jesoshi. ⁵Ineaveetashitanaca Petero:

—Oametnari, tempa ocameetsatasanoti pamaquena aca, noneantaquempiri. Meeca nocoaque novetsicajeitempi mava pancotsi-janiqui: aparoni pashi, aparoni irashi Moishishi, iro otsipa irashi Iriashi iriori.

⁶Itsarasoanojeitanaque catsini, irootaque caari iotana Petero paitarica incanterimeri. ⁷Otsimancajeitapaaqueri mencori. Omapocanaca irineane Tasorentsi mencoriqui, icantajeitaqueri:

—Iriotaque notomi nonintasanotiri, pinquemisanteri.

⁸Intsipaita yamenayevetanaca iroamere, tecatsi irinee, irinti apaniro Jesoshi. ⁹Irosati ipiajeitananaja, yoirincajeitanaja. Icantasanotiri Jesoshi: —Eiroyea picamantacotirotsi oca pineaqueri. Coajica noncame. Ariorica nontinaanaje, irosati pincamantacotante-nari oca pineaqueri meeca. Tempa noponeaca inquitequi, natiritapaaque.

¹⁰Ari iquemajeivetavacari, irosati isampitavacantanaca paita ojitari oca icantiriri Jesoshi: “Coajica noncame. Nontinaanaje aisati”. ¹¹Isampijeitaqueri:

—¿Paita icantantari oametantirori sanquenarentsi: “Tequeratarica impoque Quirishito, irijivatapaaque Iriashini”?

¹²Iriori Jesoshi yacanaqueri:

—Queario icanteetiri: “Irijivatapaaque Iriashini, iroameetsajeitapaaque maaroni”. Noponeaca narori inquitequi, natiritapaaque, tempa naro isanquenatacotiniri peerani: “Oshequi inquemaatsicatearo, aisati oshequi intseencajeitavaqueri”. ¿Paita icantantaroniri oca? ¹³Meeca noncamantempi: aitaque peerani ipocaji aisati Iriashini. Oshequi yantanayetaqueri, imoncarataquero isanquenatacotiteetacariniri.

**Yoavisacotiri Jesoshi
yatajeaoncane camaari.
(Mt. 17.14-21; Ir. 9.37-43)**

¹⁴Ari ipiajeitanaja anta isavicajeita-
quenta iroamerepee pashini. Ineajeita-

paaqueri itsipajeitapaaqueri oshequi apatotimentacariri. Itimi oametantirori sanquenarentsi, ineanajeitiri yora iroamerepee Jesoshi. ¹⁵Ari ineaajeitavaqueri Jesoshi, ipocaji, yoasanotavaqueri cavaco. Ishiashijeitanacari, ivetsajeitavacari. ¹⁶Isampitapaaqueri:

—¿Paita pineanatacojeitiri?

¹⁷Yacanaqueri aparoni shirampari, icanti:

—Oametnari, namaquempiri notomi.

Yatajeaoncapinitiri camaari. Imasontiaqueri notomi. ¹⁸Irajiricapaajeririca, ipishoncajiri quipatsiqui, ishimoretaacaanacari, yatsicanajitacaanacari, iquisoporoquitacaanacari. Nocantavetari poamere: “Poavisacotajeri”. Teve, te irimateroji.

¹⁹Yacanaqueri Jesoshi:

—Te pinquemisantimajeiteji. ¿Jaoca oncarate piojeite? Noametapinijeivetaquempi, iro cantaincha te pinquemisantajeitavaque. Jentsite, pamaquenarite pitomi.

²⁰Ari yamaqueneri. Yora camaari, ineapaaqueri Jesoshi. Yampitsitacaanacari jananequi, ipariacaanaqueri quipatsiqui, poron. Ipinaironcapinaironcatanaca, ishimoretanaque ivantequi. ²¹Yora Jesoshi isampitaqueri iriri jananequi:

—¿Jaoca ocaratiri intantanacari?

Yacanaqueri:

—Ainiroquerani ijananequitapaini.

²²Oshequi yojocacaapinitari paamariqui, aisati nijaqui. Icoaveta iroamayerime. Pitasoncantirica, pineshinoncatajena, poavisacotajenari.

²³Icanti Jesoshi:

—¿Paita picantantanari: “Pitasoncantirica”? Pinquemisanterica, aitaque irimataquempiro Tasorentsi paitapeerica.

²⁴Antearojenca icanti iriri jananequi:

—Noquemisantaveta. Tericampa nonquemisantasanote, pinquemisantacaasanotenota avinti.

²⁵Iriori Jesoshi ineavaqueri ishiashijeitapaaqueri oshequi atiri. Iquisatsataqueri camaari, icantiri:

—Avironirotaque camaari. Pimasontitacanti, pimayempitacanti. Meeca nocantasanotimpi, poimpacanjariqueti, eiro patajeaoncajiritisi aisati.

²⁶Icajemañaque camaari, yampitsitacaanacari jananequi, yojocanjiri. Yora jananequi iquempevetanacari camatsiri. Oshequi cantayetanañtsi:

—Camañaque inaque.

²⁷Iro cantaincha yacatsavacotajiri Jesoshi, yoitinaajiri, icatianaja iriori.

²⁸Impoiji iqueajeitapaaji pancotsiqui. Iojaitaca iroamere, isampijaitiri:

—¿Paitaquea caari nomatantaro narori noavisacoteri?

²⁹Yacanaqueri:

—Oshequi ishintsiti yora camaari, irotaque caari pimatantari poavisacotajeri yora yatajeaonquiri. Aisati maaroni quempejaitariri, eiro pimajeitiritisi. Iro cantaincha, pincantasa-noterica Tasoreñsi, ari iramitacotempiri poavisacotajeri yatajeaoncane camaari.

Yapiitajiniri Jesoshi iroamere:

“Aitaque noncamaque”.

(Mt. 17.22-23; Ir. 9.44-45)

^{30,31}Ari yovaanaja Jesoshi anta, iquenañari Carireaquei. Ari icoaque iroameteri iroamerepee apaniro, irotaque imanantanjari ijajeitanaji. Icantanaqueri:

—Noponeca narori inquitequi, natiritapaaque: coajica iraacanteetena. Irayena atiri, iroyena. Ari noncamasano-vetaquea, impoiji, omavatapaaque quitaiteri, ari nontinaanaje aisati.

³²Iro cantaincha te iriojeitavaqueroji iriori oca icamantavetacariri. Itsaroajeitanaque irisampiterime.

Jaoca ancanteari ampincatsariventante.

(Mt. 18.1-5; Ir. 9.46-48)

³³Ari yareejeitapaaca Caperenañoqui, isavicajeitapaaque pancotsiqui. Isampitiri Jesoshi iroamere:

—¿Paita picantavacaanacari avotsiqui?

³⁴Imajerejeitanaque iriori, ipashiventajeitanaca. Icantavacaajeitanaca anta avotsiqui, icanti:

—Meeca acarajeitica, ¿janicampa anacotantatsineri impincatsarite?

³⁵Ari isaviñi Jesoshi. Icajemiri iroamere, icantiri:

—Ariorica pincoye pimpincatsariventante, pintacojeiteari pishaninca maaroni, aisati pamitacojeiteri, pineshinoncajeiteri.

³⁶Yamaqueneri aparoni jananequi. Isatecapaaqueneri nianñi, yavitsanotavaqueri. Icantiri:

³⁷—Pishirejeitena narori, impoiji pincavintsayeri jananequi. Ariorica pincavintsayeri, aisati narori, pincavintsayena. Aisati oquempetaca, ariorica pincavintsayena, te naro pincavintsasa-note, irintiquea Apa tiancaquenari.

Yoavisacotanti pashini quemisantatsiri.

(Mt. 10.42; Ir. 9.49-50)

³⁸Impoiji yora Joa icantanaqueri:

—Oametanari, noneajeitaqueri shirampari, icanti: “Noquemisantaqueri Jesoshi, irotaque nojocantacariri camaari”. Te meeca ancarajeiteriji iriori aca, irotaque notsaneacotantariri.

³⁹Icanti Jesoshi:

—Eiro pitsaneacotaritsi. Tempa nomatacaqueri itasoncanti, eiro meeca icantimatantsi irinti. ⁴⁰Janicarica caari quisanenteene iriotaque acarajeitiri.

Icantiri Jesoshi: “Pincavintsaaavacaajeitea”.

(Mt. 18.6-9; Ir. 17.1-2)

⁴¹Aisati icantiri Jesoshi:

—Ariorica iriotavaquempi atiri aviro quemisantanari, irotaque incavintsantavaquempiri, aitaque impinateri Apa. Quearotaque oca nocamantasantotimpiri. ⁴²Jeri yoca jananequi, quemisantanari: eiro catsini pantacairitsi caari cameetsatatsi. Pantacayeririca, iroasanquetayempi Tasoreñsi, pashinoncaasanotanaquea. Oncameetsateme pincamiteame peerani, eiro pashinoncai-

tame. ⁴³Jero oca noshiacantempiri meeca pioleteari te oncameestsateji catsini pantero caari cameestsatatsi. Ariorica anticayempiro paco caari cameestsatatsi, pimpeshero. Aitaque ocameestsatiri pijapontsoquitanaje inquitequi, oncanteata anta paneantasanota-paaajari. Te oncameestsateji catsini ontime apite paco: eirorica pipeshirotsi, irootaque pijatanteari Sharincaveniqui. Aitaque anta otimiri paamari caari tsivacanetatsi, aisati iriori yora quenitsi caari caamanetatsi. ⁴⁴Eiro anta icamitsi quenitsi, aisati eiro otsivacanetitsi paamari iroori. ⁴⁵Aisati ariorica anticayempiro piiti caari cameestsatatsi, pimpesajero. Aitaque ocameestsatiri pijapontsoquitanaje inquitequi, oncanteata anta paneantasanotantapaajeri. Te oncameestsateji ontime apite piiti: eirorica pipeshirotsi, irootaque pijatanteari Sharincaveniqui. ⁴⁶Eiro anta icamitsi quenitsi. Aisati eiro otsivacanetitsi paamari iroori. ⁴⁷Aisati ariorica anticayempiro poqui caari cameestsatatsi, pinquitsoreero. Ari ocameestsatiri pijanaroquitanaje anta ipincatsaritinta Tasorentsi. Te oncameestsate ontime apite poqui: eirorica piquitsoreirotsi, irootaque irojocanteetempiri Sharincaveniqui. ⁴⁸Eiro anta icamitsi quenitsi. Aisati eiro otsivacanetitsi paamari iroori. ⁴⁹Avirojeitaque quemisantajeitanari, irootaque inquisajeitan-tempiri caari quemisantajeitatsi. Ariorica pinquemisantajeitena, ompomerentsitimotempi. ⁵⁰Ocameestsati tivi. Irompa ariorica ompeanaquea ovoteari, tecatsi oncantajea ompoteataje aisati. Aisati piquempetaca avirori: ariorica paacameestsatavacaajeitea, tempa ocameestsati: pincanteani paacameestsatavacaajeitea, maaroni.

Ijataque Jesoshi Joriraniqui intatiquero.

10 ¹Ari yovaanaja Jesoshi, iquenanaaji Joreaquei. Aisati ijataji intatiquero Joriraniqui. Yapatotimentajari aisati oshequi atiri, yoamejeitapaajiri. Tempa aitaque yametar oyoametantapiniti.

Icanti Jesoshi: “Eiro pojocajirotsi pijina”.

(Mt. 19.1-12; Jr. 16.18)

²Ipocashitapaaqueri variseo. Icoaveta incomitacayearime Jesoshi, irootaque isampijeitantapaacariri:
—¿Oshinetantampa irojocajero shirampari ijina?

³Yacavaqueri:

—¿Paitampa icantimpiniri Moishishi?

⁴Yacajeitanaqueri iriori:

—Icantini Moishishi: “Pisanquenatajenero pijina, pincamantajero: ‘Nojocajempi’. Impojiquea oshinetantajea irosati pojocantajearori”.

⁵Icantanaqueri Jesoshi:

—Te incoaveteaji Tasorentsi pojocajero pijina, iro cantaincha te ontimizeji piquenqueshireantari, irootaque isanquenatantimpiniri Moishishini oca. ⁶Peerani intantacarori yovetsicantaque Tasorentsi, yovetsicaqueri shirampari. Aisati iroori tsinane yovetsicaquero. ⁷Irootaque yojocantariri shirampari iriri, aisati irinero, irantearori ijina. ⁸Ari icarati shirampari, aisati tsinane: apite inavetaca. Iro cantaincha, ariorica irayero ijina, inquempetaquea apaniro irinaque: quiso iroavacaya. ⁹Ari ineaqueri Tasorentsi apaniro inaque, meeca eiro pinijantareacaajiriti.

¹⁰Ari itimapaaji anta pancotsiqui.

Isampitajiri aisati iroamere:

—¿Jaoca ocantari oca picantaqueriri?

¹¹Icantiri:

—Janicarica joquerone ijina, ariorica iraaaje otsipa tsinane, tempa iraimentearo ijinasanori.

¹²Aisati oquempeta iroori tsinane, ariorica ojocajeri ojime, aajerica pashini shirampari, tempa aimenteari ojimesanori iroori.

Yora Jesoshi inecameestsataqueri jananequipee.

(Mt. 19.13-15; Jr. 18.15-17)

¹³Ari yameetapaaqueneri jananequipee, icantapaqueri Jesoshi:

—Pincanteri Tasorentsi cameetsa irisavicacaajeiteri yoca jananequipee.

Iro cantaincha icantavaqueri iroamere-pee:

—Eiro pamiritsi jananequipee, pashereircari oametanari.

¹⁴Te onimoteriji Jesoshi yantiri iroamere. Icantiri:

—Pishineteri impocashitenata jananequi. Eiro pitsaneanatsi. Pineaqueri yoca jananequi, ishirejeitaquena: ipincatsariventajeitiri Tasorentsi maaroni quempejeitariri iriori. ¹⁵Queariotaque oca nocamantasanotimpiri, irinti jananequi ipincatsatiri Tasorentsi. Irompa irinti yora caari shiiri jananequi, yora caari pincatsatiri Tasorentsi, eiro ijatitsi irinti anta ipincatsaritinta.

¹⁶Yavitsanojeitavaqueri jananequi, ipamitaqueri iitoqui. Icantajeitiri:

—Cameetsa irineshinoncatempri Tasorentsi.

Ijaticari Sharincaveniqui ashitaarantincari.

(Mt. 19.16-26; Ir. 18.18-27)

¹⁷Ari ijataji Jesoshi, iquenanaqi avotsiqui. Ishiapaaca aparoni shirampari, itiyeroashitapaacari. Icantiri:

—Oametanatsiri, cameetsari pini. ¿Paitampa nanteri naneantajeiri, noncantaitiyempani?

¹⁸Icantiri:

—¿Paita picantantanari: “Cameetsari pini”? Tecatsi cameetsatsine, irinti apaniro Tasorentsi icameetsati. ¹⁹Piovintsataquero oca icantacantiniri Moishishini: “Eiro poantitsi. Eiro paimentarotsi pijina. Eiro paimentaritsi pijime. Eiro picoshititsi. Eiro pitseeyacotaritsi atiri. Eiro pamatavitantitsi paitanteariri yashiyetari pishaninca. Pimpincatsateri piri, aisati piniro”.

²⁰Icantanaqueri iriori:

—Pamene, ainironi nevancaritapaini, aitaque notsoteaquero maaroni ocapee, irosati meeca.

²¹Yora Jesoshi, yamenanaqueri, inintaqueri. Icantaqueiri:

—Ainiro apanivani caari pimati. Pijate meeca pimpimantayetero maaroni pashiyetari. Pimpashijeiteari caari ashitaarantachane, pashini paapaaje pivaararo inquitequi. Impoiji, tsame, poijatanaquena.

²²Iquemavaitiiri icantaqueriri, yoashiretanaca. Iro yoashiretantanacari oshequi timimotiriri irovaararo. Icantavototanaca, ijatanaji. ²³Ari ipitsocashitanacari Jesoshi iroamere, icantiri:

—Yora ashitaarantachari opomerentsi-timotari irijate anta ipincatsaritinta Tasorentsi.

²⁴Iquemavaitiiri iroamere, yoajeitanaquero cavaco. Yapiitajiniri aisati Jesoshi, icantiri:

—Evcancari, aitaque opomerentsitaca pijate anta ipincatsaritinta Tasorentsi.

²⁵Tempa opomerentsitaca inqueero cameyo omoroqui quitsapi. Iroquea irointi pomerentsitanotachari irijate ashitaarantachari anta ipincatsaritinta Tasorentsi.

²⁶Yoajeitanaqueri cavaco catsini iriori. Icantavacaanaca:

—¿Janicampa meeca avisacotajantsine? Opomerentsitasanotaca.

²⁷Yamenanaqueri Jesoshi, icanti:

—Eiro imatashitarotsi atiri iroavisacotajea irisati, irintiquea Tasorentsi matacayerine iroavisacotajeri. Tecatsi pomerentsitimotearine irinti.

Yora Tasorentsi impinajeiteri maaroni oijajeitiriri Quirishito.

(Mt. 19.27-30; Ir. 18.28-30)

²⁸Impoiji Petero icantanaqueri iriori:

—Naroquea nainti, aitaque nojocayetaquero maaroni, paitarica nashijeiveitaniri, noijatanaquempi meeca avirori.

²⁹Icanti Jesoshi:

—Queariotaque oca noncantempiri. Ariorica pincoaque poijatanaquena, eiro

patsipetashitarotsi pojocayetero pinampi, pirentipee, pitsiropee, piniro, piri, pijananequitepee, poanepee. Aisati ariorica pincoaque pinquemisantacayeri pishaninca, eiro patsipetashitarotsi.

³⁰Queario, inquishmentempero piquemi-santaquena, ompomerentsivetea, iro cantaincha eiro patsipetashitarotsi.

Ariorica pojocanaquero aparo, impajempi Tasorensi 100: pivancopee, pirentipee, pitsiropee, piniropee, pijananequitepee, poanepee, maaroni. Aitaque coajica ontimimojeitempi oshequi anta paneasa-nojeitapaajenta, pincantaitiyempani.

³¹Ainero pincatsarivetachari meeca, iro cantaincha coajica eiro pincatsaritajitsi; ainero meeca yora caari pincatsariyetatsi, iro cantaincha coajica impincatsarite irinti.

Yapitajiniri aisati Jesoshi: “Noncamaque”.

(Mt. 20.17-19; Jr. 18.31-34)

^{32,33}Ari iquenajeitanaque avotsiqui, irotaintsi irijajeite Jerosarequi, ijivatanaque Jesoshi. Yoajeitanaquero cavaco oijajeitiriri, aisati itsaroajeitanaque. Ari yapatotiri aisati yora 12 iroamere, icantiri:

—Pinquemena. Tempa noponeaca inquitequi, natiritapaaque. Meeca ajate Jerosarequi. Coajica iraacanteetena anta, iravaquena jivatacaajeitiriri saserotepee, aisati oametantirori sanquenarentsi, iroacantaquena. Iraacantajena aisati, iraaatenari pashinisati atiri. ³⁴Irishirontimentajeitaquena, inquitiojena, impasana-tena, iroyena. Omavatapaaque quitaiteri, irosati nontinaantanajeari.

**Icantiri Jesoshi jaoca incanteari
impincatsaritanteari.**

(Mt. 20.20-28)

³⁵Ipoqui quempeji Santiago, jeri Joa, yora itomipee Severo. Icantiri:

—Oametantatsiri. Nocoaque pishinete-naro paitarica noncoacotempiri.

³⁶Icantavaquero Jesoshi:

—¿Paita picoiri noshinetempiri?

³⁷Icantiri:

—Coajica pimpincatsaritanote, pishine-tena nosaviquimotempi pacosanoriqui. Irio iyeca irisaviquimotempi pampatequi, nonquempejeitempi avirori pipincatsariti.

³⁸Icantiri Jesoshi:

—Te pioteji paitarica picantaquenari. Pamene, oshequi nonquematsicatearo narori, çarimpa pimatero oshequi pinquematsicatearo avirori?

³⁹Icantanaque iroamere:

—Je, ario nomataquero.

Icantiri:

—Je, aitaque ontime coajica pinquematsi-
cateari. ⁴⁰Iro cantaincha tecatsi noncanea noshinetempi pisavique nacosanoriqui, aisati nampatequi. Irintiquea cantatsineri Tasorensi janicarica saviquimotenaneri: iotitacarini peerani yora saviquimotenaneri.

⁴¹Iquemajeitancariri yora itsipapee iroamere, iquisanentanaquero Santiago aisati Joa. ⁴²Icantajeitiri Jesoshi:

—Caate, pimpocajeite. Pioti itimi ivincatsa-ritepee pashinipee atiri. Iperanayetacari ishaninca iriori. Aisati yora savicacaajeitiriri iriori, iperanajeitacari ishaninca. ⁴³Eiro piquempejearitsi avirori. Aintiquea ariorica pincoaque pimpincatsariventajeiteri pishaninca, pintacojeiteari maaroni pitsipajeitari. ⁴⁴Aisati ariorica pincoaque pisavicacante, ari pintacojeiteari maaroni pitsipajeitari. ⁴⁵Noponeaca narori inquitequi, natiritapaa-que. Te iro nompocantea nonampiteari atiri, irointiquea nopocanta nintacojeiteari itsipapee. Aisati noncamimentero oshequi atiri, noavisacotanteariri.

Yoavisacotiri Jesoshi Timeojani.

(Mt. 20.29-34; Jr. 18.35-43)

⁴⁶Ari yareetaca Jesoshi anta nampitsi-qui pajitachari Jerico. Yovaanaja aisati, itsipajeitanacari iroamerepee aisati oshequi apatojeitainchari. Ainero

isavicaiti avotsinampiqui shirampari pajitachari Timeojani, iriotaque itomi Timeo. Icamarajati Timeojani, icoacotapinitiri atiri impashiteari quirequi.

⁴⁷Iquemacotavaqueri impoque Jesoshi, yora nasaretasati. Iroaquera iquemacotavaqueri, icajemavaqueri, icantiri:

—Jesoshi, tempa aviro ishanincani Iravirini, pineshinoncatapaajena narori.

⁴⁸Oshequi atiri ishintsitsajeitaqueri: —Pimajerete.

Iro cantaincha aiqvero catsini icajemasnotanaji aisati:

—Aviro quempetajariri Iravirini.

Pineshinoncatena narori.

⁴⁹Icatiapaaca Jesoshi, icanti: —Pincajemeri.

Icajemeetiri camarajari, icanteetiri: —Piveshireanaquea, pincatianaje.

Icajemimpi yonta.

⁵⁰Irosati yojocantanacaro yoicotari, icatianaca, cati. Ijatashitanaqueri Jesoshi.

⁵¹Icantavaqueri Jesoshi:

—¿Paita picocotanari? ¿Jaoca noncantajempiri?

Yacanaqueri camarajari:

—Apa, nocoaque namenaje.

⁵²Icantiri Jesoshi:

—Meeca pijataje. Pishiretaquena,

irootaque pavisacotantajeari.

Irosati yamenantanaja, yoijatanajiri avotsiqui.

Ijatanaque Jesoshi Jerosarequi, ipincatsajeitavaqueri atiripee.
(Mt. 21.1-11, 14-17; Ir. 19.28-40;
Joa 12.12-19)

11 ¹Iquempejijeitapaacaro Jerosarequi, Vetejajequi, aisati Vetaniaqui: onaquenta toncaari pajitachari Orivomashi. Yora Jesoshi itiancaqueri iroamere apite, ²icantavaqueri:

—Pijatapainte anta nampitsiqui onta amontetacari. Pareetapaaquearica, pineapaaqueri aparoni voro, tequera

irantearitasanote, tequera inquijacoyeeteari. Ainiro itsatacota: pintsatacoreapeeri, pamaquenari. ³Ariorica incanteetavaquemp: “¿Paitaquea pitsatacoreantarriri voro?” Ari pincantanaqueri: “Irio coiriri Avincatsarite. Coajica iroimpiajempiri aisati”. Ari irishinetempiri.

⁴Ari ijatanaque iroamere. Ineapaaqueri voro anta avotsiqui. Itsatacota ashitacoroqui pancotsi. Itsatacoreapaaqueri.

⁵Ainiro isaviqui atiri, isampitavaqueri:

—¿Paita pantiri? ¿Paita pitsatacoreantarriri voro?

⁶Yacanaqueri, icantiri oca icantavaqueriri Jesoshi. Ari ishinetavaqueri yaanaqueri voro. ⁷Ari yacatsatacotanaqueneri Jesoshi. Yoanquetaqueneri imititsaqui iitsaarepee, impoiji iquijacotacari. ⁸Ari yaniitacaanaqueri avotsiqui,

ipincatsajeitavaqueri maaroni ishaninca, imaaroncajeitaqueneri quitsaarentsipee avotsiqui. Yora itsipapee ipesaqueneri inchatoshi, aisati yoaqueneri avotsiqui. ⁹Yora jivajeitaqueriri aisati impoijeitaqueriri, icajemajeitanaque:

—Jeritapaaque oavisacojeiteeneri, tsame aacameetsajeitavaqueri. Coraqueni, iriotaque itiancaqueeneri Avincatsarite.

¹⁰Peerani Iravirini ipincatsariventirini ashanincani: meecaquea, impincatsariventaquee yoca anevaquerica. Iriotaque ishanincani Iravirini. Tsame ampincatsajeteri Tasorentsi inquitequiniri.

¹¹Ari yareejeitapaaca Jerosarequi, iqueapaaque ivancoqui Tasorentsi. Itsoteaquero yamenayetaquero, iro cantaincha ishaavijiteanaque catsirincaiteri. Isoquijanaji, ijatanaji Vetaniaqui. Itsipajeitanajari iroamerepee.

Ineaquero Jesoshi iyera caari timatsi oitsoqui.
(Mt. 21.18-19)

¹²Ari oquitaitetamanaji aisati, yojocanjiro Vetania, irijate Jerosarequi.

Nianqui aavetacari itashe. ¹³Ineaquero paricoti inchato, pajitachari iyera. Otimaveta oshi. Ari ijatashitiro, icoaveta-paacaro oitsoqui. Te aneroji, irointi oshi. Tequeratsita omoncaratajea oitsoquitantajeari. ¹⁴Icantanaqueri Jesoshi iroamere: —Tecatsi iroajeitajeari atiri oitsoqui aisati.

Itiancajeitajiri Jesoshi pimantayevetachari anta ivancoqui Tasorentsi.

(Mt. 21.12-17; Jr. 19.45-48; Joa 2.13-22)

¹⁵Ari yareejitaja aisati Jerosarequi. Iqueapaaji ivancoqui Tasorentsi. Yojacajeitapaaqueri maaroni pimantajeivetachari aisati maaroni amanantajeivetachari. Itatsinquitayetapaaqueri imesatepee yora pinavacaavetariri iirequite. Aisati itatsinquitayetapaaqueri isavicamentopee pimantajeivetariri sampaquiti. ¹⁶Itsaneapitsajeitacari irayetanaqueme vaararontsi anta ivancoqui Tasorentsi. ¹⁷Ari yoametantaque, icantajeitiri: —Peerani isanquenatironi irineane Tasorentsi, icantini: “Irootaque oca novanco. Aca inquenquetsatacaajeitantenari maaroni atiri”. Tempa piojeivetaro. Iro cantaincha avirojei pipeaquero ivanco coshinti.

¹⁸Ari iquemajeitavaqueri maaroni yora apatotimtariri, irootaque yoajeitanta-nacariri cavaco. Aisati iquemacotaqueri jivatacaajeitiriri saserote, oametantirori sanquenarentsi, maaroni. Icantajeivetaca: —¿Jaoa ancantaniroteriri Jesoshi, avanteariri?

Iro cantaincha tecatsi incanteri, itsarocaajeitacari. Tempa ipincatsajeitiri atiri Jesoshi. ¹⁹Iqueanaji catsirincaiteri, ari yojocanajiro Jesoshi nampitsi.

Ineajeitaquero iyera, ocamanaque.

(Mt. 21.20-22)

²⁰Oquitaitetamanaji aisati, ipianaja anta onaquenta iyera. Ineapaaquero,

ocamanaque, irosati anta ovaritsaqui.

²¹Iquenqueshiretaquero Petero icantanaqueri Jesoshi oshaiteji. Icantiri:

—Oametnari, pamenero iyeraca poamaimatanaqueri oshaiteji. Camanaque.

²²Yacanaqueri Jesoshi:

—Pishireteari Tasorentsi. ²³Queariotaque oca noncamantajeitempiri. Ariorica pincanteri Tasorentsi: “Povaajero otishinta, poviincajero anta incajarequi”. Eirorica pitseencashiretitsi, aisati ariorica pioshoretasanotaque ovaanaquea, ari irimataquempiro. ²⁴Irootaque noncamantantempirori oca: ariorica pinquenquetsacayeri Tasorentsi, paitarica pincanteri, pinquenqueshirete: “Aitaque irimataquenaro nocantaqueriri”. Pishiretearirica, aitaque irimataquempiro. ²⁵Ariorica pinquenquetsacayeri Tasorentsi, pijivate pincavintsayeri pishaninca: eiro piquishmentiritsi paitapeerica iranteri. Impoiji aisati avirori, eiro iqishimentipirotsi Apa Tasorentsi pantayetiri avirori. ²⁶Eirorica picavintsairitsi pishaninca, eiro icavintsaimpitsi avirori Tasorentsi.

Icantimentavacaacaro itasorencia Jesoshi.

(Mt. 21.23-27; Jr. 20.1-8)

²⁷Ari yareejitanaja aisati Jerosarequi, yaniitamanaji anta ivancoqui Tasorentsi. Yora jivatacaajeitiriri saserotepee, oametantirori sanquenarentsi, aisati savicacaantatsiri ipocashijeitaqueri.

²⁸Icantajeitapaaqueri:

—¿Janica oametimpirori pipincatsaritantari pimayetantarori pantayetiri? ¿Janicampa meeca peaquempiri pincatsari, pimayetantacarori pantayetiri?

²⁹Icantavaqueri Jesoshi:

—Meeca aparo nosampijeitempiri avirori. Ariorica pancaquena avirori, noncamantempiro. ³⁰Yora Joa ivaotisantayeti. ¿Janicampa tianquiriri

ivaotisantayeti? ¿Iriompa Tasorentsi tianquiriri? Tericampa, ¿irintimpa atiri tianquiriri? Panquenaqueti.

³¹Ari icantavacaanaca saserotepee:

—Ariorica ancanteri: “Iriotaque Tasorentsi tianquiriri”, icanteecari: “¿Paita caari piquemisantantari Joa?”

³²Aisati eiro acantiritsi: “Iriotaque atiri tianquiriri”. Iquisheecari.

Pineaquero, yora saserote itsaroacaajeitacari atiripee; maaroni atiri inecameetsajeitaqueri Joa, icantajeiti: “Tempa irio Tasorentsi tianquiriri Joa icamantanti”.

³³Irootaque icantantariri saserotepee:

—Te nioiteji janicarica tianquiriri.

Icanti Jesoshi:

—Aisati narori, eiro nocantimpitsi janicarica tiancanari nopincatsaritantari nomatantarori oca.

**Ishiacaventiniri Jesoshi
panquitirori ovamashi.**
(Mt. 21.33-46; Jr. 20.9-19)

12 ¹Impoiji ishiacantiniri oca, icantiri:

—Ipanquitiro ovamashi shirampari.

Itantotacotaquero otsapiqui, yovetsicashitaquero onanteari ovaja. Impoiji yovetsiquiro shitamencotsi anta jenoqui iramenacoventantearori maaroni. Impoiji aisati icantiri tsameetacantsiri: “Pishenteno maaroni: coajica nompinatempi cameetsa”. Impoiniji ijatanaque pashiniqui quipatsi. ²Osamanitapainti iraacanaque oitsoqui ova. Ari yora ashitarori itiancavetari inampire aparo, iraranteme ova. ³Te impavaqueriji, irointi yaanirotaquero, tapi; ipasatashitavacari, tac, tac. Yoipiavajiri, tecatsi iranaaque. ⁴Ari itiancavetaca aisati itsipa inampire. Iposainatavaqueri iitoqui, toc, toc, yoashinoncaavaqueri. ⁵Itiancavetaca pashini aisati. Yoavaqueri, shemi. Aisati itiancavetacari oshequi itsipapee: aparopee ipasanatavaqueri, irio itsipapee

yoavaqueri. ⁶Apanivaniquea itimanaque itomi iriori, inintasanotiri. Icantashiretanaque iriori: “Irioricampa irinti notomi irio impincatsatavaqueri”. Itiancavetacari iriori. ⁷Iro cantaincha icantavacaanaca tsameetacotirori: “Jeritapaaque itomi ashitarori, ariorica incamaque iriri, iriotaque yoca ashitasanotajearoneri. Tsame avavaqueri, impoijiquea ashijeita-jearota ainti irovamashite”. ⁸Ari yaavaqueri, yoanirrotavaqueri, shemi. Yojocaqueri otsapitapaaca ovamashi. ⁹¿Paita piquenqueshirejeitiri? ¿Jaoa incanteriri ashitarori irovamashite? Tempa impoique irinti, impoyereapaaqueri iratiritepee. Pashini iramenaje shentajenerine. ¹⁰Tempa pineanatio sanquenarentsi. Ocanti: “Yora vetsiquero-nemeri pancotsi itseencajiro mapi intincamitantearomeri ivanco, icanti: ‘Te oncameetsateji’”. ¹¹Iro cantaincha Avincatsarite ipeajiro mapica otincami ivanco, ocameetsatanoti. Tempa irootaque avantanacari cavaco”.

¹²Iotacojeitavaquero icantaqueri Jesoshi, iriotaque ishiacaaventaqueri. Icoajeiveta irajeitaniquerime, iro cantaincha itsaroacaajeitacari yora apatotimentajeitacari. Ari yojocajeitanajiri, ijajeitanaji.

Isampitiri variseopee: “¿Arimpa ampajeri ivincatsarite oromasati airequite?”

(Mt. 22.15-22; Jr. 20.20-26)

¹³Itianqueetiri variseopee aisati oijatiriri Eroreshi. Icoavetaca incomitacayearime irineane Jesoshi. ¹⁴Yareetapaaca, icantapaaqueri:

—Oametantatsiri, niojeitaquempi avirotaque cameetsatsiri. Te oncanti-moneentanaquempiji paitarica icantayetiri atiri, te pintsaroacayeariji. Tampatica poametantiro icoacaajeiteeri Tasorentsi. ¿Ocameetsatimpa nomperi ivincatsarite oromasati quirequi? ¿Tericampa

oncameetsateji? ¿Nomperimpa?

¿Eirompa nopiritsi?

¹⁵Iotacotaqueri Jesoshi, iramatavite-rime yoca sampitaqueriri. Icantiri:

—¿Paita picoantacari pincomitacaye-name? Pamaquenari quirequi, ponijayenari.

¹⁶Ari aparo yamaqueneri. Isampijeitiri:

—¿Janicampa shiacantachari ivoroqui?

¿Janicampa ashitarori ivajiro?

Yacajeitanaqueri iriori, icantiri:

—Irio ashitaro Shisari, yora ivincatsarite oromasati.

¹⁷Icantiri:

—Panteneri pincatsari icoacaimpiri, aisati panteneri Tasorentsi icoacaimpiri iriori.

Yoajeitanaqueri cavaco yora sampijeitiriri.

Icantiri Jesoshi: “Queario, antinaajeitanaje”.

(Mt. 22.23-33; Ir. 20.27-40)

¹⁸Icantapiniti saroseo: “Eiro itinaajatsi camatsiri”. Ari ipocashitiri iriori Jesoshi, isampitapaaqueri:

¹⁹—Oametantatsiri, isanquenajeitanaroni peerani Moishishi, icantini: “Ariorica incame shirampari, irojocanaquero ijinani. Eirorica itimacaanaquerotsi itomi, cameetsa iraitajeri irirentini ijinani. Ariorica intimacayero itomitsori camaintsiri, irishiacantajeitajeri itomisanori iriori”. ²⁰Ari. Ainiro shirampari irirenti. Yaaveta ijina, impoji icamaque, toren. Tequera intimacayeroji itomi.

²¹Yaavetajaro irirentini apitetapaintsiri. Icamaque iriori, aisati te intimacayeroji itomi. Aisati iquempetaja iriori yora mavatapaintsiri. ²²Aisati iriori iquempejeitaca maaroni irirentini. Tecatsi intimacayero itomi. Impoji ocamaque iroori tsinane, toren. ²³Coajica ariorica intinaajeitanaje camajeitaintsiri, ¿janicampa aajeroneri? Tempa aitaque ijinantajeiveitaroni maaroni.

²⁴Icantiri Jesoshi:

—Te pioteroji sanquenarentsi, aisati te piotacoteriji Tasorentsi, tempa irootaque picomitantacarori oca. ²⁵Icamajeitaque, toren. Coajica intinaajeitanaje aisati. Iro cantaincha eiro yaajitsi aisati ijina. Eiro itimajitsi aacaajerineri aisati. Aitaque irishiapaajeari inampire Tasorentsi savicatsiri jenoqui. ²⁶Meeca noncaman-tempi: aitaque intinaajeitanaje camajeitatsiri. Tempa pineanataquero isanquenare Moishishi. Oquenquetsatacotiro quitotsequishi, otaavetaca iro cantaincha te ontonqueaji. Anta iquemaquero peerani Moishishi icantiriri Tasorentsi: “Narotaque Tasorentsi, icantani ipincatsajeitacuen Avarama, Isaca, aisati Jacovo”. ²⁷Pineaquero, aneatsi ini iriorijeji, irosati icantani iquemisantiri Tasorentsi. Te inquemisantajeji camaintsiri, irintiquea aneatsiri. Pineaquero, te ampyereempaji. Oshequi picomitanotanota avirori.

Iquenquetsatacotiro

icoacaasanotaqueeri Tasorentsi.

(Mt. 22.34-40)

²⁸Iquempejitapaaque aparoni oametan-tirori sanquenarentsi. Iquemapaaqueri icantavacaanaca. Iotacotapaaqueri Jesoshi, cameetsa yoametaavaqueri saroseo. Ari isampitapaaqueri:

—¿Paita icoacaasanoteeri Tasorentsi?

²⁹Yacanaqueri Jesoshi:

—Tempa isanquenataqueeroni Moishishi peerani icoacaasanoteeri Tasorentsi. Jero oca isanquenatiniri: “Noshaninca, pinquemisantajeitena. Yora Tasorentsi, iriotaque Avincatsarite, apaniro ipincatsariti irinti. ³⁰Oshequi catsini pinintasanoteri, pincanteani. Aisati pinquenqueshiretapiniteri”. ³¹Aisati isanquenatini: “Oquempetaca avisati nintajanacha, aisati pinquempejeiteri maaroni picarajeitiri, pinintajeiteri”. Irootaque inintacaasanojeitaqueeri maaroni.

³²Icantanaqueri oametantirori sanquenarentsi:

—Je, aitaque. Queariotasanaotaque oca picantaqueri. Apaniro ini Tasorentsi, tecatsi pashini. ³³Cameetsa oshequi catsini anintasanoteri, anquenqueshiretapiniteri. Aisati oquempeta arosati nintajancha, aisati anquempeteri maaroni acarajeitiri, anintajeiteri iriori. Irootaque icoacaasanaotaqueeri Tasorentsi. Te iro incoasanote atayeneri poshiniri.

³⁴Iquemaqueri Jesoshi, cameetsa icantaqueri, icantiri:

—Irotaintsi pimpincatsateri Tasorentsi, impincatsariventampiri iriori.

Impoiji itsaroacaajeitacari atiripee irisampitajerime aisati.

Iquenquetsatacotaja irisati Quirishito.

(Mt. 22.41-46; 23.1-7; Ir. 20.41-44)

³⁵Yoametanti Jesoshi anta ivancoqui Tasorentsi:

—Icanti oametantirori sanquenarentsi: “Yora Quirishito, irishanincatasanaotajeari Iravirini”. ¿Paita icantantarori? ³⁶Tempa iro Ishire Tasorentsi sanquenatacainirini Iravirini. Isanquenataqueroni oca: “Yora Tasorentsi icantiri novincatsarite:

‘Pisavique aca nacosanoriqui, pincaratena ampincatsarijeite. Aitaque noasanquetaa-jeiteri maaroni quisajeivetaquempiri’”.

³⁷Tempa iquenquetsatacotitarini Iravirini Quirishito, icantiri: “Novincatsarite”.

¿Jaoca incanteari Iravirini impincatsatajeri ishaninca impoitajantsiri itimi?

Ari iqumajeitavaqueri, iquimoshirejeitanaque oshequi apatotimentacariri. ³⁸Ari yoametantaji aisati, icanti:

—Paamayeariyea oametantirori sanquenarentsi. Icoashita iroaneencashitea, irishemetacayero iitsaare, inquenaquenatsantsatacaayetero. Icoaque irineacameetsatashiteari ishaninca anta nampitsiqui. ³⁹Aisati ariorica ijatapiniti anta pancotsiqui yapatojeitanta, icoyeapi-

nitiro savicamentotsi cameetsasanasota-siri. Aisati ariorica irampatojeitea ishaninca iroajeitearica, icoaque iriori irisatecapeempa nianqui incarajeitantea-riri pincatsaripee. ⁴⁰Yaapitsanirotaquero maaroni timimovetarori camajimentaaro. Osamani ineanatashimempeavetacari Tasorentsi, vero, vero. Oshequi yamatavitanaveta, iro cantaincha coajicani iroasanquetasanaotaqueri catsini Tasorentsi.

Ora ashinoncaincaro opaqueri Tasorentsi maaroni timimovetarori.

(Ir. 21.1-4)

⁴¹Ari isavicaque Jesoshi, imontetacaro yoapiniyetantarori quirequi. Yamenajeitaqueri oshequi pocaajeitatsiri, itetapinitiri iirequite yoantaririqui. Ipoqui oshequi ashitaarantincari, itetapaaque oshequi catsini iirequite. ⁴²Opcapaaque iroori aparoni camajimentaaro ashinoncaincaro. Otetapaaque iroori apimentaquite quirequijaniqui, te impinaveteaji irinti. ^{43,44}Icajemiri iroamere, icantiri:

—Queariotaque oca noncamantempiri: capichaji otevetaca oca ashinoncaincaro, iro cantaincha ineacameetsasanasotaquero Tasorentsi. Tempa opaqueri maaroni timimovetacarori: tecatsi meeca amanantantajeari oyeari. Irintiquea yora ashitaarantincari, oshequi itejeivetaca, iro cantaincha te irineacameetsasanasotariji Tasorentsi: tempa oshequitatsi iirequite iquempoyeantari.

Icantiri Jesoshi: “Coajica ontireanajea ivanco Tasorentsi”.

(Mt. 24.1-2; Ir. 21.5-6)

13 ¹Impoiji isoquijanaji Jesoshi. Icantiri aparoni iroamere:

—Oametanari. Pamenero mapica yovetsicantarori ivanco Tasorentsi: antearo oni, aisati ocameetsati pancotsi.

²Icantiri Jesoshi:

—Pineaquero jaoca ocantari oca mapipanco. Antearo onaveta, iro cantaincha coajica intireetajero, ojocayetanaquea nijanteaji mapi. Ompoyereajea pancotsi.

Isampitiri iroamere:

“¿Jaoca oncarate ontireantajeari?”

(Mt. 24.3; Jr. 21.7)

³Impoiji isavicanaque Jesoshi toncaariqui, opajita Orivomashi. Imontetapaaro ivanco Tasorentsi. Imananaca Petero, Santiaco, Joa, jeri aisati Antirishi: ijatashjeitaqueri Jesoshi. ⁴Isampitapaaqueri:

—Pincamantajeitena. ¿Jaoca oncarate ontireantajeari ivanconta Tasorentsi? Ariorica coajica omoncaratapeempa ontireanteari, ¿jaoca noncanteari notantajeari?

Icantiri Jesoshi: “Coajica irashinoncaajeitea atiri”.

(Mt. 24.4-8; Jr. 21.8-11)

⁵Icantiri Jesoshi:

—Yamataviyeetimpicari. ⁶Intime oshequi pocayetatsineri, cantatsineri: “Narotaque nainti Quirishito”. Iramatavtapeeri oshequi atiri. ⁷Ariorica pinquemacoteri imanatavacaca atiri, aisati pinquemeru pashini cantatsine: “Irimanatavacajeitea atiri”. Iro cantaincha eiro pitsaroanaquetsi. Aitaque oncanteari coajicani, irimanatavacaapinitea, iro cantaincha tequerata omoncarateaji nompincatsaritantapaajeari. ⁸Yora atiri inquisapinitanaqueri itsipapee. Oshequi irimanatavacaajeitea itsipasatipee atiri. Onicapiniyetanaquea quipatsi, aisati intasheapiniyetanaque atiripee. Aiquero ojatatiye, inquematsicajeitearo paitapeerica, irashinoncaasanojeitanaquea.

Icantiri Jesoshi: “Inquisheetapinijeiteri quemisantatsiri”.

(Mt. 24.9-14; Jr. 21.12-19)

⁹Aisati icantaqueri Jesoshi:

—Paamaventea. Icantacoventimpicari, yaimpicari yora oametavacainchari.

Ariorica pijate anta yapatojeitantari aitaque impasanayeetavaquemperi, tac, tac. Iraanaquempi anta itiminta savicacaantatsiri, aisati anta itiminta pincatsari. Ariorica irayempi, irosati pinquemisantacayeri, iravisacotantajeari. ¹⁰Irijivajeite maaroni atiri inquemacojeitena noavisacotanti, impoiji nompocaje, nompincatsaritanotanapaaque. ¹¹Ariorica irayeetanaquempi anta, ariorica incantacoventeetempi, eiro picantashiretitsi: “¿Jaoca noncantareri?” Aitaque oametaquempi Ishire Tasorentsi paitarica pincantareri. Irootaque neanatacaaquempine, eiro pineanatashitatsi avirori. ¹²Coajica aparo shirampari iraacanteri irirenti, iroacantanteariri. Pashini iraacanteri itomi. Aisati pashini atiri inquisanaqueri ashitariri, iroacanteri. ¹³Piquemisantaquena, irootaque inquisanteetempiri maaroni. Queario, ompomerentsitimojeitempi, iro cantaincha ariorica pincanteani pishiretasanotena, aitaque noavisacotajempi.

Icantiri Jesoshi:

“Coajica ompomerentsitasanotanaquea anta Joreaqui”.

(Mt. 24.15-20; Jr. 21.20-23)

¹⁴Aisati icantiri Jesoshi:

—Ariorica pineanatero isanquenareni Iranirini, piotavaquero icantiniri: irashinoncaajeitanaquea atiri. Icantiri intime ivancoqui Tasorentsi caari cameetsatatsine. Te oncameetsateji intime anta. Ariorica pintime Joreaqui, aisati pineeririca yoranqui, pishintsite pishiajeitanaque anta toncaariqui. ¹⁵Ariorica pisavique pancotsiqui saiteriqui, eiro piqueapanajantitsi paantapanajantearori paitapeerica, irointi pishianaque. ¹⁶Aisati pisaviquerica oantsiqui, eiro pipiapanajantatsi paantapanajantearori piitsaare. ¹⁷Ariorica omoncaratapaaquea maaroni oca, joo,

oshequi ashinoncayetanaquea tsomonte-yetatsine, aisati ashinoncaaquee antsotayerine ojananequite: ompomerentsitimo-jeitearo oshianaque. ¹⁸Pincanteri Tasorentsi, oncanteata ariorica pishianaque, eirotarica oparii incani. Pishiasano-jeitanaque, yaimpicari quisajeitempineri.

Yaamaventacaajeitacari Jesoshi:

“Yamatavitimpicari”.

(Mt. 24.21-26; Ir. 17.22-24; 21.22-24)

¹⁹Jero aisati icantiri Jesoshi:

—Aitaque coajica irashinoncaasanojeitanaquea catsini oshequi atiri. Peerani te irineapiniveitearoni quempetearoneri oca, jeri yora maaroni intacaroniri, te irineeroni. Coajica aisati maaroni impoitajantsineri, eiro ineirotsi aisati quempetearoneri oca. ²⁰Irishintsite iroimajerentajeiteri Tasorentsi: eiorica, impoyereavacaajeiteame. Iro iroimajere-tanteariri, incavintsajeiteri quemisanta-jeiterineri, tempa irinintajeiteri iriori.

²¹Pamene, ariorica incamanteetempi: “Pineavaqueri: jerica Quirishito”, eiro piquemisantiritsi. Aisati ariorica incanteete: “Pineaveri: jeri yonta”, eiro piquemisantiritsi catsini, itseevani.

²²Impocapaaque amatavitantatsine, incantapaaque: “Narotaque nainti Quirishito, narotaque camantantatsiri”. Intasorentsimpeavetapaaquea, incoavetaquea pinquemisantavaqueri, irimayetempiro caari pineapiniti. Incoavetea iramataviterime quemisanta-jeitiriri Tasorentsi, iro cantaincha tecatsi incanteri. ²³Paamaventea. Nojivatita-quempiro nocamantasanojeititaquempiro maaroni.

Yora Jesoshi icamantacotaja impiantajeiri.

(Mt. 24.29-31; Ir. 21.25-28)

²⁴Aisati icantiri:

—Ariorica irovecaraanaquero iquisava-caajeita, impojiquea intsitenitanaque

catsirincaiteri, eiro iquempetajatsi meeca. Aisati eiro iquitasantetanajitsi cashiri.

²⁵Aisati impariaarantanaque impoquiro-pee, imponeaquea inquitequi, imporoca-yetanaque itsipapee. ²⁶Noponeaca inquitequi, natiritapaaque: coajica irineajeitavajena atiri nonquenapaaje mencoriqui. Nontasorentsitasanotapaa-que, nompincatsaritapaaque. ²⁷Aisati nontiancajeiteri nonampirepee irampato-jeiteri maaroni quemisantajeitanari. Imponeanaquea maaroni quipatsipeequi.

Ishiacaaventiniri Jesoshi iyera.

(Mt. 24.32-35; Ir. 21.29-33)

²⁸Yovaajiniri aisati, icantiri:

—Jero oca piotantearoni oshiacaaven-tiri iyera. Iroaquerarica oshiocajempequi-yetaje, ariorica ontimanaje oshi, piotaque irotajantsi osarintsitapaaaje. ²⁹Aisati, ariorica pineajeitavaquero maaroni oca nocamantayetaquempiri, piote quempeji-tapajana, irotaintsi nompocashitajan-templ. ³⁰Queariotaque oca nocamantim-piri. Tequeratsita pincamajeite avirori, omoncaratapaaquea maaroni oca nocamantimpiri. ³¹Ompeajea inquite aisati quipatsi, irompa irointi noneane, eiro opeajatsi.

Aamaajeitajeiri Jesoshi: te ayojeiteji jaocarica oncarate impocantajeiri.

(Mt. 24.36-51; Ir. 21.34-36)

³²Jeroca aisati icantiri:

—Jaocarica oncarate quitaiteri, jaocarica incarate catsirincaiteri, tecatsi iotatsine. Aisati te irioteji yora inampire Tasorentsi jenoquiniri. Pamene, narotaque itomi Tasorentsi, iro cantain-cha te nioteji. Irintiquea iotatsi apaniro Apa. ³³Paamaventea, aisati paamaajei-tena. Te pioteji jaoca oncarate nompocantajeiri. ³⁴Nonquempeteari shirampari, jatatsiri paricoti. Ariorica yojocanaquero ivanco, icantajeitanaqueri

maaroni inampirepee paitarica irantajei-teneriri. Aisati iriori yora shentiniriri ivanco icantanaqueri iriori: “Paamaajenayea”. ³⁵Irootaque nocantajeitantimpiri: paamaajeitajenayea avirori. Te pioteji jaoca oncarate nompocantajeari: ariorica inqueanaje catsirincaiteri, ariorica nianquiite tsiteniri, ariorica irineaje teapa, ariorica onquitamaroiteamanaje quitaiteri nompocaje. ³⁶Paamaventea, paamaasanojeitena. Ariorica nompocaje, nomapocapaimpicari. Noneapaimpicari, maatsimpi catsini. ³⁷Oca nocantimpiri, irootaque nocantajeitaqueriri maaroni atiri. Paamaventasanojeitea, paamaasanojeitena, maaroni.

**Icoajeitaque joriopee
iraacaantajeiteri Jesoshi.**

(Mt. 26.1-5; Ir. 22.1-2; Joa 11.45-57)

14 ¹Ari apitenivani quitaiteri omoncaratajea quitaiteri yavisantaniri. Iro iquenqeshiretantarori quitaiteri peerani yavisantaniri inampire Tasorentsi, oajeitiriri itomipee ejipitosati. Quitaiteri yavisantaniri te iroapinitearoji tapiachari tanta, irointi caari tapiacha. Ari icoaque jivatacaajeitiriri saserotepee aisati oametantirori sanquenarentsi jaoca incanteriri iramataviteri Jesoshi, iraanteariri. Aitaque icoaveta iroyerime Jesoshi. ²Icanti:

—Eiro aantaritisi quitaiteri yavisantaniri: iquisacoventajeitaricari atiripee.

Osaitiri Jesoshi casancajari.

(Mt. 26.6-13; Joa 12.1-8)

³Ari isavicaque Jesoshi Vetaniaqui, anta ivancoqui Shimo patsaaveitachaniri. Oshequi oajeitachari anta. Opocapaaque tsinane, amacotapaaquero casancajari. Iojataca oja nararo, oshequi ovinaro. Ocameetsatasanoti onantari, iro yovetsiqueetiri mapi pajitachari aravashitoro. Ocarajacotapaaqueneri, osaitantapaacari

iitoqui. ⁴Itimanaque aparopee quisaneentajeitaquerori. Icantavacaanaca iriori:

—¿Paitampa meeca aparajatantacarori oca casancajari? ⁵Arime ompimanterome, aantaquearome oshequi quirequi, impoijiquea ompayeterime ashinoncayetachari.

Impoiji iquisatsajeivetacaro, ⁶iro cantaincha icantiri Jesoshi:

—Eiro piquishimentirotsi. ¿Paita pashereantarori? Ocameetsatanoti osaitaquena. ⁷Aitaque incantaitiyempani ashinoncaincari: pincanteani pincarajeiteri, aisati pineapiniteri. Ariorica pincoaque pintacoteari, aitaque pimataquero, pimpaqueri. Irompa nainti, eiro nocantaitiani nontsipajeitempi aca. ⁸Te omayeteroji paitapeerica, irointi omataque osaitaquena. Tempa asaitapinitiri camatsiri, iro cantaincha te iriotacoteaji. Irointi oca tsinane ojivataquena osaitaquena, aneatsiquerana noni. Iotaquena noncamaque. ⁹Queariotaque oca noncamantempiri: jaocarica incamantantajeitero atiri noneane, incamantacotero antaqueri oca tsinane, inquenqeshireajeitantearori.

**Iquenqeshireti Jorashi
iraacanteri Jesoshi.**

(Mt. 26.14-16; Ir. 22.3-6)

¹⁰Ainiro iriori Jorashi Ishicariote icarajeitiri iroamere Jesoshi. Ijatanaque apaniro anta itiminta jivatacaajeitiriri saserotepee, incantacoventanteariri Jesoshi. ¹¹Iquemajetaqueri ora icantapaaqueriri, iquimoshirejeitanaque, icantiri:

—Cameetsataque: oshequi nompinajeitempi quirequi.

Impoiji iquenqeshireti Jorashi:

—¿Jaoca noncateriri naacantanteariri? ¿Jaoca oncarate?

Yovetsicajeitiro iroamere iroajeiteari.

(Mt. 26.17-19; Ir. 22.7-13)

¹²Moncaratapaaca quitaiteri yoajeitantarori tanta, caari tapiacha. Aisati yoari

ovishajaniqui: yametapinijeitaro
yoajeitari quitaiteriqui iquenqueshireta-
pinitiro yavisantaniri oantatsiri peerani.
Isampitiri Jesoshi iroamere:

—¿Jaoca picoaqueri novetsicajeitero
avajeiteari?

¹³Ari itianaque iroamere apite,
icantiri:

—Pijate nampitsiquinta. Aitaque
pintonquiotavaqueari aparoni shirampari,
iraacote chomoqui nija. Poijatanaqueri
iriori. ¹⁴Jaocarica anta inqueapaajeri,
aitaque iniri ashitarori ivanco; iriotaque
pineanatapeeri. Pincantapaaqueri: “Icanti
oametantatsiri: ‘¿Jaocame nosavicanta-
peempari, noacantapeempariri noamere?’”
¹⁵Irosati ironijantavaquempirori anta
jenoqui oshitamencotanta: antearo oni.
Timatsi ovetsicajeitaca maaroni
avantayeteorori: apanivaniji povetsicajei-
tapaaquero ayeari.

¹⁶Ari ijatanaque iroamere nampitsiqui,
ineapaquero oca icantaqueriri, impoiiji
yovetsicapaaquero yoari.

Icamantacotaqueri Jesoshi aacaanterineri.
(Mt. 26.20-25; Ir. 22.21-23; Joa 13.18-30)

¹⁷Ari ishaavijiiteanaque catsirincaiteri.
Yareetapaaca iriori Jesoshi, itsipajeita-
paacari iroamerepee. ¹⁸Isavicajeitapaa-
que, yoajeitapaaca, icantiri Jesoshi:

—Queariotaque oca noncamantempiri.
Meeca acarajeitica, timatsi aacantenaneri,
oocajeitaqueeri.

¹⁹Yoashirejeitanaca, icantiri aparo:

—¿Narompa aacantempineri?

Aisati itsipa:

—¿Narompa?

Aisati itsipapee isampijeitanaqueri.

²⁰Icanti Jesoshi:

—Tempa iriotaque aacantenaneri
chaantacotaquenari meeca nomatitatequi.

²¹Noponeaca inquitequi, natiritapaaque.
Irotanantsi noncame: aitaque ontsataa-
quea isanquenatacotitaquenari. Iro

cantaincha irashinoncaitaquea yora
aacantenaneri. Eirome itimime iriori,
eirome yaacantaname, aisati iriori eirome
iquematsicatarome, coajica.

Ishiacaventajeitaqueero

Jesoshi incamimentajeitee.

(Mt. 26.26-29; Ir. 22.14-20; Joa 13.21-30;
1 Cor. 11.23-26)

²²Ainiro yoajeitaca, yaaquero Jesoshi
tanta. Ipsonquitiri iriri, icarajaquero,
ipajeitakeri iroamere. Icantiri:

—Paajeitero, tempa narotaque
camimentajeitempineri.

²³Impoiiji yaaquero pajoqui aisati.

Ipsonquitakeri iriri, ipacojeitakeri,
irajeitavaquero. ²⁴Icantajeitakeri:

—Irootaque niraja amparajatimenter-
neri oshequi atiri. Ariorica noncamimen-
tempi, piojeitakeri queario icantaquem-
piri Tasorentsi, iroavisacojeitempi.

²⁵Queariotaque oca nocamantajeitimpiri.
Eiro meeca napiitajirotsi aca quipatsiqui
nirajero ovaja. Ariorica nosavicapaa-
je anta ipincatsaritinta Tasorentsi, ari
nirapaajero pashinijari.

Icantajeitiri Jesoshi iroamere:

“Coajica pojocajeitanaquena”.

(Mt. 26.30-35; Ir. 22.31-39; Joa 13.31-38)

²⁶Ari ipampoyeaventajeitanaqueri
Tasorentsi, impoiiji ijajeitanaji anta
toncaariqui, opajitanta Orivomashi.

²⁷Icantajeitakeri Jesoshi:

—Coajica pojocajeitanaquena. Aitaque
isanquenatacotiteetaquemini: “Noyeri
yora shentiriri ovisha, impoiiji inquena-
shiveetanaquea irovishate”. ²⁸Iro cantain-
cha, coajica nontinaanaje, nojivajeitana-
quempi anta Carireaquei.

²⁹Icantiri Petero:

—Ariorica irojocajeitempi maaroni
irinti yoca, irompa nainti, eiro nojoquim-
pitsi.

³⁰Icantiri:

—Queariotaque oca noncamantempiri: meeca tsiteniriqui, tequeratsitarica irampiitajerota irineaje teapa, oshequi pintsaroaque. Oncarate mava pincante: “Te nioteriji Jesoshi”.

³¹Iro cantaincha icantasanoti Petero:
—Eiro nojoquimpitsi. Ariorica ancara-
jeitavacayea ancamaajeite, eiro nocantitsi:
“Te nioteriji”.

Aisati omoncarataca icantajeitaqueri
maaroni itsipapee.

**Iquenquetsatacairi Jesoshi iriri anta
Jetsemaniqui.**

(Mt. 26.36-46; Ir. 22.39-46)

³²Ari yareejeitapaaca anta Jetsemani-
qui. Icantajeitiri iroamere:

—Pisavicajeitavaqueta aca, nonquen-
quetsatacaavaquerita Apa.

³³Irintiquea yaanaqueri Petero,
Santiago, jeri Joa. Iquenqueshireanaca,
aisati yoashiretanaca. ³⁴Icantiri:

—Oshequi catsini noashiretasanota-
naca. Pisavicaqueta aca, pisaacquitneyea.

^{35,36}Ari yovaanaca capichaji ara.
Itiyeroanaca quipatsiqui, iquenquetsata-
cairi iriri. Icantiri:

—Apa, aviro avinti mayetirori maaroni,
paitapeerica. Nocoavetaca poavisacote-
name oca nonquematsicateari, iro
cantaincha eiro pantirotsi nocoavetari
narori, pantenaro picoacaaquenari avinti.

³⁷Impoiji ipianaja anta isavicaquenta
iroamere. Ineapaatiiri, maajeitaeque.
Icantapaaqueri Petero:

—Shimo, ¿maaquempimpa? Tempa
pamavetimatero pisaacquitimate capichaji.

³⁸Pisaacquite. Pincanteri Tasorentsi oncantea-
quea ariorica incoaqua camaari irantacaye-
tempiro caari cameetsatatsi, eiroquea
pantantarotsi. Queario picoasanovetaca
pantenerime Tasorentsi icoacaaquempiri, iro
cantaincha te pimateroji.

³⁹Ipijanaja aisati, iquenquetsatacaajiri
aisati iriri. Irosati icantajiri icantaqueriri

incaranqui. ⁴⁰Ipiapaaja aisati, ineajeita-
paajiri, maajeitaji aisati. Oshequi catsini
ajeitaequeri ivochoquine. Oshequi
ipashiventajeitaca, te irioteji paitarica
incanteriri. ⁴¹Ari ipianaja aisati mavata-
paintsiri. Impoiji icantapaaqueri:

—Meecaquea pimaajeite, pimaorea-
jeite. Noponeaca inquitequi, natiritapaa-
que. Moncaratapaaca, aitaque meeca
icantacoventaquena: irayena meeca caari
quemisantatsi. ⁴²Meeca pintinaanaje,
tsame ajataje. Ja, jeri yocatapaaque
aacantenaneri.

Yaajeitaqueri Jesoshi.

(Mt. 26.47-56; Ir. 22.47-53; Joa 18.2-12)

⁴³Irosatiquera ineaveeti Jesoshi, ipocapaa-
que yora Jorashi, iriotaque tsipaveitariniri
yora iroamere Jesoshi. Itsipajeitapaacari
meeca oshequi atiri. Yamajeitapaaque
isaviritepee, aisati inchaquiipee. Iriojeitaeque
itiancane jivatacaajeitiriri saserotepee, jeri
itiancane oametantirori sanquenarentsi, jeri
savicacantatsiri. ⁴⁴Icantitajeitacari yora
Jorashi:

—Meeca noncamantasanotempi
piotantapeempariri Jesoshi: pineaquena
nonintavorotapaaqueri, pajiricapeeri.
Paanaqueriyea, pishentasanoteriyea.

⁴⁵Ari ipocapaaque, iquempejitapaacari.
Icantapaaqueri:

—Oametanari.

Inintavoronirotapaaqueri. ⁴⁶Yajiricajei-
tapaaqueri, tapi, yaajeitanaqueri. ⁴⁷Aparo
iroamere yaaquero isavirite. Ipeshitaequeri
iyempita inampire ivincatsarite saserote,
peti. ⁴⁸Icantajeitaequeri Jesoshi:

—¿Narompa coshinti? ¿Paita pamashi-
tantanari pisaviritepee aisati inchaquii-
pee? Paashitanaquena, eiro noshiapitsa-
timpitsi. ⁴⁹Aitaque maaroni quitaite-
ri notsipajeivetaquempi anta ivancoqui
Tasorentsi, noametantini. Ja, payenani-
queti. Meecaquea omoncarataca ocantiri
sanquenarentsi.

⁵⁰Iriori iroamere, yojocajeitanaqueri, ishijaeitanaca maaroni. ⁵¹Aparoquea evancari oijavetanacariri Jesoshi. Te inquitsaatanaqueaji, irointi yampinaicanaca ivashicaro. Yajiriqueevetavacari, ⁵²itsaneanaca iriori, yojocanaitiuro ivashicaro, ishiatsempequitana.

Icantajeiti pincatsaripee: “Ocameetsati incame Jesoshi”.

(Mt. 26.57-68; Ir. 22.54-65;
Joa 18.12-14, 19-24)

⁵³Impoiji yaajeitanaqueri Jesoshi ivincatsaritequi saserote. Yapatojeitimentapaacari maaroni jivatacaajeitiriri saserotepee, savicacaajeitantsiri, aisati oametantirori sanquenarentsi. ⁵⁴Iriori Petero yojitacoventavetanacari Jesoshi, iro cantaincha nijanteaji, irosati yareetanapaaca anta ivancoqui saserote. Isaviquimotapaaqueri yora nampirentsipee, itatapaaquero paamari. ⁵⁵Ainiro aisati anta pancotsiqui ivincatsarite saserote aisati maaroni oametavacaajeitachari. Isampijeitiri atiri:

—¿Pineacotaquerimpa yantiro Jesoshi caari cameetsatatsi noacantanteariri?

Iro cantaincha, tecatsi irineacoteri.

⁵⁶Ipopapaaque oshequi tseyacotacariri, te omoncarateaji icantayetaqueri. ⁵⁷Aparopee catianaincha, itseejacotashitacari, icanti:

⁵⁸—Noquemajeitaqueri Jesoshi, icanti: “Coajica noshoveajero ivanco Tasorentsi, oca yovetsicane atiri. Ari oncarate mava quitaiteri novetsicajeneri nainti pashini ivanco, caari yovetsiqui iriori atiri”.

⁵⁹Iro cantaincha te omocaratavacayeaji icantayevetacari.

⁶⁰Icatianaca nianqui yora ivincatsarite saserote. Isampitaqueri Jesoshi:

—¿Paita caari paquimatanta? ¿Paita ojita oca icantacoyetaquempiri yoca?

⁶¹Iriori Jesoshi imajeretaque, te iranqueji. Yapiitaqueri yora ivincatsarite saserote:

—¿Avirompa Quirishitotatsiri, itomi Tasorentsi noneacameetsajeitiri?

⁶²Yacanaqueri:

—Narotaque. Aitaque noponeaca narori inquitequi, natiritapaaque. Coajica pineajena nosavique anta iracosanoriqui Apa, noncarateri nompincatsarijeite. Aisati pineavajena nonquenantapaajero anta mencorinta, nompiaje aisati quipatsiqui.

⁶³Yora ivincatsarite saserote yaitanacaro iitsaare, itsereanaquero, tsererere; iquisanaca. Icantanaque:

—¿Paitampa meeca acoantari pashini camantacoterineri? ⁶⁴Piquemajeitavacari meeca: ijitasorentsinirotacateemi. ¿Paita picoajeitiri? ¿Jaoca ancantiriri?

Icantajeitanaque:

—Ainiro irantane, cameetsa incame.

⁶⁵Ainiro aparopee quitiojayaetaqueriri. Impoiji ipashicavorotaqueri, aisati ipasanatiri. Icantiri:

—Pincamantenate janica pasavorotaquempiri.

Aisati iriori nampirentsipee, ipasanajeitakeri.

Icanti Petero: “Te nioteriji Jesoshi”.

(Mt. 26.69-75; Ir. 22.55-62; Joa 18.15-29)

⁶⁶Isaviqui iriori Petero anta pancotsiqui ishaaviji. Opocapaaque aparoni inampirentsi saserote. ⁶⁷Oneapaaqueri Petero, itaataque paamari. Amenashetapaaqueri, sorerere, ocantiri:

—Aviro tsipatariri yora Jesoshi nasaretasati.

⁶⁸Itsaroanaque iriori, icantanaque:

—Jm, te nioteji paitarica picantiri. Te nonquemempiji aisati.

Isoquijanaji saiteriqui, ijatanaque anta otsapiqui. Ineanaque teapa. ⁶⁹Oneajiri aisati nampirentsi. Ocantajeitiri yora ocarajeitaqueri:

—Iriotaque yoca tsipatariri Jesoshi.

⁷⁰Aisati icantaji Petero. Ari osamanita-painti capichaji. Yapiitajiri yocapee, icantiri:

—Queariosanotaque. Aitaque pitsipatarini iriori, avirotaque carireasati.

⁷¹Icantasanotiri:

—Te nioteriji yora shirampari picantaqueri. Ioti Tasorentsi queario nocantaque: notseeyanirica, nocoaque iroasanquetayenata Tasorentsi. ⁷²Yapiitajiro ineanaji teapa. Iquenqeshiretanajiro Petero icantaqueriri Jesoshi: “Tequeratarica irampiitanajerota irineaje teapa, oncarate mava pincante: ‘Te noneeriji Jesoshi’”. Ari yoashiretanaca Petero, irosati iraantanaca, jii, jii.

Ari yaajeitanaqueri Jesoshi Piratoqui.

(Mt. 27.1-26; Ir. 22.66-23.5; Joa 18.28-40)

15 ¹Ari oquittaitetamani, yapatojeitamanaja yora jivatacaajeitiriri saserotepee, savicacaantajeitatsiri, oametantirori sanquenarentsi, maaroni. Aisati yapatojeitaca maaroni pashini oametavacainchari. Icantavacaimentajeitacari Jesoshi. Ari yoisoeyetanaqueri Jesoshi, yaanaqueri anta, ipapaaqueri Pirato. ²Isampitavaqueri:

—¿Avirompa ivincatsarite jorio?

Iriori Jesoshi yacanaqueri:

—Je, naro.

³Icantajeiti jivatacaajeitiriri saserotepee:

—Oshequi yantaniroyetaqueri yoca, te incameetsateji.

⁴Yapiitajiri Pirato, isampitajiri:

—¿Paitampa caari pacanta? Piquemaqueri oshequi icantacotashijeitaquem-piri.

⁵Te iranqueji Jesoshi. Irosatiquea iriori Pirato yoantanacariri cavaco. ⁶Ari ainiro yametacari: maaroni osarintsi, ariorica omoncaratapaaja yavisantaniri, yoimisoquijapinitiri aparoni yoiminqeetiri. Yoimisoquijajiri janicarica icoajiri atiripee. ⁷Ainiro meeca yashitacotaca anta atiripee coajeivetachari irojoque-rime pincatsari: ipajita aparoni Varava-

shi. Iro irojocantearimeri pincatsari, yoantaque. ⁸Ari ijatashijeitaqueri yora apatojeitainchari, icantajeitapaaqueri:

—Meecaquea nocoi pantajeitenaro oca pametari: poimisoquijajenari aparoni poiminqiri.

⁹Yacavaqueri Pirato:

—¿Iriompa picoaqueri noimisoquijajempiri yora pivincatsarite?

¹⁰Iotaque Pirato oshequi ipincatsajeitiri atiri Jesoshi, irootaque iquisajeitancariri saserotepee, yaacantancariri. ¹¹Ari yora saserote iquenaquenayetanaque, icantajeitaqueri atiripee:

—Picantacoventiricari Jesoshi. Pincantajeitiri: “Irinti poimpacaajeri Varavashi”.

¹²Yapiitajiri aisati Pirato, icantiri:

—¿Jaocampa meeca noncanteriri yoca pipincatsajeivetacari?

¹³Icajemajeitanaji aisati:

—Pimpajacotacanteri coroshiqui.

¹⁴Isampitiri:

—¿Paitampa yantaqueri nompajacotacantanteariri?

Aiquero yovaapinijeitanaquero icajemajeitanaque:

—Pimpajacotacanteri, pimpajacotacanteri.

¹⁵Icoanaque Pirato inquimoshiretacaajeitajeri yora atiripee, irosati yoipacantajariri Varavashi. Ja irintini Jesoshi ipasanatacantaqueri, ari yaacantaqueri impajacotacantanteariri.

Oshequi yoashinoncaaqueri soraro Jesoshi.

(Mt. 27.27-31; Joa 19.1-3)

¹⁶Iriori soraro yaanaqueri tsoinpoina ivancoqui Pirato. Ipajitironta pancotsi pereterio. Yora soraro icajemajeitaqueri maaroni itsipapee. ^{17,18}Itseencajeitanaqueri, ishirontimentajeitacari, icantiri:

—¿Avirotaquempa ivincatsarite jorio? Jentsite, narori, nompincatsajeitempi. Tsame pinquitsaatearo quitioncanirori,

aisati pamatseetearo amatseerentsi pinquempetanteariri pincatsari, impoiji nompincatsajeitantempiri. Iji, iji, iji.

Ari iquitsaataqueri, aisati yantaqueneri totseequi, yamatseetaqueri. ¹⁹Ipasanatiri iitoqui, iro ipasatantacariri savoroqui. Iquitiojaqueri. Itiyeroashinirotacari, ineapincatsatamempeacari. ²⁰Ari oshequi yantavinsanataqueri, impoiji isapocajiri iitsaare qutioncanirori, iquitsaatajiri iitsaaresanori iriori.

Ipajacotantacariri Jesoshi.

(Mt. 27.31-56; Ir. 23.26-44; Joa 19.16-30)

Impoiji yaanaqueri anta impajacotanteariri. ²¹Nianqui avotsi ineaqueri soraro shirampari pajitachari Shimo, iriotaque shirenesati. Irio iriri Arijantero, jeri Irojo. Iponeanaja Shimo oantsiqui, iro iravisanaqueme, iro cantaincha yaavaqueri soraro, iperanatavacari:

—Panatanaqueneri Jesoshi coroshi.

²²Ari yaajeitanaqueri Jesoshi anta opajitanta Coricota. Iro ipajitantarori otishi oshiaquero iitonaroqui atiri. ²³Ipavetari ovaja oconoajataca aavintarontsi pajitachari mira. Iro cantaincha te irireeroji. ²⁴Impoiji ipajacojeitaqueri, aisati ineantacaro mapijaniqui, iriojeitanteari janicarica aitajerineri iitsaareni. Ipavacaayetacaro. ²⁵Ari ijenoquitapaque catsirincateri, irosati ipajacotantacariri. ²⁶Isanquenataquero sanquenarentsi, ocanti: “Iriotaque ivincatsarite jorio”. Ipatacaquero coroshiqui jenioquiji. ²⁷Ora pashini coroshi ipajacotaqueri apite coshinti. Aparo yoatiacotaqueri iracosanoriqui Jesoshi, irio itsipa yoatiacotaqueri irampatequi. ²⁸Irootaque omoncarantantajari sanquenarentsi cantatsiniri: “Irishiacanteri caari cameatsatsine”. ²⁹Ainiro anta avisayetatsiri icantimatanaqueri, aisati yavimacanaca, icantajeitiri: —Joo, aviro shoveajeronomeri ivanco Tasorentsi. Oncarateme mava quitaiteri povetsicajerome aisati. ³⁰¿Arimpa

pitasoncantashiyeta? Jentsite, pintasoncacoventajea avisati: poavisacotajea avisati, paniireanaje coroshiqui.

³¹Irosati icantaqueriri iriori yora jivatacaajeitiriri saserotepee, aisati oametantirori sanquenarentsi. Ishirontimentajeitacari, icantavacaajeitanaca:

—Irintiquea itsipa yoavisacoti. Jaaquea iriori te iroavisacotajeaji. ³²Jeri Quirishitovetachari, pincatsariventerinemerijjioririnte. Jentsite, amenavaquerita ariorica iraniireanaje ara coroshiqui. Noneaqueririca, ari nonquemisantanaqueri.

Aisati iriori tsipatacariri Jesoshi ipajacojeitaca, itseencaqueri.

³³Ari icaravetapaaca catsirincateri tampatica, otsitenitanaque maaroni quipatsiqui. Ari ishavijitanaji, iporeanaji aisati. ³⁴Irosati icajemantanaca antearojenca Jesoshi, icanti:

—Eroi, Eroi, irama savatani.

Irootaque acantiri aneanequi: “Notasorentsiste. Notasorentsiste. ¿Paita pojocantaqueuari?”

³⁵Iquemavetavacari aparopee shirampari, icanti:

—Pinquemeru, icajemiri Iriashi.

³⁶Ari ishianaca aparo atiri, yoviinca-paaqueneri quepishijariqui aajatirori. Yoisotacotaqueneri savoroquiqui.

Ipavetari irantsimicavaquerome. Icanti:

—Ari icantavacata: amenavaquerita ariorica impocashitapaaqueri Iriashi iroaniitapaajeri.

Icamanaque Jesoshi.

(Mt. 27.50-56; Ir. 23.45-49; Joa 19.30-37)

³⁷Antearojenca icajemanaque Jesoshi, icamanaque, toren. ³⁸Ainiro anta ivancoqui Tasorentsi antearo tocoya, tontari, opaincaca omoroqui. Intanaca jenoqui otsereamaotanaque, tsererere, irosati ishaaviji. Apitemaotana. ³⁹Ainiro imontetacari iyapitanote soraro.

Ineavaqueri jaoca icantanacari Jesoshi, icamantanacari. Irootaque icantantacari: —Quearioteemi: iriotaque yoca shiram-pari itomi Tasorentsi.

⁴⁰Otimaiti paricoti aparopee tsinane, amenajeitiri. Ocarajeitaiti Maria Maquitarasato, jero aisati pashini Maria, irootaque iriniro Santiago, jeri aisati Jose. Yora Santiago impoitatsiri itimi. Aisati ocarajeitiri Sarome. ⁴¹Ainiro itimaveitani Jesoshi anta Carireaque, oijajeitirini maaroni oca tsinanepee. Intacojeitarini aisati. Otimaque meeca aca oshequi otsipapee tsinane. Itoncaantanacari Jesoshi anta Jerosarequi, irootaque oijajeitiriniri.

Jaoca icantaqueriri Jesoshini.

(Mt. 27.57-61; Ir. 23.50-56; Joa 19.38-42)

⁴²Ishavijiiteanaji catsirincaiteri. Iro quitaiteri meeca yovetsicajeitiro iroajeiteari osaitequera, tempa osaitequera quitaiteri imaoreantajeitari. ⁴³Ainiro Jose, yora poneachari Arimateaque. Aitaque icarajeitiri yora oametava-caajeitainchari. Ineacameetsajeitiri atiripee. Yaamaari Tasorentsi, icoaque impincatsariventeri. Ipanacari iriori Pirato, ijatashitaqueri yamanantapaajiri yora Jesoshini. ⁴⁴Yoanaque cavaco Pirato. Iquenqeshiretanaque: “¿Icatimaitacampa icamanaque Jesoshi?” Ari icajemacantaqueri iyapitanote soraro. Isampitavaqueri:

—¿Queariompa? ¿Camasanotana-quempa Jesoshi?

⁴⁵Icantiri:

—Je, camasanotaque ini.

Irosati itiancantacariri Jose intijeri Jesoshini. ⁴⁶Yamanantaque Jose tocuya. Yoaniitaqueri Jesoshi, yapinaicotaqueri tocuyaqui. Yoiponaaqueri omoroqui, anta imoqueetironta imperita. Itivironcashitanaqueri antearo mapi omoroqui. ⁴⁷Oneacotaqueri jaoca yoaqueriri Maria

Maquitarasato. Otsipataro Maria, ora iriniro Jose.

Itinaanaja Jesoshi.

(Mt. 28.1-10; Ir. 24.1-11; Joa 20.1-10)

16 ¹Avisanaque quitaiteri imaoreantajeitari. Amanantanaque tsinane casanacari, ontiritantajeirimeri Jesoshini. Ari opajitari iroori tiriterinimeri Maria Maquitarasato. Aisati iroori ocaratiro pashini Maria iriniro Santiago, jero aisati iroori Sarome. ²Ari capichaji quitaiteri ojatamani anta omoroqui yoyeevetacarinta. Iro tominco ojatantacari. Ari ijenoquitapaaque catsirincaiteri, irosati aretantapaaca. ³Ocantavacaanaca:

—¿Janicampa tivironqueerone ora mapi omoroquinta? Antearo oni, eiro aaveirotsi.

⁴Amenapaaque, oneapaaquero mapi, tivironcanaca. Antearo catsini onaveta. ⁵Oqueapaaquero omoroqui anta yoavetacarinta. Te oneapaajeriji ocoavetapaajari, irinti oneapaaque evancari, isavicaque acosanoriqui. Iquitsaataro quitsaarentsi quitamarori catsini. Oapaaque cavaco. ⁶Icantavaquero:

—Eiro poitsi cavaco. Irio picoaveta yora Jesoshi nasaretasati, yora ipajacoyeetaqueri. Itinaanaja, te aneajeriji aca. Pamenerote aca yoyeevetacarica. ⁷Pijataje meeca, pincamantapeeri iroamere. Aisati pincamanteri Petero. Pincantapaqueri: “Irijivatanaquempi anta Carireaque, aitaque pineapaajeriri anta. Tempa aitaque icamantitimpini”.

⁸Ari osoquijanaji, oshianaca. Opioncanaque, oanaque cavaco catsini. Otsaroanaque, irootaque caari ocamantacotantari.

Oneajiri Maria Jesoshi.

(Joa 20.11-18)

⁹Irootaque itinaantajari Jesoshi tominco. Iro intasanotajari yonijaajaro

Maria Maquitarasato. Irootaque peerani yatajeaoncaveitaniri 7 camaari, iro cantaincha yoavisacotaqueroni. ¹⁰Irosati-quea ojatantanaca iroori ocamantapa-queri yora itsipajeiveitaniri Jesoshi. Irosatiquera yoashiretacojeivetari, iracojeivetari aisati. ¹¹Ari ocamantaveta-paacari:

—Tinaanaja Jesoshi, noneajiri.

Te inquemisantavaqueroji.

Inejiri apite iroamere Jesoshi.

(*Ir. 24.12-35*)

¹²Impoiji ipashinivorotanaca Jesoshi, injapaajari apite iroamereni, yaniijeitana-ji anta oantsiqui. ¹³Ari ipianaja yoca neaqueriri, icamantapaqueri itsipapee. Aisati iquempetavaqueri, te inquemisan-tavaqueriji.

**Iquenquetsatacaajetiri Jesoshi
maaroni iroamerepee.**

(*Mt. 28.16-20; Ir. 24.36-49; Joa 20.19-23*)

¹⁴Impoiji yoajeitaja iroamerepee, icarajeitaji 11. Irosati injajeitantapaaja-riri Jesoshi. Icantajeitaqueri:

—Tempa nocamantitimpini nontinaa-naje: ¿paita caari piquemisantantana? Tempa onttime piquenqueshireantari. ¿Paita caari piquemisantantari neajanari incaranqui? ¹⁵Pijajeite pintsoteanaquero maaroni quipatsiqui. Pincamantajeiteri maaroni atiri jaoca incantajeari iroavisa-

cotantajeari iriori. ¹⁶Janicarica quemisan-tavaquerone ora pincamanteriri, aisati ariorica irivaotisatajea, aitaque iroavisa-cotajea. Irompa yora caari quemisantava-querone, iroasanquetasanoteri Tasorentsi irinti. ¹⁷Jaocarica pijajeiteri, intasoncaco-ventempi Tasorentsi, iriojeitanteari atiri queariotaque oca picantaqueriri. Nomata-cayempiro poavisacotanteeriri yatajeaon-cane camaari. Pioyetero otsipapee neantsi pinquenquetsatacotantenari. ¹⁸Ariorica pajiricaveteari maranque, ariorica irantsicavetempi, iro cantaincha eiro yoamaimpitsi. Aisati, ariorica pirero piantatsiri, eiro oamaimpitsi. Aisati ariorica pimpamiteri mantsiatatsiri aisati pincantacoventeri, ari iravisacojeitaje.

Ivecarataquero Maricoshi isanquenare.

(*Ir. 24.50-53*)

¹⁹Irootaque icantajeitaqueriri Avinca-tsarite Jesoshi, irosati yoancantanaja inquitequi, isavicapaaji anta iracosanori-qui Tasorentsi, icaratapaajiri ipincatsari-tapaaji iriori. ²⁰Ari ijajeitanaque iroamerepeeni. Iquenaquenayetanaque, icamantantayetanaque jaocarica iquenaqueri. Quiso yoiri Avincatsarite, yamitacojeitiri. Aisati itasoncantayeta-que, iojeitantacari atiripee queariosanota-que icamantajeitapairiri. Aitaque ocanta. Ari ocarati. Narotaque sanquenatirori:
Maricoshi

YORA IROCASHI ISANQUENATACOTAQUERI JESOQUIRISHITO, JAOCA ICANTA IRIORI YOAIVISACOTANTI

Ivetsatari Tiojiro.

1¹⁻⁴¿Ainirompi Tiojiro? ¿Tecatsimpa oyempine? Meeca noninti nonquensatsacoteri Jesoquirishito. Icarajeitaque oshequi sanquenatacojeitaquereri, icamantacoyetaquero yantayetaqueri. Ineajeitaqueri, aisati iquemacojeitaqueri, irootaque isanquenatacotantariri. Noneanataquero narori isanquenare, aisati nosampitacoyetaquero yantayetaqueri notasanotantacarori, notsoteaquero maaroni. Meeca novaajempio narori, nocoaque tampatica piotasanotero yantayetaqueri Jesoshi, piojeite te iramatavijeitempiji yora sanquenatirori.

Yora Caviriyeri icamantiri Sacariashi intime itomi.

⁵Peerani, ipincatsaritantari Eroreshi anta Joreaqui, itimini saserote pajitachari Sacariashi. Iriotaque ishanincani Aviashi: ariorica yantaveetiniri Tasorentsi anta ivancoqui, icarajeitiri ishanincasanori iriori. Opajita ijina Sacariashi Isavere, irootaque ishanincani Aaro. ⁶Quemisan-tincari ini iriori Sacariashi, aisati ijina. Icantani imayetaquero icantiriri Tasorentsi, iojeitiri atiri icameetsataque. ⁷Te intimeji itomipee: shiravaro oni ijina, aisati imoncaratavacaajeitaca yanteashi-pajeitaque.

⁸Ari omoncarataca quitaiteri yantavee-jeiti ishaninca. Yamejeitaro itiancapinitiri aparoni saserote itainiri Avincatsarite casancapatsari. ⁹Icantajeitiri Sacariashi ishaninca:

—Meeca aviro queasanotatsine anta, pintayeneri Avincatsarite casancapatsari.

¹⁰Ari iqueanaque, irinti yora apatojeitainchari isavicajeiti saiteriqui, iquenquetsatacaajeitiri Tasorentsi. Aitaque ariorica itaaquero casancapatsari, iquenquetsatacaajeitiri Tasorentsi. ¹¹Anta tsompoina, imapocaqueri inampire Avincatsarite, icatiapaaca quempeji onantariqui casancapatsari, icatiapaaca irampatequi. ¹²Ineantavacariri yoanaque cavaco, aisati oshequi itsaroanaque. ¹³Iro cantaincha icantaqueri:

—Sacariashi, eiro pitsaroitsi. Timatsi picantaqueriri Tasorentsi; tempa

iquemaquempi, irootaque ontimanteariri coajica pijina pitomi. Pimpajiteri Joa.

¹⁴Oshequi pinquimoshireventeari, aisati inquimoshireventajeitari oshequi pishanincapee. ¹⁵Aisati irineacameetsatanoteri Tasorentsi iriori. Eiro irirotsi cachojari. Quiso oasanoteri Ishire Tasorentsi, tequera-tsita intime, quiso oyeri: oncanteani oameteri. ¹⁶Oshequi inquemisantacaajeiteri pijorioririnte, impincatsajeitantariri Tasorentsi, tempa irio Avincatsarite maaroni. ¹⁷Inquempeteari Iriashini, oshequi

oameteri Ishire Tasorensi, aisati otasonca-caaqueri. Irijivatanaqueri Avincatsarite, incamantajeiteri ishanincepee iramaajeiteari, aisati incamanteri inquemisantajeiteri. Iroamejeiteri ishaninca inquemisantanteari, inquempeteari yora peeraniniri iqumisan-tini intacaroniri. Iroamejeiteri tseencantatsiri cameetsa inquemisanteri Tasorensi.

¹⁸Icantaqueri Sacariashi:

—¿Arimpa? ¿Jaoca noncanteari niotasanotanteari queariotaque oca picantaquenari? Anteashipataquena, aisati nojina, anteashipataque iroori.

¹⁹Yacanaqueri:

—Naro Caviriyeri, quiso noiri Tasorensi. Iriotaque tiancaquenari nocamantantimpirori oca cameetsatsiri. ²⁰Aitaque omoncarataquea oca nocamantaquempiri, iro cantaincha te pishiretearoji, irointi pitseencaquena. Meeca pimasontite, eiro pineanatajitsi irosati intimanteari pitomi.

²¹Ainiro anta saiteriqui apatojeitainchari yamenaajeivetacari Sacariashi, icantajeitaque: —Osamanitanaqueteemi ipeaca. ¿Paita caari isoquijantaja?

²²Impoiji isoquijanaji, te irimatajeaji irineanataje, irointi ijicojicotashitaca. Impoiji iojeitanaque, icantajeiti:

—Timatsi ineaqueri anta tsompoinaqui.

Te irineanatanoteji catsini. ²³Irosati icanta, oshequi quitaiteri yantaveetaji aisati ivancoqui Tasorensi. Impoiji ipianaja ivancoqui iriori.

²⁴Impoiji oaque ijina, irosati oquempoyeantaca ovancoqui. Icarati 5 cashiri te osoquijajeji.

²⁵Ocanti:

—Peerani te intimeji notomi, irootaque nopashiventantacari, iro cantaincha eiro nopashiventajatsi aisati. Icavintsaquena Avincatsarite, tempa icameetsatasanoti.

**Yora Caviriyeri icamantiro Maria:
“Intime pitomi”.**

²⁶Impoiji icarataque 6 cashiri otsomote-tantacari Isavere. Ari itiancajiri aisati Tasorensi Caviriyeri:

—Pijate Nasaretequi: ora carireaquiniri. ²⁷Pincoapaaquero Maria, ijinatsori Jose. Iriotaque ishanincani Iravirini. Ocashiacari ayeri, iro cantaincha te oneayeriiji shirampari.

²⁸Ari ijatashitaquero. Imapocapaaquero, icantapaaquero:

—¿Ainirompi, Maria? Noncamantempi: oshequi inintasanotaquempi Tasorensi, quiso yoaquempi. Oshequi icavintsaasanaotaquempi, panaacotaquero maaroni pitsinaneroronte.

²⁹Iro cantaincha otsaroanaque iroori, oquenqueshiretanaca: “¿Paita ojita oca icantaquenari?”

³⁰Icantaquero:

—Eiro pitsaroitsi. Queario, icavintsaasanaotaquempi Tasorensi. ³¹Irotaintsi poye. Coajica pintimeri pitomi, pimpajiteri Jesoshi. ^{32,33}Impincatsaritanote. Iriojeitanaque atiri irio Itomi Tasorensi, savicatsiri inquitequi. Tempa iriotaque Avincatsarite. Peerani yora Iravirini ipincatsariventaveitarini pijoriorinte. Iro cantaincha incanteri Tasorensi: “Notiomi, aviro pincatsariventajeiterineri maaroni, pincantaitatitempani”. Aitaque incanteari impincatsaritanaque, eiro yoipacaajirotsi.

³⁴Ari ocantiri:

—¿Jaoca incanteari intimanteari notomi? Te intimeji nojime.

³⁵Yacanaquero:

—Iro timacayempine Ishire Tasorensi. Aisati intasoncavaquempi Tasorensi, savicatsiri inquitequi jenoqui. Coajica incantacojeiteri pitomi: “Icameetsatasanoti, te aneroji irantane. Iriotaque Itomi Tasorensi?”. ³⁶Aisati noncamantempi: anteashipatanovetaca iroori pishaninca Isavere, aisati icanteetiro shiravaro oni, iro cantaincha icarataque meeca 6 cashiri otsomontetantacari. Coajica ontimeri otomi. ³⁷Pineaquero, tecatsi pomerentsitimotearine Tasorensi, imajeitaquero paitarica icoiri.

³⁸Ocantiri iroori:

—Irioyeampa Avincatsarite. Onimota-
quena paitarica icoacaaquenari: icoacaa-
quenarica intimashitea notomi, ari
cameetsataque.

Irosati ipiantanaja inampire Tasorentsi.

Ojataque Maria oquivantiro Isavere.

³⁹Pashini quitaiteri ojatanaque Maria
Joreaqui. Oshintsiti ojatanaque toncaari-
qui. ⁴⁰Areetapaaca anta ivancoqui
Sacariashi. Oneapaaquero Isavere,
ocantapaaquero:

—¿Ainirompi?

⁴¹Oquemantavacarori Maria ocajema-
paaque, oquematiiri ishevatanaca orijani,
moyec. Aisati oametasanotaquero Ishire
Tasorentsi, ⁴²irosati ocajemantavacaro.
Ocantiro:

—Tempa ineshinoncajeitaque

Tasorentsi, aisati iquempejeitiro maaroni
tsinane; iro cantaincha avinti, panaacojei-
taquena: ineshinoncatasanotaquempi
catsini. Tempa aisati inecameetsatiri
pirijani. ⁴³Aviro ashitearine Avincatsarite.
¿Paita piquenqeshiretantanari pineana?

⁴⁴Pamene, noquemantavaquempiri
pivetsatapaaquena, iquimoshiretanaque
norijani, ishevatanaca, moyec. ⁴⁵Pishire-
tasanotavacaro maaroni icamantaquem-
piri Avincatsarite, irootaque ineshinonca-
tantaquempiri.

⁴⁶Ocantiro Maria:

—Tempa icameetsatasanotaque Avinca-
tsarite, ⁴⁷iriotaque Atasorentsite aisati
oavisacojeiteeneri coajica. Oshequi
noquimoshireventaqueri. ⁴⁸¿Paita
icavintsantanari narori? Nashinoncaave-
taca, tecatsi niote narori. Iro cantaincha
iriojeitanaque maaroni atiri noquimoshi-
reventaqueri. ⁴⁹Oshequi itasoncacoventa-
quena, tempa itasorentsitasanotaque,
icameetsatasanotaque. ⁵⁰Icantatiani
icavintsajaquetaqueri maaroni pincatsajei-
tiriri. ⁵¹Oshequi itasoncantayetaque.

Intsoncajeitajeri maaroni shemejeitatsiri.

⁵²Imajeitaqueri pincatsarivetachari
yojocacaaqueri ipincatsariventanti.
Irintiquea ashinoncaincari ipeajiri
pincatsari. ⁵³Iquemacaaacari tasheaveta-
chari, aisati yaapitsatajiri ashitaarantin-
cari maaroni timimojeivetariri. ⁵⁴Icantani
Tasorentsi yamitacojeitaqueri ajoriori-
rinte, te impeacoteeji arori icavintsaajei-
taquee. ⁵⁵Aitaque imataquero maaroni
icantaqueriri intacaroniri peerani:
Avarama aisati maaroni ishanincani,
catsini.

Irootaque ocantirori Maria. ⁵⁶Ari
osavicaiti mava cashiri, impoji opianaja
onampiqui.

Itimaque Joa vaotisantantsiri.

⁵⁷Ari moncarataca otimiri Isavere
otomi. ⁵⁸Iquemacojeitaquero oshaninca-
pee, iquimoshireventaquero. Icantajeita-
que:

—Tempa ineshinoncatasanotaquero
Avincatsarite.

⁵⁹Ari ocarataque imaacotaque 7,
moncarataca intoyeantanteariri. Yamejei-
taro jorio ipajitavacaa iriori, icantajeiti
ishaninca:

—Tempa impajitea Sacariashi, inquem-
petajeari iriri.

⁶⁰Iro cantaincha ocanti iriniro:

—Eiro ipajitatsi Sacariashi, ainti
impajitea Joa.

⁶¹Icantajeivetaro:

—¿Paitaquea? Te intimeji pishaninca
pajitachaneri Joa.

⁶²Ari isampijeitiri Sacariashi:

—¿Paita picoiri avinti?

⁶³Ari ijicotiro paperi, isanquajeita-
queneriri: “Aitaque, impajitea Joa”.
Irosati yoajeitantanaca cavaco. ⁶⁴Imapo-
canaja Sacariashi ineanataji aisati, icanti:

—Tempa icameetsati Tasorentsi.

⁶⁵Impoji yoajeitanaqueri cavaco
maaroni ishaninca. Iquemacojeitaqueri

maaroni savicajeitatsiri toncaaripeequi: ora timatsiri Joreaqui. ⁶⁶Iquenqueshire-jeitanaca maaroni quemacojeitaqueriri: “¿Jaoaca icantari yora jananequi? ¿Paita iranteri coajicani? Tempa ineshinoncata-sanotaqueri Avincatsarite”.

⁶⁷Impoiji Ishire Tasorentsi oametaqueri Sacariashi, icantantarori oca:

⁶⁸—Tempa icameetsatasanoti Avincatsarite, iriotaque tasoncaventajeitaqueeri. Irocashijeitaquee iroavisacojeitajee.

⁶⁹Peerani Iravirini yantiniri Tasorentsi icoacairiri. Meeca itiancaqueri Tasorentsi ishanincani Iravirini, itasorentsitaque, yoavisacotantaque. ⁷⁰Tempa peerani icantirini Tasorentsi quenquetsatacotirini: ⁷¹“Nontianquempiri oavisacojeitem-pineri, intimerica quisajeitem-pineri, irojocacotentajeitaquempi. ⁷²Noncavintaajeitaqueri ishanincani Avarama, maaroni. Eiro nopeacotajarotsi nocanta-jeitaqueriri. ⁷³Peerani noncantasano-queri Avarama: ⁷⁴Coajica noavisacojei-teri pishanincepee, nompiajeiteari quisajeivetarineri, impoiji eiro itsaroajeititsi inquemisantajeitena.

⁷⁵Noameetsajeiteri, noncanteani noneacameetsajeiteri”.

Irootaque icantaqueriri Tasorentsi peeraniniri. ⁷⁶Meeca notiom, noncamantempi: iriojeitempi atiri aviro quenquetsacoterine Tasorentsi jenoquiniri. Pincamantajeiteri incameetsatana-que, iramaajeiteari Avincatsarite.

^{77,78}Poamejeiteri ashanincepee iriojeitan-teari jaoca incanteari iravisacotentajeari. Pincamantajeiteri icavintsaasanojeita-queri Tasorentsi, eiro iquenqueshiretaji-rotsi yantayetiri caari cameetsatatsi. Ariorica icontetapaaque catsirincateri, te ontsitenitanajeji, irointi oquitaitetanaji. Aisati oquempetaca, ariorica imponea-quea Avincatsarite jenoqui, ayotasanojei-tanaque cameetsa asavicajeite. ⁷⁹Iroavisa-cojeiteri maaroni caari iovetari Tasoren-tsi, maaroni tsaroayevetachari incame.

Iriotacajeitapaaqueri jaoca incanteari iraacameetsatanteariri Tasorentsi.

Irootaque icantaqueri Sacariashi.

⁸⁰Ari avisanaji oshequi osarintsi, yantearitanaque Joa, oshequi iquemisan-taqueri Tasorentsi. Ari itimaqueri apaniro caaraiteriqui, irosati iquenquetsatacanta-cariri ishanincepee.

Itimaque Jesoshi.

(Mt. 1.18-25)

2 ¹Ari ipincatsariventanti Jerosarequi oromasati, ipajita Shisari Acoshito. Ari iroaquera itimapaaque Joa, icanti Shisari:

—Nocoaque irisanquenatacojeitea maaroni atiripee, niotanteari jaoca icarajeitiri.

²Iro isanquenajeitantarori ivajiropee, irio Shirino pincatsariventajeitiriri shiriasati. ³Ari ijajeiti atiri anta nampitsi-qui itimajeitini ishanincani peerani, isanquenatacojeitaca. ⁴Itimi meeca Jose anta Nasaretequi, ora timatsiri Carirea-qui. Iro cantaincha ishanincatacari Iravirini: yora pincatsariveitachaniri. Iro inampini Iravirini Verequi, timatsiri anta Joreaqui. Irootaque ijatantacari Jose Verequi, irisanquenatacototentajeari irisati. ⁵Itsipatanacaro iroori ijinatsori, irotimataintsi ontimacote. ⁶Ari yareetantapaa-cari Verequi, irosati oquemantacaro atsicaneentaquero, nii. ⁷Icoayevetapaaca pancotsi irimaanteari, iro cantaincha ijaajeitacaro pancotsipee irisavicanta-peempameri: irointi timatsi ivanco virantsi. Aitaque otimaqueriri otomi, jivatatsiri itimi. Oponataqueri, oaqueri ora iquempoyeanteetanariri virantsi yoari.

⁸Ari otsitenitanaji, ainiro anta qeshii-qui isavicajeiti shentajeitiriri irovishate.

⁹Imapocaqueri Avincatsarite, ishiqui-reacojeitaqueri, oquempetaca quitaiteri, aisati ineajeitavaqueri inampire

Avincatsarite. Itsaroajeitanaque; icantaita, shiquere. ¹⁰Iro cantaincha icantapaaqueri:

—Eiro pitsaroajeititsi, timatsi noncamantempiri: ocameetsatasanotaque. Pinquimoshireventajeitearo, aisati inquimoshireventearo maaroni atiri.

¹¹Iroaquera itimaque Verequi oavisacojeitempineri: iriottaque Avincatsarite Quirishito. ¹²Jeroca noncamantempiri piotanteariri. Pijate ivancoquinta virantsi, pamenaiteri yora iroaquera timaintsiri; pineapaaqueri iponaaca anta ivancoqui virantsi, iponataca.

¹³Irosati imapocajeitantacariri oshequi jenoquisati, icantajeiti:

—Tempa icameetsatasanoti Tasorentsi, ¹⁴nopincatsasanojeitiri anta inquitequi. Aca quipatsiqui irisavicacaajecteri cameetsa maaroni ineacameetsajeitiri.

¹⁵Ari ipiajeitanaja inquitequi, impoiji icantajeiti shentajeitiriri irovishate:

—Icamantaquee Avincatsarite timaque Verequi oavisacojeiteeneri. Tsamete amenaiteiri.

¹⁶Ari ishijaieitanaca, ineajeitapaaqueri Jose, jero Maria, jeri iriori otomi, iponaaca ara. ¹⁷Ari icamantajeitapaaqueri maaroni icamantaqueriri inampire Tasorentsi. ¹⁸Ari yoajeitanaque cavaco maaroni quemajeitaqueriri. ¹⁹Iroori Maria oshequi oquenqueshiretapinitaqueri. ²⁰Ari ipiajeitanaja ashitariri irovishate anta qeshiiqui. Icantajeitanaque:

—Tempa icameetsataque Tasorentsi. Ocameetsataque maaroni injaaqueeri aisati maaroni icamantaqueeri. Cameetsa ini Tasorentsi.

Itoyeantajaniquitaqueri Jesoshi.

²¹Ari ocarati 7 imaacotaque Jesoshi, irosati itoyeantanteetacari. Aisati ipajitiri Jesoshi: imoncarataquero icantaquerori Maria chapinqui inampire Tasorentsi.

Incanti Jose aisati Maria: “Nocoacaaqueri Jesoshi irantasannoteneri Tasorentsi paitarica icoacaaqueriri iriori”.

²²⁻²⁴Ari peerani isanquenatacaaaqueri Avincatsarite Moishishini: “Ariorica ontimeri tsinane otomi, onquempoyeempaya ovancoqui oncarate 40 quitaiteri: eiro ojatitsi ampatojeiteari quemisantsiri. Ariorica omoncarataquea 40 quitaiteri, ocameetsati ojate ivancoqui Tasorentsi onquemisantantajeeri aisati. Aanajeneri Tasorentsi apite sampaquiti, ariorica apite paroma. Ompapaaqueri saserote, iroyeri, impoiji intayeneri Tasorentsi. Impoiji onquempetajea aisati peerani, cameetsa ojatapinitaje aisati, onquemisantapinitaje”. Timatsi pashini isanquenatiniri aisati: “Iriorica shirampari yora jivatatsiri otimiri tsinane, icoaque Avincatsarite inquemisantasannoteri, iranaacoteri impoiterineri intime. Ocameetsati iranaajeri ashitariri ivancoqui Tasorentsi, incanteri Tasorentsi: ‘Jerica notomi, jivatatsiri itimi. Paitarica pincoacaaqueriri, nocoaque irantasannotempiro’”.

Ari ocarataque 40 quitaiteri itimantacari Jesoshi, irosati ijajeitantanaja Jerosarequi: Jose, Maria, jeri Jesoshi. Imoncarajeitaquero maaroni isanquenatiniri Moishishi ojatapinitantajeeri Maria onquemisante. Aisati ocamantaqueri Tasorentsi:

—Jerica notomi, nocoaque irantasannotempiro paitarica picoacaaqueriri.

²⁵Ari itimi anta Jerosarequi shirampari pajitachari Shimeo. Quemisantasannotatsiri ini, cameetsa isaviqui, iquemisantasannotaquero Ishire Tasorentsi. Aisati yaamaari Quirishito: yora veshireacaajectearineri maaroni joriopee. ²⁶Ocamantaqueri Ishire Tasorentsi: “Eirotsitarica picami, pineavaqueri Quirishito: yora intianqueri Avincatsarite”. ²⁷Irosati

otiancantacari Shimeo anta ivancoqui Tasorentsi; impoitapaaqueri Jose, Maria, jeri Jesoshi. ²⁸Ineavaqueri Jesoshi, ijatashitaqueri, yatsomaavaqueri; icantiri Tasorentsi:

—Novincatsarite, tempa picameetsati, ^{29,30}noneaqueri oavisacotenaneri, yora picantaquenari. Meeca moncarataca, tecatsi noncoyeri aisati. Noquimoshiretaque, vetsicaquena noncame. ³¹Queario, pitiancaqueri iroavisacojeiteri maaroni atiri: ³²irio iotacaajeiterine pashinipee atiri, iriveshirementajeiteari maaroni joriopee quemisantajeitimpiri.

³³Irosati yamenantanaca Jose, jero Maria, yoanaqueri cavaco; iquenqueshiretasanotiro icantaqueri Shimeo. ^{34,35}Aisati icantajeitaqueri:

—Nocoaque irineshinoncajeitempi Tasorentsi.

Aisati icantiro iriniro:

—Pamene, coajica oshequi piraacoteari pitomi: ipocaque ayojeitantiari avavisa-cojeitajea, iro cantaincha incarate oshequi ashaninca tseencajeiterineri: iroashinoncaajeitea iriori. Irintiquea pashini ashanincapee, iroveshirementasanojeiteari pitomi. Aparo intseencajeiteri, pashini iroveshirementeari, onconijatanteari iquenqueshirejitiri.

Irootaque icantaquerori Shimeo.

^{36,37}Ari otimi aisati ivancoqui Tasorentsi tsinane pajitachari Aana: oshequi ocamantapinitiri oshaninca irineane Tasorentsi. Ipajitani irini Janoeri: iriotaque ishanincani Asere. Anteashipatasanotaque Aana: ocarataque osarintsite 84. Camajimentaaro oni, ocarataque 7 osarintsi irosati icamantacari ojimeni. Meeca osavicaque ivancoqui Tasorentsi. Ocantani: quitaiteriqui, tsiteniriqui oquenquetsatacapinitiri Tasorentsi; oshequi opincatsataqueri. Te onquenqueshiretasanoteri oayetari. ³⁸Ari ojatashitaqueri Jesoshi iroori. Ocantaqueri Tasorentsi:

—Ariove, noneaqueri narori.

Aisati ocantajeitiri oshaninca:

—Jerica yoca, iriotaque oavisacojeiterineri ashanincapee: maaroni aamaajeitariri.

³⁹Ari imataquero Jose aisati Maria maaroni isanquenataqueri Moishishi: tempa isanquenatacairi Avincatsarite. Impoiji ipiajeitanaja Nasaretequi: timatsiri Carireaquei.

**Evancariquera Jesoshi,
ipianaja ivancoqui Tasorentsi.**

⁴⁰Ari iqueveanaque Jesoshi, aisati ishintsitanaque, aiquero ijatanaque iotasannotanaque, yanaacotiri ijananequiririnte. Oshequi ineshinoncataqueri Tasorentsi. ⁴¹Ari ijatapinitiri anta Jerosarequi, itsipajeitari Jose aisati Maria.

Aitaque ijatapinitiri maaroni osarintsi ariorica omoncaratapaaca quitaiteri Yavisantaniri. ⁴²Ari ocarataque irosarintsite Jesoshi 12, ijajeitanaji aisati, ⁴³iquimoshireventaqueri Tasorentsi. Pashini quitaiteri ipiajeivetanaja maaroni ishaninca, iro cantaincha isavicanaque Jesoshi Jerosarequi apaniro. Te irioveteari ishaninca, ⁴⁴yaamaashivetacari itsipajeitanajari ishanincapee pashini. Ari ishaaviniji icoacoayevetacari ishanincaqui, ⁴⁵iro cantaincha te irineajeiriji. Irosati ipiantanaja Jerosarequi, icoacoayevetajari, ⁴⁶ocarataque mava quitaiteri. Impoiji ineapaajiri ivancoqui Tasorentsi: icarajeitiri oametantayetatsiri. Iquemisantayetiri yoametantayetiri, aisati isampijeitiri paitapeerica. ⁴⁷Yoajeitanakeri cavaco atiripee, icanti:

—Pamenerite evancarica: oshequi iotantari, cameetsa yacanaqueri yora oametantatsiri, te inamontaroji.

⁴⁸Aisati yoapaaqueri cavaco Jose, jero Maria. Ocantiri iriniro:

—Notiomi, ¿paitaquea pimanapitsantantari? Pamene, nocaratiri piritsori nocoacoayevetaquempi. Oshequi nocoiteaquempi.

⁴⁹Yacanaquero:

—¿Paita picoacoayetantanari? Tempa piote nocoasanotaque nosavique ivancoqui Apa.

⁵⁰Iro cantaincha te inquemajeitavaque-riji icantavetacariri. ⁵¹Impoiji yoijajeitanajiri, ipiajeitanaja Nasaretequi. Icantani iquemisantaqueri, tecatsi incantea impiatsateari. Irointi Maria oshequi oquenqueshiretaquero maaroni oca oneayetaqueri. ⁵²Aiquero ijatatii iotasantanaque Jesoshi, yantearitanaque. Yora Tasorentsi inintaqueri itomi; aisati ishanincapee iriori, inintajeitaqueri Jesoshi.

Intantacarori Joa iquenquetsati.

(Mt. 3.1-6; Mr. 1.1-6; Joa 1.19-28)

3 ¹Ocarati meeca 15 osarintsi ipincatsariventajeitiri maaroni oromasati yora Tiverio Shisari. Ipincatsariventiri joreasati Pontsio Pirato. Yora Eroreshi ipincatsariventiri carireasati; irinti irirenti, Jiripo, ipincatsariventiri itoreasati aisati taraconitiresati. Aisati yora Irisania ipincatsariventiri avirenesati. ²Aisati meeca ipincatsariventajeitiri saserotepee Anashi aisati Caijashi. Ari itimaqueri Joa, itomi Sacariashi, anta caaraiteriqui. Icantiri Tasorentsi:

—Nocoaque meeca pinquenquetsatacayeri pishaninca, timatsi nocoaque pincamantajeiteriri.

³Ari iquenaquenayetanaque Joa Joriraniqui, icantajeitiri ishaninca:

—Pinquenqueshirejeitea, eiro piquempetajatsi peerani, impoiji incavintsaajeitempi Tasorentsi: eiro iquenqueshireco-tajimpirotsi pantajeiveitaniri. Impoiji-quea novaotisaajeitempi iriotanteari pishaninca pavisacotaji.

⁴Imoncarataquero Joa icamantacotitariniri peerani Isayashini: “Anta caaraiteriqui intime coajica quenquetsatacayerineri ishaninca. Incamantajeiteri ishaninca:

‘Coraque Avincatsarite, pamenaajeiteri, paamaajeiteari. Pincameetsatanaque irineacameetsatantapeempiri. Ariorica pincameetsatanaque, pinquempetearo avotsi cameetsatsiri inquananteari Avincatsarite: poameetsatero irineacameetsatanteorori. Pintampaticatero, ⁵pijayero otsateni, pinquiaarantajero toncaaripee, pintampaticatajero maaroni tipiyetatsiri, pintijayetajero ovintenipee. ⁶Impoiji maaroni atiri irineajeitavaqueri oavisacojeiterineri intianqueneri Tasorentsi’”.

Icantayetiriri Joa ishaninca.

(Mt. 3.7-12; Mr. 1.7-8; Joa 1.19-28)

⁷Ari ijatashijeivetacari Joa oshequi atiri irivaotisaajeiterime. Jeroca icantavaqueriri:

—Avirojeitaque camaari: oshequi pamatavitantajeiti, te pincameetsajeiteji. Te pincoajeiveiteaji pijate Sharincaveniqui, iro cantaincha te pinintasanoteji pinquemisanteri Tasorentsi, irootaque picoantavetacari pivaotisaajeiteame.

⁸Ariorica pinquenqueshirejeitea pimpashinitantajeiri, pintime cameetsa iriojeitanteari itsipapee queario picantaque. Eiro picantashitatsi: “Noshanincatacari Avaramani, irootaque notantacari noavisacotajea”. Pamatavitaja avisati. Incoaquericame Tasorentsi, irimatero intasonquerome oca mapica, impeajerome atiri, oshanincatajearime Avaramani, iro cantaincha eiro avisacotitsi iroori. Patsipetashitaca pishanincavetacari Avarama: piquempetarocari mapi. ⁹Piquempejeitacaro aisati inchato. Iro cantaincha irotaintsi inchaquitero Tasorentsi inchato, imponquitreajero aisati. Terica oncameetsateji oitsoqui, inchaquitero, intaasanotajero, pomein. Piquempetarocari inchato caari cameetsatatsi oitsoqui: yojoquimpicari Tasorentsi.

¹⁰Ari isampijeitiri:

—¿Paita picoiri nantajeiteri?

¹¹Icantiri:

—Otimirica apite piitsaare, pimpaaranteri ashinoncaincari aparo. Otimirica oshequi poari, pimpaaranteri aisati ashinoncaincari. Pincavintsaaantapinite.

Irootaque icantapinitiriri Joa.

¹²Aisati ijtashitaqueri Joa aayetiriri quirequi: yainiri yora oromasati, oshequi yamataviriri aisati ishaninca. Ijtashijetiri, icoaque irivaotisajeitavaqueri, isampitapaaqueri:

—¿Paita nanteri piotantenari queario noquemisantaque?

¹³Ari icantavaqueri:

—Eiro paashititaritsi iirequite pishaninca, irointi pimonaratero icantaquempiri oromasati.

¹⁴Aisati ijtashijeitakeri soraro, isampitakeri:

—¿Paita nanteri narori?

Ari icantavaqueri:

—Eiro piquishiritsi atiri paapitsatantea-riri iirequite, aisati eiro picantacotashitaritsi paitanteariri iirequite. Moncarataca ipinataquempiri pivincatsarite, eiro picoiitsi aisati.

¹⁵Ari yaamaajeitari Quirishito, ijtashijeiveta irotaintsi irareetea. Iquenqueshijeitiri: “Iriorica Joa Quirishito”. ¹⁶Iro cantaincha icantajeitakeri Joa:

—Novaotisajeitakuempi nijaqui: te ompomerentsiteaji. Coajica impoque Avincatsarite irinti, oshequi nopincatsataqueri, notseencaja narori. Intiancajeitakee irinti Ishire Tasorensi, quiso oajeitee, oameetsajeitee. ¹⁷Coajica irinashitacayeari cameetsatsiri aisati caari cameetsatsi. Oquempetaca arori anashitacaaro oitsoqui panquirentsi, aisati anashitacaaro osapentairoqui. Aquempoyeajiro oitsoqui, atairo osapentairoqui. Aisati inquempejeitee Avincatsarite arori: incavintsaaajeiteri cameetsajeitatsiri, iroashinoncaajeiteri caari cameetsajeitatsi.

Ivaotisataca Jesoshi.

(Mt. 3.13-17; Mr. 1.8-11)

^{21,22}Ari ivaotisajeitakeri Joa oshequi atiri, aisati ivaotisataca Jesoshi, irosati iquenquetsatacaantacari iriri. Omapocanaca aniireashitapaaqueri Ishire Tasorensi, oponeaca inquitequi. Oshiapaaqueri sampaquiti. Aisati iquemajeitakeri icantaqueriri Tasorensi:

—Avirotaque notomi nonintasanotiri. Oshequi noveshireimentaquempi.

Yoiminqueacantaqueri Eroreshi Joa.

(Mt. 14.3; Mr. 1.14; 6.17)

¹⁸Aitake icanta Joa: icamantapinitiri atiri incameetsatanaque, aisati icamantiri jaoca incantajeiteari iroavisacojeitanta-jeiri.

^{19,20}Aisati icantaque:

—Te oncameetsateji yantayetiri Eroreshi. Yaavetaro irirenti Eroriashi, iro cantaincha yaitakeri Eroreshi. Ainiro oshequi pashini caari cameetsatsi yantayetiri.

Ari iquisanaca Eroreshi. Ipincatsariven-tajeitiri carireasati, irootaque imatantacarori yaacantaqueri Joa, shepi, yoimin-queacantaqueri. Aiquero ijtatitii yantana-queri catsini caari cameetsatsi.

**Isanquenatiro ivajiropree
ishanincani Jesoshi.**

(Mt. 1.1-17)

²³⁻³⁸Peerani yovetsiquiri Tasorensi Aran.

Iri itomini Aran ipajitani Sete.
Iri itomini Sete ipajitani Enoshi.
Iri itomini Enoshi ipajitani Cainama.
Iri itomini Cainama ipajitani Marereri.
Iri itomini Marereri ipajitani Jarete.
Iri itomini Jarete ipajitani Enoco.
Iri itomini Enoco ipajitani Matosara.
Iri itomini Matosara ipajitani
Arameca.

Iri itomini Arameca ipajitani Noe.
 Iri itomini Noe ipajitani Seme.
 Iri itomini Seme ipajitani Aratajara.
 Iri itomini Aratajara ipajitani
 Cainama.
 Iri itomini Cainama ipajitani Sara.
 Iri itomini Sara ipajitani Evere.
 Iri itomini Evere ipajitani Jarareque.
 Iri itomini Jarareque ipajitani
 Aracao.
 Iri itomini Aracao ipajitani Seroco.
 Iri itomini Seroco ipajitani Nacoro.
 Iri itomini Nacoro ipajitani Tare.
 Iri itomini Tare ipajitani Avarama.
 Iri itomini Avarama ipajitani Isaca.
 Iri itomini Isaca ipajitani Jacovo.
 Iri itomini Jacovo ipajitani Jora.
 Iri itomini Jora ipajitani Jareshi.
 Iri itomini Jareshi ipajitani Eseromi.
 Iri itomini Eseromi ipajitani Arini.
 Iri itomini Arini ipajitani Aranini.
 Iri itomini Aranini ipajitani Aminarava.
 Iri itomini Aminarava ipajitani
 Nasono.
 Iri itomini Nasono ipajitani Sara.
 Iri itomini Sara ipajitani Voso.
 Iri itomini Voso ipajitani Jovere.
 Iri itomini Jovere ipajitani Jese.
 Iri itomini Jese ipajitani Iraviri.
 Iri itomini Iraviri ipajitani Natama.
 Iri itomini Natama ipajitani Matata.
 Iri itomini Matata ipajitani Mena.
 Iri itomini Mena ipajitani Merea.
 Iri itomini Merea ipajitani Eriaquimi.
 Iri itomini Eriaquimi ipajitani
 Jonama.
 Iri itomini Jonama ipajitani Jose.
 Iri itomini Jose ipajitani Jora.
 Iri itomini Jora ipajitani Shimeo.
 Iri itomini Shimeo ipajitani Irevi.
 Iri itomini Irevi ipajitani Matata.
 Iri itomini Matata ipajitani Jorimi.
 Iri itomini Jorimi ipajitani Eriyesere.
 Iri itomini Eriyesere ipajitani Jesoshi.

Iri itomini Jesoshi ipajitani Ere.
 Iri itomini Ere ipajitani Eremarama.
 Iri itomini Eremarama ipajitani
 Cosama.
 Iri itomini Cosama ipajitani Ari.
 Iri itomini Ari ipajitani Merequi.
 Iri itomini Merequi ipajitani Neri.
 Iri itomini Neri ipajitani Saratiyeri.
 Iri itomini Saratiyeri ipajitani Sorovaveri.
 Iri itomini Sorovaveri ipajitani Eresa.
 Iri itomini Eresa ipajitani Joanana.
 Iri itomini Joanana ipajitani Jora.
 Iri itomini Jora ipajitani Joseca.
 Iri itomini Joseca ipajitani Semeini.
 Iri itomini Semeini ipajitani Matatiashi.
 Iri itomini Matatiashi ipajitani Mata.
 Iri itomini Mata ipajitani Nacai.
 Iri itomini Nacai ipajitani Eshiri.
 Iri itomini Eshiri ipajitani Naomo.
 Iri itomini Naomo ipajitani Amoshi.
 Iri itomini Amoshi ipajitani Matatiashi.
 Iri itomini Matatiashi ipajitani Jose.
 Iri itomini Jose ipajitani Janai.
 Iri itomini Janai ipajitani Merequi.
 Iri itomini Merequi ipajitani Irevi.
 Iri itomini Irevi ipajitani Mata.
 Iri itomini Mata ipajitani Eri.
 Iri itomini Eri ipajitani Jose.
 Iri itomitsori Jose ipajita Jesoshi, iro
 cantaincha ijjeivetari ishaninca
 irio itomisanori. Ari ocarataque
 irosarintsite Jesoshi 30, intantaca-
 roniri iquenquetsatcaajeitiri
 ishaninca.

**Yora camaari irantacayerime
 Jesoshi caari cameetsatatsi.**

(Mt. 4.1-11; Mr. 1.12-13)

4 ¹Ari ijatanaji Jesoshi, iponeanaja
 Joriraniqui. Quiso oanaqueri Ishire
 Tasorentsi, aanaqueri caaraiteriqui.
²Ocarati 40 quitaiteri itimaque anta,

tecatsi iroyeari: aasanaquero itashe. Ari maaroni quitaiteri ijatashitaquero yora Satanashi, icoaveta irantacayerime caari cameetsatsi. ³Icantavetapaacari:

—Avirorica itomi Tasorentsi, jentsite: pintonquero oca mapica, pimpeero tanta, poyearo.

⁴Yacanaquero Jesoshi:

—Isanquenatini peerani Moishishi: “Ocameetsati avajeitearo avanaro eiro acamanta, iro cantaincha ocameetsatasa-noti anteneri Tasorentsi maaroni icoacajetaqueeri”.

⁵Aisati yaanaquero antearoqui toncaari, ijicotapaaqueneri maaroni quipatsi,

⁶icantiri:

—Pincocuquero noncantajeiteri maaroni savicajeitatsiri impincatsajeitempi, iraacameetsajeitempi. Tempa narotaque pincatsariventajeitiriri maaroni, ⁷ariorica noncanteri impincatsajeitempi avirori, ari impincatsajeitempi. Apatiroquea nocoaque pintiyeroashitena, pimpincatsatena narori.

⁸Yacanaquero:

—Ocameetsati ampincatsateri Tasorentsi, apaniro ampincatsateri irinti. Irootaque ocantiri irineane.

⁹Impoiji yaanajiri Jerosarequi, anta otataroqui ivanco Tasorentsi, antoo jenoqui. Icantiri:

—Avirorica itomi Tasorentsi, jentsite: pimpariye, eiro picamitsi. ¹⁰Tempa ocanti Sanquenarentsi: “Irishentempi inampire-pee Tasorentsi, inquemoyeauquempi”.

¹¹Ainiro aisati pashini isanquenatiniri: “Ari irancatsatavajempi iriori, eiro ishinetimpitsi pimpariye mapiqui”. Pineaquero, ¿paita pitsaroantacari?

¹²Yacanaquero:

—Aisati ocanti Sanquenarentsi: “Eiro pineantaritsi Tasorentsi: yoasanquetaim-picari”.

¹³Ari iotaque camaari tecatsi incanteri Jesoshi, ijatanaji. Iro cantaincha ari irampiitajeri coajica.

Ipijanaja Jesoshi Carireaquei.

(Mt. 4.12-17; Mr. 1.14-15)

¹⁴Ari impoiji ipianaja Jesoshi Carireaquei, oshequi omatacaaquero Ishire Tasorentsi. Te osamaneteji iquemacojeitaquero maaroni savicajeitatsiri anta.

¹⁵Icantajeiti:

—Tempa icameetsati Jesoshi; ariorica apatojeita, tempa cameetsa yoamejeita-quee.

Yareetanaja Jesoshi Nasaretequi.

(Mt. 13.53-58; Mr. 6.1-6)

¹⁶Impoiji ijatanaji Jesoshi Nasaretequi, aitaque yantearitaquero inampisanoriqui. Ari saavaroqui ijatanaque anta yapatotapinijeitantari, icantani ijatapiniti saavaroqui. Tsompoina icatiapaaca, irineanateri ishanincapee irineane Tasorentsi.

¹⁷Ipeetavaquero isanquenareni Isayashini. Yampinaicareavaquero, yamenaquero irineanateri. Ocanti: ¹⁸“Quiso

oauena Ishire Avincatsarite, otiancaquena noncamanteri ashinoncaayetchari jaoca incanteari iroavisacotantajeeri. Noncamanteri maaroni iperanatacari camaari noimpacaventajeitajeri. Namenacaajeri aisati caari amenatsi. Aisati noimpacaventajeri maaroni yoashinonqueeyetiri. ¹⁹Aisati noncantajeiteri atiri irotaintsi nontasoncoven-teri”.

²⁰Ari yampinaicajiro sanquenarentsi, yoipiajiniri ipajiri, impoiji isavicanaji. Yamenashejeitanaquero, sorerere.

²¹Icantajeitiri:

—Queario meeca nomoncarataquero oca noneanataquempiri, oquenquetsatacotana.

²²Ari ineacameetsajeivetacari Jesoshi, aisati ineacameetsajeitaquero icantaqueri. Aisati isampitavacaaca:

—¿Tempa irio itomi Jose?

²³Icantaqueeri:

—¿Pitseencaquenampa? Naamaaca pincantename: “Jentsite, poavisacotajeri-queti pishanincasanori avirori. Noquemacotaquempi pitasoncantaque anta Caperenaocui, meecaquea pintasoncantequeti aisati aca anampiquica”.²⁴Iro cantaincha noncamantempi pamejeita pitseenquiri pishanincasanori: te pioteji pimpincatsateri iriori, irintiquea pashini pipincatsati.^{25,26}Queario oca noncamantempiri: peerani itimantacari Iriashini, piojeiti te ompariyeji incani. Peerani osarintsitaqueni. Ocarati mava osarintsi aisati 6 cashiri, te ompariimajeiti incani catsini. Itasheajetanaque maaroni savicajeitatsiri quipatsiqui. Otimini oshequi camajimentaaro aca, iro cantaincha itianquiri Tasorentsi Iriashini pashiniqui quipatsi opajita Shironi. Itianquiri irijatashitero camajimentaaro savicatsiri anta Sarepetaqui. Itasoncapinitiniro oari, ipapinitiro. Irointi savicatsiri aca inampiqui, te intasonqueneroji.²⁷Aisati, peerani itimantacari Iriseoni, itimini aca oshequi patsaincari, iro cantaincha tecatsi iroaviscote. Apaniro irinti yoavisacotiri shiriasati pajitachari Nama.

²⁸Iquemajeitantacarori apatojeitainchari, iquisajeitanaca.²⁹Ari icatiajeitanaca, yaajeitaqueri, shepi. Yaanaqueri anta otsapitapaa nampitsi, otiminta imperita. Impishoncajeiterime, iroariyerime,³⁰iro cantaincha ipeimotanajari, ijatanaji.

Ipianaja Jesoshi Caperenaocui.

(*Mr. 1.21-28*)

³¹Ari ipianaja Jesoshi Caperenaocui, ora carireaquiniri. Saavaroqui yoamejeitajiri aisati atiri.³²Yoajeitanaqueri cavaco, icantajeiti:

—Tempa ocameetsati oca yoametaqueeri. Ipincatsariti: iotasanotaquero oca yoametaqueeri.

³³Ari itimi anta yapatotapinijeitanta aparoni shirampari neiriri camaari. Antearojenca icajemacotavaqueri:

³⁴—Aviro Jesoshi poneachari Nasaretequi. Niotaquempi: aviro itomi cameetsari Tasorentsi. ¿Paita pipocashitantanari? ¿Picoavetampa pojoquena?

³⁵Ishintsitsataqueri Jesoshi, icantiri:

—Pimajerete. Pinijantareanajeri yoca shirampari.

Ari ipishoncanaqueri shirampari quipatsiqui, tiricn, irosati ijanerotantanajari. Tecatsi oajerine shirampari, tecatsitanaji.³⁶Yoajeitanaqueri cavaco aisati icantajeiti:

—Pineaqueri: apatiro ineanataqueri camaari, irosati ijatantanaja. Oshequi ipincatsariti, oshequi itasoncanti.

³⁷Ari iquemacojeitaqueri Jesoshi maaroni savicajeitatsiri.

Yoavisacotiro Jesoshi irairo Petero.

(*Mt. 8.14-15; Mr. 1.29-31*)

³⁸Impoiji ijatanaji Jesoshi ivancoqui Shimo. Icantajeitavaqueri:

—Ojoquiitaca irairo Shimo, oshequi oyatsiire. Poavisacotajero.

³⁹Icatiapaaca onampinaqui, icantaquero:

—Ari ompeanajea piatsiire, pavisacotaje. Irosati opeantanaja oyatsiire, maani; ocatianaja, opajeitajiri yoari.

Yoavisacoyetiri itsipapee atiri.

(*Mt. 8.16-17; Mr. 1.32-34*)

⁴⁰Ari iqueanaji catsirincaiteri. Yameetaqueneri Jesoshi oshequi mantsiayetatsiri, onashiyeta imantsiare. Ari ipamijeitavaqueri, yoavisacojeitavaqueri.⁴¹Impoiji ipocajeiti oshequi yoitsavianquiri camaari, icajemajeitapaaque:

—Aviro itomi Tasorentsi.

Iojeitaque camaari iriotaque Quirishito, irotaque icantantacariri:

—Pimajerete, eiro picamantacotanatsi.

Yovaanaja Jesoshi pashinipeequi nampitsi.

(*Mt. 4.23; Mr. 1.35-39*)

⁴²Ari oquिताitamanaji ijatamanaque Jesoshi anta ocaraitetapaaque. Icoacoa-

jeitaqueri atiripee. Ineantajariri, icantajeivetapaari:

—Eiro pijatajitsi, pisavique aca Capere-naoqui.

⁴³Iro cantaincha icanti Jesoshi:

—Eiro nosaviquitsi. Nocoaque noncamanteri itsipapee atiri ipincatsariventajeitiri Tasorentsi, tempa cameetsa iriojeitero iriori. Irootaque itiancantanari Apa.

⁴⁴Ari iquenaquenayetanaque Jesoshi anta Joreaqi, iquenquetsatacaajeitiri atiri anta pancotsipeequi yapatojeitan-tari.

Iquitsatiri Shimo oshequi shima catsini.

(Mt. 4.18-22; Mr. 1.16-20)

5 ¹Ari pashini quitaiteri iquenquetsati Jesoshi anta otsapijaqui incajare pajitachari Jenesarete. Itsitacajeitapaacari atiripee, icoajeitaque inquemero irineane Tasorentsi. ²Ari ineaquero Jesoshi apite pitotsi anta otsapijaqui. Tecatsi tetearone: yora quitsatsitiri iquiviro iitsarite anta. ³Itetaca Jesoshi ivitoqui Shimo, icantiri:

—Shimo, pintianquero capichaji.

Ari isavicaque pitotsiqui nianquijamaji, yoamejeitiri apatojeitainchari otsapija-quinta. ⁴Ari osamanitanaque, itsoncanaquero yoamejeitaqueri. Icantiri Shimo:

—Pijate anta osaanajataquenta, pinquitsate.

⁵Yacanaqueri:

—Oametantatsiri, noquitaitetacotaque nonquitsavetaca incaranqui, tecatsi naimate catsini. Meecaquea picantaquena, aitaque nojataque nonquitsajeitajanteta aisati.

⁶Ari iquitsataji: yaasantaque shima, oshequi catsini: monquire, monquire. Jaaca inaca, irotaintsi ompeshe quitsari.

⁷Icajemaqueri ishaninca savicatsiri pashiniqui pitotsi:

—Caateve, pamitacojeitenave.

Ari ipocacotaque, itetacotaqueri shima apite pitotsi, tero, tero; irotaintsi ontsitiye. ⁸⁻¹⁰Icarati oshequi shima iquitsatiri, irootaque yoantanacari Petero cavaco; aisati iquempejeitaca itsipapee: jeri Santiaco aisati Joa. Iriotaque yoca itomipee Severe. Iriotaque icaratapinitiri Shimo iquitsatapinitiri shima.

Itiyeroashitanacari Shimo Petero, icantiri:

—Novincatsarite, cameetsa pijataje. Te noncameetsateji narori catsini, eiro pitsipatanatsi.

Yacanaqueri Jesoshi:

—Eiro pitsaroacaanatsi. Noncaman-tempi: oquempetaca peerani piquitsatapinitiri shima, nocoaque meecca pinquemisantacaapinijeiteri atiripee.

¹¹Ari yaatacojeitapaaji, irosati yojocajeitantanajaro ivitopee, iitsarite-pee, maaroni. Yoijajeitanaqueri Jesoshi.

Yoavisacotiri Jesoshi patsaatsiri.

(Mt. 8.1-4; Mr. 1.40-45)

¹²Itimi anta nampitsiqui shirampari patsaasanotatsiri: otsoncaqueri ivatsaaro, opiticashaaqueri maaroni itseempequiqui. Ineantavacariri Jesoshi, itiyeroashitavacari, icantiri:

—Novincatsarite, tempa pitasorentsi: pincoaquerica, poavisacotena.

¹³Ari yacotashitaqueri, ipamitiri. Icantiri:

—Nocoaque. Pavisacotaje.

Irosati opeantanaja ivatsaaro. ¹⁴Aisati icantiri:

—Eiroyea picamantacotanatsi. Meeca pijate saserotequi, pinijaapeeri iriotanteari pavisacotaji. Pimatero icantiniri Moishishini: paanajeneri saserote pivira intayeneri Tasorentsi iriojeitanteari atiri pavisacotaji.

¹⁵Iro cantaincha aiquero ijatatii icamantacojeitaqueri Jesoshi. Icarati oshequi catsini jatashijeivetacariri inquemisanterime, aisati pashini

icoajeiveta iroavisacoterime. ¹⁶Ari ijatanaque iriori anta caaraiteriqui, iquenquetsatacairi iriri.

Yoavisacotiri Jesoshi caari shevatacha.

(Mt. 9.1-8; Mr. 2.1-12)

¹⁷Ari pashini quitaiteri yoametantaji Jesoshi pancotsiqui. Isavicajeiti quempeji variseopee aisati oametantirori sanquenarentsi: iponeayetaca oshequi nampitsipeequi, anta Carireaqui, Joreaqui, aisati iponeayetaca Jerosarequi. Otimasanoti itasorenca Avincatsarite imatantarori yoavisacotantaque. ¹⁸Jeritapaaque shirampari, icompitacojeitapaqueri caari shevatacha. Icoajeiveta iranaquerime anta isavicauenta Jesoshi, iro cantaincha tecatsi inquenapee, iticajeitaqueri atiripee. ¹⁹Tecatsi incantea inqueapee, irootaque yataitacantacariri otataroquinta pancotsi. Imorontaquero, impoji yoaniitacotaqueri anta inauenta Jesoshi. ²⁰Iotavaqueri iriori ishirejeitacari, irootaque icantantavacariri:

—Noshaninca, ainiro pantane, iro cantaincha eiro noquishmentimpirotsi, irointi noncavintsayempi: eiro noquencheshiretacotimpirotsi aisati, irointi noavisacotempi.

²¹Ari icantavacaajeitaca variseopee aisati oametantirori sanquenarentsi:

—Piquemanirotaqueri: ijitasorentsinirotata. Apaniro irinti Tasorentsi yoavisacotanti.

²²Ari iotaquero Jesoshi iquenqueshirejeitiri, irosati icantantanacari:

—¿Paita picantantari: “Ijitasorentsinirotata”? ²³Pamene, nocantaqueri: “Eiro noquencheshireacotajimpirotsi pantane, irointi noavisacotajempi”. Meeca pitseencajeitaquena. Tempa opomerentsivetaca naniitacaajeri yoca. Eirorica yaniitajitsi, ari pintseencasanojeitena, pishirontimentajeitena. ^{24,25}Noponeaca narori inquitequi, natiritapaaque. Nocoaque piojeite

ainiro notasorenca, aisati nomataquero nocavintsairi antirori caari cameetsatsi, noavisacojeitiri.

Ari icantiri caari shevatacha:

—Jentsite, pincatianaje, paanajero pinariantari, pijataje pivancoqui.

Ari ineajeitavaqueri icatianaja, yaanajiro inariantari, ijatanaji ivancoqui. Icantanaque:

—Ariove, icameetsati Tasorentsi.

Ari icantiri saserotepee:

—Pineaquero, nomataquero caari pineapiniti, irootaque piotanteameri oshequi notasorentsitaque. Aisati ari nomatajeri naanajeri coajica inquitequi.

²⁶Ari yoajeitanaqueri atiripee cavaco, icantajeiti:

—Tempa icameetsatasanoti Tasorentsi, ipincatsaritanoti. Te aneapiniteroji oca anequeri meeca.

Yoijatiri Jesoshi Irevi, yora apatovetanariri pincatsari quirequi.

(Mt. 9.9-13; Mr. 2.13-17)

²⁷Impoji isoquijanaji Jesoshi, irosati ineantapaacariri Irevi, yora aitayetiriri ishaninca iirequite, impoji ipiri pincatsari. Isaviqui anta isanquenatapiniti. Icantapaaqueri:

—Tsame, poijatanaquena.

²⁸Ari yoipacanaquero isanquenatacoyeteri quirequi, icatianaca, yoijatanaqueri Jesoshi. ²⁹Impoji ijataque Irevi ivancoqui, icajemacantaqueri itsipapee vionquiniriri pincatsari iirequite, pashini ishanincapee, Jesoshi, maaroni. Yoacajeitacari maaroni. ³⁰Ipoaque saserotepee aisati yora oametantirori sanquenarentsi. Icantapaaqueri iroamere Jesoshi:

—Pamenerite Jesoshi: icarajeitaqueri vionquiriri quirequi, yoajeita, irajeiti. Jeri aisati itsipapee caari cameetsayetatsi. Te oncameetsateji incarajeiteri iroajeitea.

³¹Ari icantiri Jesoshi:

—Yora joquuitachari iriotaque coatsiri iraavintea. Yorari caari joquuitacha te

incoyeji aavinterineri. ³²Iriotaque nopocashitiri caari cameetsatatsi niotacantajareri eiro yantapinitajirotsi aisati caari cameetsatatsi. Te nompocashiteriji jivetachari icameetsati.

Isampitiri saserote:

“¿Paita caari ititanta poamere?”

(Mt. 9.14-17; Mr. 2.18-22)

³³Ari icantiri saserote Jesoshi:

—Pamene ititapinita iroamere Joa, aisati iquenquetsatacapinitiri Tasorentsi: aisati iquempejeitacari iroamere variseo. Irinti poamerepee, te intiteaji: yoapini-jeita, irapinijeiti.

³⁴Ari yacanaqueri:

—Oquempetaca ariorica iraye shirampari ijina, incajemajeiteri ishanincapee inquimoshireventajeitantareri. Ariorica irareejeitaquea, ¿arimpa intijeitapeempa? Eiro. Aisati narori, nocarajeitiri meeca noamerepee: ¿paita nontitacantareri?

³⁵Ariorica irojocajeitanajeri ishaninca aatsiri ijina, impoijiquea intijeitanaquea. Aisati nonquempetea narori: ariorica coajica noncame, impoiji iroashiretacojeitanaquea noamere, irosatiquea intijeitantanaqueari iriori. ³⁶Aisati, otimirica piitsaare iroaquerari, te pintsereeroji pimpataquero peesatotaintsiri pimaatsara. Aisati, ariorica poavita-gerome, eiro omoncaratavacaatsi. Aisati pinquivajerorica ontsitiamotaanaque iroaquerari, aisati antsivianaque peesatotaintsiri. Otsereacoticari iroaquerari.

^{37,38}Tempa apeantantaro iroaquerajari pearentsi imeshinaqui iroaquerari, impoiji antsitacotaquero eiro aparajatan-tatsi. Ariorica oshimoretanaque, aravoncajatanaque, otapiasanotaqueri imeshina. Iroaquera ini, eiro ipesacotitsi, aisati eiro aparajatatsi oja. Irooricame ampeantantajarome pearentsi iroaquerajari peesatitatsiri imeshina, tempa iraravoncanaque, intoncanaque: ton.

Aitaque intserenaque, aisati amparajata-naquea iroaquerajari. ³⁹Tempa ariorica irajeitero peesatojataintsiri pearentsi, eiro acoirotsi irero iroaquerajari.

Icantavacaimentaro saavaro.

(Mt. 12.1-14; Mr. 2.23-3.6)

6 ¹Ari osaavarotaque, iquenanaque Jesoshi tiricomashiqui, itsipatanacari iroamere. Yora iroamere yaviijeitaquero oitsoquippee, yamirocaitaquero otaqui, yojocaquero. Irointi oitsoqui, yoajeita-caro. ²Ineajeitaqueri variseopee, icantiri:

—Te oncameetsateji oca pantiri. Tempa irointi oca saavaro, amaoreajeitantari, eiro ataquereaitantarotsi meeca. ¿Paita pantantarori?

^{3,4}Yacanaqueri Jesoshi:

—Tempa pineanatiro isanquenatacotiri-niri Iravirini. Aaqueri itasheni aisati itsipajeitari. Otimi anta ivancoqui Tasorentsi tanta yovetsiqueetiniriri Tasorentsi. Apaniro yoajeitaro saserote-pee, te irishineteriji itsipapee iroyearo. Iro cantaincha yashinoncaaca Iraviri, irootaque ipantacarari tanta yora ivincatsarite saserote, aisati ipajeitaqueri maaroni oijajeitiriri. Pineaquero, te irininteji iroashinoncaayeri. ⁵Noponeaca narori inquitequi, natiritapaaque: naro cantacantirori paitarica anteri saavaro-qui.

⁶Ari pashini saavaro ijatanaji anta yapatotapinijeita, yoametantapaaque. Itimi anta shirampari tsiricoipacori. ⁷Yamenashe-tavaqueri oametantirori sanquenarentsi aisati variseopee, icoaque irioteri iroavisaco-tanterica saavaroqui. Icoaque incanteri ivincatsarite: “Noneaqueri Jesoshi yantaquero caari cameetsatatsi?”. ⁸Iro cantaincha iotaqueri Jesoshi iquenqueshire-jeitiri. Icantiri tsiricoipacori:

—Caate, pincatiapee aca.

Ari icatianaca, ijatashitaqueri. ⁹Icanta-jeitiri Jesoshi:

—Meeca nosampijeitempi. ¿Paita cameetsatsiri antajeiteri saavaroqui? ¿Cameetsampa ancavintsayeri ashaninca? Terica, ¿picoaquempa avashinoncayeri? ¿Cameetsampa avavisacoteri ashaninca? Terica, ¿picoaquempa ayeri?

¹⁰Yamenajeitaqueri Jesoshi, imajereni-rojeitanaque. Ari icantiri:

—Pancote.

Ari yacotanaque, cameetsatanaji iraco.

¹¹Ari iquisajeitanaca saserotepee.

Isampitavacaanaca:

—¿Jaoca ancanteriri avacantanteariri?

Icoyeajeitaqueri Jesoshi iroamerepee.

(Mt. 10.1-4; Mr. 3.13-19)

¹²Pashini quitaiteri ijataque Jesoshi toncaariqui, iquenquetsatacairi iriri, iquitaitetacotapaaque. ¹³Ari oquitaitetamani icoyeajeitaqueri iroamerepee. Icarataque 12 icoyeaqueri. Icoaque coajica intianqueri inquenquetsatacotanteariri. Jero oca ivajiropee: ¹⁴⁻¹⁶Shimo (aisati ipajitiri Jesoshi: Petero), Antirishi (yora irirenti Shimo), Santiago, Joa, Jeripi, Varitorome, Mateo, Tomashi, Santiago (yora itomi Arijeo), Shimo (icantetiri aisati Seraroro), Jorashi (yora itomi Santiago), aisati Jorashi Ishicariote (yora aacanterineri coajica Jesoshi). Aitaque ipajijeitari iroamere icoyeaqueri Jesoshi.

¹⁷Impoiji yoirincapaaja anta opampaitetinta. Itiminta oshequi iroamerepee, aisati oshequi catsini pashinipee atiri: iponeajeitaca Joreaqui, Jerosarequi, Tiroqui, aisati Shiroqui. Otimi Tiro aisati Shiro arejiqui, anta otsapijaqui antearoja incajare. Ijatashijeitaqueri Jesoshi inquemisantajeitavaqueri, aisati icoajeitaque iroavisacojeiteri mantsiaripee. ¹⁸Ari yoavisacojeitaqueri yatajeaoncayetiri camaari. ¹⁹Icoajeitaque impamijeitapeeri, intasoncacoventanteariri iroavisacojeitan-teariri.

Iquenquetsatacaqueri Jesoshi quimoshirejeitatsineri.

(Mr. 5.1-12)

²⁰Ari yamenanaqueri iroamere, icantiri:

—Ariorica pashinoncaavetaca meeca, pinquimoshiretanaque: aitaque impincatsariventajeitempi Tasorentsi, coajica.

²¹Ariorica pitashevetaca meeca, pinquimoshiretanaque: aitaque inquemacaajempi Tasorentsi, coajica. Ariorica poashirevetaca meeca, pinquimoshiretanaque: aitaque inquimoshiretacaajempi, coajica. ²²Ariorica inquisajeitempi atiripee, intianquempi, incantimatempi, incante te pincameetsateji. Ariorica inquishimentajeitempiro piquemisantana, iro cantaincha inquimoshiretaca-yempi Apa. Tempa noponeaca narori inquitequi, natiritapaaque. ²³Ariorica inquisajeitempi, pinquimoshiretasanotanaque, pincantajeite: “Cameetsave”. Tempa aitaque cameetsa impinatasanotempi Apa inquitequi. Queario yora intacantajeita-queeri iquisajeitaquerini peerani yora camantacotiririni Tasorentsi.

Iquenquetsatacotiri Jesoshi ashinoncachaneri coajica.

²⁴Jero pashini aisati icantaqueriri Jesoshi:

—Iro cantaincha yora ashitaarantincari, iquimoshirementaro yashijeitari: moncarataca, iroashinoncayea irinti. ²⁵Aisati iroashinoncayea quemarori yoari meeca: coajica inquemero itashe. Iroashinoncayea shirontajeitachari meeca: coajica incavintsaa-jeitea aisati iriraaajeitea. ²⁶Ariorica irineacameetsajeitempi maaroni atiripee, pashinoncayea coajica: tempa yora intacarori inecameetsajeitashitari yora amatavijeitiriri.

Icoaque Jesoshi aninteri quisajeiteeri.

(Mt. 5.38-48; 7.12)

²⁷Aisati icantajeitaqueri:

—Pinquemisantajeitavaquena: pininteri avinti quisajeitimpiri, pincavintsayeri.

²⁸Pincanteri Tasorentsi iramitacojeiteri maaroni cantimajeitimpiri, aisati maaroni quisajeitimpiri. ²⁹Ariorica impasavorotempi pampatevoroqui, pishineteri impasavorotempi acaqueroca aisati.

Ariorica iraa pitsatempiro poicoro, pimperita pashini piitsaare aisati.

³⁰Ariorica iramanempiro paitapeerica, ari pimperi. Ariorica iraa pitsatempiro pivaararo, eiro picoacotiriti aisati.

³¹Ariorica picoaque incavintsayempi itsipapee, ari pincavintsayeri avirori.

³²Ariorica pinintajeitiri maaroni nintajeitimpiri, tempa moncarataca: tecatsi incantea impinatempiri Tasorentsi. Tempa ioti caari quemisantatsi inintiri nintiriri iriori. ³³Aisati oquempetaca: ariorica picavintsairi cavintsaajeitimpiri avirori, tempa aisati moncarataca. ¿Paita picoiri impinatempiri Tasorentsi? Aisati iriori caari quemisantatsi, icavintsairi cavintsaajeitiriri iriori. ³⁴Ariorica picoaque iroimpiajempipi paqueriri pishaninca, tempa moncarataca: ¿Arimpa picoaque impajempi aisati Tasorentsi? Tempa aisati ipavaca iriori caari quemisantatsi paitapeerica, aisati icoaque irovanayeneri iroimpiajeneri. ³⁵Irootaque nocantantimpiri pincavintsayeri avinti quisajeitaquempiri, pincavintsante, pimpashiyeteari ashinoncaincari: eiro piquenqueshiretirotsi irimaterorica iroimpiajempi. Ariorica pantero oca, cameetsa: impinatasanotempi Tasorentsi, aisati intomintasanojeitempi. Cameetsa ipincatsariventanti anta jenoqui. Queario icavintsairi piatsajeitariri, yora caari cameetsajeitatsi. ³⁶Icavintsantasanti Apa: pinquempejeiteari. ³⁷Eiro paamaashitaritsi pishaninca, aisati eiro picantitsi: “Ainiro irantane”, impoji eiro icantimpitsi Tasorentsi: “Ainiro pantane avirori”.

Eiro piquishmentiriti pishaninca yantayetiri, irointi pincavintsayeri: impoji eiro iquishmentimpirotsi

Tasorentsi pantayetiri avirori, irointi incavintsayempi. ³⁸Ariorica pimpayeteri ashinoncaincari coiteimoyetariri, aisati inquempetajempi iriori Tasorentsi: impayetempiro maaroni coiteimoyetaquempiri avirori. Te irimashitsateji: impasanotempi. Ariorica capichaji pincavintsante, aisati capichaji incavintsayempi avirori. Ariorica oshequi pincavintsantasante, ari oshequi incavintsaasanotempi avirori.

Irootaque icantiriri Jesoshi.

**Icoaque Jesoshi ancavintsayeri
quisajeiteeri.**

(Mt. 7.1-6, 15-23)

³⁹Jeroica ishiacaaventiniriri aisati Jesoshi:

—¿Arimpa irimatero camarajaquiri irancatsanaqueri iamarajaquiririnte? Eiro imatirotsi: tempa ari impariajeitaque omoroqui. ⁴⁰Aisati iquempea, yora iroamere te iranaacoteriji oametiriri ioti. Iro cantaincha ariorica irishitoriatasante, ariorica irimoncarateari. ⁴¹¿Paita piquishmentantariri pishaninca yantayetiri? Panaacotasantoriricari avirori. Oquempetaca picantiri pishaninca: “Pitijaquitaca ovane quipatsi”, iro cantaincha ainiro avirori pitijaquitacaro antearo inchato. ⁴²Arimpa pincanteri: “Jentsite, noshaninca, naajempiro pitijaquiro”. Tempa pioti otimi inchato pashicajaquitaquempiri avirori. ¿Jaoca pincanteari paantajeantariri itijaquiro pishaninca? Pamatavitanti, pinguempe-tearime cameetsasasanotatsiri. Pamene, pijivate pojoquero antearora inchatora pashicajaquitaquempirira, impoji pamenasanotanaje paantajeantariri itijaquiro pishaninca iriori.

⁴³Jero oca pashini ishiacantiriri Jesoshi:

—Ariorica ocameetsati inchato, ocameetsati oitsoqui iroori. Aisati terica

oncameetsateji inchato, te oncameetsateji oitsoqui iroori. ⁴⁴Ariorica aneero oitsoqui inchato ayoti jaoca ocantari inchato iroori. Ariorica pincoaque chochoqui, ¿arimpa pijatashitero anta manitincanama shiqui? Eiro pijatitsi, tempa piotiro te oitsoquitantearoji chochoqui, iyera, ova, tecatsi catsini. ⁴⁵Ariorica anquenqueshiretero cameetsatsiri, antayetero cameetsayetsiri. Ariorica anquenqueshiretero caari cameetsatsi, antayetero caari cameetsatsi. Queario, aneanantantaro aquenqueshireyeteri. ⁴⁶¿Paita picantashitantavetanari: “Novincatsarite”? Te pinquemisantenaji.

Ivecarataquero icantajeitiriri.

(Mt. 7.24-29)

⁴⁷Aisati icantiri Jesoshi:

—Meeca noshiacantempiri jaoca icantari quemisantanari. Iquemiro noneane, iquemisantasanaotauero: yantajeitaquero maaroni nocaquaqueri. ⁴⁸Ishiaqueri shirampari vetsiquirori ivanco. Iquiashitaquero tsoompoina, irosati mapiqui aitaque yovecarataquerori. Ari oniri ominca mapiqui, oquisotantacari. Opariasanaotaque incani, ooncanaca eni. Antearo catsini otatsincavetapaacaro, iro cantaincha te aaveeroji: quisotaque onaque mapi. ⁴⁹Iro cantaincha yora caari quemisantana ishiaqueri shirampari vetsicavetarori ivanco, te intijacotasanoeroji. Impoiji ooncanaca, aanaquero ivanco. Ojaraanaque, aanaquero, te aneajeroji.

Irootaque icantajeitiriri Jesoshi.

Yoavisacotiri Jesoshi inampire capitano.

(Mt. 8.5-13)

7 ¹Impoiji ipianaja Jesoshi anta Caperenaquero. ²Itimi anta nampitsiqui aparo capitano. Oromasati ini, caari ini jorio. Ijoquuitaca inampire, irotaintsi incame. Inintasanotiri capitano inampire.

³Iquemacotaqueri Jesoshi, itasoncantaque, irosati itiancantacariri jivatacaajeitiriri joriopee:

—Pincamantaitei Jesoshi impocanaque iroavisacotenari nonampire.

^{4,5}Ari yareejitapaacari, icantasanojeitapaqueri:

—Pijatashiteri. Icameetsasananoti yora capitantonata, oshequi inintajeitaquee arori. Yovetsicantaqueenero pancotsi apatojeitantari. Cameetsa poavisacoteneri inampire.

^{6,7}Ari yoijajeitanaqueri. Quempeji inapaaque, ineajeitavaqueri pashini ishanincapee capitano, itianquiri. Icamantapaqueri:

—Jero oca icantaqueri noyapitanote: “Nopincatsasanaotaqueri Jesoshi, iro caari notonquiotantavacari. Notseencaja narosati, irootaque caari nocoanta impoque novancoquica. Niotaque incoaquericar iroavisacoteri nonampire, ari iravisacotaje. ⁸Timatsi cantanari paitarica nanteri, aisati timatsi soraro notiancapinitiri. Noncanteririca: ‘Pijate’, ari irijataque. Noncanteririca: ‘Pimpoque’, ari impocanaque. Aisati noquempetiri nonampire iriori, ariorica noncanteri: ‘Jero oca panteri’, ari irantaquero”.

⁹Iquemavaitiiri Jesoshi, yoanaque cavaco. Ari ipitsocashijeitacari oijajeitiriri, icantajeitiriri:

—¿Piquemaquerompa oca icantiri oromasati? Oshequi ishiretaquena, te inquempejeiteariri ishanincapee arori.

¹⁰Ari impoiji ipiajeitanaja ishanincapee capitano. Inepaaqueri inampire, avisacotaji.

Yoitinaajiri Jesoshi camaintsiri anta Naiqui.

¹¹Pashini quitaitei ijatanaque Jesoshi anta Naiqui, icarajeitaqueri inampirepee aisati oshequi pashini oijajeitiriri.

¹²Iquempejijeitapaacaro nampitsi,

ineavaitiiri icompitacotapaaqueri camatsiri, intijerime. Iro iriniro camaintsiri camajimentaaro, aisati te intimeji pashini otomi. Oijatacoventiri otomini, ocarajeitiri oshequi oshaninca. ¹³Ineantavacarori Avincatsarite, oshequi icavintsairo, icantaquero:

—Eiro piraacotiritsi pitomi.

¹⁴Ari ijatashitaquero cajo yoantacariri, ipamitaquero. Icatiaacaapaacari compitacotiriri. Icantiri Jesoshi camaintsiri:

—Evancari, pintinaaje.

¹⁵Irosati itinaantanaja, isavicaji; ineanatanaji. Impoiji icantiro Jesoshi:

—Jerica pitomi, aneanaji.

¹⁶Yoajeitanaque cavaco catsini neajeitaqueriri, icantajeiti:

—Tempa icameetsati Tasorentsi.

Itiancaqueeri oamejeiteerori irineane. Queario, itasoncaventaquee Tasorentsi, icavintsaajeitiri quemisantajeitiriri.

¹⁷Irosati iquemacojeitancariri maaroni joreasati, aisati otsoteanaca neantsi pashinipeequi nampitsi.

Yora Joa Vaotisantantsiri itianquiri iroamere Jesoshiqui.

(Mt. 11.2-6)

¹⁸Ari iquemacotaqueri Jesoshi iroame-reepe Joa, yora vaotisantantsiri. Ijatashi-jeitaqueri, icamantapaaqueri yantayetaqueri Jesoshi. Yora Joa, icajemiri iroamere apite, ¹⁹itiancaqueri Avincatsaritequi, icantavaqueri:

—Pijajeite Jesoshiqui, pisampitapeeri: “¿Avirompa Quirishito namenaajeivetari? ¿Pashinimpa naamaajeitea?”

²⁰Ari yareejeitapaacari, icantapaaqueri: —Itiancaquena Joa, icantana: “Pisampitaiteri Jesoshi: ‘¿Avirompa Quirishito naamaajeivetari? ¿Pashinimpa naamaajeitea?’”

²¹Tecatsi incantea Jesoshi iranqueri, iroitita yanti yoavisacoyetiri oshequi mantsiyatetsiri, aisati yoavisacoyetiri

oshequi yatajeaoncayetiri camaari. Aisati yamenacaayetajiri oshequi caari amenayetatsi. ²²Impoiji icantiri:

—Meeca pijajeitaje, pincamantapeeri Joa aitaquenea pineacojeitaquenari aisati piquemacojeitaquenari. Pincamantapaa-jeri amenanaji yora caari amenaveitachani, aniitanaji yora caari aniiveitachani, avisacojeitanaji patsaayeveitachaniri, iquemayetanaji yora caari quemaveitachani, itinaayetanaja camayevetainchani. Aisati nocamantajeitiri ashinoncaajeivetachari jaoca incanteari irijate inquitequi. ²³Iquimoshireventajeitaquena maaroni quemisantasanotanari.

Icanti Jesoshi:

“Icameetsatasanotaque Joa”.

(Mt. 11.7-15)

²⁴Ari ipiajeitanaja itiancane Joa, impoiji iquenquetsatacaajeitiri Jesoshi apatotimtarariri. Iquenquetsatacotiri Joa, icantiri:

—¿Paita pijatashijeitantariri Joa anta caaraiteriqui? ¿Pijitimpa itsataashita Joa, iquenquetsatashita? Te inquenquetsatashiteaji. ¿Pijivetarimpa icomitapinita, te irioteji paitarica iquenqueshiretiri?

Tempa ioti. ²⁵¿Paita pijatashitasanotaririri? ¿Irompa pijijeitaqueri ashitaarantincari ini, quitsaatarori cameetsamaori? Caari ini. Pamene, yora quitsaatarori cameetsamaori ishanincatacari pincatsari,

aisati iquempetaca: iveshireimentaro irovaararo timatsiri ivancoqui pincatsari. Te inquempetariji irinti Joa. ²⁶Jentsite, pincamantena: ¿paita pijatashitiri? ¿Irimpa pijitiri quenquetsatirori irineane Tasorentsi pijatashitantariri? Tempa queario, iquenquetsatiro, iro cantaincha yanaacojeitiri itsipapee quenquetsatacantantsiri. ²⁷Tempa piojeitiro sanquenerentsi cantantsiri: “Notiomi, nontianqueri jivatempineri, inquenquetsatacotempi. Incamantajeiteri atiri incameetsashirejei-

tanaque, inquemisantajeitempi”. Queario, oca sanquenarentsi oquenquetsatacotiri Joa Vaotisantantsiri. ²⁸Yanaacojeitaqueri maaroni itsipapee quenquetsatacantantsiri: imataquero maaroni icoacaqueriri Tasorentsi, irootaque inecameetsatantari. Iro cantaincha inecameetsatanotiri catsini Tasorentsi maaroni ipincatsariventasanojeitiri.

Yora saserotepee itseencajeitiri Joa, aisati Jesoshi.
(Mt. 11.16-19)

²⁹Ari iquemajeitaqueri oshequi atiri icantaqueriri Jesoshi. Iquemantacariri, icantajeiti:

—Queario, icameetsataque Tasorentsi.

Aisati icarajeitaqueri quemajeitaqueriri yora ivaotisyetiri Joa, aisati apatoyetini-riri oromasati quirequi. ³⁰Irintiquea yora variseo aisati yora oametantirori sanquenarentsi te irinintajeiteji iranteneri Tasorentsi icoacaavetariri, aisati te irijatashiteriji Joa irivaotisateri. Te irivshireimentearo irinti icantiri Jesoshi. ³¹Icanti Jesoshi aisati:

—¿Paitaquea? ¿Jaoca icantari yocapee? ¿Paitaniquea caari iquemisantantana yoca? Te inquenqueshiretimateaji. ¿Paita noshiaconteri? ³²Irio noshiaconteri jananequi, isavicajeiti nampitsiqui nianqui, icanti aparo: “Apaniro nosonca-vetaca, iro cantaincha te pojatacotenaji, te pimaninquetaji. Noashiretacovetari camaintsiniri, iro cantaincha te poashire-teaji avirori”. ³³Pamene, yora Joa ititapinita, te irimateroji cachojari, jero picantajeiti: “Irio camaari pincacairiri, caari yoasanotanta, aisati caari irantaro cachojari”. ³⁴Iro cantaincha noponeaca nainti inquitequi, natiritapaaque: noapinita aisati nirapiniti. Aiquero picantajeiti: “Jerinta oashenti, shinquinarinti. Ishanincatacari apatotapinitiniriri oromasati quirequi, icarajeitapinitiri

caari cameetsajeitatsi”. ³⁵Ontimimota-quempiricame piotantari, piotaqueme te ontampaticateji picantajeitiri.

Yoavisacotiro Jesoshi tsinane antapinivetarori caari cameetsatsi.

³⁶Ari aparoni variseo icantiri Jesoshi: —Caate novancoqui, avajeitea. Yacanaqueri: —Jaa, ari.

Ari ijajeitanaque, yoajeitaca. ³⁷Otimi anta nampitsiqui tsinane antapinivetarori caari cameetsatsi. Oquemacotaqueri Jesoshi, yoa anta ivancoquinta variseo, ojatashitiri oneeri. Aacotanaqueneri casancajari. Iro aacotantanacanariri mapi quitamarori imoqueetiri. ³⁸Ocatiapaaca itapiiqui Jesoshi, quempeji. Iraasanota-paaca, ovitejantacari ojaqui iitiqui, iro oshetantajanariri oishi. Impoiji onitiri iitiqui, aisati osaitantacari iitiqui casanca-jari. ³⁹Ineantavacarori yora variseo, iquenqueshiretanaca: “Iriome itiancane Tasorentsi, iriotavaquerome oca tsinane. Oshequi antapinitiro caari cameetsatsi, eirome ishinetarome antiterime iiti”. Ipajita variseo Shimo. ⁴⁰Iotaqueri Jesoshi iquenqueshiretiri, icantiri:

—Shimo, timatsi noncamantempiri. Yacanaqueri:

—¿Paita pincamantenari oametanari?

⁴¹—Noshiacontempiro. Itimi shirampari irevitiriri 5,000 soles, itimi pashini irevitiriri 500 soles. ⁴²Iro cantaincha te irimateroji yora apitetatsiri iroimpiajeneri iirequite, irootaque icantantariri: “Aitanaji, eiro pipinatanatsi. Nopashitim-piri”. Tempa icavintsairi apite. Aparo irevivetacari capichaji, irinti itsipa irevitasanovetacari. Pincamantena: ¿janica neacameetsatanoterineri?

⁴³Yacanaqueri:

—Naamaaca yora irevitasanovetariri, tempa iriotaque icavintsasaanotiri catsini.

Icantiri:

—Queario picantaque.

⁴⁴Impoiiji yamenaquero Jesoshi tsinane, icantiri Shimo:

—Pamene, incaranqui noqueapaaque aca pivancoquica, iro cantaincha te paacameetsatavaquenaji: te pimpavaquenaji nija nonquivantapeemparomeri noiti. Pineaquero irointi oca tsinaneca. Oquivantapaaquenaro ojaqui noiti, aisati oshetantaquenaro oishi. ⁴⁵Te pinintavorotenaji, irointi oca, onintapinitaquero noiti. ⁴⁶Te pisaintantenaro noitoqui quejitsi, irointi oca, osaitantaquenaro noiti casancajari. ⁴⁷Pamene, ainiro antayevetari oshequi, iro cantaincha nocavintsaquero, eiro noquenqueshireacotajirotsi antayetiri: tempa oshequi onintasanotaquena. Ariorica noncavintsa-yeri antayevetaroni capichaji, capichaji irinintavaquena iriori.

^{48,50}Ari icantiro tsinane:

—Ainiro onaveta pantayevetari, iro cantaincha eiro noquishimentimpirotsi, eiro noquenqueshireacotimpirotsi aisati. Pishiretaquena, irootaque pavisacotantajari. Cameetsaya pijataje, piveshiresanotanaquea.

⁴⁹Ainiro inaveta oacojeitacariri, isampinatavacaaca:

—¿Paitampa ijita yoca, icavintsantarori antirori caari cameetsatatsi?

**Oijajeitiri Jesoshi tsinane
amitacotapinijeitiriri.**

8 ¹Pashini quitaiteri iquenaquenayetanaque nampitsipeequi Jesoshi. Iquenquetsatacaajeitiri atiri, icamantajeitiri:

—Irotaintsi impincatsariventajeitempi Tasorentsi.

Quiso yoanajiri iroamerepee, yora carajeitatsiri 12, ²aisati oijajeitiri tsinaneppee. Peerani yoitsaviantaveitaroni camaari, aisati ojoquiiveitani, iro cantain-

cha yoavisacojeitajiro Jesoshi. Opajita aparoni tsinane Maria Maquitarasato. Icaraveitani camaari oitsaviantaveitaroniri 7. ³Iro oijatiriri pashini, opajita Joana, ijina Cosa. Yora Cosa, iriotaque amitacotiriri pincatsari Eroreshi. Aisati iroori oijatiri Sosana, aisati otsipapee tsinaneppee. Oca tsinaneppee amitacotapinijeitiri Jesoshi, opapinijeitiri coiteimotacariri.

Ishiacantiriri jocaitirori oitsoqui tirico.
(Mt. 13.1-9; Mr. 4.1-9)

⁴Yapatotimentajeitacariri Jesoshi oshequi atiri, ari ishiacantajeitiriri, icantiri:

⁵—Ari ijataque shirampari yojocaitiro oitsoqui tirico oaantsiqui. Aparopee pariitapaintsi avotsiqui: yaaticayetaquero aniiyetatsiri, impoiiji yoajeitacarico contsaropee, itsoncaquero. ⁶Pashinipee pariitapaintsi mapiqui. Oparitsavetanaca capichaji, iro cantaincha te oncajavatsatimeteji, irootaque oshimpetantanacari, ocamajeitanaque. ⁷Pashini pariitapaintsi quitotseequimashiqui: oshiocavetanaca, iro cantaincha anaanaquero quitotseequi, irootaque ocamantacariri. ⁸Iro pashini pariitapaintsiriri cameetsariqui quipatsi: oshiocanaque, otimasanotanaque oitsoqui oshequi.

Irootaque ishiacantajeitiririri, impoiiji antearojenca icantajeitiri:

—Otimirica piquemantari, pinquemasanotavaquero.

**Yoametiri Jesoshi iroamere
oshiacaaventiri oitsoqui.**

(Mt. 13.10-23; Mr. 4.10-20)

⁹Isampijeitiri iroamerepee:

—¿Paita pishiacantiri incaranqui?

¹⁰Yacanaqueri:

—Icoacaquempi Apa Tasorentsi piojeitero caari iojeiti itsipapee atiri. Avintiquea niotacaquempi jaoca icanta

Apa ipincatsariventajeitaquempi. Irio noshiacantajeitiniri yoranqui: iramenajeivetea, iro cantaincha eiro ineasanotitsi; inquemajeivetea, iro cantaincha eiro iojeitavaquerotsi. ¹¹Jero oca noshiacaaventimpiri: oca oitsoqui oshiacaaventiroweane Tasorentsi. ¹²Oca avotsi opariantavetapaacari oitsoqui oshiacaaventiroweane Tasorentsi: quemajeivetavacarori irineane Tasorentsi: ipocapaaque camaari, yojocacaajiri iquenqeshirevetacaroro irineane. Te irinintacayeriji inquemisante aisati iroavisacotea. ¹³Orari mapitaintsiri opariantavetapaacari oitsoqui, oshiacaaventiroweane Tasorentsi, ineacameetsavetacaroro. Iquemisantaveta, iro cantaincha te inquearioventeroji: ariorica opomerentsitomotacari iquemisantaveta, ari yojocana-jiro. ¹⁴Aisati oquempetaca quitotseequimashi opariantavetapaacari: oshiacaaventiroweane quemajeivetacarori irineane Tasorentsi, iro cantaincha iquenqeshiretasanotiro yantapinitiri, iveshireimentaroyashiyetari, aisati icoaque inquimoshiretashitea. Yatsipetashitaro iquemavetaroro irineane Tasorentsi: te inquemisantasanoteroji, te iranteneriji Tasorentsi icoacavetacarori. ¹⁵Ocari cameetsataintsiri quipatsi oshiacaaventiroweane quemasanotavacerori irineane Tasorentsi. Iquearioventaquero iquemisantasanotaque, icameetsashiretanaque. Iriotaque matasanotirori maaroni icoacaaquerori Tasorentsi.

Icantiri Jesoshi: “Piotasanojeitavacuero jaoca icanta Tasorentsi ipincatsariventajeitaquempi”.

(Mr. 4.21-25)

¹⁶Jero aisati yoamejeitiriri Jesoshi iroamere:

—Ariorica antsiotero tsiomentotsi amenajeitanteari, ¿arimpa antatacotero cantiriqui? ¿Arimpa amanaquero jaocarica ara? Tempa ocameetsati

avanqueteri jenioquiji onconijajeitanteari paitapeerica. Irootaque noamejeitantaquempiri: nocoaque piotasanojeite.

¹⁷Tequera piojeite jaoca icantari Tasorentsi ipincatsariventajeitaquempi, iro cantaincha coajica piotasanojeitajero.

¹⁸Pinquemasanojeitavacuena piojeitanta-jeari. Capichaji piotaque meeca, iro cantaincha ariorica pinquemisantasanotena, nontsoteajeitempiro, niotacaasanoteitempi. Ariorica pijiveta pioti, eiro piquemisanantasi, impoji icomitacaasanotimpicari Tasorentsi: tecatsi piotimataje.

Ijatashjeitiri ishanincasanori Jesoshi irineeri.

(Mt. 12.46-50; Mr. 3.31-35)

¹⁹Impoji ojatashitiri Jesoshi iriniro, otsipajeitari irirentipee. Yarejeitapaaca pancotsiqui anta isaviquinta, iro cantaincha tecatsi icantajeitea intsipajeitapeemari: yojocaajeitavacuero oshequi atiripee. ²⁰Icamanteitiri:

—Ocoapaaquempi piniro, jeri pirentipee. Osavicapaaque anta saiteriqui.

²¹Iro cantaincha yacanaqueri:

—Nonirontacaroro maaroni quemisantasanojeitiriri Tasorentsi, maaroni antasanotiniriri icoacaaquerori. Aisati nirentijeitacaroro maaroni quemisantiriri.

Yoimajerentaquero Jesoshi tampea aisati omotoncane incajare.

(Mt. 8.23-27; Mr. 4.35-41)

²²Pashini quitaiteri itetajaro Jesoshi pitotsi, icarajeitacuero iroamerepee. Icantiri: —Tsame amonteajeitanaje intatiquero incajare.

²³Ari ijatacojeivetanaca, aacotanaqueri tampea. Ari ijatacotaque nianquijaqui, imaanaque Jesoshi. Impoji omapocajeitacuero antearo tampea, otejatapaacaroro nija pitotsiqui, irotaintsi intsitiacojeite.

²⁴Icaocaaqueri iroamerepee:

—Pintinaye, oametanari, irotaintsive antsitiacojeite.

Ari itinaanaca, impoji ipeajiro tampea, ipeajiro omotoncane: opeasanotanaja.

²⁵Icantiri:

—¿Paita caari pishirejeitantana?

Itsaroacaajeitanacari, aisati yoajeitanacari queri cavaco. Icantavacaajeitanaca:

—¿Janicampa yoca? Imataquero tampea, aisati omotoncane: ipeajiro. Te aneapiniteroji oca.

Yoavisacotiri Jesoshi neiriri camaari.

(Mt. 8.28-34; Mr. 5.1-20)

²⁶Ari iponeanajari Jesoshi Carireaquei, meeca yareetapaaca intatiquero: anta Jerasequi. ²⁷Yaatacotapaaque, yamatsecajeitanaque quipatsiqui. Ineapaaqueri neiriri camaari: peerani, te inquitsaateaji. Te irisaviqueji pancotsiqui, irointi iquenaquenatsempequiyeti anta tijaariqui. ²⁸Ineantavacariri Jesoshi, itiyeroashitavacari, icajemanaque:

—¿Jaoca pincantenari? Niotavaquempi: avirotaque itomi Tasorentisanori savicatsiri inquitequi. Eiro piquematsitacaanatsi.

²⁹Iro icajemantacari, itsaroacaavacari Jesoshi, iotaque camaari intianqueri. Yora shirampari ineapinitiri camaari, iquenacaa-pinitiri. Yoisotapiniyeevetari iracoqui aisati iitiqui carenatsa, iro cantaincha ishintsitacairi camaari, ipesantarori carenatsa yoisotanteevetariri. Ariorica ipesanaquero, ishiacaanacari camaari caaraiteriqui.

³⁰Icantiri Jesoshi:

—¿Jaoca pipajitari?

Yacanaqueri:

—Nopajita Oshequianti.

Iro ipajitantacari Oshequianti ineaqueri oshequi camaari. ^{31,32}Ari itimi anta tioncaiquiji oshequi chanco yoajeita. Yora camaari icantiri Jesoshi:

—Eiro pitiancajeitanatsi Sharincaveniqui, ainti pintiancajeitena anta chancoqui, nonijaapeemparita iriori.

Ari icantiri:

—Pijajeite.

³³Ari yojocajeitanajiri shirampari, inijaajeitapaacari chancopee, irosati ishiajeitantanaca, ipariajeitanaque imperitauqi, ipiincajeitanaque incajarequi, pocn, pocn, pocn, itsitiajeitanaque.

³⁴Ari ineantavacariri, ishiajeitanaca shentajeivetariri chanco, icamantajeitacari ishaninca anta nampitsiqui aisati oantsiqui. ³⁵Ari ipocajeitanaque irameneri yora neaveitariniri camaari, jaocarica icantajari. Ineapaaqueri, tecatsitaji inaji; tecatsi oajerine, isavicaji Jesoshiqui.

Iquitsaataja, otimanaji iquenqueshirentariri. Itsaroacaajeitapaacari. ³⁶Yora neasanotaqueriri icamantajeitavacari maaroni ishaninca yantiri Jesoshi, itsoteaqueneri. ³⁷Ari itsaroajeitanaque catsini maaroni timajeitatsiri ara.

Itiancajeitajiri Jesoshi:

—Pijataje, eiro pipocajitsi aisati.

³⁸Irintiquea yora neaveitariniri camaari icantavetari:

—Nocoaque noijatanaquempi.

Iro cantaincha icantiri:

³⁹—Eiro poijatanatsi, ainti pijataje pivacoqui. Pincamantajeitapeeri pishaninca oshequi icavintsaquempi Tasorentsi.

Ari ijtanaque, iquenaquenayetanaque nampitsiqui, icamantajeitiri ishaninca:

—Pineaquena: oshequi icavintsaajana Jesoshi.

Yoavisacotiro Jesoshi irajatsiri aisati yoitinaajiro irishinto Jairo.

(Mt. 9.18-26; Mr. 5.21-43)

⁴⁰Impoji ipianaja Jesoshi, imonteanajaro incajare. Yoyeajeitacari oshequi atiri, yaacameetsajeitavacari. ^{41,42}Itonquiotavacari shirampari pajitachari Jairo: iriotaque jivatacaantatsiri anta pancotsiqui yapatojeitantari. Itiyeroashitapaacari iitiqui Jesoshi, icantapaacari:

—Tsame novancoqui, irotaintsi oncame nishintio.

Apaniro oni irishinto, ocarataque osarintsite 12. Ari yojatanaqueri, itsitacajeitanacari oijajeitanaqueriri.

⁴³Oijatanaqueri aisati tsinane irajasheta-siri: ocarataque 12 osarintsit intantanacari irajashetanaque. Tecatsi materoneri iroavisacotajero. ⁴⁴Oquenapaaque itapiiqu antitaqueri iitsaare ocaratapaaque, irosati opeantanajaro iraja. ⁴⁵Ari icanti Jesoshi:

—¿Janica antitaquenarori noitsaare?

Icantajeitanaque:

—Te nantitempiro piitsaare.

Impoiji icanti Petero:

—Oametnari, icarajeiti atiri oshequi ishoncajeitaquempi, itsitacajeitaquempi. Aiquero picantanaiti: “¿Janica antitaquenarori noitsaare?”

⁴⁶Iro cantaincha yacanaqueri iriori:

—Ainiro antitaquenarori. Ocamantaquena notasorenca: timatsi notasoncacoventajiri.

⁴⁷Iotaque tsinane tecatsi oncantea omanapitsateri antitaqueri iitsaare. Opioncanaque, ojatashitiri, otiyeroashitaro, ocantiri:

—Narotaque antitaquempirori piitsaare, irootaque navisacotantajari nirajaveitani.

Iquemajeitavaquero maaroni atiripee.

⁴⁸Aisati icantaquero Jesoshi:

—Noshaninca, pishiretaquena, irootaque pavisacotantajari. Cameetsa pijataje pivancoqui, pinquimoshiretanaje.

⁴⁹Ari pashini pocapaintsi ishaninca Jairo camantapairiri:

—Camanaque pishinto. Eiro picantiritsi meeca oametantatsiri irijate avancoqui.

⁵⁰Iquemavaqueri Jesoshi, icantiri:

—Eiro picantashiretitsi. Ariorica pishiretena, ari avisacotanaje pishinto.

⁵¹Ari yareejeitapaaca pancotsiqui. Icanti Jesoshi:

—Eiro avinti piqueajeitapaitsi: irintiquea queapaintsine Petero, Joa, Santiaco, iri, aisati iniro, aitapaaji.

⁵²Ainiro iracojeitacaro oshanincani, yoashiretacojeitacaro. Icantajeitakeri Jesoshi:

—Eiro piraacojeitarotsi: te oncamasanteji, irointi omai.

⁵³Ishirontimentajeitacari, iojeitacque ocamasanotaque. ⁵⁴Ari yajiricavacotaquero, antearojenca icanti:

—Evancaro, pintinaanaje.

⁵⁵Irosati otinaantanaja. Icantiri:

—Pimperero oyeari.

⁵⁶Ari yoajeitanaque cavaco maaroni oshaninca, iro cantaincha icanti Jesoshi:

—Eiro meeca picamantitsi.

Itianquiri Jesoshi iroamere inquenquetsatacayeteri atiri.

(Mt. 9.35-38; 10.5-15; Mr. 6.7-13)

9 Impoiji yapatojeitiri Jesoshi iroamere, imatacaajeitakeri itasoncacaqueri itsipapee, icantajeitiri:

—Nocoaque pojocacoventajeiteri atiripee camaari, pimateri maaroni camaaripee, aisati poavisacojeiteri maaroni mantsiyatatsiri. ²Meeca pijajeite. Pinquenaquenayetanaque, pincamantajeiteri atiri: “Irotaintsi impincatsariventajeitempi Tasorentsi”. Aisati poavisacoyeteri mantsiyatatsiri. ³Noncantempi, tecatsiya paanaque: eiro paanaquerotsi piotiquiro, pitsarate, poyeari, piirequite, poicoro, tecatsi catsini. ⁴Jaocarica pareetapaaqueari, ari pisavicapaaque. ⁵Eirorica iquemisantajeitavaquempitsi savicajeitatsiri, povaana-jea. Ariorica povaanajea pincantajeitanaqueri: “Meeca te pinquemisantenaji, ari iroasanquetempi Tasorentsi”.

⁶Ari ijajeitanaque, iquenayetanaque nampitsipeequi. Icamantajeitakeri atiri jaoca icantajeiteari iravisacotantajeari. Aisati yoavisacoyetajiri mantsiyatatsiri.

Yora Eroreshi icoaque irineeri Jesoshi.*(Mt. 14.1-12; Mr. 6.14-29)*

⁷Ari yora pincatsari Eroreshi iquemacotaqueri yantayetaqueri Jesoshi, itasoncantayetaque. Te irioteji paitarica inquenqueshireteri. Icantayeti: “Irio Jesoshitajantsiri Joani: itinaanaja”. ⁸Icantayeti itsipapee: “Yonijaantaja aisati Iriashi”. Pashini cantayetatsi: “Itinaanaja camantantatsiniri”. ⁹Iro cantaincha icanti Eroreshi:

—Nopesacantaqueri Joani: camaque inaque. Iro cantaincha, ¿janica yoca aquemacojeitaqueri itasoncacoventajeitaqueri atiripee? Nocoaque noneeri.

Itasonquiro Jesoshi tanta, yoshequiaquero.*(Mt. 14.13-23; Mr. 6.30-46; Joa 6.1-15)*

¹⁰Ari ipiajeitanaja itiancajeitaqueri Jesoshi, icamantajeitapaqueri imayetaqueri. Impoiji itsataajeitanajiri yaajeitanajiri iroamere anta Vetsairaqui. ¹¹Iro cantaincha iojeitaqueri atiri ijtanaque, yoiyajeitanaqueri oshequi. Ari yovetsajeitavacari Jesoshi, yoamejeitavaqueri jaoca icanta Tasorentsi ipincatsariventajeitaqueri. Aisati yoavisacojeitaqueri mantsiaripee. ¹²Ari ishaavijiiteanaque, ipocashitiri iroamerepee, icantajeitiri:

—Pamenerote, caaraiteitaque aca. Pintiancajeiteri meeca nampitsipeequi: otiminta irimaajeitanteari aisati iroajeitanteari.

¹³Iro cantaincha icantavaqueri:

—Pimpajeiteri avinti iroajeiteari.

ICanti:

—Tecatsi nompajeiteriri. Pamene, ocarataque tantajaniqui apapacoroni. Jeri apite shima. ¿Picoaquempa nojajeite namananteneri iroajeiteari maaroni yocapee? Oshequi ini catsini.

¹⁴Aamaaca icarajeiti shirampari 5,000 yapatojeitaca. Icantiri Jesoshi:

—Poisavicajeiteri maaroni: pimoncara-jeiteri incarayetaque yora 50 irampato-

jeitaquea, aisati iriori yonta 50. Aisati inquempejeitaqueari maaroni.

¹⁵Ari imajeitaqueri, yapatojeitaqueri. Yoisavicajeitaqueri. ¹⁶Impoiji yajiricaquero Jesoshi tanta, jeri aisati shima. Yamenanaque inquitequi, icantiri iriri: “Ariove, Apa, pipaquenaro noyearchi”.

Impoiji ipaqueri iroamere, icantaqueri: —Jeri, povaaajeiteneri yora apatojeitaincharira.

¹⁷Ari yoajeitaca maaroni, iquemajeitaca. Impoiji yaajeitajiro timaaranatapaa-jantsiri, yapatotajiro. Ocarataque cantiriqui ijaajiri 12.

Icantiri Petero Jesoshi: “Avirotaque Quirishito naamaajeitacari”.*(Mt. 16.13-23; Mr. 8.27-33)*

¹⁸Pashini quitaiteri ijtanaque apaniro Jesoshi iquenquetsatacari iriri. Iotanajiri yaanajiri iroameresanori. Impoiji isampitiri:

—¿Janica ijitaquenari ashaninca? ¿Paita icantajeitiri?

¹⁹Yacanaqueri:

—Icantayeti aparopee: “Irioitatsi Joani vaotisantantaveitachaniri, itinaanaja”. Irio pashini icanti: “Irioitatsi Iriashi, yonijaantaja aisati”. Irio pashini icanti: “Irioitatsi camantantatsiniri, itinaanaja”.

²⁰Isampitiri:

—Avintiquea, ¿paita picantajeitiri?

Yacanaqueri Petero:

—Avirotaque Quirishito naamaajeitacari. Itiancaquempi Tasorentsi.

²¹Iro cantaincha icantasanojeitiri:

—Eiroyea picamantitsi. ²²Queario, noponeaca inquitequi, natiritapaaque, iro cantaincha oshequi nonquematsicateari. Intseencajeitena savicacantajeitatsiri, jivatacaajeitiriri saserotepee, oametantirori sanquenarentsi, maaroni. Incantajeite: “Caari ini Quirishito”. Iroyeetena, oncarataque quitaiteri mava, nontinaanaje.

Icanti Jesoshi: “Poijatasanojeitanaquena: eiro piperaventarotsi”.

(Mt. 16.22-28; Mr. 8.32-38)

²³Impoiji icantajeitiri Jesoshi:

—¿Picoajeitaquempa poijatasanojeitanaquena? Ari eiro picavintsaaajatsi avisati, eiro pantanonantatsi avisati. Maaroni quitaiteiri pimpomerentsiventenaro nocoacaaquempiri: ariorica iroimenteetempiro, ariorica inquishimenteetempiro. Iro cantaincha quiso poyena, poijatasanojeitanaquena. ²⁴Ariorica pantanontea pincavintsayea avisati meeca, eiro piotasanoitiritsi meeca Tasorentsi, aisati eiro pisaviquimotiritsi coajica. Ariorica pinintena narori, aisati pimpomerentsiventayetenaro meeca nocoacajeitimpiri, eiro patsipetarotsi, irointi piveshireimenteari meeca Tasorentsi, aisati pisaviquimoteri coajica. ²⁵Ariorica pimpiotasanojeitero vaararontsi catsini, iro cantaincha pintseenqueri Tasorentsi; impoiji pijate Sharincaveniqui. Tempa pantsipetashijeitearo maaroni pashijeiveteari. ²⁶Eiro pipashiventacaanatsi; aisati noneane, eiro pipashiventacaarotsi. Tempa naro poneachari inquitequi, natiritapaaque. Coajica nojatanaje jenoqui. Impoiji nompiapaaje aisati aca quipatsiqui, nompincatsaritasanotapaaque, nontasorentsitananotapaaque: nonquempeteari Apa aisati maaroni inampirepee. Iro cantaincha pinquenqueshirejeitea: ariorica pimpashiventacayena meeca, nompashiventacaquempi coajica avirori. ²⁷Iro cantaincha queario oca noncamantempiri, eiro namatavitimpitsi: eirositarica picamajeiti, pineajeitavaquero jaoca icanta Tasorentsi ipincatsariventanti.

Ineaqueri iroamere ipashinitanaque Jesoshi.

(Mt. 17.1-8; Mr. 9.2-8)

²⁸Ari ocarataque quitaiteiri 8, ijataque Jesoshi toncaariqui, inquenquetsataceyeri iriri. Yaanajiri aisati Petero, Santiaco, jeri

Joa. ²⁹Ari iquenquetsatacaapaaqueri iriri, imapocanaca ipashinivorotanaque, aisati oshipaquireasanaotaque iitsaare, atsioquinaqueri yora amenajeitaqueriri.

³⁰Imapocapaaqueri aisati apite shirampari, iquenquetsatacaapaaqueri Jesoshi. Irio pocaintsiri Moishishini aisati Iriashini; ³¹te inquempeteeji aquempejeita arori, icameetsatanaotaque: iquempejeitacari inquiresati. Ari iquenquetsatavacaajeitaca mava: iquenquetsatacotiro incame coajica Jesoshi anta Jerosarequi. ³²Oshequi ipochoquevetanaca Petero aisati itsipajeitari, iro cantaincha te irimayeji. Yamenshejeitaqueri Jesoshi, ishipaquireaque, iquempetacaro quitaiteiri. Aisati yamenshejeitaqueri yora itsipajeitari Jesoshi.

³³Irotaintsi impianaje yora apitetaintsiri, icantiri Petero Jesoshi:

—Oametanari, aitaquempa nopocaque narori aca, noneajeitaquempi. Nocoaque novetsiquempiro mava pancotsijaniqui: aparo pashi, aparo irashi Moishishi, aparo irashi Iriashi.

Ari ineaveetashitaca Petero, te inquenqueshireteaji. ³⁴Ari omapocanaca mencori, omaaroncajeitapaacari, irosati itsaroajeitantanaca. ³⁵Impoiji iqumajeitaqueri Tasorentsi, inaque mencoriqui:

—Iriotaque yoca notomi nonintasanotiri: pinquemisantajeitavaqueri.

³⁶Impoiji yamenajeivetanaca: tecatsi irinee, apaniro irinti Jesoshi. Ari imanajeitaquero: peerani, tecatsi incamantajeite. Impoiji, icamantaquee.

Yoavisacotiri Jesoshi jananequi yampitsiitacaari camaari.
(Mt. 17.14-21; Mr. 9.14-29)

³⁷Oquitaitetamanaji, yoirincajeitamanaja, itonquiojeitavacari oshequi atiri.

³⁸Icantavaqueri apanoni:

—Oametanari, pincavintsayeri notomi, te intimeji pashini. ³⁹Yatajeaoncaqueri

camaari, icajemacaapinitiri. Yampitsiitacaapinitari, ishimoretacaapinitari. Yoashinoncaapinitaqueri: te irinijantareempariji. ⁴⁰Nocantavetacari poamerepee iroavisacoteri, iro cantaincha te irimateriji.

⁴¹Yacanaqueri Jesoshi:

—Eiro imatiritsi: tempa irinti pitseen-caririnte, irootaque caari imatantari camaari; te pinquenqueshirejeitempa. ¿Arimpa noshinetempi pintseencantapinite? Jentsite pamaquenari.

⁴²Jeri inianquitacaavetapaacari itomi, imapocanaca camaari ipishoncaqueri quipatsiqui, yampitsiitacaanajari aisati. Ari itiancajiri Jesoshi camaari, yoavisacotajiri jananequi. Icantiri iriri:

—Jerica pitomi: avisacotaji inaji.

⁴³Yoajeitanaqueri cavaco maaroni atiripee icantavacaajeitanaca:

—Tempa itasorentsitasanoti catsini Tasorentsi.

Icamantavetari Jesoshi iroamere irayeeteri.

(Mt. 17.21-23; Mr. 9.29-32)

Ainiroquera icantavacaajeitaca, icantiri Jesoshi iroamere:

⁴⁴—Pinquenqueshiretasanotero oca noncamantempiri. Eiro pipeacotarotsi.

Noponeaca inquitequi, natiritapaaque, iro cantaincha irayeetena.

⁴⁵Iro cantaincha te inquemajeitavaqueri icantavetacariri. Te irishineteriji Tasorentsi inquemajeitavaquero. Itsarocaaajeitacari irisampiterime: “¿Paita picantaqueri?”

Icantiri Jesoshi iroamere jaoca incanteari impincatsaritantajeari.

(Mt. 18.1-5; Mr. 9.33-37)

⁴⁶Impoiji icantavacaajeitanaca iroame-reepe Jesoshi, yaamaajeitaca:

—Aca acarajeitica: coajica, ¿janica anaacotantajantsine impincatsaritaje? ¿Narompa pimpincatsajeite?

⁴⁷Iotashitacari Jesoshi iquenqueshirejeitiri. Icajemiri jananequi:

—Caatanaque aca nonampinaqui.

⁴⁸Impoiji icantajeitiri iroamerepee:

—Pameneri jananequica, quemisantanari. Ariorica pincavintsayeri yoca, pincavintsayena narori. Ariorica pincavintsayena, aisati pincavintsayeri tiancaquenari. Ariorica pincavintsayeri itsipapee, ari pimpincatsaritanaque.

Yoavisacotanti pashini quemisantiriri Jesoshi.

(Mr. 9.38-40)

⁴⁹Impoiji icantiri Joa:

—Oametanari, chapinqui noneaqueri shirampari oavisacoyetiriri neiriri camaari. Icamantavetana iquemisantimpi, irootaque imatantariri yoavisacotiri. Iro cantaincha te quiso iroajeitee, irootaque notsaneacotantacariri iroavisacoteri neiriri camaari.

⁵⁰Yacanaqueri Jesoshi:

—Eiro pitsaneapitsataritsi. Te inquisajeiteeji, irootaque ayotantacari iquempejeitaaque.

Yora samariasati te iraacameetsateriji Jesoshi.

⁵¹Te osamaniteji meeca: irotaintsi irijataje Jesoshi inquitequi. Ari iquenqueshiretaca irijate Jerosarequi. ⁵²Itiancaqueri iroamere:

—Pijivatanaque anta Samariaqui, pamenapeero asavicantajeitapeempari.

⁵³Ari ijavetanaca, iro cantaincha iojeitaaque samariasati irijate Jesoshi Jerosarequi, irootaque itsaneapitsatantavacariri irisavicantapeempameri inampiqui. Ari ipianaja, icamantapaajiri Jesoshi:

—Eiro ishineteetsi amaye inampiqui.

⁵⁴Ari iquemantacariri Santiaco aisati Joa, icantiri:

—¿Novincatsarite, picoaquempa noncanteri Tasorentsi intaajeiteri

maaroni samariasati? Nonquempeteari Iriashini peerani: itaacantaqueri soraro quisajeitaqueriri.

⁵⁵Yamenashetaqueri Jesoshi, icantiri:

—Te oncameetsateji anquisheri. Te piojeiteji jaoca picantacari: te pincameetsashireteji. ⁵⁶Noponeca narori inquitequi, natiritapaaque. Te iro nompocantea noayeteri atiri, irointi nopocantaca noavisacojeiteri.

Impoiji yovaajeitanaja pashini nampitsiqui.

Icantayetiri Jesoshi itsipapee atiri.

(Mt. 8.18-22)

⁵⁷Ari iquenaajeitanaque avotsiqui, itonquiotavacari shirampari, icantavaqueri Jesoshi:

—Novincatsarite, nocoaque noijatasanotanaquempi, jaocarica pijateri.

⁵⁸Icantiri:

—Natiritapaaque noavisacotenteariri atiri. Pinquemisantavaquero oca noncamantempiri: yora otsitiniro timatsi imoro imaapinitantari, yora tsimeripee timatsi itsityetari; iro cantaincha nainti, tecatsi nomaanteari.

⁵⁹Impoiji icantiri pashini:

—Poijatanaquena avinti.

Yacanaqueri iriori:

—Novincatsarite, nocoaveta, iro cantaincha incamavaquetsita apa. Ariorica nontijeri, impoiji noijatanaquempi.

⁶⁰Ipiatacari Jesoshi:

—Ainiro itseencaririnte, iriotoaque tijerine ariorica incamaque. Aviroquea avinti, pincamantajeiteri atiri jaoca icanta Tasorentsi ipincatsariventajeitiri.

⁶¹Icantiri pashini shirampari:

—Aitaque, novincatsarite, noijatasanotanaquempi: iro cantaincha nojivajeitapainterita novetsajeitapainteari noshanincapee.

⁶²Iro cantaincha icantiri Jesoshi:

—Ariorica pitsapatiro piquiuro quipatsi pimpanquitantearori pivanquire, te pamenamenayetero paitapeerica, caari otipitantayeta piquiaqueri. Aisati oquempetaca: pincoaquericica impincatsariventempi Tasorentsi, poijatasanotena, eiro piquenqueshiretirotsi pantajero aisati pantapiniveitaniri.

Itianquiri Jesoshi oshequi quenquetsatacaajeitantsiri.

10 ¹Impoiji itiancajeitaqueri oshequi iroamere irijivajeitanaqueri, icarajeiti 70. Icantavaqueri:

—Pijajeite, apitepee pincantayetanaquea. Pijivajeite nampitsipeequi nocamantajeitaquempiri, nimpoitanaje narori. ²Oquempetaca ocarataque oshequi oitsoqui panquirentsi, aparaitanaca: te iroshequiteji aviiteroneri. Pincanteri Avincatsarite intiancajeitanteariri oshequi amitacotempineri pinquenquetsatacaajeiteri atiri, irijajeitanteari iriori inquitequi. ³Pamene, oshequi ompomerentsitimojeitempi, oshequi irantanatempi tseencantantsiri: pinquempeteari ovisha, itsoncaqueri maniti. Meecaquea, pijajeite pinquenquetsajeite. ⁴Eiro paanaquerotsi pitsarate, piirequite, pisapatote. Ariorica pintonquiotavaquero atiri nianqui, eiro piquenquetsatacaavaqueritsi, irointi pavisanaqueri: apatiro povaanaquero onta nocantaquempiri. ⁵Jaocarica pisavicapaaqueri, pincanteri Tasorentsi iramitacoteri ashitarori ivanco inquemisantanteari. ⁶Ariorica inquemisantaque, iravisacotaje. Irompa eirorica iquemisanti, iro cantaincha eiro patsipetarotsi pinquenquetsatacayeri Tasorentsi: tempa pimataqueneri oca nocantaquempiri. ⁷Jaocarica anta pisavicapeeri, aitaque pisavicavaquetsita. Eiro piquenaquenayetitsi pancotsipeequi. Poyearo paitarica impavaquempiri, aisati pirero,

maaroni. Ocameetsati impavaquempi paitapeerica coiteimotaquempiri: tempa ocameetsati impinateri shirampari antaveetiniriri. ⁸Jaocarica pijateri, ariorica iraacameetsatavaquempi, poapaaquearo paitarica impavaquempiri. ⁹Intimerica mantsiaripee, poavisacojeiteri. Pincamantajeiteri maaroni: “Irotaintsi impincatsariventajetempiti Tasorentsi”. ¹⁰Iro cantaincha terica iraacameetsatempiti itsipapee ashaninca, pincamantajeiteri: ¹¹“Pinquemajeitavaquena: icoaveta Tasorentsi impincatsariventempime, iro cantaincha te pincoyeji. Te paacameetsajeitavaquenaji, aisati oquempetaca, te paacameetsatavaqueriji Tasorentsi. Meeca pashinoncaitaiyempani”. ¹²Irootaque nocoqueri pincamanteriri. Pineaquero, peerani itseencajeitaqueri Tasorentsi soromasatini, irootaque ipoyereajeitantariri. Iro cantaincha eirorica inquemisantajeitavaquempi ashaninca meeca, iranaacoteri soromasatini, irashinoncaasanojeitanaquea catsini.

**Iquenquetsatocotaqueri Jesoshi
tseencajeitaqueriri.**

(Mt. 11.20-24)

¹³Aisati icanti Jesoshi:

—Irashinoncaasanojeitanaquea corasesati aisati vetsairasati: oshequi ineacojeivetaquena notasoncantapiniti, iro cantaincha te inquemisantajeitavaquenaji catsini. Irineajeitaquenaricame tirosatini aisati shirosatini, inquenqueshirejeitanajeame, irojocajeitajerome caari cameetsatatsi yantajeitiniri. ¹⁴Queariotaque iroasanquejeiteri Tasorentsi coajica tirosatini aisati shirosatini, iroashinoncaajeiteri, iro cantaincha iroashinoncaasanojeiteri catsini corasesati aisati vetsairasati. ¹⁵Aisati icoajeiveta caperenaosati irijajeiteme anta inquitequi, iro cantaincha ainti irijajeite Sharincaveniqui. ¹⁶Noamere, pinquema-

jeitena. Ariorica inquemisantajeitavaquempi atiripee, aisati narori inquemisantajeitena. Ariorica intseencajeitavaquempi, intseencajeitavaquena narori. Aisati oquempetaca, ariorica intseencajeitena, intseencajeiteri aisati yora tiancaquenari. Meecaquea, pijatasanojeite.

**Ijajeitaque iroamere Jesoshi,
iquenquetsatacaajeitiri itsipapee, impoji
ipiajeitapaaja.**

¹⁷Ari ipiajeitapaaja itiancane Jesoshi, iquimoshirejeitapaaque. Icamantajeitapaqueri:

—Novincatsarite, iotantacari camaari noquemisantaquempi, iquemisantaquena narori. Nomataqueriquea notiancajeitaqueri.

¹⁸Yacanaqueri:

—Queario yora Satanashi ipincatsariventavetacari iamaaririnte, iro cantaincha noneajeitaquempi pimajeitaqueri pitiancaqueri camaari avirori: meeca niotaque eiro ipincatsaritanotiritsi meeca Satanashi, tempa yanaacotaqueri Tasorentsi irinti. ¹⁹Meeca oshequi notasoncaventaquempi: oquempvetaca ariorica paatiqueri maranque, eiro yoamaimpitsi; aisati yora quitoniro, tecatsi incantempi. Aisati inquisavetempi yora camaari, iro cantaincha tecatsi incantempi, tempa notasoncacoventimpi. ²⁰Queario pitiancaqueri camaari, iro cantaincha eiro piveshireimentarotsi. Irointiquea pinquimoshireventasanojeitanaque pijajeite inquitequi.

**Te iriojeiteroji irineane Tasorentsi, te
irineajeiteriji Jesoshi itasoncanti.**

(Mt. 11.25-27; 13.16-17)

²¹Impoji oquimoshiretacaasanoataqueri Ishire Tasorentsi, icantiri iriri:

—Oshequi, apa, picameetsati. Pipincatsariventajetiri maaroni inquiresati aisati

maaroni quipatsisati. Itimaveta atiri iovetachari, ioyevetaro paitapeerica, iro cantaincha pimanapitsataqueri pineane: te iriojeiteroji jaoca incanteari iravisacotantajeari. Irintiquea poametasanojeitaveri caari iotasano vetacha: itseencajeivetacari ishaninca, iro cantaincha picoacaaqueri iriote iriori.

²²Impoiniji icantajeitaveri apatoti-mentajeitacariri:

—Iriotaque Apa matacaaque narori maaroni catsini. Apaniro iotasano tana Apa, tecatsi pashini iotasano tenane. Aisati noquempeta narori, apaniro notasano tiri, te intimeji pashini iotasano tineri: irintiquea yora noamejeitiri, iojeitiri iriori.

²³Ari ipitsocashitanacari iriori iroamere, apaniro yoamejeitaveri:

—Pineajeitaveri avinti nomataquero caari ineapinijeiti itsipapee atiri. Ocameetsati pinquimoshireventena, aisati inquimoshireventena pashini neenaneri. ²⁴Icoajeiveitani peerani yora quenquetsatantaveitachaniri irineename nontasoncantayete, iro cantaincha te irineenaji notasoncantayeti. Aisati icoajeiveitani irineename yora pincatsariyeitachaniri. Aisati icoajeiveitani inquemajeitename, iro cantaincha, te. Avirojei avinti, pineajeitaveri, piquemajeitaveri.

**Icoasano taseerenti aniteri,
aisati aniteri ashanincapee.**
(Mt. 22.34-40; Mr. 12.28-34)

²⁵Pashini quitaiteri ijatashitaveri iotasano tiri isanquenareni Moishishi. Icoavetaca incomitacayearime Jesoshi; icantapaaqueri:

—Oametanari, ¿paita nanteri nosavicanteari inquitequi, noncantaitatiyempani?

²⁶Yacanaqueri:

—¿Paita ocantiri isanquenare Moishishi?

²⁷Icantiri:

—Ocanti isanquenare: “Ocameetsati anintasanoteri Taseerenti: tempa iriotaque Avincatsarite. Cameetsa anintasanojeiteri catsini. Aisati oquempetaca arosati nintajancha, anintasanojeiteri itsipapee ashanincapee, impoji antime inquitequi”.

²⁸Icantiri:

—Queario picantaque: ariorica pimatero avinti, ari pincantaitatiyempani pintime inquitequi.

²⁹Iotaque iriori te irinintasanoteriji maaroni ishaninca, iro cantaincha icoaveta irimanerome. Irotaque isampitantariri:

—¿Jaoca itimiri noshaninca noninteri?

**Iquenquetsatantiri samariasati,
neshinoncatiriri jorio.**

³⁰Yacanaqueri Jesoshi:

—Noshiacantempiro. Iquenanaque jorio avotsiqui. Iponeaca Jerosarequi, irijateme nampitsiqui pajitachari Jerico. Nianqui avotsiqui imapocaveri coshitantatsiri, yaavajiri, tapi. Isapocajiri, yaitaveri iitsaare, oshequi ipasanataveri, tac, tac, tac. Impoji yojoquitsempequitaveri avotsiqui, irotaintsi incame. ³¹Ari impoji iquenanaque avotsiqui saserote; jorio ini aisati. Ineavetapaacari ishaninca yoashinonqueetaveri, iro cantaincha yanampitanaveri, te irineshinoncateriji. ³²Aisati iquempetaca aparani Irevita, iquenapaaque avotsiqui. Ineavetapaacari ishaninca, iro cantaincha aisati yanampitanaveri, te irineshinoncatimateriji. ³³Impoji, ari iquenapaaque iriori aparani samariasati. Inashita irinti, te irishanincateeriji jorio. Iro cantaincha ineantapaacari yora ashinoncaincari, ineshinoncatapaaqueri. ³⁴Ijatashitaveri, yaavintapaaqueri, aisati ipashicaveri ora itoyeetaveri. Ainiro yamaveri aisati samariasati imorane. Ari yaajiri ashinoncaincari, yoanquetaveri imoranequi, yaanajiri anta otiminta pancotsi. Anta cameetsa

ineshinoncatapaajiri aisati, yaavintapaajiri.

³⁵Ari oquitaitetamanaque icoaque samariasati irovaanajea. Icantiri ashitarori ivanco: “Jerica quirequi. Nocoaque pincavintsayeri yoca shirampari. Terica irimoncarateaji quirequi, ari nompajempi coajica pashini”. ³⁶Ari itimi mava neaqueriri ashinoncaincari avotsiqui. ¿Jaoca itimiri ishaninca nintasanotiriri?

³⁷Yacanaqueri:

—Tempa yora neshinoncatiriri.

Icantiri Jesoshi:

—Aisati pinquempeteri, pineshinoncajeiteri pishaninca, maaroni.

Iquenquetsatacotiro Marita aisati Maria.

³⁸Impoiji iquenanaque avotsiqui Jesoshi, icarajeitiri iroamerepee. Yareejitapaaca nampitsiqui. Oneavajiri tsinane pajitachari Marita, ocantavaqueri:

—Tsame, pijajeite novancoqui.

³⁹Otimi anta ovancoqui ireento, opajita Maria. Osaviquimotaqueri Avincatsarite iitiqui, oquemisantavaqueri icamantaquerori. ⁴⁰Iroori Marita, oshintsishintsiyetaque, ovetsicayetiniri paitaricapee. Impoiji ojatashitaqueri, ocantaqueri:

—Novincatsarite, pamene apaniro novetsicayempiro poyeari. Orari eentio, te amitacotenaji. Pincantero amitacotenata.

⁴¹Yacanaquero:

—Oshequi piquenqueshiretaquero povetsicaquero ayeari, poameetsayetaquero paitapeerica. Oshequi piquenqueshireyetaquero. Ocameetsayeveta, iro cantaincha timatsi aparoni cameetsasanoatsiri: ⁴²irootaque ocoaqueri pireento, tecatsi cantimenterone.

Yora Jesoshi yoamejeitiri iroamere iquenquetsatacaajeitiri Tasorentsi.

(Mt. 6.9-15; 7.7-11)

11 ¹Pashini quitaiteri iquenquetsatacairi Jesoshi iriri. Ari ivecaratantacarori, icantiri iroamere:

—Novincatsarite, yora Joani yoamejeitiqueri iroamereni iquenquetsatacaajeitiqueri Tasorentsi. Nocoaque meeca pinquempetajeari avirori: poamejeitena nonquenquetsatacayeri narori.

²Icantaqueri:

—Ariorica pinquenquetsatacayeri, jero oca, pinquempeterori:

Apa jenoquisati, oshequi picameetsatsi catsini, nocoajeitaque pimpincatsariventajeitena, maaroni.

Ocameetsati nomajeitempiro maaroni picoacaajeitakenari, nonquempeteari iriori inquiresati yantajeitempiro iriori maaroni picoacaajeitiriri.

³Pimpapinitenaro maaroni quitaiteri noyeani coiteimotanari.

⁴Eiro piquishimentanarotsi caari cameetsatsi nantiri, irointi picavintsayena: tempa nocavintsaaajeitiri noshanincapee.

Eiro pishinetiritsi camaari irantacayena caari cameetsatsi.

Icanti Jesoshi: “Ariorica pincoacotasanoteri Tasorentsi coiteimotaquempiro, impasanotempiro”.

⁵Aisati icantaqueri Jesoshi:

—Pamene, noshiacantempiro aisati.

Oquempetaca ariorica pijatashiteri pishaninca nianquiite pamanapeeri itantane. Pincantapaqueri: ⁶“Nocoi pimpena mava pitantane noacaajeiteariri noshaninca. Iroaquera yareetapaaca, tecatsi nompavaqueriri”. ⁷Aamaaca ari incantavaquempiro: “Eiro pashereanatsi, novochoquineni. Maajeivetaquena: narori, notomipee, maaroni. Yavitaca oni ashitacorontsi. Tecatsi noncanteea nontinaye aca nompantempirori notantane”. ⁸Pishaninca inaveta, iro cantaincha eirorica icoitsi intinaye

impantempiri itantane. Iro cantaincha te incoyeji aisati pampiitapiniteri, irootaque intinaantajeiri, tinare, impaquempiro picoacotaqueriri. ⁹Aisati oquempetaca: ariorica pamanapiniteri Tasorentsi, impapinitempiro pincoacoteriri. Ariorica pincoapiniyetero paitarica, ari paajero. Ariorica pinquenquetsatacaapiniteri Tasorentsi, ari inquemisantempi. ¹⁰Queario, ipasanotee Tasorentsi maaroni coiteimojeitaqueeri: te irimashitsateji, intacojeitaquee. ¹¹Pamene, incoacotempirica pitomi tanta iroyeari, ¿arimpa pimpaqueri mapi? Incoacotempirica shima iroyeari, ¿arimpa pimpaqueri maranque? ¹²Ariorica incoacotempi iitsoqui teapa, ¿arimpa pimpaqueri quitoniro? Eiro pipiritsi, irointi pimpasanoteri yoyeeyetari. ¹³Pineaquero, te pincameetsajeivetaji, iro cantaincha piojeiti picavintsaajeitiri pitomipee. Tempa aisati iotasanoi irinti Apa jenoquiniri icavintsaajeitaquee arori. Ariorica pincoacojeiteri, intiancajeitempiro Ishire iriori amitacojeitempine.

Icantayeti atiripee: “Irio Jesoshi camaari”.
(Mt. 12.22-32; 12.43-45; Mr. 3.20-30)

¹⁴Pashini quitaiteri ineaqueri Jesoshi shirampari imasantitacairi camaari. Itasoncaoventajiri Jesoshi, yoavisacotajiri, irosati ineaveetantanaja aisati. Yoajeitanaque cavaco maaroni neajeitaqueriri. ¹⁵Iro cantaincha icantayeti aparopee:

—Ishanincatacari Jesoshi Satanashi: yora ivincatsarite camaari, irootaque imatantarori yoavisacotiri neiriri camaari.

¹⁶Itimi pashini tseenquiriri Jesoshi, icantiri:

—Intsite, pintasoncante, niotantempiri queariorica piponeaca inquitequi.

¹⁷Iro cantaincha iotaque iriori iquenqueshirejitiri. Icantiri:

—Ariorica irimanatavacaajeitea atiri, tempa aitaque impoyereavacaajeitaquee. Aisati ariorica inquisavacaajeitea ashaninca, tempa ari irinijantareajeitanajeri. ¹⁸Aisati oquempetaca, ariorica inquisajeiterime Satanashi iamaaririnte, ¿jaoca incanteari impincatsajeitantearirime? ¹⁹Aisati picantayeti: “Irio Satanashi amitacotiriri Jesoshi yoavisacotiri neiriri camaari”. Iriome amitacotenaneme noavisacotantariri, ¿janica amitacotiriri pishanicajei yoavisacotantariri neiriri camaari? ¿Irisatimpa camaari pishaninca? ²⁰Iro cantaincha itasoncacaquena Tasorentsi noavisacotantariri neayetiriri camaari, piojeitanteari meeca quiso yoajeitaquempi Tasorentsi, icoaque impincatsariventajeitempi.

Jero aisati ishiacantiniriri Jesoshi:

²¹—Pamene, oquempetaca oca: ontimerica shintsitsiriri shirampari ivesamento, ichacopite, maaroni, tempa irishentasanotero ivanco. Eiro ishinetiritsi incoshiyeeteri irovaararo. ²²Iro cantaincha impoquerica anaacotiriri ishintsitasanoti, iranaacotapaaqueri irinti irantapaaqueri, impoiji iraa pitsatapaaqueri yoantamento. Impoiji incoshiteri irovaararo, impajeiteri ishanincepee iriori. ²³Iquisajeitaquena maaroni caari oijajeitana, itseencajeitaquena maaroni caari amitacotana.

²⁴Ariorica iroavisacotajea neavetariri camaari, ocameetsati iramaventajeiri: yapiitajiricari aisati. Ishiaquero oca: iquenayeti camaari caaraiteriqui, icoayevetaro pancotsi irisavicanteameri. Tecatsi irinee, irootaque iquenqueshiretantacari: “Nompianajeta anta pancotsiqui noponeacanta”. ²⁵Ariorica impiaje, irineepaajero pancotsi, opishitaca. Vetsicayetaca irisavicantapeempari aisati.

²⁶Impoiji irijataque incajemeru itsipapee iyamaaririnte, incarate oshequi. Eiro icameetsatitsi camaari catsini, yora incajemeru. Pineaquero, oca pancotsi

oshiaqueri neiriri camaari. Ariorica iravisacotaje, ocameetsati iramaventa-
jeari camaari: yapiitajiricari irineajeri
aisati. Ariorica irampitajeri irineajeri,
catsiqueti iroasanoteri.

**Icanti Jesoshi: “Iquimoshirejitaque
maaroni quemisantatsiri”.**

²⁷Ari itimi oshequi quemajeitaqueriri
Jesoshi. Antearojenca ocanti aparoni
tsinane:

—Tempa ocameetsati oquimoshireven-
tiri Jesoshi iriniro.

²⁸Iro cantaincha icanti:

—Je, queario, iro cantaincha iquimo-
shiretasanojitaque maaroni quemajeiti-
rori irineane Tasorentsi, aisati maaroni
quemisantajeitiriri Tasorentsi.

**Icantiri Jesoshi atiri: “Ioti Tasorentsi
pitseencajeitaquena”.**

(Mt. 12.38-42; Mr. 8.12)

²⁹Ari yapatotimentajeitari Jesoshi
itsipapee atiri aisati. Impoiji yoamejeita-
jiri:

—Te pincameetsajeiteji. Picoajeiveta
pineajeitename nontasoncantajeme aisati,
iro cantaincha eiro pineajirotsi aisati.
Pinquenchireteri Jonashini
piotanteari: ³⁰peerani iniaqueri anteari
omani. Ocarati mava imaacotaque
tsompoina, impoiji isoquijanaji ivantequi,
iotantacari ninivesati itiancaqueri
Tasorentsi. Nonquempetajea coajica
piojeitanteari itiancaquena Tasorentsi:
tempa natiritapaaque nainti, noponeaca
inquitequi. ³¹Aisati ora ivincatsaroteni
savasati, oponeaca arejiqui catsini,
pashiniqui quipatsi. Oponeaca paricoti
oquemisantantariri Saromoni, peerani.
Ocoaque iriotacaasanotero. Pamene,
nanaacotiri Saromoni nioti, iro cantain-
cha pitseencajeitaquena. Coajica, ariorica
irampatojeiteri Tasorentsi maaroni
camajeitatsiri, incantajeitempi: “Ainiro

pantane: pitseencaqueri notiancane.
Irompa irointi oca ivincatsarote savasati
te aneroji antane: tempa oquemisantiri
Saromoni”. ³²Aisati iquemeta yora
ninivesatini: iquemisantirini Jonashini.
Iquenchirejeitanaca, yoipacaajeitajiro
caari cameetsatsi yantajeitiri. Nanaaco-
tiri nainti Jonashini, iro cantaincha te
pinquemisantajeitenaji. Coajica
incantempi Tasorentsi: “Iquemisantirini
ninivesatini Jonashini: avintiquea, çpaita
caari piquemisantantari notiancane?”

**Icanti Jesoshi: “Ariorica piquemisanti
pishiaquero tsiomentotsi”.**

(Mt. 5.15; 6.22-23)

³³Aisati icantajeitiri Jesoshi:

—Ariorica pitsiotiro tsiomentotsi,
çarimpa pimanaquero jaocarica?
çPitetirompa cantiriqui? Tempa poapini-
tiro onantariqui, pitsiojeitantari. ³⁴Oca
aquí oquempevetaro tsiomentotsi.
Ocameetsatirica aqui, amenajeitanaque
paitapeerica. Iro cantaincha terica
oncameetsateji aqui, tecatsi amenanteari,
oquempetaca aqueni tsiteniriqui, te
ayojeiteji jaocarica aqueniri. ^{35,36}Ocamee-
tsati piotacotea avisati piquemisantano-
taquerica. Ariorica piquemisantano-
tari, ari piotasanotanaque, eiro pitseenquima-
tantajitsi. Impoiji pinquempetearo
tsiomentotsi tsiotasanotachari.

Irootaque icantajeitaqueriri Jesoshi.

**Yora Jesoshi icantaqueri variseo aisati
oametantirori Sanquenarentsi: “Ainiro
pantanejei, iroasanquejeitempi
Tasorentsi”.**

(Mt. 23.1-36; Mr. 12.38-40; Ir. 20.45-47)

³⁷Impoiji icantaqueri variseo Jesoshi:

—Tsame ajate novancoqui, noacayempi.
Ari yoiyatanaqueri, yoacaapaacari. ³⁸Te
inquivacoteaji Jesoshi, irootaque
yoantanacariri cavaco variseo. ³⁹Icantiri
Avincatsarite:

—Queario, pamejeitacaro piquivapini-tiro pajo aisati piveratote: iro cantaincha apatiro otapiiqui. Te pojoqueroji caari cameetsayetatsi timatsiri osantequi.

Piquempetacaro avirori: piquenqueshiretapinitiro picoshiyeti aisati pantapiniyetro caari cameetsatsi. ⁴⁰Te pinquenqueshirenroteaji. ¿Apatirotimpa yovetsiquiro Tasorentsi paco? Tempa aisati yovetsiquiro piquenqueshireantari.

⁴¹Pipashiyevetari ashinoncaincari coiteimovetariri, iro cantaincha te pincavintsaaanoteriji. Ariorica pincavintsaaanoteri itsipapee pishaninca, ari pincameetsataque. ⁴²Pashinoncaajeitea avirojei. Queario pipaaranatapinivetari Tasorentsi piirequite capichaji, iro cantaincha tequera omoncarateaji.

Timatsi pineacameetsatiri avirori aisati caari pineacameetsati. Iro cantaincha te omoncaratearoriji icoacaquempiri Tasorentsi. Te pininteriji Tasorentsi aisati te pininteriji pishanincapee. Ocameetsati pimperi Tasorentsi quirequi, iro cantaincha eiro pipeacotirotsi pininteri aisati panteneri icoacaquempiri. ⁴³Pashinoncaajeitea avirojei. Ariorica irampatojeitea ashaninca inquemisantanteariri Tasorentsi, picoanrojeiti impincatsajeitempi avinti. Ariorica pinquenayetanaque nampitsiqui, picoaque cameetsa iracameetsajeitempi atiripee. ⁴⁴Queario, iroashinoncaajeitempi Tasorentsi. Piquempetacari camatsiri tijachari quipatsiqui, imanaca; iro cantaincha yavisajeitanaque atiripee, te iriojeiteji irotaintsi iratiquerime camayetatsiri patsaatsiri. Aisati avirori, pimanayevertaro caari cameetsayetatsi pantayetiri.

Irootaque icantaqueriri Jesoshi variseopee. ⁴⁵Ari icantiri oamentantirori isanquenareni Moishishini:

—Oametantatsiri, aisati narorijeji piquisaquena.

⁴⁶Icantiri Jesoshi:

—Je, aisati avirori iroashinoncaajeitempi Tasorentsi. Oshequi piperanayetacari ashanincapee, iro cantaincha te pintacoteariji. ⁴⁷Queario, pashinoncaajeitea. Pimoncarajeitacari pishanincani oajeitiririni camantantatsiniri. ⁴⁸Avirojei oayeri. Pintimitaquearicame peerani avirori, poajeitaquerime aisati yora camantantatsiniri. ⁴⁹Iotacojeitaquempiri Tasorentsi, icanti: “Nontianqueneri atiri quenquetsatayerineri, iro cantaincha iroayetavaqueri aparopee, irio itsipapee inquisavaqueri, intiancaarantajeri”.

⁵⁰Ainiro pantajeitiri maaroni: pashi poajeitiro poanti. Yora peeraniniri poajeiterime, irosati picanta meca poajeitiri quemisantajeitiriri Tasorentsi.

⁵¹Pishanincajeitacari oaqeriniri Averini. Aisati pishanincajeitacari oaqeriniri yora Sacariashini: yoyeetaqueri iriori anta ivancoqui Tasorentsi. Ainiro pantajeitiri maaroni, irootaque iroashinoncaimentempiri Tasorentsi. ⁵²Poametantavetaro isanquenareni Moishishini, iro cantaincha pashinoncaajeitea: tempa pamatavijeitiri ashanincapee. Te pincoajeiteji pioteri Tasorentsi, aisati te pincoacaajeiteriji iriojeitajeri iriori ashanincapee.

⁵³Irootaque icantajeitaqueriri maaroni, impoiji isoquijanaji. Iquisajeitaqueri yora variseopee aisati yora oamentantirori sanquenarentsi, aisati iquenquejaajeitaqueri. Aisati isampiyevetacari paitapeerica, ⁵⁴icoajeiveta incomitacayearime. Icoaveta incomitacayearime iraacantantearimeri.

Yora Jesoshi yoamejeitiri iroamerepee.

(Mt. 10.28-33; 12.32; 10.19-20)

12 ¹Ari yapatotimentajeitiri Jesoshi oshequi catsini atiri, itsitacaavacajeitanaca. Irosati icantantari iroamerepee:

—Paamayeariyea variseopee, yamatavijeitimpicari. Oshequi yamatavitanti.

²Ijijeivetaca tecatsi iotatsine yamatavijei-
vetacari, iro cantaincha coajica iriotaco-
jeitanaqueri maaroni atiri yashi yoiro
yamatavantanti. ³Aisati aviroripee,
paitarica pimanavetacari picantiri meeca,
inquemajeitero coajica. Paitarica
pincanteri apaniro anta pivancoqui,
irovaayetajero anta yapatojeitanta
atiripee. ⁴Meeca, noshaninca, noncaman-
tempi: eiro pitsaroacaaritsi yora atiri
coatsiri iroyempi. Ariorica iroyempi, iro
caincha irointi iroyeete pivatsa.
Tecatsi incantero pishire. ⁵Irinti Tasorensi
pimpincatsate: incoaquera, iroyempi.
Iro caincha aisati icoaquera,
irimatero intianquempi Sharincaveniqui.
Irooqea pintsaroacayeari irointi pijate
Sharincaveniqui. ⁶¿Ivinaronimpa
tsimeripee? Te impinatasanoteaji, iro
caincha iojeitiri Tasorensi: te
impeacojeiteariji. ⁷Aisati oquempetaca,
iotasanojeitaquempi: ioti jaoca ocaratiri
piishipee. Iquempoyeajeitaqueri
tsimeripee, iro caincha avirojei
iquempoyeasanojeitaquempi. Eiro
picantashiretitsi, irointi piveshireimen-
teari Tasorensi. ⁸Aisati piojeitavaquero
oca noncantempiri: eiro pipashiventacaa-
natsi, ariorica pincamantajeiteri itsipapee
atiri piquemisantaquena, aitaque
noncamanteri Apa anta inquitequi
pishanincataquena. Tempa noponeaca
inquitequi, natiritapaaque. ⁹Iro caincha
ariorica pimpashiventacayena aca
quipatsiqui, aisati avirori nompashiventa-
cayempi anta inquitequi. ¹⁰Ariorica
incantimatena atiri, ariorica incavints-
yeri Tasorensi, eiro iquenqueshiretaji-
rotsi yantajeitiri. Iro caincha ariorica
incantimajeitero Ishire Tasorensi, eiro
icavintsairitsi Tasorensi catsini.
¹¹Ariorica irayeetempi anta yapatotapini-
jeitanta, aisati anta joeshiqui, aisati anta
pincatsariqui, eiro pitsaroacajeitaritsi.
Eiro piquenqueshiretitsi: “¿Paita noncan-

teriri?” ¹²Ariorica irayeetempi,
oametempi Ishire Tasorensi paitarica
pincanteriri.

**Icantajeitiri Jesoshi:
“Pinevetarocari vaararotsi”.**

¹³Impoiji icantiri aparoni shirampari:
—Oametanari, ipanaquerini apani
iyeca maaroni timimojeiveitariniri.
Tecatsi impena nainti. Pincanteri iye
impaarantajena narori irovaararo.

¹⁴Yacanaqueri:

—Eiro nocantiritsi. ¿Narompa joeshi,
noncantanteariri?

¹⁵Icantajeitiri maaroni apatotimentajei-
tariri:

—Queariompia: pinevetarocari yashiye-
tari itsipapee, eiro oveshireacaasanotim-
pitsi.

¹⁶Impoiji ishiacaventiniri oca:

—Otimi iipatsite ashitaarantincari.

Oshequi onintiro panquirentsi quipatsi,
cameetsa oshiocayetanaque ivanquirepee.

¹⁷Yaayetajero oitsoquee, inquempo-
yeantearori ovancoquequi iroori, iro
caincha opiojeitaca pancotsiqui. Te
onajeitearoji maaroni. Iquenqueshiretaca:

¹⁸“¿Jaocasa noncantearori? Tecatsi

noantearori maaroni. Jaa, notaque
meeca: noshoveajero pancotsijaniqui,

nantacantajero antearo pancotsi noantea-
rori maaroni novanquirepee, aisati
maaroni novaararo. ¹⁹Oshequitaque

meeca maaroni, tecatsi coiteimotajena-
neri. Peerani catsini, eirota otsonquitatsi;

meeca nomaoree oshequi osaritsi.
Cameetsa noapinitea, noshinquitapinitea,

noveshireimentearo maaroni timimota-
nari”. ²⁰Iro caincha icantiri Tasorensi:

“Te piotacoteaji. Meeca tsiteniri noyempi;
impoiji, ¿janica ashitajearoneri maaroni

timimojeivetimpiri?” ²¹Pineaquero, te
irroteji maaroni coatsiri iroshequiyero

irovaararo. Oncameetsateme irovetsique-
rome irisavicantearime inquitequi.

Icantiri Jesoshi: “Pincanteri Tasorentsi inquemoyeaventempi”.

(Mt. 6.25-34)

²²Aisati icantiri Jesoshi iroamere:
—Eiro piquenqueshiretatsi jaoca payerori poyeari aisati pinquitsaateari.
²³Tempa Tasorentsi oaneaquempiri.
¿Opomerentsitimotarimpa meeca impaquempi poyeari aisati piitsaare?
²⁴Pinquenqueshireteri jaoca icantiri tsimerepee: te impanquitanonteaji aisati te inquemoyeanonteaji iroyeari pancotsiqui, iro cantaincha ipapinitiri Tasorentsi yoari. Pamene, iquemoyeaventajeitiri Tasorentsi tsimeripee iriori, tempa aisati avirori iquemoyeaventasanojeitimpi. ²⁵¿Paita patsipetashitantarori picantashireti? ¿Pijitimpaa ariorica pincantashirete aiqero pijatatiye pantearitasanotanaque? ²⁶Pineaquero, patsipetashitacaro picantashireti. Tecatsi paye. ²⁷Pinquenqueshireteri jaoca ocantari oteaquipee tojari. Te ontsameetanonteaji, aisati te ontijanonteaji oitsaare, iro cantaincha ocameetsasasanoaque. Peerani oshequi yoaneencani Saromoni, iro cantaincha te inquempetearoji oteaquipee: ocameetsasasanoaque irointi. ²⁸Pineaquero, yoaneencaquero Tasorentsi oteaquipee. Otimaveta, impoi oshintsiti oshimpetanaji. Peerani pintime avirojei: tempa pijiti iquenqueshiretaquempi avirori. ¿Paitasa pitseencantacarriri? ²⁹Eiro piquenqueshiretirotsi paitarica poyeari, aisati paitarica pireri: inquemacayempi Tasorentsi. ³⁰Tempa icoajeitaque atiri iroapinijeitea. Iro cantaincha iotaque Tasorentsi maaroni coiteimotaquempiri. ³¹Ariorica pimpinca-tsasasanoteri, impaquempi maaroni coiteimotaquempiri. ³²Noamere, oshequi inintaquempi Apa Tasorentsi: icoasanoaque impincatsariventajeitimpi, incavintaasanojeitimpi. ³³Pimpimantero

pashiyetari, pimpayeteri ashinoncaincari ovinaro. Impoiji impinatempi Tasorentsi anta inquitequi. Ontimasanote pivaararo anta: eiro opatsaajitsi, eiro opitsititsi, eiro icoshiyeetajimpitsi, eiro yapeajirotsi cajiro. ³⁴Ariorica otimi pivaararo aca quipatsiqui, oshequi piquenqueshiretaquero timayetatsiri quipatsiqui. Ariorica otimi pivaararo inquitequi, ari piquenqueshiretapinitiri Tasorentsi.

Icantiri Jesoshi: “Pivetsicajeitea, te pioteji jaoca oncarate impocashijeitempi Tasorentsi”.

(Mt. 24.45-51; 25.1-13; Mr. 13.33-35)

^{35,36}Jeroa icantaqueriri Jesoshi iroamere:

—Paamaajeiteari pivincatsarite, pivetsicasanojeitea. Pinquempeteari yora inampire ashitarori ivanco. Ijataque yora ashitarori irineeri ishaninca irayero ijina. Yaamaajeitari inampire anta ivancoqui. Ariorica irareetapaaje incoapaaje irashitareavajeneri, aisati incoapaaje irineapaajero ovetsicayetaca ivanco. Ariorica ontsitenitanaje, icoaque ontsiotea ivanco. Aisati icoaque intinaye inampirepee, inquitsaajeitea. ³⁷Ariorica irineapaajeri yovetsicajeitaca, inquimoshirejeitaca maaroni. Yora ashitarori ivanco irisavicacajeitiri maaroni inampirepee, iroacajeiteari. ³⁸Iro cantaincha te iriojeiteji jaocarica oncarate impocantajeiri: ariorica iroaquera imajeitei, ariorica nianquuite. Iro cantaincha ariorica irineapaajeri inampire yovetsicajeitaca, ari inquimoshirejeitanaque, maaroni. ³⁹Piojeitavaquero oca noncamantempiri: arioricame pioteme impoque tsiteniriqui coshitantatsiri, tempa pisaquitime poimpiantavajearimeri, eiro pishinetirime incoshitempime. Iro cantaincha te pioteji jaocarica oncarate impocanteari. ⁴⁰Aisati noquempevetari coshinti, te noncamantempiji jaocarica oncarate nompocantajeiri. Peerani noponeaca inquitequi, natiritapaaque.

Coajica nompiaje. Pinquenqueshirejeitena, paamaajeitajena: nomapocapaimpicari.

⁴¹Ari isampitiri Petero:

—Novincatsarite, çapanirompa poamejeitena naroripee? Irompa tericampa, çpicoaquempa iriojeitanaque maaroni atiri?⁴²Yacanaqueri:

—Noquenquetsatacaajeitiri maaroni quearioventirori nocoacaajeitiriri. Iquempetaca ivatorote atiripee, icoacaaqueri aparoni iratirite iroacaapiniteari itsipapee. Impoiji ijataque ivatorote jaocarica. ⁴³Ariorica iroacaapiniteari cameetsa, ariorica impocaje ivatorote, iroveshirementapaajeri. ⁴⁴Incantapaa-geri: “Cameetsa piquemisantaquena. Meeca aviro amenaajeitenarone maaroni timimojeitanari”. ⁴⁵Iro cantaincha, incanterica yora iratirite: “Eirotsita ipoqui novatorote”. Icoacaavetari ivatorote incavintsayerime itsipapee, iro cantaincha imapocaqueri iquisajeitaqueri, ipasajeitaqueri: shirampari, tsinane, maaroni. Oshequi iperataca, oshequi ishinquitaca. ⁴⁶Ari pashini quitaiteri impocaje ivatorote, irimapocapaajeri. Iroasanquetapaaqueri, inquempetacaanteri itsipapee caari quemisantiri. ⁴⁷Pineaquero, iovetacaro icoacaavetacariri ivatorote, iro cantaincha te incoyeji irimatero. Irootaque impasatacantante- riri, aiqero catsini impasatacantasano-teri. ⁴⁸Iro cantaincha eiyoasanquetasano- tiriti caari iotatsi. Eiro icoacotasano- tiriti oshequi yora caari iotatsi. Irintiquea iotasanoatsiri, incoacotasano-teri irinti.

Icantiri Jesoshi iroamere: “Coajica oshequi inquisavacaimentajeitena atiripee”.

(Mt. 10.34-36)

⁴⁹Aisati icanti Jesoshi:

—Nopocaque quipatsiquica inquisavacai- mentantenari atiripee, nocoasano- taque nomamajeitero maaroni nopocashitiri.

⁵⁰Oshequi noquenqueshireaca: irotaintsi

oshequi nonquematsicatearo. ⁵¹çPijitashijeive- tampa nopocashijeitiri atiri noimajerentajei- teri, cameetsa iraacameetsatavacanteari? Teve, irointi inquisavacaimentajeitena. ⁵²Ariorica incarate apapacoroni savicatsineri pancotsiqui, inquisavacaajeitea. Incarate mava quisherineri yora apite ishaninca. ⁵³Ariorica yora ashtariri inquisheri itomi, aisati itomi iquisheri iriri. Ariorica onquishero airo evatayero, onquishero iroori airo.

Pinquenqueshiretea piotanteari iroametempiro Tasorentsi.

(Mt. 16.1-4; Mr. 8.11-13)

⁵⁴Impoiji icantajeitiri apatotimentajeitariri:

—Ariorica pineaquero antearo tampea amaquero mencori otsitenishaanaque, picantajeiti: “Coraqueve incani”. Tempa piojeitaque ompoquerica incani. ⁵⁵Ariorica oquitamaroitetanaji, picantajeiti: “Eiro oparii incani, ari osarianaje”. Tempa aisati piojeiti, ⁵⁶irointi pimanaquero piojeitiri. Piojeitaque ompariaquerica incani. Iro cantaincha te pincoajeiteji piojeite oshequi ompomentsiti- mojeitempi coajica. ⁵⁷çPaita caari picoanta piojeitero queariosanotsiri? ⁵⁸Ariorica inquishmentempiri pishaninca quirequi piveviteriri, incoaquericaraanajempi joeshiqui. Ari tequeratsitarica irareetacayempi, picantanaqueri: “Eiro piquisanatsi, coajica nompinatajempi”. Yoiminqeimpicari caravosoqui. ⁵⁹Ariorica iroiminqeayempi, incoacotasano-tempi maaroni quirequi pivevitiriri. Eirorica pipiriti, eiyoimisoquija- jimpitsi.

Icantiri Jesoshi atiri:

“Pinquenqueshireajeitea, pojocajero caari cameetsatsi pantapinijeitiri”.

13 ¹Impoiji ipoqui pashini atiri, icamantapaaqueri Jesoshi:

—Ijajevetaca carireasatipee anta Jerosarequi iroajeitenerime Tasorentsi ivira. Jeriniro yora Piratoniro yoacantaniojeita- queri carireasatipee anta ivancoqui Tasoren-

tsi. Oconojatacaro irirajani ashanincani irirajani ivira yoajeitiniriri Tasorentsi.

²Yacanaqueri Jesoshi:

—¿Pijitirimpa yora carireasati antasano-jeitironiri caari cameetsatatsi ishinetantariri Tasorentsi yoacantaqueri Pirato?

³Noncamantempi: te iro incamantea. Iro cantaincha queariompiyea: eirorica

piquenqueshiretajatsi, aisati eirorica pojocajirotsi caari cameetsatatsi pantapinitiri, pinquempejeiteari yora yoyeetiri. Yoajeitimpicari, maaroni. ⁴Aisati peerani otireanaji antearo mapipanco anta

Shiroequi, otsinacapaqueri 18 shirampari, icamajeitaque. ¿Paita icamajeitantacari? ¿Iriompa antasanoitirori caari cameetsatatsi icamantacari? Te. Iquempjeitacari maaroni ishiramparirinte. ⁵Pinquenqueshireajeitea avirori, pojocajero caari cameetsatatsi pantapinijeitiri. Eirorica piquenqueshirejeitatsi, aisati pincamajeite avirorijeit.

⁶Impoiji ishiacaventajeitini oca:

—Ipanquitaquero shirampari iyera anta irovamashitequi. Ocarataque peerani oshioaque, impoiji yamenapinivetaro oitsoqui, irayerome: iro cantaincha te oitsoquiteji. ⁷Impoiji aisati icantiri yora tsameetiniriri iipatsite: “Pamene, ocarataque mava osarintsi nopocapiniveta nayerome oitsoquipee. Te ontimeji catsini. Atsipetashitaca otimi. Pimpesajero nompanquitantearori paitapeerica cameetsatatsiri”. ⁸Yacanaqueri tsameetiniriri ivatorote: “Ari onavaquetsita meeca osarintsiquica. Nonquiyetero quipatsi ometsoitetanteari, aisati noapinitenero itia pivira, cameetsa ontimanteari oitsoqui.

⁹Impoiji ariorica ontimanaque oitsoqui pashini osarintsi, tempa cameetsa, eiro apeshirotsi. Iro cantaincha eirorica otimitsi oitsoqui, nompesajero”.

**Yoavisacotiro saavaroqui Jesoshi
yatajeaonquiri camaari.**

¹⁰Pashiniqui saavaro yoametanti Jesoshi anta yapatotapinijeitanta joriopee. ¹¹Otimi

anta pancotsiqui aparoni tsinane yatajeaonquiri peerani camaari. Ocarataque meeca 18 osarintsi omitiaque, irosati ocanta omitiaque: tecatsi oncantajea oncatiaje.

¹²Ineantacarori Jesoshi, icajemaquero:

—Caatanaque, meeca noavisacotajempi.

¹³Ipamitaquero, irosati avisacotantanaja.

Cameetsatanaji, ocatianaja. Ocatanaque: —Yoavisacotajana Tasorentsi, tempa icameetsati.

¹⁴Yora jivatacantantatsiri anta ivancoqui Tasorentsi iquisaqueri Jesoshi. Icantajeitiri apatojeitainchari:

—Ocameetsati antaveejeite 6 quitaiteri, iro cantaincha ariorica omoncaratapaaquea quitaiteri 7 ocameetsati amaoreasanojeitanaque. Eiro antaveetitsi catsini. Ariorica picoaque pavisacojeitaje, pimpoque pashiniqui quitaiteri, eiroquea pipoquitsi saavaroqui.

¹⁵Ipiatanacari Avincatsarite, icantanaqueri:

—Oshequi pamatavinirotanti. Pantaveejeiti avirori saavaroqui. Pamene, ariorica airi pivacate imire saavaroqui, tempa pitsatacoreiri paantanacariri anta otiminta nija. Aisati piquempetiri pimorane, maaroni. Queario, picavintsajeitiri pivirapee saavaroqui. ¹⁶Iro cantaincha caari oni pivira oca tsinane, irointi pishaninca. Peerani omantsiataque: tempa ocameetsataque ancavintsayero saavaroqui.

¹⁷Iquemantarori oca, ipashiventajeitanaca maaroni quisajeitaqueriri Jesoshi. Irinti itsipapee atiri iveshireimentajeitacari Jesoshi, icantajeiti:

—Ocameetsajeitaque yantayetiri Jesoshi.

**Icamantiri Jesoshi iroamere paita
oshiacaventiri moshitasa aisati
tapiacairori tanta.**

(Mt. 13.31-34; Mr. 4.30-32)

¹⁸Impoiji icanti Jesoshi:

—¿Piojeitimpa jaoca icanta Tasorentsi ipincatsariventanti? ¿Jaoca noncanterori

noshiacaaventantempirori? ¹⁹Oshiaquero oitsoqui moshitasa ipanquitiri shirampari iroanequi. Oshiocanaque, oquimotanaque, oshiavetacaró inchato. Ipcapiniti tsimeri, yaatapinitiro ojempequi.

²⁰Yapiitajiro, icanti:

—¿Jaoca noncancerori noshiacaaventantempirori? ²¹Oquempetacaró tsinane, airo tapiacairori tanta capichaji. Oconoiro oshequi tiricopane otapiantancari. Otapiaquero maaroni, ometotantancari. Aisati iquempetaca ashaninca. Intimerica aparoni antirori caari cameetsatatsi, irantacaajeiteri ishaninca, maaroni.

Icantiri Jesoshi ishaninca:

**“Pimpomerentsiventearo
pareetanteari inquitequi”.**

(Mt. 7.13-14, 21-23)

²²Ari iquenaquenayeti Jesoshi nampitsipeequi, yoametantayeti. Icoaque irijate Jerosarequi. ²³Isampiyetiri:

—¿Jaoca incarajeiteri oavisacojeitajanchane? ¿Arimpa incarate aparopee?

Yacanaqueri:

²⁴—Noshiacantempiro. Oquempetaca orijaniqui omorojaniqui anqueanteari inquitequi. Intime oshequi coavetachane irijateme inquitequi, iro cantaincha eiro imatirotsi iraretearo. Pimpomerentsiventearo pareetanteari inquitequi. ²⁵Aisati oquempetacaró yantiri ashitarori ivanco. Itimi tsoompoina iriori, yashitacotaca, iyavitiro ashitacorontsi. Impoiji pimpochejeivetea avirorije, pincantavetapaaqueari: “Novincatsarite, pashitareenaro, nonqueanaque”. Iro cantaincha incantavaquemp: “Te niojeitempiji jaocrica piponeari”. ²⁶Impoiji pincantajeiveteari: “Peerani aitaque pitsipajeitaquena nonampiqui avajeitaca, aisati poamejeitaquena”. ²⁷Ari incantempi: “Te niotempiji. Pijataje, pimpianaje. Oshequi pantayetiro caari cameetsatatsi. Te pincameetsateji”.

²⁸Impoiji oshequi poashiretasanotanaquea catsini, piraasanotanaquea aisati. Pineaqueri Avarama, Isaca, Jacovo, maaroni yora quenquetsatcantatsiniri itimi jenoqui, iro cantaincha avirojei, eiro pimajeitrotsi pijate: iroimpiavajempi Tasorentsi. ²⁹Imponeajeitaquea quemisantatsiri intatiquero, acaqueroca, catonco, quirinca, maaroni quipatsipeequi. Irisavicajeitapaaque anta ipincatsarintinta Tasorentsi. ³⁰Irareetasanotaquea yora pitseencajeitaqueri. Eiro yareetatsi irinti pipincatsajeitiri.

Yora Eroreshi iramataviterime Jesoshi.

(Mt. 23.37-39)

³¹Irosati ipocantaca aparopee variseo. Icantapaaqueri Jesoshi:

—Pijate pashiniqui quipatsi. Icoaque Eroreshi iroacantempi.

³²Yacanaqueri:

—Pincamantanirotaiteri yora amatavitantatsiri: “Icanti Jesoshi: ‘Eiro noshiatsi. Noncanteani noavisacojeiteri neiriri camaari aisati mantsiaripee: meeca, osaitequera, aisati otsipa quitaiteri. Impoiji nomoncarataquero maaroni’”. Irootaque pincanteri. ³³Aitaque nonqueanaquenayete meeca, osaitequera, aisati otsipanicu quitaiteri. Aisati ocameetsati noncame Jerosarequi: tempa anta icamapiniti quenquetsatapinitirori irineane Tasorentsi.

Icanti Jesoshi:

“Iroashinoncaajeitea jerosaresati”.

³⁴Aisati icantiri Jesoshi:

—Yora jerosaresati oshequi yoayetaqueri quenquetsatirori irineane Tasorentsi. Ipichaapinitaqueri itiancane Tasorentsi. Oquempetaca teapa osaramonquitiri orijanipee, oshequi nocoaveta nampatojeiterime jerosaresati: nonquemisantacayerime, iro cantaincha te incoajeiteji.

³⁵Pamene, tecatsi amitacoterineri meeca,

yojocajeitiri Tasorentsi, icantiri: “Incanteata”. Eiro ineapinitajanatsi meeca. Jaocarica intimeri pincatsateneri, ari irineajena aisati.

**Yoavisacotiri saavaroqui
Jesoshi eereyetsiri.**

14 ¹Pashiniqui saavaro itimi Jesoshi anta ivancoqui jivatacaajeitiriri variseo. Yamenasanojeitiri Jesoshi, icoaque irantero paitarica inquishimenteariri. ²Itimi anta aparoni mantsiari, yeereyetaaque, yennoncayetaaque maaroni. ³Isampitiri Jesoshi variseopee: —¿Ocameetsatimpa avavisacoteri mantsiaripee quitaiterica amaoreajeitan-tari?

⁴Iro cantaincha imajerejeitanaque, te irancaniroteji. Ari yacatsavacotaqueri Jesoshi mantsiari, yoavisacotiri, impoiji itiancajiri ivancoqui. ⁵Ari icantaqueri yora amenashejeitaqueriri:

—Tempa pantavejeiti avirojei saavaroqui. Ariorica impariaque pivacate omoroqui, tempa ari paavajeri aisati.

⁶Aisati, imajerenirojeitanaque.

**Yoamejeitiri Jesoshi atiri: “Eiro
pishemejeititsi”.**

⁷Impoiji yamenajeitaqueri Jesoshi yora oajeitainchari yoacaajeitacari yora jivatacaajeitiriri. Icoajeiveta irisaviqueme quempeji yora pincatsari irineacameetsatantearimeri. Ari icantajeitaqueri Jesoshi:

⁸—Ariorica iroacayempi pishaninca, eiro pisavicashitatsi quempeji yora pincatsaritatsiri. Pamene, ipoquicari pashini ivincatsaririnte, ⁹impoiji ipoquicari yora cajemacantimpiri, icantimpicari: “Eiro pisaviquimotiritsi pincatsarica. Irisaviqueta aca irinti ivincatsaririnte”. Isavicacaimpicari anta nijantiaji, impoiji pimpashiventanaquea.

¹⁰Irointiquea ocameetsati pisavicapaaque anta nijantiaji. Impoiji ariorica

irineajempi yora cajemacantimpiri, incantempi: “Caatanaque, noshaninca, pisaviquimoteri aca pincatsari”. Irineajeitempi maaroni oajeitainchari ishanincataquempi pincatsari. ¹¹Ariorica pincoaque irineapincatsajeitempi itsipapee, pishemeticari; impoiji ipashiventacaimpicari Tasorentsi: tecatsi neapincatsatempineri. Iro cantaincha yora caari shemetatsi incarajeiteri Tasorentsi impicatsariventante.

**Jesoshi iquenquetsacotiri
cajemacantavetariri ishaninca
iroacaajeitearime.**

(Mt. 22.2-14)

¹²Aisati icantiri Jesoshi yora cajemacantiriri:

—Ariorica pincajemacanteri atiri poacantajeiteariri, eiro picajemapinijeitiritsi pishanincasanori aisati yora ashitaarantincari. Ariorica poacaaqueari, ari iriori impiatempi, iroacaajempi. ¹³Iro cantaincha ocameetsatasanoti pincajemacanteri irinti yora caari ashitaarantayetcha, yora choriyetatsiri, jempayetatsiri, caari amenayetatsi, maaroni. ¹⁴Tecatsi incantajeitea irinti impiajeitajempi iroacaajeitempi. Iro cantaincha coajica irointinaajeitajeri Tasorentsi maaroni quemisantajeitiriri. Impoiji impinatempi irinti. Te pantsipetashiteaji picavintsanti.

¹⁵Iquemantacariri aparoni oainchari, icanti:

—Tempa oncameetsatasanoaque antime anta ipincatsaritinta Tasorentsi.

¹⁶Icantaqueri Jesoshi:

—Oquempetaca aparoni shirampari. Yovetsicacantaquero oshequi yoari, impoiji icajemacantaqueri ishaninca iriori iroyea. ¹⁷Ovetsicajeitaca maaroni. Itiancaqueri inampire: “Pijate, pincamantaiteri: ‘Moncaratata, vetsicajeitaca maaroni, pimpoque meeca’”. ¹⁸Iro cantaincha te incoajeiteji irijajeite. Icanti

aparoni: “Iroaquera namanantaquero noipatsite. Nojate meeca namenaiterota, ocameetsataquerica. Pincamantajeri: ‘Eiro ipoquitsi’”.¹⁹Icanti pashini icajemacantiri: “Iroaquera namanantaquero 10 vaca. Nocoaque namenaiteri icameetsataquerica. Pincamantapaajeri: ‘Eiro ipoquitsi iroyea’”.²⁰Icantiri pashini: “Iroaquera naaque nojina. Tecatsi noncantea nojate”.²¹Ari ipianaja yora inampire camantavetariri ishaninca. Icamantapaajiri: “Icanta-jeiti: ‘Eiro nojatitsi noyeya’”. Ari iquisanaca yora ivatorote, icantiri inampire: “Incanteata noshaninca. Meeca pijate anta nampitsiqui, pinquenayetanaque pincoacoayeteri yora caari ashitaarantayetachane, choriyetatsiri, jempayetatsiri, caari amenayetatsi, maaroni”. Ari ijataque, icajemajeitaquero, ipocajeitaque.²²Ari ipiajaro aisati, icantapaajiri ivatorote: “Nojaiti, nocamantajeitaquero. Ipocajeitaque, iro cantaincha tequerata omoncarateaji”.²³Ari icantiri aisati: “Ari pijate anta aisati, pinquenayetanaque avotsipeequi, pincantajeiteri itsipapee impoque, nocoaque irijaasanojeitapeemparo novanco.”²⁴Irinti yora noshaninca nojivavetacari nocajemacantavetacari, eiro catsini yoimatarotsi oca novetsicavetanariri”.

Irootaque iquenquetsatacaajetitiriri Jesoshi anta ivancoqui variseo.

Icanti Jesoshi:

“Pimpomerentsiventasanotenaro nocoacaajeitaquempiri”.

(Mt. 5.13; 10.37-39; Mr. 9.50)

²⁵Ari iquenanaque Jesoshi avotsiqui aisati, yojajeitanaquero oshequi atiri. Ipitsochshijeitanacari, icantajeitiri:

²⁶—Niotaque pinintajeitiri piripee, piniropee, pijinapee, pitomipee, pirementee, pitsiropee, maaroni. Aisati avisati nintajeitacha avirori. Iro cantaincha pincoajeiterica pojajeitena,

ocametsati nainti pinintasanojeitena catsini. Eirorica pinintasanotanatsi, tecatsi pincantea pimpeajea noamere.

²⁷Aisati eirorica pipomerentsiventasanotanarotsi nocoacaajeitaquempiri, aisati eirorica pojatasananotanatsi, tecatsi pincantea pimpeajea noamere. Pinqueshirejeitea jaocarica oncanteari.

²⁸Oquempetaca ariorica icoaque irantacantero shirampari ivanco, irijivateque irisampiteri yora vetsiquenerine jaoca oncarate ompinatea. Impoiji irimoncarateri iirequite iriotanteari moncaratacarica.²⁹Eirorica ijivati iriote irimoncaratearica, icomitarocari. Ariorica irimoncaratearo ominca, ari ocaratari. Impoiji tecatsi pashini iranteneri yora vetsicavetanariri. Impoiji irishrontimenteari ishaninca.³⁰Incantajeite:

“Pineaquero, irovetasicantherome pancotsi, iro cantaincha te intsoncanceroji. Te intimeji iirequite, iji, iji, iji”.

³¹Aisati yora pincatsari, ariorica inquemacoteri itsipapee atiri itiancaquero 20,000 soraro inquisanteariri. Ariorica intime isorarote pincatsari 10,000. Te irioteji ocameetsatirica irimanatavaquero yora pocatsineri. Tempa irijivate incajemajeiteri ishanincepee iroametatavacanteari: impoiji iriote ocameetsatirica irimanatea iroimpianteariri yora pocashiterineri.³²Ariorica incantajeite ishaninca: “Yanaacojeitaquee, ishequitasanotaque. Tecatsi ancantea aimpiavajeri”. Ari incanteri: “Tequera irareejeitea, tsame antianquero aparopee ashaninca irisampiteri paitarica incoacojeitaqueeri eiroquea imanatanapeetsi”.³³Aisati pinquempetea avirorije: ariorica pincoaque pojatena, pijivate pinqueshirete jaoca ocantajeitari maaroni timimojeitimpiri. Piotasanojeitero: impoiji pojocajeitajero, pojatasanojeitanaquena.^{34,35}Nocoaque yora quemisantinari iroameteri itsipapee atiri intime cameetsa, irompa eirorica

yoametiritsi, te irimateroji nocoacaaveta-cariri, yatsipetashitaca itimi. Iquempetacaró tivi caari poteatatsine: tempa ajocajero. Pinquenqueshiretasanótero oca nocantajeitaquempiri piotasannotantea-rori.

Irootaque icantajeitaqueriri Jesoshi oijajeitiriri.

**Iquenquetsatacotiri Jesoshi
yora ovisha peachari.**
(Mt. 18.10-14; Joa 10.1-18)

15 ¹Itimi anta oshequi jorio aitiriri iirequite ishaninca impanteariri yora oromasati, aisati icoshitaqueri ishaninca. Iro cantaincha yamejeitaca iriori yapatotimentapinitari Jesoshi, icarajeitaqueri itsipapee antapinitirori caari cameetsatsi. Iquemisantapinijeita-queri Jesoshi iquenquetsati. ²Ari icantajeiti yora variseopee aisati yora oametantirori Sanquenarentsi:

—Te oncameetsateji oca yantapinitiri Jesoshi: icarajeitapinitiri caari cameetsa-yetatsi, itsipajeitacari yoajeita.

³Impoji, jero oca ishiacantiriri Jesoshi:

⁴—Aamaaca intimerica povishate 100. Impeaquearica aparoni, tempa ari poanaqueri yora 99 anta qeshiiqui, impoji pijatanaque anta caaraiteriqui, pincoacoanteariri peainchari. Pincoacoa-yetajeri irosati pineantajeariri. ⁵Ariorica pineapaajeri, tempa oshequi pinquimo-shireventajeari. Tempa pinquijajeri, paanajeri, poajateri anta itimajeitinta ishaninca. ⁶Aisati, ariorica pareetea pinampiqui, tempa pincajemajeiteri pishaninca, pincantajeiteri: “Tsame anquimoshirejeite: ipeavetaca novishate, naajiri aisati”. ⁷Aisati iquempetata-soren-tsi. Ariorica inquenqueshiretajea aparoni antirori caari cameetsatsi irojocantea-rori, incanteri maaroni savicajeitatsiri inquitequi: “Tsame anquimoshireventajei-

teri”. Te irio incantacote yora itsipapee cameetsajeitatsiri.

**Iquenquetsatacotiri Jesoshi
quirequi peachari.**

⁸Jero pashini icantiriri Jesoshi:

—Pashini aisati noshicaventempro: otimi tsinane oirequite, icarati iitsoqui 10. Ariorica impeaquea aparoni, oncoacoayetajeri. Ariorica ontsitenitana-que, ontsiotoero otsiomento, oneanteariri, aisati ompishitasanótero pancotsi amenayetajeri otijaqueririca quipatsi. Ari oncoacoayetajeri irosati oneantajeariri. ⁹Ariorica oneajeri, oncajemeri oshaninca-jei, incanteri: “Tsame pintsipajeitena, anquimoshirejeitanaque. Noneajiri aisati noirequite peavetainchari”. ¹⁰Aisati noncamantajeitempi: aisati iquempetaca Tasorensi. Ariorica inquenqueshiretajea aparoni antirori caari cameetsatsi irojocantajarori yantayetiri, inquimoshi-retanaque Tasorensi, irineajeiteri inampirepee.

**Iquenquetsatacotiri Jesoshi
evancari jatapitsavetariri iriri.**

¹¹Pashini aisati ishiacantiriri Jesoshi:

—Itimi shirampari itomi apite. ¹²Yora impoitatsiri itimi icantiri iriri: “Apa, nocoaque pishinetenaro nayerota maaroni novaararo aisati maaroni noirequite. Pimpenaro meeca maaroni”. Ari ipajeitaqueri. ¹³Pashini quitaiteri yapatojeitaquero irovaararo, maaroni. Ijataque arejiqui, pashiniqui nampitsi, yaanaquero maaroni timimojeitiriri. Anta te irisavique cameetsa, irootaque yaparantacarori maaroni irovaararo aisati iirequite. ¹⁴Ari tecatsi timimotaje-rine, aisati te ontimasanoteji iroajeiteari atiri. Oshequi yashinoncaaca evancari, iquemasanotaquero itashe. ¹⁵Impoji iquenaquenayetanaque iramenayeri tsameetacayerineri. Inepaaqueri aparoni

ashitariri ichanchote, icantapaaqueri: “¿Picoaquempa nontsameetempi?”
 Icantiri: “Je, nocoaque pamenenari nochanchote”.¹⁶ Ari yamenavetacanari ichanchote, ipapinitiri yoari: ora shiavetarori otaqui intsipa. Iro cantaincha tecatsi oacayearine yora evancari, icoavetanaca iroacotearime yoari chancho.¹⁷ Impoiji iquenqueshiretanaja: “Icarajeitaque iratirite apa oshequi. Timatsi yoajeitari maaroni, iquemapini-jeitaca, timatsi timaaranapaintsiri aisati. Naintiquea, aasanotaquena notashe.¹⁸ Meeca nompianaje anta apaqui, noncantapaajeri: ‘Apa, te nonquemisan-tempiji, aisati te nonquemisanteriji Tasorentsi. Ainiro nantane oshequi.¹⁹ Eiro meeca pitomintajanatsi, ainti pinampitajena. Nontsameetempiro piipatsite”.²⁰ Impoiji ipianaja, iquenana-ji avotsiqui. Icaantanaja, irotapaa- jantsi ivanco iriri. Ari iniitavajari iriri anta paricoti, iquenapaaji. Oshequi iquimoshi- retanaque, icavintsasaanotavajiri. Ishiashitavajari iquempejitavajari, yavitsanotavajiri, inintavorotavajiri.²¹ Ari icantapaaqueri itomi: “Apa, te nonquemi- santeriji Tasorentsi, aisati te nonquemi- santempiji avirori. Ainiro nantaneve. Te oncameetsateji pintomintajena”.²² Iro cantaincha icajemiri iriri inampirepee, icantajeitiri: “Pishintsijeite, paitero quitsaarentsi cameetsari, pinquitsaateri notomi. Aisati paiteneri aniyo, pisateva- coteneri iracotsapaquiqui. Paiteneri aisati sapato, irisapatotapaa-jeari.²³ Aisati paiteneri vacajaniqui, timasanotatsiri ireji, poyeneri. Tsame maaroni anquimo- shireventavajeri notomi, avacaajeitava- jeari, maaroni.²⁴ Nojivetaca eiro noneaji- ritsi, oquempetimotoquena icamaque. Iro cantaincha meeca oquempetaca yaneanaji aisati, meeca noneajiri. Ipeavetaca, meeca ipocaji, aneajeitajiri aisati”. Ari iquimoshirejeitanaque,

yoacaajeitajari.²⁵ Ari itsameeti itomi pashini anta oantsiqui: te irineavajeriji irirenti. Impoiji yareetapaaja iriori, iquempejitapaaji iquemapaaquero moshica, aisati ivairajeitaque.²⁶ Icajema- paaqueri aparoni nampirentsi, isampitiri: “¿Paita pivairajeitantari?”²⁷ Yacanaqueri: “Areetapaaja pirenti. Yoacantaqueri piri vacajaniqui, yoacaajeitacari maaroni. Oshequi iquimoshireventavajiri pirenti ipocaji, cameetsa yareetaja, tecatsi oyerine”.²⁸ Irosati iquisantanaca irirenti, te incoyeji inqueapaaje pancotsiqui. Isoquijanaque iriri, icantavetavajari: “Caate, notiomi, pinqueapee. Piveshirei- mentavajeri pirenti”.²⁹ Iro cantaincha yacanaqueri: “Peerani nantaveetaquem- piro paitapeerica picantaquenari, te nompiatsatimatempiji. Iro cantaincha tecatsi pimpena nainti catsini noacayeari- meri noshanincapee. Te pimpenariji chivo, tecatsi catsini.³⁰ Jeri iyeniro, ijatanaque arejiqui itsonquitaquempiri piirequite: ipinajeitaquero tsinanapee ineavintsajeitaquero. Meeca ipianirotaja, ari poaqueneri cameetsari vaca”.³¹ Ari icantiri: “Notiomi, acantani quiso avavacaaca. Avirotaque ashitearoneri maaroni vaaranontsi oca avancoquinirica.³² Iro cantaincha ocameetsati aveshirei- menteari pirenti. Oquempvetaca icamaque, ajiivevetaca eiro aneajiritsi aisati. Meeca oquempetaca yaneanaji aisati, aneajeitajiri. Ipeavetaca, meeca aneajeitajiri aisati. Tsame aveshireimen- tajeiteari”.

**Iquenquetsacotaqueri Jesoshi
amatavitiriri ivatorote.**

16¹ Aisati icantiri Jesoshi iroamere: —Itimi ashitaarantincari quem- poyeajiniriri iirequite, maaroni. Impoiji icanteetiri: “Icoshitaquempi yora quempoyeavetimpiriri piirequite”.² Impoiji icajemaqueri, isampitiri: “¿Paita

ojita oca icanteetaquenari? ¿Paita picoshinirotantanari? Meeca poimpiajenari maaroni noirequite, pisanquenate-naro ivajiropee maaroni irevitanari. Meeca eiro noshinetajimpiritsi aisati noirequite”. ³Ari iquenqueshiretanaca iriori: “Eiro meeca ishinetajanatsi novatorote nonquempoyeajeneri iirequite. ¿Paita nanteri meeca? Te noshintsiteji nontsameetanteari. Aisati nopashiventaca noncanterime atiri impashitename quirequi. ⁴Ja, je niotaque meeca. Noncavintsaajeiteri maaroni irevijeitiriri novatorote. Impoiji, iraacameetsajeitena anta ivancoqui: eiro ishinetantana nashinoncaaveeta”. ⁵Ari icajemajeitaqueri maaroni irevijeitiriri ivatorote. Isampitiri yora jivatatsiri yareetapaaja: “¿Jaoca icaratiri pirevitiriri novatorote?” ⁶Yacanaqueri: “Nirevitiriri oshequi oja orivo. Ocarati nirevitiriri jaachari virojaniqui 100”. Icanti: “Je, queario. Jeroca paperi osanquenataca pirevitiriri. Payero paperica, pisanquenate-neri otsipa, pincante: ‘Nirevitimpi 50 virojaniqui jachari oja orivo’. Amatavite-rita novatorote”. Icantiri: “Je, ari”. ⁷Ari ijataque jivatatsiri, ipocaque itsipa. Isampitiri: “¿Jaoca ocaratiri pirevitiriri novatorote?” Yacanaqueri: “Oshequi nirevitiriri tirico, ocaratiri jainchari coshitariqui 100”. Ari icantiri: “Jeroca paperica pisanquenatiniri peerani novatorote. Queario, ocaratiri pirevitiriri 100. Tsame amatavite-rita. Payero oca paperica, pojocajero; pisanquenateneri otsipa, pincanteri: ‘Nirevitimpi 80 coshitari, jainchari tirico’”. Ari isanquenataquero. ⁸Impoiji iotanaque yora ivatorote yamatavitaqueri. Icantaque: “Te oncameetsateji yamatavitaquena, iro cantaincha otimi ionirotantari irayero coiteimotacariri”. Queario yora tseencantatsiri ioniroti iomparitavacaajeita. Irintiquea yora quemisantatsiri te

iriotasantejei. ⁹Meeca noncamantajeitempi: intimerica piirequite, pincavintsaajeiteri pishaninca, pimpajeiteri coiteimotariri iriori. Eiro ipeacotarotsi. Impoiji pincamajeitanaque, pojocajeitero timimojeitimpiri, iro cantaincha iraacameetsajeitempi anta inquitequi yora picavintsaajeitaqueri. Tempa anta otimi pisavicanteari caari tsoncanetachane. ¹⁰Eirorica picoshititsi capichaji, eiro picoshititsi aisati antearoite. Iro cantaincha pincoshiterica capichaji, picoshiticari aisati antearoite. ¹¹Ariorica pincoshiyete quirequi, iriotanaque Tasorentsi te pinquenqueshireteriji iriori: impoiji eiro ishanincatimpitsi, eiro pineirotsi inampi. ¹²Ariorica pincoshiteri iirequite itsipapee, ¿paitaquea impashitantempiri Tasorentsi piirequite avirori? ¹³Tecatsi pincantea pantaveeteneri apite pivatorote. Ariorica pinintasanoteri aparoni, eiro piquempetaritsi itsipa. Piveshirementeari aparoni, irinti itsipa, eiro. Aisati ariorica pishintsiventero quirequi, eiro pimatirotsi pishintsiventero Tasorentsi.

Yora Jesoshi yoametaqueri variseopee icoacaaqueriri Tasorentsi.

¹⁴Ari iquemajeitaqueri variseopee icantaqueriri Jesoshi, irosati ishirontimentajeitancari. Icoaque irashitaaran-tea oshequi, irotaque ishirontimentantariri Jesoshi. ¹⁵Ari icantiri:

—Picoajeitaque irijijeitempi atiri picameetsajeitaque, iro cantaincha iojeitaquempi Tasorentsi. Inecameetsavetimpi atiri, iro cantaincha iotaque Tasorentsi te pincameetsajeiteji. ¹⁶Peerani ocameetsatini piquemisantroni isanquenareni Moishishini aisati yora camantantatsiniri pavisacotantajari. Iro cantaincha areetapaaca meeca Joa, yora vaotisantatsiri. Onashita meeca icoacaaajeitaquempiri Tasorentsi. Yora Joa

intanacaro icamantajeitaquempi cameetsatsiri: irotaintsi impincatsari-ventajeitempi Tasorentsi. Icoasanojeiveta atiri irineeri. ¹⁷Coajica ompeanajea quipatsi aisati inquite, iro cantaincha eiro opeatsi irointi isanquenare Moishishi: icoi Tasorentsi pincanteani pinquemisantero piotanteari cameetsa pisavique. ¹⁸Tempa ocanti: “Eiro paimentarotsi pijina”. Ariorica pojoquero pijinasanori paantea-rori otsipa tsinane, paimentearo pijina. Aisati te oncameetsateji payero tsinane joquiriri ojime.

Yora Jesoshi iquenquetsatacotiri ashitaarantincari aisati Irasaro iriori.
(Mt. 19.1-12; Mr. 10.1-12)

¹⁹Ari icantajeitiri Jesoshi:

—Itimi aparoni shirampari ashitaarantincari, oshequi iitsaare cameetsamaoatsiri, oshequi yoaneencaca. Maaroni quitaiteriqui yoacaajeitacari ishaninca yoari pinatasanotachari. ²⁰Itimi aisati ashinoncaasanotachari pajitachari Irasaro. Osoncayetanaque isompopee opatsaayetanaqueri. Ari isavicapiniveta anta iqueapinitinta ashitaarantincari ivancoqui. ²¹Oshequi yashinoncaaca, aasanotaqueri itashe. Icoaveta iroajearome yoari yoariayetaqueri ashitaarantincari quipatsiqui. Aisati yora otsitipee yatsoyetapaaqueri ivatsaaropee-qui. ²²Impoiji icamaque iriori. Ijatashita-queri inampirepee Tasorentsi, yaavajiri, impoiji yaanajiri anta itiminta Avaramani. Ocameetsaitetinta catsini. Aisati icamaque yora ashitaarantincari. ²³Oshequi yashinoncaaca meeca yora ashitaarantaveitachaniri anta Sharincaveniqui, oshequi inecatstacaro. Yamena-
naque anta osamani itiminta Avarama. Ineaqueri Avarama, jeri aisati yora Irasaro. ²⁴Icajemacotaqueri: “Apa Avarama, pineshinoncatajena. Pincanteri yora Irasaro irovinquerota iracotsapaqui

nijaqui, impoqueta aca nantsotantearori nija. Oshequi catsini yashinoncaaca aca paamariqui”. ²⁵Iro cantaincha icantaqueri Avarama: “Notiomi, pinquenqueshiretea jaoca ocantani peerani pitimaveitani quipatsiqui. Cameetsa pisaviquini catsini, irintiquea Irasaroca oshequi yashinoncaaveitani. Meeca cameetsa isavicapaaque irinti, irompa avinti oshequi pashinoncaaca. ²⁶Aisati pineaquero nijantaitetacotaquempi, tecatsi inquenashitantempiri Irasaro. Aisati avirori, tecatsi pinquenashtantenari”. ²⁷Ari icantiri: “Eirorica pimatirotsi pincavintsayena. Iro cantaincha pintianqueri Irasaro quipatsiqui: anta ivanconiqui apani. ²⁸Aneatsiquera anta iyepee, icarati apapacaroni. Nocoaque inquemisantacaapaajeri, ipoquicari aca. Pamene meeca narori, oshequi noquematsicataro catsini”. ²⁹Iro cantaincha icantiri Avarama: “Otimi isanquenare Moishishi aisati isanquenare itsipapee quenquetsatacantantsiniri. Irootaque inquemisantajeiteri irointi”. ³⁰Ari yacanaqueri: “Je, ainiro onaveta. Iro cantaincha ariorica irineajeri camaintsiri intinaanaje, aitaque inquenqueshirejeitanajea, irojocajero caari cameetsatsi yantajeitiri”. ³¹Icantiri Avarama: “Terica inquemisantero sanquenarentsi, eiro aisati iquemisantiritsi tinaajantsineri”.

Icantiri Jesoshi iroamerepee:
“Pantacairicari pishaninca caari cameetsatsi”.

(Mt. 18.6-7; Mr. 9.42)

17 ¹Icantajeitiri Jesoshi iroamere-
pee:

—Noncamantempi: incanteani intime atiri antacaajeiterineri ishaninca caari cameetsatsi. Iro cantaincha iroashinoncaajeiteri Tasorentsi yora antacairiri ishaninca caari cameetsatsi. ²Aitaque iroashinoncaasanoteri antacaajeitiriri jananequipee caari cameetsatsi.

Oncameetsateme irijivataqueme iroisoyeeterime mapiqui antearo, irovincanteetaririme. Irovinqueeterime, eiro yantacairime jananequi caari cameetsatsi. ³Queariompia, pantacairi-cari pishaninca caari cameetsatsi.

Icantiri Jesoshi: “Pincavintaapiniteri antitapinitimpirori paitapeerica”.

(Mt. 18.21-22)

Aisati icantiri:

—Ariorica pineacotaqueri pishaninca yantiro caari cameetsatsi, pinquenqueshi-retacayeari. Ariorica irojocajero yantiri, pincavintsayeri, paacameetsatajari.

⁴Ariorica inquishempi pishaninca, incoshitempi, incantimatemp, paitarica. Iro cantaincha ariorica incantemp: “Te oncameetsateji nantitaquempiri, pincavintsayena”, ari nocoaque pincavintsayeri. Ariorica oshequi irampiitajero irantitajempiro, aisati oshequi incantemp: “Pincavintsayena”. Ari nocoaque oshequi pincavintsayeri aisati, eiro piquishimentiriti.

Icantiri Jesoshi: “Ariorica pinquemisante, oshequi irimatempiro Tasorentsi paitarica pincoacoteriri”.

(Mt. 21.22; Mr. 11.22-26)

⁵Yora iroamerepee icantaqueri Avincatsarite:

—Noquemisantaveta. Nocoaque poametena nonquemisantasantantajeari.

⁶Ari yacanaqueri:

—Pinquemisanteme capichaji, pincoaquericame, pincerime Tasorentsi imponquitireajero inchatora, iroviincaitero anta incajarequi. Ari inquemisantempime, iroviincaiterome.

Icantiri Jesoshi: “Avirojei piquempejitaacari iratirite Tasorentsi”.

⁷Aisati icantajeitiri Jesoshi:

—Oquempetaca itimi shirampari iratirite. Itsameetapinitiniri aisati

yamenapinitiniri ivira. Ariorica impocaje iratirite pancotsiqui, ¿paita incantavaqueriri ivatorote? ¿Incanterimpa: “Caate, pisavicapee, poapeempa”? Eiro icantiriti. ⁸Tempa incanteri ivatorote: “Meeca povetsiquenarota noyeyari, aisati nireri. Pamaquenaro. Ariorica nonquemanaquea, ari poyea avirori, aisati pire”. ⁹Aisati eiro icantavetariti: “Ariove, pimataquenaro”; tempa yametacaro yantaveetapinitiniri ivatorote. ¹⁰Aisati avirorije, ocameetsati pimatapinijeiteneri maaroni icoacaquempiri Tasorentsi. Impoiji oncameetsate pincante: “Apatiro nomataqueneri icoacaquenari. ¿Paita noshemetanteari? Te noncoyeji noncoacoteri Tasorentsi impinatena”.

Yoavisacojeitiri Jesoshi 10 patsaajeitatsiri.

¹¹Ari yovaanaja Jesoshi, iquenayetanaque Samariaqui aisati Carireaque. Ishiretaca irareetea Jerosarequi. ¹²Ari yareetapaaca pashiniqui nampitsi, ineajeitavaqueri patsaajeitatsiri, icarajeiti 10. Icatiajeitaca aiquetiji ara. ¹³Icajemacojeitaqueri:

—Jesoshi, aviro nopicatsajeitiri, pincavintaajeitena, poavisacojeitena.

¹⁴Ari ineantacari Jesoshi, icantajeitiri:

—Pijajeite anta itiminta saserote, pinijapeemari.

Ari iquemisantajeitaqueri, ijajeitanaque. Anta nianqui avotsi yavisacojeitanaji. ¹⁵Ari iojeitaque yavisacojeitaji, iro cantaincha ipianaja aparoni anta Jesoshiqui. Antearojenca icantaque:

—Tempa icameetsataque Tasorentsi, yoavisacotaquena.

¹⁶Itiyeroashitapaacari Jesoshi, yoivotasnotashitacari, ipincatsatasantaqueri, ipasonquitasantaqueri. Iponeaca yoca shirampari Samariaqui. ¹⁷Ari icanti Jesoshi:

—Tempa icarajeiti noavisacojeitiri 10. ¿Jaoca itsipapee noavisacojeitiri?

¹⁸Ipiashitajana yoca pashinisati atiri, ipasonquitaquena, aisati inecameetsatiri Tasorentsi. Irintipee ashanincasanoripee, çpaita caari ipiantaja impasonquitante-ari Tasorentsi?

¹⁹Impoiji icantiri tiyeroashitacariri:
—Meeca pincatiae, ocameetsati pijataje. Pishiretari Tasorentsi, irootaque pavisacotantajari.

**Yoamejeitiri Jesoshi atiri jaoca icantari
Tasorentsi ipincasariventanti.**
(Mt. 24.23-28, 36-41)

²⁰Ari yora variseopee isampijeitiri Jesoshi:
—çJaoca oncarate impoque Tasorentsi
impincasariventanteaje?

Ari yacanaqueri:
—Ariorica impincasariventante
Tasorentsi, iro cantaincha eiro pineasano-
tirtsu. ²¹Eiro pimatitrotsu pincante: “Jeri
yoca”, aisati: “Jeri yonta”. Queario, eiro
iconijatasantitsi: ocameetsataque
pimpincatsashireajeitiri maaroni.

²²Aisati icantajeitiri iroamerepee:
—Tempa noponeaca inquitequi,
natiritapaaque, iro cantaincha eiro
nocantani quiso noajempi. Coajica
pincoajeivetanaquea pineajename aisati,
iro cantaincha eiro pineajanatsi. ²³Impoiji
incanteetempi: “Ipiaja Jesoshi, itimi
anta”, pashini incanteete: “Jeri yora”. Iro
caincha caarina. Eiro patsipetashitatsi
pijatashitena. ²⁴Ariorica omoncaratasano-
taquea nompocanteari, ari piotasanotava-
quena. Iquempetaca te irimaneaji itirei,
aisati iporequi; aisati nonquempetajea
narori, nompocajerica. Eiro nomanapaa-
tsi, eiro picomitavaquena. ²⁵Nojivatava-
queta nonquematsicavaquearota
oshequi, aisati intseencajeitavakenata
savicajeitatsiri. ²⁶Oquempetaca peerani
itimantacari Noeni itseencajeitaqueri
Tasorentsi, aisati inquempejeitea ariorica
nompiaje narori, intseencajeite atiri
maaroni. ²⁷Yoapinijeita peerani,

irapinijeiti, yaapinijeitiro ijinapee,
yaacaayetiro irishintopee, paitapeerica.
Icantajeitani, irosati itetantanaca Noe
ivitoqui. Impoiji opoqui antearo incani,
incajaretanaque maaroni. Icamajeitana-
que maaroni tseencajeitantsiri. ²⁸Aisati
iquempejeitacani ishaninca Oroti,
savicajeitatsiniri Soromaqui: yoapinijeita,
irapinijeiti, iquenayetanaque iyompariye-
tanaca, ipanquiyetiro yoari, yovetsica-
nontayeta ivancopee. ²⁹Iro cantaincha
ijatantanacari Oroti, itiancaquero
Tasorentsi oshequi paamari, itaajeita-
queri maaroni soromasatini. Itseencajei-
tini, irootaque ipoyereajeitancariri
Tasorentsi maaroni, poyere. ³⁰Aitaque
oncanteari ariorica nompiaje. Intime
oshequi tseencantsineri, eiro iquenque-
shiretirtsu Tasorentsi. ³¹Pamene, ariorica
omoncarataquea nompocantajeari,
pintimerica saiteriqui, eiro piqueapan-
jantitsi pancotsiqui paantapanajantearori
pivaararo. Aisati, pintimerica oantsiqui,
eiro pipiapanajantatsi nampitsiqui
paantapanajantearori pivaararo.
³²Piquempetarocari ijinani Oroti,
pipitsoquicari. ³³Picoicari poaviscotajea
avisati, impoiji pijaticari Sharincaveniqui.
Iro cantaincha ariorica pincamimentena
narori, pincantaitiyempani pisaviqui-
motena inquitequi. ³⁴Ariorica nompocaje,
intime apite maatsineri imaamentoqui.
Aparo naanajeri nontsipatanaqueari,
irinti itsipa, eiro naanajirtsu. ³⁵Ontime
apite tsinane ontsipatavacaquea
ontononquero tirico. Aparo naanajero
nontsipatanaquearo, irointi otsipa, eiro
naanajirotsu. ³⁶Intime apite shirampari
anta oantsiqui, intsipatavacayea
intsameete. Aparo naanajeri nontsipata-
naqueari, irinti itsipa, eiro naanajirtsu.

³⁷Ari iquemajeitancariri iroamere-
pee, isampitiri:
—Novincasarite, çjaocampa pinijanta-
jeari oca picantaquenari?

Yacanaqueri:

—Jaocarica anta intimeri tseencanta-
siri, yora iroashinoncayeri Tasorentsi.

**Yora Jesoshi iquenquetsacotiri yora
joeshi caari cameetsatsi.**

18¹Pashiniqui quitaiteri iquenquetsa-
tacaajeitiri aisati Jesoshi iroamere.
Icoaque iroameteri inquenquetsatacapini-
teri Tasorentsi, inquearioventajeitero, eiro
yoipacaajirotsi. ²Icantajeitiri:

—Itimini anta nampitsiqui yora joeshita-
siri, caari pincatsatiri Tasorentsi. Aisati te
irioteniji incavintsayeri ishaninceapee. ³Otimi
anta inampiqui aparani tsinane, camajimen-
taaro. Ojatashitapinivetari yora joeshi,
ocantapinivetari: “Pamitacotena, te
oncameetsateji iquisapinitana yora itsipa
shirampari”. ⁴Te incoaveteaji yoranki
iramatocotero, iro cantaincha iquenqeshire-
tanaca: “Te nompincatsateriji Tasorentsi,
aisati te noninteji noncavintsayeri itsipapee
noshaninca. ⁵Iro cantaincha oshequi
ashereaquena oca tsinane. Namitacoterota,
impoji eiro opocashitapinitajanatsi, eiro
ashereapinitajanatsi aisati”.

⁶Ari icanti Avincatsarite:

—Pamene, te incameetsateji yora joeshi
noquenquetsacotiri, iro cantaincha
yamitacotaquero oca tsinane cantapinitiriri.
⁷Irintiquea Tasorentsi, icameetsataque.

Ariorica incanteani incantapiniteri
quemisantatsiri, tempa iramatocoteri.

⁸Queariotaque oca noncamantempiri:
intispaita iramatocojeiteri Tasorentsi
maaroni quenquetsatacaajeiterineri. Iro
caincha ariorica nompiaje aca quipatsi-
quica zarimpa noneapeempi piquemisanta-
jeiti, piquenquetsatacaajeitiri Tasorentsi?

**Yora Jesoshi iquenquetsacotiri yora
variseo aisati yora apatotiniriri
oromasati quirequi.**

⁹Pashini aisati iquenquetsati Jesoshi.
Iquenquetsacotiri yora shemetatsiri,

yora tseencajeitiriri itsipapee ishaninca.
Icantiri:

¹⁰—Ijataque apite shirampari ivancoqui
Tasorentsi, inquenquetsatacayeri Tasorentsi.
Variseo ini aparo, irinti itsipa yapatotiniri
oromasati iirequite joriopee. ¹¹Ari
icatiapaaca yora variseo, icantavetapaacari:
“Tasorentsi, ariove, oshequi nocameetsata-
que nainti. Tecatsi nante, te nonquempetea-
riji yora coshitantatsiri, yora amatavitanta-
tsiri, aavioncatsiri ijina. Aisati te nonquem-
peteariji yora aitiriri noshaninca iirequite.
¹²Nametacaro maaroni tominco notitapinita
apite quitaiteri, aisati nopaarantapinietim-
piro maaroni naayetiri. Naaquerica 10,
aparani nopaquempi”. ¹³Irinti yora
apatotapinitiniriri oromasati iirequite
ishaninca, icatiapaaca irinti nijanteaji. Te
irishemeteji irinti, irointi oshequi ipashiven-
tacaacaroyantayetiri, irootaque caari
yamenanta jenoqui, irointi iposanejitaca.
Icanti: “Tasorentsi, pincavintaajena narori,
te noncameetsateji catsini, ainiro oshequi
nantane”. ¹⁴Ari noncamantempi, oshequi
onaveta irantane yora shirampari, iro
caincha icavintsairi Tasorentsi. Ariorica
impiaje ivancoqui iriotanaque inecameetsa-
tiri Tasorentsi. Irintiquea yora variseo, te
inquempeteariji. Eiro inecameetsatirisi
Tasorentsi shemetatsiri. Irinti yora caari
shemetatsi impeajeri pincatsaritajantsine.

**Icoaque Jesoshi impocashijeiteri
jananequipee.**

(*Mt. 19.13-15; Mr. 10.13-16*)

¹⁵Impoji tsinanepee amajeitiniriri
Jesoshi otomipee, ocoaque impamijeiteri
aisati incanteri Tasorentsi iramatocoteri.
Iro caincha ineantacarori iroamere,
itsaneacovetacari impocashiteri. ¹⁶Iro
caincha icajemiri Jesoshi jananequi-
pee, icantiri iroamere:

—Eiro pitsaneacotanaritsi, aitaque
nocoaque impocashijeitena. Pineajeita-
queri iriorijeji: te intseencajeitenaji,

irointi ishirejeitaquena. Maaroni quempe-
jeitacariri irineajeiteri Tasorentsi
impincatsariventajeiteri. ¹⁷Aisati,
queariotaque oca noncamantempiri:
maaroni caari quempetari jananequi
iriori, eiro ineiritsi Tasorentsi impincatsa-
riventajeiteri.

**Iquenquetsatacairi Jesoshi
ashitaarantincari.**

(Mt. 19.16-30; Mr. 10.17-31)

¹⁸Pashini quitaiteri ijatashitaqueri
Jesoshi aparoni ivincatsarite jorio.
Icantapaaqueri:

—Oametanari, oshequi picameetsati.

Pincamantena: ¿paita nanteri nojatan-
teari anta inquitequi, noncantaitatijem-
pani?

¹⁹Icantiri Jesoshi:

—¿Paita picantantanari: “Picamee-
tsati”? Itimi aparo cameetsatsiri, yora
Tasorentsi. ²⁰Piojeitiro maaroni icantiri
Tasorentsi: “Eiro paimentarotsi pijina,
eiro paimentaritsi pijime, eiro picoshiti-
tsi, eiro pitseeyacotaritsi pishaninca,
pimpincatsateri piri, aisati pimpincatsa-
tero piniro”.

²¹Yacanaqueri:

—Aitaque nocantani nomoncarataque-
roni: nevancaritapaini, irosati meeca.

²²Iquemantacarori oca, icantiri Jesoshi:

—Apanivaniji pimatero aisati: pimpiman-
tajeitero maaroni timimojeitimpiri,
pimpajeiteri ashinoncaincari ovinaro.
Ariorica pimatero oca ontime oshequi
timimojeitajempineri anta inquitequi.
Ariorica pimpimantero pivaararo,
pimpoque, pojatasananotanaquena.

²³Iquemantacarori oca, oshequi yoashire-
tanaca. Ashitaarantincari ini, te incoyeji
impimantero irovaararo, irointi yompetana-
caro. ²⁴Ineaqueri Jesoshi yoashiretanaca,
impojiji icanti:

—Opomerentsitomotacari ashitaarantin-
cari irijate anta ipincatsaritinta Tasoren-

tsi. ²⁵Tempa opomerentsitomotari cameyo
inqueero omoro quitsapi, iravisantana-
jeari. Irioquea ompomerentsitomotasano-
teari catsini irijate ashitaarantincari anta
Tasorentsiqui.

²⁶Ari isampitiri yora quemavaqueriri:

—¿Ariompa? Pomerentsitaca.

¿Janicampa meeca avisacotajantsineri?

²⁷Yacanaqueri Jesoshi:

—Oca caari imatapiniti atiri,
imataquero Tasorentsi irinti.

²⁸Ari icantiri Petero:

—Oametanari, nojocajeitaquero
maaroni noijajeitantaquemperi.

²⁹Yacanaqueri:

—Queariotaque oca noncamantempiri: te
pantshipetashitearoi. Ariorica pojocajeitajero
pivancopee, pijinapee, pirementee, pitsiropee,
piripee, piniropee, pitomipee, pishintopee:
iro cantaincha irootaque pojocajeitantariri
picoasanotaque impincatsariventempi
Tasorentsi, eiro patsipetashitarotsi.

³⁰Aitaque impinataquempi Tasorentsi
meeca aca quipatsiquica, aisati impinata-
quempi anta inquitequi: paneantasanotajeari
anta, pincantaitatijempani.

**Icamantajeitiri Jesoshi
iroamere: “Noncame”.**

(Mt. 20.17-19; Mr. 10.32-34)

³¹Impojiji icajemaqueri Jesoshi iroame-
repee, icantaqueri:

—Tsame ajajeite meeca Jerosarequi.

Timatsi isanquenatacotaquenaniri
peerani yora quenquetsatacantantsiniri.
Noponeaca inquitequi, natiritapaaque.

Meeca anta Jerosarequi omoncarataquea
maaroni isanquenatacotaquenaniri.

³²Iraacantena ashaninca arori, irayena
itsipapee atiri. Irishirontimentajeitena,
iroashinoncaajeitena, inquitiojena,

³³impasanatena, iroyena. Oncaratapaa-
que mava quitaiteri, nontinaanaje aisati.

³⁴Iro cantaincha te inquemajeitavaque-
roji icantajeivetacariri, icomijeitavacaro.

Yoavisacotiri Jesoshi caari amenatsi.*(Mt. 20.29-34; Mr. 10.46-52)*

³⁵Ari icaantanaca Jesoshi, iquenanaque avotsiqui, irotaintsi irareetea nampitsiqui pajitachari Jerico. Itimi anta avotsinampiqui shirampari caari amenatsi, icoacotapinijeitiri avisayetatsiri irineshinocatanaqueri, impayetanaqueri quirequi. ³⁶Ari iqemavaque caari amenatsi ipocajeitapaque oshequi atiri. Isampitiri itsipa:

—¿Janica pocatsineri?

³⁷Yacanaqueri:

—Coraque Jesoshi, yora nasaretasati, yoiyajeitiri oshequi atiri. Irvisanaje aca.

³⁸Ari icajemacotavaqueri:

—Jesoshi, aviro ishanincani Iravirini. Pincavintsaanaquenave.

³⁹Ari icantajeitiri jivajeitiriri Jesoshi:

—Pimajerete.

Iro cantaincha, aiquero icantanaitii:

—Jesoshi, pincavintsaanaquenave.

⁴⁰Ari icatiapaaca Jesoshi, icantanaque:

—Pamaqueri aca.

Ari yameetaqueri. Impoiji isampitiri:

⁴¹—¿Paita picoaqueri?

Yacanaqueri:

—Novincatsarite, nocoaque namenaje narori.

⁴²Icantiri:

—Ari, aitaque pamenaje meeca.

Pishiretaquena, irootaque pavisacotantajeiri.

⁴³Irosati yamenantanaja. Ari yoijatanaqueri Jesoshi, icantanaque:

—Yamenacaajana Tasorentsi, tempa icameetsataque.

Aisati iquempejitacari maaroni amenajeitaqueriri, icantajeitaque:

—Tempa icameetsataque Tasorentsi.

Yora Saqueo ineaqueri Jesoshi.

19 ¹Impoiji iquenanaque Jesoshi nampitsiqui, pajitachari Jerico.

²Itimi anta ashitaarantincari pajitachari

Saqueo. Iriotaque iriori jivatacaajeitiriri yora apatotapinitiniriri oromasati iirequite jorio. ³Icoaveta Saqueo irineerime Jesoshi, iro cantaincha te iranteariteji, icaajaniquitiji. Icarati oshequi atiri, yojocaajeitavaqueri. ⁴Ari ishianaca, ijivatanaque anta avotsiqui. Yataitapaquero inchato anta otsapiqui, anta inquenanaquenta Jesoshi. Iramenavaqueri inquenapaaque ishaaviji. ⁵Ari yareetantapaacari Jesoshi, yamenapaaque jenoqui, ineapaaqueri, icantiri:

—Saqueo, pishintsite paniireapaaji.

Nocoaque meeca nosavije pivancoqui.

⁶Ari ishistsitaque yaniireapaaji, icantaqueri:

—Tsamequeti novancoqui.

Ari oshequi iquimoshiretanaque Saqueo, ⁷iro cantaincha iquisajeitanaca amenajeitaqueriri. Icantajeiti:

—Te incameetsanirotejive yora. ¿Paita ijatashitantariri Jesoshi anta ivancoqui?

⁸Ari iquempejitasanotapaacari Saqueo Jesoshi, icantiri:

—Novincatsarite, meeca nompaaantajeitajeri ashinoncaincari cashetani timimojeitanari. Itimirica atiri namataviriti nocoshitantacariri, noimpiajeneri maaroni, aisati nompajeri aisati. Ocaratirica aparo nocoshitaqueri, nompajeri 4.

^{9,10}Ari icantiri Jesoshi:

—Meeca quitaiteri pavisacotaji, aisati iravisacotaje pishaninca aca pivancoqui. Noponeaca narori inquitequi, natiritapaaque: nocoaque namenacaajeitajeri ashinoncaajeitachari, nocoaque noaviscojeitempi maaroni. Tempa aviro ishanincani Avaramani.

Yora Jesoshi iquenquetsacotiri pincatsari paqueriri ishaninca quirequi.

(Mt. 25.14-30)

¹¹Ari iqemajeitauero atiripee icantaqueri Jesoshi. Aisati iojeitaque irotaintsi irareetea Jerosarequi. Ijitas-

jeitaca irotaintsi meeca impoque
Tasorentsi impincsariventante aca
quipatsiqui, ¹²Irootaque ishiacantiniriri
oca:

—Itimini aparoni shirampari, pincatsa-
rivetachari. Impoiji icajemaqueri pashini
pincatsari anta pashiniqui quipatsi. Ari
irijatanaque, impeaqueri pincatsarisanori
impincatsariventantariri ishaninca anta
inampiqui. ¹³Ari irotaintsi irijate,
icajemaqueri iratirite caratatsiri 10,
ipajeitaqueri oshequi quirequi.
Icantaqueri: “Jerica aparoni quirequi,
ipinataca oshequi. Nocoaque piomparije-
tea. Ariorica nompiaje, namenapaajeri
jaoca incarate quirequi pampatotenari”.
¹⁴Ari ijatanaque impeantajeri pincatsari.
Iro cantaincha te impincatsajeiteriji
ishaninca, oshequi iquisajeitaqueri.
Itiancayevetacari aparopee ishaninca,
icantavetacari yora itsipapee pincatsari:
“Te nonintajeiteji impincatsariventajei-
tena yoranqui, te incameetsateji”. ¹⁵Iro
cantaincha ipeaqueri pincatsari, impoiji
ipianaja impincatsariventantariri.
Icajemacantajeitaqueri iratiritepee: yora
ipajeivetari iirequite. Isampijeitaqueri:
“¿Pishequiaquenarimpa noirequite?”
¹⁶Ari icantiri yora jivatatsiri: “Pamene,
meeca noshequiasanotaqueri quirequi.
Aparo ishequiasanotanaque, icarataque
meeca 10”. ¹⁷Ari icantiri pincatsari:
“Cameetsataque. Oshequi piotaque.
Piquearioventaquenaro capichaji. Meeca
nompeaquempi pincatsariventeroneri
oshequi nampitsi, oncarate 10. Pinquea-
rioventenaro pimpincatsate”. ¹⁸Ari
ipocapaaque itsipapee, icantajeitapaa-
queri: “Jerica piirequite. Pipaquenari
aparo, meeca icarati apapacoroni”.
¹⁹Icanti: “Ari pimpincatsariventero atiri
savicsitsiri apapacoroni nampitsi”.
²⁰Impoiji ipocaque itsipa aisati, icanti:
“Novincatsarite, jerica piirequite
pipaquenari chapinqui. Noquempoyea-

quempiri novaniotequi. ²¹Oshequi
notsaroacaaquempi, niotaque oshequi
pipincatsaritaque. Paapitsatiri itsipapee
yashiyetari, aisati paayetiro oitsoqui
caari pipanquiti”. ²²Impoiji icantaqueri:
“Te pincameetsateji, te pimatenaroji
nocoacaavetaquempiri. Picantavetana:
‘Oshequi pipincatsariti, paapitsatiri
itsipapee yashiyevetari, paayetiro
oitsoqui caari pipanquiti’. Ari pioveta,
irootaque noquisantaquempiri meeca.
²³¿Paita caari poantari noirequite
vaancoqui? Poaquerime anta, ari
intimeme meeca noirequite, aisati itsipa
quirequi impaquenarime yora quempo-
yeajanariri”. ²⁴Irosati icantantari yora
catiajeitainchari: “Paapitsatajeri
noirequite. Pimper yora ashitariri 10”.
²⁵Ari icantajeivetari: “Novincatsarite,
oshequi iirequite meeca. ¿Paitaquea
pimpashitanteariri itsipa aisati?”
²⁶Yacanaqueri: “Noncamantempi,
intimerica ashitaarrantayetachari,
nompajeri aisati. Irinti yora caari ashitaa-
rantacha, naapitsatajeri ora capichaji
timimovetariri. ²⁷Aisati itimi quisaque-
nari caari coatsine impincatsajeitena.
Pamajeitaquenari, namenacojeitempiri
poajeiteri”.

Irootaque iquenquetsatacaajeitiriri
Jesoshi atiripee.

Yareetapaaja Jesoshi Jerosarequi.

(Mt. 21.1-11; Mr. 11.1-11; Joa 12.12-19)

²⁸Impoiji yovaanaja aisati Jesoshi, irijate
Jerosarequi. ²⁹Irotapaintsi irareetearo nampitsi
pajitachari Vetajaje aisati Vetania. Otimi anta
toncaariqui pajitachari Orivomashi. Impoiji
itianquiri iroamere apite, ³⁰icantaqueri:

—Pijate anta nampitsiqui, pineapaa-
queri voro itsatacotaca anta. Tequera
inquijacoyeeteari. Pintsatacoreapaaqueri,
pamaquenari. ³¹Ariorica irisampiyee-
tempi: “¿Paita pitsatacoreantariri?” Ari
pincerari: “Icoaqueri Avincatsarite”.

³²Ari ijajeitanaque apite, ineapaaqueri icantaqueriri Jesoshi. ³³Ari itsatacorea-paaqueri. Irosati isampitantacari ashitariri:

—¿Paita pitsatacoreantariri novorote?

³⁴Yacanaqueri:

—Icoaqueri Avincatsarite.

—Ari, paanaqueneri.

³⁵Ari yaanaqueri anta Jesoshiqui.

Yoanquetaqueneri imititsaqui iitsaarepee irisavicanteari Jesoshi, impoiji iquijacotanacari. ³⁶Ari yovaacotanaja anta avotsiqui, yoajeitniri atiripee iitsaarepee avotsiqui, iraniitantanaqueari voro. ³⁷Ari intanacaro meca yoirincacotanaja. Yoijajeitanaqueri oshequi quemisantajeitatsiri, iveshireimentajeitanacari, icajemajeitanaque. Icantajeitanaque:

—Tempa icameetsataque Tasorentsi. Aneajeitaqueri itasoncaventapinijeita-quee. ³⁸Icameetsataque Avincatsarite itiancaqueeri Tasorentsi. Cameetsa isavicajeitaque maaroni inquiresati, ineacameetsajeitaqueri Tasorentsi.

³⁹Ari itimaiti anta variseopee, icarajeitaqueri atiripee. Icantavetari Jesoshi:

—Oametantatsiri, poimajerentajeiteri yora oijajeitimpiri.

⁴⁰Yacanaqueri:

—¿Paita noimajerentanteariri?

Ocameetsataque icantajeitaqueri. Irimajejeiteme yocapee, irointi irineanatacaaque me Tasorentsi mapipee ompincatsantantenameri.

⁴¹Ari iquempejijeitapaaque, meca oconijatapaaque Jerosare. Iraacojeitaqueri Jesoshi savicajeitatsiri, ⁴²icanti:

—Nocoavetaca nosavicacaajeitempime cameetsa catsini, iro cantaincha te pincoajeiteji. Pitseencajeitauena, meca eiro pineanatsi nompincatsariventajetemp. ⁴³Coajica intime quisasanojeitempineri, inticasanojeitapaaquempi, irishoncajeitapaaquempi soraropee, eiro ishinejeitimpitsi pinquenana je jaocarica.

Irimanajeitempi, ⁴⁴intireajeitajero pivancopee, intireasanojeitajero catsini. Irovaaranteri savicajeitatsiri. Nopocashi-jeivetaquempi, nompincatsariventajetempime, iro cantaincha te pimpincatsajeitavaquenaji, irointi pitseencajeitavaquena. Irootaque inquisajeitantempiri coajica soraropee.

Yora Jesoshi iquisajeitaqueri pimantayetatsiri anta ivancoqui Tasorentsi.
(Mt. 21.12-17; Mr. 11.15-19; Joa 2.13-22)

⁴⁵Ari yareetapaaca Jesoshi ivancoqui Tasorentsi, yaajeitapaaqueri pimantayetatsiri aisati amanantayetatsiri, yojocajeitaqueri saiteriqui. Itsoncajeitaqueri maaroni, ⁴⁶icantaqueri:

—Tempa osanquenataca irineane Tasorentsi: “Nocoaque inquenquetsatacaapinijeitena atiri aca novancoquica, irootaque novetsicantantarori”. Iro cantaincha avirojeitaque amatavitantatsiri, pipeaquero pivanco avirori.

⁴⁷Impoiji ipiapinita maaroni quitaiteri ivancoqui Tasorentsi, yoametantapinitaque. Iro cantaincha iquisajeitaqueri yora jivatacaajeitiriri saserotepee, yora oametantirori isanquenareni Moishishi, aisati yora pincatsariventajeitiriri savicajeitatsiri. Isampitavacaajeitaca:

—¿Jaoca ancanteariri Jesoshi, avacantanteariri?

⁴⁸Iro cantaincha te iriojeiteji jaoca incanteariri, tempa itimi oshequi atiri pincatsajeitiriri, quemisantajeitiriri.

Isampitiri Jesoshi: “¿Janica tiancaquempi?”

(Mt. 21.23-27; Mr. 11.27-33)

20 ¹Ari pashini quitaiteri itimi Jesoshi anta ivancoqui Tasorentsi yoamejeitaqueri atiripee, icamantaqueri jaoca incantajeiteari iroavisacotantajeiri. Ari ipocajeitaque yora jivatacaajeitiriri saserotepee, yora oametantirori

sanquenarentsi, yora jivatacaajeitanta-tsiri, maaroni. ²Icantajeitapaqueri:

—Pincamantajeitena janica peaquem-piri pincatsari: ¿janica tiancaquem-piri pantayetantarori oca?

³Yacanaqueri:

—Aisati narori, timatsi nosampijeitem-piri. Pincamantajeitena: ⁴¿janicampa tiancaqueriri Joa ivaotisantani? ¿Iriompa Tasorentsi tiancaqueriri? Terica, ¿iriompa tianquiriri atiri?

⁵Te irancajeiteriji, irointi icantavacaajeitanaca:

—¿Paita ancanceriri? Ancanceririca:

“Irio Tasorentsi tianquiriri”, icantajeiteecari: “¿Paita caari piquemisantari?”

⁶Irompa ancanceririca: “Irio atiri tiancaqueriri”, tempa inquisajeitaquee atiripee. Ipitsecari. Icantajeitaque iriori itiancaqueri Tasorentsi Joa ivaotisantani.

⁷Ari impoiji icantajeiti:

—Te niojeiteji janicarica tiancaqueriri Joa.

⁸Irosati icantantari Jesoshi:

—Aisati narori, eiro nocamantimpitsi janica tiancaquenari.

Yora Jesoshi iquenquetsatacotiri yora panquitirotori ova.

(Mt. 21.33-44; Mr. 12.1-11)

⁹Impoiji aisati iquenquetsatacaajeitiri Jesoshi atiri, jero oca ishiacantiniri:

—Itimini panquitirotori ova anta iipatsitequi. Impoiji icantaqueri iratirite: “Pamenenarorica, coajica ariorica oitsoquitanaque, paaqueyeva avirori cashetani oitsoqui, cashetani pimpena narori”. Icantajeiti: “Ari cameetsa”. Impoiji ijatanaque pashiniqui quipatsi, peerani ipeaca. ¹⁰Impoiji omoncarataca irayetero oitsoqui. Yora ashitarori irovate itiancaque yora inampire: “Pijataite anta otiminta novate, picoacotaiteri yora amenanarori impaarantena cashetani”. Ari ijavetaca, iro cantaincha iquisajeita-

vaqueri, ipasanatavaqueri, yoipiavajiri. Tecatsi impavaqueri. ¹¹Impoiji itiancavetacari pashini inampire, iro cantaincha ishironimentavacari, ipasanatavaqueri, yoipiavajiri. Tecatsi impavaqueri.

¹²Impoiji itiancavetacari pashini aisati, iro cantaincha ipasanayetavaqueri, tac, tac, oshequi irirajanive. Yojocanajiri aisati. ¹³Iotantacari yora ashitarori, icanti: “¿Paita nanteri meeca? Irioyeata nontianqueri notomi nonintasanotiri. Ariorica irineajeitavaqueri irinti, impincatsatavaqueri”. Ari itiancavetacari iriori. ¹⁴Ineantajeitavacariri, icantavacaajeitanaca: “Pamenerite itomi ashitarori iipatsite. Ariorica incame iriri, iriotaque ashitajearoneri. Tsame avavaqueri, impoiji ashijeitajeoro ainti quipatsi”.

¹⁵Ari yaajeitavaqueri, shepi. Yaajeitanaqueri anta ocaratapaaque iipatsite, yoajeitavaqueri, shemi.

Irootaque iquenquetsatacaajeitaqueriri Jesoshi. Impoiji isampijeitiri:

—Aamaaca, ¿jaoca incanceriri yora ashitarori iipatsite? ¹⁶Tempa irijate iriori, inquisasanojeitaqueri tsameevetanariri iipatsite, iroapaaqueri. Impoiji iramenaje pashini tsameetajenerine.

Ari icantajeiti quemajeitaqueriri:

—Te oncameetsateji irimajeitero oca, eiro ishinetiritsi Tasorentsi.

¹⁷Yamenajeitaqueri Jesoshi, icanti:

—¿Pijivetacampa eiro imatirotsi? ¿Paitampa otimantacari oca sanquenarentsi? Tempa ocanti: “Itseencaquero yora vetsicavetarori pancotsi otincami, yojocajiro. Iro cantaincha ipeaquero Tasorentsi antearo otincami pancotsi”. ¿Paita oshiacantiri? ¹⁸Incarajaque maaroni pariatiriri mapiqui, ariorica ontsinacapaaqueri atiri oca mapi, ompeaqueri ovane quipatsi, ontsoncaqueri. Narotaque shiaquerori mapi: nompoyereajeitaqueri maaroni quisajeitaquenari.

Yoametiri Jesoshi atiri inquemisanteri pincatsari aisati inquemisanteri Tasorentsi.

(Mt. 21.45-46; 22.15-22; Mr. 12.12-17)

¹⁹Yora jivatacaajeitiriri saserotepee, aisati yora oametantirori Sanquenarentsi icoajeiveta irayerime meeca Jesoshi, tempa iojeitaque ishiacaventiri iriori. Irayerime, iro cantaincha itsarocaajeitacari atiripee, icanti: “Eiro airtsiti, iquisacoventaricari ashanincepee”.

²⁰Impoiji itiancaqueri saserote ishaninca:

—Meeca pijate pamatavitaiteiri yora Jesoshi. Pishiicantamempeapeempa picoaque pinquemisanteri, iro cantaincha, pincomitacayeari irineane. Ariorica incomitanaquearo incanteri, pishintsite pimpoque pincamantapeena. Impoiji ancamanteri pincatsari icantaqueri.

²¹Ari ijatashitaqueri Jesoshi, icantapaaqueri:

—Oametanari, niojeitaque oqueariotasanotaque maaroni picantaquenari aisati maaroni poametaquenari. Te pamenashiteariji ashaninca piotanteari icameetsatirica, irointi piotasanotaqueri iquenqueshiretiri. Aisati cameetsa poamejeitaquenaro icoacaajeitaquenari Tasorentsi.

²²Meeca pincamantena: ¿ocameetsatimpa ampajeiteiri yora ivincatsarite oromasati airequite icoacotaqueeri? ¿Eirompa apirtsiti?

²³Ari iotaqueri Jesoshi icoajeiveta iramataviterime. Icantiri:

—¿Paitaquea picoantari pincomitacayenaro noneane? ²⁴Ponijayenari iitsoqui piirequite. ¿Janica ishiavorotaqueri aca quirequiqui? ¿Janica ashitarori ivajiro isanquenataqueri?

Yacanaqueri:

—Iro ivoro ivincatsarite oromasati, aisati osanquenataca ivajiro: yora Sesari.

²⁵Ari icantiri Jesoshi:

—Ocameetsataque pimpincatsateri yora Sesari, iro cantaincha ocameetsata-

que aisati pimpincatsatasanoteri Tasorentsi.

²⁶Tecatsi icantajeitea incomitacayeari irineane Jesoshi, cameetsa yoametantasa-notaque. Yoajeitanaqueri cavaco yora amataviterinemeri, irootaque imajerejeitancari. Tecatsi incantajeri aisati.

Yoamejeitiri Jesoshi saroseo: “Queario intinaajeitaje camayetainchari”.

(Mt. 22.23-33; Mr. 12.18-27)

²⁷Impoiji ijatashitaqueri saroseo Jesoshi. Icantaque iriori saroseo eiro itinaajeitajatsi camayetatsiri, eiro ijajeititsi inquitequi. Ari icantapaaqueri:

²⁸—Oametanari, peerani isanquenataqueroni Moishishi. Icantari ariorica iravetearo shirampari ijina, impoiji incamaque. Eirorica itimacairo ijananequite, cameetsataque irajero irirentini.

Impoiji intimerica otomi irishiacantajeri itomini irirentini. ²⁹Ariorica itimi shirampari irirenti 6. Yaavetaro ijina, impoiji icamaque. Te intimeji itomi.

³⁰Impoiji yaavetajaro iriori irirentini. Aisati te intimacayeroji ijina itomi, impoiji icamaque iriori, toren. ³¹Aisati iquempetaca pashini irirentini. Yaavetajaro tsinane, impoiji aisati icamaque.

Aisati iquempejeitaca maaroni irirentini. Tecatsi timacayerone otomi. ³²Ari impoitanaque iroori tsinane, ocamaque.

³³Meeca pincamantena: queariorica intinaajeitanaje maaroni camajeivetainchari, ¿janica jinantajearone oca tsinane? Tempa icarajeiveta aayevetarorini 7.

³⁴Ari yacanaqueri Jesoshi:

—Queario, aca quipatsiqui yamejeitacaro shirampari yairo ijina. Aisati tsinaneppee aajeiti ojime. ³⁵Ari iroitinaajeitajeri Tasorentsi maaroni atiri inecametsatiri, iro cantaincha anta inquitequi eiro yaajitsi ijina. Aisati tsinane, eiro aajitsi ojime.

³⁶Aisati eiro anta icamajitsi aisati, inquempejeiteari maaroni inampirepee Tasorentsi,

saviquimojeitiriri: te incamajeiteji iriori. Icantani yaneajeiti. Aisati intomintasanojeiteari maaroni atiri yora irointinaajeitajeri. ³⁷Peerani iotitani Moishishini intinaajeitana naje camayetatsiri. Iquenquetsatacotantarori totseequi otaavetaca, iquenquetsatacotiri aisati Avincatsarite. Icantini: “Iquemisantiri Avarama Tasorensi. Aisati Isaca iquemisantiqueri, jeri aisati Jacovo”. ³⁸Pineaquero, te incanteji: “Iquemisantaveitarini Avaramani”. Yaneanaji Avarama aisati itsipapee, irootaque icantantacari: “Iquemisantiri”.

³⁹Impoiji icantayetiri aparopee oametantirori sanquenarentsi:

—Oametanari, cameetsa oca picantaqueriri.

⁴⁰Ari itsaroacaajeitacari irisampitaje-rime aisati.

Yora Quirishito irio ishanincani Iravirini.

(Mt. 22.41-46; Mr. 12.35-37)

⁴¹Pashini aisati icantaqueri Jesoshi:

—¿Paita picantajeitanti: “Iriotaque Quirishito ishanincani Iravirini”? ⁴²Tempa peerani ipampoyeaventirini Iravirini Tasorensi, isanquenataquero oca: “Yora Tasorensi, icantaqueri novincatsarite: ‘Notomi, pisavique aca nacosanoriqui, pincaratena ampicsarijeite, ⁴³irosati impincatsajeitantempiri maaroni quisajeive-taquempiri’”. ⁴⁴¿Iriompa Quirishito ishanincani Iravirini? Iriorica ishanincani, ¿paita icantantariri peerani: “Novincatsarite”? Te pamejeivetearoji pimpincatsajeiteri impoitatsiri itimi.

Icanti Jesoshi: “Paamayeariyea oametantirori sanquenarentsi, yamatavitimpicari”.

(Mt. 23.1-36; Mr. 12.38-40; Jr. 11.37-54)

⁴⁵Impoiji iquemajeitaqueri atiri Jesoshi, yoamejeitaqueri iroamerepee, icantaqueri:

⁴⁶—Paamayeariyea yora oametantajeitirori sanquenarentsi. Oshequi icoaque

inquenaquenatsantsanayete. Icoaque aisati cameetsa iraacameetsajeitavaqueri ishaninca anta nampitsiqui. Aisati anta pancotsiqui apatojeitantapinitari, icoaque irisaviquimotapiniteri pincatsaripee. Aisati ariorica yampatojeita atiri yoajeita, icoaque quiso iroapiniteri pincatsaripee. ⁴⁷Oshequi ishiacantanirota. Osamani iquenquetsatacaamempeacari Tasorensi. Icoaque irijitashijeitantariri ishaninca iquemisantasanoti. Iro cantaincha yamatavitapinitiro camajimentaro, icoshitantarori timimojeivetarori. Queariotaque oca noncamantempiri: iroasanquetaasanojeitaqueri Tasorensi, catsini.

Iquenquetsatacotiro Jesoshi tsinane paqueriri Tasorensi maaroni timimovetarori.

(Mr. 12.41-44)

21 ¹Ari isavicaque Jesoshi anta ivancoqui Tasorensi. Yamenayeta-vaqueri ashitaarantincari yamayetaqueri iirequite anta inantariqui quirequi. ²Aisati ineaquero camajimentaaro amaqueri apite iitsoqui quirequi, caari pinatacha. ³Icanti: —Queario oca noncamantempiri: pitseenquitirocari yoca amaqueri oca camajimentaaro. Oshequi inecameetsatitacaro Tasorensi yoca amaqueri, anaacotaqueri yamajeivetacari yora ashitaarantincari. ⁴Oshequi ivinaro yamavetacari iriori, iro cantaincha itimaarantaque oshequi catsini iquemoyeanontavajari iriori. Irompa oca, amaqueri maaroni timimovetarori, te aneajeriji timaarantajantsine, tecatsi amanantantearori oyeari.

Icanti Jesoshi:

“Coajica intireetajero ivanco Tasorensi”.

(Mt. 24.1-3; Mr. 13.1-4)

⁵Ari iquenquetsatavacaajeitaca iroame-repee, icantajeiti:

—Tempa ocameetsatasanotaque ivancoca Tasorensi. Aisati maaroni mapipee

yovetsicantacarori, ocameetsajeitauque, aisati maaroni yoaneencajeitantarori anta otantoqui.

Iquemantajeitacariri, icantiri Jesoshi:

⁶—Coajica intireetajero maaroni oca pineacameetsajeitiri meeca. Irojoqueeta-jero mapipeeca arejiqui.

⁷Ari isampijeitaqueri:

—¿Jaoca oncarate omoncaratanteari oca picantaquenari? Aisati, ¿paita iotacaayenaneri irotaintsi omoncaratea?

Icantiri Jesoshi: “Coajica ompomerentsitimoteari atiripee”.

(Mt. 24.4-14; Mr. 13.5-8)

⁸Icantaqueri:

—Paamayea, yamataviyeetimpicari.

Impoque oshequi atiri cantempineri:

“Naro nainti Quirishito”. Pashini incante:

“Itiancaquena Quirishito noncamantempi irotaintsi impoque”. Iro cantaincha eiro

piquemisantiritsi. ⁹Pinquemapiniteri atiri

incante irimanatavacaajeitea atiripee,

aisati irojocajeiteri invincatsarite. Iro

cantaincha eiro pitsaroajeititsi. Aitaque

incanteari inquisavacaapinijeitea, iro

cantaincha tequera omoncarateaji.

¹⁰Jero pashini icantaqueriri aisati:

—Yora atiripee irimanayeteri itsipapee atiri.

Yora savicayetsiri aparopeequi nampitsi

irimanateri yora savicayetsiri pashinipeequi

nampitsi. ¹¹Aisati oshequi onicasanotanaquea

quipatsi. Aajeiteri atiripee itashe, oshequi

incamajeitanaque; aisati irojoquijjeitea

itsipapee atiri, incamaarantayetanaque iriori.

Aisati, anta inquitequi pineaquero caari

pineapinijeiti, oshequi pintsaroacayearo.

Yora Jesoshi icantaqueri iroamere:

“Coajica irajeitanaquempi, inquisajeitempi atiripee”.

(Mt. 24.9-14; Mr. 13.9-13)

¹²Aisati icantajeitiri:

—Iro cantaincha irijivayeetempi

inquisanayeetempi. Iraajeitanaquempi

anta pancotsiqui yapatojeitantari, aisati

iroiminqueayetempi caravosoqui.

Iraajeitanaquempi aisati anta pincatsari-

peequi, inquisatsajeitempi: “¿Paita

piquemisantanirotantariri Quirishito?”

¹³Iro cantaincha eiro pitsaroacaaritsi yora

quisavetempineri, irointi pincamantajei-

teri jaoca nocanta noavisacojeitaquem-

piri. ¹⁴Eiro piquenqueshiretitsi: “Ariorica

irayeetena, ¿paita noncanteriri?”

¹⁵Ariorica iraanajempi noamejeitempi

nainti paitarica pincanteriri. Eiro imatiro-

tsi yora quishempineri impiatsatempi.

¹⁶Noncamantempi: iraacantempi piripee,

piniropee, pirementee, pitsiropee,

pishanincepee, maaroni. Iroaarantempi

aparopee. ¹⁷Irojeitanaque atiri piquemi-

santaquena, irootaque inquisajeitantem-

piri. ^{18,19}Iro cantaincha ariorica quiso

poyena aisati pinquearioventenaro

maaroni nocantajeitaquempiri, nonquem-

poyeasanojeitaquempi. Tecatsi catsini

incantajeitempi yora quishempineri, eiro

yaapitsatimpirotsi aparoni piishi. Aisati

pincantaitatiyempani pintime inquitequi.

Icanti Jesoshi:

“Yora soraro intsoncajeiteri jerosaresati”.

(Mt. 24.15-22; Mr. 13.14-20)

²⁰Aisati icanti Jesoshi:

—Ariorica pineajeitavaqueri soraro

irishoncajeitaquearo Jerosare, ari

piojeitanaque irotaintsi intsoncajeitajero

pinampi. ²¹Ocameetsati irishiajeitanaque

toncaariqui maaroni savicajeitatsineri.

Aisati maaroni savicatsineri Joreaqi,

irishiajeitanaque. Aisati yora jayetatsineri

oantsipeequi, eiro ipiajeitanaja nampitsi-

qui. ²²Aitaque omoncarataquea maaroni

oca isanquenatiniri peerani: “Iroasanque-

taasanojeiteri Tasorentsi maaroni

tseencajeitaqueriri”. ²³Ashinoncaajeitana-

quea maaroni tsinane tsomonteyetatsi-

neri, aisati maaroni antsotaayeterineri

ojananequite. Oshequi irineacatsiyetearo

yora savicajeitatsiri. Oshequi iroasanque-

taajeiteri Tasorentsi. ²⁴Irimanaajeiteri oshequi atiri, incamaarantayetanaque. Itsipapee iroisoyeteri, iraanajeri otsipapeequi quipatsi. Intime pashinipee atiri Jerosarequi peerani, irosati incantanteari Tasorentsi: “Moncarataca”.

Iquenquetsatacotaja irisati Jesoshi, jaoca oncanteari ariorica impiaje.

(Mt. 24.23-31; Mr. 13.21-27)

²⁵Jeroica icantiriri aisati Jesoshi:

—Pineajeitavaqueri impashinijeitanaque inquisiteati: yora catsirincateri, cashiri, impoquiropee, maaroni. Pineero caari pineapinijeiti. Aisati intsaroajeitanaque oneajatanaque antearoja incajare, soooo. Aisati irineavaquero antearoja otavoncajare. Iramenajeitavaquero, sorererere. ²⁶Eiro iojeititsi atiri jaocarica incanteeteriri, irootaque intsaroasanojeitanaqueari catsini. Irishevayetanaquea impoquiro. ²⁷Impoiiji pineajeitavaquena, nompiaje aisati. Tempa noponeaca peerani inquitequi, natiritapaaque. Ariorica nompiaje aisati, nonquenapaaje mencoriqui, nontasorentsitasanotapaaque, nompincatsaritanotapaaque. ²⁸Ariorica pineajeitavaquero oca nocanta-jeitaquemperi, piveshireajeitanaquea, pamenajeitavaquena: irotaintsi noaviscotasanojeitempi.

Icanti Jesoshi:

“Irotaintsi impoque Tasorentsi”.

(Mt. 24.32-35; Mr. 13.28-32)

²⁹Impoiiji ishiacantiniri oca:

—Ari pamenero iyera, jaoca ocantari. Terica iyera, ari pashini inchato pamenero. ³⁰Ariorica ontimayetanaje oshi, eereshitanaje, ari piojeitaque irootimatajantsi onquimojantsitaje.

³¹Aisati oquempetaca, ariorica pineaquero omoncarataquea maaroni nocamantitanaquemperi, piojeitaque

irotaintsi impincatsariventasanojeitempi Tasorentsi. ³²Ariorica pineajeitavaquero intanaquea oca nocamantaquemperi, ari eirotsitarica picamitsi, aitaque pineajeitavero omoncarataquea maaroni.

³³Coajica, peerani, ompeanaquea quipatsi aisati impeajeitanaquea maaroni inquitequiniri: cashiri, catsirincateri, impoquiropee, maaroni. Iro cantaincha eiro opeimatatsi irointi noneane catsini.

Icanti Jesoshi: “Paamaasanojeitajena”.

(Mt. 24.36-44; Mr. 13.33-37)

³⁴Aisati icantiri:

—Paamaasanojeitajena: nomapocapaimpicari. Piquenqueshiretirocari caari cameetsatatsi. Pishinqueitacari. Piquenqueshiretapinitirocari timajeitatsiri aca quipatsiqui. ³⁵Aitaque nomapocapaaqueri maaroni savicajeitatsiri quipatsiqui. Iroashinoncaajeitea maaroni caari aamaventajeitachane. ³⁶Paamaventea. Aisati pincerari Tasorentsi iramitacotempi cameetsa preejeitantajaneri, eirota piquematsicatarotsi maaroni oca nocamantaquemperi.

³⁷Ari maaroni quitaiteriqui yoametantaque Jesoshi anta ivancoqui Tasorentsi. Maaroni tsiteniriqui ijatapiniti anta toncaariqui ipajiyeetiri Orivomashi.

³⁸Aisati maaroni quitaiteriqui ijajeitamajaji atiripee ivancoqui Tasorentsi iquemisantapinijeitiri.

Yoametavacaajeitaca saserotepee jaoca incantajeiteriri iraacantajeitantariri

Jesoshi.

(Mt. 26.1-5, 14-16; Mr. 14.1-2, 10-11;

Joa 11.45-53)

22 ¹Irotaintsi quitaiteri yoapinijeitantarori tanta caari iconoyeeti tapiacairori. Yapiitapinijeitiro joriopee maaroni osarintsi iquenqueshireantarori peerani anta Ejipitoqui yavisajeitanajiro oantatsiri ivancopee. ²Ari yoametavaca-

jeitaca yora jivatacaajeitiriri saserotepee aisati yora oametantajeitirori sanquena-rentsi:

—¿Jaocasa ancanceriri Jesoshi avantea-riri? Aamaaca ari inquisacotanaqueari atiripee.

³Impoiji yora Satanashi ishintsinata-queri Jorashi Ishicariote, yora yoameve-tacari Jesoshi: yoametaqueri iraacanteri.

⁴Ari ijtashitaqueri yora saserotepee, icantapaaqueri:

—Namitacotempi paacanteri Jesoshi.

⁵Iquemantavacariri, iquimoshirejeita-naque, icantajeitavaqueri:

—Ari, cameetsa. Ariorica ayeri, ari nonpinatempi quirequi.

⁶ICanti:

—Ari. Namenasanoteri, impoiji noncamantempi jaoca pincanteari pimanacanteariri paacanteri. Eiroquea ineajeitiritsi atiripee.

Yora Avincatsarite yoacaacari iroamerepee.
(Mt. 26.17-19; Mr. 14.12-16)

⁷Ari moncarataca meeca vieshita. Meeca yoacaajeitacari atiripee ovisha, iquempetacari ishaninca peerani anta Ejipitoqui. ⁸Ari Jesoshi itiancaqueri Petero aisati Joa, icantavaqueri:

—Pijate povetsicajeitapee avajeiteari, anquenqueshirejeterota yavisantanacari peerani oamaantatsiri.

⁹Isampitiri:

—¿Jaoca picoaqueri novetsiquerori?

¹⁰Yacanaqueri:

—Ariorica pareetea nampitsiqui, pineapaaqueri shirampari yaacotanajiro nija. Poijatanaqueri anta pancotsiqui, jaocarica inqueapaajeri. ¹¹Pincantapaa-queri yora ashitarori ivanco: “Icanti Avincatsarite: ‘¿Jaoca noacayeariri noamerepee?’” ¹²Ari ironijayempiro anta oshitamencotanta jenoqui. Ovetsicajeitaca asavicajeitanteari. Ari povetsicajei-tero avirori avajeiteari.

¹³Irosati ijajeitantanaca, ineajeitapaa-queri icantaqueriri Jesoshi. Yovetsicajei-tapaaqueri yoari.

Yora Jesoshi yoamejeitaqueri iroamerepee iroimentapiniteari tanta.

(Mt. 26.20-29; Mr. 14.17-25; Joa 13.18-30; I Cor. 11.23-26)

¹⁴Impoiji yareejeitapaaca maaroni, yoajeitapaaca. ¹⁵Impoiji icantajeitaqueri Jesoshi:

—Oshequi nocoitacani tequeratani noncame, nontsipajeitanajempita meeca tsiteniriquica noacaajeitanajempita tanta. ¹⁶Noncamantempi, eiro napiitajirotsi noajeero aisati aca quipatsiqui. Aintiquea noapaaajeero anta ipincatsaritinta Tasorentsi.

¹⁷Ari yaaqueri tsota, ipasonquitaqueri Iriri, impoiji icanti:

—Paacojeitavaqueri oca, pirajeitero.

¹⁸Noncamantempi: eiro nirajirotsi ovaja aca quipatsiquica. Aintiquea nirapaaajeero aisati anta ipincatsaritinta Tasorentsi.

¹⁹Impoiji yaaqueri tanta, ipasonquitiri Iriri. Icarajaqueri, ipajeitaqueri iroamere, icantiri:

—Jero oca tanta, poajeitearo. Narota-que camimentajeitempineri. Nocoaque poapinitearo tanta pinquenqueshiretapi-nitantenari nocamimentajeitaquempi.

²⁰Ari yoajeitaca, maaroni. Impoiji ipacojeitaqueri ovaja aisati. Icantajeitaqueri:

—Ariorica pirero oca, nocoaque piojeite nocamantajeitaquempi noavisacojeitempi. Irootaque niraja amparajati-mentajeitempineri, noncamimentajei-tempi noavisacojeitantempiri.

²¹Impoiji icantajeitaqueri:

—Timatsi acarajeitaqueri meeca avajeitaca yora aacantenaneri iroacantan-tenari. ²²Noponeaca inquitequi, natirita-paaque noncamimentajeiteri maaroni atiri, iro cantaincha irashinoncaasanoita-quea yora aacantenaneri iroacantena.

²³Iquemantajeitacariri, isampitavacaajeitaca:

—¿Janicampa aacantaniroterineri?

Yoamejeitaqueri Jesoshi iroamerepee jaoca incanteari impincatsaritanteari.

(*Mr. 10.42-45*)

²⁴Ari anta icantavacaajeitanaca iroameerepe:

—¿Janica coajica jivatacaajeiteeneri?

¿Janica anaacojeiteeneri impincatsaritanote? ¿Naroitatsimpa jivatacaajeitajempine?

²⁵Ari icantiri Jesoshi:

—Yamejeitaro yora atiripee ipincatsajeitaqueri ivincatsaritepee, iro cantaincha iperanatapinijeitacari pincatsari ishanincapee. Jero icantashijeitaca: “Nintacojeitacari natiritepee”. ²⁶Iro cantaincha eiro piquempejeitaritsi. Ariorica picoaque pimpincatsariventante, eiro pishemetitsi, irointi pamitacotapiniteri itsipapee.

²⁷¿Janica ipincatsasasanotiri atiri?

¿Yorampa vetsicapinitiniriri yoari? Teve. Tempa ipincatsayeetiri yora peranaajeitariri inampirepee. Iro cantaincha te nomperanaajeitempiji nainti, irointi nintacojeitaquempi. ²⁸Quiso poajeitaquena peerani, piojeitaque opomerentsimotapinijeitaquee. ²⁹Irotaque nocantantimpiri meeca: oquempetaca incantena Apa nompincatsaritante, aisati noncantajeitempi pimpincatsarijeite. ³⁰Pincaratapinijeitena avapinijeitea aisati irapinijeite anta nompincatsaritentata, aisati ampincatsariventajeiteri maaroni joriopee.

Icantiri Jesoshi Petero:

“Meeca tsiteniriquica pincantapinite: **‘Te noneeriji Jesoshi’**”.

(*Mt. 26.31-33; Mr. 14.27-31; Joa 13.36-38*)

³¹Aisati icantiri Avincatsarite:

—Shimo, yora Satanashi icantaqueri Tasorentsi icoaque irineantempi, iriotanteari piquemisasantanotirica.

Queariompia, icoaque irantacayempiro caari cameetsatatsi. ³²Iro cantaincha noncanteri Tasorentsi iramitacotempi eiroquea pojocasanotantarotsi piquemisanti. Coajica, ariorica pinquencheshirereempa aisati pinquemisantajena, pinquencheshiretacaajeiteri maaroni piyemisantaririnte, pinquemisantacaasanojeiteri.

³³Yacanaqueri Shimo:

—Tempa aviro novincatsarite, quiso noanaquempi; ariorica iroiminqueetempi, eiro nojoquimpitsi. Iroiminqueetenata narori. Ariorica iroyeetempi, nontsipatanotanaquempi. Iroyeetenata narori.

³⁴Icantaqueri:

—Noncamentempi: meeca tsiteniriquica, eirotsitarica ineaaji teapa, oncarate mava pincante: “Te noneeriji Jesoshi”.

Icanti Jesoshi: “Irotaintsi omoncaratea isanquenatacotaquenaniri peerani”.

³⁵Impoiji icantajeitiri Jesoshi iroamerepe:

—Peerani notiancajeitaquempi piquenquetsatacaajeitaqueri atiripee. Nocantajeitavaquempi: “Eiro paanajirotsi pitsarate, piirequite, aisati otsipa piitsaare”. Meeca nosampijeitempi: “¿Pashinoncaajeitanacampa? ¿Otimaquempa coiteimojeitaquempi?”

Yacajeitanaqueri:

—Te. Tecatsi.

³⁶Impoiji icantajeitaqueri:

—Meeca noncantajeitempi: ontimerica pitsarate, paanajero. Intimerica piirequite, paanajeri. Terica ontimpivesamento, pimpimantero poicoro pamanantantearori aparori. ³⁷Aitaque omoncarataquea isanquenatacotaquenaniri peerani Isayashini: “Iroyeeteri, inquempetacanteeteri oayeri”. Queario, ontsataajeitaquea maaroni isanquenatacotaquenaniri peerani yora quenquetsatantantatsiniri.

³⁸Impoiji icantajeitiri:

—Jero oca, Novincatsarite: apite ocarati avesamento.

Yacanaqueri:

—Ari, moncaratataca.

**Ari anta Jetsemaniqui
iquenquetsatacairi Jesoshi Iriri.**

(Mt. 26.36-46; Mr. 14.32-42)

³⁹Impoiji isoquijanaji Jesoshi, ijatanaji anta ijatapinitinta: anta toncaariqui pajitachari Orivomashi. Yoijajeitanaqueri iroamerepee. ⁴⁰Ari yareejaitapaaca, icantajeitakeri:

—Meeca pincantajeiteri Tasorentsi iramitacojeitampiri: pantirocari caari cameetsatsi.

⁴¹Impoiji ari ijataque Jesoshi apaniro aiquetiji ara. Itiyeroapaaca, iquenquetsatacairi Iriri:

⁴²—Apa, pincoaquerica, poavisacoteno oca nonquematsicataqueari. Iro cantaincha eiro pantirotsi nocoqueri narori, irointi picoacaaquenari avirori.

⁴³Impoiji ipocaque aponi inampire Tasorentsi, intacotapaacari Jesoshi, ishintsitantacari. ⁴⁴Oshequi iquematsicatacaro, aiqvero ijatatii iquenquetsatacairi Iriri. Oshequi imasavitanaque, ovitejatanaque quipatsiqui, oquempvetaca iriraja. ⁴⁵Ari itsoncanaquero iquenquetsatacairi iriri, ijatanaji anta yoisavicanaquerinta iroamerepee, inaejaitapaatiiri maajeitaque ini. Oshequi yoashirejeitanaca incaranqui, irootaque imaojeitancari. ⁴⁶Icantajeitapairi:

—¿Paita pimaajeitancari? Pintinaajeitanaje. Pincantajeiteri Tasorentsi eiroquea pantantarotsi caari cameetsatsi.

Yayeetaqueri Jesoshi.

(Mt. 26.47-56; Mr. 14.43-50; Joa 18.2-11)

⁴⁷Ainiroquera iquenquetsatacaajeitiri Jesoshi iroamere, yareejaitapaaca

oshequi atiri, ijivajeitapaqueri Jorashi. Iroamere Jesoshi inaveta, iro cantaincha icoaque iraacantajeri meeca. Ijatashitakeri, inintavoronirotapaaqueri. ⁴⁸Icantavaqueri:

—Iro pinintavoronirotantanari, paacantena. Tempa piotaque naro poneainchari inquitequi, natiritapaaque.

⁴⁹Ari inaejaitavaqueri itsipajeitari Jesoshi. Isampijeitiri:

—Novincatsarite, ¿picoaquempa nompesheri?

⁵⁰Ari ipeshitavaqueri iyempitasanori aparoni inampire yora ivincatsarite saserote, peti. ⁵¹Icantiri Jesoshi:

—Ari inaji, eiro pantiritsi.

Impoiji yoipiajiniri iyempita, yoaviscotajiri. ⁵²Irio itsipajeitapaacari Jorashi yora jivatacaajeitiriri saserotepee, jeri aisati yora jivatacaantatsiri anta ivancoqui Tasorentsi, jeri aisati savicaantajeitatsiri. Icantavaqueri Jesoshi:

—¿Paita pamashitantanari pivesamotopee aisati inchaquipee? ¿Narompa coshinti? ⁵³Tempa nocaratapinijeitaquempi anta ivancoqui Tasorentsi, iro cantaincha te payenaji. Ja, moncaratataca meeca paantaquenari: meeca ipincatsaritanti camaari.

Icanti Petero: “Te noneeriji Jesoshi”.

(Mt. 26.57-75; Mr. 14.53-72; Joa 18.15-27)

⁵⁴Impoiji yaasanoqueri Jesoshi, shepi. Yaajeitanaqueri anta ivancoqui ivincatsarite saserote. Osamanitanaque Petero, yojitacoventavetanacari. ⁵⁵Anta pancotsiqui, ocaraiteti, yoisheetiro paamari. Isavicaajeitapaaque, icotsitajeitapaaca yora aajeitakeriri Jesoshi. Impoiji itsipajeitapaacari Petero. ⁵⁶Impoiji aisati, opoqui aponi inampire saserote. Ocatiapaaca, amenapaaqueri Petero, sorerere. Impoiji ocanti:

—Jeri yoca oijatiriri Jesoshi.

⁵⁷Icanti:

—Te nioteriji.

⁵⁸Impoiiji pashini amenaqueriri, icantiri:

—Aviro oijatiriri Jesoshi.

Icantiri:

—Teve. Te noijateriji.

⁵⁹Ari osamanitapainti aisati, icantiri pashini:

—Queario yoijavetacari yoca shiram-pari, tempa aisati iponeaca iriori Carireaquei.

⁶⁰Icantiri:

—Te nioteji paitarica picantaqueri.

Irosati ineantanaca teapa. ⁶¹Yora

Jesoshi ipitsocashitanacari Petero, yamenanaqueri. Irosati iquenqeshiretan-tanacaro icantaqueriri incaranqui:

“Tequeratsitarica irineaje teapa, mava

pincante: ‘Te nioteriji Jesoshi’”. ⁶²Ari

ijatanaque Petero, irasaanotanaca, jii, jii. Oshequi yoashiretanaca, catsini.

Ishirontimentajeitacari Jesoshi.

(Mt. 26.67-68; Mr. 14.65)

⁶³Yora shentajeitaqueriri Jesoshi ishirontimentajeitacari, aisati ipasanataqueri, tac, tac, tac. ⁶⁴Impoiiji ipashicajaquitaqueri aisati ipasavorotaqueri, icantaqueri:

—Pincamantenate janica pasavorota-quempiri. Iji, iji, iji.

⁶⁵Icantani, oshequi yoashinoncaqueri, ishirontimentacari.

Iquisajeitaqueri Jesoshi yora oametavacainchari.

(Mt. 26.59-66; Mr. 14.55-64; Joa 18.19-24)

⁶⁶Ari meeca oquitaitetamanaji. Yapato-jeitamanaja yora savacantaajeitatsiri, yora jivatacaajeitiriri saseroepee, yora oametantirori sanquenarentsi, maaroni. Yaajeitanaqueri Jesoshi anta yoametava-caapinijeitanta. ⁶⁷Isampijeitaqueri:

—Pincamantenate: ¿avirompa Quirishi-totatsiri naamaajeitacari?

Yacanaqueri:

—Noncantempiricame: “Je, narotaque Quirishito”, eiro pishiretarotsi. ⁶⁸Aisati, nosampitempiricame paitapeerica, eiro pacanatsi. ⁶⁹Noponeaca nainti inquitequi, natiritapaaque. Irotaintsi nompianaje jenoqui, nosaviquimotapaajeri Apa iracosanoriqui, noncaratapaajeri nontasoncantajeitaje.

⁷⁰Isampijeitaqueri:

—¿Avirompa Itomi Tasorentsi?

Yacanaqueri:

—Je, narotaque.

⁷¹Impoiiji icanti:

—¿Paita antoanteari itsipa camantaco-terineri? Tempa aquemajeitaqueri, ijitasorentsinirotacateemi. Ainiro yantane.

Yaanaqueri Jesoshi anta Piratoqui, icantapaaqueri: “Ainiro yantane yoca namaquerica”.

(Mt. 27.1-14; Mr. 15.1-5; Joa 18.28-38)

23 ¹Ari ijajeitanaque, yaajeitana-queri Jesoshi anta Piratoqui. Oromasati ini iriori, ipincatsariventajei-tiri joriopee. ²Icantapaaqueri:

—Ainiro yantanirotaqueri yoca. Yamata-vijeitaqueri noshaninceapee, icantajeiveta-cari: “Eiro pipiritsi pincatsari piirequite”. Aisati icantapiniti: “Narotaque Quirishito, pimpincatsajeitena nainti”.

³Ari isampitiri Pirato:

—¿Queariompa? ¿Avirompa ivicatsa-rite jorio?

Yacanaqueri:

—Je, narotaque.

⁴Impoiiji yora Pirato icantajeitavaqueri:

—Te aneroji irantane yoca.

⁵Aiquero icantajeiti:

—Iquisacaajeitacari atiripee, icantajei-taqueri atiri: “Tsame ajocajeri avincatsa-rite”. Intanacaro anta Carireaquei, meeca iquenaquenayeti aca Joreaquei, yamatavi-jeitaqueri maaroni.

Yaanaqueri Jesoshi anta Eroreshiqui.

⁶Iquemantacarori Pirato icantajeitaqueri, isampitaqueri:

—¿Iriompa carireasati yoca?

⁷Yacanaqueri:

—Je, iriotaque.

Icantiri:

—Ari, paanajeri anta Eroreshiqui.

Iriotaque pincatsariventajeitiriri carireasati. Savicatsi meeca aca Jerosarequi. Ipoqui chapinqui.

⁸Ari yaajeitanajiri anta. Ineantavacariri Eroreshi Jesoshi, iquimoshiretanaque.

Oshequi iquemacotapinitaqueri, itasoncantayetaque, irootaque icoantavetacanjiri irineeri. Icoaveta irineerime intasoncantayeteme. ⁹Oshequi isampiyevetacari paitapeerica, iro cantaincha te iranqueriji Jesoshi. ¹⁰Oshequi yapiitapinitiriri yora amaqueriri:

—Te incameetsateji. Ainiro irantane.

¹¹Impoiji ishirontimentajeitacari Jesoshi yora Eroreshi aisati maaroni soraropee. Impoiji iquitsaataqueri cameetsari quitsaarentsi, ishiacantamempeacari pincatsari, irishirontimentajeitanteiriri aisati. Impoiji itianquiri aisati anta Piratoqui. ¹²Ari peerani iquisavacaapinita Eroreshi aisati Pirato, iro cantaincha meeca intanacaro yaacameetsatavacaaja. Yojocajiro iquisavacaaveitani.

Yoacantaqueri Pirato Jesoshi, irinti Varavashi yoipacaajiri.

(Mt. 27.15-26; Mr. 15.6-15; Joa 18.39-19.16)

¹³Impoiji yapatojeitacari Pirato yora jivatacaajeitiriri saserotepee, pincatsaripee, aisati oshequi atiripee pashini.

¹⁴Ari icantavaqueri:

—Pamene, incaranqui pamavetaquenari yoca, picantajeivetaquena yoamejeitaqueri atiri irojocajeitena narori, aisati iriori novincatsaririntepee. Pineajeitaquena nosampitaqueri paitaricapee, iro

cantaincha noneacameetsatiri: te aneerioji irantane. ¹⁵Aisati iriori Eroreshi, ineacameetsataqueri, irootaque yoipiantacariri aca. Pineaquero, tecatsi irante noacantanteiriri. ¹⁶Meeca nompasatanceri, impoiji noimpacajeri.

¹⁷Ari maaroni osarintsi ariorica omoncarataca oca vieshita iquencheshiretantarori yavisantiriri peerani inampire Tasorentsi, yora oantatsiri, yora Pirato yoipacajiri aparoni shirampari yoininqueetaqueri.

¹⁸Ari itsipatavacajeitaca icantajeitaqueri:

—Poacanteri yoca, irinti Varavashi poimpacajeri.

¹⁹Ari yora Varavashi peerani icantajeitaqueri ishaninca anta Jerosarequi: “Tsame ajocajeri yora pincatsari”. Impoiji yoaqueri ishaninca, irootaque yoininqueantacariri caravosoqui. ²⁰Icoaveta Pirato iroimpacajerime Jesoshi, irootaque icoantavetacari iroimajerentajerime atiripee, iro cantaincha ²¹aiquero icantajeitanajatiiri:

—Pimpajacotacanteri. Pimpajacotacanteri.

²²Yapiivetajari aisati Pirato:

—¿Paita nompajacotacantanteiriri?

¿Paita yantaqueri? Nosampijeivetaquempi, iro cantaincha tecatsi piotacaasanotena noacantanteiriri. Nompasanatacateri, impoiji noimpacajeri.

²³Icantani icajemajeitanaque:

—Pimpajacotacanterive. Pimpajacotacanterive.

Aiquero icantanaitii, irosati iquemisantacari Pirato, ²⁴icantiri:

—Ari nomajeitempiro oca picoacaajeitaquenari.

²⁵Yoipacaacantajiri Varavashi, aisati icantajeitaqueri:

—Paajeitanaqueriqueti Jesoshica, jaocarica pincanteriri.

Ijatacaajeitaqueri anta impajacoterinta.

(Mt. 27.31-32; Mr. 15.21-23; Joa 19.16-17)

²⁶Ari yaajeitanaqueri Jesoshi anta impajacoterinta, iquenanaque avotsiqui.

Jeri itonquiojeitavacari shirenesati pajitachari Shimo. Iponeanaca oantsiqui. Ari iperanatavacari soraro yanatanaque-neri Jesoshi coroshi, ora impajacotantea-riri. Yoijatapairi itapiiqui Jesoshi.

²⁷Yoijajeitanaqueri oshequi atiri. Otimi aisati oshequi tsinane iracojeitaqueriri. Oshequi oashiretacotacari, irootaque ocajemacojeitancari aisati. Jerosaresato onajeiti. ²⁸Iro cantaincha yamenana-queri Jesoshi, icantajeitanaquero:

—Eiro piracojeitanatsi, avisati iracojei-tajanchane, aisati piracojeiteri pitomipee.

²⁹Coajica ompomerentsitimojeitempi, pashinoncaajeitanaquea. Pincantajeite: “Oquimoshiretaque caari timatsi otomi”.

³⁰Incoajeivetea atiri ontijerime imperita.

³¹Pamene, tecatsi nanteni nainti, iro cantaincha iroashinoncayena. Tempa coajica irashinoncaasanaquea maaroni antirori caari cameetsatsi.

³²Aisati anta yaayeetanajiri apite coshitantatsiri, intspajeiteari iriori Jesoshi, impajacojeiteri.

Ipajacotaqueri Jesoshi coroshiqui.

(Mt. 27.33-38; Mr. 15.22-32; Joa 19.18-24)

³³Ari yareetacaajeitapaacari anta Caraveraqui, ipajacojeitapaqueri coroshiqui, tac, tac, tac. Irinti yora coshitantatsiri, ipajacotaqueri pashiniqui coroshi anta iracosanoriqui Jesoshi. Irio itsipa ipajacotaqueri anta irampatequi.

³⁴Impoiji iquenquetsatacairi Jesoshi iriri:

—Apa, pincavintsayeri yocapee, eiro poasanquetaimentiritsi yoaquena. Te irioteji paitarica yantiri.

Ari icoajeitaque soraropee irajeitero iitsaareni Jesoshi. Icanti:

—Tsame ampishonquero mapijaniqui ayojeitanteari janicarica aitajerine iitsaareni. Icanti itsipa:

—Jaa, jentsiqueti, aneantearo.

³⁵Ari itimi anta oshequi atiri, amenajei-taqueriri, aisati itimi yora pincatsaripee,

ishirontimentajeitacari Jesoshi, iji, iji, iji; icanti:

—Yoavisacovetacari itsipapee, jentsite amenavaquerita ariorica irimatajea iroavisacotajea irisati. Iriotasanaque-rica Quirishito, itiancane Tasorentsi, ari irimatajea irisati iroavisacotajea.

³⁶Aisati iriori soraropee, ishirontimen-tajeitacari. Ijatashitaqueri, imperime ovaja, quepishijari. ³⁷Icantaqueri:

—Avirorica ivincatsarite jorio, jentsite poavisacotajea avisati: iji, iji, iji.

³⁸Ainiro ipajacoyeeataquero anta coroshiqui sanquenarentsi, otimi iitoqui Jesoshi, jenioquiji. Osanquenataca irineanequi quereshiasati, aisati irineane-qui oromasati, aisati irineanequi jorio. Osanquenataca, ocanti: “Jeri yoca ivincatsarite jorio”.

Iquenquetsatacairi Jesoshi coshitantatsiri ipajacoyeetiri.

(Mt. 27.39-53; Mr. 15.33-38; Joa 19.28-30)

³⁹Aisati yora coshitantatsiri ipajacoyee-taqueri, ishirontimentacari iriori.

—Avirorica Quirishito, poavisacotajea avisati, aisati poavisacotena narori.

⁴⁰Iro cantaincha iquisatsataqueri itsipa coshitantatsiri:

—Tempa pimpincatsateri Tasorentsi. Aisati avirori, irotaintsi pincame.

⁴¹Ainiro antaneppee arori ancamajeitan-teari, irintiquea yoca, tecatsi irante incamanteari.

⁴²Aisati icantiri:

—Jesoshi, ariorica pareetea anta pimpincatsaritentata, pinquenqueshireta-peena narori, poavisacotena.

⁴³Yacanaqueri:

—Queario oca noncantempiri: meeca quitaiteri pintsipatanaquena anta ocameetsaitentata.

⁴⁴Itampaticatapaquaque meeca catsirin-caiteri. Omapocashitanaca antearo otsitenitanaque. Ari otsitenitanaque

irosati ishaaviniji. ⁴⁵Aisati itsitenitanaque catsirincaiteri. Aisati otimi anta ivancoqui Tasorentsi oticaashiro nianqui. Ari omapocashitanaca, otsereanaque, tsererere, tsati; apitemaotanaque. Impoiji antearojenca icantanaque Jesoshi:

⁴⁶—Apa, meeca noncame. Aviro quempayeajenani.

Irosati icamantanaca, toren.

**Yoashirejeitanaca maaroni
neaqueriri Jesoshi icamaque.**

(Mt. 27.54-56; Mr. 15.39-41)

⁴⁷Ineantavacariri iyapitanote soraro, icanti:

—Tempa icameetsataque Tasorentsi. Queario icameetsatasanotini yoca shiramparini. Te ontimeniji irantane.

⁴⁸Aisati yora amenajeitiriri, iquenqueshirejeitanaca maaroni. Ipiajeitanaja nampitsiqui, yoashirejeitanaca catsini.

⁴⁹Irintiquea yora iojeitiririni Jesoshi, icatiajeitaca ara aiquetiji, yamenajeitanaque. Ocarajeitiri oca tsinaneppee poneachari Carireaque, tsipatapaacariri chapinqui Jesoshi.

Yoiminquetaqueri Jesoshi omoroqui.

(Mt. 27.57-61; Mr. 15.42-47; Joa 19.38-42)

^{50,51}Ari itimi anta cameetsari shirampari, pajitachari Jose, arimateasati. Otimi Arimatea anta Joreaque. Ari icarajeitaqueri Jose yora itsipapee pincatsariyetatsiri, yoametavacaapinijeita, iro cantaincha te incoaveteaji irinti impajacotacanteri Jesoshi. Ipincatsataqueri irinti Tasorentsi, yaamaajeitacari impoque impincatsariventajeiteri maaroni atiri. ⁵²Ari ijataque iriori, yameniri Pirato, icantaqueri:

—Nocoaque pishinetenari Jesoshini, naanajeri.

Icantiri:

—Ari, pijatequeti, paanajeri.

⁵³Impoiji yoanireajiri, yapinaicacotaqueri tocyaqui, cameetsamaotatsiri.

Yaanajiri anta oninta mapi, ora iroaquera imoqueeti, yominqeapaaqueri tsompoinaqui. Tecatsi itsipa iroyeete anta omoroquinta. ⁵⁴Tempa irootaque Viereshi icamantacari Jesoshi. Yovetsicajeitaquero atiri paitapeerica, tempa irotaintsi saavaro imaoreajeitanti.

⁵⁵Ora tsinaneppee oijatacojeitiri Jesoshi, amenacojeitaqueri yaajeitanaqueri omoroqui, anta yoajeitaqueri tsompoina. ⁵⁶Impoiji opiajeitanaja anta ovancoqui. Ovetsicapaaquero casancajari aisati pashini casancatsiri. Impoiji saavaro omaoreajeitanaque, omoncarataquero isanquenare Moishishi.

Itinaanaja Jesoshi.

(Mt. 28.1-10; Mr. 16.1-8; Joa 20.1-10)

24 ¹Ari otomincotamanaji, tsiteniquera ojatamanaque tsinane anta yoyeetaquerinta Jesoshi. Aanaquero casancajari ovetsicaqueri. Oijatanaquero otsipapee tsinane. ²Ari yoyeetaqueri chapinqui omoroqui antearo mapi, itsinacacoyeetanaqueri omoroqui. Iro cantaincha arevetapaacaro oneapaatiro tivironcaja oni. ³Oqueashivetapaacari Jesoshi omoroqui, iro cantaincha te oneapeeriji Avincatsarite. ⁴Te iojeiteji paitarica onquencheshirejeiteri. Impoiji imapocashitapaacaro apite shirampari, icatiimotapaacaro quempeji. Oshipaquireamaotanaque iitsaare. ⁵Oshequi otsaroacaavacari, oivotasanotanaca. Isampitapaquero:

—¿Paita picoantariri aneatsiri aca? Aca yoyeetapinitiri camasanoyetatsiri. ⁶Te aneajeriji Jesoshi aca, tempa tinaanaja ini. Pinquencheshiretero icamantitaquempiri anta Carireaque. ⁷Tempa icamantitaquempi: “Noponeaca inquitequi, natiritapaaque. Coajica irayena caari quemisantatsi, impajacotena coroshiqui. Oncarate mava quitaiteiri ari nontinaanaje aisati”. Meeca omoncaratata icamantitaquempiniri.

⁸Impoiji oquenqueshiretasanotaquero icamantitacaroniri Jesoshi. ⁹Opijana nampitsiqui, ocamantapaaquero iroamerepee aisati itsipapee quemisantatsiri. ¹⁰Opajita oca tsinanepée Maria ora maquitarasato, Joana, Maria iriniro Santiaco; aisati otimi otsipapee tsinane. ¹¹Iro cantaincha te irishiretaroji yora quemisantatsiri oca ocamantavetapaacariri, ijitashijeiveta te ioteji. ¹²Iro cantaincha iriori Petero ishianaca anta omoroqui yoajeivetacarinta chapinqui Jesoshi. Yamenapaaquero tsoompoina, ineapaaquero tocoya yapinaicacotantavetacariri. Impoiji ipianaja pancotsiqui, oshequi iquenqueshiretanaca.

Anta avotsiqui ineajiri iroamere Jesoshi.
(Mr. 16.12-13)

¹³Impoiji ijatanaque apite iroamere Jesoshi anta Emaoshiqui. Ariorica imponeaquea Jerosarequi, ocarat 11 quirometoro irareetanteari nampitsiqui. ¹⁴Ari iquenanaque, iquenquetsatavacaajeitaca. Iquenquetsatotaquero jaoca icanteetiri Jesoshi, aisati maaroni yantayetiri iriori. ¹⁵Ari iquenanaque, icantavacaanaca, irosati itsipajeitantacari Jesoshi, quiso yoanaquero anta avotsiqui. ¹⁶Ineajeivetacari, iro cantaincha te irishineteriji Tasorentsi iriojeitajeri. ¹⁷Ari isampitiri Jesoshi:

—Incaranqui, piquenantacari avotsiqui, ¿paita picantavacaimentacari? ¿Paita poashirejeitantacari?

¹⁸Ari ipajita aparoni Quereojashi, yacanaquero iriori:

—Iojeitaque maaroni jerosaresati: ¿paita caari piotanta avirori?

¹⁹Isampitiri:

—¿Paitaquea?

Yacanaquero:

—¿Tempa pinquemacoteri Jesoshini, yora nasaretasati? Iquenquetsatacaapinijeitanaroni irineane Tasorentsi aisati oshequi itasoncantapiniyetini. Ineacameetsataquero Tasorentsi aisati noneacameetsajeitaquero

narori. ²⁰Yaajeitaquero yora jivatacaajeitiriri saserote aisati avincatsaritepee. Icantajecti te incameetsateji, ipajacotacantaquero, icamaque toren. ²¹Nojijivetaca irio oavisacojeiteenemeri, pincatsariventajeiteenemeri. Meeca ocarataque mava quitaiteri icamantacari. ²²Ocarajeitaquena aparopee tsinane jatamanatsiri incaranqui anta noavetacarinta. Opiaja, omapocapaaquena, ²³ocamantapaaquena: “Te noneapajeriji Jesoshini, te aneajeriji. Irintiquea noneapaaque inampirepee Tasorentsi, icantaquena iriori: “Tinaanaja Jesoshi””. Irootaque ocantaquenari. ²⁴Impoiji ishiayetanaca aparopee anta, ineaquero ocantaquenari tsinanepee: irintiquea Jesoshi, te irineeriji.

²⁵Impoiji icantaquero Jesoshi:

—Te aneajeroji piojeitantari, pitseenciaquero yora quenquetsatirori irineane Tasorentsi. Te pinquemisantajeiteriji.

²⁶Tempa icantajecti irijivate Quirishito inquematsicataquearo maaroni oca, impoijiquea impincatsaritanotanaque.

²⁷Ari yoametasanojeitanacuero Sanquenarentsi, itsoteaquero maaroni quenquetsatocotiriri iriori. Ijivatacueneri isanquenare Moishishini, impoiji yoamejeitiri isanquenare itsipapee quenquetsatantajeitatsiniri. ²⁸Ari yareejeitapaaca nampitsiqui, iravisana jeme Jesoshi, ²⁹iro cantaincha icantaquero itsipapee:

—Eirota pijatita, pisavicapee novancoqui. Ishaavijiiteanaji, irotaintsi ontsitenjencaite.

Ari ijatapainti ivancoqui iriori. ³⁰Impoiji itsipatavacaajeitaca, yoajeitaca. Impoiji yaaquero Jesoshi tanta, ipasonquitiri Tasorentsi, impoiji ipajeitaquero itsipapee.

³¹Irosati iquenqueshireantanaja, iojeitavajiri. Impoiji imapocanaja Jesoshi, ipeanaja.

³²Icantavacaajeitanaca:

—Tempa ocameetsatanotaquero icantaqueeri anta avotsiqui. Oshequi aquenqueshiretaquero, aquimoshireventasanotaquero.

³³Irosati ijajeitantanaja, ipiajeitanaja Jerosarequi. Ineapaaquero yora iroamereni

Jesoshi, icarataji 11, itsipajeitacari itsipapee quemisantatsiri, yapatojeitaca. ³⁴Icantajeitavakeri yora savicajeitatsiri:

—Quearioteemi: itinaasanotanaja Avincatsarite. Ineaqueri Shimo.

³⁵Irosati icamantantapaacari:

—Aisati narori, noneajeitaqueri anta avotsiqui, cameetsa catsini yoametaquena, iro cantaincha te nioveteariji. Impoiji anta novancoqui icarajaquero tanta, ipaquenaro, irosati notantajari.

Ineajeitajiri iroamere Jesoshi.

(*Mt. 28.16-20; Mr. 16.14-18; Joa 20.19-23*)

³⁶Ari ainirojeitatsi iriori anta pancotsiqui, iquenquetsatavacaajeitaca, irosati imapocantapaajari Jesoshi, icatiimojeitapaajari nianqui. Icantapaajiri:

—Pinquimoshirejeitanaque, maaroni.

³⁷Yoajeitanaqueri cavaco, te iriojeitavakeriji, ijitashijeivetavacari camaari. Itsaroajeitanaque. ³⁸Isampitapaqueri:

—¿Paita pitsaroacantanari? ¿Paita pitseencajeitantanari? ³⁹Pamenajeitero naco aisati noiti oqueanaquena quiravo. Narotaque pocajantsiri. Jentsite, pimpamijeitena piojeitantenari. Pineaquena, otimi novatsa aisati notonqui, te nonquempeteariji camaari.

⁴⁰Irosati yonijantajeitacari iraco aisati iiti. ⁴¹Iro cantaincha tequera irishiretasanoteari itinaanaja. Iquimoshirejeivetaca, iro cantaincha itseencashirejeitaque. Icantiri Jesoshi:

—¿Timatsimpa avajeiteari?

⁴²Ari ipavaqueri shima shincorentsi, ⁴³yoacari. Iriori jei yamenashejeitaqueri, sorerere.

Ari yovecarataquero Jesoshi yoamejeitaqueri iroamerepee.

(*Yan. 1.4-8*)

⁴⁴Impoiji icantajeitaqueri:

—Tempa chapinqui nocamantaquempi: “Oshequi nonquematsicataquearo,

iroyeetena. Aitaque omoncarataquea maaroni isanquenatacotitaquenaniri Moishishini, aisati yora quenquetsatacaantatsiniri, aisati yora pampoyeaventajeitiriniri Tasorentsi”. Meeca moncarataca.

⁴⁵Impoiji yoametasanojeitaqueri ocantayetiri Sanquenarentsi, ⁴⁶icantajeitaqueri:

—Tempa ocanti Sanquenarentsi:

“Incamaque Quirishito, oncarate mava quitaiteri ari intinaanaje aisati. ⁴⁷Inquenquetsatacoyeeteri maaroni quipatsipeequi, irijivate aca Jerosarequi: inquemacojeitaqueri maaroni atiri. Incamantajeiteri atiri: “Pinquenqeshirejeitanaquea, pojocajeitajero caari cameetsatsi pantajeitiri. Paventeari Tasorentsi iroavisacotantempiri”. ⁴⁸Ari pineajeitaquero meeca omoncarataca isanquenatacotitaquenaniri peerani. ⁴⁹Meeca nontianquempiro icashiacaquempiri Apa: ompocashitempi Ishire, quiso oajeitantempiri. Pisavicavaqueta aca nampitsiqui irosati ompocanteari. Impoiji irimatacaajeitempi Tasorentsi pantajeitantearori paitapeerica incoacaayempiri.

Ijatanaji Jesoshi inquitequi jenoqui.

(*Mr. 16.19-20; Yan. 1.9-12*)

⁵⁰Impoiji yora Jesoshi yaajeitanaqueri iroamerepee anta Vetaniaqui. Ari anta nianqui, yacotanaque Jesoshi, iquenquetsatacari iriri, icantiri:

—Apa, jeri yoca noamereca: pintasoncaventajeiteri, poveshireacaajeiteari.

⁵¹Irosati yovancantanaja inquitequi, ipeanaja. ⁵²Oshequi ipincatsajeitaqueri, impoiji ipiajeitanaja Jerosarequi, iquimoshirejeitanaque catsini. ⁵³Ijatapinitaque anta ivancoqui Tasorentsi icantapinijeitaque:

—Tempa icameetsataque Tasorentsi.

Ari ocarati. Narotaque sanquenatirori: *Irocashi*

YORA JOA ISANQUENATACOTAQUERI JESOQUIRISHITO, JAOCA ICANTA IRIORI YOAVISACOTANTI

Intanacaro Joa iquenquetsataque.

1 ¹Iriotaque Quirishito intasanotarori itimi: irio Ashitarori Irineane oamejeitaqueeri. Itsipatarini Tasorentsi, tempa Tasorentsi ini iriori. ²Itsipatarini peerani iriori. ³Iriotaque vetsicajeitirori maaroni, paitaricapee. Tecatsi imashiye-tachane: eirome itimime eiro ovetsicayeta-me timayetaintsiri. ⁴Iriotaque oaneajeitaqueeri, quitaitetacojeitaqueeri: tempa iotacaajeitaquee jaoca icantari Tasorentsi. ⁵Peerani te ayojeiveitearini, oquempetimizeiteeni atimini tsiteniriqui; impoiiji ipocapaaque, iotacaajeitapaaquee, meeca oquempetimotaquee iquitaitetacojeita-quee. Meeca eiro atimajitsi aisati tsiteniriqui.

⁶Ari itimaveitani aparoni shirampari pajitachari Joa, itiancane Tasorentsi. ^{7,8}Iquenayetanaque, icamantacoyetapaa-queri yora quitaitetacojeitaqueeri, iquemisantajeitantariri maaroni atiri. Yora Joa caari ini quitaitetacotantatsi, irointiquea ineaqueri aisati iquenquetsatacotaqueri. Irootaque itiancantacariri Tasorentsi.

⁹Ari impoiiji ipocapaaque aca quipatsiqui yora quitaitetacotasantatsiri irinti, iotacaajeitaquee arori, aisati iriori maaroni savicajeitatsiri. ¹⁰Ari itimapaaque quipatsiqui, oca yovetsicaqueri peerani, iro

cantaincha te iriojeitavaqueriji atiri, yora yovetsicajeivetacari. ¹¹Ipcavetapaaca inampiqui, ishanincavetapaacari joriopee, iro cantaincha te iraacameetsajeitavaqueriji.

¹²Irintiquea aacameetsatavaqueriri, yora quemisantajeitavaqueriri: itasoncacoventa-jeitaqueri, ipeajeitajiri itomi Tasorentsi.

¹³Iriotaque Tasorentsi tomintajeitaqueeri arori, aisati maaroni quemisantajeitiriri iriori. Te inquempeteariji ashijeitaqueeri aca quipatsiquica, itimacaajeitiro irinti ijina itomi. Aisati tecatsi ancantajeite arori: “Nompeajeata nainti itomi Tasorentsi”, eiro amatirotsi. Tempa icoashita irinti, irootaque itomintajeitantaqueeri, maaroni.

¹⁴Tempa Tasorentsi ini yora Ashitarori Irineane: iponeanaca inquitequi, yatiritapaa-que, itimimojeitapaaquee aca quipatsiqui. Yashi yoiro ineshinoncajeitaquee, queariota-sanotaque oca yoamejeitaqueeri. Noneajeitavaqueri narori ipincatsaritanotaque, iquempetacari Tasorentsi; tempa iriotaque itomi irapintite.

¹⁵Yora Joa icamantacotaqueri Quirishito, icantajeitaqueri atiri:

—Jeri yoca nocamantacotaqueri chapiniqui: “Yanaacotaquena impoitapee-naneri, ipincatsaritananoti irinti. Te nompincatsariteji narori. Tequerani nontimeni narori, itimitani irinti”.

¹⁶Yashi yoiro ineshinoncatantaque Quirishito, irootaque ineshinoncatanteeri

arori. Aiquero ijatatii ineshinoncajeita-
quee. ¹⁷Peerani yora Moishishini,
isanquenatironi oca peranjaetaqueeri;
irintiquea Quirishito ineshinoncajeita-
quee, queariotasanotaque maaroni
yoamejeitaqueeri. ¹⁸Tecatsi atiri neerine
Tasorentsi, apaniro irinti ineiri itomi
irapintite. Iquempetacari iriri, tempa
quiso yoitarini, irootaque iotantacariri:
meeca yoamejeitaquee jaoca icantari.

Intanacaro Joa icamantacotaqueri Jesoshi.

(Mt. 3.11-12; Mr. 1.7-8; Lr. 3.15-17)

¹⁹Yora joriopee jerosaresati itiancayeta-
queri saserotepee, jeri ishanincapeeni
Irevi. Itiancaqueneri Joa, ari ijataque.
Isampitapaaqueri:

—¿Janicampimpa? ¿Avirompa
Quirishito naamaajeivetacari?

²⁰Ari te irimanacoteaji. Icamantasano-
tavaqueri:

—Caarina noni Quirishito.

²¹Yapiitajiri:

—¿Queariompa? ¿Avirompa Iriashini?

—Caarina.

—¿Avirompa camantantatsineri
naamaajeitacari?

—Caarina.

²²Isampitajiri aisati:

—¿Janicampimpa? ¿Paitampa noncaman-
tapeeriri tiancaquenari? ¿Paita pantiri?

²³Icantiri:

—Narotaque iquenquetsacotiniri peerani
Isayashini, tempa isanquenatini: “Coajica
impoque camantantatsineri, inquenquetsapi-
nite anta caaraiteriqui, incante: ‘Pinquenque-
shireempa, pinquemisanteri Avincatsarite
iroameetsatantempiri’”.

^{24,25}Ari isampitaqueri:

—¿Queariompa? ¿Caarimpimpa
Quirishito? ¿Caarimpimpa Iriashini?
¿Caarimpimpa yora camantantatsineri
naamaajeitacari impoque? ¿Paitampa
pivaotisantantariri ashanincapee?

²⁶Yacanaqueri Joa:

—Iro novaotisantantariri nija. Timatsi
meeca pashini shirampari caari piojeiti.
²⁷Iriotaque impoitapeenaneri, pincatsari-
tasanotatsiri ini. Oshequi nopincatsata-
queri, te nompincatsateji narori.

²⁸Aitaque icantapinita Joa anta
Vetaniaqui. Otimi Vetania intatiqueronta
Jorirani. Anta ivaotisantapinitinta.

Yapiitajiro Joa

iquenquetsacotajiri Jesoshi.

²⁹Otsipani quitaiteri yamenanaque Joa,
ineavaqueri Jesoshi, ipocapaaque.

Icantiri atiripee:

—Jeritapaaque ovishatsiri itianca-
queeneri Tasorentsi. Iriotaque oavisaco-
jeiterineri maaroni atiri caari cameetsata-
tsi. ³⁰Iriotaque noquenquetsacotaqueri
chapiqui: “Yanaacotaquena impoitapee-
naneri, ipincatsaritasanoti irinti. Te
nompincatsariteji nainti. Tequerani
nontimeni narori, itimitani irinti”. ³¹Te
niovetearini narori, iro cantaincha meeca
icoaque Tasorentsi iriojeiteri maaroni
ajorioririnte. Irootaque nopocantacariri
narori novaotisantantayeti.

^{32,33}Icamantantaji Joa aisati:

—Te niovetearini narori. Iro cantaincha
itiancaquena Tasorentsi, icantaquena:
“Pivaotisantapiniteri pishaninca nijaqui,
poamejeiteri inquenqueshirejeitanaquea.
Coajica pineavaquero aniireapee noshire.
Janicarica aatapaaqueri, iriotaque yora
pajeiterineri atiripee noshire”. Ari impojji
noneavaquero aniireapaaque Ishire
Tasorentsi, oponeanaca inquitequi.
Oshiavetapaacari sampaquiti: aatapaa-
queri Jesoshi. ³⁴Queario noneasanota-
quero. Irootaque nocamantacotantacariri:
“Iriotaque Itomi Tasorentsi”.

Intanacaro Jesoshi

icoyeaqueri iroamerepee.

³⁵Oquitaitetamani icatiaja Joa aisati
ara, itsipatacari iroamere apite. ³⁶Ipam-

poyeaqueri Jesoshi yaniiti anta avotsiqui. Icanti:

—Jeri yonta ovishatatsiri itiancaqueeri Tasorentsi, iriotaque camimentajeiteeneri oameetsajeitajeeneri.

³⁷Iquemantavacariri iroamere apite, yojajeitanaqueri Jesoshi. ³⁸Ipitsocashitanacari iriori, ineavaqueri yojatapaqueri. Icantavaqueri:

—¿Paita picoiri?

Icantanaqueri:

—¿Jaoca pisaviquiri maishitoro?

Acantiri maishitoro aneanequi arori: oametantatsiri. ³⁹Ari icantiri:

—Poijatanaquena, nonijayempiro.

Irosati yojajeitantanacari, ineapaaquero ivanco isavicantari. Ari ishavijiiteanaque catsirincaiteri, irosati isaviquimojeitantapaacari. ⁴⁰Ari ipajita aparoni savicapantsiri Antirishi, iriotaque irirenti Shimo Petero. ⁴¹Impoiji ijatanaque Antirishi, icoapaaqueri irirenti. Ineantapaacariri, icantapaqueri:

—Noneaqueri Meshiashi.

Acanti Meshiashi aneanequi arori:

Quirishito. ⁴²Icantiri:

—Tsame, poijatanaquena, pineapeeri.

—Tsame.

Ari yareetacaacari Jesoshiqui. Yamena-vaqueri, icantavaqueri:

—Tempa aviro Shimo, itomi Jonashi.

Coajica impajiyeeetajempi: Sejashi.

Acantajeitiri Sejashi aneanequi arori: Petero, mapitatsiri. ⁴³Otsipaniqui quitaiteri ijataque Jesoshi pashiniqui quipatsi. Opajita quipatsi Carirea. Ari ineapaaqueri Jeripi, icantapaqueri:

—Poijatanaquena.

⁴⁴Yora Jeripi vetsairasati ini. Vetsaira irootaque inampi Antirishi, jeri Petero.

⁴⁵Jeripi ineapaaqueri Natanaeri. Icamantapaqueri:

—Noneaqueriyea yora isanquenatacotitacani peerani Moishishini. Aisati camantantatsiniri isanquenatacotitajeita-

carini iriori. Iriotaque Jesoshi, itomi Jose nasaretasati.

⁴⁶Icantanaqueri Natanaeri:

—Te incameetsajeiteji nasaretasati.

¿Icameetsatimpa iriori?

Yacanajiri Jeripi:

—Tsame, pamenaiteri, piotanteariri icameetsatirica.

⁴⁷Ari iquempejijeitapaacari Jesoshi, ineavaqueri ipocapaaque, icantiri itsipajeitari:

—Pamenerite yora Natanaeri. Iriotaque quempetasanotariri Ishiraeri: icameetsataque, te irioteji iramatavitante.

⁴⁸Isampitapaqueri Natanaeri:

—¿Jaoca picantacari piotantavaquenari nocameetsati?

Yacanaqueri Jesoshi:

—Noneitaquempi anta pitsititaro iyera, tequerata incamantempi Jeripi.

⁴⁹Icantaqueri:

—Tempa aviro itomi Tasorentsi: pitsoteaquero maaroni, pioyetiro. Avirotaque pincatsariverterineri joriopee.

⁵⁰Icantiri Jesoshi:

—Pamene, incaranqui nocantaquempi: “Noneitaquempi pitsititaro iyera”.

¿Irootaquempa piquemisantantaquenari? Ari pineaquero coajicani nontasoncanta-sanoyetanaque, impoijiquea pinquemisantasananotanaquena. ⁵¹Queario oca nocantimpiri. Aitaque pineaquero coajica inquite tsompoina. Pineaqueri inampire Tasorentsi iraniireashitena, iroancanajea aisati. Tempa naro poneachari inquitequi, natiritapaque.

Ijivataque Jesoshi itasoncantaque.

2¹Avisanaque mava quitaiteri, aitaque iquimoshirejaitanaque canasati. Otimi Cana Carireaquei. Yoveshireimenta-jeitacari aparoni shirampari aatsiri ijina. Ainiro iroori iriniro Jesoshi. ²Ari icajema-canteetaqueri aisati Jesoshi, aisati narori,

jeri aisati itsipapee iroamerepee. ³Ari nirajeitapaaque ovaja; nocarajeitaqueri itsipapee pocajeitatsiri. Otsaatapaaca, te ointimeji aisati. Iriniro Jesoshi ocantiri otomi:

—Te aneajeroji ovaja: ¿arimpa pimataquero pamicoteri?

⁴Icantiro:

—¿Paita, ina, picantantanari? Tequera-tsita omoncarateaji nontasoncantayete.

⁵Iro cantaincha ocantiri nampirentsi:

—Pinquemisanteriyea paitarica imperanataquempiri.

⁶Onaque ara chomo, ocarati 6. Yovetsiqueetiro mapi, antearo oni. Irootaque onantari nija iquivapinitantari joriopee.

⁷Jesoshi icantajeitiri nampirentsi:

—Pisaje nija chomoquira.

Isajeitanaque, ijaajeitaquero. ⁸Irosati icantantanacariri:

—Pinquite meeca. Paacotanaqueneri peranatimpiri.

Yaacojeitanaqueneri. ⁹Ineantavacarori, opeanaja ovaja aisati. Te irioteji perantari nampirentsi jaoca oquenacotapaajiri. Irinti iotaintsi nampirentsi quitaquerori nija. Irosati icajemantacariri aatsiri ijina. ¹⁰Icantiri:

—Tempa iro ajivatapinitiri cameetsajari ovaja. Ariorica ashinqueitanaquea ompocacotapee masancajari. Aitaque ocantari amejeitari. Aviroyeata quempo-yeaquerori cameetsajari. Iroaquera meeca pamacantajiro aisati.

¹¹Otimi Cana anta Carireaquei. Ijivataque Jesoshi anta itasoncantaque. Nocarajeitaqueri itsipapee iroamerepee noneajeitaquero, irosati noshirejeitantanacariri.

Isavicaque Jesoshi Caperenaouqui.

¹²Irosati noircantajeitanaca Capere-naouqui. Itsipatanacaro Jesoshi iriniro, irirentipee, narori, itsipapee iroamerepee aisati. Nomaajeitanaque anta aparopee quitaiteiri.

Yoimisoquijaqueri pimantatsiri anta ivancoqui Tasorentsi.

(Mt. 21.12-13; Mr. 11.15-18; Ir. 19.45-46)

¹³Irotimataintsi quitaiteiri iquimoshire-jeitantapinitari joriopee, ipajiyeeitiro: yavisantaniri. Iro iquenqueshiretiri quitaiteiri peerani yavisantaniri inampire Tasorentsi anta Ejipitoqui: te iroyeriji itomipee jorio, irinti yoaque itomipee ejipitosati. Ari itoncaanaque Jesoshi Jerosarequi. Nocarajeitanaqueri itsipapee iroamerepee, noijajeitanaqueri. ¹⁴Noneajeitapairi ivancoqui Tasorentsi pimantajeitiriri vaca, ovisha, sampaquiti, maaroni. Isavicajeitaque ara pinavacaayetariri atiri iirequite. ¹⁵Ari yampitsataquero Jesoshi iviritsa impasatanteariri vaca. Irosati yoimisoquijacantajeitacariri ovisha, vaca, maaroni. Ipitamonquitaqueri imesatepee pinavacaariri iirequite, itequitaqueri iirequite. ¹⁶Icantiri pimantajeitiriri sampaquiti:

—Poimisoquijajeitajeri yoca. Eiro pipimantayetitsi aca ivancoquica Apa.

¹⁷Irosati noquenqueshireantajeitanajarori isanquenatitacaniri: “Icanti Quirishito: ‘Nonsaneacotearo, Apa, pivanco; irootaque iroimenteetenari coajicani’”. ¹⁸Icantanaque jorio:

—¿Paita pantantarori oca? ¿Paita pinijayenari niojeitantempiri avirorica Tasorentsi?

¹⁹Yacanaqueri Jesoshi:

—Pintireajerorica oca ivancoca Tasorentsi, ari oncarate mava quitaiteiri novetsicajero aisati.

²⁰Irosati icantantanacariri:

—Ocarati 46 osarintsi yovetsicanteetarori pancotsica. ¿Ariompa oncarate mava quitaiteiri povetsicantajearori avinti?

²¹Ja, irisati shiacantaincha. Tempa iriotaque shiaquerori ivanco Tasorentsi, tempa quiso yoaqueri. ²²Icamanaque,

ocarataque mava quitaiteri itinaantana-jari aisati. Impoiji, aitaque noquenqueshireajeitanajiro oca ishiacantaqueri. Aisati niotanaquero oquenquetsatocotaqueniri peerani sanquenarentsi, moncarata meeca maaroni oquenquetsatocotaqueriniri.

Intayetanaca

iquemisantajeitaqueri Jesoshi.

²³Areetapaaja aisati yavisantaniri, iquimoshirejeitantari. Itimapaaji Jesoshi Jerosarequi, oshequi itasoncantayetapaaque. Ineayetaqueri atiri, irootaque iquemisantantajeitacariri oshequi. ²⁴Yora Jesoshi ioti jaoca icantashirejeitari maaroni atiri, irootaque yaamaventantanacari: “Yayeetanacari”. ²⁵Iojeitaqueri atiri jaoca ocantajeitari iquenqueshirejeitari. Iotashitaca, tecatsi camanterineri.

Yora Nicoremo

yananincashitanaqueri Jesoshi.

3 ¹Itimini aparoni shirampari pincatsariventiriri joriopee, ipajita Nicoremo. Variseo ini. ²Ari yananincashitanaqueri Jesoshi, icantapairi:

—Niotaquempi, oametanari, piponeaca Tasorentsiqui; irootaque pipocantacari, poamejeitapeena. Eirome itsipatimpime Tasorentsi, eirome pitasoncantime.

³Icantiri Jesoshi:

—Queariotaque oca noncamantempiri: yora caari apiitajanchane intimaje, tecatsi incantea irijate anta ipincatsarintinta Tasorentsi.

⁴Icantiri iriori Nicoremo:

—Ariorica anteashiparitanaje, ¿jaoca ancantajeiri intimaje aisati? ¿Arimpa amatajaro ampianajero otomontequi anironi ontimacotantajeeri aisati?

⁵Yacanajiri:

—Queariotaque oca noncamantempiri. Maaroni caari vaotisatajachane nijaqui, aisati maaroni caari ontimaje Ishire

Tasorentsi, tecatsi incantea irareetea anta ipincatsarintinta Tasorentsi. ⁶Tsinane, ariorica ontimeri otomi, irishanincatajeiri iriri. Aisati oquempevetaca Ishire Tasorentsi: ariorica ontimajeri atiri, irishanincatajeiri Tasorentsi. ⁷Ariorica noncantempi: “Pampiitajea pintimaje”, eiro poanatsi cavaco. ⁸Jaocarica oninti, ojeaoncaque tampea, piquemavaquero opoimatapaaque, sooo. Iro cantaincha te pioteji jaoca oquenapaaqueri, aisati te pioteji jaocarica ojateri. Aisati iquempevetaro maaroni otimajiri Ishire Tasorentsi.

⁹Icantajiri Nicoremo:

—¿Jaoca ocantari oca pishiacantanari?

¹⁰Yacanajiri iriori Jesoshi:

—¿Caarimpimpa oamejeitiriri ajorioririntepee? ¿Paita caari piotantavacaro oca nocantimpiri? ¹¹Queariotaque oca noncamantempiri: nocamantacotiro

nioyetiri aisati noneayetiri, iro cantaincha te pinquemisanteroji nocamantayeve-timpiri. ¹²Jero noquenquetsavetimpiro ineyetiri aca quipatsiquica, iro cantaincha te pinquemisantenaji. Nonquenquetsatemprome timayetatsiri inquitequi,

¿arimpa pinquemisantaquenname? ¹³Aitaque noponeari narori inquitequi, natiritapaaque; coajica nompianaje aisati. Noquenquetsatocotirorica inquite,

niotaquero nocantaqueri. ¹⁴Peerani anta caaraiteriqui yatsicajeitaqueri ashanincani oshequi maranquepee. Ari icantirini

Tasorentsi: “Pishiacanteri maranque, poatiacoteri inchaquiqui iramenajeitanteariri atiripee, eiroquea icamajeitantatsi maaroni amenajeiterineri”.

Ari yoatiacotaqueri Moishishi, yavisacojeitantajari oshequi atiri. Aisati narori iroatiacoeyetaquena, coajica. ¹⁵Maaroni quemisantenaneri incantaitiyempani iraneajeitanaje anta inquitequi. ¹⁶Inintasanojeitiri

Tasorentsi maaroni atiri, irootaque itiancantaquenari aca quipatsiqui.

Narotaque itomi irapintite. Incantaitati-yempani iraneajeitapaaje inquitequi maaroni quemisantajeitanari; eiro catsini ijatitsi ishaaviji maaroni quemisantajeitanari. ¹⁷Te iro intiancantena Apa noasanquetaajeiteri atiripee, irointi itiancantaquena noavisacojeiteri. ¹⁸Eiro yashinoncaajeitatsi maaroni quemisantana-nari. Iro cantaincha iroasanquetaajeita-queri Apa maaroni caari quemisantana. Iro iroasanquetaanteariri, itseencajeitana. ¹⁹Nopoqui noamejeiteri atiri jaoca icantari Tasorentsi aisati iriotanteari intimajeite cameetsa: oquempevetaca noquitaitetacovetacari atiri. Iro cantaincha yantapinjaitiro caari cameetsatatsi, te incoajeiteji iriojeitero oca noamejeive-tacariri; oquempetaca inintasanojeitiro tsiteniri irointi. Te incoajeiteji intimajeite quitaiteriqui, icantajeiti: “Ineiteerocari Tasorentsi antayetiri, yoasanquetayee-cari”. ²⁰Yora antajeitirori caari cameetsa-si iquisajeitana. Te incoajeiteji impocashitena: iotaque nonijaantiteri caari cameetsatatsi yantajeitiri, irootaque caari ipocashitantana inquemisantana.

²¹Antirori cameetsayetatsiri, iriotaque pocashitanari irinti. Nonijayetiri ocameetsajeitaque yantayetaqueri. Tempa irio Tasorentsi antacaajeitiriri cameetsayeta-siri, irootaque caari ipashiventanta ipocashitana.

Irootaque icantaqueriri Jesoshi

Nicoremo.

**Mavatanaque iquenquetsatacotiri
Joa Jesoshi.**

²²Irosati ijatantanaja Jesoshi Joreaqi, nocarajeitanaqueri itsipapee iroamerepee, noijajeitanaqueri. Nosavicajeitapaaji anta, novaotisantapaaaji. ²³Aisati iriori Joa, ivaotisantanti aisati Ainoqui, oquempejitaro Sarimi. Oshequitapai nija anta. Ijatashijeitanaqueri oshequi atiri irivaotisantanteariri. ^{24,25}Tequeratsita

iroiminqueeteriji Joa. Yora iroamere, ipiatsatacarari aparoni jorio. Iro ipiatsata-vacaimentari jaoca ancantajeitajeari ancameetsajeitantajeari. ²⁶Irosati ipocashitantapaacari Joa iroamere, icantapaaqueri:

—Oametanari, jeri ivaotisantanti yoranqui pitsipatariranqui chapinqui intatiqueronta Jorirani. Yoranqui picantiri Quirishito. Irootaque ijatashijeitantanacariri maaroni atiri, meeca yojocajeitanaquee arori. ¿Paitaquea?

²⁷Yacanaqueri Joa:

—Tecatsi amatashitea arori, irintiquea Tasorentsi jenoquisati matacayeroriri maaroni cameetsayetatsiri. ²⁸Piquemajeitakuena nocantaqueri chapinqui: “Caarina noni Quirishito. Itiancaquena Tasorentsi nojivataqueri”. ²⁹Yora aintsiri ijina, iriotaque aasanotirori. Yora ishaninca icarajeitiri inquimoshireimenteari inquemavaqueririca irineanate. Aisati meeca noquempetari narori. Oshequi noquimoshireimentasano-taque iriori Jesoshi. ³⁰Aiquero ijatatii ipincatsaritasanotanaque irinti. Narori, te: ³¹eiro nopincatsarititsi. Yoraquea poneachari jenoqui ipincatsariventasano-tanti irinti. Aroquea quipatsisati ashanincatasanojeitari savicajeitatsiri quipatsi-qui, te ampincatsarijeiteji. Aquenquetsatacotiro oca aneyetiri aca quipatsiqui. ³²Yora poneachari inquitequi icamanta-coyetiro paitarica ineyetiri aisati iquemayetiri anta. Iro cantaincha te intimasanoveteaji quemisantasano-tava-queroneri icantaqueri. ³³Irintiquea maaroni quemisantavaqueroriri, ioti irinti otampaticatasanotaque maaroni icantiriri Tasorentsi. ³⁴Iriotaque Tasorentsi tianqui-riri Jesoshi, meeca yoametapaaqueero irineane. Yora Tasorentsi te intsaneempa-roji Ishire, quiso oajeitaquee. ³⁵Apa jenoquisati inintiri Itomi, itiancaqueeri ipincatsariventajeitee maaroni. ³⁶Maaroni

quemisantajeiterineri Itomi Tasorentsi incantaitatijempani iranee inquitequi. Eiro ijatitsi inquitequi caari quemisante-rine irinti, irosati incantatijempani Tasorentsi inquisheri irinti.

Ijati Jesoshi Carireaquei.

(Mt. 4.12; Mr. 1.14; Ir. 4.14)

4 ^{1,2}Yora variseopee iquemacotaqueri Jesoshi, icantajeitiri atiri:
—Jesoshi yanaacotiri Joa yoametanti. Oshequi iquemisantacaaqueri atiri, oshequi ivaotisantanti.

Te iri Jesoshi vaotisaterine atiri, narojeitaque nainti iroamerepee vaotisa-tantsiri. Iotaque Avincatsarite icantaqueri variseopee, ³yojocanajiro Jorea, ipianaja aisati Carireaquei.

Iquenquetsatacaaquero Jesoshi samariasato.

^{4,5}Iquenanaaji Jesoshi Samariaqui, noijatanaqueri narori. Narejeitapaacaró nampitsi samariaquiniri pajitachari Shicari. Oquempjitaro iipatsiteni Jacovoni: oca ipaqueriniri itomini Jose. ⁶Otimi ara iyanareni Jacovoni. Imaota-paaque Jesoshi, tempa noponeajeitaca arejiqui. Isaviquimotapaaquero iriori iyanareni. Irotimataintsi intampaticate catsirincaiteri. ⁸Notsipatacari itsipapee iroamerepee, nojajeitapainti nampitsiqui namanantapaintiro noyeyari. ⁷Irosati opocantapaaca tsinane samariasato, onquitaate nija. Icantavaquero Jesoshi:
—Pimpacotena nire.

⁹Ocantiri:

—¿Caarimpimpa jorio? ¿Paita pamanantanari nija? Samariasato noni.

Te iraacameetsajeiteriji jorio samaria-sati, irootaque ocantantacariri. ¹⁰Yacana-queri Jesoshi:

—Te piteji paitarica inintacaquem-piri Tasorentsi nomatempiri. Aisati te pietenaji narori, janicanarica. Nocanta-

quempi: “Pimpacotena nireta”. Iro cantaincha piotaquenname, pincantaque-name avinti: “Aviro avinti penaneri nireri”. Irosati nompashitantemprome nija oaneantatsiri.

¹¹Ocantanaqueri:

—Tecatsi pinquitaatanteari. Tsompoina oni nija. ¿Jaoca payerori oca nija ovaneantatsiri? ¹²¿Panaacotirimpá yora Jacovoni, quianatironiri oca iyanareni? Irironi nijaca, irajeitroni itomipee iriori, aisati ivira. Irosati meeca nirajeitiro narori. Ocameetsajataque nijaca: ¿pjiitimpá ari pimpajena nija anaacotero-neri oca ocameetsajati?

¹³Yacanajiro aisati:

—Irimirejeitanaje aisati maaroni irapinitirori oca nija. ¹⁴Irintiquea yora iraqueroneri nija nompaueriri nainti: eiro imiretajitsi aisati. Ora nija nomperiri amotoapaaque ishiquei, irootaque aneacaajerine incantaitatijempani.

¹⁵Ocantanaajiro tsinane:

—Pimpenaroqueti meeca ora nija picantaquenari, eiroquea nomiretantaja-tsi. Eiro natsipetajatsi nompocaje nonqui-taataaje aisati.

¹⁶Icantanajiro:

—Pijate meeca, pincajemaitenari pijime, pimpiaje aisati.

¹⁷Acanajiri:

—Te intimeji nojime.

Icantanajiro:

—Queariotaque picantaquenari: “Te intimeji nojime”. ¹⁸Icarajeitaque pijime paavetacari apapacoroni. Yora pitsipatari meeca caari ini pijime. Queario picanta-quena.

¹⁹Ocantanaajiro:

—Aviroyeata camantantatsiri: aparo meeca nosampitempi. ²⁰Aca toncaariqui iquemisantapinijeitiri noshaninca Tasorentsi. Avirojei jorio, picantajeiti avirori cameetsa anquemisantajeite Jerosarequi. ¿Paitaquea anashitavacantacari?

²¹Icantanajiro:

—Pinquemisantero oca noncamantem-
piri meeca. Coajica eiro piquenqueshire-
tajirotsi jaocarica pinquemisanteriri
Tasorentsi. Atsipetashita aquenqueshire-
tashitaro jaoca anquemisanteriri, irointi
cameetsatasanotatsiri anquenqueshiretero
janica aquemisantiri. ²²Avirojei samaria-
sati te piojeivetaryi yora piquemisan-
jeivetaryi. Narojei, jorio, niojeitiri nainti
janica noquemisantajeitiri. Jorio irine
oavisacotantatsineri. ²³Moncarataca
pinquemisantasanojeiteri Apa:
pincoaqueric, ari amitacojeitempi Ishire
Tasorentsi, oamemtempo quearioyetsiri.
Aitaque icoaque Apa inquemisantajeiteri
maaroni coyeroneri Ishire oamejeiteri.
²⁴Te ontimeji ivatsa Tasorentsi, irointi
Ishire. Coatsiri inquemisanteriri Tasorentsi
inquemisantasanotero Ishire iriotantea-
rori quearioyetsiri.

²⁵Ocantanajiri:

—Niotaque impoque Meshiashi, yora
icanteetiri Quirishito. Irareetapeemparica
iriotacaajeitapaajee maaroni.

²⁶Icantanaquero:

—Narotaque nainti Quirishito neanata-
quempirica.

²⁷Irootaque icantaquerori Jesoshi. Irosati
narori, nocarajeitiri itsipapee iroamerepee,
narejeitapaaja. Noneapaaqueri iquenque-
tsatacairo tsinane, noajeitapaaque cavaco.
Iro cantaincha te nosampitapeeri: “¿Paita
picantirori tsinane? ¿Paita piquenquetsata-
cantarori?” Namenashitapaacari.

²⁸Irosati ojocantanacaro ochomone,
ojatanaque nampitsiqui. Ocamantapairi
onampiquiniri:

²⁹—Tsame, poijajeitanaquena. Nonija-
yempiri shirampari cantaquenari
maaroni, paitarica nantayetiniri.
Irioyeata Quirishito.

³⁰Irosati yoiyajeitancaro irameneri
Jesoshi. ³¹Irosatiquera nonajeitaque
iiyanareniqui, nocantavetaryi Jesoshi:

—Oametanari, poyea.

³²Icantana:

—Timatsi noari narori caari piojeiti
avinti.

³³Irosati nocantavacaajeitanaoca:

—¿Yameetinirrimpa yoari?

³⁴Icantanaquena:

—Nantiniri tiancaquenari inintaca-
nari: oquempetimotaquena noaca, te
meeca nonquemeroji notashe. ³⁵Ariorica
pipanquitiro pivanquire, tempa picanta-
vacaajeita: “Itisipasatinivani cashiri
ajeitantearori avanquire”. Pinquemisan-
tajeitero noncamantajeitempiri meeca:
piotavaquero noshicantempiri. Pamen-
ajeitero panquirentsi: sampatanaque,
³⁶moncarataca iranteeteorori. Impinateri
ashitarori, impoiji inquimoshirejitana-
que: yora ashitarori, aisati iratiritepee,
maaroni. Aviro noshicantiri aayetirori,
irio Tasorentsi ashitarori. Ariorica
pinquemisantacayeri atiri impinatempiri,
aisati incantaitiyempani iranee maaroni
pinquemisantacaajeiteri. Iramptojeiteri
Tasorentsi maaroni irioriqui, anquimoshi-
rejeitantajeiri, maaroni. ³⁷Queariotaque
oca icantapiniyeetiri: “Yora panquitaque-
rori, eiro yaayetirotsi; irinti pashini
aajeroneri”. ³⁸Notiancajeitaquempi nainti
pajeitanteorori caari pipanquiti avirori.
Timatsi pashini panquitaquerori, pimpo-
jeitajeri avirori. Ari pimoncaratavacaajei-
taca pantajeitaquero nocoacaajeitaque-
piri.

³⁹Irosati aretantajari tsinane aisati
maaroni oijajeitaquerori. Iro ipocajeitan-
tacari ishirejeitavacaro ocantapaaqueriri
tsinane. Ocantapaaqueri onampipeequi-
niri incaranqui: “Icantaquena Jesoshi
maaroni, paitarica nantayetiri: irioyeta
Quirishito”.

Irootaque iquemisantajeitancacari
Jesoshi oshequi. ⁴⁰Irosati ipocashijeitan-
tacari, icantapairi:

—Pisaviquimotanaquenatsita.

Ari isavicanaque apite quitaieri,
⁴¹Iquenquetsatacanaqueri. Iquemisanta-
 sanojeitanaqueri oshequi. ⁴²Icanta-
 jeita-
 quero tsinane:

—Noquemisantavetacaro picantaque-
 nari, iro cantaincha meecaquea noquema-
 sanotaqueri iriori Jesoshi, irootaque
 niojeitancari queario oni picantaque-
 nari. Iriotaque oavisacojeiteeneri.

Iriotaque yoca Quirishito.

⁴³Ari apite imaaque Jesoshi anta,
 irosati ijatantanajari. Ijatanaji aisati
 Carireaquei. Narori, noijajeitanaqueri.

⁴⁴Jero oca icantapinitiri Jesoshi: “Te
 impincatsatasanoteriji yora inampipee-
 quiniri camantantsiri, irointi itseencapi-
 nitiri ishanincasanori”.

⁴⁵Ari narejeitapaaja Carireaquei.
 Yaacameetsajeitavaqueri carireasati
 irinti. Ijajeitanaque chapinqui iriori anta
 Jerosarequi, iquimoshirejeitinta. Aitaque
 anta ineyetaquero yantayetiri Jesoshi.
 Irootaque meeca ineacameetsajeitanta-
 riri.

**Ipianaja Jesoshi Carireaquei,
 yoavisacotiri itomi pincatsari.**

⁴⁶Ipianaja aisati Jesoshi Canaqui: ora
 carireaquiniri. Anta chapinqui ipeaquero
 nija ovaja. Itimaiti Caperenaquero pincatsari,
 yojoquiitaca itomi. ⁴⁷Iquemacotavaqueri
 Jesoshi, iponeanaja Joreaquei, yareetapaaja
 Carireaquei. Ari ijatashitanaqueri, icantapairi:
 —Irotaintsi incame notomi. Tsame
 poavisacotajanteneri.

⁴⁸Icantaqueri Jesoshi atiripee:
 —Eirorica notasoncantayeti, çariompa
 pinquemisantajeitena? Aitaque picanta-
 jeitiri avirori, pitseencajeiti.

⁴⁹Icantanajiri aisati:
 —Intsipajte apa, pijate novancoqui.
 Icamicari notomi.

⁵⁰Icantanaqueri:
 —Pijataje meeca. Eiro icamitsi pitomi,
 aitaque irivasacotaje.

Iquemisantaqueri icantaqueriri,
 ijatanaji. ⁵¹Nianqui itonquiotavacari
 inampirepee, icantavajiri:

—Avisacotanaji pitomi.

⁵²Irosati isampitantavacari:

—¿Jaoca ocaratiri yavisacotantajari?
 Yacanajiri:

—Oshaiteji, itaanaji catsirincaiteri,
 aitaque opeanaja iyatsiire.

⁵³Iquenqueshireanajiro aitaque icaratiri
 catsirincaiteri icantantacariri Jesoshi:

“Eiro icamitsi pitomi”. Ari iquemisanta-
 naque iriori. Aisati iquempjeitaja
 maaroni ishaninca, iquemisantajeitaji.

⁵⁴Ari meeca isaviqui Jesoshi Carireaquei,
 iponeanaja chapinqui Joreaquei. Ocaratiri
 meeca apite itasoncantaque Jesoshi anta.

Yoavisacotiri mantsiari anta incajarequi.

5 ¹Irosati iquimoshirejeitantanaja aisati
 joriopee. Itoncaanaji Jesoshi Jerosare-
 qui, tonca, tonca. ²Otsapiqui nampitsi otimi
 yoiminqeantapinitariri ovisha. Otimi anta
 quempeji incajare. Irineanequi Evereo
 opajita Vetsata. Otimi anta pancotsipee
 apapacoroni. ³Irootaque inariantajeitari
 joquijeitachari oshequi. Yapatojeita
 quitapoajari, mayempiri, choriveetsiri.
 Yoyeajeitiro nija oshevajatajea. ⁴Yaniireashi-
 tapinitiro incajare inampire Tasorenti.
 Ishevajatacapinitaro nija, irosati
 iqueajatantarori yora joquijeitachari.
 Jaocarica itimiri jivatasanotsiri iqueajata-
 que, yavisacotaji; opeanaja paitarica
 oavetariri. ⁵Itimaiti ara aparoni shirampari
 joquieitachari: ocaratiri 38 osarinti yojoqui-
 tantacari. ⁶Ineapaaqueri Jesoshi inariaita.
 Iotacotapaaqueri aitaque ocaratiri yoshequi-
 taquero osarinti. Icantiri:

—¿Picoimpa pavisacotaje?

⁷Yacanaqueri:

—Tecatsi queajatacayenane ariorica
 oshevajaveta nija. Irointita nopomeren-
 tsita narori, irosati yanaacotantanari
 itsipapee: iqueajatanaque irinti.

⁸Icantanaqueri Jesoshi:

—Pintinaanaje, pajiricajero pinariantaveitari, paniitanaje.

⁹Irosati yavisacotantanaja. Yajiricana-jiro inariantaveitaniri, irosati yaniitantanaja.

**Icantavacaimentaro
quitaiteri imaoreantari.**

Irootaque saavaro, quitaiteri imaoreantetari. ¹⁰Irootaque icantajeitancacari joriopee yora avisacotajantsiri:

—Irootaque meeca quitaiteri amaoreantajeitari. Te oshinetanteaji paanajero meeca pinariantari.

¹¹Yacanaqueri:

—Yora oavisacotajanari irio cantanari: “Paanajero pinariantaitari, paniitanaje”.

¹²Irosati icantantanajari:

—¿Janicampa cantaquempiri?

¹³Te irioteji iriori janicarica oavisacotajiriri. Itimaiti ara oshequi atiri, ipeimotanacari Jesoshi. ¹⁴Impoji inejiri aisati anta ivancoqui Tasorensi. Icantiri:

—Pineaquero, avisacotajimpi meeca.

Eiro pantajirotsi aisati caari cameetsatsi. Apiitajimpicari, omatasanoticari catsini.

¹⁵Irosati ijatantanaja shirampari.

Icamantapaajiri joriopee:

—Irio oavisacotajanari Jesoshi.

¹⁶Irootaque iquisajeitancacari joriopee Jesoshi. Iro icoantacari iroyerime, ineaqueri yoavisacotantaque quitaiteriqui imaoreantajeitari. ¹⁷Iro cantaincha icantanaqueri:

—Irosati icantani Apa yantayetiro cameetsatsiri. Aisati noquempetacari narori: ¿paitampa noimpacaantearori saavaroqui?

¹⁸Aiquero catsini icoasanotanaiti iroyerime. Ineaqueri Jesoshi yantaveetantaro quitaiteri imaoreantajeitari. Iquemaqueri aisati icanti: “Iriotaque Apa Tasorensi”. Irosati icantantanaca joriopee:

—Ijitasorensitacateemi, te incameetsateji.

**Yora Jesoshi imoncarayetacari iriri,
paitarica yantayetiri.**

¹⁹Yacanajiri Jesoshi:

—Queariotaque oca noncamantempiri. Naro itomi Tasorensi. Te nantaveetashiteaji, irointiquea nomoncarayetaquero paitarica noneacotiriri yantiri Apa.

²⁰Inintaquena iriori, yoameyetaquenaro maaroni nantayetiri. Coajica irimatacayena nomatasanyetero catsini nontasoncantayete, poantenari cavaco. ²¹Tempa yoitinaapiniyetiri Apa camayetatsiri, yoaneajiri. Aisati nonquempetea narori, noaneajeri janicarica noncoacayeri.

²²Eiro icantacoventiritsi Apa atiri, eiro catsini; irootaque itiancantaquenari nainti noncantacoventanteariri. ²³Icoaque Apa impincatsajeiteri maaroni atiri.

Aisati icoacaaquena narori, impincatsajeitena maaroni. Yora caari pincatsatana narori, te impincatsateriji aisati Apa, yora tiancaquenari. ²⁴Queariotaque oca noncamantempiri. Maaroni quemeroneri noneane, ariorica inquemisanteri tiancanari, incantaitiyempani iraneajeitanaje inquitequi. Eiro yoasanquetairitsi Apa. Incamavetaquea, iro cantaincha iraneanajiri. ²⁵Queariotaque oca nocantimpiri. Irotimaintsi yora camavetainchari inquemajeitena noneanate:

tempa naro Itomi Tasorensi. Icantaitiyempani iraneajeitanaje maaroni quemajeitenaneri. Aitaquequea meeca omoncarataca inquemajeitantenari.

²⁶Irisati aneashitacha Apa. Aisati icoacaaquena narori nomoncarayatitari, narosati aneashitacha narori. ²⁷Tempa noponeanaca inquitequi, natiritapaque.

Irootaque itiancantanari noncantacoventeriri maaroni atiri. ²⁸Eiro poajeititsi cavaco. Coajica inquemajeitena noneanate maaroni yora tijajeivetai-

chari. ²⁹Aitauque intinaajeitanaje antirori cameetsayetatsiri, iraneajeitanaje aisati. Aisati iriori antayetirori caari cameetsatsi: intinaajeivetanajea, iro cantaincha noashinoncaasanojeiteri irinti. ³⁰Tecatsi noncantea nantashitearo. Nocantacoventantirica, nomoncarataquero icantanari Apa. Tampatica nocantacoventari. Te nantashitearoji paitarica nonintiri narori, irointi nantiniri Apa tiancanari inintacaaquenari iriori.

Apa icamantacotaqueri Itomi.

³¹Aisati icantajeitiri Jesoshi:

—Narosatirica camantacotachaneme apaniro pincanteme: “Te ontampaticateji icantiri”. ³²Iro cantaincha ainiro pashini camantacotitananiri: yora Joani. Nioti queario oni icamantacotanari iriori.

³³Pitiancayetaqueri pishaninca, pisampitacantaqueri. Ari icamantacotasanoquero queariotasanoatsiri, icamantaquempi: “Iriotaque Jesoshi Quirishitotsiri, Itomi Tasorentsi”. ³⁴Te oncantimoneentenaji incanterica atiri: “Icameetsati Jesoshi”, iro cantaincha nocoaque pavisacojeitaje, irootaque nocamantantimpirori oca. ³⁵Yora Joa iquempevetacarero tsiomentotsi amorecasanoatsiri. Pineajeitavaqueri itsiojeitapaquempi: tempa oshequi iotacaajeitakuempi.

Piquimoshireventajeivetavacari osamani. ³⁶Timatsi aisati otsipa iotacaquempiri, ora anaacotiriri Joa, piotasanoantenari. Apa itiancaquena. Meeca nontsoteeneri icantaquenari. Paitarica nantayetiri narori, irootaque piotantenari

itiancaquena Apa. ³⁷Aisati icamantacotaquena Apa tiancaquenari. Queario, te pinquemapiniteriji irineanate, aisati te pineapiniteriji jaoca icantari. ³⁸Iro cantaincha te pinquemisanteriji itiancane, irootaque caari pishiretantaro irineane.

³⁹Pineanatapinijeitakuero Sanquenarentsi, tempa pijitashijeivetaca ariorica

pineanatero, pincantaitiyempani paneajeitanaje. Tempa irootaque camantacotanari. ⁴⁰Iro cantaincha te pincoyeji paventena noaneantajeitajempiri. ⁴¹Te oncantimoneentenaji pineacameetsajeitanarica. ⁴²Niojeitimpi nainti, te pininteriji Tasorentsi. ⁴³Itiancana Apa, irootaque nopocantacari. Iro cantaincha te pineacameetsajeitenaji. Ariorica impocashitempi irinti yora caari itiancane, irioquea pineacameetsajeitavaqueri irinti. ⁴⁴Avisati neacameetsatava-caajeitacha. Aitauque picantajeitari. Iro cantaincha te pincoyeji irineacameetsajetempit Tasorentsi. Iriotaque Tasorentsi apaniro. ¿Jaoca pincanteari meeca pinquemisantasanoteri? ⁴⁵Eiro pijitashitatsi naro camantacotempineri Apaqui: “Ainiro, Apa, yantajeitiri yocapee”. Timatsi pashini camantacotempineri: iriotaque yora Moishishini, incanteri Apa: “Te inquemisantajeiteroji yocapee ora pisanquenatacaaquenari”. ¿Pijivetacampa ari irancacoventakuempi? ⁴⁶Arime pinquemisantasanojeiterime Moishishini, aitauque pinquemisantajeitavaquename narori. Isanquenatacotaquena iriori peerani. ⁴⁷Niotaque te pinquemisanteroji isanquenatiniri. ¿Ariompa pinquemisanterero nocantimpiri narori?

Irootaque icantajeitiriri Jesoshi joriopee.

Yoshequiacaquero Jesoshi tanta, jeri shivajaniqui.

(Mt. 14.13-23; Mr. 6.30-46; Ir. 9.10-17)

6 ¹Irosati imonteantanajaro Jesoshi incajare pajitachari Tiveriashi, onta carireaquiniri; noijajeitanakueri. ²Oshequi catsini oijajeitiriri. Inecojeitakueri itasoncacoventajiri joquuitachari, irootaque yojajeitantanacariri. ³Itoncaaque Jesoshi toncaariqui. Isavicapaaque anta, nocarajeitakueri itsipapee iroamerepee, notsipajeitanacari. ⁴Irotimataints

inquimoshirejitantajeari joriopee.
Ipajiyeeitiro quitaiteri “Yavisantaniri”.

⁵Yamenaque Jesoshi. Ineavaqueri
oshequi atiri pocashijeitaqueriri,
isampitiri Jeripi:

—Jeripi, ¿jaoca amananterori meeca
tanta iroajeiteari ashanincapee?

⁶Iro icantashitantacari, icoaque
Jesoshi irineanteari Jeripi. Irinti Jesoshi,
iotaque jaoca incanteriri. ⁷Ari
yacanaqueri:

—Amanantavetearorica tanta oshequi,
ampinaventavetaquearorica 200 tenario,
eiro inajeitarotsi. Ariorica ampaveveta-
queari capichaji, eiro inajeitarotsi.

⁸Ari itimi anta pashini iroamere, yora
Antirishi. Iriotaque irirenti Shimo Petero.
Icantiri:

⁹—Oametnari, jerica aparoni evancari,
timatsi itantane apapacoroni. Timatsi
aisati ishivajaniquite apite. Iro cantain-
cha notseencaqueri: tempa oshequi
catsini atiri.

¹⁰Irosati icantantanacari Jesoshi:

—Poisavicajeiteri maaroni atiri.

Ocasaveshiiteaquera. Icarajeitaque
5,000 shirampari savicajeitaintsiri.

¹¹Irosati yaantacaro Jesoshi tanta.

Ipasonquitacotaquero. Ipajeitaqueri
savicajeitaintsiri. Aisati iquempetaqueri
shivajaniqui, ipajeitaqueri. Aitaque
ocarati icoajeitaqueri aitaque ocarati
ipaqueriri. ¹²Iquemajeitanaca maaroni.
Irosati icantajeitantajari Jesoshi
iroamerepee:

—Paaajeitajero timaarantapaajantsiri,
aparatacari.

¹³Iquemajeitacaro oca tanta apapaco-
roni. Yaajeitajiro timaarantapaajantsiri.
Itetajiro cantiriqui. Ijaajeitajiro ocarati
12. ¹⁴Noneajeitaqueri itasoncaquero
tanta, irosati nocantajeitantanacari:

—Iriotasnotaque yoca camantantatsiri
aquemacotaqueri, aamaajeiveitaniri
peerani.

¹⁵Iotavaque Jesoshi impocashijeiterime
oajeitainchari iranaquerime, impeaje-
rime ivincatsarite. Irosati ipeapitsatanta-
najari. Ijatanaji toncaariqui apaniro.

Ipianaja Jesoshi Caperenaquii.

(Mt. 14.24-33; Mr. 6.47-52)

¹⁶Ishavijiiteanaque, nocarajeitanajiri
itsipapee iroamere, noirincajeitanaja
incajarequi, ¹⁷notejeitapaajaro pitotsi.

Notiancajiro nomonteanaje intatiquero,
anta Caperenaquii. Tsitenitanotanaji,
tequeratsita intsipajeitajena Jesoshi.

¹⁸Opocaque antearo tampea, oquisaata-
naca incajare, soooo, irootaque otimanta-
cari antearo omotoncane. ¹⁹Aitaque
nonajeitaque nianquijaqui. Osamani
quipatsi, aamaaca ari ocarati 5 quirome-
tero, arioricampa 6 nareetantajeari.
Aiquero nocomajeivetaca. Irosati nonean-
tavajari Jesoshi yanijitapaaji incajare-
qui, te intsitiaquiiteji. Iquempejitapaajaro
pitotsi. ²⁰Notsaroejeitanaque. Icantapaa-
jana iriori Jesoshi:

—Narotaque, eiro pitsaroeajeitanatsi.

²¹Nocoajeivetanaca nontetavajerime,
iro cantaincha noneacotashitapaaca
naatacojeitapaaque otsapijaqui, anta
nojajeitenta.

Icoajeitajiri Jesoshi.

²²Oshaiteji icatiajeitaca atiri intatique-
ronta. Ineajeitavajana narori notejeita-
naja novitoqui. Te intsipajeitanajena
Jesoshi, nainti jajeitajantsi. Tecatsi
pashini pitotsi vaatachane anta. ²³Meeca
yareejeivetapaaca tiveriashisati,
iquenacotapaaque ivitoqui. Yaatacojeita-
paaque quempeji yoacaajeitacarinta
oshaiteji tanta. Icoavetapaacari:

—¿Jaocame Jesoshi? ¿Jaoca iroamere-
pee?

²⁴Te irineajeitapaajeriji Jesoshi; aisati
narorijeji iroamerejeji, te irineajeitapaaje-
naji. Ari impoji itejeitanaja atiripee

ivitopeequi, ijatacojeitanaji Caperenao-
qui, icoajeitapaajiri Jesoshi.

**Iriotaque Jesoshi shiirori oanarontsi
aneacaaqueriri quemisantatsiri.**

²⁵Aitaque ineajeitapaajiriri intatiquero.
Icantajeitapaajiri:

—Oametnari, ¿jaoca ocaratiri
pareetantajari aca?

²⁶Yacanajiri:

—¿Paitasa picoantanari? Queariotaque
oca noncamantempiri: te iro pincoimen-
tena pimpincatsatena, irointiquea
picoimentana noacaaquempi oshaiteniji
tanta. Meeca picoajeiveta noacajeita-
jempí aisati. ²⁷Ora ayeari ario ontsonca-
naquea. Eiro piqenqueshiretapinitrotsi.
Naintiquea pinquenqueshiretasanote
nainti, naro materone noaneasanojei-
tempí pincantaitiyempani paneasano-
jeitantapaajeari anta inquitequi. Notimi-
tani inquitequi, itiancaquena Apa
quipatsiquica, natiritapaaque noaneajei-
tantajempiri.

²⁸Isampitiri jorio:

—¿Jaoca noncanteari nantanteanariri
inintacaanari Tasorentsi?

²⁹Yacanajiri Jesoshi:

—Pinquemisantajeitena: irootaque
inintacaajetimpiri Apa.

³⁰Irosati isampitantanajari:

—¿Paita ponijayenari nonquemisan-
tempiri? Ariorica noneaquempi pintason-
cante, ari niotaque queario picantaqueri.

³¹Peerani yora ashanincani yoajeitaro
mana anta caaraiteriqui. Ocanti
sanquenarentsi: “Ipeetaqueri yoari
yoajeitantarori. Oponeaca inquitequi”.
Tempa irio Moishishi pajeitaqueriri,
irootaque iojeitantacaniri ashanincani
ocameetsati iroiijaiteiri.

³²Icantanajiri Jesoshi:

—Queariotaque oca noncamantempiri.
Te irio Moishishini perineri yoajeitari
poneainchari inquitequi. Irinti Apa

pajeivetacariniri. Meeca icoaveta
impempi pashini poajeiteari, cameetsata-
sanotatsiri, poneachari inquitequi.

³³Noponeaca narori inquitequi, naniirea-
paaque quipatsiqui noaneajeiteri maaroni
atiri: noshiaquero poyeameri impempi-
meri Tasorentsi.

³⁴Icantanajiri:

—Irosati pincanteani, novincatsarite,
pimpapinitenaro ora noyari picamanta-
quenari. Aiquero pimpapinitenaro.

³⁵Icantanajiri iriori:

—Narotaque shiirori oanarontsi
aneacantatsiri. Pocashitanari eiro aajiritsi
itashe. Quemisantananari eiro imiretajitsi.

³⁶Aitaque nocantajeivetaquempi.

Pineaajeivetaquena, iro cantaincha te
pinquemisantenajiri. ³⁷Yora icantanari
Apa: “Pinquempoyeajeitenari”, iriojeita-
que pocashitajenaneri. Pocashitapaajena-
neri eiro noipiavajiritsi. ³⁸Te iro
naniireantapeempa nantapeero nonintiri
narori, irointi nante inintacaanari

tiancanari. Irootaque naniireantapaacari.
³⁹Yontapee noquempoyequeneri Apa,
eiro ipeatsi aparoni. Nontinaajeitajeri
omoncaratapeemparica quitaiteri.

Irootaque inintacaanari Apa tiancaque-
nari. ⁴⁰Maaroni neenaneri, ariorica
inquemisantena, incantaitiyempani
iraneanaje inquitequi. Nontinaajeitajeri
coajicani, omoncaratapeemparica
quitaiteri. Irootaque inintacaanari Apa
tiancaquenari.

⁴¹Irosati icantimajeitantanacariri
joriopee. Iquemaqueri icantaqueri:
“Narotaque shiirori oanarontsi,
poneachari inquitequi”, irosati icantima-
jeitantanacariri. ⁴²Icantajeiti:

—Tempa iriotaque Jesoshi, itomi Jose.
Tempa anepinijeitiri iriri, iriniro aisati.
¿Paita icantantari: “Noponeaca inquitequi”?

⁴³Icantanaqueri iriori Jesoshi:

⁴⁴—Eiro picantimajeitanatsi. Eirome
inintacairime Apa tiancaquenari, tecatsi

pocashitmatenaneme. Iriotaque nontinaajeri coajicani omoncaratapeem-parica quitaiteri. ⁴⁵Isanquenatacotitacariini peerani camantantatsiniri: “Tasorentsi iroamejeitajeri maaroni”. Maaroni quemavaquerori icantiri Apa, iriotavaquerorica, impocashitena noavisacotan-teariri. ⁴⁶Noponeanaca Tasorentsiqui, irootaque noneantariri Apa. Tecatsi pashini neerine. ⁴⁷Queariotaque oca nocantimpiri. Yora quemisantinari incantaitiyempani iraneajeitanaje inquitequi.

Iriotaque Jesoshi shiirori oanarontsi aneacantatsiri.

⁴⁸Jero oca icantajeitiri aisati:

—Narotaque oanarontsi aneacaantatsiri. ⁴⁹Yoajeivetacaroni pishanincani mana peerani anta caaraiteriqui, iro cantaincha yanteashipajeitanaque, icamajeitanaque. ⁵⁰Oca oanarontsi noquenquetsatacotiri oponeaca inquitequi. Eiro icamanetajitsi oaquearoneri irinti. ⁵¹Narotaque shiirori oanarontsi aneatsiri, noponeaca inquitequi. Maaroni oyearoneri oca oanarontsi incantaitiyempani iraneajeitaje inquitequi. Nompajeiteri maaroni atiri iraneajeitantajeri: irootaque novatsa.

⁵²Irosati icantavacaajeitantanacari joriopee. Icantajeiti:

—¿Jaoca incanteari yoca impanteerori ivatsa avantearori?

⁵³Icantajeitiri Jesoshi:

—Queariotaque oca noncamantempiri. Noponeaca inquitequi, natiritapaaque. Eirorica poarotsi novatsa, aisati eirorica pirotsi niraja, eiro paneajitsi. ⁵⁴Maaroni oyearoneri novatsa, aisati ireroneri niraja, incantaitiyempani iraneaje inquitequi iriori. Nontinaajeri coajicani omoncaratapeemparica quitaiteri.

⁵⁵Novatsa irootaque oanarontsisanori. Niraja irootaque ireetasanoyeetiri.

⁵⁶Oyearoneri novatsa aisati ireroneri niraja irosati incantea, quiso iroajena. Aisati nonquempetea narori, quiso noajeiteri. ⁵⁷Aneatsiri ini Apa tiancaquenari: iriotaque oaneaquenari narori. Aisati inquempejeitea iriori oyearoneri novatsa, noaneajeiteri maaroni. ⁵⁸Irootaque oca oanarontsi aniireapaintsiri inquitequi. Te onquempetearoji ora yoajeivetacaniri peerani pishanincani. Tempa icamajeitaje irinti. Yora oyearoneri oanarontsica nocantaquempiri incantaitiyempani iraneajeitanaje irinti inquitequi.

⁵⁹Aitaeque ocanta icantajeitajeriri Jesoshi anta pancotsiqui yapatojeitantari. Otimi anta Caperenaoqui.

Jero oca icantiriri Jesoshi quemajeivetacariri.

⁶⁰Oshequi catsini quemajeivetavacaroni yoamejeivetacariri, irosati icantajeitanta-naja:

—Te oncameetsate oca icantiri, tecatsi ancantea anquemisantero.

⁶¹Iotashitaca Jesoshi icantimentavacaajeitacaro yora yoamejeivetacari. Icantanajiri:

⁶²—Terica oncameetsatimotempi oca nocantaquempiri. Peerani noponeanaca narori inquitequi, natiritapaaque. Coajica pineajeitavajena nomplanaje aisati jenoqui. Impoiji, ¿paita pinquenqueshrejeiteri?

⁶³Ishire Tasorentsi, irootaque oaneajeitajeri-neri maaroni savicajeitatsiri inquitequi. Eiro isavicajeititsi maaroni atiri. Oca nocamantaquempiri oshiavetaro Ishire Tasorentsi: ariorica pinquemisantero, ari oaneaquempi inquitequi. ⁶⁴Niotacojeitimpi: timatsi picarajeitica caari quemisantatsine.

Peerani iotitari Jesoshi caari quemisantajeitatsine. Aisati iotitacari aacanterineri coajicani. ⁶⁵Icantanaqueri:

—Niotaque te pinquemisantajeitenaji maaroni, irootaque nocantantaquempiri

incaranqui: “Eirome inintacairime Apa, tecatsi pocashitenaneme narori”.

⁶⁶Irosati yojocaarantantanajari oshequi yora yoamejeivetacari. Te meeca iroijsajaitanajeri. ⁶⁷Irosati icantajeitanta-janari Jesoshi:

—Noamerepee, ¿aisatimpa pojocajeitana-jena avirori?

⁶⁸Yacanaqueri Shimo Petero:

—Novincatsarite, eirorica noijatimpitsi, ¿janicampa noijatanajeri? Incantaitati-yempani iraneajeitanaje inquitequi maaroni quemisantajeitirori pineane.

⁶⁹Noquemisantajeitimpi, niojeitana-quempi; avirotaque itiancane Tasorentsi, picameetsataque.

⁷⁰Yacanajeri Jesoshi:

—Tempa nocoyeajeitaquempi. Picarajeiti aca 12, iro cantaincha aparo picarajeitica, iriotaque camaaritajantsineri.

⁷¹Iquenquetsatacotaqueri Jorashi Ishicariote, yora itomi Shimo.

Ainiroquera icarajeivetana maaroni.

Iriotaque aacanterineri Jesoshi coajicani.

**Jero oca icantayetiriri carireasati,
jeri jerosaresati.**

7 ¹Irosati iquenantanaca Jesoshi Carireaque. Icoaveta joriopee iroyerime, irootaque caari icoanta irijate Joreaque.

²Irotimataintsi inkuimoshirejaitantari joriopee. Irotaintsi irovetsicajeitero pancotsijaniqui inkuenqueshirejaitantearori iquenajeitanaque ishanincani caaraiteriqui.

³Irirentipee Jesoshi icantajeitiri:

—Pijate meeca Joreaque. Piniyaayeta-peeeri poamerepee anta paitarica pantaye-tiri. ⁴Pincoquerica iriojeitempi maaroni atiripee pinquenaquenayetanaque irineajeitantempiri. Eiro pimanirotsi paitarica pantayeteri. Ariorica pintason-cantayete, pinijaayeteri maaroni atiri.

⁵Te inkuemisantajeiteji irirentipee iriori, ⁶irootaque icantantacariri. Icantajeitanajiri Jesoshi:

—Tequerata omoncarateaji nomatan-tearori. ⁷Avirojei, pijajeite avinti. Tecatsi incantea atiri inquisajeitempi avinti.

Irompa nainti, iquisajeitakuena.

Nocamantajeitaqueri: “Te oncameetsateji oca pantayetiri”, irootaque iquishimentaque-nari. ⁸Pintoncaajeitanaquetsita avinti Joreaque. Eirotsita nojatita narori, tequeratsita omoncarateaji nojatanteari.

⁹Aitaque icantajeitaqueriri Jesoshi.

Isavicanaji Carireaque. ¹⁰Irinti irirentipee jajeitaintsi Joreaque, itoncaajeitanaque, tonca, tonca. Iquimoshirejaitapaaque.

Impoitanaji iriori Jesoshi, itoncaanaji, iro cantaincha te irinijaantapeempaji: te incoyeji irineeyeteri. ¹¹ICanta joriopee iquimoshirejaitanaque. Icoajeivetacari Jesoshi Jerosarequi, icantajeiti:

—¿Jaoca meeca yoranqui Jesoshi?

¹²Apatojeitainchari anta icantavacaajei-tanaca. Icantacoyetiri Jesoshi:

—Cameetsari ini.

Pashini cantayetaintsi:

—Te incameetsateji, irointi yamataviti-tiri atiri.

¹³Iro cantaincha itsarocaaajeitacari atiripee yora jivatocaaajeitiriri, irootaque imanacojeitantarori icantacoyetiriri Jesoshi.

**Yoametantaque Jesoshi anta
ivancoqui Tasorentsi.**

¹⁴Yovaanajiro aisati iquimoshirejeitanaji. Itoncaanaque Jesoshi iriori ivancoqui Tasorentsi, yoametantapaaaji.

¹⁵Yoajeitanaque cavaco joriopee. Icantari: —¿Jaoca icantari iotantarori paitapeerica? Tecatsi oameterine.

¹⁶Yacanaqueri Jesoshi:

—Te naro iotashitearone oca noame-timpiri, irinti iotacaanaro yora tiancaquenari. ¹⁷Pincoasanoterica panteneri inintacaquempiri, aitaque piotanaque. Piotanaque itiancaquenarica Tasorentsi. Piotanaque noneaveetashitarica. ¹⁸Yora

neaveetashitachari icoi impincatsayeeyeteri iriori. Intimerica coatsiri impincatsayeeyeteri tiancaqueriri, icameetsati iriori; te irioteji iramatavitante. ¹⁹Tempa irootaque icantajeitimpiniri Moishishini peerani: “Jeroa pantayeteri”. Iro cantaincha tecatsi aca matasanojeiteroneri oca icantaquempiniri. ¿Paita pisareantanari poyena narori?

²⁰Yacajeitanaqueri apatojeitainchari:

—Yoitsaviantaquempi camaari. ¿Janica sareimpiri iroyempi?

²¹Yacanaqueri:

—Jero aparo notasoncantaque saavaroqui, meeca poajeitanaquena cavaco maaroni. ²²Icantimpiniri Moishishini: “Pintoyeantea”. Iro cantaincha caari ini Moishishini cantasanotatsine, irintiquea yora intasanotaroniri. Irootaque meeca pitoyeantantacari. Pitoyeantapinita aisati saavaroqui amaoreantari. ²³Tempa pitoyeantapinita saavaroqui, pimoncaramantarori isanquenatiniri. Irosati saavaroqui noavisacotantariri yora shirampari. Aiquero piquisanaitiana. ¿Paitaquea? ²⁴Ariorica pamenavoroteri pishaninca, eiro picantashitatsi: “Cameetsari ini. Yora pashini te incameetsateji”. Pijivateta piotasanoteri, impoijqiquea piotanaque paitarica pinquenquetsatocoteriri. Aisati onquempetea, pinquenqueshiretasanotero nocantimpiri piotasanotantenari.

Iponeanaca Quirishito Tasorentsiqui.

²⁵Irosati icantayetantanaca jerosaresati aparopee:

—¿Caarimpa yoca icoyeetiri iroyeeteri?

²⁶Pamenero meeca, yoametantayeti, te irimaneroji. Tecatsi cantimenterine: “Pimajerete”. ¿Yaamaajeitarimpa avincatsarite iriosanotaque yoca Quirishito? ²⁷Iro cantaincha ayotacojeitaqueri arori jaoca iponeacari yoca. Impocasantapaajerica Quirishito, tecatsi iotacoterine jaoca imponeempari iriori.

²⁸Yoametanti Jesoshi ivancoqui

Tasorentsi, icanti:

—¿Piojeitanampa? ¿Piotimpa jaoca noponeacari? Te nompocashiteaji, timatsi tiancaquenari: icameetsatasanotaque catsini. Te pioteriji avinti, ²⁹narori niotiri nainti. Iriotaque tiancaquenari, iriotaque noponeimotacari.

³⁰Irosati icoajeitantavetacari irayerime. Iro cantaincha tecatsi ayerine. Tequeratsita omoncarateaji iraanteetariri.

Irotaintsi irijataje Jesoshi.

³¹Oshequi apatojeitainchari quemisantajeitaqueriri. Icantayeti:

—¿Ariorica impocapaaque Quirishito, iranaacotapeerimpa Jesoshi intasoncanta-yetapee?

³²Yora variseopee iquemajeitavaqueri atiri iquenquetsatacojeitaqueri Jesoshi. Irosati itiancantacari variria irayerime. Irojeitaque tiancaqueriri jivatacaajeitiriri saserotepee, variseopee aisati. ³³Irosati icantantanacari Jesoshi atiri:

—Capichanivaniji nontsipajeitanajempi. Irotanaintsi nompianaje tiancanariqui. ³⁴Pincoajeivetajenarica, iro cantaincha eiro pineajanatsi. Jaocarica nosavicapaae eiro pimatirotsi pijataje avirori.

³⁵Icantanaque jorio:

—¿Jaocampa irijateri yoca eiro aneantajaritsi? ¿Ariompa irijatashiteri ashaninca savicayetatsiri pashinipeequi nampitsi? Irioyeata oamejeitapeerine itsipapee atiri. ³⁶Jero icantaque: “Pincoajeivetajenarica eiro pineajanatsi. Jaocarica nosavicapaae eiro pimatirotsi pijataje avirori”. ¿Paita icantantari?

Nija oaneantatsiri.

³⁷Irootaque quitaiteri ivecaratantarori iquimoshirejeitanaque. Irosati icatiantanaca Jesoshi. Icajemanaque:

—Maaroni miretatsiri impocashitenata irirapeeta, ³⁸ontimanteari ishirequi quemisantanari nija oaneantatsiri, oncontejatapaqueri. Aitaque oquenque-tsatacotiro Sanquenarentsi nija nocanta-quempiri.

³⁹Iro ishiacantaqueri nijatatsiri Ishire Tasorentsi, quiso oajeiterine quemisanta-jeiterine corajicani. Iro cantaincha tequeratsita iroancajeaji Jesoshi jenoqui, irootaque caariquera opocashitantari quemisantajeitatsiri.

Icantavacaimentajeitari Jesoshi.

⁴⁰Apatojeitainchari ara iquemajeitavaveri icantaqueriri Jesoshi, irosati icantayetantanaca aparopee:

—Iriotasantaque yoca camantantatsiri aamaajeitacari.

⁴¹Pashini cantayetatsi:

—Iriotaque Quirishito.

Pashini cantatsi:

—¿Ariompa imponepari Quirishito Carireaqi? ⁴²Tempa ocanti Sanquenarentsi: “Quirishito irio irishanincatajeari Iravirini. Imponeaquea Verequi, anta isavicaveitani Iravirini peerani”.

⁴³Impoiji icantavacaimentajeitacari Jesoshi. ⁴⁴Timatsi aparopee coayevetachari irayerime, iro cantaincha te irimateroji. ⁴⁵Ipiajeitanaja variria.

Yareetapaajari jivatacaajeitiriri saserotepee, jeri variseopee. Icantajeitavajiri:

—¿Paitasa caari pamantanari aca?

Nocantavetimpi incaranqui: “Pamaque-nari”.

⁴⁶Yacanaqueri:

—Cameetsa ineanati yonta shiramparinta. Cameetsa yoametanti, tecatsi pashini quempetearine.

⁴⁷Icantavaqueri:

—¿Yamatavitajimpimpa aisati avirori?

⁴⁸¿Iquemisantaquerimpa jivatacairiri ashaninca arori? Te inquemisanteriji. ¿Iquemisantaquerimpa variseo? Te.

⁴⁹Yonta atirinta te irionirojeiteroji Sanquenarentsi. Te oncameetsateji impincatsajeiteri Jesoshi: iroasanchejeteri Tasorentsi.

⁵⁰Itimaiti ara Nicoremo, ananincashitanaqueriri Jesoshi chapinqui. Itsipatava-caajeita ivariseoririnte, icantanaqueri:

⁵¹—¿Paita ocantiri Sanquenarentsi? ¿Oshinetantampa ancantashitea: “Te incameetsateji Jesoshi”? Tempa ocameetsati ajivatavaqueri anquemisanteri incantaqueeri. Tempa ocameetsati aisati ajivataque ayote paitarica yantayetaqueri.

⁵²Yacanajiri:

—Aviroyeata avirori carireasati. Pineanatasanotero Sanquenarentsi piotanteari te imponeempaji Carireaqi camantantatsiri.

⁵³Irosati ijajeitantanaja maaroni ivancopeequi.

Tsinane aimentariri ojime.

8 ¹Yora Jesoshi ijatanaque toncaariqui, ipajiyeeitironta Orivomashi. ²Oquitaitetamanaque ipiapaaja ivancoqui Tasorentsi. Maaroni atiri ijatashijeitajiri. Isavicapaaji, yoametapaajiri. ³Yamajeitapaaqueneri aparoni tsinane, ineetaquero aimentacari ojime. Irio amirori oametantirori Sanquenarentsi, jeri variseopee. Isatacaquero nianqui, ⁴icantapaqueri:

—Oametantatsiri, ineetaquero oca aimentacari ojime. ⁵Peerani icantini Moishishini ocameetsati ampichanatero aimentariri ojime. ¿Paita picantiri avirori?

⁶Ineantavetari, icoajeiveta inomitacayearime, irootaque icantantajeivetariri. Itsentetanaque Jesoshi, isanquenatantancaro iracotsapaqui quipatsi. ⁷Yapiivetajari:

—¿Paita picantiri?

Icatianaja Jesoshi. Icantajeitiri:

—Timatsirica picarajeitica meeca caari antiro caari cameetsatsi, irijivaterota

impicheero; impoiji ari pimpichaajeitero maaroni.

⁸Yoivotanaja aisati. Isanquenatanaji aisati quipatsiqui. ⁹Maaroni quemajeitavaqueriri, ijajeitanaji. Ijivajeitanaji yora anteashiparipee, impojeitanajiri iriori maaroni evancaripee, ijajeitanaji. Apanivaniji irinti Jesoshi, jero iroori tsinane. Irosati ocatia ara. ¹⁰Icatianaja aisati. Tecatsi irineaje, irointi tsinane apaniro. Icantiro:

—¿Jaoca meeca yoranqui quisajeitaquempiriranqui? ¿Tempa intimeji quishimentempirone pantiri?

¹¹Ocantanaqueri iroori:

—Te aneajeriji, novincatsarite, jajeitanaji inaji.

Irosati icantantajaro:

—Aisati narori, eiro noquishimentimpirotsi. Pijataje meeca, eiro papiitajirotsi caari cameetsatsi.

Irio Tasorensi camantacotiriri Jesoshi.

¹²Ineanatajiri aisati Jesoshi atiri, icantajiri:

—Narotaque iotacaajeitiriri atiripee, oquempetaca noquitaitetacojeitiri. Eiro iquenashiyetanajatsi tsiteniriqui oijajeitananeri. Queario, naro iotacaajeitiriri atiripee, aisati oaneajeiterineri.

¹³Irosati icantantanacari variseopee:

—Avisati camantacotashitacha.

Irootaque caari otampaticatanta picantayetaqueri.

¹⁴Yacanajiri Jesoshi:

—Je, narosati camantacotacha, iro cantaincha otampaticati nocantaqueri. Iro otampaticatantacari nioti nainti jaoca noponeacari. Aisati nioti jaoca nojatajiri. Te piojeiteji avinti jaoca noponeacari, aisati te piojeiteji jaoca nojatajiri.

¹⁵Piquempejeitacari pashinisati atiri: te piojeitenaji, iro cantaincha picantacoventashijeitaquena. Naintiquea, te meeca noncantacoventempiji. ¹⁶Iro cantaincha,

noncantacoventempime meeca, ontampaticateme noncantacoventempime.

Niotaquempi; aisati quiso yoaquena Apa tiancaquenari, iotaquempi aisati. Nocarataque apite iotasanojeitimpiri. ¹⁷Tempa ocanti Sanquenarentsi pineanatapinitiri: “Apterica incarate camantacoterineri ashaninca, ari paamayea queariotaque incanteri”. ¹⁸Ari nocamantacotaja narosati, icamantacotana Apa tiancaquenari iriori; apite nocanta.

¹⁹Icantanaqueri:

—¿Jaoca meeca piri?

Yacanajiri Jesoshi:

—Te pioenaji. Te piojeiteriji aisati Apa. Ariorica piojeitaquename piotaquerime aisati Apa iriori.

²⁰Irootaque icantajeitaqueriri Jesoshi anta ivancoqui Tasorensi. Icatianaja anta ipapinijeitirinta Tasorensi quirequi. Tequera omoncarateaji incamanteari Jesoshi, irootaque caari imatanteetari irayeeteri.

Yora caari quemisantatsi, incanteani irantapinitero caari cameetsatsi yantayetiri.

²¹Yapiitajiri aisati:

—Irotimataintsi nojataje. Pincoacoajeivetajena pineajename aisati, iro cantaincha eiro pineajanatsi. Irotaintsi nojataje. Pincoajeivetea poijajeitena, iro cantaincha eiro pimajeitirotsi pijajeitaje nojatajenta narori. Irosati pincanteani pantapinijeitero caari cameetsatsi irosati pincamanteari, irootaque pijajeitanteari Sharincaveniqui.

²²Icantajeitanaque jorio:

—Irisatiyeata oajanachane. Piquemaquerinea icantantari: “Irotaintsi nojataje, eiro pimajeitirotsi pijajeitaje nojatajenta narori”.

²³Icantajiri Jesoshi:

—Avirojeitaque timajeitatsiri quipatsiquica. Noponeaca nainti jenoqui. Aca

quipsatsiquica irootaque pisavicantajeitari avirori. Te nosavicasanote narori quipsatsiquica. ²⁴Irootaque nocantantuempiri incaranqui: “Irosati pincanteani pantapinijeitero caari cameetsatsati irosati pincamanteari”. Eiorica piquemi-santirotsi nocantantuempiri, irootaque pijatanteari Sharincaveniqui.

²⁵Isampitajiri:

—¿Janicampimpa?

Icantanajiri iriori:

—Aitaque nocamantasanovetaquempi.

²⁶Timatsi oshequi noncamantempimeri; otimi aisati pantayetiri noncantacoventantempimeri. Iro cantaincha icameetsataque tiancaquenari, timatsi icamantaquenari iriori: irootaque oca novaaqueneri atiri.

²⁷Te iriojeiteriji joriopee irio iquenquetatacotaqueri Jesoshi Iriri. ²⁸Icantanajiri Jesoshi:

—Ariorica poatiacotaquena, aitaque piojeitanaquenari. Piojeitena noponeanaca inquitequi, natiritapaaque. Aisati piojeitanaque tecatsi nantashitea nainti. Noneanatiro oca yoametaquenari Apa tiancaquenari, ²⁹quiso yoana iriori. Irosati nantiniri narori paitarica inintacaaquenari iriori, irootaque caari yojocantana.

³⁰Aitaque ocantari icantaqueriri. Icarati oshequi quemisantajeitanaqueriri.

Yora camaari iririntajeitacari caari quemisantajeitatsi.

³¹Irosati Jesoshi icantajeitantanajari joriopee quemisantajeivetacariri:

—Ariorica pincantaitiyempani

pishiretearo noneane, avirosanojeitaque noamere. ³²Aitaque piotavaquero queariotatsiri. Irootaque oipacaacoventajempineri. Eiro itimajitsi perantajempineri aisati.

³³Yacanaqueri:

—Narojeitaque ishanincani Avaramani. Tecatsi perantatenane. ¿Paitasa picantan-

tanari: “Oimpacaacoventajempi queariotatsiri”?

³⁴Yacanaajiri Jesoshi:

—Queariotaque oca noncamantempiri. Timatsi perantajeitariri maaroni antajeitirori caari cameetsatsati. Ora caari cameetsatsi yantapinijeitiri, oshavetacari perantajeitariri. ³⁵Yora perantantsi eiro icantatiani irisavicasanote ivancoqui perantatariri. Irintiquea itomi ashitarori ivanco incantatiyempani irisavicasanote irinti. ³⁶Narotaque itomi Tasorentsi.

Ariorica noimpacaacoventajempi, eiro yapiiyeetajimpitsi iromperanayeetajempi.

³⁷Niotasanojeitaquempi, avirojeivetaca ishanincani Avaramani. Iro cantaincha te pinquemisanteroji noneane. Irootaque pisareantanari poyena. ³⁸Ora icamantaquenari Apa, irootaque nocamantajeitim-piri. Ora icantimpiri pirintajeitari irootaque pantapinijeitiri avirori.

³⁹Yacanaqueri:

—Nirintajeitacari Avaramani.

Icantanajiri Jesoshi:

—Avirome ishanincani Avaramani, aitaque pinquempejeitajarime. Iquemi-santini peerani iriori; pishanincataquearime, pinquempejeitaquearime avirori, pinquemisantajeitaquenane. ⁴⁰Narotaque neanavetarori queariotatsiri noquemiriri Tasorentsi. Iro cantaincha pisareajeitana poyena. Te inquempeteaniji irinti Avaramani. ⁴¹Pantapinijeitiro avinti yantayetiri pirintasanotari.

Irosati icantajeitantanacari:

—¿Pashinimpa ashitana? Apaniro ini nirintajeitari. Iriotaque Tasorentsi.

⁴²Icantajeitaqueri Jesoshi:

—Irioricame pirintajeiteame Tasorentsi aitaque pinintajeitaquenane narori. Te nompocashiteaji; aitaque noponeacari Tasorentsiqui, iriotaque tiancaquenari.

⁴³¿Paita caari piotantavacaro nocantimpiri? Te pimateroji pinquemisanteroji noneane. ⁴⁴Camaari ini pirintajeitacari.

Irootaque picoantajeitacari pantapinijeitini inintacaajeitimpiri. Oantatsiri ini peerani: irio nijantirori yoanti. Te inquenqueshireteroji quearioyetsiri, irootaque caari icameetsatanta. Tseyari ini, irootaque itseeyantacari. Yashi yoiro itseeya. Iriotaque tseyacaayetariri atiri. ⁴⁵Irompa nainti nocamantavetaquempiro queariotatsiri, te pinquemisantenaji. ⁴⁶¿Timatsimpa aca neaquenari narori nantiro caari cameetsatatsi? Tempa otampaticati nocantajeitaquempi. ¿Paitampa caari piquemisantantana? ⁴⁷Maaroni itomintajeitari Tasorensi, iriojeitaque quemisantajeitirori irineane. Te intomintajeitimpiji avirori. Irootaque caari piquemisantantaro irineane.

⁴⁸Irosati yacantanajari jorio:

—Queariotaque nocantaquempi.

Avirotaque samariasati, yoitsaviaantaquempi camaari.

⁴⁹Yacanajari:

—Te nontsaviateji. Nopincatsatiri Apa.

Irompa avinti te pimpicatsajeiteriji; pitseencajeitiri avinti. ⁵⁰Te noncoyeji impincatsayeetena nainti. Irintiquea Apa coaintsi impincatsayeetena. Aisati iriotaque cantacoventajeiterineri maaroni tseencajeitanari. ⁵¹Queariotaque oca nocantimpiri. Quemisantavaquerori noneane eiro icamanetajitsi.

⁵²Irosati icantantanajari joriopee:

—Meecaquea niotasanojeitaquempi pitsaviataque. Camaque Avaramani. Aisati camantantatsiniri, camajeitaque iriori. Aiquero picanti: “Eiro icamitsi quemisantajeitirori noneane”. ⁵³Camaque ashanincani Avaramani. Camajeitaque iriori camantantatsiniri. ¿Arimpa pijipincatsaritashitaca? ¿Pijivetampa panaacojeitiri maaroni peeraniniri pipincatsaritanotaque avinti?

⁵⁴Yacanajari Jesoshi:

—Narosatiricame jitashitachaneme nopincatsaritaque, tempa nantsipetea-

rome. Apa, yora picantajeitiri avirori: “Notasorensite”, iriotaque pincatsarita-caaquenari. ⁵⁵Te piojeiteriji. Nainti notiri. Ariorica noncantaqueme narori: “Te nioteriji”, aitaque nonquempetaquempime, nontseeyaqueame narori. Irompa notiri. Noquemisantiro irineane. ⁵⁶Icamantacotaquenani pishanincani Avaramani, icantini: “Coajica ontime quitaiteri noneanteariri Quirishito, irootaque noquimoshiretantacari”. Ari ineaquena, irosati iquimoshiretasanotanacari aisati.

⁵⁷Icantanaqueri jorio:

—Tequeratsita oncarate pisarintsite 50.

¿Piniirrimpa Avaramani?

⁵⁸Icantanajari Jesoshi:

—Queariotaque oca noncamantempiri.

Tequeratsitani intimeni iriori Avaramani, notimitani nainti. Je, noneiri.

⁵⁹Irosati yaantajeivetanaca mapi, impichaajeiterime. Iro cantaincha ipeapitsajeitanajari ivancoqui Tasorensi, ineaacotashitapaaja jaocarica anta.

Yoavisacotiri Jesoshi quitapoajari.

9 ¹Ari iquenanaque anta Jesoshi. Ineapaaqueri aparoni shirampari quitapoajari. Aitaque icantitapaani iroaquera itimapaaque. ²Nocarajeitiri iroamerepee nosampijeitiri:

—Oametnari, ¿paitampa itimantapaari quitapoajari? ¿Irompa yantayetiro caari cameetsatatsi ashitariri iquitapoajatantacari itomi? ¿Irioricampa yoca antaquerori caari cameetsatatsi iquitapoajatantacari?

³Yacanaqueri Jesoshi:

—Tecatsi irante, iquitapoajatashitaca.

Aisati ashitariri, tecatsi irante. Iro iquitapoajatantacari yoca intasoncacoventantajariri Tasorensi. Icoacaajeitaqueri atiri iriojeitanaque queario itasorensitaque. Ainiroquera meeca oquitaiteti. ⁴Ocameetsatimotana nanteneri meeca tiancanari inintacaanari.

Ariorica ontsitenitanaje, tecatsi matajerone irantaveetaje. ⁵Ainiroquerata-tsina quipatsiquica narotaque iotacaaqei-taqueriri atiri.

⁶Irootaque icantaqueriri, irosati iquitiojantanacaro quipatsi. Ocajavatsatanaque oca iquitiojaqueri quipatsi, irosati ipatsancajaquitantacari quitapojari.

⁷Icantajiri:

—Pijate anta Shiroequi, pinquivajaquitajantea.

Incajare oni Shiroe. Acanti aneanequi arori: Itianqueetiri. Irosati ijatantanaca, iquivajaquitapaaca. Ipiaja, amenanaji ini.

⁸Itimi ara inampiquiniri, aisati yora neapinitiriri yamanantapiniti quirequi. Icantajeitanaque:

—¿Caarimpa yoca yoranqui savicapinitisiri amanantapinitatsiri quirequi?

⁹Aparopee cantayetanainti:

—Iriotaque.

Pashini cantayetatsi:

—Caari ini. Shiyetariri ini.

Icantanaque iriori:

—Narotaque.

¹⁰Icantaqueri:

—¿Jaoca icanteetajimpiri pamenantajari?

¹¹Yacanaqueri iriori:

—Yora shiramparinta pajitachari Jesoshi icajavatsataquero quipatsi, ipatsancajaquitantajanaro noquiqui. Icantajana: “Pijate Shiroequi, pinquivajaquitajantea”. Nojatanaque, noquivapaaja; irosati namenantanaja.

¹²Irosati icantantanajari:

—¿Jaocariqueame iriori?

Yacanajiri:

—Jaocarica, te nioteji.

Icantavacaimentajeitanacari Jesoshi.

^{13,14}Irootaque saavaro icajavatsatantarori Jesoshi quipatsi yamenacantajariri quitapojaveitachaniri. Iro saavaro imaoreanteevetari. Ari yayeetanaqueneri variseopee, ¹⁵isampitavaqueri:

—¿Jaoca icantajimpiri?

Icantiri:

—Ipatsancajaquitaquena quipatsi noquiqui, irosati nojatantanaca noquivajaquitaja. Meeca namenanaaji.

¹⁶Irosati icantantanaca variseo aparopee:

—Yora shirampari yantaveetantaro saavaro. Te imponeempaji Tasorentsiqui.

Pashini cantayetatsi:

—Irioricame antayetirori caari cameetsatsi, eiro imatirome intasoncantayeteme.

Irosati icantavacaimentajeitanacari.

¹⁷Yapiitajiri isampitajiri:

—¿Paita pijitiri avirori yora amenacaa-jimpiri?

Icantanaqueri:

—Nojitiri itiancane Tasorentsi.

¹⁸Yora joriopee te irishiretearoji

iquitapojaveitani. Icajemacantaqueri iriri, jero iriniro, ¹⁹isampitavaqueri:

—¿Iriotaquempa yoca pitomi picantiriranqui: “Itimapaaque quitapojari”?

¿Jaoca icantajari yamenantajari meeca?

²⁰Yacanaqueri:

—Je, iriotaque notomi. Noneasanotiri yashi yoiro iquitapojatapaaque. ²¹Jaocarica icantajari yamenantajari, te nioteji narori.

Te nioteji aisati janicarica amenacajiriri. Te irijananequitajeji meeca. Pisampiteri iriori. Irisati camantacotajanchane.

²²Yora ashitariri itsaroacaacari joriopee, iotaque aitaque yapatotimentajeitacari Jesoshi. Icantajeititaca: “Intimerica cantatsine: ‘Iriotaque Jesoshi Quirishito’, eiro ashinetajiritsi irinti intsipajeitee anquemisantajeite”. Irootaque itsaroajeitanacari ashitariri, ²³irootaque icantantanacariri: “Te irijananequitaje meeca notomi. Irio pisampite”. ²⁴Ari yapiitajiri icajemajiri. Icantavaqueri:

—Tasorentsi pimpincatsate. Yora shirampari nojeitiri irio antayetirori caari cameetsatsi.

²⁵Irosati yacantanacari iriori:
—Irioricampa antayetirori caari
cameetsatsi, te nioteji narori. Apatiro
niotaque noquitapoajaveitani, meeca
naneanajji.

²⁶Icantanjiri aisati:
—¿Jaoca icantajimpiri yamenacanta-
jimpiri?

²⁷Yacanajiri iriori:
—Aitaque nocamantavetaquempi
incaranqui, iro cantaincha te pinquemi-
santeroji piquemavetaquenari. ¿Paita
picoantari aisati pinquemajero?
¿Picoajeitajimpa avirori pimpeajeitaja
iroamere?

²⁸Irosati iquisatsatantanacariri,
icantanaqueri:
—Avironirotaque avinti iroamere. Naro
nainti iroamerepeeni Moishishini.

²⁹Niojeiti iquenquetsatacaquerini
Tasorensi Moishishini peerani. Irompa
yoranqui, te niojeiteriji jaocarica
iponeacari iriori.

³⁰Yacanajiri iriori:
—Iriotaque amenacaajanari. Piojeiteri-
quetite avirori jaocarica iponeacari,
irootaque noantanaquempiri cavaco.

³¹Ayotacojeitiri Tasorensi, te inquemeri-
jiji antayetirori caari cameetsatsi. Yora
quemisantiriri Tasorensi, antirori
inintacaqueriri, iquemapinitiri irinti.

³²Te anquemacotapinitiriji amenacaye-
rine timapaatsiri quitapojari. ³³Eirome
iponeame Tasorensiqui, tecatsi
irimateme.

³⁴Yacanajiri:
—Peerani pitimantapaacari te
pincameetsatapeeni. ¿Arimpa picoaque
meeca poamejeitena?
Irosati yojocantanajari.

Iquemisantaque quitapoajaveitachaniri.

³⁵Iquemacotajiri Jesoshi yojocajeita-
queri quitapoajaveitachaniri. Impoiji
ineapaajiri aisati, icantapaajiri:

—¿Piquemisantirimpa Atiritapaintsiri?

³⁶Ari yacanaqueri:

—¿Jaoca itimiri, apa? Nonquemisan-
teri.

Yacanaqueri:

³⁷—Tempa narotaque: noponeanaca
inquitequi, natiritapaaque. Pineaquena,
meeca noneanataquempi.

³⁸Icantanaqueri:

—Noquemisantimpi, Novincatsarite.

Itiheroashitanacari. ³⁹Icantiri Jesoshi:

—Irootaque nopocantacari quipatsiqui
noncantajeitantariri atiri jaoca incanta-
jeiteari. Namenacaajeitajeri quitapaja-
vetachari. Yora amenajeivetachari
nonquempetacantajeri quitapojatsiri.
Pineaquero, niotacajeiteri caari
iojeitatsi; irinti iovetachari nompeapitsa-
tajeri iotantavetari.

⁴⁰Yora variseopee itsipajeitacari,
iquemajeitavaquero icantaqueriri. Irosati
icantajeitantanaca aparopee:

—¿Jaocampa nocantajeitari narori?

¿Noquitapoajatimpa?

⁴¹Yacanajiri Jesoshi:

—Pinquitapoajateme, eiro otimime
pantane; iro cantaincha picantajeiveta:
“Namenajeiti”, irosati picantani pantapi-
nijeitiro caari cameetsatsi.

**Yora Jesoshi iquenquetsatacotiri
ashitariri irovishate.**

10 ¹Aisati yoametanti Jesoshi,
icanti:

—Queariotaque oca noncamantempiri.
Tempa yoiminqueapinitiri ashitariri
irovishate itantoqui iquempoyeantariri.
Yora coshitariri irovishate, te inqueapeeji
omoroqui, ainti yataitashitapaaqueri
araquerora. Icanti: “Ineanacari ashitariri”.
^{2,3}Intimerica iratirite shentinariri omoro,
ariorica impocapaaque irinti ashitariri,
ari irashireavaqueneri, irishineteri
iravisanaaje. Ariorica inqueashitapaajeri,
incajemapeeri ivajiropee, ari impocashi-

jeiteri, eiro itsaroacaavacaritsi. Impoiiji iraajeitanajeri anta paashitomashiqui, ⁴irijivatanaqueri. Ari iotsajeititiri irineane, irootaque yojijaeitantariri. ⁵Ariorica incajamaveteari caari ineapiniti, eiro iotsajeititavaqueritsi irineane. Eiro yojijaeitiritsi, aintiquea irishiapitsajeitanaqueri.

⁶Aitaque ocantari ishiacaaventaqueneriri Jesoshi, iro cantaincha te iriojeitavaqueroji icantavetacariri. ⁷Icantajeitaqueri aisati:

—Queariotaque oca noncamantempiri. Narotaque shiacaventachari omoro tantorentsi iqueapinitantari ovisha. ⁸Maaroni jivajeitaquenari, coshinti ini irinti, coshitantatsiri; irootaque caari iquemisantajeitantari ovishapee. ⁹Narotaque iqueapinitantari, nareetacaajeiteari maaroni pocashijeitenane. Iriojeitaque avisacotajantsine. Inqueapinijeite, aisati irijatashitapinitero iroyeari. ¹⁰Ipcashitiri coshinti icoshiteri ovisha, iroyeri, impoyereeri. Irompa nainti, nopocashitiri naneacaajeiteri oijajeitenaneri, naneacaasanojeitajeri inquitequi. ¹¹Narotaque ashitariri cameetsari, irootaque nocoantacari noncamimenterri novishate. ¹²Te nonquempeteariji oisantiniriri ashitariri. Caari ini ashitariri ovisha. Ariorica irineavaqueri maniti impocapaaque, intsaroanaque, irishiapitsatanaqueri; irojocanaqueri ovishapee. Irosati iraanapeempariri maniti ovisha, irovarayetapeeri. ¹³Aitaque icantari oisantiniriri irovishate. Te inquenqueshireteriji ovisha, irinti iquenqueshireti quirequi impinayeeteri, irootaque ishiantanacari. ¹⁴Narotaque ashitariri cameetsatsiri. Niotiri novishate. Yora nashijeitacari iojeitaquena iriori. ¹⁵Aisati iquempeta Apa, iotaquena; aisati niotiri narori. Coajica noncamimentajeiteri novishate noavisacotanteariri. ¹⁶Ainiro aisati pashini, tequerata noviratajeari aca.

Iriojeitaque nampatojeitajeri. Ariorica noneanateri iriotsatavaquena, inquempeavacantajeitajeari novishatepee maaroni. Apaniro nashijeitajeari maaroni.

Incamimenterri Jesoshi irovishate.

¹⁷Aisati icanti Jesoshi:

—Noncamimenterri novishate, irosati naneantajeari. Irootaque inintacaanari Apa. ¹⁸Tecatsi matashitenaneme iroyename, irointiquea nocoasanoaque noncamimenterri novishate. Noncamavetaquea, aisati nontinaanaje: irootaque inintacaquenari Apa.

Icantavacaimentajeitacari Jesoshi.

¹⁹Aitaque ocantari icantaqueriri Jesoshi. Irosati icantavacaimentajeitanacari joriopee. ²⁰Timatsi icarajeiti oshequi cantayetatsiri:

—Yoitsaviaantaqueri camaari. Ishinqui-ventaitia. ¿Paita piquemisantantariri?

²¹Icanti itsipapee:

—Te intsaviateji: tempa cameetsa yoametanti. Caari ini camaari: tempa icavintsaajiri quitapoajeri, irootaque yamenacantajariri.

Iquempetasanotacari Jesoshi iriri.

²²Iquimoshirejeitaji aisati joriopee Jerosarequi. Iquenqueshiretajiro yoameetsayeentajaroniri peerani ivanco Tasorentsi. Opariantsitapaaji. ²³Yanii-veeti Jesoshi anta oveshintsayetacanta otincamipee pancotsi. Iro yovetsicacantiniri peerani Saromoni. ²⁴Yapatojeitashitapaacari joriopee. Icantapaaqueri: —Peerani pimanapitsataquenaro. Pincamantasanotena: ¿virompa Quirishito?

²⁵Yacanajiri:

—Aitaque nocamantajeivetaquempi. Iro cantaincha te pinquemisantavaquenaji. Paitarica nomayetaqueri, iriotaque

Apa tiancanari matacaaqueñarori. Oca nomayetaqueri, irootaque iotacayetempneri narotaque Quirishito. ²⁶Aitaque nocantaquempi: “Avirojeitaque caari novishate, irootaque caari piquemisantantana”. ²⁷Novishate iquemisantirononeane. Niojeitiri, aisati iriori, yojajeitana. ²⁸Aitaque naneacaajeitajiri. Incantaitatitempani iraneanaje inquitequi. Eiro yashinoncaajatsi. Noquempo yeasanoataqueri, oquempetimotaquena najiricaqueri. Tecatsi aapitsatajenarine. ²⁹Icantaquena Apa: “Pinquempoyejenari”. Yanaacojeitiri maaroni itasoncantanoti, tecatsi aapitsatajerine aisati iriori Apa. ³⁰Nomoncaratasanotacari Apa, imoncarataquena iriori.

³¹Irosati yaantajeivetanaca mapi impichaajecterime. ³²Icantanajiri Jesoshi: —Iriotaque Apa tasoncacaaqueñari.

Oshequi nonijayetaquempiro. ¿Paita pimpitseimentenari?

³³Icantanajiri:

—Te iro nompitseimentempi pantiri cameetsatsiri. Aviro shirampari, iro cantaincha pijitasorentsitashitaca, irootaque nompitseimentempiri.

³⁴Yacanajiri Jesoshi:

—Tempa isanquenayeetinirini atiri: “Noncamantajeitempi: ‘Avirojeitaque tasorentsitsiri’”. ³⁵Yora isanquenatiniri irineane Tasorentsi, icanteetiri: “Tasorentsitsiri”. Tecatsi ancantero ampashinitajero Sanquenarentsi. ³⁶Inintacaaquena Apa, irootaque itiancantaquenari aca quipatsiquica. Incaranqui nocantaquempi: “Narotaque Itomi Tasorentsi”. ¿Paita meeca picantantanari: “Pijitasorentsitashitaca”? Itasoncantaque Apa. ³⁷Terica nonquempeteari eiro piquemisantantsi. ³⁸Irompa noquempetacaririca, pinquemisantajeitena. Eiro piquemisantashitanatsi narori, irointi pinquemisantimentenaro nomayetaqueri. Pinquemisante, piotanteari iquempetaquena Apa. Aisati

narori noquempetacari Apa. Piotasanoataquero.

³⁹Icoasanojeivetanaja aisati irayerime, iro cantaincha ipeimotanacari Jesoshi.

Imonteanajaro Jesoshi Jorirani.

⁴⁰Ari imonteanajaro aisati Jesoshi Jorirani. Ijataji anta intacaronta peerani Joani ivaotisantantaqueni. Aitaque itimapaajiri anta. ⁴¹Oshequi pocashijeitajiriri aisati. Icantajeitapaaji:

—Te intasoncanteji irinti Joani, iro cantaincha queario oni maaroni icantacotaqueriri Jesoshica.

⁴²Oshequi quemisantajeitavaqueriri Jesoshi anta.

Ipianaja aisati Jesoshi Vetaniaqui.

11 ¹Isaviqui Vetaniaqui shirampari pajitachari Irasaro, yojoquuitaca. Osaviqui aisati ivancoqui iritsiropee: jero Maria, jero Marita. ²Chapinqui osaitiri Maria Avincatsarite iitiqui. Iro osaitantari casancajari. Oshetantajari oishi aisati. Ari yojoquuitaca ojariri, ³irootaque otiancantacariri camanterine Jesoshi. Arejiqui ijatashitaqueri. Ineantapaacariri icantapaqueri:

—Novincatsarite, yora Irasaro pinintasanotiri, yojoquuitaca.

⁴Iquemavaqueri Jesoshi, icantavaqueri:

—Yojoquiiivetaca, iro cantaincha eiro icamasanotitsi. Iro yojoquiiitantacari, icoaque Tasorentsi impincatsanteeteeriri, aisati impincatsanteetenari narori.

⁵Jesoshi inintiro iroori Marita, ireento, jeri ojariri. ⁶Ari iquemacotitacari yojoquuitaca, iro cantaincha apite quitaiteri isavicanaque. ⁷Irosati icantantajana aisati icantajeitiri itsipapee iroamerepee:

—Tsame ampiajeitanaje aisati Joreaqui.

⁸Nocantanaqueri narori:

—Chapinqu, oametanari, anta impichaaquempime ashaninceapee.

¿Ariompa pimpiashitanajeri aisati anta?
Eiro ajatitsi: yoicari.

⁹Yacanaquena:

—Noshiacantempiro. Icontetapaaque catsirincaiteri, iquitaitetacotapaaaje. Ariorica inquianaje, ari ontsiteniiteanaje. Yora aniitatsiri quitaiteriqui, iniiro oquitaiteti quipatsiqui, irootaque caari itsitincanta. ¹⁰Iro cantaincha itsitincajeita aniitatsiri tsiteniriqui. Iro itsitincantacari, tecatsi quitaitetacoterine.

¹¹Aitaque icantaquenari. Irosati icantantanari:

—Maanaqueyeya Irasaro. Nojate meeca noncaocapaajeri.

¹²Nocantanaquero:

—Maanaquerica, Novincatsarite, aitaque iravisacotaje.

¹³Iro cantaincha, irointi iquenquetsatacoveacarari Irasaro, icamaque. Narori, nojtashivetaca iro icantaquenari: “Imaashita, irimaoreanteari”. ¹⁴Irosati icamantasanotantajanari:

—Camanaque Irasaroni. ¹⁵Te nontsipatavaqueariji narori. Meeca pinquemisan-tajeitanaquena, irootaque noquimoshire-tantanacari. Tsame amenajeitateri.

¹⁶Yora Tomashi ipajiyeetiri Tsipari, icantaajeitana:

—Tsame aijajeitanaquero, iroavaqueeta arori.

Oquenquetsatacairi Marita Jesoshi.

¹⁷Irotimataintsi inampini Irasaro. Niojeitaque icaratacotaque otsipasati quitaiteri yoiminqueantacariri Irasaroni omoroqui imperita. ¹⁸Ora Vetania oquempejitaro Jerosare, ocarati 3 quirometero. ¹⁹Iponeanaca Jerosarequi oshequi joriopee pocashitirori Marita, jero Maria. Icantapaaquero:

—Eiro poashiretacoshirearitsi pijaririni.

²⁰Oquemacotavaquero Marita quempeji-tapaaque Jesoshi. Osoquijanaque, ojataque otonquotavacari. Irointi Maria,

ainiro osaviqui pancotsiqui. ²¹Ocantava-queri Marita Jesoshi:

—Ariorica pintimaiteme aca, Novinca-tsarite, eiro icamime jaijini. ²²Niotaque meeca paitarica pincanteriri Tasorentsi aitaque inquemisantaquempi.

²³Icantanaquero Jesoshi:

—Aitaque intinaaje pijaririni.

²⁴Ocantanajiri aisati:

—Ariorica omoncaratapaaquea intinaa-jeitantanajeari camajeitaintsiri, aitaque intinaanaje iriori jaijini. Niotaquero.

²⁵Icantanajiro:

—Narotaque tinaajeitajerineri camajeitain-tsiri, oaneajeitajerineri aisati. Incamajeiveta-quea quemisantanari, iro cantaincha iraneanaje aisati. ²⁶Maaroni aneajeitatsiri, inquemisantenarica iriori, eiro icamasanotitsi. ¿Pishiretacarompa oca nocantaquempirica?

²⁷Ocantanajiri:

—Je, Novincatsarite, niotaquempi, avirotaque Quirishito, Itomi Tasorentsi pocaintsiri quipatsiqua.

²⁸Irosati opiantanaja ocajemiro ireento. Ocamantatsatapaaquero:

—Areetapaaca Oametantatsiri, icajema-cantaquempi.

²⁹Ocantiro:

—Ari.

Intsipate ocatianaca, ojatashitanaquero Jesoshi. ³⁰Tequeratsita irareetea iriori nampitsiqui. Ainroqueratsita anta oneaitirinta Marita. ³¹Ari inajeitavaquero quivantajeitirori ojatanaque, irosati yojajeitantanacaro. Ijijeivetaca ario ojateri omoroqui yoiminquee-taquerinta ojaririni. Aisati ijijeitiro ojate iracotajeari aisati anta. ³²Ari oneapaaquero Jesoshi, ojatashitiri, otiyeroashitapaacari. Ocantapaaquero:

—Ariorica pintimaiteme aca, Novinca-tsarite, eiro icamime jaijini.

Intinaanaja Irasaro.

³³Ineavaquero Jesoshi iraimotapaacari. Iraajeitaca joriopee tsipajeitarori. Irosati

icantashiretananacari iriori Jesoshi,
yoashiretanaca. ³⁴Icantanaque:

—¿Jaoca poaqueriri?

Icantanaqueri:

—Anta, Novincatsarite, noaqueri
omorogui. Tsame pamenaiteri.

^{35,36}Iraapaaca Jesoshi iriori. Irosati
icantantanaca jorio:

—Pineaqueri, oshequi inintasanovetarini.

³⁷Timatsi aparopee cantatsiri:

—¿Caarimpa yoca amenacaajiriri
quitapoajari? Intimeme aca, ¿eirampa aisati
yoavisacotajirime Irasaroni, eiro icamime?

³⁸Icantashiretasanotanaji Jesoshi aisati.

Iquempejitapaacaro omoro, ora imorotashi-
yeetaqueriri imperitaqui. Yashitacoyeetanta-
cari mapi. ³⁹Icantapaaque Jesoshi:

—Pintivironcajero mapica.

Ocantanaqueri Marita:

—Novincatsarite, otsipasatitanaque
quitaiteri icamantacari. Shititanaque.

⁴⁰Icantanajiro:

—Tempa nocantaquempi: “Pinquemi-
santaquenarica aitaque pineaquero
intasoncante Tasorentsi”.

⁴¹Irosati itivironcanteetajaro mapi.

Yamenanaque Jesoshi jenoqui, icantanaque:

—Ariove, Apa, niotaque piquema-
quena. ⁴²Niotaque irosati picanta
piquemapinitana. Jeri oshequi catiimojei-
tanari. Nocoaque iriojeite pitiancaquena,
irootaque noquenquetsatacantimpiri.

⁴³Irosati icajemasananotanaca:

—Irasaro, pintinaanaje, pimpocaje.

⁴⁴Irosati isoquijantanaja camavetai-
chari. Ora chapinqui yoisotanteetavaca-
riri tocoyatsa: iracoqui, iitiqui, maaroni.
Ipashicavorotanteetavacariri paanio.
Icantiri Jesoshi:

—Poisoreajeri, pishineteri irijataje.

Icantayetiri oametavacainchari.

(Mt. 26.1-5; Mr. 14.1-2; Jr. 22.1-2)

⁴⁵Joriopee, yora tsipajeitacarori Maria,
ineacojeitaqueri Jesoshi. Oshequi

quemisantajeitanaqueriri; ⁴⁶itsipapee
ijatashitaqueri variseopee, icamantacota-
paaqueri Jesoshi. ⁴⁷Yora jivatacaajeitiriri
saserotepee, jeri aisati variseo, yapatojei-
taqueri pincatsaripee oametavacaajeitain-
chari. Icantavacaajeitaca:

—¿Paita antajeiteri? Yora shirampari
oshequi itasoncantapinitaque. ⁴⁸Ariorica
ashinetajeri aisati, ario inquemisantajei-
tanaqueri maaroni atiri; impoiiji ipocashi-
jeiteecari oromasati, itireayetirocari
ivanco Tasorentsi. Ipyereaajeiteecari,
maaroni.

⁴⁹Itsipajeitari anta Caijashi iriori.

Meeca osarintsi ipincatsariventiri
saserotepee. Icantanaque iriori:

⁵⁰—Tecatsi piojeite avinti. Te pinquen-
queshireempaji. Pamenajeite: ocameetsa-
timojeitee incameta shiramparinta
aparoni, iroavisacojeitantaajeri eiro
apoyereaajeitantatsi.

⁵¹Te incantashitearoji oca. Iriotaque
pincatsariventajeitiriri maaroni saserote-
pee. Yoametiri Tasorentsi, iotantacari
incamimentajeiteri Jesoshi maaroni
joriopee. ⁵²Te apaniro incamimentajeiteri
joriopee, irointi incamimentero maaroni
atiri intomintajeiteari Tasorentsi.

Inashijeiveta, isavicajeiti nampitsipeequi
arejipeequiniri, iro cantaincha
incamimentero irampatojeitantariri
maaroni. ⁵³Irosati isareajeitancariri
iroyeri Jesoshi. ⁵⁴Irootaque caari meeca
iquenapinitantaja Jesoshi anta yoshequi-
tinta joriopee, te ironijaapeempariji.
Ijatanaji quipatsiqui pajitachari Ejerai,
otsapitapaacanta caaraiteri. Aitaque
isavicapaajiri, icarajeitana, aisati maaroni
itsipapee iroamerepee. ⁵⁵Irotimataintsi
Yavisantaniri, inquimoshirejeitanaque
noshanincapee. Meeca itoncaajeitanaque
Jerosarequi iroameetsatantajeiri,
inquemisantanteariri Tasorentsi. Ijajeita-
naque maaroni savicajeitatsiri jaocarica,
⁵⁶icoajeitapaajiri Jesoshi. Iqueajeitapaa-

que ivancoqui Tasorentsi, icantavacaajei-tapaaja:

—Paamaaca, çari impoque Jesoshi?

Eirorica ipoquitsi iriori inquemisante.

⁵⁷Aitaque icantacantaque jivatacaajeitiriri saserotepee, jeri variseopee:

—Piotaqueririca jaocarica inaqueri Jesoshi, pincamantenata.

Icoajeitanaque iraacanteri.

Anta Vetaniaqui osaitiri tsinane Jesoshi.

(Mt. 26.6-13; Mr. 14.3-9)

12 ¹Ocaranivani 6 quitaiteri inquimoshireventearo Yavisantaniri. Yareetaja Jesoshi Vetaniaqui, anta isaviquinta Irasaro camavetainchari: yora yoitinaajiri Jesoshi, yoaneajiri. ²Aitaque icarajeitiri Irasaro Jesoshi, yoajeita. Marita irootaque amacoyetiniriri yoari. ³Maria amaqueneri Jesoshi casancajari, cameetsajatasannotatsiri. Opinatasanotaca. Quejitsi oni, ojaacaro voteyajaniqui. Osaitiri iitiqui, irosati oshetantajari oishi. Otimanaque ojencaare, otsoteanaquero maaroni pancotsi. ⁴Ari itimaiti ara Jorashi Ishicariote. Iroamere Jesoshi inaveta, iriotaque aacanterine coajicani. Icantanaque:

⁵—¿Paitampa caari pipimantantaro casancajarica? Opinaveta 300 tenario, ampayetajerimeri iriori ashinoncaincari. Paparajatashitacaro maaroni.

⁶Icantashita: te irineshinoncateriji ashinoncaincari. Iquempoyeajeivetanari noirequite maaroni, iro cantaincha coshinti ini. Ari icoshitaarantitavajanari, irootaque iquishmentantarori te omperiji ovinaro casancajari. ⁷Icantiri Jesoshi:

—Oncanteata. Iotaque noncame, irootaque osaitantanari tequeratsita noncame. ⁸Incantaitiyempani incarajeitempi ashinoncaincari, ari pineshinoncatapinitiatiyerini. Irompa nainti eiro nocantatiani noncarajeitempi. Eiro osamanitajitsi pineshinoncatantajanari aisati.

Oshequi quemisantajeitiriri Jesoshi.

⁹Oshequi jorio quemacojeitajiriri Jesoshi itimapaaji anta, ijatashijeitanaqueri. Aisati ijatashijeitanaqueri irineeri Irasaro, yora camavetainchari yoitinaajiri. ¹⁰Isareajeitacari jivatacaajeitiriri saserotepee iroyeri aisati Irasaro.

¹¹Oshequi joriopee neacojeitaqueriri Jesoshi yoitinaajiri Irasaro, irootaque yojocajeitantanajarori iquemisantavetari saserotepee, iquemisantajeitantariri Jesoshi irinti.

Yora jerosaresati

ipincatsajeitavaqueri Jesoshi.

(Mt. 21.1-11; Mr. 11.1-11; Ir. 19.28-40)

¹²Oquitaitetamanaji aisati. Oshequi catsini pocaintsiri inquimoshirejeite. Iquemacojeitajiri Jesoshi impoque Jerosarequi. ¹³Ari ijajeitanaque itonquiojeitavacari. Yajeitaqueneri tsiaroshi. Icajemajeiti:

—Jeri yoca oavisacotajeeneri, icameetsatasanoti. Iriotaque itiancane Avincatsarite. Iriotaque yoca pincatsariventajeitajerine ashanincapee, maaroni.

¹⁴Ineapaaqueri Jesoshi aparo voro caariquera iquijacoyeeta. Iriotaque iquijacotapaacari. Aitaque peerani isanquenatacotitari: ¹⁵“Savicajeitatsiri Sioniqui, eiro pitsaroashitatsi. Jeri yoca pocaintsiri, iriotaque pincatsariventajeitempine; iquijacotapaacari vorojaniqui”.

¹⁶Tequeratsita notacojeiteri oca isanquenatacotitacariniri peerani: ijatanaji Jesoshi jenoqui, impoijiquea noquenqueshireajeitanaquero. Aitaqueuea imoncarataquero maaroni isanquenatacotitacariniri. ¹⁷Ari chapinqui icajemiri Irasaro: “Pincontetapaaje”, ari icontetapaaji.

Camasanovetainchari, iro cantaincha yoitinaajiri: nocarajeiti oshequi neacojeitiriri, impoiji nocamantacojeitaquero ora noneajeitaqueri. ¹⁸Ari iquemacojeitaqueri

atiri itasoncantayeti Jesoshi, irootaque ijatashijeitantacariri itonquiojeitavacari.

¹⁹Icantavacaajeitanaca variseo:

—Pineaquero, tecatsi ancantanirojeiteri. Yoijajeitaqueri maaroni atiri.

**Icoajeiti pashinisatipee
atiri irineeri Jesoshi.**

²⁰Itoncaajeitanaque Jerosarequi oshequi atiri inquimoshirejeite, inquemi-santajeite. Icarajeitiri pashinisatipee atiri, iroaquera peajancha jorio. ²¹Ijatashijeitapaaqueri iriori Jeripi, yora vetsairasati. Otimi Vetsaira Carireaquei. Icantapaa-queri:

—Apa, nocoï noneeri Jesoshi.

²²Jeripi ijatashitanaqueri icamantaitiri Antirishi. Irosati ijatantanaja apite, icamantiri Jesoshi.

Incamaque Jesoshi, intinaanaje.

²³Icantavaqueri:

—Noponeaque inquitequi, natiritapaa-que; irotaintsi meeca impincatsayeetena.

²⁴Queariotaque oca noncamantempiri. Ariorica ompariye quipatsiqui apaitsoquirotirico, eirorica otijatsi, irosati oncantea: apaitsoquirotirico onapaaque. Irompa ontijaquearica, ari oshiocanaque, oshequiasanotanaque aisati oitsoqui. ²⁵Timatsi atiri quempoyeave-tachari irisati, te incoyeji irashinoncayea, yatsipetashitaca iquempoyeaca irisati; eiro yaneasanotajitsi inquitequi iriori. Irintiquea caari quempoyeacha irisati meeca, incantaitiyempani iraneanaje irinti inquitequi.

²⁶Maaroni coatsiri irantayetenaro nocoacairiri, irojijatenata; incarajeitenaya jaocarica nontimeri narori. ^{27,28}Aisati impinateri Apa. Meeca noquenqueshiretanaca. ¿Paita noncanceriri meeca Apa? ¿Noncancerimpa: “Apa, irotaintsi iroashinonqueetena, poavisacotena”? Eiro nocantiritsi. Irootaque nopocantacariri quipatsiqui nonquematsicataro meeca.

Irosati iquenquetsatantacariri iriri:

—Apa, nocoaque impincatsajeitempita atiripee, irineacameetsajeitempita.

Irosati noquemajeitantacariri Apa anta inquitequi, icanti:

—Aitanaque niotacaajeitiri nopincatsaritanotaque. Coajica niotacaajeitajeri aisati.

²⁹Ari iquemajeivetavacari catiajeive-tainchari, iro cantaincha te iriotosanotavaqueroji. Icantashijeitanaca:

—Otirei.

Pashini cantayetanaintsi:

—Ineanatiri inampire Tasorentsi.

³⁰Icantiri Jesoshi:

—Te naro iroamete: avirojeivetaca avinti yoamejeivetaca. ³¹Meecaquea incantacoventajeiteri maaroni tseencantayetsiri: “Ainiro pantane, aitaque noasanquetimentempiro”. Meeca aisati irojoqueri Apa yora pincatsariventajetiriri tseencantsiri. ³²Irotaintsi iroatiacoyeetena, irosatiquea nampatojeitanteariri maaroni atiri, impocashijeitena.

³³Irootaque icantaqueriri Jesoshi. Icamantitacariri jaoca incanteari incamanteari coajicani.

Ipiatsayetacariri Jesoshi.

³⁴Yacanaqueri atiri:

—Oamejeitee Sanquenarentsi: “Irosati incantaitiyempani Quirishito iranee”. ¿Paita picantiri? ¿Paita picantantarori avirori: “Iroatiacoyeetaqueri Atiritapaintsiri”? ¿Janicampa yora Atiritapaintsiri camatsineri?

³⁵Yacanajiri Jesoshi:

—Ainiroquera oquitaiteti, iro cantaincha eiro meeca osamanitajitsi ontsitenitajeari. Paniitanaque meeca, omapoquimpicari tsiteniri. Ariorica paniitanaje tsiteniriqui, eiro piotitsi jaocarica pinquenajereri. ³⁶Ainiroquera noquitaitetacotimpi, niotacaimpi; picoaquerica pinquemisantena, pinquemisantenata meeca. Impojiji

pinquempejeiteri pishanincepee:
pinquitaitetacoteri, piotacaajeiteri iriori.
Irosati ijtantanaja, imanapitsatanajari.

Caari iquemisantanta joriopee.

³⁷Ineajeivetacari oshequi atiri itasoncantayeti Jesoshi, iro cantaincha te inquemisantajeitavaqueriji. ³⁸Imoncarajeitacuero isanquenatacotitacanjari peerani Isayashini: “Novincatsarite, eiro ishequitasanotitsi quemisantavaqueroneri ora ancamanteriri. Irineajeivetempi pintasoncante, iro cantaincha eiro iquemisantimpitsi”. Camantantatsiniri inaveitani Isayashini. ^{39,40}Icantitacani aisati: “Yora Tasorentsi inquitapoajatacayeri tseencajeitiriri, impeitacuero iquenqueshireantavetari. Icantari: ‘Ineicari. Ioticari. Yaventanacari. Noavisacotiricari’”. Irootaque caari imajeitantararo tseencantatsiri inquenqueshireempa. ⁴¹Peerani ineaqueri Isayashini ishiquaireaque Avincatsarite, impoiji iquenquetsacotiri. ⁴²Aisati oshequi jivatacaajeitiriri joriopee, iquemisantajeivanacari Jesoshi. Iro cantaincha itsarocajeitacari variseopee, irootaque caari icamantantari ishaninca: “Noquemisantari Jesoshi”. Iquenqueshireti: “Iquishmentanaricari noquemisantari Jesoshi, eiro ishinetanatsi nampatojeiteari noshaninca nonquemisantajeite”. ⁴³Yora variseopee icopinijeiti irineacameetsajeiteri atiri, te irio incoye irineacameetsateri Tasorentsi irinti.

Cameetsa anquemisanteri Jesoshi.

⁴⁴Irosati icajemantanaca Jesoshi:
—Maaroni quemisanterari, te nara inquemisantasanote, irintiquea iquemisantasanotaque tiancaquenari. ⁴⁵Maaroni neaquenari, irinti ineaque aisati tiancaquenari. ⁴⁶Irootaque nopocantacari nonquitaitetacoteri atiri, niotacaasanojeiteri. Yora quemisanterari,

eiro yatsipetajaro intimaje tsiteniriqui; tempa ioyetaque. ⁴⁷Yora quemayevetacrori noneane: eirorica iquemisantiro, eiro noasanquetiritsi nainti. Te iro nompocantea quipatsiquica noasanquetaayeri atiri, irointi nopocantea noavisacojeiteri. ⁴⁸Maaroni tseencaqueenari, caari quemisantiro noyenquetsare, timatsi oasanquetaajeiterineri coajicani. Jero oca noneane nocantavetacari: coajica omoncaratapeemparica, iroasanquetimentero itseenquiro noneane. Te noneaveetashiteaji. ⁴⁹Apa tiancaquenari, iriotaque cantavaquenari: “Iroyea oca pineanatapeeri. Jero oca pincantapeeriri”. ⁵⁰Yora quemisantavaquerori irineane Apa, incantaitiyempani iraneanaje inquitequi. Niotaquero oca. Oca nocantaquempiri, nomoncarataquero icantaquenari Apa.

Yora Jesoshi iquiviniri iroamerepee iiti.

13 ¹Tequeratsita inquimoshireventajeitajearo Yavisantanari. Aitaque iotaque Jesoshi omoncarataca irojocantanaajearori quipatsica, impiantanajeari iririqui. Icantatiani inintajeitacuero yashijeitacari quipatsiqiniri. Meeca inintasanojeitiri. ²Ari noajeitaca, notsipajeitacari Jorashi Ishicariote, yora itomi Shimo. Iquenqueshireacaacari camaari iraacanteri Jesoshi coajicani. ³Iotaque Jesoshi itiancaqueri Iriri impincatsariventajeiteri maaroni atiri. Iotaque aisati iponeaca Tasorentsiqui, impiashitanajeri aisati. ⁴Ari yoacajeitacuena Jesoshi, impoiji icatianaca. Yojoquireacuero yoicoro. Ishitacsaquitacaro ishevorotantari. ⁵Irosati isantacaro nija metarogui, irosati iquivantajeitacuenerori noitipee: narori, aisati itsipapee iroamerepee. Iro ishetantajanarori noiti ishevorotantari. ⁶Irovetaincha inquivaquiiatapeerime iriori Petero, icantavaqueri:

—Tempa avirotaque Novincatsarite, te oncameetsateji pinquivenaro noiti narori. Oncameetsateme nonquivemprome piiti avinti.

⁷Yacanaqueri Jesoshi:

—Te piotacoteroji meeca oca nantaquempiri. Aitaque piotajero coajicani.

⁸Icantanaqueri:

—Eiro piquivanarotsi noiti catsini.

Yacanaqueri:

—Eirorica noquivimpitrosi piiti, eiro aquempeavacaatsi coajicani.

⁹Irosati icantantacariri:

—Jentsite, Novincatsarite, pinquivenaro noitipee, naco, noito, maaroni.

¹⁰Icantanajiri Jesoshi:

—Eiro yapiitajatsi inquivajea caajeitaintsiri. Quitejeivetaquempi avinti, iro cantaincha te pinquitejeiteji maaroni.

¹¹Iotaque Jesoshi janica aacanterineri.

Irootaque icantantacari: “Te pinquitejeiteji maaroni”. ¹²Itsoncajeitaquena iquivajeitaquenaro noiti maaroni. Iquitsaatajaro aisati yoicoro. Aisati isaviquimojeitajana, icantana:

—¿Piojeitaquempa meeca paita nantantayetarori ocapee? ¹³Tempa picantapini-jeitana: Oametantatsiri, aisati Pincatsari. Queariotaque oca picantaquenari.

Narotaque oamejeitimpiri, pincatsariventajeitimpiri. ¹⁴Pineaquena meeca, noquivajeitaquempiro piiti. Aitaque pinquempetavacaajeiteari avirori, pinquivavacayea piitiqui. ¹⁵Naro onijaquempirori. Aitaque meeca pinquempejeitavacayea avirori, pinquivavacaajeitea. ¹⁶Queariotaque oca nocantimpiri. Inampire te iranaacoteriji nampitariri impincatsarite. Aisati itiancane eiro yanaacotiritsi impincatsarite yora tianquiriri. ¹⁷Ariorica piquema-

vaquero oca noametimpiri, pimataquero nocoacaimpiri pinquimoshirejiteanteari. ¹⁸Timatsi meeca aparoni nocamantacota-

sanotiri, te maaroni nonquenquetsatacotempiji. Nocoyeajeitaquempi, tempa niojeitaquempi. Ainiro Sanquenarentsi caariquera moncaratacha, ocanti: “Yora oacotaquenari notantane, iraacantena”. ¹⁹Aitaque nocamantitajeitaquempi tequeratsita irayeetena. Ariorica piotaque omoncaratata nocantimpiri, aitaque pishiretearo naro nainti isanquenatacotitaniri. ²⁰Queariotaque oca nocantimpiri. Ariorica iraacameetsayeetavaqueri notiancane, aisati narori, iraacameetsatena. Ariorica iraacameetsatavaquena narori, aisati inquempeteri iriori tiancanari, iraacameetsateri.

Icanti Jesoshi: “Iraacanteetena”.

(Mt. 26.20-25; Mr. 14.17-21; Jr. 22.21-23)

²¹Irosati yoashiretantanaca Jesoshi, icamantajeitana:

—Queariotaque oca noncamantajeitempiri. Timatsi aca aacantenaneri.

²²Ari namenavacaajeitanaca, te nioteji janicarica icantacotaqueri. ²³Narotaque iroamere inintasanotiri Jesoshi, ainirona narori, notiinatacari inejiqui. ²⁴Ijicotaquena Shimo Petero, icantana:

—Pisampiteri. ¿Janica iquenquetsatacotiri?

²⁵Irosati notiinatasanotantanacariri aisati inejiqui Jesoshi. Nosampitaqueri:

—Novincatsarite, ¿janicampa aacantempine?

²⁶Yacanaquena:

—Ariorica novincaquero tantaca, yoca nompaqueri, iriotaque aacantenaneri.

Irosati yovincantanacaro tanta, ipaqueri. ²⁷Irosati iquenqueshiretacaantariri Satanashi Jorashi iraacanteri Jesoshi. Icantanaqueri Jesoshi:

—Ora piquenqueshiretiri panteri, pimateroqueti.

²⁸Yora oajeitainchari ara te iriotavaqueroji icantaqueriri. ^{29,30}Ari yaanirotavaquero tanta, irosati ijatantanaca

iraacaantanteariri. Yora Jorashi iriotaque quempoyeaquenariri noirequite maaroni. Ijatantacari, yaamaanaca aparopee icantiri Jesoshi: “Pamanantaite ayeari anquimoshireventearo Yavisantaniri”. Pashini yaamaaca icantiri: “Pijate pimpashiyetaiteari ashinoncayetachari”. Ari ijjatantanacari, otsitenitanaji.

Icamantajiri iroamere irijataje.

³¹Impoiji icantanaquena Jesoshi:

—Noponeanaca narori inquitequi, natiritapaaque. Irotaintsi meeca impincatsajeitena atripee, aisati niotacaajeiteri impincatsajeiteri Apa. ³²Aisati inquempetea Apa iriori, iriotacaajeiteri atiri impincatsajeitena narori. Meeca irimatero, eiro isamanitirotsi. ³³Meeca, noamerejei, eiro osamanititsi nojocajeitantanajempiri. Aitaque nocamantatari joriopee, aisati meeca noncamantajeitempi avirori: anta nojatajenta, eiro pimatirotsi pijataje avirori. ³⁴Pashini noncantajeitempi meeca: pinintavacaajeitea maaroni. Oquempetaca narori nonintajeitimpi, aisati pinquempetavacaajeitea avirori, pinintavacaajeitea. ³⁵Ariorica pinintavacaajeitaquea, aitaque iriojeitaquempi maaroni atiri: avirojeitaque noamere.

Incante Petero: “Te noneeriji Jesoshi”.
(Mt. 26.31-35; Mr. 14.27-31; Ir. 22.31-38)

³⁶Icantanaqueri Shimo Petero:

—¿Jaoca pijatajери, Novincatsarite? Yacanaqueri:

—Anta nojatajenta, eiro pimatirotsi poijatanaquena meeca. Coajicaquea aitaque poijatanajena.

³⁷Icantanaqueri Avincatsarite:

—¿Paitampa caari nomatantearo noijatanaquempi meeca? Iroyeteerica, iro cantaincha nintacotanaquempi.

³⁸Yacanajiri Jesoshi:

—¿Ariompa pintacotasantanaquena? Queariotaque oca noncamantempiri:

eirotsitarica inei teapa, pincantaque: “Te noneeriji Jesoshi”. Oncarate mava pincantaque.

Iraanajeri Jesoshi quemisantatsiri Apaqui.

14 ¹Aisati icantajeitana Jesoshi: —Eiro picantashirejeititsi, irointi pishireteari Tasorentsi. Aisati narori, pishiretena. ²Anta inampiqui Apa otimi oshequi pancotsipee. Eiro oshequitime, aitaque noncamantaquempime te oshequiteji. Nojate anta novetsicanontapeempi pisavicantajeiteari avirori coajicani. ³Ariorica nomatempiro pisavicanteari, nompishijeitajantempi aisati, naajeitajantempi. Aitaque pintsipa-jeitapaajena nosaviquinta narori. ⁴Piojeitaque jaoca nojatajери. Piojeitaque aisati jaoca nonquenanajeri.

⁵Icantanaqueri Tomashi:

—Te nojeiteji jaocarica pijatajери. ¿Jaoca noncanteari niotanteari jaoca pinquenanajeri?

⁶Icantanajiri Jesoshi:

—Tempa narotaque nijaanajempironeri pinquenantanajeari, aisati narotaque oametapinijeitaquempirori queariotasannotatsiri, aneacaajeitaquempiri. Tecatsi pincantea pijatashiteri Apa, narotaque aajeitanajempine. ⁷Piojeitaquenaricame, aisati piojeitaquerime Apa iriori. Meeca piojeitaqueri. Aitaque pineajeitaqueri.

⁸Icantanaqueri Jeripi:

—Novincatsarite, ponijayenari piri; irootaque aparoni nocantimpiri, aita-paji.

⁹Icantanajiri Jesoshi:

—Peeranitaque notsipajeitaquempi. ¿Tequerampa piotimatena? Maaroni neaquenari, ineaqueri Apa iriori. ¿Paita picantantanari meeca: “Ponijayenari piri”? ¹⁰¿Tequerampa piotimateji noquempetacari Apa? Aisati iquempetana iriori. Te noncantashiteaji. Iquempetaquena Apa, iriotaque matacaanarori notasoncanti. ¹¹Tempa nocamantimpiri

noquempetacari Apa. Aisati iquempetaquena iriori. Pishiretearo oca nocamantaquempiri. Pineasanojeitaquena notasoncantaque, pinquemisantimentasanotenaro.

Ariorica irijataje Jesoshi, oshequi irimateneri quemisantatsiri.

¹²Jero aisati icantajeitana Jesoshi:

—Quearioraque oca noncamantempiri. Maaroni quemisantanari inquempejeitena, intasoncante iriori. Nompianaje Apaqui, irootaque iranaacojeitantenari intasoncantasanojeite iriori. ¹³Ariorica pishiretaquena, aitaque nomataquempiropaitarica pincoacoteriri Apa. Oca nomatempiro irineapincatsatanteeteariri Apa. Tempa narotaque Itomi. ¹⁴Pishiretarica, aitaque nomataquempiropaitarica pincanteriri. ¹⁵Pinintanarica, pinquemisantajeitena paitarica noncamantajeitempiri. ¹⁶Narotaque quenquetsatacayerine Apa. Noncanteri, irootaque intiancantajeitempirori pashini Amitacotajempineri. Irosati oncanteani ontsipajeitempi irointi: ¹⁷irootaque Ishire Tasorentsi, oamejeitempironeri maaroni quearioletatsiri. Te iriojeiteroji irinti tseencantatsiri, irootaque caari opocashijeitantari ontsipajeiteari. Aitaque quiso oajeitaquempi, oncantaitatiyempani. Irootaque piojeitantacarori avinti. ¹⁸Eiro nojoquimpitsi apaniro, aitaque nompia-shijeitajempi. ¹⁹Irotaintsi nojataje. Eiro ineajeitajanatsi tseencantatsiri, avintiquea neajeitajenane. Nashi noironanei, irootaque paneantajeitanajeari avirori: pincantaitatiyempani inquitequi. ²⁰Ariorica nontinaanaje, impojiquea piojeitanaque noquempetacari Apa. Piquempejeitaquena avirori, aisati noquempejeitaquempi narori: aacameetsatavacaajeitaca. ²¹Maaroni iotavaquerori nocantiriri, inquemisantaquerorica aisati, iriotaque nintanari. Apa ario

irinintaqueri nintaquenari. Aisati naroriarionintaqueri. Niotacaasanojeiterijaoca nocanta.

²²Ainiro anta pashini Jorashi, caari iniyora Ishicariote. Isampitiri:

—Novincatsarite, piotacaasanotaquena narori jaoca picanta. ¿Paita caari piotacantari tseencantatsiri iriori?

²³Yacanaque Jesoshi:

—Ariorica pinintena, pinquemisanterononeane, irosati irinintantempiri Apa iriori. Impoji nompocashijeitajempi quiso noantempiri. ²⁴Irintiquea caarinintana, eiro iquemisantirotsi noneane. Oca nocaquempirica, caari nashinoneane, irointi irineane Apa tiancaquenari. ²⁵Ainiroqueratatsi nocarajeitimpi, aitaque nocamantitaquempi. ²⁶Ioti Apa pishiretaquena, irootaque intiancantempirori Ishire, Amitacojeitajempineri. Oamejeitapaajempi maaroni. Irootaque quenqueshireacaajeitajempironeri maaroni nocantajeitaquempi.

Icamantajeitajari Jesoshi iroamere: “Nojataje”.

²⁷Aisati icantajeitana Jesoshi:

—Noquimoshiretanaque narori, tseencantashireteji. Noninti pinquempetena, pinquimoshirejitanaque avirori. Eiro imatirotsi atiri iromoshirenquempi. Eiro meeca picantashiretitsi, irointi piveshireajeitanaquea. ²⁸Aitaque piquemaquero nocantajeitaquempi. Nojatanaje, coajica nompia-shijeitajantempi aisati. Yanaacotana Apa itasorentsitasanoti. Arioricame pinintajeitaquename pinquimoshireimenta-jeitaquearome nocamantaquempi: “Nojatanaje Apaqui”. ²⁹Meeca nocamantitaquempiro tequeratsita nojataje. Ariorica piotaque omoncarataca nocamantaquempi, pinquemisantajeitaque. ³⁰Eiro osamantajitsi nonquenquetsatacaajempi aisati. Quempejitapaque pincatsariventajetiriri tseencantatsiri. Tecatsi incantea iriori

impincatsariventena. ³¹Meeca iriojeitana-
quero atiri nonintiri Apa, tempa nantapiniti-
niri paitarica inintacaaquenari. Ari, pincatia-
jeitanaje. Tsame avaajeitanajea.

**Yora Jesoshi irisati shiacantajancha
ovorentsa ova.**

15 ¹Jero aisati ishiacantaquenari
Jesoshi:

—Narotaque quempetarori ovorentsasa-
nori ova. Iriotaque Apa tsameetacotirori.
²Ipesayetiro ojempequi caari oitsoquitatsi.
Irompa irointi oitsoquitatsiri yoameetsata-
quero oitsoquitasanotanaqueari. ³Oca
noamejeitaquempiri, aitaque oameetsashire-
jeitaquempi. ⁴Quiso poajeitena. Aisati
narori, quiso noajeitempi. Ojempequi ova,
ariorica onchaoreanaque ovorentsa, eiro
omatajatsi oitsoquitaje, tempa oncamaque.
Aitaque piquempejitarori avirori. Eirorica
quiso poajeitanatsi, eiro pimatirotsi
cameetsayetsiri. ⁵Narotaque quempetarori
ovorentsa. Avirojeitaque quempejitarori
ojempequi. Maaroni quiso oanari irio
majeitajerone paitarica noncoacaayerirori.
Quiso noyeri narori. Ariorica pintentareajei-
tanajena, tecatsi pimatimataje. ⁶Yora caari
quiso oana, inquempetacaanteeteri
ojempequi ova, impesheetero, peti. Impoiji
ompirijatanaque, irampatoyeetajero
coajicani, irojoqueetero paamariqui,
ontayea, pomein. ⁷Irosatirica quiso
poajeitena, aisati ariorica pishiretaro
noneane, pincantena paitarica picoayetiri:
aitaque nomataquempi. ⁸Ariorica
pimayetaquero paitarica noncoacayempiri,
impincatsayeetanteariri Apa. Impoiji
iriotasanojeitempi avirotasanoataque
noamere.

**Yora Jesoshi ishanincatacari
maaroni iroamerepee.**

⁹Jero aisati icantajeitanari Jesoshi:
—Inintana Apa. Aisati noquempejei-
timp narori, nonintajeitimp. Quiso

poajeitena, anintavacaajeitanteari.

¹⁰Pinquemisanterorica nocantajeitimpiri,
irosati noncanteani nonintajeitempi
narori. Noquemisantiro icantaquenari
Apa, irosati icantani iriori, inintana.

¹¹Noquimoshiretanaque narori. Iro
nocamantantimpirori oca pinquempetan-
tenari, pinquimoshirejeitanteari avirori.
Nocoaque pinquimoshiretasanojeitanaque
maaroni. ¹²Jero oca noncamantempiri:
tempa nonintajeitimp narori. Aisati
pinquempetea avirori, pinintavacaajeitea.
¹³Yora intacotariri ishaninca, incamimen-
taqueririca, iriotaque nintasanotiriri.

¹⁴Ariorica pimajeitaquero nocantaquem-
piri, avirotasanoataque noshaninca. ¹⁵Eiro
meeca nocantajeitajimpitsi nonampire, te
irioteji nampirentsi paitarica yantiri
nampitariri. Iro cantaincha niotacaajeita-
jimp paitarica icantaquenari Apa,
irootaque noshanincatasanoantajimpiri.

¹⁶Te aviro coyeajeitenane; naro nainti
coyeajeitimpiri. Nontianquempi pimatan-
tearori paitarica noncoacaayerempiri.
Eiro patsipetarotsi paitarica pantayete-
nari. Pishiretenarica, aitaque irimatem-
piro Apa paitarica pincanteriri. ¹⁷Nampii-
tajempiro oca noncamantajeitajempiri:
pinintavacaajeitea maaroni.

**Yora tseencantatsiri iquishiri Jesoshi
aisati inquisajeitaqueri maaroni
quemisantajeitiriri.**

¹⁸Pashini aisati icantaquena Jesoshi:
—Ariorica inquisajeitaquempi
tseencantatsiri, piotasanote naro
ijivataque iquisaquena peerani. ¹⁹Yora
tseencantatsiri inintavacaaca. Arioricame
pinquempetearime avirori, aitaque
irinintajeitaquempime. Iro cantaincha te
pinquempejiteajeari. Nocoyeajeita-
quempi, irootaque iquisajeitantaquem-
piri. ²⁰Pinquenqueshireajero nocanta-
quempiri chapinqui: “Yora inampire te
iranaacoteriji nampitariri impincatsarite”.

Ari iquisajeitaquena. Aisati inquempejeitempi avirori, inquisajeitempi. Te inquemisanteroji nocantajeivetacariri. Aisati avirori, eiro iqumisantajeitirotsi pincamantajeiveteariri. ²¹Iriotaque Tasorentsi tiancaquenari. Iro cantaincha te iriojeiteriji iriori, irootaque inquisajeitantempiri. ²²Ari nopocashivetacariri, noquenquetsatacaavetacariri. Eirome nopocashitirime, eiro otimimotirime meeca irantane. Iro cantaincha meeca tecatsi incantajeite incante: “Te aneroji nantane”. ²³Yora quisaquenari iquisaqueri Apa iriori. ²⁴Tempa ineajeiveitaquena notasoncantayeti. Nomayetaquero caari imayeti atiri iriori. Eirome ineajeiveitaquename, eirome otimimotirime irantane. Aiquero ineaveitaquena, iquisaquena. Aisati iquisaqueri Apa iriori. ²⁵Aitaque incantajeitari. Moncaratapaaca oca isanquenayeeitiniri: “Iquisashijeitaquena, tecatsi nantavetea”. ²⁶Ari nontiancajeitajempi Amitacotempineri, ora Ishire Tasorentsi. Omponeaquea Apaqui, cameetsa oamejeitapeempi. Ariorica ompocaque oncamantacotapaajena narori. ²⁷Aisati avirori, pincamantacojeitajena narori. Tempa avirojeitaque tsipatapinijeitaquenari peerani.

Icantiri Jesoshi: “Coajica inquisajeitempi”.

16 ¹Aisati icantana: —Nocoi eiro pojocajirotsi piquemisanti, irootaque nocamantantajeitimpirori oca. ²Coajica pincoajeivetee pincarajeiterime ajorioririnte anta apatojeitapinitanta, iro cantaincha iroimpiavajempi. Coajica iroyempi aisati. Aiquero yora quisajeitaquempineri iramayeayantineri Tasorentsi inintacaaqueriri. ³Te iriojeiteriji Apa, aisati narori te iriojeitenaji, irootaque inquisajeitantempiri. ⁴Ariorica omoncarataquea oca nocamantaquempiri, aitaque pinquenqueshireanaquero nocamantitaquempiniri, irootaque meeca

nocamantantimpirori. Peerani notsipatimpini, irootaque caari nocamantantimpini peerani, meecari meeca irootaji nojataje, irootaque nocamantasannotantimpiri.

Ompocapaaque Ishire Tasorentsi.

⁵Aisati icantana Jesoshi:

—Meeca nojatanaje tiancaquenariqui.

Iro cantaincha te pisampijeitenaji: “¿Jaoca pijatajeri?” ⁶Meecaquea, meeca, nocamantaquempi, irootaque poashiretasanajeitantanacariri. ⁷Tampatica nocamantaquempiro oca. Ocameetsatimotimpi nojataje. Eirorica nojatajitsi, eiro opocashijeitimpitsi Amitacojeitempineri. Ariorica nojatanaje, aitaque nontiancajeitapaaquempiro. ⁸Areetapeemparica, iotacaajeitapaaqueri tseencantatsiri te oncameetsateji yantayetiri. Iotacaajeitapaaqueri aisati jaoca incantajeitajeari incameetsatantajeari. Aisati iotacaajeitapaaqueri jaoca incanteari Tasorentsi iroasanquetanteariri maaroni tseenquiriri. ⁹Te inquemisantajeitenaji, irootaque iroasanquetimentanteariri caari cameetsatsi. ¹⁰Coajica nompeimotanjempi, nojatanaje Apaqui, irootaque iotacantajeitapeempariri atiri nocameetsataque. ¹¹Iotacaajeitapeeri iroasanquejeiteri Tasorentsi. Tempa irisati oasanquejeiterineri yora pincatsariventajeitiriri tseencantatsiri. ¹²Ainiquera oshequi noncamantajeitempimeri, iro cantaincha eiro pimajeitirotsi piojeitavaquero meeca. ¹³Queariotasanotaque maaroni oamejeitempiri Ishire Tasorentsi. Ariorica ompocapaaque, iotacaapeempiro maaroni queariotatsiri. Eiro oametantashitapaatsi. Paitarica oquemaqueri irootaque oamejeitapeempiri. Oametempijaoca incanteeteari coajicani. ¹⁴Oca nocantajeitimpiri, irootaque oametempineri; iotacantempiri nopincatsaritaque. Maaroni icantayetanari Apa, nocamanta-

yetajimpro aisati narori, ¹⁵irootaque nocantajeitantaquemperi: “Oca nocantayetaquemperi, irootaque oametempineri”.

Icantiri Jesoshi: “Poashirejevetaquea, impoiiji pinquimoshirejeitanaje”.

¹⁶Aisati icantana Jesoshi:

—Capichanivaniji eiro pineajanatsi.

Osamanitimaque capichaji, ario pineajena aisati.

¹⁷Irosati nocantavacaarantantanacari:

—¿Jaoca ocantari oca icantaqueeri?

“Capichanivaniji eiro pineajanatsi.

Osamanitimaque capichaji, ario pineajena aisati”. Icanti aisati: “Nojataje Apaqui”. ¹⁸¿Paitasa icantantari: “Capichanivaniji”? Te ayotacotavaqueri icantaqueeri.

¹⁹Iotaque Jesoshi nocoajeiveta

nosampiterime. Icantanaquea:

—¿Pisampitimentavacaarompa

nocantaquemperi? “Capichanivaniji eiro pineajanatsi. Osamanitimaque capichaji pineajena aisati”. ²⁰Queariotaque oca noncamantajeitampi. Ario piraacojeitanaquea, maaroni, poashirejeitanaquea. Irinti quimoshirejevetachane tseencantsiri. Poashirejevetaquea, iro cantaincha pinquimoshirejeitanaje aisati. ²¹Ariorica omoncarata otimiri tsinane otomi, oquemaatsitacari. Itimanaquerica ojananequite, te onquenqueshireajeroji oquemaatsitacari, irointi oquimoshireimentiri yora timaintsiri. ²²Aitaque pinquempejitaqueari meeca avirori, poashirejevetaquea. Iro cantaincha aitaque noneajeitajempi aisati. Pinquimoshirejeitanaque, tecatsi oashiretaajempine aisati. ²³Meeca, eiro pisampijeitajantsi paitarica. Queariotaque oca nocantimpiri. Ariorica pishiretaquea, impaquempi Apa paitarica pincantajeiteri. ²⁴Peerani te pishirejitenani, te pinquenquetsatacaajeterini Apa. Meecaquea pinquenquetsatacapiniteri.

Paitarica pincanteriri, aitaque inquemi-santaquempi, pinquimoshirejeitasanotananaqueari.

Jesoshi icamantacotasantotiri Apa.

²⁵Aisati icantaquea:

—Ari noshiacaventapinitimpironi paitarica, iro cantaincha coajica eiro noshiacaventajimprotsi aisati. Aitaque tampatica noncamantacotasantotiri Apa, eiro nomanapitsatajimpiootsi. ^{26,27}Impoiiji pishiretanaquea, pinquenquetsatacayeri Apa. Avirojeitaque nintaquenari. Pishiretaro noponeaca Tasorentsiqui, irootaque inintajeitantimpiri Apa. Ari inintasanoroqueempi, irootaque impajeitantempirori maaroni coiteimojeitimpiri. Natsipetashitarocari namanacoventajeitajempi aisati.

²⁸Nosavicaveitani irioriqui, irosati nopocantacari quipatsiquica. Meeca nojocanajero quipatsica, nompiashitanajeri Apa.

²⁹Nocantiri:

—Meecaquea picamantasanotaquenaro. Te pishiaventajaneroji. ³⁰Meeca niojeitaque pitsotentajeitiro piojeitiro maaroni, irootaque noquemisantantacari piponeaca Tasorentsiqui. Tecatsi meeca nosampitajempiri.

³¹Yacanajana Jesoshi:

³²—¿Ariompa piquemisantasantaque meeca? Irotaintsi iroimishiyeetempi, pijajeitanaje pinampipeequi. Pojocajeitanajena apaniro. Aitaque irotaintsi omoncaratapeempa meeca. Iro cantaincha te apaniro none, quiso yoana Apa irinti. ³³Iro nocamantantimpirori oca piveshireanteari. Aitaque piveshireimentajena. Aca quipatsiquica iroashinonqueetempi, iro cantaincha piveshireajeitanaquea. Nanaacojeitaqueri maaroni timajeitatsiri quipatsiquica, nopincatsaritananoti nainti.

Irisati cantacoventashitacha Jesoshi.

17 ¹Irootaque icantajeitanari Jesoshi, irosati yamenantanaca jenoqui. Icanti:

—Apa, moncaratapaaca. Meeca piotacaajeiteri atiri nopincatsaritanoti: tempa narotaque pitomi. Aisati nonquem-petea, niotacaajeiteri pipincatsaritanoti avirori. ²Tempa aitaque pitiancaquena nompincatsariventajeiteri maaroni atiri, irootaque nomatantarori naneacaajeitajiri maaroni picoyeaquenari. Iro picoyeantacariri incantaitatitempani iraneajeitanaje iriori aviroriqui. ³Aviro Tasorentsi, apaniro pini. Cameetsa iriojeitempi maaroni atiri. Cameetsa iriote naro pitiancane, naro Jesoquirishito. Maaroni iotanari incantaitatitempani iranee inquitequi. ⁴Acu quipatsiqui nomajeita-quempiro maaroni pinintacaquenari, irootaque ipincatsatantimpiri atiri. ⁵Peerani, Apa, tequeratani avetsiqueroni quipatsi, notsipatimpini, nopincatsarita-quenti. Meeca pinquempetacaajena aisati, nompincatsaritaje, nontsipatajemp.

Icantacoventiri Jesoshi iroamerepee.

⁶Ari yovaajiro aisati, icantiri Iriri:
—Jeri yoca atiripee quipatsiquiniri pashijeitacari. Picantaquena: “Pinquem-poyeajenari”. Ari niotacaajeitaqueri jaoca picantari. Iquemisantajeitavaquero pineane. ⁷Meeca iojeitanaque aviro avinti intasanotarori maaroni poamejeitaquenari. ⁸Maaroni poametaquenari, novaaqueneri noamerepee, noametasano-jeitaqueri maaroni. Iojeitavaquero. Iotasannotavaque aviro tiancaquenari. Ainiro ishire iriori iquemisantantarori aviro tiancaquenari. ⁹Iriojeitaque nocantacoventiqueru. Te noncantacoven-teriji irinti tseencantatsiri, irintiquea yoca noquempoyeajimpiri. Tempa avirotaque ashijeitariri, ¹⁰aisati nashijeitacari narori. Aisati nashije narori, pashijeitacari avirori. Iquemisantajeitana, irootaque ineapincatsajeitananari. ¹¹Eiro notima-najitsi aisati quipatsiquica, irioquea irinti timajeitanajantsine, naintiquea nainti

piashitanajempine. Aviro, Apa, cameetsari. Tempa picantani pitason-canti. Meeca aviro quempoyeajeitajerine yoca noquempoyeaquempi, inquempea-vacaanteari. Nocoaque irimoncarajeita-jeeta aquempeavacaajeita arori. ¹²Noca-rajeitantacariri, tempa pimatacaaquena, irootaque nomatantarori noquempoyean-tacariri. Nojocacoventajeitaqueru: tecatsi ashinoncachane, apaniro irashinonca-yea Jorashi, iriotaque jatatsineri Sharincave-niqui. Aitaque omoncarataquea ocaman-tacotitarini sanquenatachaniri peerani. ¹³Meeca nompishitanajempi. Ainiroque-ratatsina quipatsiquica, nocamantajeitiri oca, inquimoshirejitasanotanteari, inquempetena narori noquimoshireti. ¹⁴Noametaqueru pineane, meeca iquisajei-tanaqueru tseencantatsiri. Iro iquisantaca-riri, te inquempeempariji. Iquempetana narori, te nonquempeempariji tseencanta-tsiri. ¹⁵Jeri itimajeiti noquempoyeaquem-piri quipatsiquica. Te noncantempiji: “Paanajeri”. Apatiroti nocantimpji: “Pojojacoventeri. Yantiricari camaari”. ¹⁶Te inquempeempariji tseencantatsiri. Iquempetana narori, te nonquempeempa-riji. ¹⁷Piotacaajeiteri queariotasannotatsiri, inquearioventantempirori maaroni picoacairiri. Ora pineane, irootaque queariotasannotatsiri. ¹⁸Pitiancaquena nojatashitantariri atiri noquenquetsata-caajeitiri. Aisati narori noquempetaque-ri, notiancaajeitaqueru irijatashitanteariri atiri inquenquetsatacaajeiteri. ¹⁹Noqueario-ventimpiri maaroni, iojeitantarori queariotatsiri, irosati inquearioventajei-tantempirori iriori.

Icantacoventajeitiri Jesoshi maaroni quemisantiriri.

²⁰Jero aisati icantiriri Jesoshi iriri:
—Nocantacoventajeitiri noamereca. Aisati noncantacoventajeiteri yora iquemisantacaajeitiri: yora quemisanta-

jeitanari, maaroni. ²¹Nocoaque inquempeavacaajeitanajea maaroni. Tempa aquempeavacaaca, Apa, arori. Aisati nocoaque inquempejeitajee iriori quemisantajeitanari, irosati inquemisantanteari atiri pitiancasanotaquena.

²²Pitasoncacoventaquena noquempetantaquempiri avirori, aisati notasoncacoventajeitaqueri iriori, inquempetavacaajeitantajeari. Irimoncarajeitajee arori, aquempeavacaaca. ²³Iquempetaquena narori. Noquempetaquempi avirori.

Irootaque inquempetavacaasanojeitanteari, irosati iriojeitanteari atiri pitiancaquena. Iriojeitanaque pinintaquena, aisati piquempejeitaqueri, pinintasanajeitaqueri maaroni. ²⁴Tequerani ontimeni quipatsi, tempa pinintitanani, irootaque pipeantaquenari pincatsari. Meeca, Apa, nocoaque intsipajeitena iriori irineantenari nompincatsaritananotaque. Tempa picantana: “Pinquempoyeajeitenari”, aitaque nomataquempiri. ²⁵Picameetsatananotaque, Apa. Te iriojeitempi tseencantatsiri, iro cantaincha notimpi nainti. Aisati iojeitaquempi yocapee pitiancaquenari, ²⁶niotacaajeitaqueri jaoca picantari avirori. Aitaque nampiitajeri niotacaasano-terer, pinintasanajeitanteariri, pinquempetacanteri narori pinintasanotana. Aisati inquempeajeitena.

Irootaque icantiriri Jesoshi Iriri.

Yaantanacariri Jesoshi.

(Mt. 26.36-56; Mr. 14.32-52; Ir. 22.39-53)

18 ¹Ari yovecarataquero Jesoshi iquenquetsatacairi iriri, irosati nojajeitantanaja: Jesoshi, aisati maaroni iroamerepee. Nomonteanajaro pirijavinteni pajitachari Seroni. Nojajeitanaji panquiveerentsiqui anta. ²Aitaque anta ijatacaapinijeitanari Jesoshi, irootaque iotantarori iriori Jorashi, yora aacanterineri. ³Yora jivatacaajeitiriri saserotepee, jeri variseopee itiancajeitavaque soraro,

jeri variria. Ijvajeitapaaqueri Jorashi. Yamajeitapaaque tsiomentotsi, sampi, yoantamento aisati; ^{4,5}ipocashijeitapaaqueri Jesoshi. Iotaque iriori Jesoshi jaoca incanteriri. Ijatanaque itonquiotavacari, icantavaqueri:

—¿Janica picoiri?

Yacanaqueri:

—Yora Jesoshi nasaretesati.

Icantavaqueri:

—Narotaque.

⁶Icantantavacari Jesoshi: “Narotaque”, irosati ipiantanaca itapiiqui.

Ipariajeitanaque quipatsiqui, tiriquicn.

⁷Yapiitajiri:

—¿Janica picaoantotiri?

Yacanajiri iriori:

—Yora Jesoshi nasaretisati.

⁸Icantajiri:

—Aitaque nocantajeivetaquempi:

“Narotaque Jesoshi”. Naroricampa picoiri, pishinejeiteri irijajeiteta yoca notsipajeitarica.

⁹Moncaratapaaca icantaqueriri Jesoshi

Iriri: “Yoca picantaquenari: ‘Pinquempoyenari’, tecatsi ashinoncachane”.

¹⁰Irosati Shimo Petero yaantanacaro isavirite.

Ipesaqueri inampire ivincatsarite

saserotepee: ipeshitaqueri iyempita

iracosanoriquiniri. Ipajita nampirentsi

Marico. ¹¹Irosati icantantanacari Jesoshi

Petero:

—Poimpiajero pisavirite poantaroriqui.

Irootaque inintacaquenari Apa

irayeetena. ¿Nontsaneapitsatearimpa?

Yayeetanaqueri Jesoshi Anashiqui.

(Mt. 26.57-58; Mr. 14.53-54; Ir. 22.54)

¹²Irosati yaajeitantanacari Jesoshi. Irio

aajeitanaqueriri soraropee, iyapitanote,

variria. Ari yoisojeitaqueri. ¹³Ijivatapainti

yaanaqueneri Anashi. Iriotaque

iriconquiri Caijashi. Ari iquenquetsata-

cairi Jesoshi. ²⁴Impoiji icanti yora

Anashi:

—Paanajeri anta Caijashiqui, irisampi-tavaquerita iriori paitapeerica.

Yora Caijashi, iriotaque meeca ivincatsarite saserotepee, ¹⁴cantaqueriri joriopee: “Ocameetsatimotimpi incameta shiramparinta aparoni, iravisacojeitanta-jeari ashaninceapee”.

Irisati manacotaincha Petero.

(Mt. 26.58-70; Mr. 14.66-68; Ir. 22.55-57)

¹⁵Shimo Petero iriotaque oijatacoventavetanacariri Jesoshi, itsipataripashini iroamere. Yora ivincatsarite saserote iotiri yora tsipatariri Shimo, irootaque ishinetantacariri iriori ipocaque ivancoqui, itsipatapaacari Jesoshi. ¹⁶Irinti Petero icatiapaaca ashitacorontsiqui araquerora. Isoquijanaji yora itsipatapaacari, icantapaaquero shentirori ashitacorontsi:

—Pishineteri inqueapee iriori.

Ocantiri:

—Ari.

Irosati iqueantapaacari Petero iriori.

¹⁷Ora nampirentsi ocantavaqueri:

—¿Caarimpimpa avirori iroamere

Jesoshi?

Icantiro:

—Caarina.

¹⁸Ocatsincaiteaque. Yoisajeitaquero paamari nampirentsipee, jeri soraropee. Yaquitsiantajeitaca paamariqui. Aisati iriori Petero itsipajeitapaacari yaquitsiantapaaca.

Yaanaajiri aisati Jesoshi Caijashiqui.

(Mt. 26.59-66; Mr. 14.55-64; Ir. 22.66-71)

¹⁹Yora ivincatsarite saserote isampitaveri Jesoshi:

—¿Janica poametapinitiri? ¿Paita poametapinijeitiriri?

²⁰Yacanaqueri Jesoshi:

—Iquemajeitaquena maaroni atiri noametantiri. Noametantapiniti anta yapatojeitantari. Aisati noametapinitanta-

que ivancoqui Tasorentsi. Tecatsi nomanapitsateri ashaninca. ²¹¿Paita pisampitantanari narori? Pisampijeiteri irinti quemajeitaquenari paitarica nocantaqueriri. Iojeitaquero iriori.

²²Irosati ipasavorotantanacari aparoni soraro catiainchari ara. Icantiri:

—¿Arimpa ampiatsateari ivincatsarite saserote?

²³Yacanaqueri:

—Terica oncameetsate nocantaqueriri, piotacayenaro. Irompa ocameetsatirica nocantaqueriri, ¿paita pipasavorotantanari?

Yapiitaja Petero imanacotaja irisati.

(Mt. 26.71-75; Mr. 14.69-72; Ir. 22.58-62)

²⁵Ainiroquera Shimo Petero yaquitsiantata. Irosati icantanteetacariri:

—Tempa aviro iroamere Jesoshi.

Irisati manacotanaincha, icantanaque:

—Caarina.

²⁶Itsipajeitari aparo inampire Caijashi.

Iriotaque ishaninca yora ipesaquempitavetacari Petero. Icantaqueri:

—Tempa noniimpi panquirentsiqui, pitsipatariri Jesoshi.

²⁷Yapiitajiro Petero imanacotaja.

Irosati ineantanaca teapa.

Yaanaajiri Jesoshi Piratoqui.

(Mt. 27.11-14; Mr. 15.1-5; Ir. 23.1-5)

²⁸Capichaji quitaiteri yojocajeitanaquero ivanco Caijashi. Yayeetanaqueri Jesoshi ivancoqui Pirato, yora pincatsaritatsiri. Caari ini jorio, irootaque caari icoajeitanta joriopee inqueajeitapee ivancoqui. Icantiri:

—Irotaintsi avajeitamentearo Yavisantaniri. Ariorica ajate ivancoqui Pirato, eiro amatirotsi avajeitea, eiro inecameetsajeiteetsi Tasorentsi.

²⁹Irosati isoquijashijeitantanacariri Pirato. Icantajeitavaqueri:

—¿Paitampa yantaqueri yoca shiramparica pamantaquenariri?

³⁰Yacanaqueri iriori:

—Ainiro yantayetiri. Eirome yantirome caari cameetsatatsi, eiro namimpirime.

³¹Irosati icantantavetacari Pirato:

—Paajeitanajeri avinti. Tempa otimi sanquenarentsi oametimpiri poasanquejeitantariri. Pimamateriquetite avinti poasanquetayeri.

Icantanaqueri iriori:

—Te irishineyeetenariji noyeri.

³²Irootaque icantaqueri omoncaratantacari icantitacari Jesoshi. Tempa icantitani: “Impajacoyeetena”. ³³Irosati ipiantanaja Pirato ivancoqui. Icajemacantajiri Jesoshi aisati. Icantiri:

—¿Avirompa ivincatsarite joriopee?

³⁴Yacanaqueri Jesoshi:

—¿Piovetaquenampa? ¿Paita pisampitantanari? ¿Timatsimpa pashini camantaquempiri?

³⁵Yacanaqueri Pirato:

—¿Narompa meeca jorio? Iriotaque pishaninca amajeitaquempiri aca, jeri jivatacaajeitiriri saserotepee iriori. ¿Paita pantaqueri iquisajeitantaquempiri?

³⁶Yacanaqueri Jesoshi:

—Te nompincatsariventante aca quipatsiqui. Nompincatsariventanteme aca, aitaque inquisacoventajeitaquename nonampire. Eirome ishinetirime joriopee iramename. Iro cantaincha te aca nompincatsariventante.

³⁷Irosati icantantacari:

—¿Ariompa? ¿Avirotaquempa pincatsari?

—Je, narotaque Pincatsari. Queario picantaquena. Nocamantajeitiri atiripee queariotasanotatsiri. Irootaque notimantacari, irootaque nopocantacari quipatsiquica. Maaroni yora iotavaquerori queariotasanotatsiri, iriojeitaque quemisantanari.

³⁸Icantiri iriori Pirato:

—¿Paita ojita oca picantiri: “Queariotasanotatsiri”?

Irosati isoquijashitantanajari joriopee, icantajeitiri:

—Nosampivetaquempi incaranqui, te pincamantenaji paita yantasanotaqueri noamaanteariri.

Iroimpacajerime Pirato Jesoshi.

(Mt. 27.15-31; Mr. 15.6-20; Jr. 23.13-25)

³⁹Pashini icanti aisati:

—Ariorica omoncaratapaaja Yavisantaniri, noimisoquijapinitimpiri aparo yoiminqheetiri. Tempa aitaque ocantari amejeitari. ¿Picoimpa noimpacajempiri pivincatsariteca?

⁴⁰Irosati icajemantajeitanaca maaroni:

—Eiro poipacananritsi yora. Irio poimisoquijajenari Varavashi irinti.

Yora Varavashi coshinti ini.

19 ¹Irosati yaacantantacari Pirato Jesoshi, ipasatacantaqueri. ²Yora soraro itapoyetaqueneri iramatseere quemariiti. Yamatseetacaacari. Iquitsaataqueri quitioncari. ³Ipcashitapinijeitaqueri, icantamempeashijeitacari:

—¿Avirompa pincatsariventiriri jorio? Iji, iji, iji.

⁴Ipasavorotantapaacari iraco. Isoquijashitanajiri Pirato joriopee aisati.

Icantajeitiri:

—Jeri yoca, namajimpiri aisati. Nosampivetaquempi, iro cantaincha tecatsi pincamantajeitena niotanteari paita piquisantacari.

⁵Isoquijanaji Jesoshi iriori. Yamatseetacaro quemariiti, iquitsaataca quitioncari. Icantajeitiri Pirato:

—Jerica.

⁶Yamenajeitavaqueri jivatacaajeitiriri saserotepee, soraro aisati. Icajemajeitanaji: —Pimpajacotacanteri, pimpajacotacanteri.

Icantiri Pirato:

—Paajeitanaqueri avinti, pimpajacojeiteri. Nosampitacovetacari, tecatsi nonquemacoteri irante.

⁷Yacanajiri jorio:

—Timatsi sanquenarentsi oametanari ocameetsati incame jitasorentsitachari. Tempa icanti iriori: “Narotaque Itomi Tasorentsi”, irootaque ocameetsatantacari incame.

Yapiitajiri Jesoshi, isampitajiri aisati.

⁸Iquemantavacariri Pirato icantajeitaqueriri, aiqero ijatatii itsaroasanotanaque. ⁹Ipianaja, iqueanaji ivancoqui.

Icantapaajiri Jesoshi:

—¿Jaoca piponeari avirori?

¹⁰Te iranqueji Jesoshi iriori. Irosati icantantanacari Pirato:

—¿Paita caari pacantana? Naro pincatsari. Noncoaquerica, ari nomatero noimpacacoventajempi. Aisati oquempeta, noncoaquerica, nomatero nompajacotacantempi. Tempa piotaquero.

¹¹Yacanaqueri Jesoshi:

—Eirome ishinetimpime Tasorentsi, tecatsi pincantename. Yora amacantaquenari aca, irio antasantaquerori caari cameetsatatsi irinti.

¹²Irosati icoantavetanaja Pirato iroimpacaajerime. Iro cantaincha icajemajeitanaji joriopee aisati:

—Ariorica poimpacaajeri yora, te pishanicateariji Shisari. Jeri yora cantashitachari: “Narotaque pincatsari”. Tempa iriotaque quisaqueriri pivincatsarite.

Ipajacotacantaqueri Jesoshi.

¹³Iquemantacari Pirato icantajeitaqueriri, isoquijacaanajiri Jesoshi. Isavicapaaque anta icantacoventantapinitinta. Anta yovetsiqueetironta mapi, ipampaiteyeetironta. Icanteetiro evereo “Cavata”.

¹⁴Itampaticati meeca catsirincaiteri, irotaintsi quitaiteri iquenqueshiretantarori Yavisantaniri. Irosati icantajeitancacari Pirato:

—Jeri yoca pivincatsarite.

¹⁵Icajemajeitanaque iriori:

—Payeri. Paanaqueri anta. Pimpajacotacanteri.

Isampitiri:

—¿Nompajacotacanterimpa pivincatsarite?

Yacanaqueri jivatacaajeitiriri saserotepee:

—Te nompincatsateriji, apaniro irinti Shisari.

¹⁶Irosati ipajacotacantancari.

Ipajacotaqueri Jesoshi anta Coricotaqui.

(Mt. 27.24-50; Mr. 15.21-41; Ir. 23.25-49)

¹⁷Irio soraro aajeitanaqueriri. Irisati aanajiro Jesoshi coroshi. Yojocanajiro nampitsi, yareetapaaca toncaariqui pajitachari litontsini. Evereo ipajitiro: “Coricota”. ¹⁸Aitaque ipajacoyeetaqueriri coroshiqui. Itsipatacari apite shirampari. Ipajacoyeetaqueri iriori coroshiqui pashini. Yoyeetaqueri Jesoshi nianqui. Aparo yoyeetaque iracosanoriqui Jesoshi, irio itsipa irampatequi. ¹⁹Pirato isanquenatacantaque cantatsiri: “Jesoshi nasaretasati, iriotaque ivincatsarite jorio”. Ipatacotaacantaquero coroshiqui. ²⁰Oquempejitaro nampitsi aitaque ipajacotaqueriri Jesoshi. Oshequi jorio neanataquerori isanquenatiri. Osanquenavetaca irineanequi jorio, oromasati, aisati irineanequi quireshiasati. ²¹Yora jivatacaajeitiriri saserotepee icantiri Pirato:

—Eiro pisanquenatirotsi: “Iriotaque ivincatsarite jorio”, irointi pisanquenate: “Irio cantashitachari: ‘Naro ivincatsarite jorio’”.

²²Yacanaqueri Pirato:

—Aitanaque, nomataquero: nosanquenatacantaquero.

²³Ari ipajacotaqueri soraro. Yovojeaquero iitsaareni, otsipasatitapaaque, irosati ipavacaantacaro. Te orimpiteajiri

iroicoroni, intani itijeetiro maaroni.

²⁴Irootaque icantavacaantajeitacari:

—Eiro atsereirotsi. Tsame antanatiteri, ayotanteari janica ashitajearone.

Aitaque icantari soraro. Imoncarataquero Sanquenarentsi cantatsiri:

“Impavacayearo noitsaareni. Irantanatita-jeitaquenaro noicoroni”. ²⁵Ora iriniro

Jesoshi ocatiapaaca quempeji ipajacotaca. Ainiro otimi ireento, aisati opajita iroori Maria. Irootaque ijina Quereojashi. Otimi ara aisati Maria maquitarasato.

²⁶Ineajiro Jesoshi iriniro, aisati ineaquena narori. Narotaque iroamere inintasanotiri. Icantanaquero:

—Ina, jeri yora, pintomintajeari.

²⁷Icantanaquena:

—Jero ora, pinirontajearo.

Irosati naantanajaro novancoqui.

²⁸Iotanaque Jesoshi aitaque moncarajeitaca maaroni. Irosati icantantanaca:

—Nomireni.

Iro icantantari imoncarataquero ocantiri Sanquenarentsi. ²⁹Otimi ara choncorina, ojaaca quepishijari. Yoviinqueetaquero atsimiicajitirori. Yoaqueneri sataamentotsiqui. Ijicotacotaqueneri ivantequi Jesoshi. ³⁰Yatsimiicavaquero, irosati icantantanaca:

—Aitaque meeca, nomoncarataquero icocaanari Apa.

Irosati yoivotantanaca, icamanaque, toren.

Isataaqueri Jesoshi.

³¹Meeca yovetsiquimentajeitiro jorio Yavisantaniri. Onquitaitetamanaque, iro saavaro irimaoreantasanojeiteari. Te incoajeiteji jorio yora pajacojeitachari iroavisayero saavaro coroshiqui, irootaque icantajeitancarirori Pirato:

—Pincarajacantajeiteri ivoripee, irosati pimpajacoreacantantajeariri.

³²Irosati ijatashijeitantanajari soraro, icarajavoritaqueri yora itsipatacari

Jesoshi. Aisati icarajitaqueri iriori pashini. ³³Yovaashivetapaacari iriori Jesoshi, incarajiterime iriori; iro cantaincha ineapaaqueri camaque irinti, irootaque caari icarajitantari irinti ivori.

³⁴Iro cantaincha aparo soraro isataapaaqueri imerequiqui. Ocontejatapaaque iriraja, tsiquiririri. Nija aisati. ³⁵Naro neacotaqueriri, meeca narotaque camantacotaqueriri. Nioti queario oni nocamantimpiri, pinquemisantantajeari avirori. ³⁶Aitaque icanteetaqueriri, irootaque omoncaratantacari Sanquenarentsi cantatsiniri: “Eiro icarajiteetiritisi itonqui aparoni”. ³⁷Timatsi pashini isanquenayeetini: “Aitaque irameneeteri Quirishito, yora irisatayeeteri”.

Yoiminqueetaqueri Jesoshini omoroqui.
(Mt. 27.57-61; Mr. 15.42-47; Ir. 23.50-56)

³⁸Itimi anta Jose arimateasati. Iroamere Jesoshi inaveta, iro cantaincha imanaquero. Iro imanantacarori, itsaroacaacari invincatsaritepee jorio. Ijatashitaqueri meeca Pirato, icantapairi:

—Pishinetajenari Jesoshini, naanajerita.

Icantiri:

—Paanajeri.

Irosati ijatantanaca, yaanajiri.

³⁹Ijatanaque iriori Nicoremo. Iriotaque jatashitiriniri peerani Jesoshi tsiteniriqui. Yaacotanaqueneri intiritanteariri.

Iconoaquero oyashi inchato pajitachari mira, ovane inchato pajitachari aroeshi.

Aamaaca otenati 45 quiro. ⁴⁰Yaajeitanacueneri Jesoshini. Iro tocoyatsa yapinai-cacotantacariri, itsipataquero casancajari.

Irootaque yametari joriopee, ariorica yovetsiquiri camatsiri. ⁴¹Otiminta panquirentsi quempeji ipajacojeitaque-

rinta. Anta panquirentsiqui otiminta iroanteariri camatsiri, iroaquera imoqueetiro. ⁴²Irotaintsi inquee catsirin-

caiteri, omoncaratanteari Yavisantaniri.

Ineaquero Jose oquempajitaque omoro, irootaque yoantacariri Jesoshini anta.

Ocoavetari Maria Jesoshini.

(Mt. 28.1-10; Mr. 16.1-8; Ir. 24.1-11)

20¹Otomincotapaaque. Tsiteniquera ojatamanaque Maria maquitarsato anta omoroqui yoavetacarinta Jesoshini. Oneapaatiro jocanaja mapi yashitacotantevetacariri. ²Narotaque iroamereni inintasanotiniri Jesoshi. Notsipatari anta Shimo Petero. Jero oshiashitapaaquena Maria. Ocantapaaquena:

—Yayeetajiri Avincatsariteni. Te anaejeriji yoavetacarinta. Te nioteji jaocarica yoyeetajiriri.

Yamenajeivetajari Petero, jeri Joa.

(Ir. 24.12)

³Irosati nojatantanaca apite. Nojatanaque yoavetacarinta. ⁴Noshianaca apite, nanaacotaqueri nainti Petero. Naro anaacotaqueriri nareetapaaca anta yoavetacarinta. ⁵Noivotapaaca, namenapaaque tsompoina. Noneajiro tocoyatsa ovaja omoroqui, iro cantaincha te nonqueapeeji. ⁶Impoitapaaji iriori Shimo Petero. Irinti queapaintsi tsompoina. Irosati inepaaque iriori tocoyatsa. ⁷Ora panio ipashicantevetacariri iitoqui, te ontsipatearoji tocoyatsa. Apitivitaja, ovashitaja iroori. ⁸Ari noqueanaque narori, noneapaaquero, irosati niotantanaca tinaanaja Jesoshi. ⁹Tequerata nonquenqueshiretajeroji Sanquenarentsi cantatsiri: “Incamavetaquearica Quirishito, aitaque intinaanaje”. ¹⁰Irosati nopiantanaja novancoqui.

Oneaqueri Maria Jesoshi.

(Mr. 16.9-11; Ir. 24.10)

¹¹Irointi Maria catianaincha saiteriqui, iraacotaqueri. Oivotanaca, amenanaque tsompoina. ¹²Oneaqueri apite inampire

Tasorentsi, iquitsaataro quitamarori. Isavicaque yoavetacarinta Jesoshini. Isavicaque aparoni iitoyeevetacariri Jesoshini, irio itsipa iitiqui.

¹³Icantiro:

—Tsinane, ¿paita piraantari?

Ocantajiri iroori:

—Yayeetanajiri novincatsariteni. Te nioteji jaocarica yoyeetajiriri.

¹⁴Irosati opitsocantanaja. Oneaqueri Jesoshi icatiapaaca, iro cantaincha te iotavaqueriji. ¹⁵Icantiro:

—Tsinane, ¿paita piraantari? ¿Janica picoiro?

Ojitaquaqueri irio tsameetacoyetirori panquirentsipee. Ocantiri:

—¿Avirompa aanajiriri novincatsariteni? Pincamantajenate jaocarica poajiriri. Aitaque naajanteri narori.

¹⁶Icantanajiro iriori:

—Maria.

Opitsocanaca iroori, ocantanaqueri:

—Oametanari.

¹⁷Irosati avitsanotantacariri. Icantanajiro:

—Poimpacajena: tequeratsita novajenocua Apaqui. Meeca nocoaque pijatashi-jeiteri quemisantajeitanari, pincamantajeitapaajeri meeca novajenocajea Apaqui. Tempa iriotaque Tasorentsi. Tempa irisati Piri avirori, piotiri Tasorentsi ini, irootaque pipincatsatantacariri avirori.

¹⁸Irosati opocashitantajanari narori, aisati itsipapee iroamerepee, ocamantajeitapaajana:

—Noneajiriyea Avincatsarite.

Ocamantapaaquena icamantayetaquerori Jesoshi.

Intapaajari Jesoshi, inijaapaajari iroamereni.

(Mt. 28.16-20; Mr. 16.14-18; Ir. 24.36-49)

¹⁹Ishaavijiiteanaji meeca, napatojeitaja, nocarajeitajiri itsipapee iroamere. Notsaroacaajeitanacari jivatacaajeitiriri

noshanincapee, yora oacantaqueriri Jesoshi, irootaque noyavitantacarori ashitacorontsi. Imapocashijeitapaajana Jesoshi, icatiapaaja nianqui. Icantajeitapaajana:

—Piveshireajeitanajea.

²⁰Irosati injantajeitapaquenaro iraco, aisati imerequi. Noneajeitavajiri Novincatsarite, irosati noquimoshirejeitantanaja.

²¹Yapiitajana:

—Piveshireajeitanajea. Tempa irio tiancaquenari Apa peerani, aisati meeca nonquempetacayempi avirori, nontianquempi.

²²Irosati itasoncantajeitanaquena, joo. Icant:

—Meeca ompocashijeitempi Ishire Tasorentsi, quiso oajeitanaquempi.

²³Ariorica pineaqueri ashaninca iquemisantasanaquena, irosati pincantanteariri: “Incavintsayempi Tasorentsi avirori, eiro iquishimentimpirotsi pantayetiri”. Irootaque pincanteriri: tempa aitaque incavintaasaanoteri Apa yora pincanteri. Pincanteririca itsipapee: “Te pinquemisanteji, irootaque inquishimentantempirori Tasorentsi pantayetiri”, aitaque inquishimentaqueri.

²⁴Ipocashijeitantaquenari, te aneriji irinti Tomashi, yora ipajiyetiri Tsipari; aparoni peaincha. ²⁵Ari ipocapaaji iriori, nocamantavajiri:

—Noneajeitajiriyea Avincatsarite.

Icantanaque:

—Nocoi noneero iraco, ora oqueaqueri quiravo, noninti noimunqueero nacotsapaqui. Aisati noninti noimunqueero naco imerequiqui. Eirorica noimunqueirotsi, eiro noquemisantitsi.

Yapiitajiri inajeitajiri Jesoshi iroamere.

²⁶Avisanaque 8 quitaiteri, ari napatojeitana aisati pancotsiqui, itsipajeitajana iriori Tomashi. Oshequi catsini notsarocajeitacari quisajeitanari, irootaque

noyavitantacarori ashitacorontsi.

Imapocapaajana aisati Jesoshi, icatiashi-tapaajana nianqui. Icantajeitapaajana:

—Piveshireajeitanajea.

²⁷Irosati icantantanacari Tomashi:

—Pamenero naco. Pancote, poimunqueero pacotsapaqui aca. Pancote aisati, poimunqueero paco nomerequiquica. Eiro pitseencajanatsi aisati, pinquemisante irointi.

²⁸Irosati yacantanacari Tomashi:

—Avirotasanaotaque novincatsarite, avirotasanaotaque notasorentsite.

²⁹Icantanaqueri Jesoshi:

—Meeca pineajana, irootaque piquemisantantajanari. Timatsi caari neenane, iro cantaincha inquemisantejeitena; inquimoshiretasanojeitanaque irinti.

³⁰Oshequi catsini itasoncantayetaque Jesoshi. Narojeitaque iroamere, noneajeitaqueri, iro cantaincha te nosanquenajeiteroji maaroni aca. ³¹Nosanquenajeitaquero oca pinquemisantantajeitariri Jesoshi iriotaque Quirishito, yora Itomi Tasorentsi. Ariorica pinquemisantajeitaqueri, aitaque iraneacaajeitajempi anta inquitequi, pincantaitiyempani.

Mavatanaque inijaajari Jesoshi iroamerepee.

21 ¹Irosati inijaantajeitajana aisati Jesoshi, aisati itsipapee iroamerepee. Noneajeitajiri otsapijaqui incajare Tiveriashi. Aitaque ocantari. ²Napatojeitaca, nocarajeitiri Shimo Petero, jeri iriori Tomashi: icanteetiri aisati Tsipari. Jeri Natanaeri poneachari Canaqui, onta carireaquiniri. Narojeitaque itomipee Severeo. Jeri aisati apite pashini iroamere Jesoshi. Napatojeitaca maaroni. ³Icantajeitana Shimo Petero:

—Nojate nonquitsate.

Nocantajeitanaqueri:

—Narosati, noijajeitanaquempi.

Ari nojajeitanaque. Notejeitapaaca pitotsiqui. Noquitsajeivetaca, irosati

noquitaitetacotantacari. Tecatsi naye.

⁴Oquitaitetamanaji, irosati icatiantapaaja Jesoshi otsapijaqui. Te nojeitavajeriji.

⁵Icantajeitana:

—Ayompari. ¿Chorampa shima?

Nacajeitanaqueri:

—Te aneeriji.

⁶Icantajeitana:

—Pinquitsataje aisati pacosanoriqui, aitaque paye.

Ari noquitsajeitanaji. Naajeitaque oshequi catsini shima, te naaveacoteriji nontetacoteri pitotsiqui. ⁷Naro iroamere inintasanotiri Jesoshi. Nocantiri Petero:

—Ja, iriotaqueyeatsi Avincatsarite.

Ari isapocaquero Shimo iitsaare incaranqui, irointi itorosate. Iquemantaquenari, irosati iquitsaatantanjaro iitsaare. Ishiticatsaquitanaja. Ipiincotanaquero iitsaare, pocn; yamaatashitanajiri, yaatapaaji. ⁸Nimpoitacojeitapaaji narori, nonoshicacojeitiri shima. Quempejitapaaji otsapija, aamaaca ocaratí 100 metero. ⁹Nonitajeitanaque quipatsiqui. Noneapaaque oparasheti paamari, itashitiri shima. Otimi aisati tanta. ¹⁰Icantajeitavaquena Jesoshi:

—Pamaquenari meeca shima piquitsataqueri.

¹¹Itetapaaja aisati Shimo Petero, inoshicacotajiri shima quipatsiqui. Jaasanotaca antearipee shima, icarati 153. Yoshequiasanovetaca catsini, iro cantaincha te ompesanaqueji noquitsatantari. ¹²Icantajeitana Jesoshi:

—Pimpocajeite meeca poajeitapeempa.

Notsarocaacari noncanterime: “¿Janicampimpa?” Maaroni nojeitakeri Avincatsarite ini. ¹³Irosati iquempejijeitantaquenari Jesoshi. Yaaquero tanta, ipajeitauena. Aisati shima, ipajeitauena maaroni. ¹⁴Icamavetaca Jesoshi chapinqui, itinaanaja. Mavatanaque meeca injaajana.

Icantiri Petero.

¹⁵Noajeitaca. Irosati isampitantajari Jesoshi:

—Shimo, itomi Jonashi, ¿panaacojeitaquerimpa yocapee, pinintasanotana avinti?

Yacanaqueri iriori:

—Aviro, Novincatsarite, iotatsiri nonintimpi.

Icanti:

—Pimperí novishajaniquite iroyea.

¹⁶Yapiitajiri aisati isampitajiri:

—¿Pinintanampa?

Yacanajiri aisati:

—Je, Novincatsarite. Aviro iotatsiri nonintimpi.

Icantiri:

—Pinquempeyeajeitenari novishate.

¹⁷Mavatanaque isampitiri:

—¿Pinintasanotanampa?

Irosati iquenqueshireantanaca Petero.

Iro iquenqueshireantanacari, mavatanaque isampitakeri: “¿Pinintanampa?”

Yacanajiri aisati:

—Avirotaque, Novincatsarite, iotirori maaroni. Piotana avinti nonintasanotimpirica.

Icantiri:

¹⁸—Pimperí novishate iroyea. Queario-taque oca noncamantempiri: peerani, ainiroquera pevancariveitani, piquitsaata-piniveitaroni piitsaare. Pijatapiniyetini jaocarica pinintiri: tecatsi tsaneempineri. Iro cantaincha ariorica panteashiparitasanotapaaque, pancotsaye pacoqui, iroisoyeetempi, inquitsaatajempi itsipapee. Iraanaquempi tenta pincoave-tea pijate.

¹⁹Aitaque incantaqueriri. Yoametaqueri jaoca incanteari incamanteari Petero iriori. Ariorica irineeteri incamaque, irioyeetanaque ipincasaritanoti Tasorensi. Irosati icantantanajari:

—Tsame, poijatanaquena.

Inintane Jesoshi.

²⁰Ipsitocanaca Petero. Ineaquena noijatanaqueri, tempa naro iroamere

Jesoshi inintasanotiri. Chapinqui noacajeitantariri Jesoshi, naro sampitaqueriri: “Novincatsarite, ¿janicampa aacantempineri?” ²¹Ineantaquenari Petero, ijicotana, aisati isampitiri Jesoshi: —Novincatsarite, ¿jaoca incanteeteriri coajica yora?

²²Icantanaqueri:
—Noninterica intimavaqueta aca irosati nompiantajeari, eiro piquenqueshiretirotsi. Poijatenata nainti.

²³Yovaajeitaquero maaroni quemisantsiri icantiriri Jesoshi. Ijjeivetaca eiro

nocamitsi. Iro cantaincha te incanteriji Jesoshi: “Eiro icamitsi Joa”. Irointiquea icantavetari: “Noninterica intimavaqueta aca irosati nompiantajeari, eiro piquenqueshiretirotsi”.

²⁴Narosanotaque iroamereni Jesoshi, sanquenatirori oca. Ayojeitaque quearitanasotaque oca nosanquenataqueri.

²⁵Timatsi oshequi pashini yantayetaqueri Jesoshi. Ariorica nontsoteaquerome nosanquenatacotaquerome maaroni, eiro onarome quipatsiquica sanquenarentsi.

Joa

YANTAYETINIRI ITIANCANENI JESOSHI

Icamantiri Irocashi jaoca ocantari inquenquetsatacayeriri.

1 ¹¿Ainirompi Tiojiro? ¿Tecatsimpa oyempine? Peerani nintantacarori nosanquenatantaquemipironiri, noquenquetsatacaimpironi maaroni yantayetiniri Jesoshi. Aisati noquenquetsatacaimpironi maaroni yoametantayetiniri. ^{2,3}Ari oshequi inecatsitacaro, icamaque, itinaanaja aisati, irosati yonijaantapaajariri iroamerepeeni. Oshequi inecotapini-jeitajiri yantayetapaajiri, irootaque iotasantantajariri itinaanaja. Ocarati 40 quitaiteiri yonijaapinitantajariri. Iquenquetsatacotaquero jaoca icantari Tasorentsi ipincatsariventanti. Itiancajeitaqueri iroamerepee, iriotaque yora icoyeajeitaqueri. Iro cantiriri Ishire Tasorentsi. Impoiji yoancajiri Tasorentsi inquitequi, irosati narori novecaratantacarori noyenquetsare peerani. Meeca novaajempiro: noncamantajeitempiro yantayetiri iriori iroamereni Jesoshi, yora itiancanaqueri peerani.

Yoverantasanotanacarori Jesoshi irineane.

⁴Ari yoacaajeitajiri Jesoshi. Icantasana-
notaqueri:

—Eirota pojoquitarotsi Jerosare; nocoaque poyeavaquerota icashiaca-quempiri Apa: ora piquemitaquenari peerani nocamantitaquempiri. ⁵Yora Joani ivaotisaajeitaquempi nijaqui iojeitantacari atiri piquemisantajeitirini.

Iro cantaincha eiro osamanititsi ompocashijeitempi Ishire Tasorentsi, quiso oajeitempi iriojeitanteari atiri queario piquemisantaquena narori.

⁶Yora apatotimentacariri, isampijeitiri:

—Novincatsarite. Arojeitaque ishanincani yora intacaroniri Ishiraeri. Peerani itimaveitani pincatsariventaveitariniri ashanincani; meecampa, tecatsi. ¿Ariompa meeca pincanteri pashini impincatsariventajeitajena? Oshequi nocoajeitaque.

Yacanaqueri:

⁷—Te incoacayempiji Apa piojeitero jaoca oncarate. Osamanitatsirica, irompa jaocarica oncarate. Irintiquea Apa apaniro cantatsine. ⁸Coajica intasoncaventajeitempi, aisati ompocashijeitempi Ishire. Nocoaque pinquenquetsatacojeitena anta Jerosarequi, pintsoteaquero Jorea. Pinquenquetsajeite anta Samaria-
qui, aisati pintsoteanaquero anta pashini-
peequi quipatsi.

Yoajenocantanajari Jesoshi.

⁹Irootaque icantanaqueriri Jesoshi. Ari yamenajeitavajiri, irosati yoajenocantana jenoqui, ipeanaja mencoriqui. ¹⁰Ari yamenajeitavajiri sorerere, ijatanaji. Ari imapocapaaqueri apite shirampari, icatiimojeitapaacari. Quitamarori iitsaare. ¹¹Icantapaaqueri:

—¿Ainirompi, carireasati? ¿Paita pamenantarori inquite? Pineavajiri yora Jesoshi yoajenocanaja inquitequi.

Iriotaque piajantsineri coajica aisati. Ariorica impiaje aisati, inquempetapaajea meeca ijatantanajari.

¹²Ari ipiajeitanaja Jerosarequi iroame-reni Jesoshi. Iponeanaja toncaariqui opajitanta Orivomashi. Oquempajitaro Jerosare, te arejiteji. ¹³Ari yareejeita-paaja, yataijeitapaaji oshitamencotanta jenoqui. Anta imaapinijeitinta yora Petero, jeri Joa, Santiaco, Antirishi, Jeripi, Tomashi, Varitorome, Mateyo, Santiaco itomi Arijeo, Shimo yora Shintsitatsiri. Aisati imaapinitinta Jorashi, yora itomi Santiaco, maaroni. ¹⁴Ari yapatojeitaja aisati iquenquetsata-caajeitiri Tasorentsi. Itsipajeitari irirentipeeni Jesoshi, jero Maria irinironi, jero otsipapee tsinane. Aitaque icantani iquenquetsatacaapinijeitiri Tasorentsi.

**Icoyeanacariri Matiashi
poyeetajariri Jorashi.**

¹⁵Ari pashini quitaiteri yora Petero icatimojeitanacari iyemisantaririntepee. Aamaaca icarajeiti 120. Icantani:

¹⁶—Noyemisantaririnte, moncarataca ocantineri Sanquenarentsi. Peerani oametirini Ishire Tasorentsi Iravirini iquenquetsatacotantarineri Jorashini: yora jivajeitaquereri aajeitaquereri Jesoshi. ¹⁷Aitaque acarajeiveitarini. Peerani itsipajeiveiteeni intacojeitanti, iro cantaincha ¹⁸impoiiji yaacantanirota-queri Avincatsarite, ipinatashiyeevetacari quirequi. Yaavetacari, impoiiji yoipiaji-niri, iriotaque quirequi yamanantanteeta-jarori quipatsi. Impoiiji irisati shiticajan-cha, shiti; itsatanaca. Impoiiji ipesacota-naque, peti; iquenaitaque tirin; ipitianca-paaca; irosati itsirajantapaaca imotijaqui, tsira, osoquijanaque iramporetsa.

¹⁹Iojeitaqueri maaroni jerosaresati. Irootaque ipajitanteetarori quipatsi yamananteetiri Asererama. Acantiri aneanequi arori: “Ivinaroni Jesoshi

yoanteevetacariniri”. ²⁰Aitaque isanque-nayeeitroni peerani pampoyeantsi cantatsiri: “Oncaarapancoitetanaque ivanconi aacanterineri Avincatsarite, eiro itimajitsi timantitajearine”. Aisati ocantini pampoyeantsi: “Ocameetsati intimaje poyeetajearineri quenquetsata-cantajantsineri”. ^{21,22}Tsame meeca ancanteri itsipa: “Pimpoyeetajeari Jorashini”: tempa irootaque icoaca-queeri Tasorentsi. Iriotaque ancanteri tsipatitapinijeiteeniri peerani: neasanoti-riri Joani ivaotisantantini, aisati neapinitiriri Jesoshi. Acoaque neaqueriri itinaanaja aisati ijatanaji jenoqui: ancanteri incarajeitee anquenquetsataco-jeiteri Jesoshi. ¿Janicampa meeca ancanteri?

²³Ari icanti itsipa:

—Iriorica yoca Jose Varasavashi, ipajiyeetiri aisati Joshito. Terica, iriorica yoca Matiashica.

Ari icajemiri apite:

—Caate aca nianqui.

²⁴Impoiiji iquenquetsatacairi Tasorentsi, icantiri:

—Novincatsarite, aviro avinti iotirori jaoca icantajeitari maaroni atiri. Jeri yoca apite. Piotacayenari janicarica picoasanotaqueri avinti ²⁵poyeetajearine Jorashini. Tecatsi incantea meeca iriori inquenquetsataje aisati irintacotantajea: tempa camaque ini, janirotaque anta Sharincaveniqui.

²⁶Impoiiji ipishoncajeitiro mapijaniqui iriotanteari janicarica icoacaqueri Tasorentsi, irio icyeaque Matiashi. Ari icaraveita itiancane Jesoshi 11. Meeca icarajeitajiri aisati Matiashi.

Quitaiteri ipajiyeetiri: “Pentecoshiteshi”.

2 ¹Ari omoncaratapaaja meeca quitaiteri ipajiyeetiri: “Pentecoshiteshi”. Ari yapatojeitaca Jerosarequi quemisantajeita-tsiri. ²Omapocashitapaacari, iquemavaquero

shiavetarori tampea antearo, oneapaaque, sooo. Oponeanaca jenoqui, otsoteapaaquero pancotsi isavicajeitantari. ³Aisati oconijati-motashitapaacari shiavetacarori paamari, ovaraapaaca; opomencajeitapaqueri iitopeequi maaroni savicajeitaintsiri, pomein. ⁴Otimantashirejitapaacari Ishire Tasorentsi. Irosati ineanatantanacaro otsipapee neantsipee, imajeitaquero ora oneaveetacaqueriri Ishire Tasorentsi. ⁵Ari isaviqui anta Jerosarequi joriopee, quemisantasantotsiri, iponeayetaca pashinipeequi quipatsi, jaocaricapee. ⁶Iquemantajeitavacariri ineanajeitanaque, irosati yapatojeitancata oshequi atiri. Iquemajeitapaquero irineanesanori. Te iriotacotaapeeriji. ⁷Yoajeitapaaque cavaco, iquenqeshireajeitapaaca, isampitavacaajeitapaaca:

—Tempa carireasati inajeiveta yoca neaveetaintsirica. ⁸¿Jaoca icantacari iquemantajeitarori maaroni aneaneppee? ⁹Meeca acarajeitaqueri paratosati, merosati, eramitasati. Jeri savicatsiri Mesopotamiaqui, Joreaquei, Caparoshiaqui, Pontoqui, Ashiaqui, ¹⁰Jirijiaqui, Pampiriaqui, Ejipitoqui. Aisati acarajeitaqueri poneayetainchari otsapitapaaca Irviaqui anta oquempejitapai Shirene. Jeri aisati acarajeitaqueri quivantatsiri poneayetachari Oromaqui. ¹¹Acarajeitaqueri joriosanotatsiri aisati peajanchari jorio. Acarajeitiri queretasati aisati aravesati. Iro cantaincha aquemajeitaqueri ineanajeitantaro aneanesanoripee. Iquenquetsacotiri Tasorentsi, jaoca icanta itasoncantayeti.

¹²Ari yoajeitanaque atiripee cavaco, te iriotacoteriji. Isampitavacaajeitanaca:

—¿Paitaquea iquemantarori aneane?

¹³Irinti pashini, ishironimentajeitancari, icanti:

—Ishinqueitaca yonta, iji, iji, iji.

¹⁴Ari ainiro anta iriori Petero, icarajeitiri itsipapee itiancane Jesoshi. Quimojenca icamantaqueri:

—Nojorioririnte: maaroni aviro savicajeitatsiri aca Jerosarequi, piojeitavacuero oca noncamantempiri, pinquemisantajeitavaquena. ¹⁵Pijitashijeivetacari ishinqueitaca yocapee. Ja, te irishinqueiteaji. Tempa ashinquitapinijeita tsiteniriqui, iro cantaincha oquitaitetamani meeca, tequera irijenoquitapeeriji catsirincaiteri. Tequera omoncarateaji ishinquitapiniyeeta, ¹⁶irointi oca piquemaqueri icamantacotiri camantantaveitachaniri peerani Joirini: ¹⁷“Icanti Tasorentsi: ‘Coajica irineajeitero maaroni atiri nontianqueneri Noshire. Incamantantayete itomipee, irishintopee. Yora evancaripee iriohshiretashitearo paitapeerica. Aisati irimishiveetashitea anteashiparipee. ¹⁸Jeri quemisantajeitenane: shiramparipee, tsinaneppee, nontiancajeiteneri Noshire, inquenquetsacotantennari. ¹⁹Ari nomatero coajica caari pineapiniti inquitequinta jenoqui, aisati aca quipatsiqui: poajeitanaquero cavaco. Aitaque pineajeitero coajica irirajani camajeitatsineri, aisati pineavaquero ontaajeitanaquea pancotsipee: oshequi oncachaajencatanaque. ²⁰Irijivate intsvacanaque catsirincaiteri; aisati yora cashiri, inquisitioncatanaque, irishianaquero irajantsi. Impoijiquea omoncaratapaquea quitaiteiri irareetantapaajeari Avincatsarite. Oshequi irimatapaque, iriotacojeitaqueri maaroni atiri. ²¹Iroavisacojeitea maaroni aventajeitearine’”.

Irootaque isanquenatiniri Joirini.

²²Aisati icanti Petero:

—Noshaninca. Pinquemisantavaquero oca noncamantempiri, nonquenquetsacoteri Jesoshi, yora nasaretasatini. Itasoncantayeti, imayetaquero caari aneapiniti. Aisati imayetaquero paitapeerica, ayotantariri itasorentsitasanotaque. Tempa pineapinijeitaqueri avirori, piotitacari. Tempa irio Tasorentsi matacaqueriri. ²³Peerani aitaque

iotacotitarini, icantitani: “Aitaque oncanteari, impimanteeteri yora Jesoshi”. Irio caari cameetsatsi oaqueriri, iro cantaincha pipajacotacantajeitaqueri avirori, poamaacantajeitaqueri. ²⁴Ari oshequi iqumatsicayetacaro, icamanaque, torein. Iro cantaincha yoitinaajiri Tasorensi, te incocayeriji incamasanote. ²⁵Tempa isanquenatitacaroni peerani Iravirini irineane Jesoshi: “Niotaque quiso yoaquena Novincatsarite, isavicaque nacosanoriqui yamitacotapinitantanari, caari noashiretanta. ^{26,27}Oshequi noquimoshireventaqueri, otimantari nontantari: ‘Apa, oshequi noveshireaca. Niotaque eiro pojocanatsi anta ishaaviji. Aisati eiro pishinetanatsi nompatsaye, tempa pineacameetsatana. Niotaque pimataquenaro oca picantaquenari. ²⁸Piotacaaquenaro noncanteani naneasanotanaaje, quiso avavacayea, noncanteani noveshireimentanaquemp’”. Irootaque irineane Jesoshi isanquenatirini Iravirini.

²⁹Ari yovaajiro aisati Petero:

—Meeca, noshaninca, noncamantasanotempi. Icamaque intacantaqueeri Iravirini, itijaca. Timatsiquera meeca itijacanta. ³⁰Camantantatsiniri inaveitani. Iotasanotironi icantitariniri Tasorensi: “Queariotaque oca noncamantasanotempiri, eiro namatavimpitsi. Coajica impincatsariventante pishanincasanori, poyetajempineri”. ³¹Pineaquero, tequerasitani intinaajeji Quirishito, iro cantaincha iotacotitarini Iravirini. Tempa isanquenatini: “Incante Quirishito: ‘Apa, niotaque eiro pojocanatsi anta ishaaviji, aisati eiro pishinetanatsi nompatsaye’”. ³²Iriotaque Jesoshi yoitinaajiri Tasorensi. Aitaque noneajeitaqueri narori, meeca nocamantasanotaquempiro. ³³Impoiji yoancajiri anta iracosanoriqui, icaratanapaajariri ipincatsariventanti. Irosati quiso oantacariri Jesoshi Ishire Tasoren-

tsi, ora icashiacaqueriri Iriri.

Meecaquea, itiancajeitaquenaro narori aca: irootaque pineantajeitaquenari aisati piquemajeitantaquenari. ³⁴Pamene, te irio quenquetsatocotajanchane irisati Iravirini peerani, irintiquea iquenquetsatocotiri Quirishito. Te irovajenocajeaji irinti Iravirini jenoqui, irintiquea Quirishito. Tempa isanquenatitani peerani: “Tempa irio Tasorensi cantiriri Avincatsarite Quirishito: ‘Pisavicapee aca nacosanoriqui, pincaratena ampincatsariventante ³⁵irosati impincatsajeitantiempiri maaroni quisaiveitimpiri’”.

³⁶Aisati icantajeitiri Petero:

—Tempa arojeitaque ishanincani Ishiraerini. Cameetsa iriotosanojeitero ashanincajei oca nocantaquempiri: pipajacotacantavetacari Jesoshi, iro cantaincha yoitinaajiri Tasorensi, ipeavajiri aisati Pincatsari, irisati Quirishito.

³⁷Iquemantajeitavacarori oca, oshequi iquenqueshiretasanojeitanaca. Isampijeitiri Petero:

—Noshaninca, ζjaoca noncantajeiteari? Yacanaqueri:

³⁸—Pinqueshireajea, eiro piquempetajatsi peerani. Paventajeitajeari Jesoquirishito aisati pivaotisantajeitajeari, incavintsaajeitantiempiri Tasorensi, eiro iquenqueshireacotajimpitrosi aisati caari cameetsatsi pantajeiveitaniri. Irootaque quiso oajeitantiempiri aisati Ishire intianquempiri. ³⁹Irootaque icashiacaajeitaquempiri avirori; aisati icashiacaajeitaqueri iriori pishanincatajeari coajicani, jeri aisati maaroni arejipeequiniri iriori. Irootaque icashiacaajeitaqueeri maaroni; irootaque icoacaajeitaqueeri Avincatsarite, ariorica anquemisanteri.

⁴⁰Oshequi pashini icamantasanoeitiriri, icoaque inquemisantacayeri. Jero oca icantaqueriri aisati:

—Poavisacojeitea. Pishiajeitaricari timajeitatsiri meeca: yora caari cameetsajeitatsi.

⁴¹Ivaotisaajeitaca maaroni quemisanta-jeitaquerori irineane, aamaaca icarajeitaque 3,000. ⁴²Icantatiani iquemisantapini-jeitiro oca yoamejeitiriri. Icantatiani cameetsa iquempeavacaajeitaca: itsipata-vacaajeitaca icarajapinijeitiro tanta, iquenqueshirejeitantacariri yora camimentajeiteeri, aisati iquenquetsata-caapinijeitiri Tasorentsi.

⁴³Yora quemisantatsiri imatapinitaque-neri atiripee caari ineapinijeiti, aisati imayetaquero paitarica iotantacariri queario itsipatari Tasorentsi. Yoajeitan-aqueri cavaco maaroni. ⁴⁴Ari iquempeava-caajeitaca quemisantajeitatsiri. Te irimashitsajeiteji, irointi ipavacaapinijeita timimojeitiriri, paitaricapee. ⁴⁵Ipimanta-jeitiro irovaararo, iipatsite aisati. Ipaarantajeitiri maaroni ishaninca coiteimojeitariri. ⁴⁶Maaroni quitaiteri ijatapinijeiti anta ivancoqui Tasorentsi. Aisati icarajajeitaquero tanta ivancopee-qui iriori, iquenqueshireantariri camimentajeitaqueeri. Ariorica yoajeita, iquimoshiretasanojeiti, aisati cameetsa ipashitavacaajeitaca. ⁴⁷Icantajeiti:

—Cameetsa ini Tasorentsi.

Jeri yora maaroni timajeitatsiri inecameetsajeitaqueri quemisantatsiri. Icantatiani maaroni quitaiteri iquemisan-taque pashini atiri, yoshequiacaasanojei-taqueri Avincatsarite.

**Icamantanti Petero anta
ivancoqui Tasorentsi.**

3 ¹Pashini quitaiteri, jenoquiquera catsirincaiteri, irotaintsi omoncara-tea iquenquetsatacaantapinitariri jorio Tasorentsi. Itoncaanaque Petero, jeri Joa anta ivancoqui Tasorentsi. ²Ainiro isavicaque anta aparoni shirampari, choriveetatsiri iitiqui. Aitaque icantitapaa

peerani, iroaquera itimapaaque. Ari maaroni quitaiteri yameetapinitiriri omoroqui pancotsi ipajiyeetiri: “Camee-tsari omoro”. Aitaque yoyeetapinitiriri omoroqui iramananteariri iirequite queayetatsiri. ³Yora Petero, jeri Joa irovetaincha inqueajeitapeeme pancotsi-qui, iro cantaincha ineavaqueri, icantave-tavacari:

—Pincavintsayena noshaninca, pimpena quirequi.

⁴Ari yamenapaaqueri Petero, icantiri:

—Pamenenate.

⁵Yamenasanovetavacari, ijitashivetaca ari impaquerime paitarica. ⁶Iro cantain-cha icantanaqueri:

—Tecatsi noirequite, iro cantaincha nocoaque noncavintsayempi. Noncanteri Jesoquirishito, yora nasaretasati iraniita-caajempi irinti, panitantajeari.

⁷Yajiricaqueri iracosanoriqui, yoatiaqueri. Intsipaita yavisacotaji, ishintsitanaji iitiqui. ⁸Ishintsiti icatianaja, cati. Icatiasanotanjaja, yaniitanaji.

Itsipatanacari, iqueanaque pancotsiqui. Isapocasapocataanaque, icantanaque:

—Cameetsa ini Tasorentsi.

⁹Ineajeitavaqueri maaroni atiri: yaniita-naji. Iquemajeitavaqueri icantanaji:

—Cameetsa ini Tasorentsi.

¹⁰Ari iojeitavaqueri, iriotaque yoca savicaveitachaniri omoroqui, amananta-veitachaniri quirequi. Ineajeitaqueri yavisacotaji, irootaque yoajeitantanaca-riri cavaco. Te iriotacoteriji. ¹¹Ari yajiricasanotajiri Petero, jeri Joa. Inajeitaque anta yapatotapinijeitanta: irio Saromo vetsicacanthironiri peerani pancotsi. Irosati ishiashitantapaacari maaroni atiri, yoajeitanaqueri cavaco. ¹²Ineavaqueri Petero, icantavaqueri ijrioririnte:

—Noshaninca, ¿paita poajeitantanacari cavaco? ¿Paita pamenantajeitanari, sorerere? Eiro pijitashitanatsi naro

Tasorensi naniitacantajariri yoca choriveitachaniri. Eiro aisati pijitanatsi noquemisantasanoti nomatantajariri.^{13,14}Irinti Tasorensi oavisacotajiriri. Peerani iquemisantaveitarini Avarama, Isaca, Jacovo, jeri aisati maaroni intacantaroniri. Ocameetsati pinquempjeiteari iriorini, pinquemisantajeiteri Tasorensi. Iriotaque neacameetsatasanotiriri Jesoshi, icanti: “Pineaqueri, icameetsatasanoti Notomi, yantaquenaro maaroni nococaaqueriri”. Queario icameetsasasanoti Jesoshi, catsini. Iriotaque paacantaqueri. Iro iroimpacaajerime Pirato, aiquero picantacoventatiiri: “Te noncoyeji poimpacaajeri”, irinti picaoqueri yoipacajimpiri oantatsiri.¹⁵Poacantaqueri oaneajeitiriri atiri. Icamavetapainta, impoiiji yoitinaajiri Tasorensi. Aisatitapaaji, noneajeitajiri.¹⁶Jeri yoca shirampari: iquemacotantavacariiri Jesoshi, iquemisantaque, irootaque yavisacotantajari. Jerica pineaqueri. Tempa piojeitiri. Ari iquemisantaque, irootaque itecatsitantajari. Pineaqueri meeca yaniitanaji.

Aisati icantajeitiri Petero:

¹⁷—Ari noshaninca, meeca niotaque te piojeiveiteani avinti. Aisati iquemeta avincatsaritepee, te iriojeiveiteani.

¹⁸Imataquero Tasorensi oca icantitaniri peerani: “Coajica oshequi inquematsicataro Quirishito, incamentajeiteri atiri iroavisacotantajariri”. Tempa iquenquetsacotitarini Quirishito maaroni yora camantantatsiniri.¹⁹Pinquenqueshirejitanaquea, eiro piquempjeitajatsi peerani, irointiquea pinquemisantajeite; impoiiji incavintsayempi Tasorensi: iroameetsajeitempi, eiro iquenqueshireacotajimpirotsi aisati caari cameetsatsi pantaveitaniri. Irosati intsipajeitantempiri Avincatsarite, iriveshireacajeitempi.²⁰Aisati intianquempiri Jesoshi, yora Quirishitotatsiri. Tempa peerani icaman-

tasanotaquempini.²¹Incantaitiyempani intimapaaje anta jenoqui, irosati iroameetsatantayetaquearori maaroni, paitapeerica. Tempa irootaque icantiriri peerani yora camantantatsiniri, yora yoameetsajeitiri Tasorensi: iriotaque neanatacaajetiririni maaroni.²²Icantini Moishishi: “Yora Avincatsarite Tasorensi intianquempiri camantajempineri, inquempetajena narori itiancaquena. Avirotaque irishanincatajeari. Paitarica incamantempiri, pinquemisantavaqueri.²³Irinti maaroni caari quemisantiri iriori, eiro quiso yoiritsi ishaninca, irointiquea intsoncajeitajeri”.²⁴Iquenquetsacotitaroni peerani maaroni camantantajeitatsiniri oca pineayetaqueri meeca. Jeri yora Samoirini, intacaroniri, jeri aisati maaroni impoijeitiriri. Iquenquetsacotajeitiro, maaroni.²⁵Aitaque ashanincajeitacari yora camantantatsiniri. Peerani icantirini Tasorensi Avarama: “Coajica iriveshireimentajeiteari maaroni atiri pishanincani: yora Quirishito pocatsineri”. Moncarataca icantaqueriniri. Ocameetsati meeca piveshireimentajeiteari.²⁶Itiancaqueri aroriqui, ijivajeitaquee yoamejeitaquee. Ainiro pantajeitiro caari cameetsatsi, iro cantaincha ipocashijeitimpi iroavisacojeitempi eiro pashinoncanta; icoaque iroveshireacajeitempi.

**Yora oametavacainchari,
yapatotashijeitacari quemisantatsiri.**

4¹Irosatiquera iquenquetsacacari Petero ishaninca, ari ipocapaaque saserotepee. Jeri aisati jivatacariri atiri anta ivancoqui Tasorensi. Jeri saroseopee.²Icantashirejitanaque, icantavacacana:

—Paitateemi yoametantariri atiri. Jero icamantaqueriri: “Intinaye camajeitatsiri: tempa itinaaja Jesoshi”. Te oncameetsateji oca yoamejeitiriri.

³Ari ishaaviniji catsirincaiteri, irosati yaantacari, tapi. Yaajeitanaqueri, yoiminqueajeitapaaqueri, ari iquitaitacojeitaque.

⁴Iro cantaincha iqumisantaque oshequi quemajeitavaqueriri Petero, aamaaca icarajeiti 5,000 shirampari, quemisanta-jeitaintsiri.

⁵Oquitaitetamanaji yapatojeitaja aisati anta Jerosarequi pincatsaritsiri, savicacantantatsiri, oametantirori sanquenarentsi. ⁶Icarajeitiri Anashi, yora ivincatsarite saserote. Aisati yapatotiri Caijashi, Joa, Arijantero, jeri maaroni ishaninca ivincatsarite saserote. ⁷Ari icajemacantaqueri quemisantatsiri, isatecaqueri nianqui, isampijeitaqueri:

—¿Janica matakaaquempirori oca?
¿Janicampa cantaquempiri?

⁸Ari oametaqueri Ishire Tasorentsi Petero, omatacaasanotaqueri. Iquenquetsatacaajeitaqueri apatotimentajeitariri:

^{9,10}—¿Iriompa pisampitacoventirri yora choriveitachaniri ineshinoncatiri Tasorentsi? Pineaqueiri, avisacotanaji ini.

¿Picoaquempa piote jaoca icantacari yavisacotantajari? Pinquemajeitavaquero oca. Aisati ocameetsati iriojeitavaquero maaroni ashanincapee. Iriotaque Jesoquirishito, yora nasaretasati, oavisacotajiriri.

Pipajacotacantavetacari, iro cantaincha yoitinaajiri Tasorentsi. ¹¹Iriotaque Jesoshi shiacantachari mapitatsiri itseencaqueri vetsicavetarori pancotsi: iro cantaincha ipeaqueiri Tasorentsi itincamitantarori. Avirojeitaque avinti shiaqueriri vetsicavetarori: pitseencaqueri Jesoshi.

¹²Iro cantaincha te intimeji pashini oavisacotantatsineri: te intimeji aca quipatsiqui pashini oavisacojeiteeneri: apaniro Jesoshi.

¹³Ari yoajeitanaqueri cavaco yora pincatsaripee, icanti:

—Pineajeitaqueri, te intsaroajeitanaqueji iriori. ¿Paita caari itsaroacantajeitee? Aisati te intsoteavetearoji sanquena-

rentsi, te irishitoriotasanovetearoji, iro cantaincha oshequi ioti. ¿Paitaquea iotacairiri? ¿Iriompa oametiriri Jesoshi, yora quiso yoaveitaniri?

¹⁴Ari ineajeitaqueri itsipatacari yora yoavisacoyeetajiri. Tecatsi incantea incantimenterri. ¹⁵Ari itiancajiri:

—Pisoquijajeitanaje anta; ari coajica noncajemajempi aisati.

Ari isoquijajeitanaji. Impoiji icantava-caajeitanaca iriori pincatsaripee:

¹⁶—¿Jaoca ancanterriri yonta? Jojeitanaqueri maaroni jerosaresati itasoncaventaqueri yora choriveitachaniri. Tecatsi ancante: “Te irimateroji”. ¹⁷Te oncameetsateji inquenquetsatacaajeitajeri pashini atiri. Tsame ancantasanoterita: “Eiroyea meeca piquenquetsatacotajiritsi yora Jesoshi”.

¹⁸Ari yapiitajiri, icajemajiri. Icantasantotiri:

—Eiroyea meeca piquenquetsatacotajiritsi Jesoshi. Eiroyea picamantacotajiritsi.

¹⁹Yacanaqueri:

—Tempa inaejeitee Tasorentsi. Pincamantasanotenate: ¿cameetsampa nonquemisantempi? Tempa irio Tasorentsi nonquemisanterri. ²⁰Tecatsi noncantea meeca nojocajero noquenquetsatacotiro oca noneasanotaqueri, aisati oca noquemasanotaqueri.

²¹Ari yapiitajiri aisati icantasanovetajiri, irosati itiancantajiri. Tecatsi irante impasatimenterri. Ineajeitaquero atiri oca imataqueri, icantapinijeitanaque: “Cameetsa ini Tasorentsi, oshequi imatacaajeitaqueri quemisantatsiri”, irootaque caari ipasantantari. ²²Peerani imoncarataquero 40 irosarintsite choriveitachaniri. Ari oshequi iquenqueshirejeitaquero atiri yoavisacotiri Jesoshi, iojeitantacari itasorentsitaque.

²³Ari yoimpacaajeitajiri pincatsaripee, impoiji ijajeitanaji quemisantatsiri ishanincaqui. Icamantapaaqueri oca

icantavetacariri yora cantavetacariri.

²⁴Iquemantavacarori oca, iquenquetsatacaajeitaqueri Tasorentsi. Antearojenca icanti:

—Novincatsarite. Aviro vetsiquirori inquite, quipatsi, incajare, maaroni; aisati povetsicajeitaqueri maaroni timantajeitarori. ²⁵Aisati peerani poametaquerini noshanincani Iravirini, yora quemisan-timpiri. Oametaqueri pishire, isanquena-tantarori oca: “¿Paita itseencajeitantacari yora pashinisatipee atiri? ¿Paita iquenqueshiretashitantarori caari cameetsayetatsi? ²⁶Yora invincatsaritepee iraimanajeivetari Pincatsarisanori, aisati yora Quirishitotsiri; incoajeivetea intsoncajeiterime”. ²⁷Aca nampitsiquica yapatojeitaca yaimanajeivetacariri pitomi Jesoshi, yora pineacameetsatiri. Tempa pipeaqueri Quirishitotasantatsiri. Icarajeiti aimanajeitantachari Eroreshi, Pontsio Pirato, joriopee, pashinisatipee atiri, maaroni. ²⁸Peerani piotitani, picantitani: “Aitaque oncanteari”. Ari meeca imataquero yocapee. ²⁹Meeca, Novincatsarite, piotaquero oca icantasanovetaquena: “Eiro piquenquetsatacotajiritsi Jesoshi”. Tempa narotaque quemisantimpiri. Pimatacaasanotena eiro notsarointatsi nonquenquetsatanotero pineane. ³⁰Pintasoncacoventante, poavisacotenteariri mantsiaripee; pimata-pinitero caari ineapinijeiti, piotacaajeiteri atiri queario iriotaque Jesoshi pitomi, aisati pineacameetsatiri.

³¹Aitaque icantajeitiriri Tasorentsi. Impoiiji onicanaca pancotsi isavicajeitantari. Otasoncacoventajeitapaqueri Ishire Tasorentsi, irosati cameetsa iquenquetsantarori irineane Tasorentsi, te intsarointateji.

Yaacameetsatavacaajeitaca yora quemisantatsiri.

³²Oshequi icarati meeca quemisanta-siri, cameetsa isavicajeitaque, aisati

imoncaratavacaajeitaca: paitarica icoajeitiri aisati paitarica iquenqueshire-jeitiri. Te irimashitsajeiteji, irointi ipavacaajeitacaro maaroni coiteimojeita-riri. ³³Jeri iroamereni Jesoshi, icamanta-pinitiri atiripee:

—Itinaasanotaja Avincatsarite Jesoshi. Aisati icantajeiti atiripee:

—Tempa icameetsajeiti quemisantajei-tatsiri.

^{34,35}Yora maaroni ashiyetachari iipatsite aisati ivanco, ipimantajeitiro. Oca opinayetari, yamajeitaqueneri iroamereni Jesoshi, ipapaaqueri. Irosati ipaarantaqueriri itsipapee iriori coiteimo-tariri, caari yashinoncaajeitanta quemisantajeitatsiri. ³⁶Icarajeitiri quemisantatsiri ishanincani Irevi, pajitachari Jose. Pashini ipajitiri yora itianqueetiri: Verenave. Ocanti ivajiro aneanequi arori: “Veshireacaantachari”. Iriotaque poneachari Tsipirequi. ³⁷Yashi-vetaro quipatsi, impoiji ipimantiro. Yaanaque ovinaro, ari ipapaaqueri yora iroamereni Jesoshi.

5 ¹Iro cantaincha itimi pashini shirampari pajitachari Ananiashi, iro ijina Sajira. Ipimantiro iipatsite, ²yaaran-tavaji ovinaro nianqui. Irointi cashetani aisati yaanaque, ipapaaqueri iroamereni Jesoshi. Icantapairi:

—Jeri yoca quirequi, iriotaque maaroni ovinaro noipatsiteni nopimantaqueri.

Iotaque aisati ijina iroori iramatavite-rime. ³Iro cantaincha icantavaqueri Petero:

—Ananiashi, tempa paarantavaji ovinaro piipatsite. Yoametaquempi Satanashi, picoantavetacari pamatavite-rome Ishire Tasorentsi. ⁴Tempa iro piipatsiteni onaveitani, tempa iriotaque pashi ovinaro. Ocameetsati pinquempoyeri ovinaro. ¿Paita picantanirotantari: “Jeri yoca maaroni ovinaro noipatsiteni”? Pamatavivetaquena narori, iro cantain-

cha tecatsi pincanteri pamataviteri irinti Tasorentsi.

⁵Iquemantavacariri Ananiashi, irosati itaantanaca, poron. Icamanaque, toren. Itsaroasanojeitanaque catsini maaroni neajeitaqueriri. ⁶Impoiji yovetsicajeitaqueri evancaripee intijeri; yaanaqueri, itijiri. ⁷Osamanitapainti capichaji, ari oqueapaaque ijinani iroori. Te ioteji camaque ojimeni. ⁸Icantavaquero Petero:

—¿Pipaquenarimpa maaroni quirequi, ora ovinaro pipatsiteni pipimantaqueri?

Ari acanaqueri:

—Je, nopaquempiri maaroni.

⁹Irosati icantantacaro iroori:

—¿Paita piquempetaririri pijimene, pamataviterome Ishire Avincatsarite? Jeritapaaji tijaitiriri pijimene: irisati anaquempine avirori.

¹⁰Irosati oteimotantanacari, ocamanaque. Iqueapaaqi yora evancari, ineapaaquero, camaque. Ari yaanaquero, itijaitiro iroori, itsipatajantiro ojimeni.

¹¹Ari itsaroajeitanaque maaroni yora quemisantajeitatsiri, aisati itsaroajeitanaque maaroni quemacojeitaqueriri.

Yora oametavacainchari, iquishimatiri iroamereni Jesoshi.

¹²Oshequi itasoncaventanti yora iroamereni Jesoshi. Oshequi imayetaqueri atiri, irosati yoantajeitanacari cavaco. Ari yapatojeitaca anta pancotsiqui yovetsicacantiniri Saromoni.

¹³Oshequi ipincatsajeitaqueri atiripee, irootaque itsaroacantajeitacariri intsipajeitajearime. Iro cantaincha icantajeiti atiripee:

—Icameetsatasanojeiti quemisantajeitiriri Jesoshi.

¹⁴Aiquero ijatati yoshequiasanotanaque quemasantiriri Avincatsarite. Oshequi icarajeiti shirampari, jero tsinane.

¹⁵Yoapiniyetaqueri atiri mantsiaripee anta avotsiqui: yoiponaayetiri shitashin-

tsiqui, oncanteata ariorica iravisanaque Petero, intsimancayetanaqueri iravisacotantajeiri. ¹⁶Aisati yapatotashitaca oshequi atiri, poneayetachari nampitsi-peequi anta otsapiyetapaa Jerosare. Yamayetaqueri mantsiaripee, jeri aisati neiriri camaari. Yoavisacojeitajiri maaroni.

¹⁷Ari ocantimoneentanacari ivincatsarite saserote, jeri itsipapee: iriojeitaque saroseotatsiri. ¹⁸Ari yaacantaqueri yora iroamereni Jesoshi, yoimniqueacantave-tacari caravosoqui. ¹⁹Iro cantaincha yanaincaque inampire Avincatsarite, yashitareapaajiniri ashitacorontsi, yaanajiri saiteriqui. Icantiri:

²⁰—Pijataje anta ivancoqui Tasorentsi, pincatiapaaje. Pincamantasanojeiteri atiri jaoca incantajeiri intimantajeiri inquitequi, incantaitiyempani.

²¹Yacanaqueri:

—Je, ari noncamantajeitaqueri.

Ari iroaquera oquitaitetamani ijatanaque ivancoqui Tasorentsi, yoametantapaaji.

Jeri ivincatsarite saserote, itsipajecari ishaninceapee anta pashiniqui pancotsi. Yapatojeitiri oametavacainchari: yora ivincatsaritepee jorio. Ari icantiri variria:

—Pijajeite anta poiminueaquerinta oshaiteji quemasantiriri Jesoshi, pamajeitenari.

²²Ari ijatashivetari, te irineapaajeriji. Irosati ipiantaja, icantapaaqueri:

²³—Te aneajeriji. Noneapaaquero pancotsi, ashitasanovetaca ashitacorontsi, oyavivetaca. Ainiro icatiavetaca shentavetarori omoropee. Iro cantaincha nashitareavetapaacaro omoro, noquea vetapaaca; tecatsi noneapaaqe tsompoina.

²⁴Iquemantavacariri, icantavacaanaca:

—¿Jaocaquea meeca iquenanaajiri?

—Jaocateemi.

—¿Jaocaqueame ancanteriri?

²⁵Irosati yareetantapaacari aparo camantapaaqueriri, icantapaiari:

—Yora shirampari poimnqueacantave-tacari, catiajeitapaaja anta ivancoqui Tasorentsi. Yoamejeitapaajiri atiri.

²⁶Irosati ijtashitantajariri capitano, yaajeitanaqueri variriaepe, iro cantaincha itsaroacaacari ashanincapee; icanti:

—Iquisacoventaricari atiripee quemisantatsiri, ipitseeecari.

Irootaque cameetsa yaantanacariri, te inquisanatanakeriji. ²⁷Ari yaanaqueri, yoatiapaaqueri anta itiminta oametavacainchari. Icantavaqueri ivincatsarite saserote:

²⁸—¿Paita piquenquetsacantajariri aisati atiri? Tempa nocantasanovetimpi: “Eiro picamantacotajiritsi Jesoshi”. Meeca aiqero poamejeitatiiri maaroni jerosaresati. Jero oca picantacotaquena: “Irio saserotepee oacantaqueriri Jesoshi”. Te oncameetsateji picantajeitaqueri. Pimajerejeite, eiro picamantantajitsi aisati.

²⁹Yacanaqueri Petero:

—Eiro noquemisantiritsi atiri, irintiquea nonquemisantasanoteri Tasorentsi. ³⁰Queario avirojeitaque oacantaqueriri Jesoshi. Pipajacotacantaqueri coroshiqui. Irinti oitinaajiriri Tasorentsi, yora iquemisantiniri ashanin-cani peerani. ³¹Yoancajiri anta iracosano-riqui. Ipeajiri Jivatacaajeitaqueeri, aisati Oavisacojeitaqueeri. Icoacaajeitaqueri ajorioririnte inquenqueshirejeitanaquea, impoiji incavintsaajeiteri, eiro iquenqueshiretajirotsi aisati caari cameetsatatsi yantajeitaqueri. ³²Aitaque noneasanota-quo yantayetaqueri Jesoshi, aisati niotaque quiso oajeitiri Ishire Tasorentsi maaroni quemisantajeitiriri. Irootaque noquenquetsatacapinitiriri atiri. Tecatsi noncantea nomajerete.

Impoiji icantajeiti itsipapee iroamereni Jesoshi:

—Queario oca icantiri Petero.

³³Ari iquemantajeitavacariri, iquisajeitanaqueri, icoajeivetanaca iroyerime.

³⁴Ari icatianaca ishaninca pajitachari Camariyeri. Variseo ini, irisati oametanti-rori sanquenarentsi. Maaroni ineacamee-tsajeitiri atiri. Icanti:

—Noshaninca, nocoaque irisoquijaitea-naque quemisantiriri Jesoshi, eiro iquemantaro noncantempiri. Impoijiquea impiaje aisati.

Ari itiancajeitaqueri saiteriqui.

³⁵Impoiji icantiri:

—Noshaninca. Quearioya, pantiricari quemisantiriri Jesoshi. ³⁶Jeri itimaveitani peerani yora Teorashi, oshequi ishemeta-queeni. Ari yapatotashivetacari oshequi iratiritepee, naamaaca icarajeiti 400.

Yoyeetaqueri, impoiji inijantareavacaajei-tanaca oijajeivetariri. Ipeashjeitanaca, tecatsi anquemacotajeri aisati. ³⁷Impoitiri aisati Jorashi, yora carireasati. Anta isanquenatacojeitana, aisati ijivatana-queri aparopee atiri. Aisati iriori, yoyeetaqueri. Yovaraanaca oijajeivetariri, tecatsi aisati anquemacotajeri. ³⁸Ari meeca noncamantempi, eiro pineashiren-quiritsi yocapee, incanteata. Iriorica tianquiriri atiri iquenquetsati, tempa aisati impeajeitanajea iriori. ³⁹Iriorica tianquiriri Tasorentsi, tecatsi pincanteri poimajerenteri. Piquishimaticariri Tasorentsi.

⁴⁰Ari onimojeitanaqueri iriori. Icajema-jiri aisati, ipasanatacaantaqueri. Impoiji icantasanovetari:

—Eiro aisati piquenquetsacotajiritsi Jesoshi.

Irosati itiancantajariri. ⁴¹Ari ijajeitana-que, Iquimoshirejeitanaque, icantajeiti:

—Ineacameetsajeitee Jesoshi, irootaque ishinetantaqueeri aneacatsitimentajeita-cari.

⁴²Maaroni quitaiteri yoametantapiniti anta ivancoqui Tasorentsi, aisati pancotsi-

peequi. Icantani: yoametantapiniti, icamantantapiniti. Icantapinitiri ishaninca: —Iriotaque Jesoshi yora Quirishitotasiiri aamaajeitaniri peerani.

Icoyeaqueri intacotantachaneri.

6 ¹Yoshequiantacari quemisantatsiri, jeri iquisashireanaca yora iotirori quirieco. Icantavacaanaca:

—Maaroni quitaiteri, ariorica intacotanta, te irintacotearoji ashaninca arori: oca camajimentaaro. Apaniro intacotaro irointi iotirori evereo.

²Ari yora iroamereni Jesoshi yapatojeitaqueri maaroni quemisantatsiri. Icantiri:

—Te oncameetsateji nojocajero noquenquetsatapinitiro irineane Tasorentsi, nompantayetempirori poyeari. ³Meeca, noshaninca, pincoyeanontea 7 shirampari, yora pineacameetsatasanotiri. Pincoyeaqueri timatsiri iotantari, quemisantasanotirori Ishire Tasorentsi. Noncanterita iriori irintacotantea. ⁴Irompa nainti, apatiroti nonquenquetsacoteri Tasorentsi, aisati noncanteani nonquenquetsatero irineane.

⁵Onimojeitacari oca icantaqueriri. Icoyeaqueri Ishiteva: quemisantancari ini, quemisantasanotirori Ishire Tasorentsi. Icoyeaqueri Jeripi, Pirocoro, Nicanori, Timo, Parimenashi. Aisati icoyeaqueri Nicorashi, yora peajanchari jorio, poneachari Antioquiaqui. ⁶Irosati yonijaantapaacari. Icantajeitiri Tasorentsi: “Pamitacojeiteri yocapee irintacotantea”, aisati yajiricainataqueri iitoqui.

⁷Oshequi icarati quemajeitaquerori irineane Tasorentsi. Aiquero ijatatii yoshequiti quemisantatsiri anta Jerosarequi. Aisati oshequi catsini icarati saserote shiretararori oca aquemisantiri.

Yora Ishiteva, iriotaque icoyeane Tasorentsi.

⁸Catsini icameetsashiretaque Ishiteva. Oshequi itasoncaciairi Tasorentsi.

Imatasanoyetiniri atiri caari ineapinijeiti. Imataqueneri paitapeerica iojeitantacari Tasorentsi ini Jesoshi. ⁹Ainiro yapatotapinijeitanta anta ivancoquinta Tasorentsi atiri yora ipimanteevetari peerani, iro cantaincha yoipacajiri amanantavetariri. Aisati anta yapatotanta shirenesati, arejantiriasati, poneachari Shirishiaqui, Ashiaqui. Ijatashijeivetacari Ishiteva, iquisatsajeivetacari aisati ipiatsajeivetacari. ¹⁰Iro cantaincha oshequi ioti Ishiteva yoametanti, tecatsi incantajeiteri impiatsatasanojeiteari. Ainiro iotantari, cameetsa ineanati aisati, tempa oametaqueri Ishire Tasorentsi. ¹¹Ari oshequi iquisajeitaqueri yoranqui, icantiri pashini ishanincapee:

—Pamene, nocoaque pintseeyacoteari Ishiteva. Ariorica pimajeitero nocantacquempiri, nompinatempi quirequi. Jero oca pincantacotashiteariri: “Noquemacheri Ishiteva, itseenquimataqueri Moishishi. Aisati iquempetaqueri iriori Tasorentsi, icantimataqueri”.

Icantiri:

—Ari, noncamantajeiteri ashanincapee.

¹²Iquemantacariri atiripee, iquisajeitanaca: savicacantantatsiri, oametantirori sanquenarentsi, maaroni. Jentsipaite ijatashijeitaqueri Ishiteva, yaapaintiri, tapi; yaajeitanacari anta yoametavacaapinijeitanta pincatsaripee. ¹³Yaanjiri aisati iriori yora tseeyachari, icantanirotapaaqueri:

—Aitaque icantani Ishiteva, icantapiniti: “Te oncameetsateji ivanco Tasorentsi”. Aisati iquempetiro isanquenare Moishishi, itseencapinitiro. ¹⁴Noquemacheri, icanti: “Yora Jesoshi, nasaretasati, intireajero oca pancotsica. Impashinitero oca ameyetacari, aisati impashiniyetajero yoameyetaqueeniri Moishishi”.

¹⁵Yamenajeitaqueri maaroni savicajeitantsiri, sorerere. Ishipaqueavorotanaque Ishiteva, iquempetanacari inampire Tasorentsi.

7 ¹Isampitiri ivincasarite saserote: —¿Queariompa oca icantaqueri? ²Yacanaqueri Ishiteva: —Novincasarite, pinquemisantajeitavauena. Peerani isavicantaveitaniri anta Mesopotamiaqui intacantaqueeniri Avaramani, iniyaapaacari Tasorentsi, yora cameetsatsiri. ³Ari icantapaaqueri: “Pojocanajero piipatsiteca, pijate anta pashiniqui quipatsi ora nonijayempiri”. ⁴Irosati yojocantanajero iipatsite careasati, yovaanaja anta Jaraqui. Aitaque icamapaaqueri iriri, irosati yovaacaantajariri Tasorentsi aca aipatsitequica. ⁵Iro cantaincha, te imperiji iipatsite, te impimateriji capichaji irisavicanteari. Aisati tequerani intimeni itomi. Iro cantaincha icantitacari: “Intime pitomi, aisati nompempi piipatsite avirori. Aisati nompajeiteri maaroni impoijeitempineri intimaje”. ⁶Aisati icantaqueri Tasorentsi: “Coajica intimaje poyeetajempineri iipatsitequi pashinisati atiri. Peerani catsini irompe-ranatanasoteari, oncarate osarinti 400 iroashinoncaasanoteri. ⁷Impoijiniquea noasanquetaqueri yora peranavetearineri. Irintiquea pishanincani, noimpiajeitajeri aca quipatsiquica, impoiji inquemisantaquena aca. ⁸Nocoaque meeca pintoyeantea iriotanteari atiri piquemisantaquena aisati pinquenqueshiretantearori nocantaquempiri”. Ari impoiji itimanaque itomi, yora Isaca. Ocarataque quitaiteiri 8, irosati itoyeantantacari. Itimaque itomi iriori Isaca, ipajitaqueri Jacovo. Itomipee iriori Jacovo icarajeitaque 12. Tempa iriojeitaque intacantaajeitaqueeri. ⁹Ari yovaajiniri Ishiteva, icantiri: —Ari yantearijeitanaque, iquisajeitakeri irirenti, pajitachari Jose. Ipimantajeitakeri, impoiji yayeetanaqueri Ejipitoqui. ¹⁰Ari yoashinoncaajeivetacari savicajeitatsiri, iro cantaincha yoavisacotiri Tasorentsi. Itasoncacoventiri,

irootaque ineacameetsatantariri ivincasarite ejipitosati, pajitachari Jarao. Ineaqueri otimimotiri iotantari, irootaque ipeantajariri iriori ivincatsaririnte. Ipincatsariventajeitiri maaroni ejipitosati, aisati ishaninca Jarao. ¹¹Impoiji otashentsiiteanaque maaroni Ejipitoqui, aisati Cananaqui. Oshequi yashinoncaajeitaca, tecatsi iraanajero intacantaqueeri iroajeitajeari. ¹²Iriori Jacovo iquemacotaquero ari otimaqueri tirico anta Ejipitoqui. Ijivataqueri itiancaqueri itomipee: “Pijajeite Ejipitoqui pamanantaitero ayeari”. Ari yamanantaiti, aisati ipianaja. ¹³Impoiji otsoncaja, itiancajari aisati: “Pijajeite pamanantajante aisati”. Ari ijajeitanaji aisati, jeri ineajeitapaajiri pincatsari. Icantavaqueri: “Narotaque Jose pipimantaqueri peerani”. Aisati icantiri Jarao: “Jeri yoca iyentisanoripee narori”. ¹⁴Impoiji icantiri aisati: “Pincantaiteri apa impoque aca, aisati maaroni ishaninca”. ¹⁵Irosati ijatantanacari Jacovo anta Ejipitoqui, yaajeitanaqueri ishaninca, icarajeiti 75. Ari icamapaaqueri. Aisati iquempejeitacari maaroni itomipee, icamajeitaque iriori. ¹⁶Impoiji yaatonquijeitanajiro itonquini Jacovoni, itijapaajiro anta Shiquemiqui, ari opajitari quipatsi yamanantiniri Avarama. Irio pimantirori quipatsi itomipee Emori. Ipinataqueri quirequi.

¹⁷Irosati yovaajiniriri Ishiteva, icantiri: —Irotanaintsi omoncarataquea icantitacaniri Tasorentsi. Icarati oshequi ashaninca arori, yoshequianaque anta Ejipitoqui. ¹⁸Impoiji ipincatsariventanti pashini, caari iotacotiri Jose. ¹⁹Yamataveitiri ashanincani. Ishintsitsanajeitiri, yaajeitakeri itomipee, yoitajeitakeri. ²⁰Irosati itimantanaca Moishishi. Aitaque icanta Tasorentsi, ineacameetsatiri. Icarati mava cashiri iqueveanaque anta ivancoqui iriri, imanapitsataqueri ejipitosati. ²¹Te irimateroji irimaneri

aisati ivancoqui, irootaque yovetsicantacantariri pitotsijaniqui, imanavetacari otsapijaqui eni. Iro cantaincha oneaqueri irishinto Jarao, aaqueri. Oyevejiri onampiqui, oquempetacantajiri otomisanori. ²²Yoametasanotiri ejipitosati maaroni ocarayeti ioyetiri iriori. Cameetsa ineaveeti. Imatasanoyetiro paitapeerica yantayetiri.

Jero aisati icantiriri Ishiteva:

²³—Ari ocarati irosarintsite Moishishi 40, irosati iجاتاناناعاري irineeri ishaninca: yora ijorioririnte. ²⁴Ineapaaqueri aparo, yashinoncaaca: ipasanatiri ejipitosati. Ari iquisacoventapaacari Moishishi ashaninca, irosati yoantapaacari ejipitosati. ²⁵Ijivetaca iriori Moishishi ari impincatsajeitavaquerime ishaninca-pee, aisati ijivetaca ari iriojeitavaqueri iriotaque cavintsaajeitajerine. Ijivetaca irioteme itiancaqueri Tasorentsi, iro cantaincha te impincatsajeitavaqueriji. ²⁶Oquitaitetanaji ineaqueri ishaninca apite, iquisatsatavacaanaca. Icoaveta iroimajerenterime. Icantiri: “Tempa pishanincatavacaaca. ¿Paita piquisavacantajeitacari?” ²⁷Ari itatsincavaqueri yora quisasanotainchari, icantiri: “¿Janicampa peaquempiri meeca novincatsarite? ¿Picoaquempa pimperanajeitena? ²⁸¿Picoaquempa meeca poyena narori, pinquempetacantena yoranquini ejipitosati poaqueri oshaite-niji?” ²⁹Iquemavaque icantaqueriri, irosati ishiantanaca Moishishi, itsaroanaque. Irosati isavicantapaaca nampitsineentsiqui anta iipatsitequi Matia. Yaapaaque ijina, impoiyi itimanaque itomi apite.

³⁰Ari yovaajiniri Ishiteva iquenquetsatacaajeitiri:

—Ocarataque 40 osarintsi isaviquimotiri Moishishi iriconquiri. Irosati inijaantacari inampire Tasorentsi, anta amorequimotaqueri totseequishi.

Ocaaraitetinta anta, oquempetitara toncaari pajitachari Shinai. ³¹Yamenanaquero, irosati yoantanacaro cavaco: “Otaavetaca totseequishi, iro cantaincha te ontsonequeaji. ¿Paitaquea?” Ari ijatashitaquero, icoaveta iramenasanotero. Irosati iquemantacari Avincatsarite, ³²icantiri: “Narotaque Tasorentsi, icantani ipincatsajeitacuena pishanincani: yora Avarama, Isaca, jeri yora Jacovo, maaroni”. Jaa iriori Moishishi itsaroasannotanaque, te iramenanajeroji. ³³Icantiri aisati Tasorentsi: “Pipincatsatanarica, pisapatoreempa, picatiantacaro meeca quipatsi noameetsantiri, oca nopashiniriti. ³⁴Noneaqueri anta Ejipitoqui pishaninca nocoyeaqueri, oshequi yashinoncaajeitaca. Noquemaqueri icavintsaajeitaca, meeca nocavintsaajeitiri. Irootaque nopocashitantariri noimpacacaventajeri. Meeca, nontianquempie Ejipitoqui”. ³⁵Tempa peerani itseenquevetacari yora Moishishi, icantirini: “¿Janicampa peaquempiri novincatsarite?” Iriotaque yoca itiancaqueri Tasorentsi. Ipeajiri pincatsaritatsiri, aisati oavisacojeitiriri ashanincani. Irio tiancaqueriri inampire Tasorentsi, yora ineaqueri peerani anta totseequishiqui. ³⁶Yaajantiri ishaninca, imayetaquero caari inepinijeiti, aisati itasoncaventanti. Imayetaquero anta Ejipitoqui, incajarequi Quitioncajaroni, jero aisati anta caaraiteriqui. Ocarati 40 osarintsi imatapiniyetaquero.

Aisati icanti Ishiteva:

³⁷—Iriotaque yoca Moishishi cantiriri ajorioririnteni: “Oquempetaca narori itimacacuena Tasorentsi, aisati inquem-peteri pashini ashaninca intimacyeri: camantantapaatsineri iriori”. ³⁸Peerani iquenaquenajeitantaniri ashanincani anta caaraiteriqui, ijivajeitacari yora Moishishini. Anta toncaariqui pajitachari Shinai iquenquetsatacaari inampire

Tasorentsi. Iquemavaquero Moishishi irineane Tasorentsi, irosati yovaajeitancanariri intacantaqueeri, iotantacariri Tasorentsi. Irosati yovaajeitantaqueero meeca arori. ³⁹Iro cantaincha te incoyeji intacantaqueeri inquemisanteri Moishishi, irointiquea itseencaqeri. Icoajeiveta impianajeme Ejipitoqui. ⁴⁰Icantajeitiri Aaro: “Yora Moishishi iriovetaca aajeitajanteeri anta Ejipitoqui, yamajeivetaquee aca. Iro cantaincha ijataque chapinqui Shinaiqui. Meeca te ayotacoteriji paitanirica oaqeriri caari ipocantaja. Povetsicajeitajena pashini atasorentsite, ampincatsajeitajero iroori”. ⁴¹Ari yovetsicajeitiro, ishiacantiri vacajaniqui. Icoi impeajerome itasorentsite. Yoquenere ovisa, yamashiyetacano, ipashiyetacaro. Iquimoshireventashivetacaro yovetsicane. ⁴²Ishemanaca Tasorentsi, yojocanaqueri: ishinejeitiri ijitasorentsitashiyetari catsirincaiteri, cashiri, impoquiropree, paitapeerica. Tempa irootaque isanquenatacotiniri peerani yora Amoshini. Jero oca isanquenatiniri: “Noshaninca, jero oca icantimpiri Tasorentsi: ‘Ishanincani Ishiraeri, anta ocaaraiteapaaquenta pisavicaveitani 40 osarintsi. Iro cantaincha te poapinitenariji poshiniri, te pintaapinitenariji: te pimpincatsatimajeitenaji catsini. ⁴³Irointi pipincatsatashitacaro ipajiyeeitiri Maroco. Aisati pipincatsatashitacari impoquiropajitachari Ireja. Aisati pipincatsatashitacaro povetsicajeitiri. Irootaque nontiancanteariri vavironiasati irraajeitanaquempi inampiqui, imperanajeitempi”’. Irootaque isanquenatiniri peerani Amoshini.

⁴⁴Irosati yovaaqueneri aisati Ishiteva:

—Peerani anta caaraiteriqui otimimo-veitarini ashanincani cajo, onantari isanquenare Moishishi. Irio vetsicantirori Tasorentsi. Imoncarataqueneri Moishishi icantaqueriri. ⁴⁵Impoi

yaajeitanaquero ashanincani jaocarica ijayetiri. Ijivajeitaqueri Josoe iipatsitequi pashinipee atiri. Itianajeitiri Tasorentsi atiripee, otimantari isavicantari ashanincani. Quiso yoajeitiro cajo, irosati itimantacari Iravirini iriori. ⁴⁶Yora Tasorentsi inecametsatiri Iravirini. Icantavetarini iriori: “Apa, tempa aviro Tasorentsi, ipincatsatimpini Jacovoni. Nocoaque pishinetena meeca novetsiquempiro pinampitanteari”. ⁴⁷Iro cantaincha irinti Saromoni vetsicasanotirori pancotsi. ⁴⁸Te irisavicantearoji Tasorentsi oca pancotsi yovetsicayetiri atiri. Tempa irio savicasanotatsiri inquitequinta jenoqui. Tempa aitaque icantita camantantatsiniri: ⁴⁹“Icanti Avincatsarite: ‘Irootaque inquite nosavicasanotantari. Ora quipatsi, te iro nonampi. ¿Jaoca pincanteari povetsicantenari pancotsi nosavicanteari? ¿Arimpa nonaquearo pancotsi? ⁵⁰Tempa narotaque vetsicajeitaquerori maaroni timayetatsiri”’. ⁵¹Noshaninca, te pincoyeji piote. Pishiajeitaqueri pashinisati atiri: te pinquenchirempa. Te pinquemisanta-jeiteji. Aitaque picantaitatiani pipiatsatacaro Ishire Tasorentsi. Pishiaqueri intacantimpiniri. ⁵²¿Timatsimpa camantantatsiniri caari iquishini pishanincani? Teve aneeriji, tempa iotaca iquisajeitaquerini. Yoajeitaquerini maaroni camantantajeivetachaniri; icantini: “Coajica impoque cameetsatannotatsineri”. Ipocavetaca, iro cantaincha te pimpincatsajeitavaqueriji avinti, irointi paacantaqueri, poacantaqueri. ⁵³Piojeive-
taro irineane Tasorentsi yoamevetimpiri inampire, iro cantaincha te pinquemisanteroji.

Irootaque icantiriri Ishiteva ishaninca. ⁵⁴Ari iquemajeitavaquero oca icantaqueriri, irosati iquisajeitantanaca. Oshequi iquisajeitanaqueri, yatsicanajitimentajeitanacari irajiqui, taquiririri. ⁵⁵Irompa

irinti Ishiteva, iveshireimentashiretasano-tacaro Ishire Tasorentsi. Yamenasanotanaque inquitequi, ineaquero ishiquaquireane Tasorentsi. Jeri ineaqueri Jesoshi aisati, icatiaca iracosanoriqui Tasorentsi.⁵⁶Icantanaque:

—Jaa, yonta noneasanotaqueri inquitequi, icatiaca Atirivetapaintachaniri anta iracosanoriqui Tasorentsi.

⁵⁷Shintsi icajemajeitanaque, yovijeitanaquero iyempita, ishiashijeitapaacari. Yaajeitaqueri, shepi; ⁵⁸yaajeitanaqueri anta ovecaratapaacanta nampitsi. Irosati ipichaanajeitantacariri. Yora pichaaqueriri, isapocaquero yoicoro, yoaquero iitiqui Saoro, icantiri:

—Pamenenaro noicoro, nompichaavaquerita.

Icantiri:

—Ari.

Evancari ini Saoro iriori. ⁵⁹Ari ipichaanotaqueri Ishiteva, irosati iquenquetsatanacari Tasorentsi, icantanaque:

—Novincatsarite Jesoshi, paavajero noshire.

⁶⁰Itiyeroanaca, antearojenca ineanatanaque, icanti:

—Novincatsarite, te oncameetsate oca yantajeitaqueri, iro cantaincha eiro piquishimentiritsi.

Irootaque icantaqueriri, irosati icamantanaca, torein. Icantanaque Saoro iriori:

—Ariove, camanirotaque ini; inearove.

Ijati quemisantatsiri anta Samariaqui.

8 ¹Irosatiquea intantanacari iquisajetiri quemisantatsiri anta Jerosarequi. Itoncajeitanaca maaroni, ishiajeitanaca Joreaqi, aisati Samariaqui. Irinti timajeitanaintsi yora iroamerepeeni Jesoshini. ²Ari itijaqueri Ishitevani. Irio tijaqueriri quemisantasanotatsiri. Oshequi iracojeitaqueri. ³Irinti Saoro, icoveta intsoncajeterime yora

quemisantatsiri. Ijatashijeitiri ivancopeequi, inoshicajeitiri shirampari, tsinane, maaroni. Yoiminqueajeitaqueri.

Iquemisantaque savicatsiri otsipapeequi nampitsi.

⁴Yora shiajeitanainchari, iquenaquena-yetanaque otsipapeequi nampitsi. Iquenquetsajeitaquero irineane Tasorentsi. ⁵Yora Jeripi yareetapaaca nampitsiqui, onta Samariaquiniri. Icamantacotapaaqueri Quirishito. ⁶Iquemajeitantacariri, aisati inajeitantacariri itasoncantayeti, iquemisantasanojeitavaqueri atiripee. ⁷Yoavisacojeitiri oshequi neiriri camaari, antearojenca icajemajeitanaque camaaripee, irosati iجاتantanaja. Yoavisacojeitiri oshequi choriveetatsiri, aisati amashitachari iitiqui. ⁸Irosati iquimoshirejeitantanaca yora savicajeitatsiri nampitsiquinta.

⁹⁻¹¹Itimi aisati anta shirampari pajitachari Shimo. Peerani oshequi osarintsi isheripiariveitani. Yoajeivetarini cavaco maaroni samariasati, irootaque ishemetantacari oshequi. Ipincatsajeivetacari atiripee: pincatsaripee, iratiritepee, maaroni. Icantajeiti:

—Tempa iriotaque Shimo yoca matirori itasorencia Tasorentsi. Tempa irio pincatsaritatsiri. Tsame ampincatsajeiteri.

¹²Iro cantaincha impoiji yareetapaaca Jeripi, icamantacotaqueri Tasorentsi, jaoca icanta ipincatsariventanti. Aisati icamantacotaqueri Jesoquirishito. Ari ivaotisaajeitaqueri quemisantajeitaintsiri: shirampari, tsinane, maaroni. ¹³Aisati iquempetaja Shimo iriori, iquemisantaji, ivaotisataja. Impoiji quiso yoanaqueri Jeripi. Ineacoyetaqueri paitarica yantayetaqueri, aisati itasoncantasanoyeti. Irosati yoantanacari cavaco.

¹⁴Yora iroamereni Jesoshi savicatsiri Jerosarequi iquemacojeitaqueri samariasati, iquemisantajeitaquero iriori irineane

Tasorentsi, irosati itiancantacariri Petero, jeri Joa. ¹⁵Ijajeitanaque anta. Icantiri Tasorentsi: “Pintasoncacoventajeiteri samariasatipee, quiso oajeitanteeriri Pishire”. ¹⁶Iro cantaincha tequerata quiso oajeiteri, apatiroquera ivaotisitamentajeitacari Avincatsarite Jesoshi. ¹⁷Ari yajiricainatapaqueri iitopeequi, irosati yaashirejaitancaro Ishire Tasorentsi, otasoncacaajeitaqueri. ¹⁸Inecotaqueri Shimo. Iotanaque ariorica yajiricainatapaqueri, yaashirejaitaquero iriori Ishire Tasorentsi, irosati icantantacari:

¹⁹—Jerica quirequi, nocoaque poame-tena nontasoncante narori, nonquempe-tempi avirori. Nocoaque ariorica najiricainateri noshaninca, iraashirejei-tantearori Ishire Tasorentsi.

²⁰Icantanaqueri Petero:

—Pijate Sharincaveniqui, paanajeri aisati piirequite. Pijitashivetaca avirori ari pamanan-tero itasorenca Tasorentsi: apaniro imatacanti Tasorentsi. ²¹Tecatsi pincantea pinquempe-tena: ioti Tasorentsi te pincameetsashireteji. ²²Te oncameetsateji oca piquenqueshirevetacari. Pinquenqueshiretanaquea, pojoquero caari cameetsatatsi pantayetiri. Pincanteri Avincatsarite: “Pincavintsayena”.

²³Niotaquempi, oshequi pishemeti, aisati pashi poi-ro te pincameetsateji.

²⁴Yacanaqueri Shimo, icanti:

—Pincanterite Tasorentsi incavintsaya-ncanteataquea eiro nojatantatsi Sharincaveniqui.

²⁵Yora Petero aisati Joa, icamantacotiro irineane Avincatsarite, iquenquetsacotiro. Iquenayetanaque oshequi nampitsipeequi Samariaqui, icantajeitiri savicajeitsiri:

—Ariorica pinquemisanteri Jesoshi, iroavisacotempi Tasorentsi, irajeitanacu-tempi inquitequi.

Irosati ipiajeitantanaja Jerosarequi.

Iquemisantaque etiopiasati.

²⁶Ari ineanatiri inampire Avincatsarite, icantiri Jeripi:

—Meecca pijatanaque, pinquenanaque anta avotsiqui quenantachari caaraiteriqui: ora poneachari Jerosarequi, jatatsiri irosati Casaqui.

²⁷Ari ijatanaque, iquenanaque avotsiqui. Itonqui otavacari shirampari poneachari Etiopiaqui. Aitsoquireari ini. Irisati ovincatsaririnte Cantasheshi, yora quempeyinirori maaroni oirequite. Irootaque iroori ivincatsarite etiopiasati. Ari ijaiti anta Jerosarequi, iquemisantatiri Tasorentsi. ²⁸Meecca ipiaja, isavicaque ishiacomentoqui, ineanatiro isanquenareni Isayashini, camantantaveitachaniri. ²⁹Iro Ishire Tasorentsi cantaqueeriri Jeripi:

—Pijate anta, pintonqui otavaquearo shiacomentotsinta.

³⁰Ishishitanacari, iquemapaaqueri ineanatiro. Icantapaaqueri:

—¿Piotaquerompa oca pineanatiri?

³¹Yacanaqueri:

—Teve nioteroji. ¿Jaoca noncanteari niotantearori? Tecatsi oametenarone. Pintetapeempa, pisaviquimotapeena aca.

³²Jero oca ocantiri sanquenarentsi ineanatipairi: “Ariorica yoyeetiri ovisha, imajeretashitanaca. Ariorica yameeyeetiri ovishajaniqui, imajeretashita. Aisati inquempeteari Quirishito iriori, irimajere-rite. ³³Iroashiventeeteri, eiro otampaticatitsi incantacoyeeteriri. Impoiji iroyeeteri. Eiro itimitsi irinti itomipee”.

³⁴Isampitiri:

—Pincamantenate. ¿Janicampa iquenquetsacotiri yora camantantatsiniri? ¿Irisatimpa quenquetsacotashitacha? ¿Pashinimpa iquenquetsacotiri?

³⁵Irosati icamantantanacari Jeripi, icamantacotiri Jesoshi. Ijivataqueneri ocantiri ora Sanquenarentsi, yoametasanotaqueri. ³⁶Aiquero ijatacairiri avotsiqui, irosati ineanapaacaro nija. Icantaqueeri:

—Jero oca nija. ¿Cameetsanimpa novaotisatea?

³⁷Yacanaqueri:

—Piquemisasantanotiririca Quirishito, cameetsa pivaotisataquea.

Icantiri:

—Noquemisanti. Iriotaque Jesoquiri-shito Itomi Tasorentsi.

³⁸Yoatiaquero shiacomentotsi. Ari yaniireajeitanaque, itsipatavacaanaca apite, yaniijatanaquero nija, ivaotisata-queri. ³⁹Ari yaatanaji, irosati quiso oantanacari Jeripi Ishire Avincatsarite. Te irineavajeriji aisati yora itsipavetacari. Apaniro yovaanaja iriori, iquimoshiretanaque. ⁴⁰Irintiquea Jeripi inecotashitapaaca nampitsiqui anta opajitanta Asoto. Ari yovaanaca, iquenquetsayetanaque nampitsipeequi:

—Pinquemisantajeiteri Quirishito pavisacojeitantajeari.

Irosati yareetantanaja anta Sesareaqui.

Ipashinitantajari Saoro.

9 ¹Ari yashi yoiro iquisa Saoro.

Isareavetacari iroajeiterime maaroni quemisantajeitiriri Avincatsarite. Irosati ijatashitantacari ivincatsarite saserote, icantiri:

²—Nocoaque pisanquenateneri yora quemisantaajeitiriri ajorioririnte anta Tamashicoqui, pincerite: “Pamitacojeiteri Saoro iraaajeiteri maaroni quemisantajeitiriri Jesoshi. Nocoaque iraaajeiteri: shirampari, tsinane, maaroni. Impoiji irosojeiteri, iramajeiteri aca Jerosarequi”.

Ari isanquenatiniri, ipavaqueri. ³Impoiji ijatanaque, icantanaca, icantanaca: irotapaintsi Tamashico. Omapocapaaqueri amorecatsiri, amorecacotapaaqueri, morec: oponeaca inquitequi. ⁴Iparianaque quipatsiqui, tiricn, iquematiro irineane Jesoshi:

—Saoro, Saoro: ¿paita piquisantanari?

⁵—¿Janicampi, Novincatsarite?

⁶—Narotaque Jesoshi, piisane. Pijate, povaanaquea nampitsiqui. Coajica incamanteetempi paitarica panteri.

⁷Ari icatijaiteitaca yora shirampari itsipajeivetacari, yoajeitacave. Iquemashitacaro irineane, iro cantaincha tecatsi irinee. ⁸Iriori Saoro, icatianaja. Yoquireavetanaja, te irimatajeaji iramenaje, irootaque yacatsatanajariri, yareetacaacari Tamashicoqui. ⁹Ocarati isavicashitaca mava quitaitei. Te irineajeji, te iroajeaji, te irirajeji.

¹⁰Ari itimiri anta Tamashicoqui quemisantatsiri, pajitachari Ananiashi. Ineashitavacari Avincatsarite, icantapaa-queri:

—Ananiashi.

Yacanaqueri:

—¿Paita, Novincatsarite? Ainirona aca. Icantiri:

¹¹—Meeca pijate anta avotsiqui ipajiyeetirinta: “Tampaticari”. Pincoapaa-queri shirampari pajitachari Saoro, yora tarisatosi. Pincoapaaqueri anta ivancoqui Jorashi. Ainiro iriori, iquenquetsatacaana. ¹²Nomishitacaacari, ineaquempi piqueashitapaaqueri, pajiricainatapaa-queri; inea yamenanaji.

¹³Yacanaqueri:

—Oshequi noquemacotiri, iquenquetsatocoyeetiri yora picantaquenari. Oshequi yoashinoncaajeitiri quemisantajeitimpiri anta Jerosarequi, icantirive. ¹⁴Tempa itianquiri aca yora jivatacaajeitiriri saserote iraajeitantaquenari, maaroni aventajeitimpiri. Oshequi notsarooaacari.

¹⁵Iro cantaincha icantiri:

—Pijate. Tempa iriotaque nocoyea-queri. Iriotaque quenquetsatocotajeneri. Inquenquetsatacaajeiteri joriopee, pashinisatipee atiri, pincatsaripee, maaroni. ¹⁶Aisati nonijayeri jaoca oncarate irineacatsitimentena.

¹⁷Ari ijatanaque Ananiashi, iqueapaaque pancotsiqui. Yajiricapaaqueri, icantiri:

—Saoro, avirotaque noyemisantari-rinte. Itiancaquena Avincatsarite Jesoshi,

yora onijaaquempiri anta avotsiqui piquenapaaquenta. Itiancana pamenantajeari, quiso oasanotantempiri Ishire iriori.

¹⁸Irosati opariantanaja iroquiquiniri shiavetarori iventaqui shima, yamenasannotanaji. Ari ijatanaque, ivaotisataca.

¹⁹Aisati yoaja, ishintsitanaji. Aparopee quitaiteri itimimovetanacari quemisantatsiri anta Tamashicoqui. ²⁰Impoiji icamantantayeti anta pancotsiqui yapatojeitanta joriopee. Icantapinijeitiri:

—Iriotasantaqueyeata Jesoshi Itomi Tasorentsi.

²¹Yoajeitanaqueri cavaco yora quemajeitavaqueriri. Icantajeiti:

—Tempa iriotaque yora tsoncajeiterine-meri quemisantatsiri anta Jerosarequi. Tempa irootaque ipocashitantavetacariri aca iroisojeiterime quemisantiriri Jesoshi, irajeitanaquerime anta saserotepeequinta.

²²Aiquero ijatatiini Saoro iquenquetsati, tecatsi intsaroacaimateari. Yoajeitavaqueri cavaco yora joriotatsiri. Iotacaasantaqueri, icanti:

—Yora Jesoshi, iriotaque Quirishitotsiri.

²³Ari avisanaque oshequi quitaiteri, irosati isareantajeivetacari iroyerime.

²⁴Iro cantaincha iotacotaqueri Saoro isareacari. Maaroni quitaiteriqui, tsiteniriqui, yamenajeivetacaro joriopee iqueantapinitari nampitsi, icoajeivetaca iravaquerime Saoro, iroyerime. ²⁵Iro cantaincha, osaita yaanaqueri iroamerepee tantotsiqui, ora shoncarori nampitsi; yataitacaanaqueri, impoiji yoaniireacojeitajiri cantiriqui araquerora. Irosati ishiantanaja, te irineajeitavajeriji oyerine-meri. ²⁶Ari yareetapaaca Jerosarequi. Icoaveta intsipajeitapeemparime quemisantajeitatsiri, iro cantaincha itsaroacaajeitavacari. Ijtitashivetacari te inquemisanteji.

²⁷Impoiji yaanaqueri Verenave, ijivatanaqueri anta itiminta iroamereni Jesoshi. Icamantapaaqueri:

—Queario, irajeiterime Saoroca ayemisantaririnte anta Tamashicoqui, iro cantaincha anta avotsiqui ineaqueri Avincatsarite, iquenquetsatacaaqueri. Iquemisantaque, impoiji anta Tamashicoqui iquenquetsatacotapinitiri Jesoshi, te intsaroacayeariji tseencantatsiri.

²⁸Ari yaacameetsajeitaqueri quemisantatsiri, cameetsa itimimotaqueri iriori anta Jerosarequi. Icantani Saoro, quiso yoajeitaqueri ayemisantaririnte. Cameetsa iquenquetsatacotasanotiri Avincatsarite. ²⁹Iquenquetsatacaajeivetacari joriopee iotirori quirieco, iro cantaincha ipiatsajeitavacari; icoajeivetanaca iroyerime, ³⁰iro cantaincha iotacotaqueri iyemisantaririnte, irosati yaantanajari Saoro anta Sesareaqui. Impoiji itiancajeitakueri Tarisoqui.

Itasoncantayeti Petero anta Iriraqui.

³¹Cameetsa itimajeiti quemisantaajeitatsiri anta Joreaqui, Carireaque, Samariaqui. Aiquero ijatatii iquemisantaajeitanaque. Yamejeitaca ipincatsajeitiri Avincatsarite. Aisati oshequi oveshiraecaasanojeitacari Ishire Tasorentsi. ³²Ari iquenaquenayetanaque Petero iquivantayetiri quemisantayetatsiri, irosati yareetantacari Iriraqui. Anta isaviqui oshequi quemisantatsiri. ³³Ineapaaqueri shirampari pajitachari Eneashi. Ocarat osarintsi 8, inareaca imaamentoqui, ichoritaque. ³⁴Icantapaaqueri:

—Eneashi, iriotaque Jesoquirishito oavisacotajempine. Pincatianaje, povetsicajero pimaamento.

Jentsipaite itinaanaja. ³⁵Ineajeitaqueri irirasati, jeri saronasati; irosati iquemisantaajeitantanajari Avincatsarite.

³⁶Otimaveta Jopequi quemisantatsiri pajitachari Tavita. Acanti aneanequi

arori: Maniro. Cameetsa oca antayetiri: ashi oiro intacotantayeta. ³⁷Omansiatanaque, impoiji ocamaque, torein. Ari iquivatsempequiyeeataquero ovatsani, impoiji yoaquero anta shitamencotsiqui, onta jenioquijiniri. ³⁸Jero Irira oquempejitaro Jope. Yora quemisantajeitatsiri, iquemacotaquero Petero, inapaaque anta. Itiancaquero apite shirampari:

—Pishintsite, pincantaitei Petero impoque.

Ari ijataque, icantasanotapaaquero:

—Pishintsite poijatanaqueña pamenapeero tsinane, camaque oni.

³⁹Ari ijatanaque Petero, yoijatanaquero. Yareetacaacari, yaanaquero anta pancotsiqui jenioquiji. Oshonquimentajeitacaro maaroni camajimentaaro, irajeitaca. Onijaayetiri oicoropee, aisati oitsaaresanoripee. Ocantajeitaque:

—Tequerani oncameni Tavita, otijayetanaroni maaroni ocapee.

⁴⁰Ari yomisoquijapaaquero maaroni atiri. Itiyeroanaca, iquenquetsatacairi Tasorensi. Iptsocashitanacaro camaintsiri, icantiro:

—Tavita, pintinaanaje.

Oquireanaji, oneaquero Petero, irosati osavicantaja. ⁴¹Yaavacotiro, yoatijairo. Icajemajeitiri aisati quemisantajeitatsiri, aisati iroori icajemajeitiro camajimentaaro, maaroni. Icantajeitavaquero:

—Jero, aneanaji.

⁴²Ari iquemacojeitaquero maaroni jopesati. Icarati oshequi quemisantayetanajiriri Avincatsarite. ⁴³Oshequi quitaitei isaviqui Petero Jopequi. Isaviqui ivancoqui Shimo, yora vetsicapinitiriri meshinantsi.

**Iquemisanti Coronerio,
yora capitantotsiri.**

10 ¹Ari itimaiti anta Sesareaqui shirampari pajitachari Coronerio. Iriotaque iyapitanote oshequi soraro,

poneayetachari Itariaqui. ²Quemisantasanotatsiri ini, ipincatsatiri Tasorensi. Aisati iquempejeitari maaroni ishanincapee iriori, saviquimojeitiriri. Oshequi icavintsajeitiri atiripee. Icantani iquenquetsatacairi Tasorensi. ³Ishaavijitanaque catsirincaitei ineashitavacari inampire Tasorensi, iconijatasanotapaaque. Iquempejitapaaquero, icantapaaquero: —Coronerio.

⁴Yamenasanotavaquero, sorerere. Itsaroasanotanaque catsini. Icantavaquero:

—¿Paita, Novincatsarite?

Icantiri:

—Iquemaquempi Tasorensi piquenquetsatacaapinitaqueri, aisati ineaquempi pintacotapinijeitacari atiripee. ⁵Icoaque meca pintianque aparopee shirampari anta Jopequi. Pincajemacanteri yora Shimo, ipajiyeeitiri aisati Petero. ⁶Irio isaviquimotiri pajitachari aisati Shimo, yora vetsicapinitiriri meshinantsi. Otimi ivanco otsapijaquic incajare.

⁷Ari ipianaja inampire Tasorensi, yora neanaitiriri. Icajemaquero Coronerio inampire apite, aisati soraro aparo. Quemisantasanotatsiri ini soraro. Icarajeitiri amitacojeitiriri Coronerio. ⁸Icamantajeitacuero maaroni oca icantaqueriri inampire Tasorensi, impoiji icantiri: —Nocoaque pijajeite Jopequi, pamenaiteri yora Petero.

Ari ijajeitanaque. ⁹Oquitaitetamanaji, itampaticatapaaque catsirincaitei. Iquenapaaque, irosati iquempejitantapaaquero nampitsi. Iriori Petero, yataitanaque jenoqui, iquenquetsatacairi Tasorensi. ¹⁰Itasheavetaca, icoaveta iroyeame. Ainiroquera oveysiquiniri iroyeari, omapocapaaquero ineashitacaro. ¹¹Ineaquero inquite tsompoina.

Oaniimaotapaaca quipatsiqui shiavetarori tocoya antearo. Yajiriqueetaquero anta ocaramaotapaaque. ¹²Iteyeta yora caari

yoyeeta; jeri iteyetaca maranquepee, vanquiyetachari, maaroni. ¹³Iquemavaqueri Tasorentsi, icantiri:

—Petero. Jeri yoca, poyeri, impoiji poyeari.

¹⁴Icantanaqueri:

—Novincatsarite, eiro noaritsi. Te nameteariji caari yoyeeta, caari icoacayeetana noyearchi.

¹⁵Yapiitajiri:

—Tempa narotaque Tasorentsi, nocamantimpi nainti: “Cameetsari ini, poyeari”. Eiro picantashitaritsi avirori: “Te incameetsateji”.

¹⁶Yapiitajiniri aisati:

—Poyeri, poyeari.

Irosati yoancacotanteetajariri jenoqui.

¹⁷Te iriotacoteroji Petero oca ineaqueri.

Irosati yareetantapaaca pancotsiqui itiancane Coronerio. Isampitacotapaaqueri:

—¿Jaoca ivanco Shimo, yora vetsicapinitiriri meshinantsi?

Icamanteetiri:

—Irootaque oca ivanco.

¹⁸Ari isampitajiri:

—¿Ariompa isaviquimotimpiri yora Shimo Petero?

Icanteetiri:

—Je, aitaque isaviquiri.

¹⁹Irosatiquera iquenqueshiretiro Petero ineaqueri. Ari ocantaqueri Ishire Tasorentsi:

²⁰—Jerijeitapaaque shirampari,

coimpiri. Pijate, paniireashitanaqueri. Eiro picantashiretitsi, poijajeitanaqueri. Tempa narotaque amajeitaqueriri.

²¹Ari yaniireashitapaaqueri, icantapaaqueri:

—Narotaque picoiri. ¿Paita pipocashitantanari?

²²Ari yacanaqueri iriori:

—Itiancaquena Coronerio, yora capitantatsiri. Icameetsashiretasanoti, aisati ipincatsatiri Tasorentsi. Maaroni

joriotatsiri ineametsajaitiri. Icantiri inampire Tasorentsi: “Pincajemacanteri Petero pivancoqui. Pinquemisantavacero irineane”. Irootaque itiancantanari aca.

Ari icantavaqueri:

²³—Pinqueapee.

Ari ineshinoncatavaqueri. Ari oquitaita-manaji yojitanaqueri, itsipajeitanacari iyemisantaririnte aparopee, yora jopesati.

²⁴Aparo imaajeitanaque nianqui, irosati yareetantamanaca anta Sesareaqui.

Yoyeaqueri Coronerio anta, yapatojeitaqueri maaroni ishaninca aisati itsipapinijetari.

²⁵Iqueapaaque Petero. Yovetsatavacari Coronerio, impoiji itiyeroashitavacari iitiqui. ²⁶Ari yoatijiri Petero, icantiri:

—Pincatianaje. Te naro Tasorentsi, tempa narosati narori atiri, aquempetava-caaca.

²⁷Ari iquenquetsatavacaaca, iqueapaa-queri pancotsi. Ineapaatiiri oshequi apatojeitainchari, ²⁸icantapaaqueri:

—Naro jorio. Piojeiti avirori te irishinetenaji noshaninca nontsipajeitari

pashinisatipee atiri. Aisati te irishinetenaji nonquivanteri. Iro cantaincha

yoametaquena Tasorentsi te oncameetsateji nompinqueri pashini atiri, te

oncameetsateji noncante: “Te incameetsateji”.

²⁹Ari picajemacantaquena, irosati nopocantanaca, te nonquisotanaque. Meeca nosampitempi, ¿paita picajemacantantanari?

³⁰Icantiri Coronerio:

—Ocarati meeca 4 quitaiteri, ishaavijitanaque catsirincaiteri, iquempetaca

meeca. Noquenquetsatacari Tasorentsi aca novancoqui. Noneaqueri aparoni

shirampari, icatiimotapaaquena. Iquitsaataro shipaquireatsiri iitsaare. ³¹Icantapaaquena: “Coronerio. Iquemavaquero

Tasorentsi piquenquetsatacaqueriri. Iotaquempi pintacotantayeta. ³²Pintian-

que anta Jopequi, pincajemacanteri Shimo, ipajiyeetiri aisati Petero. Isaviquimotiri itsipa Shimo, yora vetsiquiriri meshinantsi. Otimi ivanco otsapijaqui incajare”.³³Intsipaita nocajemacantaquempí, irosati pipocantacari. Meeca nocarajeitaqueri iriori Tasorensi aca. Nocoajeitaque nonquemajeitero oca inintacaaquempiri Avincatsarite.

³⁴Ari ineaveetanaque Petero iriori, icanti:

—Meeca niotasanotaque te irinashitacajeiteji Tasorensi, tempa icanti: “Piquempetavacaajeitaca, eiro pipincavacaajeitatsi”.³⁵Te inquenqueshiretacoteeroji onashiyetarica aneane aisati ameyetari, irointi inecameetsajeitaqueri maaroni pincatsajeitiriri, aisati maaroni antapinitirori cameetsayetatsiri.³⁶Naro jorio. Piojeitavaquero irineane Tasorensi ijivajeitaquena, iotacaaajeitaquena. Cameetsa oca icamantaquenari: “Ariorica pinquemisantajeiteri Jesoquirishito, cameetsa nosavicacaajeitempi, pinquempetavacantajeiteari”. Tempa iriotaque Jesoshi Avincatsarite maaroni,³⁷piojeitaquero. Ijivataque Joani iquenquetsataco- taqueri, icanti: “Cameetsa pivaotisati- mentajeiteari Quirishito”. Impoiji iquenquetsataco- taqueri itsipapee, intanacaro anta Carireaque. Yovaacaanacaro maaroni nampitsipeequi anta Joreaque.³⁸Icamantajeitiri atiri jaoca icantaqueriri Tasorensi Jesoshi, yora nasaretasati, itiancantacariri Ishire, aisati ipantacariri itasorena; irootaque iquenaquenayetantacari, yantantayetacari cameetsayetatsiri. Yoavisacojeitiri neajeitiriri camaari. Quiso yoiri Tasorensi, irootaque imatantacariri.³⁹Noneajeitaqueri yantayetiri anta inampipeequi noshaninca, aisati anta Jerosarequi. Noneaqueri yoanteetacariri, ipajacotan- teetacariri coroshiqui.⁴⁰Omatapaaque quitaiteiri itinaajiri Tasorensi, yonijaaja-

nari.⁴¹Te ironijaajeiteriji maaroni, narojeitaque nainti, yonijaajiri. Icoyeaquena Tasorensi, irootaque noneantavajariri. Icamasanovetaca, itinaanja aisati. Impoiji noacaavajari, aisati niracaavajiri.⁴²Incantaquena: “Pincamantajeiteri atiri: ‘Inintacaaqueri Tasorensi Jesoshi incantacoventajeiteri maaroni atiri: aneatsiri aisati camaintsiri’”.⁴³Tempa peerani iquenquetsatacotirini Quirishito yora camantantatsiniri, icantajeitini: “Ainiro yantajeitaquero maaroni atiri caari cameetsatsi; iro cantaincha ariorica inquemisanteri Quirishito, incavintsaajeiteri irinti, eiro iquishimentiritsi yantajeitiri, eiro iquenqueshireacotiritsi”.

⁴⁴Ainiroquera iquenquetsati Petero, irosati opocashitantacari Ishire Tasorensi. Aisati opocashijeitaqueri maaroni quemajeitavaquerori icantaqueriri.⁴⁵Ari yoajeitanaque cavaco yora jorio, quemisantatsiri: yora tsipatariri Petero. Ari irojeitaque itiancasanotaquero Tasorensi Ishire, quiso oantacariri pashinisati atiri. Irootaque yoajeitantanacari cavaco.⁴⁶Iquemajeitavaqueri ishaninca Coronerio ineanatantashitanacaro pashinipee neantsi, aisati icantajeiti:

—Cameetsa ini Tasorensi.

Ari icantanaji Petero:

⁴⁷—Iquemetaquee arori, yaashirejeitaquero Ishire Tasorensi. Tempa ocameetsati irivaotisajeitea.

Icantiri itsipapee jorio:

—Je, cameetsataque.

⁴⁸Irosati icantantariri Petero ishaninca Coronerio:

—Pivaotisatimentajeiteari Jesoquirishito, iriojeitantempiri atiri pipincatsajeitaqueri.

Icantajeitanaqueri:

—Jentsiqueti pivaotisatena.

Ari ivaotisajeitaqueri. Impoiji icantajeitavaqueri:

—Pisaviquimotanaquenatsita aparopee quitaitei, poametasanotajena aisati.

**Iquemajeitaque jerosaresati
iquemisantaque itsipapee atiri.**

11 ¹Iquemacojeitakeri joreasati: jeri yora itiancanepee Jesoshi, jeri maaroni quemisantajeitatsiri. Icamanteetiri:

—Iquemisantaqueri Jesoshi pashinisati-pee atiri; irio quemisantaajeitakeriri Petero.

²Itoncantanajari Petero Jerosarequi, iquishmentajeitavaqueri ijorioririnte: quemisantsiri inaveta. ³Icantajeitavaqueri:

—¿Paita pijatashitariri pashinisati atiri? ¿Paita poimotantariri iriori? Te oncameetsateji.

⁴Itsoteasanotaqueneri Petero, icantiri:

⁵—Meeca noncamantempi. Anta notimaitinta Jopequi, noquenquetsacairi Tasorensi. Noneashitavacaro, noneaquero shiavetarori tocoya antearomaronca. Yajiriqueetaquero anta ocaramaoyetapaaque, oponeaca inquitequinta, oaniimaotimotapaaquena.

⁶Namenasanotavaquero sorerere:

noneaqueri caari avajeita: chancho, maranque, vanquiyetachari, maaroni.

⁷Noquemaqueri Tasorensi, icantaquena:

“Meeca poyeri; poyeari”. ⁸Iro cantaincha nocantavetacari: “Novincatsarite, eiro noaritsi. Te nameteariji caari yoyeeta, caari icoacayeetana noyeari”. ⁹Apitetaque Yapiitaquena, icantana: “Tempa narotaque Tasorensi cantimpiri: ‘Cameetsari ini’. Eiro picantashitaritsi avirori: ‘Te incameetsateji’”. ¹⁰Aitaque apiitaca mava. Irosati ovancantanaja inquitequi.

¹¹Irosati yareetantapaaca mava shirampari anta pancotsiqui notimaitinta. Iponeanaca Sesareaqui, itianqueetaqueneri. ¹²Irosati ocantantaquena Ishire Tasorensi: “Pojatanaqueri, eiro piquiso-

tanaquetsi”. Ari noijatanaqueri. Aisati yojatanaquena iriori ayemisantaririnte, icarajeiti 6. Noqueajeitapaaque ivancoqui yora cajemacantaqueneri. ¹³Iquenquetsatacaavaquena, icamantavaquena jaoca icantacari ineantacari inampire Tasorensi. Yonijantapaacariri, icantiri: “Pintianque anta Jopequi. Pincajemacanteri Shimo: ipajiyeetiri aisati Petero.

¹⁴Iriotaque oametapeempirone irineane Tasorensi, pavisacotantajeari. Aisati inquempejeitajea iriori maaroni pivancoquiniri”. ¹⁵Nintantacarori noquenquetsatacaqueri, ari opocashijeitakeri Ishire Tasorensi. Oquempetacaajeitaquee

intantaqueeri arori. ¹⁶Noquenqueshiretanaquero irineane Avincatsarite icantitacari: “Yora Joa ivaotisantaroni nija, irompa nainti nontianquempiro Ishire Tasorensi”. ¹⁷Peerani aquemisantajeitantariri Avincatsarite Jesoquirishito, itiancaqueero Tasorensi Ishire. Meeca imoncaratajiniri iriori itsipapee atiri. ¿Arimpa nontsaneaqueeri? Tempa irio Tasorensi.

¹⁸Iquemajeitantavacarori oca, tecatsi incantanaqueri impiateari, irointi icantajeiti:

—Cameetsa ini Tasorensi. Tempa icoacairi aisati pashinisatipee atiri iquenqueshirejeitiri, irijajeitantajeari iriori anta jenoqui.

Icamantanti anta pashinipeequi nampitsi.

¹⁹Ari iquisacoyeetanacari Ishitevani. Meeca iquisheetanaqueri maaroni quemisantajeitatsiri, irosati ishiajeitanta-naca pashinipeequi quipatsi: Jenishiaqui, Tsipirequi, Antioquiaqui, maaroni. Anta te inquenquetsacayeriji pashinisati atiri, irinti itsatayetiri ijorioririnte. ²⁰Ainiro iconoayetacari itsipapee quemisantsiri, poneayetainchari Tsipirequi, jero Shirenequi. Yareetantanacari irinti anta Antioquiaqui, iquenquetsatacaapaqueri caari jorioyetsati. Icantajeitiri:

—Pinquemisantajeiteri Jesoquirishito pavisacotantajeiri.

²¹Itasoncacoventapinitiri Avincatsarite, itimantacari oshequi catsini quemisanta-jeitavaqueriri, aventajeitariri. ²²Ari anta Jerosarequi iquemacojeitaqueri quemisantatsiri. Itiancaqueri Verenave anta Antioquiaqui. ²³Yareetapaaca iriori, iotapaaqueri ineshinoncatiri Tasorentsi. Iquimoshiretapaaque, icantajeitiri:

—Quearioyeya, quiso poajeiteri yora Avincatsarite, pinquearioventeneri maaroni icoacaajeitimpiri.

²⁴Cameetsari ini iriori Verenave. Quiso yoasanotiro Ishire Tasorentsi, yashi yoiro quemisantasanoi. Aisati aiqhero ijatati yoshequiajeitanaque quemisantajeitiriri Avincatsarite. ²⁵Impoiji yovaanaca Verenave Tarisoqui, icoapaaqueri Saoro. Ineapajiri, irosati yoiyantajariri Antioquiaqui. ²⁶Anta yapatotapinitirinta quemisantatsiri. Icantani, ocarati aparoni osarintsi. Yoametapaaqueri oshequi catsini atiri. Aitaque anta intanacaro ipajiyeeitiri quemisantatsiri: “Quirishitia-notatsiri”.

²⁷Irosati yareejeitantapaaca Antioquiaqui pashini camantantatsiri, iponeanaca iriori Jerosarequi. ²⁸Icarataqueri aparoni, pajitachari Acavo. Icatiapaaca anta yapatojeitanta, oametaqueri Ishire Tasorentsi, icantantari:

—Coajica intasheajeitanaque atiripee anta Joreaquei.

Ainironi ipincatsariventanti Caraorio, omoncarataja icantitaniri Acavo.

²⁹Icantajeiti quemisantatsiri:

—Tsame ancavintsaajeiteri ayemisantaririnta anta Joreaquei, ampacanteri paitarica icoajeitiri. ³⁰Jaocarica ocarayetiri timimoyeteeri, aitaque oncarate ampacantayeretiri.

Aitaque imataquero icantaqueri. Yapatotaqueri quirequi, ipavaqueri Verenave, jeri Saoro. Icantaqueiri:

—Jeri yoca quirequi: paajeitanaqueneri quenquetsatacantatsiri anta Jerosarequi, incavintsaajeitanteariri ashinoncaajeitachari.

Ari yaanaqueneri jerosaresati, ipapaaqueri quenquetsatacantatsiri. Ari yovaajeitanaqueneri iriori ashinoncaajeitachari.

Eroreshi Aquiripa, iriotaque quishiriri quemisantatsiri.

12 ¹Impoiji yora pincatsari Eroreshi iquisayetaqueri aparopee quemisantatsiri. ²Yoacantaqueri Santiaco, iro ipesantetacariri saviri, peti. Irio irirentini Joa. ³Ionirotaque Eroreshi onimojeitakeri joriotatsiri, irootaque yaacantantavetacariri Petero aisati. ⁴Iro yaacantantacariri quitaiteri yoantapiniyeetarori tanta caari tapiacha. Ijitashive-taca ariorica omoncarataquea quitaiteri Yavisantaniri, iramenacojeiteri joriopee iroyeri. Yaaqueri, impoiji ipaqueiri 16 soraro, irishentanteariri. ⁵Ari yominqueaqueri. Yora quemisantatsiri iquenquetsatacaasanojeitiri Tasorentsi, icantiri: “Poavisacotajeri Petero”. ⁶Ari otsitenitanaque, iro osaitequera iroisoquijerime Eroreshi, iroacaantantearirime. Icoaveta iramenajeiterime atiri incamaque. Ainiro inaveta Petero caravosoqui, imanaque; isatecaqueri apite soraro. Yoisotantacari apite carenatsa. Ishentavetaro ashitacorontsi itsipapee soraro. ⁷Ari imapocapaaqueri anta inampire Avincatsarite. Oconijaiteshitimotanacari. Itincapaaqueri imerequiqui, icoacapaaqueri. Icantaqueiri:

—Pishintsite pintinaanaje.

Irosati oisoreashitantanaja carenatsa iracoquiniri, yoisotantavetacariri. ⁸Aisati icantiri:

—Pinquitsaatajeya, pisapatotajeya.

Ari iquitsaataja, isapototaja. Aisati icantajiri:

—Pampinaicajearo poicoro, poijatanaquena.

⁹Isoquijanaji, yojatanaqueri. Te irioteji Petero queariosanotaquerica yoavisacotajiri inampire Tasorentsi. Yaamaaca imishitaca. ¹⁰Yavisanaqueri shentavetariri aparo, jeri aisati itsipa yavisanaqueri. Yareetacaro onta ashitacorontsi, onta iquenantapinitari nampitsiqui. Ashitareimotashitanajari. Yavisanaajiro, yovaanaca anta avotsiqui. Irosati injantareantanjari inampire Tasorentsi. ¹¹Iotacotaja Petero, icanti:

—Meeca notasanotaque itiancaquenari Novincatsarite inampire. Yojocaacoventaquena iroyename Eroreshi. Aisati iquempetacoventaquena, yojocaacoventaquena jaocarica incantenameri noshanincapee. ¹²Iquenqueshiretanaquero, irosati ijatantaca ovancoqui Maria, iriniro Joa. Ipajiyetiri Joa aisati Maricoshi. Anta yapatojeitacanta oshequi quemisantatsiri, iquenquetsatacaajeitiri Tasorentsi.

¹³Iposanavetapaaro Petero ashitacorontsi, ora otsapiquiniri: toc, toc. Ari ocatiashivetanacari nampirentsi pajitachari Irore. ¹⁴Iotsatavajiri irineane Petero, oquimoshiretasanotanaque. Iro cantaincha te ashitareanaqueneriji, ainti oshiashitanaca. Ocamantajeitiri quenquetsatacaajeitiriri Tasorentsi:

—Jeritapaaji Petero omoroquinta.

¹⁵Icantajeitavaquero:

—Pishinquiventacateemi.

Aiquero ocantanaitii:

—Queariosanotaque.

Icantaquero:

—Caari ini Petero, irintiata inampire Tasorentsi, amenacoventiriri.

¹⁶Aiquero catsini iposanaitiuro, toc, toc, irosati yashitareantajanari. Ari ineajectavajiri, yoajeitavaquero cavaco, icantavaaajeitanaja:

—¿Jaoca iquenapaajiri?

¹⁷Ari yacotashitanajari, icantiri:

—Pimajerejeite.

Impoiji icamantajeitapaajiri jaoca icantajiriri Avincatsarite, yoimisoquijantajiriri. Aisati icantiri:

—Pincamantaiteri Santiaco, aisati pincamantajeiteri ayemisantaririnte.

Irosati isoquijantanaja, ijatanaji imanapitsatacari soraropee. ¹⁸Oquitaitetamani oshequi icantavacaimentajeitacari soraropee:

—¿Jaocaquea meeca icantanajari Petero?

¹⁹Icoacantavetacari Eroreshi, te irineajeriji. Isampinatiri soraro shentavetariri:

—¿Jaocaqueame iquenanjari?

Yacanaqueri:

—Caa, jaocarica, te nioteji; te noneavajeriji.

Ari iquisaquero Eroreshi soraropee, yoacantajeitacari, shemi. Ari impoiji yojocanaajiro Eroreshi Jorea, yovaanaja anta Sesareaqui, irosati isavicanapaaja.

²⁰Ari anta Tiroqui aisati Shiroqui aajeitacari savicajeitatsiri itashe, te ontimasanoteji iroajeiteari. Peerani icantiri iriori Eroreshi:

—Pincavintsajeitena, nocamicari.

Pimpapinijeitenaro noyari.

Ari ipapinijeivetacari, iro cantaincha meeca iquisajeitacari. Oshequi iquenqueshireajeitanaca tirosati aisati shirosati. Icantavacajeitaca:

—Itsaneapitsajeiteerocari avajeiteari.

Tsame ancanteri Varashito iramitacojeitee ampitsimareacaajeari: tempa iriotaque inampire Eroreshi. Ariorica incanteri, iracameetsajeitajee aisati, eiroquea itsaneapitsatanteerotsi ayeari.

Icantiri Varashito; impoiji icantiri iriori:

—Ari, namitacojeitempi. Noncanteri novincatsarite incajemajeitempi, iracameetsajeitempi.

²¹Ari pashini quitaiteri icajemajeitacari Eroreshi, yaacameetsajeitacari.

Yoaneencaro pincatsari iitsaare, isavicaque anta ivincatsarimentoqui. Oshequi ishemetaque, iquenquetsatacaajetaqueri. Icantiri:

—Eiro piquenqueshirejeitatsi. Nompajeitempi maaroni coiteimojeitaquempiri.

²²Irosati iquimoshirejeitantanaca pocajeitaintsiri, icantajeitaque:

—Te irio atiri aquemajeitaqueri, irinti Tasorentsi. Cameetsa ini.

²³Ari oshequi ishemetaque Eroreshi, iveshirementacaró icantajeitaqueriri atiri. Iro cantaincha ishemaári Avincatsarite, itiancaqueri inampire:

—Te impincatsatenaji Eroreshi. Pijate pojouitacayeari.

Ari ijataque, yojoquitacaacari, impoiji icamanaque, torein, irosati yoantacari quenitsi.

²⁴Irosati iquenacaantayetancaró quemisantatsiri irineane Avincatsarite. Yoshequianaque quemisantajeitatsiri.

²⁵Iriori Verenave, aisati Saoro intacotanta anta Jerosarequi. Irosati ipiantanaja Antioquiaqui, itsipatanajari Joa, ipajiyee-tiri aisati Maricoshi.

Ijati Saoro aisati Verenave anta Tsipirequi.

13 ¹Icarajeitiri quemisantatsiri anta Antioquiaqui camantantatsiri, aisati oametantatsiri: jeri Verenave, aisati Shimo Nijeri. Iroshio shirenesati, Manaemi ishaninca pincatsari Eroreshi, Saoro, maaroni. ²Ari pashini quitaiteri yapatojeita iquemisantajeitiri Avincatsarite, tecatsi iroajeiteari. Irosati icantantacari Ishire Tasorentsi:

—Pincantajeiteri Verenave aisati Saoro: “Pimateneri Tasorentsi paitarica incoacayempiri”.

³Ari impoiji yajiricainajeitaqueri iitoqui, irosati icantantariri:

^{4,5}—Pijate pantero icoacaimpiri Tasorentsi, naroquea canterineri Tasorentsi iramitacotempi.

Ari otiancaqueri Ishire Tasorentsi, irosati ijatantacari anta Sereoshiaqui. Yoijatanaqueri Joa Maricoshi iramitacotantariri. Ari itetapaaca pitotsiqui. Otiancacotiri tampea, iquenacotanaque Tsipirequi. Otimi anta nampitsiqui pajitachari Saramina: yareejeitantapaacari anta, iquenquetsatapaaquero irineane Tasorentsi anta pancotsiqui yapatotapinijeitantari joriopee. ⁶Impoiji itsoteajeitanaquero maaroni nampitsipequi anta Tsipirequi, maaroni. Impoiji yareejeitapaaca Pajoshiqui. Anta ineapaaqueri sheripiaritatsiri, pajitachari Varijesoshi. Jorio ini. Irishiyerime camantantatsiri, icantapiniti:

—Naro quenquetsatirori irineane Tasorentsi.

Ja, itseevani. ⁷Itsipatapinitari pincatsaritatsiri pajitachari Serijio Pavoro. Ainri iotantari iriori. Icajemacantaqueri Verenave, jeri Saoro: icoaque inquemero irineane Tasorentsi. ⁸Iro cantaincha itsaneavetacari yora sheripari: te irinintacaaveteariji inquemisante yora pincatsaritatsiri. ⁹Ari iotacotaqueri Saoro, pajitachari aisati Pavoro. Oametasanotiri Ishire Tasorentsi, yamenasanotanaqueri sheripari, ¹⁰icantanaqueri:

—Pamatavitantasanotaque. Te catsini pincameetsateji: piquempetacari camaari. Te pininteroji cameetsayetatsiri, irointi picoasanotaque pamatavitante. Picoaque pamatavijeiteri maaroni coatsiri irioteri Novincatsarite. ¿Eirompa piquenqueshiretatsi? ¹¹Meeca intasonquempi Novincatsarite pinquitapoajaquitanaque. Osamanitanaque, eiro pamenitajatsi.

Irosati icamarajatantanaca, otsiteniiteacotanaqueri. Ipamipamitanaque, pami, pami; icanti:

—Teve namenajeve. Pancatsatanajenave.

¹²Ari ineavaqueri yora pincatsaritatsiri, aisati iquemiro irineane Avincatsarite, irosati iquemisantantanaca. Icanti:

—Cameetsave oca icamantacotiriri
Avincatsarite.

Yovaanaja camantantatsiri anta Ashiaqui.

¹³Iponeanaja Pavoro Pajoshiqui, itetanaja pitotsiqui, itejeitanaja aisati maaroni icarajeitiri. Iquenacotanaque anta Perejequi, ora Pampiriaquiniri. Iriori Joa yojocanajiri, ipianaja iriori Jerosarequi. ¹⁴Impoiji itsipapee, yovaajeitanaja aisati. Yareejeitapaaca anta pashiniqui Antioquia: ora Pishiriaquiniri. Quitaiteri imaoreantajeitari iqueajeitapaaque pancotsiqui yapatojeitanti, ari isavicajeitapaaque. ¹⁵Ineanyeetiro isanquenareni Moishishi, aisati isanquenareni camantantatsiniri. Yora jivatacantantatsiri anta pancotsiqui, icantavaqueri:

—Noshaninca, pincoaqueric a virori pinquemisantacayeri ashanincapee aca, pincamanteriqueti.

¹⁶Ari icatianaca Pavoro, yacotashitaqueri yojimajerentajeitaqueri. Icanti:

—Noshaninca, ariorica pipincatsataqueri Tasorentsi, pinquemisantajeitavaquena. ¹⁷Meece nonquenquetsatocotempiri Tasorentsi iquemisantiniri Ishiraerini. Peerani icoyeaqueri intacantayetacariniri inquemisanteru. Impoiji, itimantacari ashanincani anta Ejipitoqui, yoshequia-caaqueri. Itasoncacoventajeitiri, irosati ishinetantacari peranavetariri ijajeitanaque. ¹⁸Ocarati 40 osarintsi itimajeiveitani ashanincani anta caaraiteriqui, iro cantaincha oshequi itseencajeitaqueri Tasorentsi. ¹⁹Icoajeivetaca irareejeiteame Cananaqui, iro cantaincha isaviqui pashinisatipee atiri, ticaajeivetavacariri. Inashiyetaca iriori, ocarati irineanepee 7. Impoiji itasoncaventiniri Tasorentsi ashanincani, itsoncajeitaqueri savicajeiveitachaniri. Impoiji ipaqueri ashanincani iipatsite, icantiri: “Jero oca, pisavicajeitanti”. ²⁰Ari ocarataque osarintsi isavicajeitapaaque 450. Te intimeji pincatsa-

riventasanojeiterineri, irinti ijivatashijeivetacarini itsipapee savicacantayetatsiri. Impoiji ijivatacanti yora camantantatsiniri pajiveitachaniri Samoiri. ²¹Impoiji icantaqueri ashanincani Tasorentsi: “Nocoejeitapaaque pincatsariventasanojeitenaneri”. Ari icoyeaqueneri Saoro, ipincatsariventantariniri ashanincani. Iriro iriri iriori Saoro ipajita Shishi. Iriojeitapaaque ishanincapee Vejami. Ocarati 40 osarintsi ipincatsariventantapaaque Saoro, ²²impoiji icanti Tasorentsi: “Eiro ipincatsariventantajitsi aisati Saoro, te incameetsateji, irinti pincatsaritajantsine Iraviri, yora itomi Jese. Irio noneacameetsatanotaqueri, irantenaro irinti maaroni nonintacayeriri”. ²³Iriotaque ishanincani Iravirini oavisacotajeeri: ipajita iriori Jesoshi. Tempa icantini Tasorentsi: “Irio ishanincani Iravirini oavisacojeiterineri atiri”. Moncaratata meece icantitacani. ²⁴Ijivataqueri Joa iquenquetsatacaajeitaquerini maaroni ashaninca: “Pinquenqueshirejeitajee, eiro piquempejeitajatsi peerani, impoiji novaotisajectempe, aisati iroavisacojectempe Tasorentsi”. Impoijiquea iquenquetsatapaaque Jesoshi. ²⁵Iriori Joa irotaintsi incame, ari icanti: “Te narosano yora piquenqueshirejeivetari. Te naro Quirishito oavisacojectempineri, irintiquea impoitapeenaneri. Oshequi nopincatsatanotaqueri narori; irompa nainti, te nompincatsatimateaji”.

²⁶Ari yovaa jiniri aisati Pavoro, icantiri:

—Noshaninca, tempa ashanincajeitarini Avaramani, tsame anquempetasanojeiteari, ampincatsatanotaqueri Tasorentsi. Meece noncamantajeitempe: ariorica ampincatsatanotaqueri Jesoshi, ari iroavisacojectee. ²⁷Te iriojeitavaqueriji jerosaresati, itseencajeitavaqueri. Aisati iquempejeitaqueri ivincatsaritepee, te iriojeiteriji Quirishito ini. Maaroni saavaro ineanatapinijeivetaro isanquena-

yetiniri camantantatsiniri, iro cantaincha te inquemasanotavaqueroji, irootaque caari iojeitantaro oquenquetsacotiri Jesoshi. Iriotaque oquenquetsacotiri Sanquenarentsi: “Iroyeeteri Quirishito”. Ari yoacantajeitaqueri ashanincajei Quirishito, iro cantaincha te irioteriji. ²⁸Tecatsi irantavetea, yoacantashitacari. Icantacoventashitacari Pirato: “Poacanteri”. ²⁹Moncarayetaca maaroni isanquenatacotitacariniri: oshequi yoashinoncaqueri, ipajacotaqueri coroshiqui, icamanaque, torein. Impoiji yoaniireajiri, yoaqueri anta omoroqui imperita. ³⁰Icamasanovetaca, iro cantaincha yoitinaajiri Tasorentsi. ³¹Ari ocarataque oshequi quitaiteri iniJaapinijeitajari iroamere, yora tsipajeitapaajariri chapinqui Jerosarequi: yora poneachari Carireaquí. Iriojeitaque meeca camantajeitiriri atiri.

Jero aisati icantajeitiriri Pavoro:

^{32,33}—Ocameetsataque icamantaqueriniri peerani Tasorentsi ashanincani. Isanquenatacaqueri peeraniniri otimantacari pampoyeantsi, oca apitetaintsiri. Ocantini: “Incantari Tasorentsi Quirishito: ‘Ariorica nontinaajempi noncantajempi notomi’”. Meeca noncamantajeitempi: imataquero Tasorentsi icantaqueriniri ashanincani: yoitinaajiri Jesoshi, ayojeitantacari Quirishito ini. ³⁴Jeroa pashini icantaqueriniri Tasorentsi: “Notiomí, nomoncaratasanotempiro maaroni nocantaqueriniri Iravirini: nontasoncacoventempi pimpincatsaritasanotanteari. Queariotasanaotaque: tempa narotaque cantaquempiri”. Irootaque, noshaninca, piojeitantacari yoitinaasannotajiri Tasorentsi Quirishito, irootaque ipincatsaritasanotantajari. Icamasanovetaca, yoitinaajiri, te impatsayeji quipatsiqui. ³⁵Tempa irootaque oca isanquenataqueriniri pashini pampoyeaveitachaniri: “Tasorentsi, niotaque eiro pishinetiritsi

pitomi impatsaye quipatsiqui: tempa oshequi pineacameetsataqueri”.

³⁶Pinquenqueshireteri peerani Iravirini, imoncarataqueneri Tasorentsi maaroni icoacairiri. Impoiji icamaque iriori, torein. Itijeetaqueri, itsipayeetaqueri ishanincapeeni, irosati ipatsaasanotantana. ³⁷Irompa irinti Jesoshi itinaajiri Tasorentsi, te impatsayeji irinti. ^{38,39}Meeca, noshaninca, piojeitavaquero oca. Ainiro pantajeitaqueri caari cameetsatsi, iro cantaincha aneatsi meeca irinti Jesoshi, icavintsaajeitaquempi. Te incoacayempiji pijajeite Sharincaveniqui, irointi icoaque iroameetsajeitempi, iroavisacojeitempi. Ocari meeca isanquenare Moishishi, tecatsi oncantea oameetsajeitempi. ⁴⁰Paamaventeayea, piquempetaricari yora iquenquetsacotiniri camantantatsiniri icantini: ⁴¹“Pamene, tseencantatsiri, pinquenqueshirejeitanaquea: pijajeiticari Sharincaveniqui. Coajica pineajeitena nontasoncansanotanaque, nomayetero caari pineapinijeiti. Ariorica noncamantaveitempi paitarica nanteri, eiro piquemisanantansi”.

Irootaque icantaqueriniri Pavoro ijorioririnte. ⁴²Ari isoquijajeitanaji, icantasanojeitavajiri:

—Coajica otsipani saavaro pimpocajanteya aisati. Pashini pinquenquetsatacaajeitenaro niotasanoanteari.

⁴³Ari ijajeitanaji. Jeri Pavoro iquenajaji avotsiqui, itsipatanajari Verenave. Yoijajeitanaqueri quemisantatsiri: jeri joriosanori aisati peajanchari jorio. Ari icantaqueri Pavoro:

—Pinquemisantasoteri Jesoshi irineshinoncatantempiri Tasorentsi.

⁴⁴Ari otsipani saavaro yapatojeitaca oshequi nampitsiquiniri. Te irishequiteji caari apatotacha. Yapatotimentaro inquemisantero irineane Tasorentsi.

⁴⁵Yora ivincatsaritepee jorio ineaqueri

apatojeitainchari, irosati ocantimoneen-tantanacari. Icantajeiti:

—Te oncameetsateji oca icantiri Pavoro, aisati te incameetsateji iriori. Oshequi yamatavitanti.

⁴⁶Cameetsa yacasannotanaqueri Pavoro, jeri Verenave. Te intsaroashiretanaqueji, icanti:

—Avirojeitaque nintavetacari nocamantajeivetaquempiro irineane Tasorentsi, iro cantaincha pitseencava- quero avinti. Meeca niotaque te pincoyeji pincantaitatitempani paneasanotaje anta inquitequi. Meeca nojatashiteri irinti pashinisati atiri, niotaque inquemisante irinti. ⁴⁷Irootaque nojatashitantariri, tempa icantitaquena Novincatsarite: “Tempa avirotaque notiancaqueri pincamantayeteri pashinisatipee atiri, iravisacotantajeari iriori. Pinquenquetsatacaajeiteri maaroni, pintsoteajeitana- quero maaroni nampitsipeequi”.

⁴⁸Iquemantajeitavacari yora caari joriotatsi, iquimoshirejeitanaque. Icantajeiti:

—Cameetsa oni irineane Avincatsarite.

Ari itimi oshequi caari joriotatsi icoyeaqueri Tasorentsi intime inquitequi, incanteani: iriojeitaque quemisantajeitain- tsiri, maaroni. ⁴⁹Otsoteayetanaca irineane Avincatsarite maaroni nampitsipeequi anta.

⁵⁰Irinti ivincatsarite jorio, oshequi iquisajeitanaca. Ijatashijeitiro quemisan- tincaro shanincatacariri savicacaantaye- tatsiri, aisati ijatashijeitaqueri savicacaantajeitatsiri iriori. Icantajeitiri:

—Tsame, anquisajeiteri yora Pavoro, jeri Verenave. Te incameetsateji.

Irosati itiancantajariri:

—Tsame pijajeitaje. Eiro pipocajitsi aisati aca nonampiquica.

⁵¹Ari iriori, ipacaraanajiniri quipatsi iitiquiniri, pacara, pacara. Icantiri:

—Meeca piojeitaquena eiro nopiajatsi. Te pincoajeiteji pinquemisante.

Irosati yovaantanaca Iconioqui. ⁵²Ari iquimoshiretanasojeitanaque quemisanta- tsiri anta. Quiso oasanojeitaqueri Ishire Tasorentsi.

Yovaanaja Pavoro anta Antioquiaqui.

14 ¹Anta Iconioqui iqueapaaque Pavoro, jeri Verenave, anta pancotsiqui yapatojeitantari jorio, iquenquetsatapaaque. Iquemisantavaque oshequi catsini jorio, aisati caari joriotatsi. ²Yora jorio, caari quemisanta- tsi, yoamejeitaqueri pashinisatipee atiri, iquisajeitavaqueri quemisantajeitatsiri.

³Ari osamani isavicapaaque Pavoro, iquenquetsatacotapinitiri Avincatsarite, te intsaroyeji. Yora Avincatsarite, imatacaaque quemisantatsiri itasoncan- tayeti, imatacaaque paitarica caari ineapiniyeti. Iotacaaque atiri queariota- sanotaque ineshinoncatasanotanaque.

⁴Iro cantaincha icantavacaajeitanaca nampitsiquiniri. Itimi aparopee quempea- yetanacariri jorio. Irio itsipa quempeaye- tanacariri quemisantatsiri. ⁵Jeri yora jorio, caari joriotatsi, pincatsaritatsiri: icoajeivetaca iroatsinayerime, impichaa- naterime Pavoro, jeri Verenave. ⁶Ari iotanaque, irosati ishijaieitantanaca anta Irishitaraqui. Impoiji yovaanaja Terevequi. Irootaque oca nampitsi Iricaoniaquiniri. Aisati ijati otsapiyeta- paa, ⁷icamantajeitapaaqueri atiri jaoca incanteari iravisacotantajeari.

⁸Anta Irishitaraqui isavicaque shiram- pari yamashita iitiqui. Choritatsiri ini. Aitaque icantitapaani iroaquera itimapaa- que. Te iraniitimateji capichaji. ⁹Iquemi- santavaqueri Pavoro. Ari yamenapaa- queri iriori iotacotaqueri, iquenqueshire- tiri Tasorentsi, iravisacotantajeari.

¹⁰Antearojenca icantaqueri:

—Pincatiasanotaje.

Ari imitajaitanaque iriori, mita, irosati yaniitantanaja. ¹¹Oshequi catsini icarati

neaquerori oca imataqueri Pavoro. Ari ineanatantajeitaro irineane iricaoniasati, antearojenca icantajeitanaque:

—Yaniireashitapaaque tasorentsitsiri, iquempetapaacari shirampari.

¹²Iriori Verenave ipajitashitari Seoshi.

Yora Pavoro quenquetsatacaantatsiri, irootaque ipajitancariri iriori Eremeshi.

¹³Anta oquempejitaro nampitsi ovanco Seoshi. Jeri yora saserotetimentarori Seoshi, yamajeitaqueri toropee, aisati inchateaqui. Yamayetaqueneri anta iqueapinitiro nampitsi, icarajeitaqueri oshequi ishanincepee. Icoajeivetaca iroyenerime toropee; imperime Verenave, jeri Pavoro.

¹⁴Iquemantavaiitari iriori, itsereanaquero iitsaare. Ishiashijeitanacarri apatotimantariri. Icajemaunque, ¹⁵icanti:

—Ashaninca. ¿Paita pantajeitiri? Aisati aquempeavacaajeita, atiri anajeiti. Iro nopocantacarri noncamantempiro pojocajero caari cameatsatatsi pantayetiri. Eiro meeca patsipetashitajarotsi pimpincatsatashitajearo pivetsicayetiri. Pinquencheshirejeiteri Tasorentsisanori irinti, yora aneasanotatsiri. Iriotaque vetsicajeitirori inquite, quipatsi, incajare, maaroni; yovetsicajeitiri aisati maaroni timantajeitarori. ¹⁶Peerani ishinejeitimpi maaroni caari joriotatsi paitarica pameyetacarri. ¹⁷Iro cantaincha yovetsicaquempiro Tasorentsi iotacaajeitimpiri. Ineshinoncajeitaquempi. Yoariajeitimpiro incani. Itimacayetiro oitsoquitapinitantari inchatopee. Iquemacaapinitimpiro poari. Yoimoshirencapinijeitimpi. Iriotaque yoca nocoacaquempiri pimpincatsateri: iroquea pipincatsatanatsi nainti.

¹⁸Oshequi icamantanavetacarri, iro cantaincha irovetanaincha iroashiteanarime toro. ¹⁹Jeri ipocapaaque joriopee, poneayetachari Antioquiaqui aisati Iconioqui. Yamatavitapaaque oshequi atiri, icantiri:

—Oshequi yamatavitanti Pavoro: pinquisherri.

Ari ipichaaajeitaqueri, ijijeivetacarri camasanotaque. Inoshicanaqueri, yojocaitiri anta otsapitapaaca nampitsi. ²⁰Ari ijatashijeitaqueri quemisantatsiri, ishoncapaacari; irosati itinaantanaja. Ipaajeitanaja nampitsiqui. Oquitaitetamanaji yovaanaja Pavoro Terevequi, itsipatanajari Verenave. ²¹Iquenquetsatacotapaaquero jaoca icantari Tasorentsi yoavisacotanti. Iquemisantacaqueri oshequi atiri. Impoiji ipianaja Irishitaraqui, Iconioqui, Antioquiaqui. ²²Aiquero ijatatiini iquemisantasanotacairi quemisantatsiri. Icantasanotiri:

—Eiro pojoquirotsi oca piquemisantaqueri. Oshequi anquematsicataquearo paitaricapee, irosatiquea ajatantanaqueari anta ipincatsaritinta Tasorentsi; iro cantaincha eiro ashemarotsi.

²³Jaocarica anta yapatotapinijeitari quemisantatsiri, icoyeaqueneri jivatacaajeiterineri. Impoiji iquenquetsatacaajeitiri Tasorentsi, aisati itijeita. Impoiji aisati icantajeitiri Avincatsarite:

—Jerica quemisantajeitimpiri. Pojocacoventajeiteri.

²⁴Ari iquenanaque Pishiriaqui, irosati yareetantanaca Pampiriaqui. ²⁵Icamantantiro irineane Tasorentsi anta Perejequi, irosati yovaatanaja anta Atarayaqui. ²⁶Irosati itetantanaja pitotsiqui, iquenacotanaji Antioquiaqui. Aitaque anta itianqueetaquerinta peerani, icanteetirini Tasorentsi: “Jeri yoca, pineshinoncateri irimatantempirori paitanirica pincoacayeriri”. Tempa aitaque imataquero.

²⁷Ari yareetapaaja. Yapatojeitaqueri quemisantajeitatsiri. Iquenquetsatacaajeitaqueri maaroni yantacaajeitaqueriri Tasorentsi iriori. Aisati icantiri jaoca icantari ishinejeitantajariri pashinisatipee atiri iquemisantajeitantajari. ²⁸Ari

osamanitanaque itimimotaqueri
iyemisantaririnte anta.

**Icoaveta jorio inquempetearime itsipapee
atiri yameyetacari iriori.**

15¹Ari yareejaitapaaca Antioquia-
qui joriopee poneachari Joreaqi.
Yoametapaaqueri ayemisantaririnte,
icantapaaqueri:

—Isanquenatini Moishishi: “Pintoyean-
tea”. Eirorica piquemisantiri, eiro
pavisacotajitsi.

²Ari ipiatsatavacari Pavoro, itsipatari
Verenave. Te capichaji incantavacayea:
oshequi yoametavacaaca. Ari itianquiri
Pavoro, Verenave, aisati aparopee
pashini. Icantavaqueri:

—Pijajeite Jerosarequi anta itiminta
iroamereni Jesoshi, aisati yora quenque-
tsatacantatsiri. Pisampitacoventapaa-
queri icantiri yoca. ¿Queariompa icoacaa-
jeitaquena nontoyeantajeitea?

³Irio tiancajeitiriri quemisantatsiri anta
Antioquiaqui. Ari ijatanaque, iquenanaque
Jenishiaqui. Yovaanaca, irosati Samariaqui.
Icamantapiniyetiri joriopee quemisantatsiri:

—Oshequi iquemisantajeiti meeca
pashinisatipee atiri, yojocajeitiro
yamejeivetari peerani.

Ari iquimoshiretasanojeitavaque
maaroni quemajeitavaqueriri.

⁴Anta yareejaitapaacanta Jerosarequi,
yaacameetsajeitavaqueri quemisantajeita-
tsiri: iroamereni Jesoshi, quenquetsata-
caantatsiri, maaroni. Icamantapaaqueri:

—Oshequi imatacaaquena Tasorentsi
noquemisantacajeitiri itsipapee atiri
anta otsipapeequi nampitsi.

⁵Ari icatiayetanaca aparopee variseo,
quemisantatsiri inaveta iriori. Icanti:

—Aitaque incanteari intoyean-
tea itsipapee atiri. Ocameetsati antsotea-
quero isanquenareni Moishishi, maaroni.

⁶Ari impoiiji yapatojeitanaja aisati
iroamereni Quirishito, quenquetsatacaan-

tatsiri, maaroni. Icoajeitaque iriotanaque
paitarica incanteriri antioquiasati.

⁷Oshequi yoametavacaajeitaca. Impoiiji
icatianaca Petero, icantajeitiri:

—Noyemisantaririnte. Peerani
icoyeeaquena Tasorentsi, piojeitauero:
tempa pineacojeitauena. Aitaque
icoyeeaquena noncamantajeitiri pashini-
sati atiri jaoca incanteari inquemisantant-
tajeiri, iravisacotantajeiri. ⁸Tempa irio
Tasorentsi iotirori aquenqueshirejeitiri.
Iriotaque tianquiniriri itsipapee atiri
Ishire, ayojeitancari yavisacojeitaji.
Tempa meeca iquempjeitauene arori.

⁹Queario, aitaque amoncarajeitacari
iriori. Tempa aisati icanti Tasorentsi:
“Pimoncaratavacaajeitaca”. Iquemisanta-
que itsipapee atiri, irosati yoameetsashi-
reantajariri. ¹⁰Meeca, ¿picoaquempa
pincanteri Tasorentsi: “Te pitejei”? Jero
oca picoaque pimpomerentsitacaasano-
teari ayemisantaririnte. Arojeitauero jorio,
amejeivetaro, iro cantaincha te amateroji
antsoteajeitero, aisati maaroni ashanin-
cani, te irimajeiteroji. ¿Jaoca incanteari
itsipapee atiri irimatantearori? Oshequi
opomerentsitaca. ¹¹Ineshinoncatajee
Jesoquirishito, irootaque avavisacotanta-
jari. Tempa maaroni ashirejeitaro oca.
Aisati irishiajeitajee arori itsipapee atiri.

¹²Imajerejeitanaque maaroni apatojei-
tainchari. Iquemisantajeitavaqueri
Verenave, aisati Pavoro. Icantavaqueri:

—Imatacaaquena notasoncacoventiri
itsipapee atiri. Imatacaaquena caari
ineapinijeiti, irootaque iojeitancari
queario Tasorentsi ini Jesoshi.

¹³Impoiiji imajeretanaque apatojeita-
chari. Impoiiji aisati iquenquetsati
Santiaco, icanti:

¹⁴—Noyemisantaririnte, pinquemisan-
tena. Iquenquetsatacaimpi Shimo jaoca
icanta Tasorentsi intantajarori ineshinon-
cajeitajiri pashinisati atiri. Aitaque
icoyeeaqueri iquenquetsatacotantajariri.

¹⁵Omoncarataca oca isanquenatitacaniri camantantatsiniri pajitachaniri Amoshi. Isanquenatini: ¹⁶⁻¹⁸“Icanti Avincatsarite: ‘Coajica nompiapaaje quipatsiqui, novetsicapaajero aisati inampini Iravirini itirevetacari. Novetsicajero aisati maaroni pancotsi. Nocoaque iraventajeitena maaroni itsipapee atiri, nocoaque inquemisantajeitena’. Irootaque icantiri Avincatsarite, vetsiquirori peerani maaroni timajeitatsiri”. ¹⁹Irootaque nocantantacari nainti te oncameetsateji ampomerentsitacayeari yora pashinisati-pee atiri. Iquemisantiririca Tasorentsi, moncarataca. ²⁰Iro cantaincha, tsame ampacanteri sanquenarentsi. Ancamanteri oca: “Paamaventearo yovetsicane atiri ijitasorentsitashitari: amatavitashi-jeitimpicari. Eiro pineavintsatirotsi tsinane caari pai. Eiro poaritsi ampitsiitachari, poacotarocari ivatsa iriraja”. ²¹Tempa maaroni saavaroqui, ariorica yapatotapinijeita ajorioririnte, icantani itsaneapinitacar oca nocantimpiri: tempa itsaneajeitacaroni peerani Moishishi. Eirorica yantajeitiro oca, ari ocameetsati iraacameetsajeiteri ashanincapee.

Irootaque icantaqueriri Santiaco. ²²Ari onimojeitaqueri maaroni quemisantajeitatsiri, icanti:

—Cameetsataque. Irootaque ancamanteri antioquiasati.

Ari icoyeajeitaqueri apite jivatacaajeitiriri quemisantatsiri: Jorashi Varasavashi, aisati Shirashi. Icantaqueri:

—Avirojei oijajeiterineri Pavoro aisati Verenave anta Antioquiaqui. Pincamantapaqueri ayemisantaririnte nocantaqueri aisati pimpapeeri sanquenarentsica.

²³Jero oca ocantiri sanquenarentsi isanquenatiniri: “¿Ainirompi noyemisan- taririnte? ¿Tecatsimpa oyempine? Aca Jerosarequi nocarajeitiri iroamereni Jesoshi aisati itsipapee quenquetsata-

caantatsiri. Meecca nosanquenajeitimpiri caari joriotatsi, savicajeitatsiri anta Antioquiaqui, Shiriaqui, aisati Shirishiaqui. ²⁴Noquemacotaqueri yora nocarajeivetari: oshequi iquenquetsatacaamempeaquempi, icomitacaaquempi. Icantashiretacaquempi. Te naro tianquerine.

²⁵Aitaque onimojeitaquena maaroni narori nontianquempiri yoca nocoyeaqueri. Intsipatanaqueari Verenave, jeri Pavoro: yoca nonintane. ²⁶Irojeitaque caari tsaroatsi incamimentero Avincatsarite Jesoquirishito. ²⁷Nontianquempiri Jorashi, jeri Shirashi. Incamantasanotempiro iriori oca nosanquenatimpiri. ²⁸Ari onimotaquero Ishire Tasorentsi, aisati onimotaquena narori noncamantempiro oca. Eiro noperanatimpitsi, irointi apatiroti pimatero oca. ²⁹Eiro poaritsi yora yoyeevetacanariri yovetsicane atiri: caari oni Tasorentsi. Eiro poacotarotsi ivatsa iriraja. Eiro poaritsi ampitsiitachari. Ariorica poyeari, oshequi inquenqueshiretanaque joriopee. Eiro pineavintsatirotsi tsinane caari pai. Ariorica pimayetaquero oca, cameetsataque. Ari cameetsa pintimajeite”.

Irootaque isanquenatiniriri antioquiasati.

³⁰Ari ijajeitanaque Antioquiaqui yora itianquiri. Yapatoteitapaacari quemisantajeitatsiri, ipapaaqueri sanquenarentsi. ³¹Ineanajeitavaquero, irosati iquimoshirejeitantanaca.

³²Irisati camantantatsiri iriori Jorashi, aisati Shirashi. Oshequi iquenquetsatacapaaqueri iquimoshiretacaapaaqueri, iquemisantacaasanojeitapaqueri. ³³Osamani isaviquimotaitiri, impoiji ipianaja aisati Jorashi. Yovetsatavajari yora iyemisantaririntepee, icantavajiri:

—Cameetsayea pijataje.

Irosati ipiantanaja anta itiminta tiancaqueriri.

Yapiitajiro iquenaquenayetaji Pavoro.

³⁴Irinti Shirashi icoaque irisavicanaje Antioquiaqui. ³⁵Irosati isavicanapaaca

Pavoro, jeri Verenave. Yoametantanaque, icamantantanajiro irineane Avincatsarite. Itsipajeitacari aisati oshequi pashinipee, icamantantajeiti. ³⁶Pashini quitaiteri icanti Pavoro:

—Verenave. Tsame anejanteri aisati ayemisantaririnte anta maaroni nampitsipeequi: yora peerani acamantajeitaitiri irineane Avincatsarite. Amenajanterita jaocarica icantajeitacari.

³⁷Icoaveta Verenave iraanajerime aisati Joa. Ipajiyetiri aisati Maricoshi. ³⁸Iro cantaincha Pavoro, icantaqueri:

—Peerani anta ajatantacari Pampiriaqui, yojocanaquee. Te intsipatanaqueeji anta aquenquetsatinta. Eiro meeca aanajiritsi.

³⁹Ari ipiatsatasanotavacaaca, irosati injantareavacantanaca. Yora Verenave, yaanaqueri Maricoshi. Itetanaca pitotsiqui, ijataque Tsipirequi. ⁴⁰Irintiquea Pavoro, yaanaqueri iriori Shirashi. Icantajeiti quemisantatsiri:

—Novincatsarite, pineshinoncajeiteri yoca, quiso poanaqueri cameetsa.

⁴¹Ari iquenanaque Shiriaqui, aisati Shirishiaqui. Anta iquemisantacaasanojeitacari quemisantatsiri.

16 ¹Impoiji yareetapaaja Terevequi, aisati Irishitaraqui. Itimaiti anta quemisantatsiri pajitachari Timoteo. Irootaque irinirontari jorio. Irompa irinti iriri, te irijorioteji. Quemisantatsiri oni iriniro. ²Icantajeiti quemisantajeitatsiri anta Irishitaraqui aisati Iconioqui:

—Icameetsati Timoteo.

³Icoaque Pavoro intsipatanaqueari. Iotacojeitiri joriopee iriri, caari ini jorio iriori, icantantariri Timoteo:

—Ariorica pintoyeantea, iraacameetsa jeitempi jorio.

Icantiri:

—Ari.

Ari yaanaqueri, itoyeantimentanacari joriopee, timayetatsiri anta nampitsipee-

qui. ⁴Impoiji iquenantanajari nampitsipeequi, yoamejeitacari maaroni icantayetiri jerosaresati: yora iroamere Jesoshi aisati jivatacaajeitiri quemisantatsiri. Icantiri:

—Ariorica inquemisanteri itsipapee atiri Quirishito, eiro acantiritsi: “Pimpeajea jorio”.

⁵Ari iquemisantacaasanoaqueri maaroni quemisantatsiri. Maaroni quitaiteripee aiqero ijatatiini yoshequia-sanotanaque.

⁶Iquenanaque Jirijiaqui, Carashiaqui. Tempa ocantitacari Ishire Tasorentsi:

—Eiro picamantantsi anta Ashiaqui.

⁷Yareetanaca Mishiaqui, ari icoavetaca irijateme Vitiniaqui. Iro cantaincha aisati te oshineteriji Ishire Jesoshi. ⁸Iquenanaque Mishiaqui, irosati yoirincantanaja Toroarequi: ari noneavaqueri narori.

⁹Tsiteniriqui imishitacari Pavoro aparato maseroniasati. Icatiimotapaacari, icantasanotapaacari:

—Pimpoque aca Maseroniaqui, pintacojeitena.

¹⁰Irosati nocoantanaca jaoca nonqueanteari nareetanteari Maseroniaqui. Niotanaque itiancaquena Tasorentsi anta noncamantanteariri savicajeitatsiri jaoca incantajeiteari iravisacojeitantajeari.

Ijati Pavoro Eoropaqui.

¹¹Anta Toroarequi notejeitanaca pitotsiqui. Aacotanaquena tampea Samotorashiaqui. Oquitaitetamanaque aisati novaamanaja Neaporishiqui.

¹²Novaanaja aisati Jiriposhiqui. Irootaque intapaarori nampitsi Maseroniaquiniri. Inampitapaaro meeca poneachari Oromaqui. Ari notimajeitapai aparopee quitaiteri. ¹³Ari saavaroqui nosoquijanaji omoroqui tantorentsi shoncarori nampitsi, nojatanaque anta otsapijaqui eni. Naamaapaacari aitaque anta iquenquetsatacaapinitiri joriopee

Tasorensi. Nosavicapaaque, noquenquetsatacapaaquero tsinanepée apatojeitainchari. ¹⁴Otimaiti aparo quemavaquenari pajitachari Iriria. Oponeanaca peerani nampitsiqui anta Tiatiraqui. Irootaque quemisantiriri Tasorensi. Opimantapiniyetiro tocoya quisaarípee. Iotacaquero Avincatsarite oquemisantavaquero icantayetiri Pavoro. ¹⁵Ovaotísataca, otsipajeitacari maaroni savicajeitatsiri ovancoqui. Ocantasanotaquena:

—Ariorica piotaquena noquemisantasanotiri Avincatsarite, pijajeite novancoqui, pisaviquimotanaquenatsita.

Ari ocoacaquena, irosati nocantantacari:

—Tsamequeti.

¹⁶Ari nojajeitanaque anta iquenquetsatacapiniyeetirinta Tasorensi. Otonquiotavaquena nampirensi, iotacairo camaari. Iotashita, oquenquetsatacotitaro paitarica tequeratsita oneeroji. Irootaque yaantayetacari oshequi quirequi yora nampitarori. Icantapinitiri atiri:

—Pincoaquerica pinquemero, pimpinata.

¹⁷Ari oijajeitanaquena. Ocajemi, ocanti:

—Yoca shirampari, iriojeitaque quemisantiriri Tasorensi, yora jenoquiniri catsini. Incamantajeitempi jaoca pincanteari pavisacotantajeari.

¹⁸Aitaque ocantapinita maaroni quitaieriqui. Ishemanacaro Pavoro, ipitsocashitanacaro, icantanaqueri camaari:

—Iriotaque Jesoquirishito noquemisantiri, irootaque nocantantimpiri: pojocana-jero.

Irosati yojocantanajaro. ¹⁹Iotanaque yora nampitarori, icantaniroti:

—Eirove, tecatsi ancantajea meecca aantajeariri quirequi.

Irosati yaantacari Pavoro aisati Shirashi, tapi. Inoshicanaqueri nampitsiqui, nianqui: anta itiminta pincatsarita-

tsiri. ²⁰Yaanaqueri pincatsariqui, icantapaaqueri:

—Iquenqueshiretacaajeitaquena maaroni savicajeitatsiri aca anampiqui. Tempa jorio ini iriori. ²¹Icamantacotiro oca yameyetacari iriori. Te oncameetsateji anquemisantavaquero icantaqueeri, te oncameetsateji ameyetearo. Tempa ashanincajeitacari arori oromasati.

²²Iquisajeitanaca maaroni apatojeitainchari, irosati icantantari comantanti:

—Pisapoquiteri iitsaare Pavoroca, jeri Shirashica; pimpasatsempequijeiteri.

²³Oshequi ipasanataqueri, impoiji yoiminqueaqueri caravosoqui. Icantasanotiri catsini yora shentiriri:

—Cameetsayea pishentasanoteri, ishiacari.

²⁴Iquemaquero oca icantasanotaqueriri, yoiminqueaqueri. Aisati itsinacaquiitacari inchatoqui. ²⁵Nianquuite tsiteniri, ari iquenquetsatacajeitiri Tasorensi, ipampoyeaventajeitaqueri. Iquemisanta-jeitiri itsipapee yoiminqueeyetiri.

²⁶Omapocashitanaca onicanaca quipatsi, aisati onicanaca pancotsi, jero maaroni otincamípee, nica, nica, nica. Intsipate ashitareajeitanaca ashitacorontsipee. Irosati onijantareantanaca tsinacaquiive-tacariri iitiqui. ²⁷Itinaanaca shentiriri. Ineaquero ashitacorontsi, ashitareajeitanaca. Ijishashivetaca shiajeitanaca yora yoiminqueajeitiri, irosati yaantanacaro isavirite, irovetanaincha iroashitanajeame irisati. ²⁸Ari intsipate icajemacotanaqueri Pavoro:

—Eiro poashitajatsi avisati. Irosati nocantajeita maaroni aca, te noshiyeji.

²⁹Icantiri variria inampire:

—Pamaquena tsiementotsi.

Ari yamaqueneri, irosati iqueantanaca anta yoisovetacarinta. Ipioncanaque, itiyeroimotapaacari Pavoro, jeri aisati Shirashi. ³⁰Impoiji yaanaqueri saiteriqui. Icantiri:

—Noshaninca, ¿jaoca noncanteari narori navisacotantajeari?

³¹Yacanaqueri:

—Pinquemisanteri Novincasarite Jesoshi, iroavisacotantajempiri. Aisati inquempejeiteari maaroni pishaninca.

³²Icamantasanotiri irineane Tasorentsi. Aisati ishanincapee iriori, icamantajeitiri.

³³Irosati osaite yaantanacari, iquivayeta-jiniri oca yaaveaqueri ipasanataqueri, impoiyi yaavintajiri. Irosati ivaotisatan-taja, icarajeitaqueri maaroni ishaninca.

³⁴Ari yaanaqueri ivancoqui, yoacaapaacari. Iquemisantajeitiri Tasorentsi, irotaque iquimoshirejiantanacari maaroni ishaninca.

³⁵Ari oquitaitetamanaji, jeri yora pincatsari itianquiri variria:

—Pijate caravosoqui, pincamantaiteri iroimisoquijajeri quemisantatsiri.

Ari ijataque, icamantapaaqueri shentiriri:

—Pintiancajeitajeri irijatajeta.

³⁶Irosati icantantajari iriori:

—Icantajana pincatsari nontiancajempí. Meeca pisoquijanaje, cameetsa pijataje.

³⁷Iro cantaincha icantiri Pavoro:

—Jampa noshanincatacari oromasati. Te irisampitacovenenaji pincatsari, te irioteji ainirorica nantane. Ipasatacanta-shitaquena, aisati yoimínqueacantashita-quena. Tempa ineajeitaquena maaroni savicajeitatsiri yoashinoncaaquena: ijijeiveta ainiro nantane. ¿Ariompa meeca irimanaquero iroimisoquijacanta-jena? Tempa eiro. Impoqueta iriori, iriotsitaquea oimisoquijajantenane iriojeitanteari ashanincapee tecatsi nante.

³⁸Ari ipianaja variria, icamantapaajiri.

Iotantacari pincatsari ishanincatacari Pavoro oromasati, ari itsaroanaque. ³⁹Ipcapaaque, cameetsa iquenquetsatacapaaqueri. Irosati yoimisoquijantapaajari:

—Meeca pijataje, pojocanajero nonampi.

⁴⁰Ari isoquijanaji, iquenanaqi ovancoqui Iriria. Ineapairi ayemisantaririnte, icantapaaqueri:

—Cameetsayea pintimajeite.

Irosati yovaantanaja pashiniqui nampitsi.

17 ¹Iquenanaque Pavoro Antiporishi-
shiqui, Aporoniaqui, irosati yareetantaca Tesaronicaqui. Ari anta otimi pancotsi yapatotantari jorio, ²irosati iqueantapaaca. Aitaque icantatiani yameta-pinitaro iquenquetsata-caapinijeitiri jorio. Ocarati mava saavaro yoamejeitiri ocantayetiri Sanquenarentsi. ³Ari yoametasanotapaaqueri. Iotacaasana-
notaqueri, icantiri:

—Aitaque ocantitani Sanquenarentsi: “Irineacatsitaquearo yora Quirishito.

Incamaque, irosati intinaantajeari”. Iriro nocamantacotiri Jesoshi, iriotaque Quirishito.

⁴Iquemisantavaquero aparopee icantaque-
riri, irosati yoijajeitantanacari Pavoro, jeri Shirashi. Aisati iquempjeitaca oshequi caari joriotatsi, quemisantatsiri: yoijajeitanaqueri Pavoro. Aisati oquempetaca iroori tsinane, ishanincapee pincatsaritatsiri. Oquemisanta-
jeitaque. Te aparopee one iroori. ⁵Ari oshequi iquisanaca joriopee, yapatojeita-
queri caari cameetsajeitatsi, aisati perayeta-
chari. Iquisacaajeitacari timajeitatsiri nampitsiqui. Ijajeitanaque ivancoqui Jaso, icoajeivetapaacari Pavoro, jeri Shirashi. Icoavetaca iranaquerime anta yapatojeita-
canta atiri, inquisajeiterime. ⁶Te irineapee-
riji, irinti inoshicashitanaca Jaso, jeri aparopee quemisantatsiri aisati. Yaanaqueri anta savicacaantatsiriqui. Icajemajeitapaa-
que:

—Jeri yoca quisacaantajeitaqueriri maaroni savicajeitatsiri. Jeri yoca Jaso aacameetsataqueriri. ⁷Yoamantajeiti, icanti: “Eiro pimocaratiniritsi Sesari icantimpiri. Timatsi pashini pincatsarita-
tsiri, yora Jesoshi”.

⁸Ari iquemantavacarori oca, iquisajeitana-
naca atiripee, aisati yora savicacaanta-
siri. ⁹Icantanaque Jaso, aisati itsipapee:

—Jerica quirequi: pinquempoyeajenari
piotantenari eiro noshiapitsatimpitsi,
tecatsi nante. Ontimerica nantane, ari
paasanoterita noirequite.

¹⁰Irosati itiancantajari. Ari otsitenitana-
que. Itiancajiri Pavoro aisati Shirashi. Irio
tiancajiriri ayemisantaririnte. Yovaanaca
Vereaqui. Yareetantapaacari, irosati
ijatantapaaca yapatotapinitanta jorio.

¹¹Irio irinti cameetsatasanotaintsiri, te
irishiyeriji yora tesaronicasati. Icoasano-
taque inquemisantero Sanquenarentsi.
Ineanatapinitiro maaroni quitaiteriqui
iriotanteari queariosanorica oca
icantaqueriri. ¹²Oshequi iquemisantajei-
taque iriori. Oquemisanti tsinanepee
caari joriotatsi, ishanincapee pincatsarita-
tsiri, maaroni. Aisati iquemisanti
shiramparipee, te aparato irine: oshequi
catsini. ¹³Ari icamantantiro Pavoro
irineane Tasorentsi anta Vereaqui.
Iotacotaqueri joriotatsiri, yora tesaronica-
sati. Ipcapaaque iriori, iquisacaapaacari
atiri, icantashiretacaqueri. Icantiri:

—Eiro piquemisantajeitiritsi Pavoro,
iriointiquea pinquisajeiteri.

¹⁴Yora quemisantatsiri intsipaite
itiancaqueri Pavoro anta incajarequi.
Irinti savicanaintsi Shirashi, jeri Timoteo.

¹⁵Ainiro aanaqueriri Pavoro anta
Atenashiqui. Icantavajiri Pavoro:

—Ariorica pareetajea pinampiqui,
pincamantapaajenari Shirashi aisati
Timoteo intsipaite impocajeta.

Ari ijatanaque, icamantapaajiri.

Yantayetapairi Pavoro anta Atenashiqui.

¹⁶Ari yoyeapaajiri Pavoro anta
Atenashiqui. Irio yoyeapaajiri Shirashi
aisati Timoteo. Ineapaaquero anta
nampitsiqui oshequi catsini yovetsicashi-
yetari ijitasorentsishiyetari, irosati

yoashiretantanaca. ¹⁷Aisati anta
Atenashiqui oshequi yoamejeitiri joriopee
aisati caari joriotatsi: yora quemisantajei-
tiriri Tasorentsi. Oshequi yoametavaca-
jeitaca. Aisati iquempetacaapinitacari
maaroni atiri anta nampitsiqui nianqui.
¹⁸Yoametapaaqueri coapinitatsiri iriote
paitaricapee, icarajeitiri iroamereni
Epecoreo. Aisati icarajeitiri caari
intacotacha irisati: yora icanteetiri
eshitoico. Yora Pavoro icamantacotiri
Jesoshi, aisati icanti:

—Intinaaje camajeitatsiri.

Icanti aparopee quemavaqueriri:

—¿Paita icantaqueri yoca naveetashi-
tachari?

Icanti pashini:

—Icamantacotiri pashinisati tasorentsi-
tatsiri.

¹⁹Yajiricaqueri, yaanaqueri anta
yapatotapinijeitanta, icantajeitiri:

—¿Cameetsampa niotero oca iroaque-
ratatsiri poametantiri? ²⁰Te nonquemapi-
niteroji oca picantaqueri. Nocoajeiti
niotero jaoca ocantacotari oca.

²¹Aitaque icantari atenashisati: te
intsameeteji, irointi icoaque inquemisan-
tashiteari quenquetsatacaajeitiriri
iroaquerayetatsiri caari iquemapinijeiti.
Aisati iquempejeita poneayetachari
paricoti, iquenquetsatacotashiyetaro
paitapeerica. ²²Anta icatiaca Pavoro
nianqui, icantiri:

—Atenashisati. Niotacotaquempi avirori,
pashi poiropiquemisantayeveta. ²³Anta
noquenaquenayetinta noneayetaquero oca
piquemisantashiyetari. Aisati noneapaa-
quero anta poapinitiniri pitasorentsise
paitaricapee. Ainiro osanquenataca, ocanti:
“Anquemisantanteariri tasorentsitatsiri caari
ioyeeti”. Yora caari pioti: piquemisantashi-
tari, iriotaque yoca noncamantempiri.

²⁴Yora Tasorentsisanori, iriotaque vetsiqui-
rori quipatsi. Yovetsicajeitiri maaroni
timantajeitarori. Iriotaque vetsicayetirori

inquire aisati quipatsi. Te irisavicantearoji ora pancotsi yovetsiquiri atiri. ²⁵Aroquea ainti, tecatsi ancantari intacojeiteari. ¿Ariompa incoanaque intacotearine? Tempa iriotaque oaneajeiteeri, intacojeiteeri irinti. Tempa iriotaque paqueerori maaroni, paitaricapee. ²⁶Aparoni yovetsicavetaca peerani, iriotaque intanacaroniri; meeca ashequiajeitanaque, atsoteajeitanaquero maaroni quipatsipee. Iriotaque Tasorentsisanori cantatsiri jaocarica irisavicajeiteeri maaroni atiri, aisati jaocarica oncarate intsoncajeitantariri; iriotaque cantacantirori. ²⁷Itimacaajeitaquee ancoanteari ayojeiteeri, aisati aneantajariri coajica. Iro cantaincha, te irarejiteji. ²⁸Iriotaque ovaneajeiteeri. Iriotaque shevatacaajeiteeri. Iriotaque timacaajeiteeri. Tempa aitaque icantitani pishaninca pampoyeapinitatsiri: “Arojeitaque itimacaane Tasorentsi”. ²⁹Arojeitaquerica itimacaanepee Tasorentsi, te oncameetsateji meeca ashiancanteri oro, perata, mapi, yovetsicaneepee atiri. Aisati eiro ashiancantiritsi paitarica iquenqueshiretiri atiri. ^{30,31}Peerani te irioveiteani ashanincani, ari tecatsi incantimenterini Tasorentsi inquishimenterini yantajeitini. Iro cantaincha ioti irinti jaoca oncarate incantacoventantariri maaroni atiripee. Timatsi shirampari pajitachari Jesoshi, icamasanovetaca. Impoiji itinaajiri Tasorentsi, iotantajeitariri maaroni atiri. Ipeaqueri iriori cantacoventantatsineri. Cameetsa incantacoventante. Irootaque icantantajeitariri atiri meeca: “Pinquenqueshirejitanaquea, paventajeiteari Tasorentsisanori”. Aitaque icantajeitiri maaroni atiri, jaocarica isavicajeitiri.

Irootaque icantiriri Pavoro.

³²Ari iquemantajeitavacariri icanti: “Itinaanaja camavetainchari”, ainiro shirontimentaantarariri; iro cantaincha icantanaqueri pashinipee:

—Coajica pashini pampiitajenaro oca aisati.

Irosati iijatantanaja Pavoro. ^{33,34}Itimaa-rantaque quemisantavaqueriri, irosati yoiijatantanacariri iriori. Ipajita aparoni quemisantatsiri Tionishio: iriotaque pincatsaritatsiri anta nampitsiqui, icarajeitiri ivincatsaririnte yoametavacaajeitaca. Aisati oquemisanti tsinane pajitachari Tamarishi. Icaratiri aisati itsipapee quemisantajeitatsiri.

Icamantanti Pavoro anta Corintoqui.

18 ¹Impoiji yojocanajiro Pavoro Atenashi, yovaanaja anta Corintoqui. ²Anta ineapaaqueri joriotatsiri pajitachari Aquira. Pontosati inaveta, iponeanaca meeca Itariaqui. Iroaquera yareetapaaca. Itsipatapaacaro ijina, Pirishira. Iro ipocantacari, yora pincatsari pajitachari Caraorio iquisajeitaqueri jorio savicajeivetachari Oromaqui, itiancajeitaqueri:

—Pijajeite pashiniqui quipatsi, eiro pisavicajeititsi aca.

Ari isavicajeitapaaca Corintoqui. Impoiji yareetapaaca Pavoro, isaviquimotapaqueri. ³Aisati iquempetavacaajeitaca, iojeiti yantiro tocoyapanco. Irootaque isaviquimotantapaacariri, itsipatavacaaca anta yantavejeitei.

⁴Maaroni saavaroqui yoametavacaajeitaca anta pancotsiqui yapatojeitantari. Iquemisantacaasanojeitaqueri joriotatsiri, caari joriotatsi aisati. ⁵Impoijiquea iponeanaja Maseroniaqui Shirashi aisati Timoteo. Irosati yareetantapaajariri. Ineapaajiri Pavoro, iquenquetsati iriori. Icamantapinivetacariri joriotatsiri:

—Iriotaque Jesoshi yora Quirishitotatsiri aamaajeitaniri peerani.

⁶Ipiatsajeitavacariri aisati icantimajeitaqueri, irootaque itequimotantajariri iitsaare iriojeitanteari irotajatsi irijataje. Icantanaqueri:

—Avisati jatacantajanchane anta Sharincaveniqui: te aneroji nantane

nainti, tempa nocamantavetaquempi. Meecaquea nojatashiteri irinti pashinisati atiri, nonquenquetsatacaajeiteri.

⁷Ari yovaanaja anta, iquenanaajiro ivancoqui Tishio Joshito: iriotaque quemisantiriri Tasorentsi. Isavicanampitiro pancotsi yapatotantapinitari.

⁸Yora Quirishipo iriotaque quenquetsatacaantatsiri anta pancotsiqui yapatotantari. Cameetsa iquemisantaqueri Avincatsarite. Aisati iquempejeitaca maaroni savicajeitatsiri ivancoqui, iquemisantajeiti. Aisati iquempeaarantaca oshequi corintosati. Iquemavaquero irineane Tasorentsi, iquemisantavaquero, irosati ivaotisantajeitaca. ⁹Ari tsiteniriqui ineshitacari Pavoro yora Avincatsarite, iquemaqueri icantiri:

—Eiro pitsaroitsi. Pincamantante, eiro pimajeretitsi. ¹⁰Quiso noaquempi. Aca nampitsiqui, tempa icarati oshequi quemisantanari. Tecatsi incanteetempi iroashinonqueetempi.

¹¹Irosati isavicananaca aparo osarintsi, oquimojantsivetapaaja aisati. Yoamejeitaqueri corintosati irineane Tasorentsi.

¹²Ipcincatsariventanti meeca Cario acayasati. Irosati joriopee iquisantanacari Pavoro. Yaanaqueri anta itiminta oametavacainchari. ¹³Icantapaaqueri:

—Jeri yoca shirampari, icantanirotiri atiri: “Pinquemisantajeiteri Tasorentsi”, iro cantaincha icantashitacaro irineane Tasorentsi.

¹⁴Irovetanaincha irineaveetanaqueme Pavoro, ari yora Cario icantiri joriotatsiri:

—Aviro jorioletatsiri, pashereajeitaquena. Irooricame iranterome yoca caari cameetsatsi, irooricame iroanteme, aitaquemequea oncameetsateme pamaquerime aca. ¹⁵Jero meeca picantavacaimentacaro oca yoametantiri. Picantavacaimentacari atiripee. Picantavacaimentacaro Sanquenarentsi. Aviroyeate. Oshequi pashereajeitaquena: eiro pipocashitanatsi. ¹⁶Pijanirajeitaje.

Ari ijajeitanaji. ¹⁷Yora atiripee yaajeitaqueri Soshiteneshi, shepi; ipasanajeitaqueri, tac, tac. Yora ipasataqueri iriotaque quenquetsatacaantatsiri anta pancotsiqui yapatotejantari. Ineacovetacari Cario ipasajeitaqueri, iro cantaincha tecatsi oncantimoneentanaqueari, tecatsi incantajeiteri.

¹⁸Oshequi quitaiteri isavicanaji Pavoro, impoiji ijatanaji, yojocanajiri ayemisantaririnte. Itetapaaca pitotsiqui, aacotanaqueri tampea Shiriaqui, icantanaca, shiririri. Itsipatanacaro Pirishira, jeri ojime, Aquira. Timatsi icashiacaqueriri Pavoro Tasorentsi, irootaque yameentatorori iishi anta Senqureshiqui. ¹⁹Yareejitantanacari Ejesoqui, ari yojocanajiri itsipataniri. Yovaanaja apaniro Pavoro anta pancotsiqui yapatotapinitanta jorio, iquenquetsatacaapaaqueri. ²⁰Icantajeive-tavacari:

—Osamanita pisavicanaquetsita, poamejeitena.

Iro cantaincha te incoyeji iriori.

²¹Icantanaqueri:

—Oshequi noshiretanaca meeca, iro cantaincha, ariorica incoacaaquena Tasorentsi, nompiaje, coajica.

Irosati itetantanaja aisati pitotsiqui, aacotanaqueri tampea, icaantanaca aisati shiririri. ²²Yareetapaaca Sesareaqui, irosati yovaantanaca Jerosarequi, iquivantapaaqueri ayemisantaririnte. Impoiji yovaanaja aisati Antioquiaqui, iponeanaca peerani.

Mavatapaaque iquenayetaque Pavoro.

²³Osamani isavicanaque Pavoro Antioquiaqui, impoiji ijataji aisati. Iquenaquenayetanaque Carashiaqui, aisati Jirijiaqui. Yoametasanojeitaqueri maaroni quemisantsiri.

²⁴Yareetaca Ejesoqui jorio pajitachari Aporo, arejantiriasati ini. Cameetsa iquenquetsatapiniti, iotasano tiro Sanque-

narentsi. ²⁵Icamanteetiri jaoca icantaniri Joani, aisati jaoca ocantari maaroni iquenquetsatacotiriniri Jesoshi, iro cantaincha tequera inquemacotasanotero maaroni yantayetiri iriori Jesoshi. Itsoteasanotaquero yoametantiro maaroni ioyevetari. ²⁶Ari iquenquetsatacotasano-tiro anta pancotsiqui yapatojeitanti. Te intsaroyeji, cameetsa iquenquetsati. Iquemantavacari Aquira, jero Pirishira, icantiri Aporo:

—Nocoaque nonquenquetsatacayempi apaniro.

Icanti:

—Ja, tsamequeti.

Ari apaniro itsoteaqueneri, yoamejeita-queri jaoca icantari Jesoshi, aisati jaoca ancantajeiteari ajajeitanteari anta Tasorentsi.

²⁷Impoiji icanti Aporo quemisantajeita-tsi:

—Nocoaque nojate meeca Acayaqui, noamejeiteri savicajeitatsiri anta.

Ari icantajeitavaqueri:

—Cameetsataque pijate, poamejeiteri cameetsa. Jeroca sanquenarentsi paajeita-naqueneri.

Jero oca isanquenatavaqueneri iyemisanrarinte anta: “Paacameetsajei-tavaqueriyea Aporo, pinquemisantajeita-vaqueri”.

Ari peerani ineshinoncatitacari Tasorentsi acayasati, irotaque iquemisantajeitantajari. Meeca, yareetan-tacari Aporo, oshequi intacojeitapaacari. ²⁸Yoametasanotiri iotasanoantajari.

Iquemajeitiri atiri yoametantiro Sanque-narentsi, icanti:

—Iriotaque Jesoshi oquenquetsatacotiri Sanquenarentsi, iriotaque Quirishitotatsiri.

Ijataque Pavoro Ejesoqui.

19 ¹Isavicaque Aporo Corintoqui, iriori Pavoro iquenanaque toncaariqui, yareetapaaca Ejesoqui.

Ineapaaqueri aparopee quemisantatsiri.

²Icantapaaqueri:

—Peerani, piquemisantajeitancari, ÷paashiretaquerompa Ishire Tasorentsi?

—Te. Te nonquemacoteroji.

³—¿Paita pivaotisatimentari?

—Novaotisatimentari Joa.

⁴Ari icantiri:

—Ariorica iquenqueshiretanaca atiri, ivaotisatiri Joa iriotanteariri atiri te incoyeji irampiitapinitero caari cameetsa-tatsi, irointi icoaque inquemisanteri Tasorentsi. Tempa icantitarini: “Pinque-misantajeiteri yora impoitapeenane, iriotaque Jesoshi”.

⁵Ari iquemantajeitavacarori oca, ivaotisatimentajeitanacari Avincatsarite Jesoshi. ⁶Yajiricainataqueri Pavoro iitoqui, irosati opocashitantacari Ishire Tasorentsi, ineaveentajeitanacaro pashinipee neantsi, icamantantajeiti.

⁷Aamaaca icarajeiti 12 shirampari vaotisajeitainchari.

⁸Ari ijatapiniti Pavoro pancotsiqui yapatotantari, icarati mava cashiri iquenquetsatacantayetaque. Te aneeriji tsaneacotearine. Oshequi icamantacota-queri Tasorentsi, jaoca icanta ipincatsari-ventanti. Impoiji oshequi yoametavacaa-jeitaca. ⁹Aparopee, te aneroji iquenqueshireantari, te incoyeji inquemisante. Icantajeitiri yora atiripee:

—Te oncameetsateji oca yoametantiri Pavoro.

Irosati yojocantanajari Pavoro, yaanaqueri quemisantajeitatsiri. Iquenquetsatacaapini-tiri maaroni quitaiteeriqui anta yoametanta-pinitinta Tirano. ¹⁰Icantatiani apite osarinti, irotaque iquemantacarori maaroni ashiasati irineane Avincatsarite. Iquemajei-taquero: jorioppee, caari joriotatsi, maaroni.

¹¹Itasoncantayeti Pavoro, imatantarori caari aneapiniti. Irio matacairiri Tasoren-tsi. ¹²Ipamititiri atiri ivaniote Pavoro, aisati yoicoro, irosati yavisacotantajari.

Aisati iriori mantsiari, yaanaqueneri, yoavisacotajiri. Aisati yoavisacotajiri neiriri camaari. ^{13,14}Ainiro anta jorio, quenaquenayetatsiri, oavisacotapinivetariri neiriri camaari: iriojeitaque itomipee Esheva, icarajeiti 7. Jorio ini Esheva, ishanincatacari saserote. Ineajeivetacari Pavoro yoavisacotiri neiriri camaari. Icoajeiveta inquempetearime, icantashitantariri itsipa camaari:

—Ainiro Jesoshitatsiri iquenquetsacotiri Pavoro. Iriotaque amitacotanari noavisacoteri yoca neaquempiri. Pojocanajeriqueti iravisacotantajeari.

¹⁵Yacanaqueri camaari:

—Noneiri Jesoshi. Noneiri Pavoro. Irompa avinti, te noneanirotempiji. ¿Paita nonquemisantantempiri?

¹⁶Irosati imitajashitantanacari, mita; yantapaaqueri apitero. Imataqueri, irosati ishiatsempequijeitantanaca, yojocanaquero pancotsi. Oshequi yoatsinaqueri.

¹⁷Iquemacojeitaqueri maaroni ejesosati: jorio, caari joriotatsine, maaroni. Itsaroajeitanaque aisati icantajeitaque:

—Icameetsati Avincatsarite Jesoshi: imatacairi quemisantasanotiriri yoavisacotiri neiriri camaari. Irinti shemetatsiri, tecatsi matacayerine.

¹⁸Impoiji ipocapaaque oshequi quemisantatsiri, icantajeitapaaque:

—Ainiro nantayetiro caari cameetsatsi, nocoaque iroameetsatena Tasorentsi.

¹⁹Oshequi sheripiaritatsiri yamayetaquero sanquenarentsi yashiyetari: irootaque oamejeitiriri isheripiaritantari. Yapatojeitaquero, irosati itaimotantacari maaroni atiri. Icantajeiti:

—Te noncovejiji namatavijeitajeri aisati noshaninca.

Imoncarajeitaquero ovinaro sanquenarentsi, opinajeitaca S/.50,000. ²⁰Oshequi iquenacayetanaquero irineane Avincatsarite, aisati itimi oshequi quemisantajeitaqueriori.

²¹Impoiji ishiretaca Pavoro irijate Jerosarequi, irosati ijtatananaca. Iquenanaque Maseroniaqui, jero anta Acayaqui. Icantitaca:

—Nintanaquearo nojate Jerosarequi, impoiji nojatanaque Oromaqui.

²²Itiancaque apite amitacotapinitiriri maseroniasatipee: yora Timoteo, jeri Erashito. Iriori Pavoro, osamani itimanaque anta Ashiaqui.

Iquisajeitanaca ejesosati.

²³Te meeca capichaji incantavacaimentearo oca acamantacotaqueteri Avincatsarite. ²⁴Itiminta vetsicapinitiriri perata pajitachari Irimitirio. Ishiacantapinitiro ovanco Aretemisa iquemisantapinijeitantarori ishaninca. Ora Aretemisa irootaque ijitasorentsijeitane. Ainiro yora amitacotiriri, vetsicapinitiniriri ora pancotsijaniqui; ari ipinatapinitiriri oshequi perata, yaajeitantari oshequi quirequi. Iro cantaincha te meeca iramanantajeroji quemisantajantsiri, irosati iquenqueshiretantanaca Irimitirio. ²⁵Ari yapatojeitiriri maaroni iratiritepee, icantajeitiriri:

—Antapinijeitiro oca shiacaantsi aajeitantari airequite oshequi. ²⁶Meeca pineaqueri Pavoro, aisati piquemacotaqueri: yamatavijeitiriri oshequi atiri, ipashinijeitantajari. Icantaniroti: “Caari oni Tasorentsi oca yovetsicayetiriri atiri”. Te apatiro iroametanteaca: irotaintsi intsoteero Ashiaqui iroametantayete. ²⁷Itseencajeitanaqueecari maaroni atiri, aisati itseencanaquero cari maaroni avetsicajeitiriri. Tempa opincatsarotasanoti Aretemisa: iquemisantajeivetacaro maaroni ashiasati, jeri maaroni atiri. Ipincatsajeivetaro meeca, iro cantaincha iquemisantajeiteririca Pavoro, irojocacajeiteri iquemisantiro.

²⁸Iquemantajeitavacarori oca, iquisajeitanaca. Icajemajeitanaque:

—Opincatsarotasanoti Aretemisa, oca pincatsariventajeitiriri ejesosati.

²⁹Icajemajeitanaque savicajeitatsiri nampitsiqui. Ishiajeitanaca maaroni anta yantaveetapinijeitinta. Inoshicajeitanaqueri Cayo, jeri Arishitaraco, sorororo. Maseroniasati ini apite, tsipatapinitariri Pavoro. ³⁰Icoaveta Pavoro irojatacoven-tanaquerime anta, iro cantaincha te irishineteriji quemisantatsiri. ³¹Ainiro itimi aisati aparopee pincatsaritatsiri, poneachari Ashiaqui, nintiriri Pavoro. Itianquiri ishaninca, camantapaqueriri: —Eiro catsini poijatiritsi anta: yoimpi-cari.

³²Icajemajeitanaque apatojeitainchari, onashiyetaca icantayetiri. Icajemashijeitanaca. Te iriojeiteji oshequi paitarica yapatotimentari. ³³Ainiro anta Arijantero, itiancane jorio, isatecaqueri nianqui. Yacotashitanaqueri maaroni atiri, iriotanteari icoaque inquenquetsatacaajeiterime. ³⁴Iro cantaincha iojeitantacari irio jorio, icajemapinijeitanaque maaroni: —Opincatsarotasanoti Aretemisa, oca pincatsariventiriri ejesosati.

Osamani icajemajeitanaque, ishirinca-naca catsirincaiteri. ³⁵Yoimajerentajeita-queri yora sanquenatapinitatsiri anta nampitsiqui. Impoiji icantajeitiri:

—Noshaninca. Tempa arojeitaque pincatsajeitirori Aretemisa, aisati ashentapinitiniro ovanco. Tempa aisati ashentapinitiro oca shiaquerori, pariapaintsiri jenoqui. Ayojeitanaquero oca, ³⁶tecatsi tseenquerone oca nocanta-queri. Cameetsa meeca pimajerejeitana-que. Eiro pishintsititsi panteri yoca shiramparipee. ³⁷Jerica pamaqueri, tecatsi incantero ovanco, aisati te incantimateroji atasorensite. ³⁸Jeri aisati yoca Irimitirio, icarajeitiri pashini antirori perata. Incoaquerica incantaco-teri, cameetsa iraanajeri anta savicacaan-tatsiriqui, impoiji iroametavacaajeitea anta. Irijatequeti anta incantacoventava-cayea. ³⁹Otimirica pashini picoaqueri

piote, ari pincanteri coajica yora oameta-vacaachari, irampatojeitajarica. ⁴⁰Jero aca meeca apatojeitaca, aquisatsatavacaajeitaca. Icamantacotashiteecari aquisajeit-aqueri avincatsarite, impoiji tecatsi ancantea ancantacoventajea arosati.

⁴¹Icantantarori oca, itiancajeitajiri maaroni apatojeitainchari:

—Meeca aitaapaaji, pincatsimareajeita-naje, pijajeite pivancopeequi.

Ijatanaque Pavoro Jerosarequi.

20 ¹Ari imajerejeitanaque ejesosati. Impoiji iriori Pavoro icajemajei-tiri quemisantajeitatsiri, yoametasanojei-tiri. Impoiji ijatanaji, yovaanaja Masero-niaqui. ²Anta oshequi iquenaquenayeta-naque, oshequi yoametantayetanaque. Irosati yareetantanaca Quireshiaqui.

³Icarati mava cashiri isavicapaaque. Irovetaingha intetearome pitotsi irijatan-teameri Shiriaqui. Irosati iotacotantaca-riri jorio, yaimanavetacari iroyerime. Irosati iquenqueshiretantanaca:

—Nompianajeta anta Maseroniaqui.

⁴Ari ijatanaque, icarajeitanaque Sopatoroshi itomi Piro vereasati, Arishita-raco, jeri Seconto tesaronicasati, Cayo terevasati, Timoteo, Tiquico, jeri Torojimo ashiasati, maaroni. ⁵Ijivajeita-naquena Toroarequi, yoyeajeitaquena anta. ⁶Avisanaque quitaiteri yoanteetapi-nitarori tanta caari tapiacha, impoiji noponeanaja Jiriposhiqui, noquenacota-naque pitotsiqui. Ocarati 5 quitaiteri nareetantajari Toroarequi, anta itiminta oyeajeitaquenari. Irosati nosavicanta-paaca ocarati 7 quitaiteri.

⁷Otomincotapaaque. Napatojeitaca nocarajajeitaquero tanta noquenqueshire-jeitantajariri Jesoshi icamimentajeita-quee. Iquenquetsatacaajeitana Pavoro. Ishiretaca irijatamane, irootaque yosama-nitantanacarori iquenquetsatanaque, vero, vero. Irosati nianquiteni. ⁸Otima-

que oshequi tsiomentotsi anta napatojeitacanta. Iro napatojeitancari shitamencotsi onta jenoquiniri; mavatapaintsiri, jenoqui anta. ⁹Isavicaque omoroqui yora evancari pajitachari Eotico. Osamani iquenquetsataque Pavoro, irootaque aantapaacariri ivochoque. Irosati ipariantanaca: iquenaitanaque, sheroo, tirin, anta quipatsiqui. Ari naniireashijei-tanaqueri, itinayeevetapaacari; camaque ini, torein. ¹⁰Ari yaniireapaaque Pavoro iriori. Itsentetashitapaaqueri, yavitsanotapaaqueri. Icanti:

—Eiro poashiretacotaritsi: aneatsi ini.
Ari itinaanaja, aisaitanaji.

¹¹Ari nataijeitanaji, icarajapaaquero Pavoro tanta, noajeitaca. Impoiji iquenquetsatacaajiri, irosati oquitaitetan-tanaja. Irosati ijtantanaja. ¹²Yayeetanajiri evancari ivancoqui, aneanaji. Te capichaji iroveshiraajeitanaquea.

¹³Nojivatanaque pitotsiqui, noquenacotanaque Asoqui; irinti Pavoro iquenanaque avotsiqui. ¹⁴Ari ineapaajanari Asoqui, irosati notetantanajariri pitotsiqui. Novaajeitanaja Mitirenequi, nocaantanaca, shiririri. ¹⁵Oquitaitetamanaji novaanaja aisati. Nomontetacotanacaro Quio. Omavatanaque quitaiteri, irosati anta Samoshiqui. Quitaiteri pashini nareetanaca Miretoqui. ¹⁶Iquenqeshiretaca Pavoro iravishitanaquearo Ejeso, eiro itimaanitapaajitsi Ashiaqui. Icoasanotaque irareetitajea Jerosarequi, irimoncaraapeemparo quitaiteri pajitachari Pentecoshiteshi.

¹⁷Itiancaque Ejesoqui, icajemacantaqueri quenquetsatacaqueriri quemisantajeitatsiri anta. ¹⁸Ari yareejeitapaaca ejesosati, irosati icantajeitantavacari:

—Piotacotasanaquea jaoca nocantari notimimotantajeitaquempi. Iroaquerani nareetaca Ashiaqui, aitaque nocantitapaaca, irosatitsi meeca. ¹⁹Anta oshequi nantaveetapinitiniri Avincatsa-

rite, teyea iro noshemete. Niraacotapini-taquempi. Aisati ocantimoneentaquena anta yaimanavetaquena joriopee iroyename. ²⁰Notsoteaquero, tempa aitaque nocamantajeitaquempi maaroni oca cameetsayetsiri. Te nomajeretashi-teaji. Noamejeitimpi anta yapatojeitacanta atiripee aisati anta pivancopeequi. ²¹Nocamantajeitiri jorio, jeri caari joriotatsi, maaroni: “Pinquenqeshirejeitanajea piojeitantajariri Tasorentsi. Pinquemisanteri Novincatsarite Jesoshi”. ²²Ari meeca nojate Jerosarequi, ojatacaanaquena Ishire Tasorentsi. Te nioteji jaocarica incanteenari anta. ²³Apatiro niotaquero oca ocamantaquenari Ishire Tasorentsi. Maaroni nampitsiqui ocamantapinitana: “Queario iroisoyeetempi, iroashinoncayeetempi”. ²⁴Te noncoasanteji noncantaitatitempani nontime aca quipatsiqui, irointiquea nocoasanotaque nomateneri Avincatsarite Jesoshi paitarica inintacaquenari. Aisati nocoasanotaque nontsoteneri oca nantaveetapinitiniriri. Ocameetsati oca nocamantapinijeitimpiri: “Ineshinoncajeitaquee Tasorentsi”. ²⁵Niotaque meeca eiro aneavacaajatsi aisati. Nocarajeivetaquempi, nocamantajeitaquempi jaoca icantari Tasorentsi ipincatsariventanti. ²⁶Irootaque meeca nocamantantimpirori oca. Ariorica iroasanquetaarantempi Tasorentsi, te naro oasanquetacantempine: tempa nocamantitaquempi peerani. ²⁷Te nontsaroyeji, notsoteaquempi maaroni icantayetiri Tasorentsi.

Irootaque icantajeitiriri Pavoro.

²⁸Jero oca icamantajeitiriri aisati:

—Queariompia, pojocaacoventajeitiri piyemisantaririnte anta. Tempa avirojeitaque ocoyeane Ishire Tasorentsi. Pamenacoverteri maaroni quemisantajeitatsiri, pintacojeitari. Tempa iriojeitaque yoavisacojeitakeri Jesoshi, icamimentajei-

taqueri, yaparajatimentajeitaqueri iriraja.

²⁹Coajica, nojatanajerica, impocashitempi amatavitempinemeri: noshiacantaqueri catsimayetatsiri. Eiro ipeacotimpitsi, yoashinoncaimpicari. Niotaquero oca.

³⁰Timatsi aca picarajeitica quenquetsatacaavetempineri, iro cantaincha eiro otampaticatanasotitsi iroamejeitempi. Yojojacaimpircari piyemisantaririnte, iroiijatanteariri iriori.

³¹Queariompia, pinquenqueshiretero. Ocarati mava osarintsinoametapinitaquempi. Nocantiani: tsiteniriqui, quitaiteriqui. Aisati niraacotapinitaquempi. ³²Nocantiri Avincatsarite: “Pojocaacoventajeiteri ejesosati, aisati pineshinoncatimenteriquemisanthro pineane”. Aitaque omataca irineane oquemisantacaasanotaquempi, oavisacojeitaquempi. Tempa picarajeitiri quemisantajeitiriri icoyeaqueri. ³³Te noncoitayeteriji iirequite pashini atiri. Te noncoitayeteriji iitsaare. ³⁴Piojeitaque narosatiquea antaveetanontacha, naantayetarori maaroni coiteimotanari, aisati nintacojeitari notsipajeitari. ³⁵Nomayetaquero maaroni oca piojeitanteari avirori pintacotantajeitea. Pinquenpejeitena narori, pantaveetasanojeite, pintacotantajeiteariri ashinoncaincari. Pinquenqueshiretero irineane Avincatsarite Jesoshi, icantitaniri: “Iro cameetsasananotatsiri ampashitanea. Te iro cameetsasananotatsine aashitearo paitarica impashiyeeteeri”.

³⁶Irootaque icantajeitaqueriri Pavoro ejesosati. Impoiji itiyeroanaca, icarajeitiri ejesosati maaroni, iquenquetsatacaajeitiri Tasorentsi. ³⁷Iraajeitanaca maaroni. Yavitsanojeitavajiri, inintavorojeitavajiri. ³⁸Yoashiretacojeitanacari iquemaqueri icantanajiriri: “Eiro pineajanatsi aisati”. Yoajeitavajiri anta pitotsiqui, yamenavajiri ijatanaji.

21 ¹Irosati nojocajeitantanajari quemisantacaajeitiriri ejesosati. Notejeitanaca pitotsiqui, tampatica noquenacotanaque Coshiqui, nocanta-

naca shiririri. Oquitaitetamanaque novaamanaja Irorashiqui, irosati novaantanaja Pataraqui. ²Noneapaaquero anta pitotsi monteachaneri Jenishiaqui. Notetapaaca, noquenacotanaque.

³Noneantanacarori Tsipire, noquenanam-pitanaquero nampatequi. Nanaanaquero, irosati Shiriaqui, naatapaaque Tiroqui. Anta nampitsiqui yoaniitanaquero marinero ovaararontsi. ⁴Nocoayetapaaqueri narori quemisantatsiri. Noneantapaacariri nosaviquimotapaaqueri 7 quitaiteri. Oamejeitaqueri Ishire Tasorentsi, icantajeitantariri Pavoro:

—Eiro pijatitsi Jerosarequi: yoashinon-queetavaquempicari.

Iro cantaincha te inquemisanteriji Pavoro. ⁵Ari omoncarataja notetantanajari aisati, nojajeitanaji. Itsipajeitanacuena quemisantajeitatsiri irosati otsapitapaa nampitsi, icarajeitanacuero ijina, jeri itomipee. Notiheroajeitanaca anta otsapijaqui, noquenquetsatacaajeitaqueri Tasorentsi. Impoiji novetsatavacaajeitanaja. ⁶Notetanajaro pitotsi, ari ipiajeitanaja iriori ivancopeequi. ⁷Ari noponeanaca Tiroqui, noquenacotanaque, novaanaja aisati Toremairaqu. Noquivantapaaqueri ayemisantaririnte. Aparo nomaaque. ⁸Oquitaitetamanaque, novaamanaja aisati. Nareetantapaacari Sesareaqui, noquivantapaaqueri Jeripi, yora quenquetsatacaantatsiri. Ari oshequi nosaviquimotapaaqueri. Iriotaque icarajeitiri yora intacotantachari sietetatsiri. ⁹Timatsi otsipasato irishinto, timashitachari; ocamantantajeiti iroori.

¹⁰Oshequi nomaanaque. Jeri yareetapaaca camantantatsiri pajitachari Acavo, iponeanaca iriori Joreaqui. ¹¹Ipcashitapaaquena, yaapaaquero ishiticatsaqui Pavoro. Irisati oisotashitajancha iitiqui, iracoqui. Icanti:

—Aitaque ocanti Ishire Tasorentsi: “Aisati inquempeyeetaqueri yora

ashitarori ishiticatsaqui. Iroisoteri jorio, yora jerosaresati: oiso, oiso. Imperi pashinisati atiri, iranaaqueri”.

¹²Noquemantavacarori oca, nocarajeitaqueri maaroni ashaninca, nocantajeive-tari Pavoro:

—Eiro pijatitsi Jerosarequi.

¹³Yacanaquena:

—¿Paita piraantari? ¿Paita picantashi-retacaantanari? Tempa naro quemisanti-riri Avincatsarite Jesoshi. Iroisoyeetenata anta Jerosarequi, iroyeetenata: te nontsaroacayeariji.

¹⁴Te inquemisantenaji, irosati nomaje-retantanaca. Nocantajeiti:

—Aitaque oncanteata paitarica icoiri Avincatsarite.

Yareejeitanaca Jerosarequi.

¹⁵Impoiji novetsajeitanajari sesareasati, novaanaa Jerosarequi: noquenanaa avotsiqui. ¹⁶Itsipajeitanaquena aparopee quemisantatsiri, sesareasati. Yaanaquena anta ivancoqui Manaso, yora tsipiresati: iriotaque intacantarori iquemisanti. Nomaimotapaaqueri iriori. ¹⁷Nareetantapaacari Jerosarequi, yaacameetsajeitavaquena ayemisantaririnte, iquimoshireventavaquena. ¹⁸Oquitaitetamani iquivanta-jantiri Pavoro Santiaco, noijatanaqueri narori. Anta yapatojeitacanta maaroni quenquetsatacantatsiri. ¹⁹Novetsatava-caajeitaca, impoiji itsoteaqueneri Pavoro, iquenquetsatacapaaqueri:

—Itiancaquena Tasorentsi noquenque-satacaajeitiri oshequi pashinisatipee atiri. Icarajeiti oshequi quemisantajeitiriri.

²⁰Iquemantavacarori, icantajeiti:

—Cameetsa ini Tasorentsi.

Impoiji icantajeitiri:

—Pamene, Pavoro, amoncaratavacaa-jeitaca aquemisantajeitiri Jesoquirishito. Iquemisantajeitaque oshequi catsini ajorioririnte, iro cantaincha aisati

iquemisantasanojeitaquero isanquenati-niri Moishishi. ²¹Oshequi iquemacojeita-queri picantiriri ajorioririnte, saviquimo-tiriri pashinisati atiri: “Pojoquero isanquenare Moishishi. Eiro pitoyeanta-jeitiritsi pitomi. Pojocajeitajero oca amejeiveitaniri arori”. ²²¿Jaoca pincanteari? Aitaque inquemacojeita-quempi, areetapaaquempi: inquisajeitava-quempi. ²³Pinquemisantero oca noncanti-tempiri: jerica itsipasati shirampari, timatsi icashiacaacariri Tasorentsi. ²⁴Paanajeri maaroni ivancoqui Tasorentsi, pincanteri Tasorentsi iroameetsanta-jeitempi. Pimpinateneri yocapee paitarica, irameetantarori iishi. Impoiji iriojeitanaque ajorioririnte te ontampati-ateji oca iquemacotaquempiri. Iriotana-que pimoncarataquero isanquenare Moishishini. ²⁵Ja meeca yora pashinisati atiri, yora quemisantatsiri: nopacanta-queri iriori sanquenarentsi. Jero oca nocantaqueriri: “Eiro poitaritsi ivatsa yoyeetaquenerori yovetsiqueetiri, caari oni Tasorentsi. Eiro poacotarotsi ivatsa iriraja. Eiro poaritsi ampitsiitachari. Eiro pineavintsatirotsi tsinane caari pai”.

²⁶Ari iquemisantaqueri Pavoro. Oquitaitetamanaque yaanaqueri evancari, icantajeita-queri iroameetsatanteariri, aisati iqueajeita-paaque ivancoqui. Icamantapaaqueri anta:

—Oncarate 7 quitaiteri nomoncaratan-taquearori nantajeiteri iroameetsatante-nari Tasorentsi, impoiji noajeiteneri virantsi, nompajeiteri.

Yoiminqueaqueri Pavoro.

²⁷Irovetaicha omoncarateame 7 quitaiteri. Ineajeitaqueri anta ivancoqui Tasorentsi jorioque, poneachari Ashiaqui. Iquisacaacari apatojeitainchari, impoiji yaajeitaqueri Pavoro, shepi. ²⁸Icajemajeitanaque:

—Noshaninca, pamitacojeitena. Iriotaque yoca quenaquenayetatsiri

amatavijeitiriri atiri; icantanirotaqueri: “Te incameetsateji joriopee. Te oncameetsateji isanquenare Moishishi. Te oncameetsateji ivanco Tasorentsi”. Irootaque icantajeitiriri atiri. Pamenete meeca yamanirotaqueri aca pashinisati atiri, caari ocameetsatantana meeca oca pancotsica cameetsavetachari.

Irootaque icantajeitaqueriri. ²⁹Chapinqui ineavaqueri Pavoro anta nampitsiqui, itsipavetari Torojimo: yora ejesosati. Ijtitashijeitavacari irootaque iqueacaapaqueri ivancoqui Tasorentsi, irootaque icantantacari: “Yamanirotaqueri aca pashinisati atiri”. ³⁰Ari iquisajeitanaca maaroni nampitsiqiniri, yapatojeitanaca anta. Yaaqueri Pavoro shepi, inoshicanakeri saiteriqui, sorororo. Irosati yashitantanacaro ivanco Tasorentsi.

³¹Irovetaincha iroyerime, iro cantaincha iquemacotaqueri yora iyomantantite sororopee, carajeitaintsiri 600. Icamanteetiri:

—Iquisajeitanaca maaroni jerosaresati.

³²Ishintsiti yaanjiri soraro, jeri capitanotatsiri, ishiashijeitanacari. Ineantajeitavacariri atiri, yoipacajeitanaquero ipasajeitiri. ³³Ari ipocapaque comantanti, yaapaaqueri Pavoro. Yoisotacantaqueri. Iro yoisotantapaacariri apite arenatsa. Isampitacotiri:

—¿Janicampa yoca? ¿Paita yantaqueri piquisajeitantacariri?

³⁴Ipashiniyetanaquero icantayetanaqueri. Icajemajeitanaque, tecatsi incantea comantanti iriotacoteri, irootaque yaacantantanacariri anta ivancoqui soraro. ³⁵Yareetapaacaro ataimentotsinta, oshequi itatsincajeitanaqueri. Irosati yoancacaantapaacari soraro. ³⁶Yoijatanaqueri oshequi atiri, icajemajeitanaque:

—Paanirotanaqueri.

³⁷Irovetapaincha inqueacaapeerime Pavoro pancotsiqui. Icantiri yora comantanti:

—¿Cameetsampa nonquenquetsatacayempi?

Icantiri:

³⁸—¿Piotirompa quirieco? ¿Tempa aviरो ejiptosati, yora quisacaacariri atiri chapinqui? ¿Tempa aviरो aanajiriri chapinqui 4,000 oantatsiri anta caaraite-riqui?

³⁹Yacanaqueri:

—Te. Nainti jorio. Noponeanaca Tarisoqui, ora shirishiaquiniri. Iotacojeitiro nonampi. Meeca noncamantempi: pishinetena nonquenquetsatacayeri atiri.

⁴⁰Ari ishinetaqueri, icantiri:

—Jentsiqueti, pinquenquetsatacayeri. Irosati icatiantapaaca ataimentotsiqui, cati. Impoiji yacotashitanaqueri atiri. Imajerejeitanaque, irosati iquenquetsatacaajeitantacari. Iro iquenquetsatacaantari evereo.

Iquenquetsatacaqueri Pavoro joriopee.

22 ¹Jero oca icantajeitiriri Pavoro ijoriorinte:

—Noshaninca. Meeca narosati camantacotachane. Pinquemisantajeitavacuena.

²Iquemantavacariri ineanantaro evereo, aiqero catsini imajeretasanojeitanaque. Ari icantanaque:

³—Narotaque jorio. Ari otimaquenari ina anta Tarisoqui, onta shirishiaquiniri. Aca nampitsiquica ari nantearitaqueri. Yoametaquena Camariyeri, itsoteasanotaquenaro oca icantajeitiri intacantaqueeri. Nocoasanotaque noshintsiteneri Tasorentsi paitarica nantiniriri, noquempevetaquempi avirori meeca. ⁴Noquisasanotiri oametantirori oca iroaqueratatsiri, irootaque noantayetariri, noisotacantayetaqueri, aisati noiminueacantayetaqueri shirampari, tsinane, maaroni. ⁵Iotana ivincatsarite saserote queariotaque oca nocantaquempiri. Aisati iquempejeitanaja maaroni savicacaantajeitatsiri: yora

oametavacainchari, iojeiti. Iriojeitaque panarori sanquenarentsi isanquenatiniri tamashicosati. Itiancaquena nonquisajeitaneartarime quemisantajeitiriri Jesoshi. Nojavetaca Tamashicoqui naayerime savicatsiri anta, noisoterime. Namaquerime aca iroasanquetantearirime saserotepee. ⁶Noquenanaque avotsiqui, noquempejitapaacaro Tamashico. Ari icarataque tampatica catsirincaiteri. Omapocapaaquena, amorecacotapaaquena amorecatsiri, oponeanaca inquitequi. ⁷Notaanaque quipatsiqui, porocn. Noquemaqueri icantaquena: “Saoro. Saoro. ¿Paita piquisantaquenari?” ⁸Nacanaqueri: “¿Janicampi Novincatsarite?” Icantaquena: “Narotaque nainti Jesoshi, nasaretasati: narotaque piquisaqueri”. ⁹Ineajeitaquero notsipajeitari oca amorecatsiri, iro cantaincha te inquema-jeitavaqueroji icantaquenari Jesoshi. ¹⁰Nocantiri: “¿Paita picoacaquenari nanteri?” Icantana Pincatsari: “Pincatiana-je, pijate Tamashicoqui. Anta incamanteetempi paitarica panteri”. ¹¹Oshipaqui-reacotasannotanaquena amorecatsiri, irootaque caari noneantaja. Ari yacatsatanaquena notsipajeitari, irosati nareetapatapaaca Tamashicoqui. ¹²Itimi anta shirampari pajitachari Ananiashi. Iquemisantasanotiro isanquenare Moishishini. Ineacameetsajeitiri maaroni jorio, savicajeitatsiri anta. ¹³Ipocashitaquena, iquempejitapaaquena, icantapaaquena: “Saoro, aviro noyemisanantaririnte. Pamenanaje”. Irosati namenantanaja, noneaqueri. ¹⁴Aisati icantana: “Icoyeaquempi Tasorentsi piotantearori icoacaquempiri iriori. Icoyeaquempi pineanteariri yora Cameetsatasantatsiri. Aisati icoyeaquempi pinquemasantanteariri iriori. ¹⁵Aisati pinquensatatacoteri. Pincamanteri maaroni atiri oca pineaqueri aisati oca piquemaqueri. ¹⁶¿Paita poisamanincantacarori? Tsame,

pivaotisatea. Ainiro caari cameetsatsati pantayetiniri, iro cantaincha ariorica paventeari Tasorentsi, iroameetsanta-jempi”. ¹⁷Ari impoiji nopianaja Jerosarequi. Noquenquetsatacaavetacari Tasorentsi anta ivancoqui, impoiji te niotacoteaji, ¹⁸irointi noneashitacari Avincatsarite. Icantaquena: “Pishintsite, pojocanajero Jerosare, pishianaque. Eiro iquemisantee-tirotsi oca piquensatatacotaqueinari”. ¹⁹Nocantiri: “Novincatsarite, iojeitaque notsoteaquero maaroni pancotsi yapatojeitantari, naajeitaqueri quemisanti-mpiri. Noiminquacantaqueri, aisati nopasanatacantaqueri. ²⁰Narotaque oacantaqueriri Ishitevani: yora camantacotimpiri. Nocatiaca ocaquiji, nocantiri: ‘Cameetsa incame’. Namenaqueneri oqueriri iroicoropee”. ²¹Iro cantaincha icantaquena: “Tsame pijate. Nocoaque nontianquempi arejiqui, anta itiminta pashinipee atiri”.

²²Iquemisantajeivetacari joriopee, iro cantaincha iquemajeitantavacarori oca, icajemajeitanaque. Icantaajeiti:

—Pojocanirotanajeri. Te oncameetsateji iranee: poyeri, incameta.

²³Icajemajeitanaque, iquisajeitanaca, irootaque ipishoncajeitantanacarori iroicoropee aisati quipatsipane. ²⁴Ineantajeitacariri comantanti iquisajeitaca, irosati icantantacari soraro:

—Paanaqueri, pinqueacaanaqueri anta; pimpasanateri incamantantempiri paitarica yantaqueri iquisajeitantacariri ishaninca.

²⁵Ari yoisovetacari impasatantearirime. Ari itimi anta capitantatsiri, icantiri Pavoro:

—Narotaque shanincatariri oromasati. Tequera piotacojeitena otimirica nantane, ¿arimpa pimpasatashitena?

²⁶Iquematiiri, ijatashitaqueri comantanti. Icantapaaqueri:

—¿Paita poyeriri? Irinti ashaninca arori.

²⁷Ari ipocashitaqueri comantanti, icantiri:

—Pincamantasanotenate. ¿Pishaninca-tarimpa oromasati?

Icantiri:

—Je, noshanincajeitacari.

²⁸Icantanaque comantanti:

—Oshequi nopinaventaqueri oromasati noshanincatantacariri.

Icanti Pavoro:

—Aitaque notimaqueri noshanincatan-tacariri.

²⁹Intsipaita itiancajiri yora pasaterine-meri. Irinti comantanti, itsaroanaque.

Iotaque yoisotashitacari shanincatacariri oromasati: te oncameetsateji iroisotashi-teari.

Yaanaqueri Pavoro anta inaquentaa oametavacainchari.

³⁰Icoaque comantanti iriotasanote paita icantacotantariri joriopee Pavoro.

Oquitaitetamanaque yoisoreajiri. Yapato-tacantaqueri jivatacaajeitiriri saserote, jeri maaroni oametavacaajeitainchari.

Irosati yoirincacantanacariri Pavoro, yaanaqueri anta.

23 ¹Yamenasanotapaaqueri maaroni oametavacainchari. Icantiri:

—Noshaninca. Nioti ineacameetsatasa-notaquena Tasorentsi. Nocantatiani cameetsa nosaviquini, irosatitatsi meeca.

²Yora Ananiashi ivincatsarite saserote, icantiri tsipatariri anta:

—Pimpasavanteniroteri.

³Icantanaque Pavoro:

—Avirotaque avinti inquishe Tasorentsi; ainiro pantane: oshequi pamatavianti. Jero meeca pisaviqui aca, picoaque pimoncarate-rome Sanquenarentsi, pincantacaventante-narime. Iro cantaincha pipasatacantaquena, te pimoncarateroji Sanquenarentsi.

⁴Icantanaque catiainchari ara:

—Iriotaque picantaqueri ivincatsarite saserote.

⁵Yacanaqueri:

—Te nioteji iriorica ivincatsarite saserote. Ocanti Sanquenarentsi: “Eiro picantimatiritsi pincatsariventiriri pishaninca”. Niotaqueme, eiro nocantirime.

⁶Iotaque Pavoro anta iconoayetacari saroseopee, jeri aisati variseopee. Icajemanaque:

—Noshaninca. Narotaque variseo.

Narotaque itomi variseo. Niotaque intinaajeitaje maaroni camajeitaintsiri, irootaque iquishimentaquenari meeca yoca.

⁷Iquemantajeitavacarori oca icantaqueriri, iquisatsatavacaajeitanaca variseopee jeri saroseopee. Iquisavacaajeitanaca. ⁸Icantapi-nijeiti saroseo: “Eiro itinaajatsi camajeitaintsiri. Te aneriji Tasorentsi inampire. Te aneroji ashire arori”. Iro cantaincha icantajeiti variseo: “Antinaajeitanaje.

Timatsi inampire Tasorentsi. Timatsi ashire maaroni”. ⁹Ari iquisatsatavacaajeitanaca. Icatianaca oametantirori sanquenarentsi, variseo ini. Icantasanotanaque:

—Tecatsi nonquemacoteri yoca, yantaquero caari cameetsatatsi. Ariorica yoametaqueri Tasorentsi. Ariorica yoametaqueri inampire.

¹⁰Aiquero catsini iquisatsatavacaajeita-naca. Yaamaanaca comantanti ari impichareajeitanaqueri Pavoro. Itiancaqueri soraro:

—Pijate, paajanteri.

Ari yaniiereajeitanaque, ijajeitanaque nianqui, yaapitsajeitavajiri. Yaanajiri anta pancotsiqui. ¹¹Aparo imaaque, otsitenitanaji aisati, iconijatimotapaa-queri Avincatsarite. Icantapaaqueri:

—Piveshireanaquea. Piquenquetsataco-taquena aca Jerosarequi, aisati pinquem-petajea coajica anta Oromaqui.

Yaanajiri Pavoro Sesareaqui.

¹²Ari oquitaitetamanaji, yora joriopee, isareajeivetacari Pavoro iroyerime. Icantavacaajeitaca:

—Meeca, eirotsitarica airi, eiro avajatsi, aisati eiro irajitsi. Ariorica amatavitavacaajeitea, tempa ari iroasan-quetaquee Tasorentsi.

^{13,14}Yanaajeitaquero 40 shirampari sareavetacariri iroyerime. Ijatashijeitiri jivatacaajeitiriri saserotepee, jeri aisati savicacaantayetatsiri. Icantapaaqueri:

—Eirotsitarica noiri Pavoro, eiro noitajatsi, aisati eiro niritajatsi. Eirorica nomajeitiro, nocoajeitaque iroasanquejeitena Tasorentsi. ¹⁵Pincarajeiteri maaroni oametavacainchari, pincantaiteri yora comantanti: “Pamaquenari Pavoro, nocoaque niotacotasanoteri, paitarica yantiri”. Irootaque pincanteriri. Naroquea nainti, novetsicajeititaquea noantavaqueariri nianqui, tequeratsita irareetea.

¹⁶Jeri otomi iritsiro Pavoro, iquemacoventaqueri iriconquiri isareacari iroyeeteri. Ari ijatanaque anta ivancoqui soraro, icamantapaaqueri Pavoro.

¹⁷Irosati icajemacantantacari iriori aparo capitantatsiri, icantiri:

—Paanaqueri yoca evancari anta itiminta comantanti. Timatsi incamanterriri.

¹⁸Irosati yaantanacari anta. Icantapaaqueri:

—Icajemaquena Pavoro, yora aiminqueiri oshaiteji. Icantaquena: “Paanaqueneri comantanti yoca. Timatsi incamanterriri”.

¹⁹Ari yacatsatanaqueri aiqetiji ara. Imanacaacari, isampitaqueri:

—¿Paita ojita oca pincamanteneri?

²⁰Icantiri:

—Icantavacaaca joriopee, incoacojeitaquempi paanajeneri Pavoro anta yoametavacaajeitacanta. Icoaque iramatavitempi, incante icoaque irisampitacoventasanoteri coqui. ²¹Iro cantaincha, eiro piquemisantiritsi. Timatsi shiramparipee, yavisajeitaquero 40 icarajeiti,

sareacariri iroyeri. Icantajeitaque: “Eirotsitarica airi, eiro avajatsi, aisati eiro irajitsi. Eirorica airitsi, acoaque iroasan-quetajeiteeta Tasorentsi”. Meeca yovetsicajeitaca. Yoyeaquempi meeca, panteneri oca incoacotempiri.

²²Ari itianquiri comantanti yora evancari. Icantavaqueri:

—Eiro picamantiritsi ashanincapee oca picamantaquenari.

²³Impoiji icajemiri apite capitano. Icantiri:

—Ariorica onianquii tetimatanaque, povetsicajeiteri 200 soraro, 70 quijacotearineri cavayo, jeri 200 ajiriqueroneri isataamento. Irijajeite Sesareaqui.

²⁴Povetsiqueneri Pavoro cavayo, inquijacotanaqueari. Cameetsa paajeitanaqueri anta itiminta pincatsari Virishi.

²⁵Impoiji isanquenatiniri sanquenarentsi, iquempetaquero oca: ²⁶“¿Ainirrompi Virishi? ¿Tecatsimpa oyempine? Narotaque Caraoriro Irishiashi sanquenatimpirori oca. Oshequi nopincatsatimpi. ²⁷Pineavaqueriya yoca shirampari nontianquempiri. Irovetaingha iroajeiterime chapinqui joriopee. Icamantetana ishanincatacari oromasati, irosati nojatashitantacari, notsipatanacari soraro, noavisacotajiri. ²⁸Nocoanaque niote paita incantacoteri, naanaqueri anta yoametavacaajeitana. ²⁹Noquemapaaqueri, icantavacaimentajeitaro sanquenarentsi. Iro cantaincha tecatsi incantacoteri aiminqueanteariri aisati avanteariri. ³⁰Timatsi camantapaaquenari isareetacari iroyeeteri, irootaque nontiancantempiriri. Nontianquempiri coajica yora quisaqueriri irijatashitempi incamantacotasanoteri Pavoro”. Irootaque isanquenatiniriri, impoiji ipavaqueri soraro:

—Jeroca paanajeneri Virishi, aisati paanajeri Pavoro.

³¹Ari iquemisantaqueri soraro, yaanaqueri Pavoro. Tsiteniriqui yareeta-caacari Antipatirishiqui. ³²Oquitaitetamaque ipiajeitanaja soraro inampiqui.

Irinti tsipatasanotanacariri Pavoro yora quijajojeitariri cavayo. ³³Yareejeitanta-paacari Sesareaqui, ipapaaqueri pincatsari sanquenarentsi. Aisati iriori Pavoro, yonijaapaqueri. ³⁴Ineanatavaquero sanquenarentsi, irosati isampitan-tavacari:

—¿Jaoca opajitari piipatsite piponeantacari?

Yacanaqueri Pavoro:

—Noponeanaca Shirishiaqui.

³⁵Icantiri pincatsari:

—Coajica impocavaquetsita camantaco-tempineri, ari nonquemisantanaquempi.

Impoiiji icantiri soraro:

—Pashitacoteri anta ivancoqui

Eroreshi, pamenasanoteriyea.

24 ¹Ocarataque quitaiteri apapacaroni, ari ijatanaque Ananiashi, yora ivincatsarite saserote, itsipatanacari aparopee savicacajeitantsiri. Jeri aisati itsipatanacari amitacotiriri, pajitachari Teretoro. Ijatashijeitanaqueri pincatsari, incantacojeiteri Pavoro. ²Icajemeetaqueri, impoiiji iquenquetsati Teretoro. Iquenquetsatacappaqueri Virishi, ineshinoncata-mempeacari, aisati icantacotashitacari Pavoro, icanti:

³—Meeca, novincatsarite, nopasonquijeitimpi. Cameetsa pipincatsariventajeitacuena, irootaque cameetsa nosavicajeitancacari aca. Poameetsajeitacuenaro paitaricapee, irootaque nopasonquitimentaquempiri maaroni. ⁴Meeca eiro nosamanitimpirotsi. Aitaquenea pametaro pineshinoncantanti, capichaji nocoaque pinquemisantavaquena.

⁵Noneaqueri yoca Pavoro, oshequi ineshirencanti. Iquisacajeitacari joriopee maaroni nampitsipeequiniri. Iriotaque jivatacairiri quemisantajeitiriri yora nasaretasati. ⁶Irovetanaincha impincacayenarome ivanco Tasorentsi, irosati naajeitancacari. Irovetanaincha nonmoncaraterome isanquenajeitananiri

Moishishini, noncantacoventantearirime yoca. ⁷Iro cantaincha yareetapaaca Irishiashi, yora comantanti. Itatsinquimentayetapaquenari, yaapitsatapaquenari. Itiancaquena nopocantacari aca, noncantacoventanteariri Pavoro. ⁸Meeca, pisampiteri, piotanteari queariorica oca nocantacotaqueriri.

⁹Icantajeitanaque joriopee:

—Queariotaque oca icantaqueri.

Aitaque ocantacari.

¹⁰Ari yora pincatsari icantaqueri

Pavoro irineanate iriori. Ari icanti:

—Niotaque ocarati meeca oshequi

osarintsi pipincatsariventajeitiri

noshaninca, irootaque noquimoshiretan-

tanacari. Meeca narosati camantacoven-

tajanchane. ¹¹Jentsite, pisampitacoven-

jeitena. Iroaqueratatsiquera ocarati 12

quitaiteri nojatantaitari Jerosarequi.

Nojaiti noquemisantaiti. ¹²Tecatsi

neenaneri nompiatsatavacayempaji anta

ivancoqui Tasorentsi, aisati te nompiatsa-

tavacayempa anta pancotsiqui napatotan-

tari, nampitsiqui, tecatsi. Aisati te

nampatojeiteri oshequi atiri. ¹³Tecatsi

incantea meeca iriotacaasanotempi oca

icantacotashitaquenari. ¹⁴Meeca

noncamantasannotempi. Noquemisantiri

yora Tasorentsi iquemisantiniri intacanta-

nari. Noquemisantajeitiro isanquenareni

Moishishi, aisati iroori isanquenareni

camantantajeitatsiniri. Queario, ainiro

yoametaquenari Jesoshi ayojeitanteari

ajajeitantajeari inquitequi, iro cantaincha

icantashijeitaca yocapee te oncameetsa-

teji anquemisanteri. ¹⁵Noquempejeitacari

iriori, niotaque irointinaajeitajeri

Tasorentsi maaroni camajeivetainchari:

cameetsatsiri, caari cameetsatsi,

maaroni. ¹⁶Irootaque nocoasanotantacari

noncameetsashiretimoteri Tasorentsi,

aisati atiri. Tempa inajeitacuena.

Nocoaque nontime cameetsa, notanteari

ineacameetsacuena. ¹⁷Notimavetaca

anta arejiqui oshequi osarintsi, meeca nopiaja. Namaqueneri noshaninca ipacantashiyetacariri savicayetatsiri otsipapeequi nampitsi. Aisati nopashitapaacari Tasorentsi paitarica. ¹⁸Pamenete meeca, ineaquena yoca anta ivancoqui Tasorentsi, noquemisantaque. Tecatsi nampatotacayeari, aisati tecatsi nonquiscacayeari. ¹⁹Itimi anta ivancoqui Tasorentsi joriopee poneayetachari Ashiaqui, iriotaque quisacaajeitariri atiripee. Ontimeme nantayetiri, tempa impoqueme iriori incantacoventena. ²⁰Iro cantaincha ¿paita icantajeitiri yocapee? ¿Paita iotacotanari anta yoametavacaajeitacanta? ¿Timatsimpa nantaqueri? ²¹Apatiroti nocantaqueri chapinqui: “Niotaque intinaajeitanaje maaroni camajeivetainchari, irootaque picantacoventantaquenari meeca”.

²²Iotasanoti iriori Virishi oca acamantacotiriri Tasorentsi. Icantanaque:

—Aitapaajitsita meeca. Coajica impocavajetsita comantanti Irishiashi, ari noncantacoventempi.

²³Icantiri capitano:

—Paanajeri Pavoro, poiminueajeri: pamenasanoteri, iro cantaincha pishineteri paitanirica incoyeri. Aisati pishineteri ishaninca irintacoteari.

²⁴Pashini quitaiteri ipocapaaque Virishi. Itsipatapaaro ijina pajitachari Toroshia. Jorio oni. Icajemacantiri Pavoro inquemisantanteariri. Iquenquetsacotiro jaoca ancanteari anquemisanteri Jesoquirishito.

²⁵Aisati iquenquetsacotiro jaoca ancanteari ancameetsashiretanaje, aisati antime cameetsa. Aisati iquenquetsacotiri Tasorentsi, jaoca incanteari coajicani incantacoventanteariri maaroni atiri. Ari itsaroanaque Virishi. Icantiri:

—Meeca pijataje. Coajica, tecatsirica nante, ari noncajemacantajempi aisati.

²⁶Ari oshequitaque icajemacantapinitaqueri, ijitashitaca Virishi ari impashitanajearime quirequi irishinetantearirime irijatantajeari. Ari iquenquetsatacapini-taqueri, iro cantaincha te imperiji quirequi. ²⁷Apitetaque avisanaque osarintsi. Ipoheetajeri Virishi yora Porishio Jeshito. Icoaque inquimoshiretacyempari joriopee, irootaque caari ishinetantajeri Pavoro irisoquijanaje.

Yaventacari Pavoro Sesari.

25 ¹Ari yareetanaca Jeshito anta impincatsariventantenta. Mava imaapaaque Sesareaqui, irosati yovaantanaja Jerosarequi. ²Jeri yora jivatacaajeitiriri saserotepee, jeri pincatsariventiriri jorio, icantacojeitiri Pavoro. Icantiri Jeshito:

³—Pinquimoshiretacayena. Pamacanteari Pavoro aca Jerosarequi.

Ari isareavetacari irimapocavaquerime nianqui, iroavaquerime. ⁴Icanti Jeshito:

—Irisavicavaquetsita Sesareaqui. Eiro osamanititsi nompiaje. ⁵Ari otimirica yantane, nocoaque intsipatanauena pincatsariventimpiri, incantacotanteariri.

⁶Ari aamaaca isavicaque anta 8 quitaiteri, ariorica 10. Te iroanayeroji 10. Irosati ipiantaja Sesareaqui. Oquitaitetamanaque isavicaque anta ivincatsarimentotqui. Icajemacantiri Pavoro. ⁷Yareeta-paaca, ari ishoncavacari yora poneachari Jerosarequi. Oshequi incantacotasnovetacari, iro cantaincha tecatsi incante iriotacotasantanteariri Jeshito. ⁸Irisati cantacoventavajanacha Pavoro, icanti:

—Tecatsi noncantero Sanquenarentsi iquemisantiri joriopee. Tecatsi noncantero ivanco Tasorentsi. Aisati ouquempetaca, tecatsi noncantimateri Sesari.

⁹Iro cantaincha Jeshito icoaque inquimoshiretacaajeiteri joriopee. Icantiri Pavoro:

—Piquemaque meeca icantacojeitim-piri yocapee. ¿Picoimpa pijate Jerosarequi? Anta ari noncantacoventajempiri.

¹⁰Yacanaqueri Pavoro:

—Noshanincatacari nainti oromasati, aivetaanea aca pincantacoventenameri. Piotasannotaque tecatsi noncanteri joriopee. ¹¹Nantaquerorica caari cameetsatatsi, ainirorica nantane iroyeetantenari, ari. Cameetsataque iroyeetana. Iro cantaincha ariorica icantacotashijeitana, tecatsi pincantea pishinetacoventena. Nocoaque pintianquena meeca Sesariqui, incantacoventena irinti.

¹²Ari iquenquetsatacaqueri Jeshito yora oametavacainchari. Impoiji icantiri Pavoro:

—Meeca picoaque nontianquempi Sesariqui. Aitaque nontianquempi irioriqui, incantacoventantempiri.

Iquenquetsatacaqueri Pavoro Aquiripa.

¹³Jaocarica ocarati imaaque. Jeri yareetaca pincatsari Aquiripa, itsipataro Verenise. Ipoqui iquivantiri Jeshito.

¹⁴Isavicapaaque oshequi quitaiteri, ari iquenquetsatacotaqueri Pavoro:

—Timatsi aca shirampari yoiminqequeri Virishi. ¹⁵Nojatantacari Jerosarequi, icantacotaqueri joriopee: yora jivatacaajetitirisi saserote, savicacaajeitantsiri, maaroni. Icoacotaquena noncantacoventashiteari Pavoro: “Ainiro yantane”. ¹⁶Iro cantaincha nocantaqueri: “Naro oromasati. Te nameteaji noshinetacantashiteari tequeratsitarica incantacoyeeteri. Inquemavaquerotsita oca pincantacoteriri. Impoijiquea irisati cantacoventajanchane”. ¹⁷Irosati yapatojeitanta aca, ari te nosamaninqueroji. Oquitaitetamanaque nosavicaque aca novincatsarimentequi, nocajemacantaqueri Pavoro. ¹⁸Ari nojivetaca incantajeite yantasanotiro caari cameetsatatsi. Iro cantaincha, tecatsi incantacotasanojeiteri. ¹⁹Iquisatsatimentavacaacaro oca yaamaashiyetari iriori. Aisati iquisatsatimentavacaacari

Jesoshini. Icamaque, iro cantaincha icanti Pavoro: “Aneaji”. ²⁰Te nioteji jaoca noncanterori nosampitacoventantearori oca icantayetiri. Nosampivetacari icoaquerica irijate Jerosarequi, anta noncantacoventantearirime. ²¹Iro cantaincha icoanaque incantacoventeriri irinti Sesari, yora Aocoshito. Ari nocantaqueri soraro irishenter, irosati nontiancanteariri anta Sesariqui.

²²Icanti Aquiripa:

—Nocoaque nonquemisanteri nainti. Icantiri:

—Aitaque, osaitequera pinquemameneri.

²³Oquitaitetamanaque ijataque Aquiripa, jero Verenise. Ari yoaneencasanojeitanaca apite. Iqueanaque anta yapatotapiniyeetanta. Icarajeitaqueri comantantipee, aisati pincatsariyetatsiri: yora savicajeitatsiri anta. Yora Jeshito, icajemacantaqueri Pavoro. Ari yamapaaqueri soraropee. Icantiri Jeshito:

²⁴—Pincatsari Aquiripa. Maaroni aviro nocarajeitiri aca. Jeri yoca. Ipocashijeitaquena maaroni joriopee: jerosaresati, jeri yoca savicayetatsiri aca. Icantacovetari yoca: “Te oncameetsateji intime”. ²⁵Iro cantaincha tecatsi niotacoteri noamaanteariri. Jero meeca yavetacari Sesari, ari meeca nocoi nontianqueri irioriqui. ²⁶Iro cantaincha te nioteji paitarica noncamantasoteriri avincasarite. Irootaque nocajemacantantaquempiri avinti, asampitacoventanteariri. Impoijiquea ontime nosanquenatacotanteariri. ²⁷Jeri yoca noiminqequeri. Te oncameetsateji nontiancashiteari, tecatsirica noncamantacoteri.

26 ¹Yora Aquiripa icantiri Pavoro: —Meeca noshinetempi avisati cantacoventachane.

Irosati yacotashitantanacari Pavoro, impoiji incantacoventaja irisati:

²—Pineaquena, pincatsari Aquiripa. Meeca noncamantempi paita iquishimen-

tantaquenari nojrioririnte. Noquimoshi-reventaquempi, ³piotasano tiro maaroni yameyeteri noshaninca, aisati pioyetero maaroni icantavacaimentajeitari. Nocoaque pinquemisantasanotena, eiro pishemanatsi. ⁴Iotacotitajeitaquena noshanincapee, peerani ainironi nevanca-ritapaini. Nosaviquini Jerosarequi, nocarajeitaqueri noshaninca. Irosatitatsi meeca iotana. ⁵Tempa quemisantincari variseotatsiri. Peerani novariseoveitani narori, noquempetasanoveitarini. Iotasanojeitaquena noshanincapee, incoaquericame incamantajeitempime. ⁶Nocoasanotaque noneeri icashiacaacariri Tasorentsi noshanincani, irootaque meeca picantacoventimentaquenari. ⁷Peerani itimini Jacovoni itomini 12, ijoriojeitini. Meeca icoajeitaque maaroni ishanincani irineeri yora Quirishitotatsiri iquenquetsatacotiniri Tasorentsi. Coajicani iroitinaajeitajeri maaroni camajeitatsiri. Icantatiani yaamaajeiveta-cari: quitaiteriqui, tsiteniriqui. Meeca nocantaque ipocasanotaque, irootaque icantacotantanari meeca noshaninca. ⁸¿Pijitimpa eiro imatirotsi Tasorentsi iroitinayeri camajeitatsiri? ¿Paita pitseencantariri? ⁹Nojitashiveitani narori peerani cameetsa nonquisheri yora quemisantajeitiriri Jesoshi nasaretasati. ¹⁰Aitaque nomavetacaro anta Jerosarequi. Noiminueayetaqueri oshequi icoyeaneppee Tasorentsi. Iriotaque tiancaquenari jivatacaajeitiriri saserote. Nocoaveitani incamajeiteme quemisanta-jeitiriri Jesoshi. ¹¹Aitaque oshequi noashinoncaapiniveitarini anta maaroni pancotsipeequi yapatojeitantari. Nocoacaavetari incantimaterime Tasorentsi. Nocaantirive, noijajeitanaqueri pashinipeequi nampitsi, nonquisanteariri. ¹²Irootaque nojatashitantavetacariri tamashicosati, itiancana jivatacaajeitiriri saserote nayerime. ¹³Ari nocaantanaca,

itampaticataque catsirincateri. Ari noneavaquero anta avotsiqui amorecatsiri, oponeanaca inquitequi, morec. Oshipaqueireasanotapaaque catsini, te oshiyeriji catsirincateri. Oshoncappaquena, aisati iriori nocarajeitaqueri. ¹⁴Notaajeitanaque quipatsiqui, porocn. Irosati noquemantacariri, iquenquetsatacaana evereoqui. Icantaquena: “Saoro, Saoro. ¿Paita piquisantanari? Ariorica nonquenquetsatacayempime, ¿paita pipiatsatantanari? Tempa pashinoncaja avisati”. ¹⁵Nacanaqueri: “¿Janicampi, Novincatsarite?” Icantaquena: “Narotaque Jesoshi, piisaneentane. ¹⁶Pintinaana-jequeti, pincatianaje. Nocoaque nompeajempi intacojeitearine atiripee, camantajeiterineri; irootaque noquenquetsatacantimpiri meeca. Pincamanteri atiri oca pineaqueri, aisati oca nonjayempiri, coajica. ¹⁷Jaocarica incantavetempiri pishaninca, jeri pashinisatipee atiri, ari noavisacotempi: eiro noshinejeitiritsi iroashinoncaajeitempi. Iro nontiancantaquempiri ¹⁸irojeitantajeiri. Oquempetimovetacari otsitenitimovetacari: te irojeitenaji, irinti Satanashi amatavijeitiriri. Pijatashijeiteri, poamejeiteri iraventantenari, impoiji onquempetimotajeiri intime quitaiteriqui. Impoiji noameetsajeiteri, eiro noquenqueshireacotajiritsi caari cameetsatsi yantajeiveta-ri; incarajeiteri maaroni quemisantajeitanari, aisati nosavicacaajeiteri cameetsa”. ¹⁹Irootaque noneaqueri aisati irootaque icantaquenari Jesoshi. Te nompiateariji, irointi notsoteaqueneri icantaquenari. ²⁰Nintanacari yora tamashicosati, nocamantaqueri. Impoiji anta Jerosarequi nocamantantaque. Aisati notsoteajeitaqueri anta Joreaqui. Nocamantajeitaqueri yora pashinisatipee atiri, maaroni. Nocamantajeitiriri: “Pinquenqueshirejeitanaquea, paventajeiteari Tasorentsi. Cameetsayea pisavica-

jeite, iriojeitantajeari atiri queario piquemisantasanojeitaque”.²¹ Ari noquenquetsatacotaqueri Jesoshi, irootaque yaajeitantaquenari joriopee anta ivancoqui Tasorentsi, iroyename.²² Icantatiani Tasorentsi intacotana: peerani, irosatitatsi meeca. Irootaque nomatantarori noquenquetsatacaajeitiri pincatsaritatsiri, caari pincatsaritatsine, maaroni. Ari noametantapinitiro isanquenare camantantatsiniri, aisati isanquenareni Moishishi. Nocamantacotiri iquenquetsatacotiniri peerani: moncarata iquenquetsatacotiniri, aneyetaquero.²³ Tempa irootaque icantitaniri: “Irineacatsitearo Quirishito, incamaque. Impoiji irijivajeiteri maaroni camajeitaintsiri, intinaanaje. Incamantajeiteri jorio, jeri pashinisati atiri: ‘Meeca piotasanojeiteri Tasorentsi’”.

²⁴Aitaque ocantari icantaqueriri Pavoro. Antearojenca icajemanaque Jeshito:

—Pitsaviataqueteemi, piomempeave-taca.

²⁵Yacanaqueri:

—Te nontsaviateji, niotasanotaque. Queariotaque catsini oca nocamantaquempiri.²⁶ Yoca Aquiripa iojeitiro oca nocantaqueri, irootaque cameetsa noquenquetsatacaasanotantacariri. Tecatsi nomaneri, niotasanotaque itsoteaquero, iotavaquero; te omaneaji.

²⁷Pincatsari Aquiripa: tempa piquemisantiro isanquenajeitaquenari camantantatsiniri. Niotaque piquemisantaquero.

²⁸Yacanaqueri:

—Irovetaingcha pinquemisantacayenarime Quirishito.

²⁹Yacanaqueri:

—Irovetaingcharica pinquemisante, irompa osamaniquerarica, te nioteji. Iro cantaincha nocantaqueri Tasorentsi pinquempetantajenari narori. Aisati nocoaajeivetacari inquempejeitename

maaroni quemajeitaquenari meeca: apatiro te noncoacayempiji irosotantee-tempiro oca carenatsa.

³⁰Icatianaca pincatsaritatsiri: yora Aquiripa, jeri Jeshito, aisati oquempetaca Verenise, ocatianaca iroori. Aisati iquempjeitanaca maaroni saviquimojeitiriri, icatiajeitanaca.³¹ Ijajeitanaque, icantavacaajeitanaca:

—Tecatsi irante Pavoro incamanteari. Tecatsi irantavetea, yominqueashiyeetacari.

³²Yora Aquiripa icantiri Jeshito:

—Eirome yaventarime Sesari, antianquerime irijatajetame.

Jataque Pavoro Oromaqui.

27 ¹Ainiro anta iyapitanote oshequi soraro, pajitachari Jorio. Ipajiyeyetiri soraropee Aocoshita. Icanteetiri:

—Ainiro meeca antearo pitotsi, paanajeri Pavoro Itariaqui, jeri yonta pashini yoisoeyetiri.

Aisati icanteetana:

—Pincoaquerica pojatanaqueri Pavoro, pintetearo onta pitotsinta inquenanteari iriori.

²Ari notejeitanacaro pitotsi poneachari Ataramishiaqui, irovetaingcha ojate nampitsipeequi anta otsapijaqui Ashia: anta oatapinitanta pitotsi. Ari noquenacoyetanaque, notsipatanacari Arishitaraco. Iponeanaca iriori Tesaronicaqui, ora masoniaquiniri.³ Oquitaitetamaque nareetaca Shiroqui. Yora Jorio, ineshinoncataqueri Pavoro: ishinetaqueri ijati iquivantiri ishaninca anta, ari intacojeitavacari.⁴ Irosati novaantanaja aisati. Iro oimpiacotajename tampea, irootaque noquenantanacari Tsipirequi, antaqueronta.⁵ Nomonteanajaro incajare oquempjeitaro Shirishia, aisati Pampiria. Novaanaja, nareetanaca Miraqui, ora irishiaquiniri.⁶ Ari ineapaaquero capitano

pitotsi poneachari Arejantiriaqui: ojateme Itariaqui, irosati notejeitantanacaro.

⁷Ocarati oshequi quitaiteri noquenacojeitanaque, jentsiquero. Opomerentsitimotaquena, iro cantaincha noquempejitapaa-carro Jeniro. Te oshinetenaji tampea, irootaque noshoncantanacarori Quereta. Noquenanaque antaqueronta, anta quempeji Saramona. ⁸Opomerentsitimo-taquena, iro cantaincha noshoncanacaro ora ovoyeja. Impoiji nareetanaca onta ipajiyeeitiri: Cameetsajari. Oquempejitacaroro nampitsi pajitachari Irasea.

⁹Meeca operaniitanaque, avisanaque meeca quitaiteri ititantapiniyeetari. Ari ocovencatasanotanaque noquenacotana-que: irotaintsi oshequi tampea, oshequi omotoncane. Icamantavetacari Pavoro:

¹⁰—Noshaninca, niotaque ompomerentsitimotaquee anquenacojeitanaque meeca. Ayecari antearo tampea. Otsitiicari pitotsi, otsoncacari vaararontsi, aisati atsitiajeiticari arori.

¹¹Yora capitano, te inquemisanteriji Pavoro; iquemisantasanotiri yora jivatiriri marinero, irinti. Aisati iquemisantiri yora ashitarori pitotsi. Icantajeiti iriori:

—Tsame avaaajeitanajea.

¹²Irotajantsi ompocanteari antearo tampea, iro cantaincha te oncameetsati-moteriji nosavicasanojeite anta. Yora oshequaintsiri icoajeitanaque novaajeitana-jea. Icoavetaca nareeteame Jenishiaqui, onta queretaquiniri. Anta onapiniti pitotsi, ocameetsatimojeitiri nosavica-jeite anta. Icoaque anta iroyevaquero-tame tampea, ompeantajeiri. Ocamee-tsati intsatacoterome pitotsi Jenishiaqui: te aneasanoteroji tampea anta.

¹³Ari impoiji cameetsa ojeaoncaque tampea: ojati anta noshirejeivetacanta nojateme. Ijishajeiveta ari nareejei-teame Jenishiaqui, irosati novaantanaja. Noquenacotanaque otsapijaqui Quereta.

¹⁴Iro cantaincha, te osamaniteji, ari omapocaquena antearo tampea, icantee-tiro Noreshite. Oponeanaca quipatsiqui, ¹⁵otiancasanoaquero pitotsi nianquija-qui; tecatsi oncantea ojate oquenapaa-quentata tampea. Ari noshinetacotanaca, aiquero otiancasanotirori. ¹⁶Noquenaco-tanaque anta ovoyejajaniquiqui pajitachari Caora. Aisati oponeanaca tampea ovoyejaqui. Opomerentsitimojei-vetaquena, iro cantaincha nomataquero naasanotavaquero pitotsijaniqui: ora onoshicapinitiri opatiqui. ¹⁷Impoiji yoancaquero marinero. Ari yaamaacaro ari ontsipareanaquea taaverapee yovetsi-cantarori antearo pitotsi, irosati yoisotan-tacarori. Aisati itsaroajeitanaque ojocaco-jeitename quipatsiqui, anta Shiritequi, irootaque yaajeitantajarori maaroni tocoyatatsiri. Ishinetaquero pitotsi, icanti:

—Aanaquerota tampea, tecatsi ancantaro.

¹⁸Oquitaitetamanaque, aiquero catsini otiancacotasanojeitanaque tampea. Ari yoviincajeitaquero vaararontsi, pocn, pocn, pocn. ¹⁹Omatapaaque quitaiteri yoviincashitacaro aisati ovaararo pitotsi, soocatsa, maaroni. ²⁰Ari ocaratanaque oshequi quitaiteri: te inconijatajeji catsirincaiteri, aisati impoquiro, tecatsi. Ocantatiani tampea, antearo ojeaonca-que, sooo. Nojijeivetaca eiro navisacojei-tajitsi.

²¹Avisanaque oshequi quitaiteri, te noajeiteaji. Icatianaca Pavoro, icantaque:

—Noshaninca, pinquemisantaquenname, oncameetsataqueme. Eirome ajoquirome Quereta, eiro otsitiime pitotsi, eiro otsoncame maaroni. ²²Iro cantaincha piveshireajeitanaquea meeca. Coajica ontsitianaque pitotsi, iro cantaincha eiro atsitiajeititsi ainti. ²³Iriotaque Tasorentsi jocaacoventaquenari. Noquemisantiri nainti. Osaita noneaqueri inampire,

²⁴icantaquena: “Pavoro, eiro pitsaroitsi. Aitaque pareetaqueari Sesari. Picantaqueri Tasorentsi incavintsaajeiteri maaroni picarajeitaqueri aca: ari iquemisantaquempi”. ²⁵Meecca, piveshireajeitanaquea. Noquemisantiri Tasorentsi, niotaque ontsataaquea maaroni icantayetaquenari. ²⁶Ario coajica ojocacotaquee tampea ovoyejaqui, eiro acamajeititsi.

²⁷Ocaratanaque meecca 14 quitaiteri, meecca otsitenitanaque. Noquenacotashitanaca incajarequi pajitachari Atiria. Onianquiietanaque, yaamaaca marinero ari noquempejitanao otsapijaqui. ²⁸Ineantacaro, osanajatirica. Ocarati 37 metero. Oshamaniji yapiitaquero. Ocarati meecca 28 metero niotantacari quempejitapaaque quipatsi. ²⁹Itsaroajeitanaque, icanti:

—Queariyea, atsitincacotarocari mapi.

Anta opataquiqui yoviincaquero 4 otsatacotantari pitotsi, otsatacojatantacari nianquijaqui. Icoasanotanaque onquitaitetaje. ³⁰Icoasanovetanaca yora marinero iravisacotanaque, iroviinquerome pitotsijaniqui inquenacotanteameri otsapijaqui. Icoaveta irijocajeitename narori. Icoajeivetaca iramatavijeitename, icantajeivetana:

—Noviinquerota otsatacotantari pitotsi, onta otsoviquiniri. Iro naantajearori pitotsijaniqui, noviinquero ara, onquiso-tanteari antearo pitotsi.

Ja, icoajeiveta irijocajeitename. ³¹Yora Pavoro icantaqueri capitano, jeri soraropee:

—Eirorica quiso yoiro marinero pitotsi, tecatsi pincantea avirori pavisacojeitaje. Eiro pishinetiritsi irijocajeitee.

³²Irosati ipesantacaro soraro socatsa: oca otsatacotantaveitaniri pitotsijaniqui. Yoviincaquero, pocn. ³³Irotanajantsi onquitaitetaje, icantajeitaqueri Pavoro:

—Tsame, poajeitavaqueata. Ocarati meecca 14 quitaiteri pinashitaca, te

poajeiteaji. ³⁴Meecca nocantasanotaquempi, poajeitea. Oshintsitacaajempi. Piotasanotanaque: tecatsi oyempine catsini.

³⁵Icantantarori oca, ipasonquitaqueri Tasorentsi, noneajeitaqueri. Icarajaquero tanta, ijivataque yoanaca. ³⁶Yoveshireajeitana naja maaroni, yoajeitanaca. ³⁷Nocarajeitanaque maaroni tetarori pitotsi 276. ³⁸Iquemajeitanaca, ari yoviincajeitaquero maaroni tirico, irosati opijoncatantana naja pitotsi.

³⁹Ari oquitaitetasotanaji, te iriojeitaje-roji quipatsi. Iro cantaincha ineaquero otsantsajatanane irosati anta quipatsiqui, otiminta impanequi. Icoajeivetaca iraatocotapeeme anta. ⁴⁰Yojocajiro otsatacotantaveitaniri incajarequi. Ari itsatacoreajiro soocatsa oisotantaveitaniri oomaro. Yovancajiro tocoya, ora otsoviquiniri. Aacotanaquena tampea, icoajeiveta iraatocotapeeme impanequiqui. ⁴¹Iro cantaincha navicacotapaaque nianquijaqui, eentapaaca quiripequiriqui. Avicasanotapaaque otsoviqui. Oquisotasantapaaque, te oshevatajeaji. Ora omotoncane ocarajaquero opataquiqui, patire. ⁴²Icoajeiveta soraro iroajeiterime maaroni yora yoiminqeajeitaqueri. Iquenqeshiretanaca:

—Yamaatanaquecari, ishiapitsatanaqueecari.

⁴³Iro cantaincha icoaque capitano iroaviscoteri Pavoro. Te irishinejeiteriji iroajeiteri. Icantajeitaqueri maaroni tojeitatsiri yamaati:

—Pijivajeite pimitajajeitanaque, pamaajeitanaque irosati anta quipatsiqui. ⁴⁴Avirojei caari iotatsi pamaate, jero oca taavera, aisati carajayetaintsiri: irootaque pamaatananaqueari.

Aitaque ocantacari, navisacojeitaji. Naatajeitapaaji anta quipatsiquinta.

Isavicajeitapaaque Marataqui.

28 ¹⁻²Naajeitantapaacari, ineshinoncatasanojeitavaquena yora savicatsiri. Icamantavaquena:

—Opajita oca ovoyejaca Marata.

Ari yoisavaquenaro paamari, icajema-
jeitaquena:

—Caate pimpoque aca, pintatapee
paamarica.

Opariaque incani, ocatsincaiteanaque.

³Yaayetapaaque Pavoro inchajempequi,
aripati. Yoisapaaquero paamariqui.

Ocatsirincataanaque, irosati isoquijanta-
naca maranque, irosati yatsicantapaacari
iracoqui, shepi. ⁴Ineajeitaitiiri itsatanacari
iracoqui, icantavacaajeitanaca:

—Iriitatsi oantatsiri. Ineacarove. Te
intsitiaveteaji anta incajarequi, iro
caincha irineashiitetarota meeca.

⁵Iro caincha itecanaqueri maranque
paamariqui, teca, pomein; te inquematsi-
cateariji. ⁶Ijtashijeivetaca ari irishintsita-
naqueme ireeretacanaquerime;
irishintsite intanaqueme, incamana-
queme. Osamani yamenashejeitaqueri,
sorere. Ineakeri tecatsi oaqerine.
Impoiji iquenqeshirejeitanaja aisati,
icantajeiti:

—Iriotaque tasorentsitsiri caari
icamanta.

⁷Ainiro quempeji ora iipatsite yora
pincatsariventiriri savicajeitatsiri. Ipajita
Povirio. Yaacameetsajeitavaquena.

Ocarataque mava quitaiteri cameetsa
ineshinoncajeitaquena. ⁸Ainiro iponaaca
iriri iriori imaamentoqui. Icatsirincata-
que, ishijataca. Iquivantaqueri Pavoro,
iquenquetsatacaqueri Tasorentsi, aisati
yajiriquiri, yoavisacotaqueri. ⁹Imatanta-
rori oca, ipocashijeitaqueri maaroni
pashini mantsiajeitatsiri. Yoavisacojeita-
jiri. ¹⁰Oshequi ipincatsajeitaquena
savicajeitatsiri. Irotaintsi nojate, ipajeita-
vaquena paitarica coiteimotaquenari.

¹¹Ari icarati mava cashiri, irosati
notejeitantanaca pitotsiqui poneachari
Arejantiriqui. Otimantacari chapinqui
antearo tampea, ainiro onaque pitotsi
anta ovoyejaqui. Ainiro isheroncayetiri

anta otsoviqui, ishiacantaqueri tsipari.

¹²Naatapaaque Shiracosaqui, ocarati
mava nomaanaque. ¹³Novaanaja aisati,
noshoncanajaro anta otsapijaqui, irosati
Irequio. Oquitaitetamaque oponeanaca
tampea irampatequi catsirincaiteri.

Irosati oquitaitetamaque nareetanta-
cari Posoriqui. ¹⁴Noneapaaqueri
ayemisantaririnte. Icoaque nosaviquimo-
tanaqueri 7 quitaiteri. Novaanaja, irosati
nareetantanaca Oromaqui. ¹⁵Ari iquema-
cojeitavaquena ayemisantaririnte, irosati
ipocashijeitantaquena, intonquiojeitava-
quena. Osamani iponeayetanaca.
Iponeanaca Jororeapioqui, aisati Tireshi
Taverinashiqui. Pavoro, ineantacariri,
ipasonquitaqueri Tasorentsi aisati
iveshireanaca. ¹⁶Nareetantacari
Oromaqui, ishineyeetaqueri Pavoro
isavicapaaque ivancoqui iriori. Itsipata-
cari aparo soraro, ameniriri.

¹⁷Mava imaapaaque, impoiji icajema-
cantaqueri jivayetiriri joriopee. Yapato-
jeitantacari, icantaqueri Pavoro:

—Noncamantajeitempi, noshaninca. Te
noncantmateriji ashanincapee arori.

Aisati tecatsi noncantacotero oca
yamejeiveitaniri ashanincani peerani.

¹⁸Iro caincha yoisoeyeetaquena anta
Jerosarequi, icantiri oromasati: “Payeri
yoca”. Isampitacoventaquena pincatsari,
impoiji icoaveta iroimisoquijacantaje-
name. Iotaque tecatsi nanteri noncama-
teari. ¹⁹Iro caincha ipiatsatavacari
joriopee, irootaque naventantacariri
Sesari. Tecatsi noncantmateriji ashaninca.

²⁰Irootaque nocajemacantantaquempiri,
noquenquetsatacaajeitaquempi. Peerani
aamaajeivetacari Quirishito impocan-
teari. Meeca nocamantajeitiri ashaninca
yareetaita, irootaque yoisoeyetantaque-
nari carenatsaqui.

²¹Yacajeitanaqueri:

—Tecatsi noneero sanquenarentsi
poneachane Joreaque, quenquetsataco-

tempineri. Aisati te intimeji ashaninca cantacotempineri. ²²Iro cantaincha nocoajeitaque pincamantena paitarica piqenqueshireyeteri. Onashitaca oca piquemisantiri: niotaque oshequi iquishmentajeitacaro anta maaroni nampitsipeequi.

²³Ari iotacaajeitakeri jaoca oncarate quitaiteri incantavacaimentajeitantarori. Ari oshequi ijajeitanaque ivancoqui. Icamantasannotavaqueri jaoca icanta Tasorentsi ipincatsariventanti. Intamanacaro, irosati itsitenitacotanaquero. Icoaque iriotacaasanotaqueri isanquena-tacotiri Moishishini, jeri maaroni camantantatsiniri: tempa isanquenataco-taqueri Jesoshi. ²⁴Iquemisantaqueri aparopee, itseencaqueri pashini. ²⁵Ipiatsatavacaanaca, impoji iteentarea-vacaanaca. Icantaque Pavoro:

—Queario oca ocantaqueri Ishire Tasorentsi. Osanquenatacaqueri Isayashini, camantantatsiniri. Isanquena-taqueneri iriori ashanincani. ²⁶Icantini: “Pijate anta joriopeequi, pincamanta-peeri: ‘Otimaveta piyempita pinqueman-

teameri, iro cantaincha te piotavaqueroji. Poquireavetanaja, pamenavetanaja, iro cantaincha te pamenasanteji’”. ²⁷Te meeca aneroji atiri iquenqueshireantari. Te inquemisanteji, te irameneji. Icantashireitaque: ‘Amenicari. Aquemi-santicari. Ayotasanicari. Aquenqueshi-retacari. Avavisacotacari’”. ²⁸Piojeitava-quero meeca: yoavisacotanti Tasorentsi. Meeca itianquiri quemisantatsiri iriotacaajeiteri pashinisati atiri. Inquemi-santajeitavaque irinti.

²⁹Iquemantavacarori joriopee oca icantaqueriri, ijajeitanaque, iquisatsata-vacaajeitanaca.

³⁰Ocarati apite osarintsi isavicaque Pavoro pancotsineentsiqui, ipinataquero. Yaacameetsajeitakeri maaroni quivanta-jeitiriri. ³¹Icantani, icamantacotapinitiri Tasorentsi, jaoca icantari iriori ipincatsariventanti. Icamantacotapinitaqueri Avincatsarite Jesoquirishito, te irimane-roji. Te intimeji tsaneacotearine iquenquetsati.

Narotaque sanquenatimpirori:
Irocashi

YORA PAVORO ISANQUENATINIRI OROMASATI

Ivetsajetari Pavoro quemisantajeitatsiri anta Oromaqui.

1 ¹¿Ainirompi oromasati? ¿Tecatsimpa oajeitempine? Narotaque Pavoro sanquenajeitimpirori oca. Itiancaquena Jesoquirishito nantaveetiniri. Icoacaquena noncamantajeiteri atiri jaoca icantari Tasorentsi yoavisacotanti. Tecatsi pashini incoacayenari. ^{2,3}Tempa peerani icamantajeitaquerini Tasorentsi yora quenquetsatacotaqueriniri imponeaquea inquitequi Itomi, irantiritapaaque, iroavisacojeiteri maaroni caari cameetsajeitatsi. Icantaqueerini irishanincatajeari Iravirini. Impoiji isanquenatacotaquerini yora quenquetsatacantatsiniri, irootaque otimantacari meeca irineane Tasorentsi. ⁴Impoiji ipocaque Jesoquirishito aca quipatsiquica, yoyeetaqueri, impoiji itinaanaja. Ayojeitaque ainiro itasorenca, iriotaque itomi Tasorentsi, aisati quiso oaqueri Ishire Tasorentsi. Irootaque apincatsajeitantacariri. ⁵Aquemisantaqueri, irootaque icavintsaajeitantaqueeri Tasorentsi, aisati itiancaajeitantaqueeri anquemisantacaajeiteri maaroni itsipapee atiri. ⁶Aisati avirorijeji, icoacaquempi pishanincajeiteari Jesoquirishito. ⁷Oshequi inintajeitaquempi Apa Tasorentsi, aisati maaroni itsipapee quemisantejiteri. Meeca nocoaque incanteani incavintsaasanojeitempi, aisati cameetsa irisavicacaajeitempi. Aisati inquemeta-caajeitempi Avincatsarite Jesoquirishito.

ICantiri Pavoro: “Nocoaque nojate pinampiqui, noneempi”.

⁸Meeca noncamantempi: jaocarica nojayetaqueri noquemacotapinitaquempi piquemisantasanojeitaque. Iquemacojeitaquempi maaroni atiripee, savicayeta-tsiri jaocaricapee, irootaque nopasonquiantacariri Tasorentsi, tempa narosati narori quemisantiriri Jesoquirishito. ⁹Ioti Tasorentsi nocantapinitiri iramitacojeitempi. Noquearioventiniri nantaveetiniri, aisati nocantani noquenquetsatacotiri Itomi: nocamantajeitiri atiri jaoca icanta yoavisacotanti. ¹⁰Aisati nocantiri Tasorentsi: “Nocoaque, Apa, pincoacayena nareejeiteari oromasati”. ¹¹Oshequi noquenqueshirejitempi noneajeitempi: nocoaque omatacaajeitempi paitapeerica ora Ishire Tasorentsi, pinquemisantasano-tanteariri. ¹²Aisati ariorica aneavacaajeitea aquemisantasanojeitaque, ari aveshireimentavacaajeitea. ¹³Nocoaque piojeitero, noyemisantaririnte, oshequi nocoapiniveta nojatashijeitempime, iro cantaincha te incoacayenaji Tasorentsi nojatashitempi. Nocoaveta namitacojeitempime, oquempetaca namitacojeitaqueri itsipapee ashaninca anta pashinipeequi nampitsi. ¹⁴Nocoasanoataque nonquenquetsatacaapiniteri yora quereshiasati aisati yora itsipapee atiri; yora iovetachari aisati yora caari iotatsi. Tempa itiancaquena Tasorentsi nonquenquetsatacaajeiteri maaroni. ¹⁵Irootaque

nocoasanotantacari nonquenquetsatacaajetempi ara Oromaqui aisati.

Incantaqueri paitarica inquenquetsatacoteri.

¹⁶Te nompashiventeaji nocamantajeitiri atiri jaoca icanta Quirishito icavintsaajeitaaque. Intasoncaventer Tasorensi maaroni quemisantajeiterineri, iroavisa-cojeiteri. Ijivataque iotaque jorio, iro cantaincha ocameetsati iriojeite meeca maaroni itsipapee atiri. ¹⁷Pineaquero, ariorica anquemisantasanotaque, iroameetsajeitaaque Tasorensi. Tempa peerani isanquenatacairi Tasorensi yora Avacoconi: “Iroameetsajeiteri Tasorensi maaroni quemisanterineri, cameetsa irisavicajeitanteari anta inquitequi”.

Yora itsipapee atiri te iriojeiteriji Tasorensi.

¹⁸Itimi Tasorensi inquitequi, iro cantaincha iotacaajeitaaquee iquisaqueri maaroni caari quemisantiri, aisati maaroni antapinitirori caari cameetsatsatsi, aisati iriori yora maaroni caari coatsi inquemisantero oca cameetsatsisiri. ¹⁹Incoajeitaquericame iriojeiteme jaoca icantari Tasorensi, iriojeiteme. Te ompomerentsitimoveteariji, tempa yoamejeivetari. ²⁰Peerani oconijataque maaroni yovetsicajeitiri, ayojeitancari itimi Tasorensi, aisati otimi itasorenca. Conijatasanotaque. Tecatsi incantajeitea tseencantatsiri incantajeite: “Te niotacoteriji Tasorensi”. ²¹Tempa iojeivetari, iro cantaincha te impincatsajeiteriji. Icavintsaapinijeivetari, iro cantaincha te impasonquijeiteriji iriori. Te inquenqueshirejeiteaji: yatsipetashitacaro iquenqueshiretashitacaro paitapeerica; meeca te aneajeiteroji iotantari. ²²Incantajeiveta: “Oshequi nioti nainti”, iro cantaincha te iriotasanoteji. ²³Icameetsasasanotaque irinti Tasorensi, icantani itimi inquitequi, iro cantaincha te impincatsajeiteriji

atiripee. Jero ishiacantajeitaqueri tsimeripee, poshiniripee, maranquepee, maaroni: joo, irointi ipincatsatashitaro yovetsicashiyevetari.

Iroasanquetaajeiteri Tasorensi yora caari joriotatsi.

²⁴Oshequi icoajeitaaque atiri iquenqueshiretapinijeitaquero caari cameetsatsati, imayempitavacaapinijeita; icanti Tasorensi: “Ari incanteata, eiro iquemitsi”. ²⁵Ari peerani isanojeivetari jaoca icanta Tasorensi, iro cantaincha yamatavijeitaja irisati. Ipincatsatashijeitacaro maaroni yovetsicajeitiri Tasorensi, iquemisantashijeitacaro. Irintiquea yora vetsicajeiterori, te impincatsajeiteriji iriori. Tsame ainti aneacameetsajeiteri, ancantaitatiyempani. Tempa aitaque ancantajeiteari. ²⁶Ari ishinetaqueri Tasorensi yantanirojeitaquero paitarica icoajeitaqueri. Te oncoyeji tsinane aye ojime, irointi ocoaque otsinampairo otsinaneronte. ²⁷Aisati iquempetaca shirampari: te incoyeji iraye ijina, irointi itsinampaapinitiri ishiramparirinte. Paitapeerica yantajeitaqueri, iro cantaincha te irioteji impashiventea. Impoiji yoasanquejitaqueri Tasorensi, inecarove.

²⁸Ari te incoajeiteji impincatsajeiteri Tasorensi, irotaque icantantari Tasorensi: “Incanteata. Inquenqueshireterota caari cameetsatsati, aisati eiro itimitsi cameetsa”. ²⁹Imatapinijeitaquero caari cameetsayetatsi: yashi yoiro te incameetsajeiteji, inevetitacari ishaninca yashiyevetari, icoaque iroashinoncaayeteri itsipapee, iquisavacaajeitaca, yoavacaajeitaca, iquisatsatavacaajeitaca, yamatavitantapinijeiti, itsimaavacaajeitaca, yaamaacotavacaajeitaca, ³⁰icantimatavacaajeitaca, iquisajeitaqueri Tasorensi, icantimajeitaqueri ishaninca, inintajeitaja irisati, ishemejeiti, icoacoayetaque irantajeitero pashinipee caari cameetsa-

yetatsi, ipiatsajeitacari ashijeitariri, ³¹te aneajeiteroji iojeitantari, te inquemisan-tajeiteji, te irinintavacaajeiteaji, te incavintsavacaajeiteaji. ³²Iojeivetaro icantiri Tasorensi: “Maaroni antapinijei-tirori caari cameetsatatsi irijajeite Sharincaveniqui”, iro cantaincha itsataa yantashijeitacaro aisati yantacaajeita-queri pashinipee.

Aisati iriori jorio, eiro yavisacotashijeitajatsi.

2 ¹Naamaaca itimi jorio cantatsiri: “Ineashiitetacarove irintipee, te incameetsajeiteji”. Iro cantaincha noncamantempi; queariompia, ariorica pincantacoteri itsipapee atiri: “Ainiro yantane”, ainiro pantane avirori, piquem-pejeitacari yora picantacovetacari. ²Ayojeitaque ocameetsati iroasanquetaa-jeiteri Tasorensi yora antirori caari cameetsatatsi. ³Iro cantaincha avirori, picanti: “Ainiro irantanejei irinti”, aisati piquempejeitacari, pantapinijeitiro avirori caari cameetsatatsi. ¿Pijitashi-tampa eiro yoasanquejeitimpitsi avirori Tasorensi? ⁴Pamene, oshequi ineshinon-cajeitaquempi, icavintsasaanojeita-quempi, te intsipaite irishemempi: osamani icoavetaca pinquenqueshirejeita-jeame, pojocajeitajerome caari cameetsatatsi pantajeitiri. Iro cantaincha, te pimajeiteroji.

⁵Te pinquenqueshireteroji icantiri Tasorensi, te pinquenqueshireempaji. Aiquero pijatati pantapinaquero caari cameetsatatsi, irootaque iroasanqueti-mentempiri Tasorensi. Queario, coajica inquisasanojeiteri maaroni antirori caari cameetsatatsi. Iro cantaincha ayojeitana-que icameetsasananoti Tasorensi, eiro iquisashitaritsi atiri, iotasanotaqueri maaroni, jaocarica icantajeitari. ⁶Iroasan-quejeiteri maaroni caari cameetsatatsi, irisavicacaajeiteri cameetsa anta inquite-

qui maaroni cameetsajeitatsiri. ⁷Ariorica acoasanotaque aneajeiteri Tasorensi aisati ancameetsasananotaque, aisati ancantaitiyempani antime inquitequi, tsame anquearioventajeitero maaroni icoacaajeitaqueeri Tasorensi. Impoiji irisavicacaajeitajee inquitequi, ancantaitiyempani asaviquimojeitajeri. ⁸Iro cantaincha ainiro irinti caari cameetsatatsi, caari coatsi iriotoero icoacaavetariri Tasorensi: icoashijeita irantapinitero caari cameetsatatsi. Ari inquisasanojeiteri Tasorensi, iroasanquetasanojeiteri. ⁹Irimoncaratavacaajeitea jorio aisati itsipapee atiri: ariorica incanteani irantero caari cameetsatatsi, ari irashinoncaajeitea, iroasanquejeiteri Tasorensi. ¹⁰Iro cantaincha maaroni antapinitirori cameetsatatsiri irineapaa-jeri Tasorensi inquitequi, irineacameetsatavajeri iriori, irisavicacaajeiteri cameetsa: jorio, itsipapee atiri, maaroni. Amoncaratavacaajeitaquea. ¹¹Yora Tasorensi te irinashitacaajeiteariji itsipasatipee atiri: ioti aquempetavacaajeitaca.

Timatsi iotacaajeivetariri yora caari joriotatsi.

¹²Yora itsipapee atiri te irineeroji isanquenareni Moishishi, iro cantaincha ainiro yantayetiri, aisati irijate Sharinca-veniqui. Iro cantaincha eiro icantiritsi Tasorensi: “¿Paita caari piquemisan-tarotaro isanquenatiri Moishishi?” Iro cantaincha irinti iovetarori isanquenare ainiro yantayetiri, aisati irijate Sharinca-veniqui; ari iroasanquetasananoteri Tasorensi, incanteri: “Te pinquemisanta-sanoteriji oca isanquenatiniri Moishishini”. ¹³Te irineacameetsatashi-tearigi Tasorensi quemashijeivetarori irineane, irintiquea inecameetsasano-jeiti quemisantasananotirori. ¹⁴Pameneri yora itsipapee atiri, piote jaoca icantajei-

tari. Te irineeroji Sanquenarentsi, iro cantaincha ainiro imayetaquero ocantayetiri. Pineaquero, iotashiyeta itimi cameetsa. ¹⁵Ariorica irisavique cameetsa, ayojeitaque iovetaro iriori ocantiri Sanquenarentsi. Ainiro iquenqueshireantavetari: iojeitaque ocameetsatirica yantajeitiri. ¹⁶Coajica incanteri Tasorentsi yora Jesoquirishito: “Aviro iotirori jaocarica ocantari yantajeitaqueri atiripee, pitsoteaquero maaroni iquenqueshirejeitiri. Meeca aviro cantatsine jaocarica irijajeiteri. Aviro cantatsine ariorica aneacameetsateri, ariorica avashinoncayeri”. Irootaque nocamantajeitiriri narori, inquenqueshirejeitanteari, iroavisacojeitantajeari.

Yora jorio iojeivetaro isanquenareni Moishishi: ariorica irantero caari cameetsatatsi, ontimasanote irantane.

¹⁷Iro cantaincha, avirorica jorio, queariompa. Picantirari: “Niotiro nainti isanquenare Moishishi. Noshanincatasannotacari nainti Tasorentsi”. Pishemeticari. ¹⁸Piojeitiro icoacaajeitaqueeri Tasorentsi. Peerani piovetacaroni Sanquenarentsi, irootaque piojeitantavetacaroniri cameetsayetatsiri. ¹⁹Meeca pijitashijeveta pimatero piotacaajeiteri maaroni caari iojeitatsi. Oquempevetaca pintsiotacojeiterime maaroni timajeitatsiri tsiteniriqui. ²⁰Piotacaajeiterime maaroni caari iojeitatsi, oquempevetaca poamejeiterime jananequipee. Queario piojeivetaro Sanquenarentsi, tempa cameetsa oamevetaquempi, te amatavitantjeji. ²¹Pamene, poamejeiterime itsipapee, iro cantaincha çpaita caari piotanta avirori? Tempa oncameetsateme poametavacaajeiteame avirori. Jero picantajeitaqueri itsipapee: “Eiro picoshititsi”. Tempa picoshiti avirori. ²²Picantajeivetari: “Eiro paimentarotsi pijina”. Tempa paimentaro avirori pijina. Picantajeivetari: “Eiro

picantirotsi povetsicane: ‘Irio Tasorentsi’. Caari oni”. Iro cantaincha çpipincatsatasantotirimpa avinti Tasorentsisanori? ²³Pishemejeitaque, picantajeiveta: “Niotiro nainti irineane Tasorentsi”. Iro cantaincha terica pimoncarayeteroji ocantayetiri, tempa pitseencaqueri Tasorentsi. ²⁴Jero oca isanquenayeetiriri peeraniniri: “Ainiro yantayetiri ajorioririnte caari cameetsatatsi, irootaque icantimajeitantariri itsipapee atiri Tasorentsi, icantajeiti: ‘Te incameetsateji Tasorentsi, eiro aquemisantiritsi’”.

Jaoca icanta quemisantasannotatsiri.

²⁵Pamene, ariorica piquemisantaquero irineane Tasorentsi, te pantsipetashiteaji pijoriotaque, tempa piotaqueri Tasorentsi. Iro cantaincha terica pinquemisanteri, patsipetashita pijoriotashiveta. ²⁶Ariorica inquemisante caari joriotatsi, tempa irineacameetsateri Tasorentsi iriori. Inquempetacayeari jorio, quemisantsiriri iriori. ²⁷Avirorica jorio, pivetarorica isanquenare Moishishi; iro cantaincha terica pinquemisantasannotero, çocameetsatimpa? Teve, te oncameetsateji. Jeri yora caari joriotatsi: te irineeroji Sanquenarentsi, iro cantaincha ariorica irisavique cameetsa, ari irimataquero icoacaqueriri Tasorentsi. Tempa ocameetsatasanoti oca. ²⁸çJaoca icantari quemisantasannotatsiri? çJoriompa inajeiti? Teve. çIriompa toyeantajeitachari? Teve, caari ini. ²⁹Irinti quemisantsincari yora quenqueshiretapinitiriri Tasorentsi. Te iro irineacameetsatimenteri itoyeanta, irointiquea inecameetsatimentiri iquemisantiri. Eirorica inecameetsatiritsi atiri, irintiquea Tasorentsi neacameetsaterine.

3 ¹Naamaaca picantaque: “çNatsipetashitampa nojoriotaque? çNatsipetashitampa notoyeanta?” ²Te pantsipevetaroji pijoriotaque. Tempa irio jorio

yoametiri Tasorentsi. ³Queario, te inquemisantajeiteji maaroni, ainiro amataviyeterinemeru Tasorentsi. ¿Ariompa iramatavitaqueri Tasorentsi yora quemisantiriri? ⁴Teve, eiro yamatavitiritsi. Ariorica iramatavitantajeite maaroni atiri, iro cantaincha tecatsi incantea Tasorentsi iramatavijeitee irinti. Tempa peerani isanquenatini Iravirini, icanti: “Otampaticatasanotaque, Tasorentsi, pineane: te pintseeyaji. Tecatsi incantea atiri impiatsajeitempi”.

⁵Naamaaca itimi cantashitachari: “Ariorica nantero caari cameetsatatsi, impoiji iriojeite noshaninca icameetsasanotaque Tasorentsi, te inquempenajani narori. Impoiji ariorica impincatsajeiteri. ¿Paita meeca inquishmentantenarori Tasorentsi caari cameetsatatsi nantayetiri? Tempa irootaque irineacameetsatan-teariri noshaninca”. ⁶Teve. Te oncameetsateji oca yaamaayevetari. ¿Arimpa iramatavitaquee Tasorentsi? Icanti intianqueri antapinitirori caari cameetsatatsi Sharincaveniqui. ⁷Pineaquero, ¿ocameetsatimpa nontseeya niotacantea-rimeri atiri te intseeyaji Tasorentsi, impoiji impincatsateri? Impoiji oncameetsateme nontseeya, eirome iquishmentanarome Tasorentsi nontseeya. Iro cantaincha, te oncameetsateji oca icantiri.

⁸¿Ocameetsatimpa antapinitero caari cameetsatatsi inquimoshiretanteari Tasorentsi? Teve, eiro antirotsi. Ocameetsati intianqueri Tasorentsi Sharincaveniqui cantashiniroyetarori oca, aitanauquem-paquea irineashiiteteartotave coajicani. Iro cantaincha itimi cantacotashitanari: “Yoametiri Pavoro ashaninca yantiro caari cameetsatatsi”. Itseeyashita iriori.

⁹Ari arojei jorio. ¿Ocameetsatimpa ancante: “Te incameetsajeiteji itsipapee atiri, aroquea ainti, acameetsajeiti”? Te oncameetsateji ancantero oca. Tempa amoncaratavacaajeitaca, ainiro antanejei

maaroni: aroripee, aisati iriori itsipapee atiri. ¹⁰Tempa aitaque ocanti Sanquena-rentsi: “Te intimeji cameetsatatsineri, tecatsi catsini. ¹¹Te intimeji coatsine irioteri Tasorentsi, aisati te intimeji coatsine irioteri icoacaqueriri. ¹²Iquishi-manataqueri Tasorentsi, yantajeitiro caari cameetsatatsi. Te intimeji cameetsatatsine, tecatsi catsini. ¹³Te oncameetsateji catsini iquenquetsatashiyetari. Oshequi itseeya. Oshequi catsini iquisatsajeitiri ishanincapee. ¹⁴Oshequi yoamaimanateri ishaninca, iquisatsatapinijeitiri. ¹⁵Aisati yoashiyetacari ishaninca, shemi, shemi. ¹⁶Jaocarica ijayetaqueri, yoashinoncaaye-taqueri ishaninca. ¹⁷Te irioteji catsini incavintsante, irineshinoncatante. ¹⁸Te impincatsajeiteriji Tasorentsi”. Irootaque isanquenatacaqueriniri Tasorentsi peeraniniri.

¹⁹Ayojeitaque meeca irashinoncaasante maaroni iojeivetarori isanquenareni Moishishi. Iojeiveta paita icoacaqueriri Tasorentsi, tecatsi incantajeite: “Te nioteji”. Tempa iroashinoncaajeiteri maaroni atiri antirori caari cameetsatatsi. ²⁰Tecatsi incante atiri: “Nomajeitacuero maaroni ocantiri isanquenareni Moishishi, meeca irineacameetsatena Tasorentsi”. Teve, te irimateroji. Tempa irootaque Sanquenarentsi oamejeiteeri ainiro antane.

Yoavisacojeitacuero Tasorentsi maaroni quemisantajeitacuereji Quirishito.

²¹Meeca noncamantempi: yora Moishishi aisati yora camantantatsiniri icamantajeitacuee jaoca ancanteari irineacameetsatanteeri Tasorentsi. Te incamantejeji amoncaratero Sanquenarentsi, ²²irointi icamanteeni ariorica aquemi-santaqueri Jesoquirishito, inecameetsa-jeitacuee Tasorentsi. Aitaque amoncaratavacaajeitaca, arojeitacuee jorio aisati itsipapee atiri: ²³ainiro antajeitacuereji

caari cameetsatatsi, maaroni. Te antajeiteroji cameetsayetatsiri icoacaajeitaqueeri Tasorentsi. ²⁴Ariorica aquemisantajeitaqueri Jesoquirishito, yoavisacojeitaquee Tasorentsi, inecameetsajeitaquee. Tempa ineshinoncajeitaquee: te inquenqeshireteroji aisati caari cameetsatatsi antajeitaqueri. ^{25,26}Itiancaqueri itomi, icamimentaquee, aparajitamentajeitaquee iriraja. Meeca, ariorica aquemisantaqueri, moncarataca, eiro iquenqeshiretajirotsi aisati antajeitaqueri. Aisati peerani, tequeratani impoqueni aca quipatsiqui Jesoshi, te iroasanquejeiterini Tasorentsi yora quemisantatsiniri. Iotitani coajica incamimentajeiteri iriori Jesoshi. Irootaque ayojeitancacari icameetsatasa-notaque Tasorentsi aisati inecameetsajeitaqueri maaroni quemisantajeitiriri Jesoshi.

Tecatsi ancantajeitea arori ashemete, te amateroji avavisacotajea arosati.

²⁷Tecatsi meeca ancantea ashemete. Tecatsi ancantea aisati avavisacotajea arosati. ¿Paita caari amatantaro? Tempa irinti quemisantatsiri yoameetsatiri Tasorentsi. ²⁸Pineaquero, ariorica aquemisantaque, yoameetsataquee Tasorentsi. Te incantajeiteeji: “Pimoncarajeitero isanquenare Moishishi pavisacojeitantajeari”. ²⁹¿Apanirompa yoavisacojeitiri Tasorentsi jorio? Tempa aisati yoavisacojeitaqueri pashinipee atiri aisati. ³⁰Itimi aparoni Tasorentsi, icavintsaajeitaquee maaroni. Iotaque amoncaratavacaajeitaca. Ariorica inquemisante jorio, iroavisacoteri. Ariorica inquemisante itsipapee atiri, iroavisacoteri. ³¹Ariorica aquemisantaqueri Jesoshi, ¿ocameetsatimpa ajocajero Sanquenarentsi? Teve, eiro ajocajirotsi. Ariorica aquemisantaque, irootaque amatantearori ocamantajeitaqueeri.

Inecameetsataqueri Tasorentsi Avaramani.

4 ¹Piojeitaque jaoca icantaniri ashanincasanorini Avaramani. Meeca noncamantempi: ²te iroavisacotajeaji irisati. Iroavisacoteame irisati, irimate-rome irishemeteme, incanteme: “Oshequi nocameetsataque, navisacotantajari”. Iro cantaincha tempa iotaque Tasorentsi te incameetsateji Avaramani. ³¿Paita ocantiri Sanquenarentsi? Tempa ocanti: “Iquemisantaqueri Avaramani Tasorentsi, irootaque inecameetsatantariniri”. ⁴Noshiacantempiro: intimerica tsameeterine ivatorote, tempa ocameetsati impinateri. ¿Ocameetsatimpa incanteri: “Jeri yoca, nompashitempiri”? Te oncameetsateji: tempa pomerentsitaca itsameetiniri. ⁵Irinti Tasorentsi, inashita: eiorica amayetirotsi cameetsayetatsiri, iro cantaincha ashiretaririca, aitaque iroameetsajeitee. Eiro apomerentsiventaritsi ampinateri. ⁶Pineaquero, tecatsi antasanote iroameetsanteeri Tasorentsi, iro cantaincha iriveshireacaajeitee, ariorica anquemisanteri. Tempa irootaque icantaqueniri Iravirini: ⁷“Iquimoshirejeitaque maaroni atiri yora icavintsairi Avincatsarite. Eiro iquenqeshiretajirotsi aisati caari cameetsatatsi yantayetiri. ⁸Queario, inquimoshiretasannotanaque, iotaque eiro iquishmentiritsi yantayetiri”. ⁹Ari, ¿janica iquenquetsatacotiri Iravirini? ¿Apanirompa ajorioririnte? Tempa iquenquetsatacotiri aisati maaroni itsipapee atiri. Tempa ayojeiti iquemisantaque Avaramani, irootaque yoameetsatantariri Tasorentsi. ¹⁰Iro cantaincha ¿jaoca icantacari yoameetsatantariri Tasorentsi? Tequerani irijorioteni, tequerani intoyeanteani. ¹¹Pineaquero, tequerani intoyeanteani ishiretarini Tasorentsi, yoameetsatantariri. Impoiji-

quea itoyeantaca, iojeitantacari ishaninca ijivataque iquemisantaque. Meeca ayojeitaque aitaque inquempejeiteari iriori itsipapee atiri: eiro ijititsi ariorica intoyeantea irineacameetsatanteariri Tasorentsi, irointiquea inquemisante. Tempa yora Avaramani iriotaque intasanotacarori iquemisanti. ¹²Aisati inquempejeiteari maaroni ashanicapee arori, ariorica inquemisante. Eiro ijititsi ariorica intoyeantaquea, ari iravisacotaje, irointi ocameetsati inquemisante iravisacotantajeari. Inquempeteari Avaramani, tequerani intoyeanteani peerani.

Jero oca icantiriniri Tasorentsi Avaramani.

¹³Ari iquemisantaque Avaramani, irosati yoameetsatantariri Tasorentsi, impojji icantaqueri: “Nocoacaquempi coajica pimpincatsaventajeiteri maaroni quipatsisati. Pincarajeiteri maaroni quempejeitempineri piquemisanti, pimpincatsariventantajeite”. ¿Paíta icantantariniri oca? ¿Imoncarayetironimpa isanquenare Moishishi? Teve, tequerani ontimeni. Iro icantantariniri, ishiretarinari. ¹⁴Irioricame incanteme yora coavetachari irimoncaraterome isanquenare Moishishi, iramataviterime Avaramani. Tecatsime incanterime shiretariri. ¹⁵Iroashinoncaajeiteri Tasorentsi maaroni caari moncaratiro isanquenare Moishishi, inquisaqueri. Iro cantaincha eiroricame otimime isanquenare, tecatsime inquisimienteemeri Tasorentsi. ¹⁶Ariorica ashiretacari Tasorentsi, tempa imoncarataquero icantaqueeri. Queario, ineshinoncajeitaqueri maaroni quempejeitariri Avarama. Te apaniro irineshinoncajeiteri jorio, irointi ineshinoncajeitaqueri maaroni quemisantsiri. Tempa iriotaque Avarama intacarori iquemisantaque; ariorica aquemisantaque, aquempejeitajari. ¹⁷Tempa icantaquerini peerani Tasorentsi: “Avirotaque intasanotacarori, impojji quea inquempejeitempi

oshequi itsipapee atiri”. Iriotaque Tasorentsi quiso oaqueriri Avaramani. Aisati yoaneajiri camayevetañchari, tempa irisati timacaajetirori maaroni aneajeitaqueri.

¹⁸⁻²⁰Iotacotaca Avaramani yanteashipataque, irotimataintsí incame. Aamaaca ocarataque irosarintsite 100. Aisati iotiroyjina, shiravaro oni. Te intimeji itomi catsini, iro cantaincha icamantaqueri Tasorentsi: “Irishequianaje pishanincasanori”. Te intseenqueriji Tasorentsi, irointi iquenqeshiretaquero icantaqueriri, iotaque queario icantaqueriri, irimoncarataquero maaroni. Tequerani intimeni ishanincani, iveshirementacari Tasorentsi, icanti: “Tempa icameetsataque Tasorentsi”. ²¹Iotasannotini ainiro itasorenca Tasorentsi, tecatsi pomerentsitimetearine; iotasannotini irimatero maaroni icantaqueriri. ²²Irootaque icantantacari Tasorentsi: “Ishiretaquena Avarama, irootaque noneacameetsatantariri”. ^{23,24}Irootaque icantaqueriniri Avaramani, irosati meeca icantajeitaqueeri arori; ayojeitaque ariorica ashiretari Tasorentsi, inecameetsajeitaquee, iquempetacaantajeitaquee te anteroji caari cameetsatatsi. Tempa iriotaque oitinaajiriri Avincatsarite Jesoshi. ²⁵Otimi antajeitiri caari cameetsatatsi, irootaque icamimentantajeitaqueeri Jesoshi. Impojji itinaanaja aisati, irootaque ayojeitantacari maaroni inecameetsajeitaquee, oquempetaca te antapiniteroji caari cameetsatatsi.

Inecameetsajeitaquee Tasorentsi ayojeitantacari antime inquitequi, ancantaitatemypani.

5 ¹Ari icamimentajeitaquee Avincatsarite Jesoquirishito, yoavisacojeitaquee. Meeca ashirejeitacaro maaroni icantaqueeri Tasorentsi, irootaque inecameetsajeitantajeeri, oquempetaca te anteroji caari cameetsatatsi; meeca

yaacameetsajeitaquee, maaroni.

²Aquemisantaqueri Quirishito, irootaque icavintsantaqueeri Tasorentsi, icantatiani. Oshequi aveshirementacari, ayojeitaque aneajeitajeri anta ipincatsaritasanotinta.

³Aisati, ariorica aquemaatsicataro paitapeerica, cameetsa aveshirementeari Tasorentsi. Ayojeitaque ariorica aquemaatsicataro, yamitacotaquee amavetantarori, eiro ashemantatsi.

^{4,5}Aisati ariorica ayoti amavetiro, yamitacotaquee Tasorentsi aquearioventaquero antaveetiniri Tasorentsi. Ariorica aquearioventiniri paitapeerica, ayotanaque ashiretcaro icantaqueeri, aisati ayotanaque te iramatavijeiteji. Tecatsi incantee iramatavijeitee, tempa quiso oajeitaquee Ishire, irootaque meeca inintasanojeitantaqueeri catsini. Aveshirementacari.

⁶Peerani ashinoncaasanojeitaca, tecatsi ancantea avavisacotajea arosati. Impoiji onmoncarantacari, ipocaque Quirishito. Te ampincatsaveteariji, iro cantaincha icamimentajeitaquee. ⁷Ari te aneapinite-riji atiri coatsiri incamimentera itsipapee cameetsatsiri, iroavisacotanteariri. Iro cantaincha aamaaca itimi aparopee camimentiriri cameetsatsiri. ⁸Arojeiquea ainti, te ancameetsajeiteji, iro cantaincha itiancaqueri Tasorentsi Itomi icamimentajeitaquee. Tempa irootaque ayojeitantacari icavintsaasanojeitaquee, inintasanojeitaquee. ⁹Aparajatimentaquee iriraja, icamimentajeitaquee. Meeca inecameetsataquee Tasorentsi, oquempevetaca te anteroji caari cameetsatsi. Coajica, inquisheri Tasorentsi maaroni antapinitirori caari cameetsatsi, irompa ainti, aitaque iroavisacojeitaquee. ¹⁰Peerani aquisaveitarini Tasorentsi, iro cantaincha icamimentajeitaquee Itomi, meeca anecameetsataqueri Tasorentsi; aisati iriori, inecameetsataquee. Meeca eiro

icamajitsi aisati Jesoshi, irointi yaneasannotaji, imatantarori itasoncaventapinijeitaquee meeca. ¹¹Aisati ayojeitaque ariorica aquemisantaqueri Avincatsarite Jesoquirishito, inecameetsajeitaquee Tasorentsi. Tempa irootaque aveshirementantariri meeca.

Yantaqueri Aran aisati yantaqueri Jesoquirishito.

¹²Peerani intanacaro caari cameetsatsi aparoni shirampari, yora Aran; irootaque icamantacari impoiji. Aisati aquempejeitacari arori, aisati iriori maaroni pashinipee atiri; antajeitaquero caari cameetsatsi: ashi avajeitiro. Irootaque meeca acamanejeitantarori arori maaroni: ashi airo acamajeiti maaroni.

¹³Peerani te ontimeni isanquenareni Moishishi. Yantapinijeitaquero atirini caari cameetsatsi, iro cantaincha te iriotasanojeitenti paita icocaaasanojaqueriri Tasorentsi: pineaquero, te ontimeni irineane. ¹⁴Iro cantaincha icamajeitaquee maaroni atiri: yora Aran, iriotaque nijantaquerori, irootaque icamajeitantacari maaroni impoitiriri itimi, irosati itimantacari Moishishi. Oamaajeitaqueri yantiniri Aran, te iro oamayerine yantayetiri iriori. Yora Aran ishiavetari pashini pocatsiri impoiji, ¹⁵iro cantaincha inashita aisati. Otimi yantaqueri Aran icamajeitantacari atiri. Iro cantaincha icavintsaasanojeitaquee Tasorentsi, te inquisimentasanojeiteeroji antayetiri, irootaque itiancantacariri yora impoitatsiri ipoqui: yora Jesoquirishito. ^{16,17}Oca yantaqueri Aran oamaajeitaqueri oshequi atiri, irointi oca yantaqueri Quirishito oaneajeitajiri oshequi atiri. Meeca icavintsaasanojeitiri Tasorentsi oshequi atiri, te inquenqeshiretacotajeriji yantajeitaqueri, irointi inecameetsajeitaqueri maaroni quemisantiriri Quirishito. Yoaneajeitaqueri maaroni, incantaitiyempani irisavique inquitequi.

¹⁸Yantaquero caari cameetsatsi aparoni shirampari: yora Aran, irootaque

ajajeitanteameri Sharincaveniqui arori. Iro cantaincha ainiro yantaqueri pashini shirampari, yora Quirishito. Yoameetsajeitaquee irinti, asavicajeitantajeari inquitequi, ancantaitatijempani. ¹⁹Te inquemisanteriji Aran Tasorentsi, irootaque caari cameetsajeitanta. Iquemisantaqueri Quirishito iriri, irootaque yoameetsajeitantaqueeri. ²⁰Isanquenatacaqueri peerani Tasorentsi Moishishi ayojeitantacari te oncameetsateji catsini oca antajeitaqueri. Te ancameetsateji catsini, iro cantaincha oshequi catsini icavintsaajeitaquee Tasorentsi. ²¹Ari te ancameetsajeiteji, irootaque acamajeitantacari, iro cantaincha aquemisantaqueri Avincatsarite Jesoquirishito, irootaque icavintsaajeitantajeeri Tasorentsi. Te inquisimenteroji antajeitaqueri, irointi yoameetsajeitajee ancantaitatijempani asaviquimojeitajeri anta inquitequi.

**Ariorica avaotisaajeitaja
aquempetacantajeitaca atsipajeitacari
Quirishito acamajeitaque aisati
atinaajeitanaja.**

6 ¹¿Paita antajeiteri meeca? ¿Antapinijeitajerompa caari cameetsatsi incavintsantapinijeiteeri Tasorentsi? ²Teve. Eiro catsini antapinitajirotsi aisati caari cameetsatsi. Oquempevetaca acamaque, eiro amatantaro antapinitajero aisati. ¿Paitasa, meeca, antapinitantajarori? ³Ariorica aquemisantaqueri Quirishito aisati avaotisatimentajeitacari, oquempetaca acarajeitaqueri acamajeitaque. ⁴Aisati oquempetaca acarajeitaqueri atijajeitaca, aisati oquempetaca atinaajeitanaja. Meeca anashijeitaja, aquempejeitacari Jesoshi: icamaque, impoiiji itasoncasanotajiri Apa Tasorentsi itinaantanajari aisati. Meeca inashitanaja, te inquempetajeaji peerani. ⁵Ari piquempejeitacari Quirishito. Oquempetaca picarajeitaqueri picamajei-

taque, aisati oquempetaca picarajeitaqueri pitinaajeitanaja: paneajeitanaji, iro cantaincha pinashijeitanaja maaroni. Te inquempeteaji Quirishito peerani; aisati avirorijeji, te pinquempejeiteaji peerani. ⁶Peerani oshequi picoapinijeitini pantapinijeitironi caari cameetsatsi, iro cantaincha oquempetaca pitsipatacari Quirishito pipajacojeitaca coroshiqui, picamajeitaque: ¿paitampa pincoantajeari aisati pampiitajero caari cameetsatsi? Peerani oquempetaca avirojeji iratiritepee camaari, yantacaapinitaquempi caari cameetsatsi; iro cantaincha meeca oquempetaca picamaque, tecatsi incantea iromperanatajempai aisati. ⁷Pineaquero, ariorica incamaque atiri, eiro itimitsi omperanajeitajarineri. Meeca avirori, eiro pantajirotsi meeca caari cameetsatsi. ⁸Ariorica picarajeitaqueri Quirishito picamajeitaque, ayojeiti pincarajeiteri aisati pisaviquimoteri anta isaviquinta iriori. ⁹Ayojeitaque icamaque, aisati itinaanaja. Eiro icamajitsi aisati: tecatsi incantajea incamaje aisati. ¹⁰Icamantacari Jesoshi, icamimentaquero caari cameetsatsi antajeitaqueri. Moncarataca: eiro icamajitsi aisati. Meeca aneanaji: quiso yoajiri meeca Tasorentsi, incantaitatijempani. ¹¹Aisati aviroripee, piquempejeitaca picamasanojeitaque, eiro pantantajarotsi caari cameetsatsi; iro cantaincha yoaneajeitajimpi aisati Jesoquirishito, piojeitantajariri Tasorentsi.

**Iquenquetsatacotiri pincatsatiriri camaari
aisati pincatsatiriri Tasorentsi.**

¹²Tempa oquempetaca picamaque: eiro meeca pantapinitajirotsi caari cameetsatsi, eiro piquenqueshiretajirotsi. ¹³Ari oquempetaca picamaque, eiro pishine-tantajaritsi meeca camaari irantacaapinitempiro caari cameetsatsi. Aisati oquempetaca yoaneajimpi Tasorentsi,

irootaque pishinetanteariri irantacaye-tempiro cameetsayetatsiri. ¹⁴Eiro meeca pantajirotsi caari cameetsatatsi. Te aneroji peranatempine pantero paitapeerica, irointi icavintsaajeitaquempi Tasorentsi, ineshinoncajeitaquempi.

¹⁵¿Paita anteri meeca? Ayojeitaque te ontimeji peranajeiteene aisati ayojeitaque icavintsaaPINIJEITAQUEE Tasorentsi.

¿Ocameetsatimpa antashitapinitearo caari cameetsatatsi? Teve, te oncameetsateji. ¹⁶¿Janicampa pimpincatsatasanoteri? Ariorica pimpincatsateri camaari, irantacaapinitempiro caari cameetsatatsi, iro cantaincha impoiji pijate Sharincaveniqui. Iro cantaincha ariorica pimpincatsateri Tasorentsi, irantacaapinitempiro cameetsayetatsiri. ^{17,18}Peerani pipincatsaveitarini camaari, meeca pipincatsatajiri Tasorentsi. Piquemisantajiro maaroni yoamejeitajimpiri iriori, irootaque nopasonquitantariri meeca. Pantapiniveitaroni caari cameetsatatsi, meeca pantapinitiro cameetsayetatsiri.

¹⁹Noncamantempiro piojeitantearori, pinquemajeitantearori. Oquempetaca peerani pipincatsaveitarini camaari pantantaroniri caari cameetsatatsi, ocameetsati meeca pimpincatsajeiteri Tasorentsi pantajeitantearori cameetsayetsatsiri, pincameetsatasanajeitanteari.

²⁰Peerani, pipincatsajeiveitarini camaari, te pimpincatsajeiterini Tasorentsi. ²¹Iro cantaincha oshequi meeca pipashiventa-caajaro pantajeiveitaniri: ¿paita impinatempimeri camaari? Pantajeiveitarini, irootaque pijatanteameri Sharincaveniqui. ²²Meeca tecatsi incante camaari iromperanajeitajempi aisati: tempa meeca pipincatsajeitajiri Tasorentsi. Iroameetsajeitempi irinti, irisavica-caajeitempi inquitequi: pincantaitatitempani. ²³Pantapinijeivetacaró caari cameetsatatsi, pijajeitanteameri Sharincaveniqui. Iro cantaincha piquemisanta-

queri Jesoquirishito, irootaque icavintsantaquempiri Tasorentsi, irisavicacaajeitempi inquitequi, pincantaitatitempani.

Ariorica aquemisanti, te omperanajeiteeji isanquenare Moishishi.

7 ¹Tequerarica, noyemisantaririnte, pinquemasanajeite. Avirojeitaque nojorioririnte, noquenquetsatacaajeitiri. Ariorica incame ashaninca, tecatsi incantea inquemisantero icantavetacarí Moishishini. ²Noshiacantempiro oca. Ocanti Sanquenarentsi: “Ariorica aye tsinane ojime, quiso oanaqueri, irosati incamanteari. Te oncameetsateji ojocashitajeari”. Iro cantaincha ariorica incamaque, te aneajeriji ojime. ³Iro cantaincha ainirorica ojime, te oncameetsateji aimenteari. Ariorica incamaque ojime, ari ocameetsati aaje aisati pashini ojime, meecaquea te aimenteariji ojimeni. Tecatsi tsaneajearone aaje. ⁴Aisati, noyemisantaririnte, icamaque Quirishito: aisati oquempvetaca picarajeitaqueri, picamajeitaque. Meeca eiro operanatajimpitsi isanquenare Moishishi, tempa oquempvetaca picamaque. Irointi yoaneajeitajimpitsi aisati Tasorentsi pimajeitantearori maaroni icoacaajeitaquempiri. ⁵Peerani aquemisantaveitarini camaari. Acoapiniveitaroni antapinitironi caari cameetsayetatsi, ora itsaneapitsavetaqueeri Tasorentsi. Aitaque acantajeitaniri, antapinijeitironi, irootaque ajajeitanteameri Sharincaveniqui. ⁶Iro cantaincha oquempetaca acamajeitaque. Eiro meeca aquenqueshirejeitajirotsi icantajeitiri jorio, yamejeitari iriori. Meeca te antapiniteroji ocantiniri isanquenatiniri peerani, irointiquea antapinite ocoacaajeitaqueeri Ishire Tasorentsi.

Iquenquetsatacotaquero isanquenare Moishishi.

⁷¿Paita nocantajeitimpiri? ¿Nocantimpimpa te oncameetsateji isanquenareni

Moishishi? Teve, te noncantempiji. Eirome otimime, eiro niotime te oncameetsateji nantayetiri. Eirome ocantime: “Eiro pinevetarotsi yashiyetari itsipapee”, eiro niotime te oncameetsateji. ⁸Oamevetaquena te oncameetsateji nonevetearo paitapeerica, niövetaro; iro cantaincha aiqero nojatatii nonevetasannotanacaro paitapeerica. Eirome otimime Sanquenarentsi, eiro niotime te oncameetsateji nonevetearo. ⁹Peerani, tequerani nioteroni Sanquenarentsi, noquimoshiretashiveitani. Iro cantaincha impoiji oametaquena otimi nantane, irootaque noashiretantacari. Niotanaque nojateme Sharincaveniqui. ¹⁰Nojivetaca ariorica nanterome maaroni ocantiri Sanquenarentsi noncantaitiyempani nontimeme inquitequi, iro cantaincha tecatsi noncantea nomatero. Oametaquena meeca otimi nantane, irootaque nojatanteameri Sharincaveniqui. ¹¹Oshequi noquenqueshiretaquero caari cameetsatatsi, namatavitantajari narosati, irootaque caari nantantaro ocantiri Sanquenarentsi. Impoiji niotaque nojate Sharincaveniqui. ¹²Pineaquero, ocameetsataque isanquenareneni Moishishi: irootaque irineane Tasorentsi, ocameetsasanaotaque.

**Icantiri paita antapinitantarori
caari cameetsatatsi.**

¹³Ari ocameetsati Sanquenarentsi, iro cantaincha ¿paita nojatanteameri Sharincaveniqui? ¿Irompa Sanquenarentsi jatacayenaneme? Teve, irointi nantaquero caari cameetsatatsi, irootaque nojatanteameri Sharincaveniqui. Tempa oametajana Sanquenarentsi te oncameetsateji catsini oca nantayetaqueri. ¹⁴Ocameetsataque irointi, tempa irio sanquenatacaantirori Tasorentsi; narori, te noncameetsateji nainti, catsini. ¹⁵Te niotacoteaji narosati: nocoaveta nontimeme cameetsa, iro cantaincha, te

nomateroji. Nantapinitiro caari nocoasanoveta. ¹⁶Niotaque te oncameetsateji oca nantayetaqueri, niotaque ocameetsati oca oametantiri Sanquenarentsi. ¹⁷Te noncoaveteaji nantero paitapeerica, iro cantaincha nashi noiro te noncameetsateji, irootaque nantashitantarori. ¹⁸Niotaque te noncameetsateji catsini. Ariorica nocoaveta nanterome cameetsayetsiri, iro cantaincha te nomateroji. ¹⁹Te nantapiniteroji cameetsatsiri nocoavetari nantemeri, irointi nantapinitiro caari cameetsatatsi caari nocoaveta nantero. ²⁰¿Paita nantashitantarori caari nocoaveta nantero? Aitaque nashi noiro te noncameetsateji, irootaque nantashitantarori.

²¹Aitaque nocantani: nocoavetaca nosaviqueme cameetsa, iro cantaincha omapocaquena nantaquero caari cameetsatatsi. ²²Noquenqueshiretasano vetacaro irineane Tasorentsi, nocoasano vetaca nanterome icoacaaquenari. ²³Oshequi noashiretasano vetaca catsini. Oshequi noquenqueshirevetacari Tasorentsi, nocoavetaca nanterome icoacaaquenari. Iro cantaincha tecatsi noncantea nantero, irointi omapocaquena nantaquero caari cameetsatatsi. ^{24,25}Oshequi nashinoncaavetaca. Noquenqueshirevetaca nanterome icantaquenari Tasorentsi, iro cantaincha nashi noiro te noncameetsateji. ¿Janica amitacotenaneri eiro nantapinitantajarotsi aisati caari cameetsatatsi? Iriotaque Avincatsarite Jesoquirishito amitacotenaneri. Irootaque meeca oshequi nopasonquitantariri Tasorentsi.

Amitacojeitaquee Ishire Tasorentsi.

8 ¹Ariorica anquemisantajeiteri Jesoquirishito, aisati antapinitero icoacaaqueeri Tasorentsi, eiro yoasanquetajeiteetsi. Eiro meeca antapinijetirotisi caari cameetsatatsi acoiri arori. ²Ari

peerani nashi noironi nantapinitironi caari cameetsatatsi, nojateme Sharincaveniqui. Iro cantaincha noquemisantaqueri Jesoquirishito, oavisacotantajanari Ishire Tasorentsi, oaneantajanari. Osavicacaa-jena coajica anta inquitequi, noncantaitatiyempani. ³Pineaquero, tecatsi oncantea oavisacojeitee isanquenare Moishishi: ashi airo te ancameetsateji. Te amajeite-roji ocantaqueeri. Iro cantaincha yoavisa-cojeitaquee Tasorentsi, irinti. Itiancaqueri Itomi aca quipatsiqui, yatiritapaque, iquempetasanotapaquee arori, iro cantaincha te iranteroji caari cameetsatatsi. Icamimentaquee arori, ipashinitacaa-je eiro aquempetantajatsi peerani.

⁴Meeca, ariorica anquemisantero Ishire Tasorentsi, ari amataquero ocantaqueeri Sanquenarentsi. Peerani ashi aironi te ancameetsateji, te amateroni ocantaqueeri. ⁵Yora caari cameetsajeitatsi iquenqueshiretapinitiro irantero caari cameetsatatsi. Irinti iotirori Ishire Tasorentsi icoaque irantero ocoacaaqueri iroori. ⁶Ariorica anquenqueshiretero acoashiyetari arori, ajate Sharincaveniqui. Ariorica anquenqueshiretero Ishire Tasorentsi, ari cameetsa ancantaitatiyempani asaviquimojeiteri Tasorentsi.

⁷Ariorica antayetero acoaqueri arori, atseencaqueri Tasorentsi: te ancoyeji antayetero icoacaajeivetaqueeri. Eiro amatirotsi.

Jaoca icanta yora caari cameetsayetatsi.

⁸Te irineacameetsateriji Tasorentsi maaroni antayetirori caari cameetsatatsi.

⁹Iro cantaincha avirojei avinti, te pinquempeteiteariji iriori. Quiso oajeitaquempi avirori Ishire Tasorentsi. Yora caari quiso oi Ishire, te irioteriji Quirishito. ¹⁰Oshequi pantaquero caari cameetsatatsi, irootaque pincamajeitanteari, iro cantaincha pishanincatacaririca Quirishito, yoameetsataquempi Tasoren-

tsi, pincantaitatiyempani pisaviquimoteri. ¹¹Tempa yoitinaajiri Jesoshi. Meeca ariorica quiso oaquempi Ishire, irointinaajeitajempi aisati, iroaneaajeitajempi aisati. Iro irimatantajempiri pishiretacaro Ishire. ¹²Meeca, noyemisantaririnte, atsipetashitacaro aquemisantiri camaari, atsipetashitaro antiro caari cameetsatatsi. ¹³Ariorica pantapinitero aisati, pijate Sharincaveniqui. Iro cantaincha ariorica pinquemisantero Ishire Tasorentsi, eiro pantajirotsi aisati caari cameetsatatsi, impoijiquea pisavique inquitequi, pincantaitatiyempani.

Itomintajeitari Tasorentsi maaroni quemisantiriri.

¹⁴Maaroni quemisantirori Ishire Tasorentsi, iriojeitaque itomipee Tasorentsi. ¹⁵Pamene, ariorica quiso oajeitaquee Ishire, arojeitaque Itomi. Te anquempeteiriji iratiritepee, aisati eiro atsaroacaa-ritsi. Eiro aquempetajatsi peerani atsaroacaa-jeivetarini. Tempa queario, acantiri meeca: “Apa”. ¹⁶Ariorica ayotaque quiso oajeitaquee Ishire Tasorentsi, aisati oamejeitaquee, irootaque ayojeitancari itomintajeitaquee Tasorentsi. ¹⁷Arojeitaquerica itomipee, ari impajeitaquee Tasorentsi maaroni icoacaaqueeri ontimimojeitee coajicani, anquempeteiteari Quirishito. Meeca aitaque anquempeteiteari aneacatsitaquearo paitapeerica, iro cantaincha coajica anquempeteiteajeari cameetsa asaviquimojeiteri Tasorentsi, aveshireimentajeiteari.

Coajica eiro aquenqueshiretajirotsi paitapeerica aquematsicavetacari meeca.

¹⁸Coajica cameetsa catsini irisavicacaa-jeitee anta inampiqui, impoiji eiro aquenqueshiretajirotsi paitapeerica aquematsicavetacari meeca. ¹⁹Ayojeitaque maaroni catsini yovetsicajeitaquee Tasorentsi irisavicacaasanojeitaquee

cameetsa, aisati impeajeitajee pincatsari-tajantsineri. Yaamaajeitacari maaroni catsini: “¿Jaoca oncarate intasoncaventajeitajeri maaroni itomipee?”^{20,21} Yatsipe-tashita itimayetaque maaroni yovetsicajeitiri Tasorentsi: icamapinijeitajee iriori poshiniripee, panquirentsipee, maaroni; eiro aneajiritisi aisati coajicani. Tecatsi irantajeivetea icamajeitancari, irointi icamajeitancari otimi yantaqueri peerani Aran. Iotaque Tasorentsi coajica eiro oquempetajatsi meeca, irointi iroameetsatasanojeitajeri aisati, oquempetaca iroameetsatasanojeitajee arori: tempa arojeitajee itomipee maaroni.²² Ayojeitajee icatsinatapinijeitini maaroni yovetsicane Tasorentsi, aisati icamajeitini: icantani, irosati meeca.²³ Aisati arorijeje quemisantatsiri, ashinoncaajeivetaca, ainiro aquemaatsicajeitacari. Timatsi Ishire Tasorentsi, quiso oajeitajee, amitacojeitajee; iro cantaincha acoajeitajee inquempetacaantasanajeitee Tasorentsi itomi. Impoiji eiro aquematsicatarotsi paitapeerica, eiro acamajitsi.²⁴ Ariorica ayotaque irimatero Tasorentsi icantaqueeri, aquemisantaqueri avavisacotantajari. Iro cantaincha tequera irimateroji, tequera irimoncarajeiteroji maaroni icantaqueeri arori. Omoncarataquearica, ¿arimpa ayeacotajero irimateero icantaqueeri?²⁵ Ariorica ayotasanojaquee irimoncarateero icantaqueeri, cameetsa ayeacotero, eiro ashematsi.

**Amitacojeitajee Ishire Tasorentsi,
ocantiri Tasorentsi iramitacojeitee.**

²⁶Te ayotasanojeiteji arori, iro cantaincha amitacojeitajee Ishire Tasorentsi. Te ayotasanojeiteji anquenquetsacayeri Tasorentsi cameetsa, iro cantaincha ioti irointi Ishire, ocantacoventajeitajee; cameetsa catsini oquenquetsacairi, eiro amatirotsi anquempetearo.²⁷ Iotasano-

quee Tasorentsi, aisati iotaquero paitarica ocantiriri Ishire. Ariorica ocantacoventaquee, iotaque maaroni icoacaaqueeri Tasorentsi.

Icoacaaqueeri Tasorentsi.

²⁸Ayojeitajee ariorica anintaqueri Tasorentsi, aisati ariorica antapinitaquero icoacaaajeitajee, irosati incanteani intasoncacoventajeitee. Ariorica ompomerentsitimovetaquee, iro cantaincha eiro ishineteetsi avashinoncayea.²⁹ Peerani catsini iotiteeni anquemisanteri, irotaque icantitantaniri: “Incameetsatanaque quemisantenaneri, inquempejeitari Notomi”. Tempa iriotaque Itomi Tasorentsi yora Jesoquirishito. Iriotaque itomisanori peerani catsini, itimitani; impoijeitajee itomintajeitajee arori, ashanincatavacaajeitantajari.³⁰ Peerani icantitani: “Nontomintajeitari”, impoiji itomintasanotaquee; impoiji aisati yoameetsataquee, iquempetacaantajee te anteroji caari cameetsatsi. Aisati icanti: “Coajica cameetsa irisaviquimojeitena aca inquitequi”.

³¹Tempa ocameetsajeitajee oca. Pineaquero, itasoncaventasanajeitajee Tasorentsi: ¿janica meeca oashinoncaajeitajee? Tecatsi catsini.³² Te intsaneempariji Itomi, irointi itiancaqueri aca quipatsiqui icamimentajeitajee. Tempa ayojeitajee aisati coajica impapinijeitee maaroni coiteimojeitajee.³³ Tempa icoyeajeitajee Tasorentsi, iquempetacaantajee te anteroji caari cameetsatsi: ¿janica meeca cantatsine ainiro antane? ³⁴¿Janicampa oashinoncaajeiteeneri? Tecatsi: tempa icamimentajeitajee Jesoquirishito yoavisacojeitajee. Aisati itinaanaja, isaviquimotiri Iriri, icaratiri ipincatsariventajeitajee, aisati icantacoventajeitajee.³⁵ ¿Janicampa jocacayerineri Quirishito inintajeitee? Tecatsi catsini. Intimerica oashinoncaajeiteeneri,

quisajeiteeneri; ariorica ompomerentsiti-
mojeitee paitapeerica, ariorica ayee
atashe, eirorica otimitsi anquitsaateari,
ariorica antsarocayearo paitapeerica,
intimerica oayeteeneri; iro cantaincha
icantani Quirishito, inintasanojeitaquee.
³⁶Onquempetajea isanquenataqueroni
peerani: “Noquemisantaquempi, Tasoren-
tsi, irootaque isareantapiniyeetaquenari
iroyeetena. Inquempetacaantena ovisha
yoapiniyetiri”. ³⁷Queario oshequi
inintajeitaquee Quirishito, icantani:
itasoncaventajeitaquee, irootaque
aveshirementasanojeitantacariri.
^{38,39}Queario, te intimeji jocacyerineri
inintajeitaquee: eiro imatirotsi inampire-
pee Tasorensi, camaaripee, pincatsari-
pee, jenoquisati, quipatsisati, maaroni
yovetsicajeitaqueri Tasorensi, eiro
imatirotsi. Ariorica ancamaque, ariorica
aneanaje, eiro imajeitirotsi meeca, aisati
eiro imatirotsi coajica. Aquemisantaqueri
Avincatsarite Jesoquirishito, meeca
inintasanojeitaquee, aisati quiso yoajeita-
quee maaroni.

**Oshequi icavintsajeitaqueri
Pavoro ijorioririnte.**

9¹⁻³Oshequi noquenqueshireacota-
queri maaroni noshanincasanori,
yora nojorioririnte. Queariotaque oca
nocantaqueri, iotaque Quirishito te
nontseeyaji. Aisati quiso oaquena Ishire,
iotacaaquena queario nocantaque.
Noashiretacotacariri noshaninca, te
inquemisanteji. Arioricame nomaterome
noavisacoterime noshaninca, nojatetame
Sharincaveniqui iravisacotantajeameri;
nojatericame anta, eiro noneirime nainti
Quirishito; pineaquero, oshequi nocoaque
iravisacojeitaje. ⁴Ishanincajeitacariri
Ishirairini aisati itomintajeivetarini
Tasorensi. Ineajeitaqueri itasoncantaque,
aisati iquemajeivetaroni icantavetariri,
iojeivetaro Isanquenare Moishishi,

iojeiveta jaoca incanteameri inquemisan-
terime, timatsi icashiacaajeitaqueriri,
⁵iriojeitaque ishanincani yora intacaro-
niri peerani, iriojeitaque ishaninca
Quirishito. Tempa iriotaque Quirishito
Tasorensi, ocameetsati ancantaitiyem-
pani aneacameetsajeiteri aisati ampinca-
tsatasanojeiteri maaroni. Aitaque
ancantajeiteari.

⁶Iojeivetaro irineane Tasorensi, iro
cantaincha te inquemisantajeiteji. ¿Paita
caari iquemisantajeitanta? ¿Yamatavitaque-
rimpa Tasorensi? Teve, te iramataviteriji.
Pamene, maaroni ishanincani Ishirairi te
inquempetasanojeiteariji: te inquemisanta-
jeiteji maaroni. ⁷Aisati te inquempetasano-
jeiteariji Avaramani maaroni ishanincani.
Tempa icantaquerini peerani Tasorensi:
“Irio pishanincatasanojeiteari maaroni
ishanincani yora Isaca”. ⁸Meeca noncaman-
tempiro oca ishiacantiri. Te intominteariji
Tasorensi maaroni ishanincani Avaramani.
Apaniro ishanincajeitacariri yora ishanincani
Isaca. Tempa icantiri Tasorensi: ⁹“Apaniva-
niji osarintsi ontimeri Sara otomi”.
¹⁰Otsipani osarintsi itimaque Isaca. Impoiji
yantearitanaque, yaaque ijina, pajitachari
Ereveca. Impoiji otsomontetaque, iriotaque
tsipari. ¹¹⁻¹³Ainiroquera iriori otsomontequi
iriniro, tequera iranteroji cameetsatsiri
aisati tequera iranteroji caari cameetsatsi,
iro cantaincha otimi icoacaitacariri Tasoren-
tsi. Ari icantitaro Tasorensi: “Yora jivatatsi-
neri intime impincatsateri yora oijatapee-
rine”. Tempa irootaque oquenquetsatacota-
queniri Sanquenarentsi: “Icanti Tasorensi:
‘Nonintasanoteri Jacovo, irinti Esao eiro
nonintasanotiritsi’”. Pineaquero, iotitani
Tasorensi icoacaitacarini: impoiji
imatacaaqueri.

**Jaoca icantiriri Tasorensi
jorio aisati itsipapee atiri.**

¹⁴¿Arimpa ancante: “Te oncameetsateji
oca yantiri Tasorensi”? Teve, eiro

acantitsi. ¹⁵Tempa peerani icantirini Moishishi: “Tempa narotaque cantatsine janicarica noneshinoncateri, aisati janicarica noncavintsayeri”. ¹⁶Te irio atiri cantatsine, irinti Tasorentsi. Ioti irinti janicarica irineshinoncatasanoteri. ¹⁷Tempa peerani osanquenatacani icantiriri yora ivincatsarite ejipitosati: “Nompeajempi pincatsaritajantsine, iriojeitanti atiri oshequi notasorentsi-taque, aisati oshequi impincatsajeitanti-nari maaroni savicajeitatsiri”. ¹⁸Pineaquero, tempa iriotaque cantatsine janicarica irineshinoncateri. Tempa aisati iriotaque cantatsineri janicarica impeajeri tseencantatsineri. ¹⁹Naamaaca meeca pincantena: “¿Arimpa? Queariorica picantaqueri, ¿paita inquishimentantenanori nantayetiri? Tempa nantayetaquero icoacaaquenari iriori”.

²⁰Pamene, aviro atiri: te oncameetsateji pimpiatsateari Tasorentsi, oshequi ipincatsariti irinti. Noshiacantempiro coviti. Ocantirompa vitseirori: “¿Paita caari povetsicantana narori cameetsa?”

²¹Ora vitseirori, tempa irootaque coatsiri jaoca oncanterori quipatsi. Tempa ocameetsati ovetsicaque aparo cameetsa-tasanotatsiri, irointi otsipa eiro oameetsantiro. ²²Ariorica incoaque Tasorentsi, tempa ocameetsati iroashinoncaayeteri iisane. Tempa ocameetsati iriotacajeiteri atiri ainiro itasorenca. Iro cantaincha te iroashinoncaajeiteriji yora caari cameetsajeitatsi, irointi yamavetiro yantayetiri, icavintsaa-queri. ²³Irio icavintsaaanotaqueri yora jatatsineri inquitequi; icoacaaqueri iriojeite oshequi icavintsanti, aisati oshequi ipincatsariti. ²⁴Arojeitaque icoyeajeitaqueri, ayojeitantajariri: jorio, aisati caari joriotatsi. ²⁵Tempa peerani isanquenatacojeitaqueeni yora Oseashi: “Icanti Tasorentsi: ‘Caari inaveitani noshaninca, iro cantaincha meeca

noshanincatacari. Caari inaveitani nonintasanotiri, iro cantaincha meeca nonintasanotajiri”.

²⁶Jero icantini: “Caari inaveitani noshaninca”. Irio iquenquetsatacotaqueri yora peajanchaneri itomipee Tasorentsi; tempa irio Tasorentsi aneasanotatsiri.

²⁷Jero aisati oca isanquenataqueniri Isayashi. Iquenquetsatacotaqueri joriopee: “Incarajeitaque ishanincani Ishiraeri oshequi catsini. Oquempetaca eiro amatirotsi iotero jaoca ocaratiri ovane impanequi, aisati iriori joriopee, eiro amatiritsi ayojeiteri maaroni, jaocarica incarajeiteri. Iro cantaincha eiro yoshequitasanotitsi avisacotajantsine. ²⁸Coajica irimatero Tasorentsi maaroni icantaqueri: irimapocajeiteri maaroni tseencantatsiri, iroashinoncaajeiteri. Intsoteasanojeiteri, maaroni”.

²⁹Tempa aisati isanquenatini: “Eirome icavintsaaajeiteeme Tasorentsi, eirome ishanincaajeiteeme, tempa intsoncaajeiteeme maaroni, anquempajeitarime yora soromasatini aisati yora comorasatini”.

Icamantiri paita caari iquemisantanta joriopee.

³⁰¿Paita aisati noncamantempiri? Yora itsipapee atiri te incoajeiveiteani iroameetsateri Tasorentsi, iro cantaincha meeca iquemisantajeitajiri, irootaque yoameetsajeitantariri. ³¹Irinti yora joriopee icoajeiveta iriori irimayeterome icantayetirini Moishishini incameetsa-tanteameri, iro cantaincha te irimajeite-roji. ³²¿Paita caari yoameetsatantari Tasorentsi? Te inquemisantajeiteriji, irointi icoajeiveta rantero paitapeerica. Oshequi icomitacaró, te iriojeiteji inquemisanteri Jesoshi. ³³Peerani isanquenatironi oca icantaqueniri Tasorentsi: “Nontiancaveteanari joriopee notomi, iro cantaincha eiro iojeitavaque-ritsi. Oquempvetaca ariorica intsitin-

quearo mapi, impariaque; te iriojeiteriji Quirishito ini, irootaque iroashiretanteari. Iro cantaincha eiro yoashiretatsi irinti quemisanterineri, irointi iriveshireimentasanojeiteari”.

10¹Noyemisantaririnte, oshequi catsini nocoaque iravisacojeite maaroni nojrioririnte, oshequi nocantapinitiri Tasorentsi: “Pinquemisantacaajeitajeri noshaninca, iravisacojeitantajeri”.²Niotaque oshequi icoajeiveta inquearioventenerime Tasorentsi paitapeerica yantiniriri, irishintsiventeneri maaroni. Iro cantaincha te iriojeiteji paitarica icoacasanojeitaqueriri. ³Te iriojeiteji jaoca icantajeeri Tasorentsi yoameetsatantajeitajeri. Icoajeiveta iroameetsajeiteame irisati, te incoyeji iroameetsajeiteri Tasorentsi, irinti. ⁴Pamene, ipocaque Quirishito, icamimentajeitaquee. Meeca, ariorica anquemisanteri iriori, iroameetsajeitajee. Atsipetashitacaro meeca antayetaquero icantiniri Moishishi avavisacotanteameri.

Jaoca ancanteari avavisacojeitantajeri.

⁵Peerani yora Moishishi iquenquetsatacotaqueri yora coatsiri irimoncarayetero Sanquenarentsi: “Intimerica coavetachaneri irimoncarayeterome iroameetsatanteameri, oncameetsateme irimoncarajeiterome maaroni, incantaitiyempani. Eirome icomitarome catsini”. ⁶Iro cantaincha ariorica aquemisantaji irootaque acameetsatantajeri, eiro acantitsi: “Pomerentsitaca avavisacotajea. Tsame ajatashiteri Quirishito anta jenoqui, ameri aca iroavisacojeitajeeta”. Teve, eiro acantashitatsi; ⁷aisati eiro acantashitatsi catsini: “Tsame ajate Sharincaveniqui, aintinaajeri Quirishito, iroavisacojeitajeeta”. Teve, eiro acantitsi catsini. Jampa tinaanaja ini peerani. ⁸Ariorica aquemisantaque, aitaque avavisacotaca: eiro acoitsi amayetero

pomerentsiyetatsiri. Tempa timatsi aca irineane Tasorentsi: te ompomerentsiteaji pinquenquetsatacotero aisati pishiretearo. Irootaque oca nocamantapinitimpiri: pinquemisante pavisacotantajeri.

⁹Ariorica pincamanteri itsipapee atiri pipincatsataqueri Jesoshi, aisati ariorica pishiretearo yoitinaajiri Tasorentsi, aitaque pavisacotaje. ¹⁰Pineaquero, ariorica ashireteari Tasorentsi, irineacameetsajeitee; aisati ariorica ancamanteri itsipapee atiri aquemisantaqueri Jesoquirishito, aitaque avavisacotajea. ¹¹Tempa ocantini Sanquenarentsi: “Eiro ipashiventatsi yora quemisantatsiri”. ¹²Amoncaratavacaajeitaca: jorio aisati itsipapee atiri. Icarati Avincatsarite apaniro. Aventajeitacari, irootaque ipincatsariventajeitantaqueeri, ineshinoncajeitantaqueeri maaroni. ¹³Tempa aisati ocantini Sanquenarentsi: “Iravisacojeitaje maaroni aventajeitearineri Avincatsarite”.

Oshequi itseencantajeiti joriopee.

¹⁴Eirorica iquemisantiri Tasorentsi atiri, ¿jaoca incanteari iraventanteariri? Eirorica iquemacotiri, ¿jaoca incanteari inquemisantanteariri? Eirorica itimitsi camanterine, ¿jaoca incanteari inquemacotanteariri?

¹⁵Eirorica itimitsi tianquerine camantantatsineri, ¿jaoca incanteari irijatanteari? Tempa ocantini Sanquenarentsi: “Tempa oshequi aveshireimentacari yora camantajeiteerori irineane Tasorentsi, tempa aneacameetsajeitiri”. ¹⁶Iro cantaincha te inquemisantajeiteji maaroni. Tempa irootaque icantaqueniri peerani Isayashi: “Novincatsarite, nocamantajeivetacari, iro cantaincha icarati oshequi caari quemisantatsiri”. ¹⁷Eirorica icamantee-teetsi, eiro amatirotsi anquemisante. Tempa icamanteetaquee icamimentaquee Quirishito, yoavisacotantajeri.

¹⁸Tempa iquemajeitaque maaroni joriopee. Queario, iquemajeivetaca. Jero ocantini Sanquenarentsi: “Ijataque

camantantatsiri maaroni quipatsiqui, iquemajeitaqueri maaroni savicajeitatsiri”. ¹⁹Tempa iojeiveta jorio inquemisantajeite itsipapee atiri iriori. Aitaque icamantaquerini peerani Moishishi: “Icanti Tasorensi: ‘Coajica pinquisaneenter i itsipapee atiri pitseencajeivetacari. Iro pinquisanteariri noavisacojeitajeri’”. ²⁰Impoiji aisati isanquenatini Isayashi: “Icanti Tasorensi: ‘Te incoavetenaji yora atiripee, iro cantaincha iojeitaquena meeca: niotacaasanojeitaqueri. ²¹Irinti yora joriopee nocantapinivetacari, iro cantaincha ipiatsataquena, te incoyeji inquemisantena’”. Irootaque isanquenatini.

Jaoca incanteari yora joriopee.

11 ¹Naamaaca pisampitena meeca: “¿Ariompa? ¿Eirompa meeca yaacameetsatiritsi Tasorensi maaroni joriopee, yora itomintajeivetari?” Teve, eiro. Tempa narotaque narori jorio. Noshanincatacari Avaramani aisati Vejamine. ^{2,3}Narojeitaque jorio. Tempa peerani icoyeajeitaquena Tasorensi, irosati meeca yaacameetsajeitantajanari. Tempa piojeiti ocantini Sanquenarentsi. Oquenquetsatacotaquerini Iriashi peerani, iquenquetsatacairi Tasorensi, icantiri: “Novincatsarite, teve incameetsajeiteji yoca nojorioririnte. Yoapinyetiri yora quenquetsatacotimpiri. Yojocacaayetajiri ishaninca inquemisantajeivetimpi. Meeca icoajeitaque iroyena narori. Apaniro noquemisantimpi nainti”. ⁴Tempa piojeitaquero aisati ora yacanaqueriri, icantirini: “Timatsiquera 7,000 shirampari quemisantasanotanari. Te impincatsajeiteroji iriori ora Vari ijitasorensiyeevetari”. ⁵Aisati oquempetaca meeca. Timatsi aisati icoyeane Tasorensi, ineshinoncajeitaqueri. ⁶Pineaquero, ineshinoncajeitaqueri, te incanteriji irantero paitapeerica. Incante-

rime irantayerome paitapeerica, te irineshinoncateriji.

⁷Ari, ¿jaoca ocantari meeca? Icoajeivetaca irineacameetsajeiterime Tasorensi, iro cantaincha, te. Ineacameetsayetaqueri aparopee: yora icoyeayetaqueri. Irintiquea itsipapee, te incoajeiteji inquemisante catsini. ⁸Tempa aisati ocantini Sanquenarentsi: “Ipeapitsataqueri Tasorensi iquenqueshireantavetari. Ineayevetacaro paitapeerica, iquemayevetacaro, iro cantaincha te inquemisantaji. Aitaque icantajeitani, irosati meeca”. ⁹Aisati icantini Iraviri: “Iveshireimentavetacaro paitapeerica, iro cantaincha yamatavijeitaja irisati. Impoiji incamaajeite, irineacatsitimentajeitearo yantayetiri. ¹⁰Eiro coajica otimitsi iotantari, eiro iojeititsi. Incanteani irashinoncayea”.

Jaoca icantari jorio aisati itsipapee atiri.

¹¹Ari itseencajeitaque joriopee: ¿inquisajeiterimpa meeca Tasorensi? Teve, eiro iquishirtsiti. Irointi yoavisacojeitaqueri itsipapee atiri incoanteari joriopee inquempejeitajeari iriori, inquemisantaje. ¹²Itseencajeitaque, te incoajeiteji inquemisante, iro cantaincha yavisacojeitaji itsipapee. Coajica, ariorica inquemisantasanojeite joriopee iriori, tempa aiqero irijatatiye inquemisantasanojeite aisati itsipapee iravisacojeitantajeari. ¹³Te avirojei jorio. Piojeiti itiancaquena Tasorensi noquenquetsatacaajeitaquempi. Nocoasanoaque nomajeitaquero icoacaquenari. ¹⁴Nocoaque nonquenqueshiretacaajeiteri aisati nojorioririnte, iravisacotaarantantajeari iriori. ¹⁵Itseencajeitaque meeca, irootaque caari yaacameetsajeitantari Tasorensi; avintiquea yaacameetsajeitaquempi. Iro cantaincha coajica iracameetsajeitajeri iriori, tempa oncameetsatasanotanaque. Irijajeiteme anta Sharincaveniqui oshequi, iro

cantaincha coajica irijajeite oshequi anta inquitequi. ¹⁶Pamene, ineacameetsata-querini Tasorentsi Avaramani, tempa aisati irineacameetsateri ishanincani. Noshiacantempro aisati inchato: ariorica ocameetsataque ovaritsa, tempa aisati ocameetsataque ojempequi iroori. Oquempetaca icameetsataqueni Avaramani, aisati inquempeteari coajica ishanincani, incameetsajeitanaque.

¹⁷Meeca noshiacantempro inchato pajitachari orivo. Ocameetsataque ovaritsa, iro cantaincha te ontimeti oitsoqui ojempequiqui. Irootaque ipesanteetarori, yojoqueetajiro. Yaaque pashini ojempequi, irointi orivoniro. Ipatacaaquero, irointiricampa timatsine oitsoqui. Iro ovaritsa shiocacayeroneri. Ora ojempequini oshiacantiri jorio; ora iroaquera ipatacaaqueri oshiacantaquempi aviorijei, tempa avirotaque pashinisati atiri. ¹⁸Meeca eiro pishemetitsi aviro: “Nocameetsati nainti, te nonquempeteariji yora jorio”. Pamene, te pintimashiteaji apaniro, eiro pimatirotisi apaniro. ¹⁹Naamaaca picanti: “Yojocaqueri Tasorentsi jorio, quiso noyeri nainti. Tempa nocameetsatanoti”. ²⁰Queario, itseencaqueri, yojocantavetacari. Piquemisantajeiti avinti, irootaque quiso poajeitancari. Pishemeticari, pimpincatsatanoteri. ²¹Pamene, yojocaqueri iriori jivataintsiri, aisati aviro, yojocajimpicari.

²²Piojeitaque icavintsataque Tasorentsi, iro cantaincha aisati yoasanquetaajeitakeri yora antirori caari cameetsatsi. Ariorica pincanteani pinquemisanteri, ari incanteani incavintsajeitempi. Eirorica piquemisantasanotiri, irojocanjemp aviro. ²³Aisati iriorijei: ariorica inquemisantajeite, iraacameetsajeiteri Tasorentsi, tempa iriotaque Pincatsarisanori. Iriotaque cantacoventerineri jaocarica incantajeiteri atiri. ²⁴Peerani

te piojeiveitarini, iro cantaincha meeca yaacameetsajeitaquempi. Ariorica inquemisante yora iojeivetariri, tempa aisati iraacameetsajeitajeri iriori.

²⁵Noyemisanrarinte, timatsi noninti noncamantempro caari piojeiveta. Iro noncamantempro noninteji pishemete. Pamene, itseencajeveta yora joriopee meeca, iro cantaincha eiro icantatani. Ariorica omoncarataquea inquemisantajeite itsipapee atiri, ari omoncarataquea aisati inquemisantajeitaje aisati jorio. ²⁶Queario iravisacojeitaje coajica, maaroni. Tempa peerani ocantini Sanquenarentsi: “Icanti Tasorentsi: ‘Irijoriotaque yora oavisacojeiterineri, inquemisantacaajeiteri ishaninca, irojocacaajeiteri itseencanti. ²⁷Nomoncarataquero coajica maaroni nocantitacariniri ishanincani peerani: noavisacojeiteri, eiro noquishmentirtsitsi caari cameetsatsi yantajeitakeri’”.

²⁸Meeca iquisajeitakeri, aisati itseencajeitakeri; irootaque meeca yoavisacojeitantaquempiri Tasorentsi avinti. Iro cantaincha inintitarini yora intacantacariniri, aisati meeca inintajeitakeri maaroni. ²⁹Te iramatavitanteji Tasorentsi: eiro yaapitsatajeerotsi paitarica ipajeitakeeri, eiro yojocajiritsi yora icoyeakeri. ³⁰Peerani te pinquemisantani, iro cantaincha itseencasanojeitakeri jorio, irootaque icavintsajeitantaquempiri avinti. ³¹Meeca te inquemisantajeite jorio, iro cantaincha coajica inquemisantajeite aisati, inquempejitempi aviro. Impoiji aisati incavintsajeitajeri Tasorentsi, inquempetacaantajeitajemp aviro icavintsajeitakeempi. ³²Icanti Tasorentsi: “Ainiro irantanejei maaroni atiri, iro cantaincha nocoaque noncavintsajeiteri maaroni, noavisacojeiteri”.

³³Tempa oshequi icameetsataque catsini. Ainiro iotantari, oshequi ioti. Te amateroji ayotero iquenqueshiretiri iriori,

te ayoyeteroji yantayetiri. ³⁴Tempa irootaque ocantiri Sanquenarentsi: “¿Timatsimpa iotirori iquenqueshiretiri Avincatsarite? ¿Timatsimpa oametiriri yantayetantarori paitaricapee? ³⁵¿Timatsimpa paqueriri paitaricapee ipinatantari?” ³⁶Pineaquero, iriotaque vetsiquirori maaroni. Itasoncaqueri maaroni, itimajeitancari. Tempa iriotaque ashijeitariri maaroni timajeitatsiri. Tsame meeca maaroni ampincatsatasanojeiteri, ancantaitiyempani. Aitaque ancantajeiteari.

Icantiri: “Pimpashinitanaje”.

12 ¹Noyemisantaririnte, tempa oshequi icavintsaasanojeitaquee Tasorensi. Irootaque nocoacaasanojantaquempiri eiro pantashitarotsi avirori paitapeerica, irointi pincanteri intianquempi irinti. Aneatsimpiquera, cameetsa pisavique iriveshireimentan-tempiri: irootaque icoacaajeitaqueriri maaroni quemisantajeitiriri. ²Eiro piquempejaritsi tseencantatsiri, irointi pashini pinquenqueshiretapinitaje. Piotasanotero icoacaquempiri Tasorensi: ocameetsatasanotaque. Ariorica pantapinitero oca, moncarataca: irineaca-meetsajeitempi Tasorensi.

Icantiri: “Eiro pishemetitsi”.

³Icantaquena Tasorensi: “Poamejeiteri oromasati”, irootaque nocamantajeitan-timpirori oca. Eiro pishemetitsi, eiro pijititsi panaacojeitaqueri itsipapee pipincatsariti. Pinquenqueshirejitea jaoca picantari, piojeite imatacaasano-timpirica Tasorensi piquemisantiri. ⁴Pamene jaoca acantajeitari: otimi aqui amenantari, ayempita aquemantari, avante aneanatantari, aco ajiricantari, aiti aniitantari, maaroni. ⁵Aisati aquempejeitacari maaroni quemisantajeitiriri Quirishito: acarajeitaque oshequi,

ashanincatavacaajeitaca. Iro cantaincha onashiyetaca antajeitaqueri. ⁶Tempa oshequi ineshinoncajeitaquee maaroni. Imatacaajeitaquee amayetaquero paitapeerica, iro cantaincha onashiyetaca. Eiro aperaventarotsi amayetero. Ariorica irimatacaquempi pinquenquetsatacayeri pishaninca, pinquemisantasano-te cameetsa pinquenquetsatacanteariri pishaninca. ⁷Ariorica irimatacaquempi pintacoteari itsipapee, ari pimatero cameetsa. Ariorica irimatacaquempi poametante, ari poametante cameetsa. ⁸Ariorica irimatacaquempi piveshiraecaayeari itsipapee, ari cameetsa piveshiraecaajeiteari. Aisati ariorica incantempi pimpashiyeteari ashinoncaincari paitapeerica, pimpasanoteri: eiro pimashitsatitsi. Ariorica pamitacoteari itsipapee, eiro piperataritsi. Ariorica pincavintsayeri, ari pinquimoshiretasano-taque.

⁹Pinintasanajeiteri pishaninca, eiro picantashitaritsi: “Nonintaquempi”, irointi pinintasanoteri. Eiro catsini picoirotsi caari cameetsayetatsi, irointi pincoasano-taque pantayetero cameetsatasanotatsiri. ¹⁰Pinintasanotavacaajeitea maaroni: tempa piquempetavacaajeitaca, piquemisantajeiti. Pincoasanojeite piveshiraecaajeiteari itsipapee. ¹¹Eiro piperatatsi, irointi pincoasanojeite pishintsiventeneri Avincatsarite maaroni incoacaajeitempi. ¹²Piojeitaque irimataquempiro Tasorensi maaroni icantaquempiri: meeca piveshireimentearo. Ariorica ompomerentsitimotempi paitapeerica, eiro pishemarotsi. Pincanteani pincanteri Tasorensi: “Pamitacotena”. ¹³Pimpapiniteri piyemisantaririnte coiteimotariri. Pincavintsaapiniteri neajeitimpiri. ¹⁴Pincanteri Tasorensi incavintsaajeiteri quisajeitaquempiri, eiro pipiataritsi. ¹⁵Ariorica inquimoshiretanaque

pishaninca, pinquimoshiretasanotanaque avirori. Ariorica iroashiretea pishaninca, pinquencheshireacoteri.

¹⁶Paacameetsatavacaajeitea, maaroni. Eiro pitseencayetiritsi pishaninca. Eiro pipinquiritsi ashinoncaincari, irointi paacameetsateri. ¹⁷Ariorica irantimotempi pishaninca caari pinintacairi, eiro piquishiritsi. Cameetsa pisavique iriojeitantempiri atiri picameetsataque. ¹⁸Pincoasanojeite paacameetsajeiteri itsipapee, maaroni. ¹⁹Noshaninca, oshequi nonintajeitaquempi. Eiro pipiataritsi antanajeitaquempiri. Iriroquea irinti Tasorentsi oasanquetaajeiterineri. Tempa peerani icantini: “Noasanquetaajeiteri nainti, nompiateari. Tempa naro pivincatsarite. ²⁰Ariorica ayeri quisaquempiri itashe, pimperi iroyea. Ariorica ayeri imire, pimpacoteri irire. Impoiiji ariorica impashiventanaquea, eiroquea iquisantajimpitsi aisati”. ²¹Eiro pishinetaritsi caari cameetsayetatsi irantacayempro paitapeerica, irointiquea pincavintsayeri, ponijayeri cameetsayeta-tsiri.

Ocameetsati ampincatsajeiteri pincatsariventajeiteeri.

13 ¹Pinquemisantajeiteri pincatsariventajeitiriri pishanincapee: tempa irio Tasorentsi nintacaqueriri ipincatsaritantacari. Eirome inintacairime, eirome ipincatsariventantime. ²Yora piatariri ivincatsarite, aisati iquempetaqueri Tasorentsi, ipiatacari iriori. Tempa iriotaque nintacairiri ipincatsariventanti. Coajica iroasanquetaajeiteri maaroni piajeitacari. ³Yora savicatsiri cameetsa te intsaroacayeariji pincatsari, irintiquea yora antapinitirori caari cameetsatatsi. Ari, eiorica picoitsi pintsaroacayeari pincatsari, pintime cameetsa; impoiiji irineacameetsatempiri. ⁴Queario, inintacairi Tasorentsi ipincatsa-

riventanti ontimanteari pisavicaajeitan-teari cameetsa. Iro cantaincha terica oncameetsateji pantayetiri, ari pintsarocaaqueari. Te irantsipetashiteaji ipincatsariventanti. Inintacairi Tasorentsi iroasanquetaajeiteri maaroni antirori caari cameetsatatsi. ⁵Te ancoyeji iroasanquetaajeitee Tasorentsi, aisati te ancoyeji anquencheshiretea, irootaque ocameetsatantari ampincatsateri avincatsarite. ⁶Irootaque aisati pipaarentantiriri pincatsaripee piirequite. Pipinataqueri irimatantearori inintacairiri Tasorentsi: ipincatsariventajeitaquempi. ⁷Pimpajeiteri maaroni coiteimotacariri: pimperi quirequi, paitapeerica. Pinquemisantajeiteri aisati pimpincatsajeiteri.

Cameetsa anintavacaasanojeitea, maaroni.

⁸Eiro pirevityetiritsi pishaninca paitapeerica, irointi pinintavacaajeitea. Ariorica anintavacaajeitea, ari amoncaratero isanquenayetiniri Moishishini, maaroni. ⁹Icantini: “Eiro paimentarotsi pijjina, eiro paimentaritsi pijjime, eiro poantitsi, eiro picoshititsi, eiro pinevetarotsi yashiyetari pishaninca”. Oshequi aisati icantiniri. Impoiiji aisati icantini: “Oquempetaca picavintsaaaja avisati, pincavintsaaajeiteri itsipapee, pinintajeiteri”. Ariorica amajeitaquero oca, tempa amoncarataquero maaroni icantiniri. ¹⁰Ariorica aninteri ashanincapee, tecatsi ancantea ancantimajeiteri, amoncarantearori maaroni icantiniri Moishishi.

Eiro osamanititsi impocashijeitajee Avincatsarite.

¹¹Eiro osamanititsi impocashijeitajee Avincatsarite iraaajeitanajee antsipajeitan-teariri. Peerani aquemisantantacari, ajitashijeivetaca ari osamanitanaque. Meece aamaajeitacari, irootaque ocameetsatantari antime cameetsa. ¹²Ariorica antapinitiro caari cameetsatatsi,

oquempetaca ariorica atimaque tsiteniriqui, amanantarori antayetiri. Ariorica atimi cameetsa, oquempetaca atimaque quitaiteriqui, te ampashiventacayearoji antayetiri. Ari meeca oshiavetacaro irootajantsi quitaiteri, tempa irotaintsirica impocaje Avincatsarite iriori. Eiro antapinitirotsi meeca caari cameetsayeta-tsi, irointi tsame antimajeite cameetsa. ¹³Tsame meeca cameetsa antimajeite. Eiro antayetajirotsi caari cameetsayetatsi, eiro ashinjujeitajatsi, eiro antirotsi caari ai, eiro antiritsi caari ai, eiro aquisava-caajatsi, eiro anevetasanotarotsi vaararotsi, ¹⁴eiro antayetirotsi caari cameetsatatsi acoayetiri aisati aquenqueshireyetiri. Irointiquea tsame ancanteri Avincatsarite Jesoquirishito intasonca-ventajeitanteeri cameetsa asavicajeitan-teari.

**Ocameetsati iraacameetsatavacaajeitea
maaroni quemisantatsiri aisati caari
quemisantajeitatsi.**

14 ¹Incoaquericca itsipapee quemisantatsiri incarajeitempi pinquemisantajeite, ari paacameetsajeitavaqueri. Tequerarica iriotasanoyetero maaroni icoacaajeitaqueeri Avincatsarite, iro cantaincha eiro picantavacaimentaro-tsi ioyevetari iriori. ²Oquempetaca timatsi cantatsiri ocameetsati avajeiteari paitapeerica: ivatsa, maaroni. Iro cantaincha itimi caari iotasannotatsi: jivetachari te oncameetsateji ayeari ivatsa. ³Ariorica pametari poapinitari ivatsa, eiro picantimatiritsi yora caari oari. Aisati, terica poapiniteari ivatsa, eiro picantitsi: “Te incameetsateji yora oariri ivatsa”. Tempa iriojeitaque itomipee Tasorentsi, yaacameetsajeitavacqueri iriori. ⁴Tempa iriotaque Tasorentsi ivincatsarite. ¿Ocameetsatimpa pincante avirori: “Te incameetsateji yora, te inquemisanteriji ivincatsarite”? Tempa Tasorentsi cantatsi-

neri irinti ocameetsaririca yantayeta-queri, aisati yamitacotaqueri imayeta-queri cameetsayetatsiri. ⁵Aisati itimi pashini cantatsiri: “Te omoncaratavacaajeiteaji quitaiteripee, anashitacaajeitearo aparopee quitaiteri anquemisantasano-tanteariri Tasorentsi”. Irio itsipa icanti: “Ocameetsateji maaroni quitaiteripee anquemisantanteariri, te onashiyeteaji”. Ari ocameetsati piojeite paitarica picoiri avirori, iro cantaincha eiro picantavacaimentaro-tsi quitaiteripee. ⁶Yora cantatsiri: “Nonashitacajaro aparopee quitaiteri noquemisantantajari”, tempa icoaque impincatsateri Avincatsarite. ¿Paita antsaneacotanteariri? Yora pashini, yoari ivatsa, ipasonquitiri Avincatsarite, aisati ipincatsatiri. ¿Paita antsaneacotanteariri? Aisati yora caari oari ivatsa, ipasonquitiri Avincatsarite aisati ipincatsatiri iriori. Tempa aisati ocameetsati.

⁷Te antimashijeiteaji, eiro apincatsata-jatsi arosati. Eiro acantitsi paitarica antayeteri meeca, aisati jaocarica oncarate ancame. ⁸Meeca aneajeitatsee arori, cameetsa ampincatsajeiteri Avincatsarite, anteneri iriori maaroni icoacaajeitaqueeri. Iriotaque nintacayee-neri jaocarica oncarate ancame, iro cantaincha ancanteani ampincatsajeiteri. Icantani ipincatsariventajeitiri aneatsiri aisati camaintsiri, maaroni. ⁹Icoaque Quirishito impincatsariventajeiteri aneajeitatsiri aisati camajeitatsiri, irotaque icamantacari aisati itinaanta-jari. ¹⁰¿Paita picantacotantacariri piyemisantaririnte: “Te incameetsateji”? ¿Paita pitseencantayetacariri? Eiro pipeacotarotsi oca: coajica aneajeiteri Tasorentsi, impoiiji incante irinti ocameetsaririca antajeitavacqueri arori. ¹¹Jeroca ocantiniri Sanquenarentsi: “Icanti Avincatsarite: ‘Nocantani naneasanoti nainti, queariotaque oca noncamantem-piri. Coajica intiyyeroashijeitena atiri

impincatsajeitena. Incantajeitena: Picameetsataque'". ¹²Queario, coajica aneajeiteri, aisati ancamantajeiteri maaroni antayetaqueri aca quipatsiqui, impoiji incantacojeitee ocameetsatirica antayetaqueri.

¹³Ari meeca te oncameetsateji ancantacotashiteari ayemisantaririnte: "Te oncameetsateji yantayetiri iriori". Queariompia, pantacairicari caari cameetsatatsi. ¹⁴Yoametaquena Avincatsarite Jesoshi, irootaque niotantacari ocameetsataque maaroni yoyeeyetari. Ocameetsati ayeari ivatsa. Iro cantaincha yora jitashitachari te oncameetsateji ayeari, ari eiro yoaritsi irinti; te oncameetsateji iroyeari. ¹⁵Aisati avirori, ariorica poimoteari piyemisantaririnte ipinquiri iriori, aitaque poashireta-caaqueari: te oncameetsateji. Ariorica pinquenqueshiretacayeri, te pinintasanoteriji. Tempa icamimentaqueri Quirishito iriori, meeca eiro pitseencacairitsi.

¹⁶Pijijeiveta ocameetsayetaque pantayetaqueri, iro cantaincha queariompia, icantimatimpicari itsipapee. ¹⁷Ariorica apincatsataqueri Tasorentsi, eiro aquenqueshireyetrotsi avayetari aisati irayetiri; irointi anquemisantero Ishire Tasorentsi ancameetsatanteari, asavican-teari cameetsa, anquimoshirejeitanteari. ¹⁸Ariorica cameetsa aquemisantaquero, ari cameetsa antaveeteneri Quirishito. Impoiji irineacameetsajeitee Tasorentsi aisati ashanincapee. ¹⁹Tsame meeca aacameetsajeiteri ayemisantaririnte, maaroni; aisati inquempetee iriori, iraacameetsajeitee. Aisati avametavacajeitea cameetsa anquemisantanojeitanteari.

²⁰Pioterica ari pojocacayeri pishaninca iquemisanti, eiro poimotashitaritsi ivatsa. Queario ocameetsati ayeari paitapeerica, iro cantaincha te oncameetsateji ajocacayeri ashaninca iquemisanti. ²¹Te

oncameetsateji pantero paitapeerica pojocacantariri pishaninca iquemisanti: eiro poashitaritsi ivatsa, eiro pirashitarotsi cachojari, paitapeerica, maaroni.

²²Ariorica piotaque ishinetaquempi Tasorentsi paitapeerica, eiro picantapini-jeitiritsi yora caari ametaro, eiro picantavacaimentarotsi. Ariorica piotasantaque ocameetsataque pantayetaqueri, tempa pinquimoshiretasanotanaque. ²³Iro cantaincha pijiterica te oncameetsateji paitapeerica yantayetiri piyemisantaririnte, eiro pantashitarotsi, otimicari pantane. Terica piote inintacaaquempiro Tasorentsi pantero, te oncameetsateji pantashitearo.

15 ¹Pineaquero, ariorica aquemisantatanotaque aisati ayojeitaque ocameetsayetaque oca noquenquetsataco-taqueri, iro cantaincha ocameetsati anquenqueshireta-cojeiteri yora caari quemisantanoatsi, caari iotasanotatsi. Eiro antashitarotsi acoayevetari arori,

²irointi anquenqueshireacojeiteri ayemisantaririnte, inquimoshirejeitan-teari iriori. Aisati amitacojeiteri iriotasano-tanteari, inquemisantano-tanteari.

³Tempa aisati iriori Quirishito, te irantashitearopi icoavetari iriori. Tempa isanquenatacotirini peerani: "Yora Quirishito icantiri iriri: 'Iquisajeitaquena maaroni quisajeitaquempiri avirori'".

⁴Itimacaaqueero Tasorentsi maaroni isanquenareni peeraniniri ayojeitantea-rori cameetsayetsiri antayeteri, amavetantearori anquematsicayetea-ro paitapeerica, aveshireimentanteariri Tasorentsi, aisati ayotasanotanteari coajica antime cameetsa anta inampiqui.

⁵Tempa yamitacotapinijeitaquee amavetantarori aquematsicayetacari paitapeerica, aisati yoveshireacajeita-quee. Nocoaque meeca iramitacojeitempi paacameetsatavacajeitea. Irootaque icoacajeitaquempiri aisati Jesoquiri-

shito. ⁶Impoiji amoncaratavacaajeitea ancantajeite: “Tempa icameetsataque Apa Tasorentsi aisati Avincatsarite Jesoquirishito”. ⁷Tempa yaacameetsajeitaquee Quirishito. Meeca pinquempejeiteari, paacameetsatavacaajeitea maaroni, impoiji irineacameetsajeiteri atiri Tasorentsi.

⁸Peerani ipocantacari Quirishito aca quipatsiqui, intacojeitacari ijorioririnteppee iojeitancari te iramatavijeiteriji Tasorentsi. Aisati iotacaajeitaqueri irimoncarajeitero maaroni icantaqueriniri ishanincani. ⁹Aisati icoaque iriojeite itsipapee atiri ineshinoncaajeitaqueri, incantanteari iriori: “Tempa icameetsataque Tasorentsi”. Irootaque ocantiniri Sanquenarentsi: “Noncamantajeiteri itsipapee atiri: ‘Icameetsataque Tasorentsi, tsame ampampoyeaventajeiteri’”. ¹⁰Otimi pashini Sanquenarentsi cantatsiri: “Caarimpi pinajeiveta jorio, iro cantaincha pincarajeiteri iriori piveshireimentajeiteari Tasorentsi”. ¹¹Pashini aisati osanquenataca, ocanti: “Maaroni caari joriotatsi incantajeite: ‘Tempa icameetsati Tasorentsi’. Irineacameetsajeiteri maaroni”. ¹²Aisati yora Isayashini icantini: “Intime ishanincani Jese, impoque impincatsariventajeiteri itsipapee atiri, iriojeitanaque iroavisacojeiteri”. ¹³Tempa ayojeitaque irimoncarateenero Tasorentsi maaroni icantaqueeri. Piquemisantajeitaqueri, irootaque nocoantacari iroimoshirencajeitempi, cameetsa irisavicacaajeitempi. Impoiji ontasoncaventajeitempi Ishire Tasorentsi piotasanotanteari eiro yamatavitimpitsi Tasorentsi, intsoteaquempiro maaroni icantaquempiri.

Icantiri Pavoro: “Oshequi nocoaque nonquenquetsate”.

¹⁴Meeca, noyemisantaririnte, notaque picameetsajeitaque, aisati piotasonojeita-

quero irineane Tasorentsi pimajeitantarori poametavacaajeitaca. ¹⁵Meeca oshequi nosanquenajeitaquempiro, noquenqueshiretacaquempiro maaroni oca eiro pipeacotantarotsi. Queario, ineshinoncataquena Tasorentsi, ¹⁶irootaque itiancantaquenari nonquenquetsacaajeiteri yora caari joriotatsi. Nocamantajeitaqueri atiri jaoca icanta Jesoquirishito yoavisacojeitantaqueeri. Impoiji oameetsatasanojeitaqueri Ishire Tasorentsi maaroni, aisati yaacameetsajeitaqueri Tasorentsi. ¹⁷Irootaque noveshireimentantaquempiri: icoyeaquena Jesoquirishito nocamantajeitaquempi jaoca icanta Tasorentsi. ¹⁸Eiro noquenquetsatacotashiyetatsi paitapeerica, iotaquea nonquenquetsatacotero imatacaaquenari. Ineajeitaquena itsipapee atiri, aisati iquemajeitaquena, irootaque iquemisantantayetariri Tasorentsi. ¹⁹Otasoncacaquena Ishire Tasorentsi, nomayetantarori paitapeerica caari inepiniti atiripee.

Ari noquenquetsatacaajeitaqueri atiripee anta Jerosarequi, osamani anta Iririaqui, maaroni nampitsipeequi. Nocamantajeitaqueri jaoca icanta Quirishito yoavisacotanti. ²⁰Nocoasanotaque nonquenquetsatacaajeiteri yora caari iojeitiri Quirishito. Te noncoyeji nimpoitapeeri narori jivatatsiri iquenquetsatacaari. ²¹Tempa ocanti Sanquenarentsi: “Inquemero yora caari quemaveitaroni; iriotajeri yora caari loveitarini”. ²²Ari oshequi noquenquetsatacaajeitaqueri caari iotatsi, irootaque caari nareetanta aviroriqui. ²³Iro cantaincha notsoteajeitaquero nampitsipee aca, noquenquetsatacaajeitaqueri savicayatsiri, aisati oshequi osarintsi nocoaveta noneempime, ²⁴irootaque nojatanteari coajica pinampiqui. Jaocarica oncarate nosaviquimojeitempi, impoiji nocoaque navisanaque anta Eshipaneaquei. Nocoaque aisati ponijayenaro jaocarica nonquenanteari.

²⁵Iro cantaincha nintapaintearota nojatapainte Jerosarequi, naajeitajeneri ayemisantaririnte ²⁶iirequite ipacantiriri yora maseroniasati aisati yora acayasati. Yapatojeitiniriri ashinoncaincari quirequi. ²⁷Aitaque icoaque irineshinoncajeiteri joriopee anta Jerosarequi. Te irishanincaveteariji, iro cantaincha tempa iriojeitaque intacariri icamantajeitaqueri jaoca incanteari iravisacotantajeari. Icantajeiti: “Tempa irio quemisantacaajeiteeri joriopee, irootaque ocameetsatantari meeca ancavintsajeiteri iriori. Ampajeiteri quirequi iramanantantearori coiteimotacariri”. ²⁸Ariorica nompapaaqueri quirequi yapatojeitiniriri, ari nojate pinampiqui. Impoiji novaanaajea, irosati Eshipaneaqui. ²⁹Niotaque ariorica nareetapaaquempi nonquenquetsatacaapaaquempi piveshireimentasanotanteariri Quirishito.

³⁰Meeca, noyemisantaririnte, tempa aquempetavacaajeitaca aquemisantaqueri Avincatsarite Jesoquirishito, aisati oamejeitaquee Ishire Tasorentsi anintavacaajeitaca. Nocoaque meeca pincantajeiteri Tasorentsi intasoncacoventantenari, ³¹eiro yaantanatsi yora tseencantatsiri anta Joreaquei. Aisati pincanteri iroamejeiteri yora jerosaresati inquimoshireimentanteariri quirequi ipacantiriri iyemisantaririnte. ³²Impoiji ariorica irinintacayena Tasorentsi, nareejeitapaaquempi, oshequi nonquimoshiretapaaque. Impoiji oshequi aveshireacotavacaajeitea maaroni. ³³Tempa isavicacaajeitaquee cameetsa Tasorentsi, maaroni. Nocoaque quiso iroajeitanaquempi. Aitaque incanteari.

Ivetsajeitari oromasati.

16 ¹Meeca noncamantempi: coajica ojatashitempi oneempi ayemisan taroronte Jeve. Oponeaca Senquereshi-qui, anta oshequi intacojeitacari maaroni

quemisantatsiri. ²Paacameetsajeitavaquero, tempa irootaque quemisantiriri Avincatsarite. Pintacojeitearo, pimpayetero maaroni coiteimotearoneri. Tempa intacojeitacari oshequi ayemisantaririnte; aisati narori, intacotapinitaquina. ³Novetsajeitaro Pirishira aisati Aquira. Oshequi yamitacojeitaquina iriori nantaveejeitiniriri Jesoquirishito. ⁴Peerani irotaintsi iroyeetename, iro cantaincha oavisacotaquina Pirishira aisati iriori Aquira. Oavisacotantaquenari, irotaintsi iroyeeterome iroori, aisati ojime. Oshequi nopasonquijeitaquero: narori aisati maaroni ayemisantaririnte, yora caari joriojeitatsi. ⁵Novetsajeitari maaroni quemisantapinitatsiri ara ovancoqui. Novetsatari aisati Epeneto, nonintasanotaqueri iriori. Peerani noquenquetsatacantariri yora acayasati, iriotaque jivataintsiri iquemisantaqueri Quirishito.

⁶Novetsataro Maria, tempa oshequi intacojeitaquempi iroori. ⁷Novetsajeitari noshaninca Antoronico aisati Joniashi. Peerani notsipajeitacari yoiminqeetaquina caravosoqui. Oshequi inecameetsajeitaqueri yora itiancaneppee Quirishito. Ijivajeitaquina narori, iquemisantitacani irinti peerani. ⁸Novetsatari Ampiriashi, iquemisantaqueri Avincatsarite, oshequi nonintaqueri iriori. ⁹Novetsatari Orovano, oshequi icarajeitaquina noquenquetsatacotaqueri Jesoquirishito. Aisati iriori Eshitaquishi, novetsatari; oshequi nonintaqueri. ¹⁰Aisati novetsatari Apereshi; yora Quirishito, oshequi inecameetsataqueri. Novetsatari Arishitovoro, aisati ishaninca, maaroni. ¹¹Novetsatari noshaninca Erorio. Novetsajeitari ishaninca Narishiso, yora quemisantiriri Avincatsarite.

¹²Novetsajeitari Tirijena, jeri Tirijosa, tempa irisati antaveetiniriri Avincatsarite. Aisati oquempetaca Pereshira, novetsataro. Oshequi nonintaquero. ¹³Novetsa-

tari Irojo, yora quemisantasantotiriri Avincatsarite. Aisati novetsataro iriniro, oshequi intacotaquena noquempetacaantaquero iro ina. ¹⁴Novetsajeitari Ashinquirito, Jereconte, Eremashi, Patorovashi, Eremeshi, jeri maaroni ayemisantaririnte tsipajeitariri. ¹⁵Aisati novetsajeitari Jiroroco, Joria, Nereo, aisati iritsiro, ora Orimpashi, aisati maaroni quemisantajeitatsiri tsipajeitariri, maaroni. ¹⁶Ariorica pineavacaajeitea, paacameetsatavacaajeitea, pinintavacaajeitea. Ivetsajeitimpi maaroni quemisantajeitiriri Quirishito savicajeitatsiri otsipapeequi nampitsi.

¹⁷Meeca noncantempi, noyemisantaririnte: piojeiteri yora oamejeitiriri ayemisantaririnte icantavacaajeitea, aisati piojeiteri antacairiri caari cameetsatsi, jeri aisati cantimpiri: “Te oncameetsateji pinquemisantero oca yoamejeitaquem-piri”. Eiro pitsipajeitaritsi, eiro poijajeitiritsi. ¹⁸Te iranteneriji irinti icoacaajeive-tariri Avincatsarite Quirishito, irointi yantashijeitaro icoayetiri iriori. Cameetsa ineanaveta, iro cantaincha icoaque iramatavijeiteri caari timatsine iotantari.

¹⁹Tojeiti atiri piquemisantasantaque, irootaque noveshireimentantaquempiri. Iro cantaincha nocoaque piasanojeite pantero maaroni cameetsayetsatsiri; irointi caari cameetsatsi, eiro pantimatirotsi catsini. ²⁰Tempa Tasorentsi savicacaajeitimpiri cameetsa. Eiro osamanititsi iranaacotasantaqueri Satanashi eiro yantacantajimpirotsi aisati caari cameetsatsi. Nocoaque meeca irineshinoncaajeitimpi Avincatsarite Jesoquirishito. ²¹Ivetsajeitimpi Timoteo;

itsipataquena nantaveejeitiriri Jesoshi. Aisati ivetsajeitimpi noshaninca Iroshio, Jaso, jeri Soshipatere. ²²Narotaque nainti Tereshio sanquenatiniriri Pavoro oca. Aisati narori, noquemisantiriri Avincatsarite. Novetsajeitimpi narori. ²³Aisati ivetsajeitaquempi iriori Cayo. Nosaviqumotiri aca ivancoqui. Aisati ipocapiniti quemisantayetatsiri aca ivancoqui, oshequi yaacameetsajeitaquena, ineshinoncajeitaquena. ²⁴Ivetsajeitimpi Erashito, yora quempyeajeitiriri iirequite savicajeitatsiri aca. Aisati ivetsajeitimpi ayemisantaririnte pajitachari Coarato.

Ivcarataquero isanquenare.

²⁵Tsame meeca ampincatsajeiteri Tasorentsi. Iriotaque matacaaqueeri aquemisantasantaacariri, ariorica ashiretasanojeitacaro oca noquenquetsatacotaqueriri Jesoquirishito. Peerani catsini te iriojeiteni yora intacarori impoque Quirishito iroavisacojeitee. Te incamanterini Tasorentsi, ²⁶iro cantaincha meeca iotacaajeitaquee. Isanquenatacaqueri yora camantantatsiniri peerani, aisati itiancajeitaquena narori nocamantajeitaqueri maaroni atiripee: “Ocameetsati pinquemisantajeiteri Tasorentsi”. Tempa ocameetsati anquemisanteri iriori, te incamaneteji irinti, icantatiani yanei. ²⁷Oshequi ioti catsini irinti, apaniro ini. Tsame, maaroni quemisantajeitiriri Jesoquirishito, ancantajeite: “Tempa icameetsatasantaque Tasorentsi”. Aitaque ancantajeiteari, maaroni.

Narotaque sanquenajeitimpirori: Pavoro

IJIVATAQUE PAVORO ISANQUENAJEITAQUENERI CORINTOSATI

Yovetsajeitari Pavoro corintosati.

1 ^{1,2}¿Ainirompi, corintosati?
¿Tecatsimpa oajeitempine? Narota-
que Pavoro sanquenajeitimpirori oca.
Tempa icoyeaquena Tasorentsi, irootaque
itancantaquenari Jesoquirishito, icoacaa-
quena nonquenquetsatacoteri. Nocarata-
queri aca Soshiteneshi nosanquenajeitim-
piro maaroni quemisantajeitatsiri ara.
Piquemisantaqueri Jesoquirishito,
irootaque yoameetsajeitantaquempiri;
meeca pishanincatacari Tasorentsi.
Piquempejeitacari maaroni aventajeitaca-
riri Avincatsarite Jesoquirishito,
irootaque yoavisacotantacari. Tempa
meeca ashanincajeitacari maaroni
quemisantajeitiriri, jaocarica isavicajei-
tiri. ³Nocoaque irineshinoncajeitempi
Apa Tasorentsi, aisati nocoaque cameetsa
irisavicacaajeitempi. Aisati inquempejei-
tempi iriori Avincatsarite Jesoquirishito.

Iveshirementajeitari Pavoro corintosati.

⁴Piquemisantaqueri Jesoquirishito,
irootaque ineshinoncajeitantaquempiri
Tasorentsi, irootaque meeca nocantanta-
riri: “Ariove pimatacaajeitaqueri corinto-
sati”. ⁵Oshequi itasoncacoventajeita-
quempi, cameetsa isavicacaajeitaquempi,
iotacaasanojeitaquempiro paitapeerica
icoacaajeitaquempiri. ⁶Tempa moncara-
taca nocantajeitaquempiri peerani:
imajeitaquempiro Jesoquirishito maaroni.

⁷Tempa iriotaque Avincatsarite:
paamayeari, irosati impocantajeiri.
Tempa itasoncacoventaquempi pimatan-
tatarori pantiniri paitarica icoacaajeita-
quempiri, tecatsi coiteimotempine aisati.
⁸Incantaitiyempani intasoncacoventasa-
nojeitempi; impoiji, ariorica impocaje,
irineacameetsajeitapaajempi. Eiro
iquishmentapaimpirotsi pantayevetari.
⁹Eiro yamatavijeitimpitsi Tasorentsi,
tempa icoyeajeitaquempi pishanincatan-
teariri Itomi: tempa iriotaque Avincatsa-
rite Jesoquirishito.

Icantiri: “Pinintavacaajeitea”.

¹⁰Noyemisantaririnte, tempa apincatsa-
jeitiri Jesoquirishito. Irootaque meeca
nocantajeitantimpiri cameetsa pinintava-
caajeitea, eiroquea piquisavacaajeitatsi.
Pinquempetavacaajeitea, eiro picantava-
caimentajeitarotsi paitapeerica. ¹¹Iroota-
que nocantantimpiri oca icamantapaa-
quena atirite Coroe oshequi picantava-
caajeitaca. ¹²Ainiro cantayetaintsiri:
“Noquemisantiri narori Pavoro”. Pashini
cantajeitaintsi: “Irio noquemisantiri
Aporo”. Pashini cantajeitaintsi: “Irio
noquemisantiri Sejashi”. Pashini cantajei-
taintsi aisati: “Noquemisantaqueri nainti
Quirishito”. Irootaque nocantantimpiri:
“Eiro picantavacaajeitatsi”. ¹³¿Itsiparea-
campa Quirishito? Te, apaniro ini.
¿Nopajacotimentaquempimpa narori?
¿Pivaotisatimentaquenampa narori? Teve.

¹⁴Meeca nopasonquitiri Tasorensi te novaotisajeitempiji. Irinti apaniro novaotisataqueri Quirishipo, aisati Cayo.

¹⁵Meeca tecatsi incantashiyeetea: “Novaotisatimentacari Pavoro”. ¹⁶Aisati novaotisataqueri Eshitejana, aisati ishaninca. Te nonquenqeshiretereriji pashini novaotisataqueririca.

Iovetari atiri aisati ioyetiri Tasorensi.

¹⁷Te iro intiancantena Quirishito novaotisatante, irointiquea itiancantana nocamantacotiro cameetsatsiri. Nocamantantirica, te noshemetsatacayerome, eiro ocameetsatime. Pijijeiticari icoacaaquempi Tasorensi piojeite oshequi pavisacotantajeari. Tempa iriotaque Quirishito camimentajeitaqueeri, irootaque yoavisacojeitantajeeri: irootaque irointi nocoaque niotacaajei-tempi. ¹⁸Ariorica acamantavetari yora jatatsineri Sharincaveniqui: “Icamimenta-quempi Quirishito coroshiqui, icoaveta iroavisacojeitajempime”, tempa ishirontimentajeitaquee. Iro cantaincha ainti, avavisacojeitaca, ayojeiti ainti ainiro itasorenca Tasorensi imatantarori yoavisacojeitaquee. ¹⁹Aitaque isanquena-yeetini: “Icanti Tasorensi: ‘Nompeitajeri iotantavetari yora ioyevetachari. Nompeapitsatajeri quenqeshireavetachari ora iquenqeshireantavetari’”.

Itsarajeitaqueri yora corintosati.

²⁰¿Jaoca incanteari meeca iotincari? ¿Jaoca incanteari meeca oametantirori Sanquenarentsi? ¿Jaoca incanteari aisati yora oametavacainchari? Tempa itseencaquero Tasorensi maaroni iojeivetari atiripee. ²¹Yatsipetashita atiri iojeivetaro paitapeerica: te iriojeiteriji Tasorensi. Ioti irinti, irootaque icoantacari iroavisacojeiteri maaroni quemisanti-rori nocamantajeitaqueriri. Iro cantain-

cha ishirontimentashitaquena tseencantsiri. ²²Icoaque jorio antasonqueneri paitapeerica iriotanteari itsipataquee Tasorensi. Yora caari joriotatsi yoameta-shitavacaapinitaro paitapeerica. ²³Iro cantaincha nocamantiri atiri: “Icamimenta-quee Quirishito coroshiqui yoavisacojeitaquee”, irootaque iquisantaquenari jorio. Irinti caari joriotatsi, ishirontimentajeitaquena. ²⁴Iro cantaincha itimi icoyeajeitaqueri Tasorensi iroavisacoteri: jorio, aisati caari joriotatsi. Iotacaajeitaqueri iriori ainiro itasorenca Quirishito, iroavisacotanteariri. ²⁵¿Paita itseencajeitantariri Tasorensi? Tempa irio anaacotasanotantatsiri ioti. Tempa irisati anaacotasanotantatsiri ishintsiti. Te aneeriji atiri quempetearine.

²⁶Pinquenqeshireempa, noyemisantaririnte, jaoca picantajeitari. Oshequi itseencajeitaquempi pishaninca, icantajeiti: “Te irioteji quemisantatsiri”. Queario, te pimpincatsarijeiteji, aisati te pashitaaranteaji, irootaque itseencajeitanti-piri. ²⁷Ishirontimentajeivetaquempi atiri, te impincatsajeivetempiji, iro cantaincha icoyeaquempi Tasorensi iroavisacojeitempi. Iriotacaasanojeitempi, impeajeitempi pincatsaritatsineri. Impoiiquea impashiventajeitanaquea shirontimentajeivetimpiniri, tseencajeivetimpiniri. ²⁸Icoyeasanotaqueri Tasorensi yora caari pincatsatachane, yora ipiincayevetari atiri, yora itseencanaye- vetari: irio itomintasanojeitari. Irintiquea yora pincatsarivetachari aisati iojeiveta- chari iroashinoncaajeiteri. ²⁹Tecatsi meeca incantea atiri irishemetimoteari Tasorensi. ³⁰Piquemisantaqueri Jesoquirishito, irootaque yoaneajeitantaquempi Tasorensi, irisavicacaajeitempi inampiqui. Tempa iriotaque Jesoshi iotacaajeitaqueeri, oameetsajeitaqueeri, shanincajeitaqueeri, oavisacojeitaqueeri. ³¹Tempa aitaque isanquena-yeetironi:

“Eiro ashemetitsi, irointi aneacameetsasatanoteri Avincatsarite irinti”.

Jaoca icantari Pavoro icamantantapiniti.

2¹Nareetantapaaquempiri, noyemisan-taririnte, nocamantacotapaaqueri Tasorentsi. Te noshemetsatapeeroji noneane, te noametashiyetapeemproji nioyeteri; apatiro noametapaimproji icantiri Tasorentsi. ²Iotaca noquenquetsatocotapaaqueri Jesoquirishito, icamimentajetaquee coroshiqui. Tecatsi pashini nonquenquetsatocote. ³Nopashiventashireavetapaaca, notsaroshireavetapaaca, nopioncapaaca. ⁴Pamene, noquenquetsatacapaaquempi aisati nocamantapaaquempiro irineane Tasorentsi, iro cantaincha te noametashitapeemproji nioyeteri. Iotacaasanoaquempi Ishire Tasorentsi queariotaque irineane, aisati itasoncacoventajetaquempi piotantarori queario noametaquempiri. ⁵Ora iojeitiri atiri, tecatsi oncantea oavisacojeitempi, irointi itasoncacoventaquempi Tasorentsi pavisacojeitancari.

⁶Ariorica noametapinitiri quemisantasanoatsiri, queario notsoteaqueneri irinti noametasanojeitiri, niotaque iquemavaquero nocantaqueriri. Iro cantaincha te noametashiteariji ioyeteri atiripee aisati ivincatsaritepee. Eiro oavisacojeitiritsi ora yoametavacaashiyetari. ⁷Irointiquea noquenquetsatocoti ioyeteri Tasorentsi. Peerani imanavetacaro, te ayojeiveitearoni. Peerani, tequerani irovetsiqueroni paitapeerica, icantitani: “Nosavicacaajeteri cameetsa aca nonampiqui maaroni yora pincatsajetenaneri, coajica”. ⁸Te iriojeiteroji peerani yora pincatsaripee. Iriojeitaquerome, eirome ipajacotirime Avincatsarite, yora cameetsasatanotsiri. ⁹Irootaque isanquenatacotitaqueeniri: “Timatsi yovetsicaqueri Tasorentsi. Te irineapiniteroji atiri, te inquemacotapiniteroji, te inquenqeshiretapiniteroji. Iro

cantaincha yovetsiquiniri maaroni nintasanotiriri”.

¹⁰Irootaque iotacaaajetaqueeri Tasorentsi ainti, iro vaajeerori Ishire. Iotasanojeitacuero maaroni Ishire, otsoteaquero maaroni iquenqeshiretaqueri Tasorentsi. ¹¹¿Janica iotirori iquenqeshiretiri ashaninca? Tempa apaniro iotiro irinti. Aisati oquempetaca, tecatsi ioterone iquenqeshiretiri Tasorentsi: apaniro ioti Ishire irointi. ¹²Pamene, te anquemisantshitearoji ioyeteri atiripee, irointi aquemisantaquero Ishire Tasorentsi. Irootaque ayotantacarori icoaque Tasorentsi irineshinoncajeitee, irisavicacaaajitee cameetsa. ¹³¿Piquemaquerompa nocantaquempiri? Te irioteroji atiripee, aisati te iroamejeiteeroji, irointi oamejeiteerori Ishire Tasorentsi. Oamejeitaqueri yora otimantashiretari, iquemajeitancari irinti. ¹⁴Yora caari otimantashireta Ishire Tasorentsi, te inquemavaqueroji ocantayeteri, irointi ishirontimentacaro. Tecatsi incantea inquemero. Iro caari iquemantaro, te ontimantashiretareiji. Apaniro iquemajeitiro otimantashiretasanotari, irinti. ¹⁵Iquemajeitaquero iriori maaroni, iro cantaincha yora tseencantsiri, tecatsi inquemasanote irinti. ¹⁶Pamene, ¿timatsimpa iotirori iquenqeshiretiri Avincatsarite? ¿Timatsimpa materone iroameteri Tasorentsi? Te intimeji catsini. Iro cantaincha niotiro nainti iquenqeshiretiri Quirishito, tempa yoametaquena.

Iquisavacaajetaca corintosati.

3¹Noyemisanraririnte, te noncantem-piji quemisantirori Ishire Tasorentsi, ainti nocantaquempi caari quemisantiro. Piquempetaca iroaquera piquemisantaqueri Quirishito, piquempejitaca jananequi. ²Irootaque noamejeitanti-pirori peerani caari pomerentsitatsi: oquempetaca niracaaquempiro tsomitsi;

te nompempiji ivatsa, tequera pimateroni. Irosati picanta meeca, te pimateroji. ³Tequera pinquemisanteroji Ishire Tasorentsi. Ariorica pininatavacaajeitaca, aisati piquisavacaajeitaca, tequera pinquemisanteroji. Piquempetacari caari quemisantayetatsi. ⁴Jero icanti aparo: “Noquemisantiri Pavoro”. Icanti pashini: “Noquemisantiri Aporo”. Tempa piquempejetari caari quemisantatsi. ⁵Pamene, ¿jaoca icantari Aporo? Aisati ¿jaoca nocantari narori picantavacaimentantari? Narojeitaque iveranaro Tasorentsi, quemisantacaaquempi. Nantiniri Avincatsarite icoacaquenari. ⁶Oquempetaca nopanquitaquero narori oitsoqui. Irio saitacotirori Aporo. Irintiquea Tasorentsi shiocacaquerori. ⁷Notsataaca nopanquitashitaro: tempa noquenquetsatacaajeitacquempi. Impoiji Aporo isaitacotashitaro: yoamejeitacquempi. Apaniro irinti Tasorentsi ishioacairo: irio quemisantacaasanojeitacquempiri. ⁸Aisati imoncaratavacaaca yora panquitirori aisati yora saitacotirori. Imoncaratiniri yora ashitarori panquirentsi ipinajeitiri. ⁹Aisati oquempetaca, nomoncaratacari Aporo nantiniri Tasorentsi icoacaajeitacquenari. Avirojei pishiajeitacquero iroane Tasorentsi. Aisati pishiacantacquero ivanco yovetsicacueri. ¹⁰Noshiacantacqueri iotasannotatsiri yovetsiqui pancotsi. Ineshinoncataquena Tasorentsi, irootaque ishinetantacquenari noatiaquero otincami. Airo pashini, ovaavaquerori. Ariorica yovaavaquero, iramayearoyea, icomitarocari. ¹¹Iro otincami pancotsi oshiacantacqueri Quirishito, irio shiaquerori otincamisanori. Te intimeji pashini shiyerone otincami. ¹²Yora ovaavaquerori, ¿paita irovetsicantearori? Iroorica oro, iroorica perata, iroorica mapi marereatatsiri; iroorica inchato, iroorica saveshi, iroorica compiroshi. ¿Ariompa onquisota-

que? ¿Eirompa oquisotitsi? ¹³Onconijata-naque coajicani yovetsicayetiri. Iriotaquero Tasorentsi, iriotasanotero. Ariorica ovetsicaquea pancotsi cameetsatanotatsiri, eiro otaatsi; irompa ariorica ovetsicavetaquea caari quisotatsi, ario ontaaquee. Irineantearo Tasorentsi aisati maaroni antajeitacueri, iriotanteari ocameetsatanotirica. ¹⁴Ariorica oncameetsatanote antajeiteneriri, oshiaquero quisoyetatsiri avetsicantayetarori; ari cameetsa impinajeitee. ¹⁵Terica oncameetsateji antayeteri, onquempe-tearo avetsicantaro caari quisotatsi; ontayea irointi, oshiaquero tecatsi amatanote. Ariorica avavisacotajea, iro cantaincha tecatsi timimoteeneri, onquempetimotaquee otaacojeitaque maaroni timimojeiteeri: apaniro ainti avavisacotajea.

¹⁶Tempa arojeitaque shiaquerori pancotsi isavicanitari Tasorentsi. Tempa aisati oquempetaca osavicanitajeitaquee Ishire. ¹⁷Eiorica picavintsairo isavicanitari Tasorentsi, eiro aisati icavintsaimpitsi avirori. Ocameetsatanoti isavicanitari Tasorentsi: tempa avirojeitaque isavicanitari. ¹⁸Eiro pamatavitajatsi avisati. Ari picarajeitiri jivetachari iotasannoti paitapeerica. Te oncameetsateji irishemete. Ariorica irishemeventero ioyetiri, eiro iotacairitsi Tasorentsi. Iro cantaincha incanterica: “Te nioteji, poametena”, ari iroametasanoteri. ¹⁹Itseencaquero Tasorentsi maaroni ioyevetari atiripee. Tempa aitaque isanqueneyetini: “Yora tsimeripee ijivetaca tecatsi ayerineri, iro cantaincha omapocaqueri oashirentsi aavaqueri, oamaaqueri. Aisati iquempejetaca maaroni shemetimentarori ioyetiri: irimapoqueri Tasorentsi, iroashinoncaajeiteri”. ²⁰Aisati isanqueneyetini: “Ioti Avincatsarite te oncameetsateji iquenqueshireyetaqueri iotasannotachari”. ²¹Eiro

pishemetimentiritsi atiri, te oncameetsateji. Yovetsicajeitaquempiro Tasorentsi maaroni timayetatsiri poveshireimentantearori iroori. Irootaque nocantantimpiri: ²²itiancaquena Tasorentsi namitacojeitantempiri, aisati itiancaqueri Aporo, aisati Sejashi iriori, iramitacojeitantempiri. Yovetsicajeitaquempiro maaroni timayetatsiri quipatsiqui, piveshireimentantearori. Aneatsimpirica, piveshireempa. Pincamaquerica, aisati piveshireanaquea. Piveshireimentearo timayetsiri meeca, aisati timayetatsineri coajica. ²³Aisati oquempetaca, pamitacojeitiri Quirishito, iveshireimentaquempi. Yamitacotiri iriori Tasorentsi, iveshireimentacari iriori.

4 ¹Meeca piojeitaquena narojeitaque iveranaro Quirishito. Itiancajeitaquena Tasorentsi novaqueneri atiripee oca imanapitsaveitariniri peerani. ²Aitaque icoasanoataque ariorica novayempiro, eiro namatavijeitimpitsi. ³Te oncantimoneentimatenaaji paitarica pincantacotashijeitenari, ainirorica nantane; aisati te oncantimoneentimatenaaji paitarica incantacotashijeitenari atiripee. Tecatsi noncantea noncantacota-jea narosati: “Nocameetsati”. ⁴Noquencheshiretaca narori tecatsi nantane, iro cantaincha eiro nocantashitatsi: “Nocameetsataque”. Irintiquea Avincatsarite cantacotenaneri irinti, nocameetsatirica. ⁵Irootaque meeca noncamantantempirori: meeca te oncameetsateji ancantacotashiteari itsipapee: “Ainiro irantane”; coajicaquea ari ayotasanojeitanaque. Tempa impocaje Avincatsarite, inquitaitetacojeitapaajero maaroni manavetachari meeca tsiteniriqui. Ironijayero paitarica acoasanojeitiri maaroni. Acameetsatirica, ari incantajeite Tasorentsi: “Picameetsati”.

⁶Pamene, noyemisantaririnte. Narosati quenchetsatocotacha, aisati noquenchetsata-

cotiri Aporo piojeitanteari eiro pipincatsatashitantariatsi atiri. Ariorica pincante: “Nonintasanotiri aparo”, pitseenquiricari itsipa. ⁷¿Paita pishemetimentiri? Tempa Tasorentsi pashijeitimpirori maaroni timimojeitaquempiri. Meeca ¿paita pishementacari, oquempetaca te impashitempiro? ⁸Piquempetacari ashitaarantachari: pijivetaca tecatsi coiteimotempine. Pijitashijeivetaca piotasanojeiti: te pincoyeji oamejeitempineri. Pijitashijeivetaca pipincatsatasanoataque, pitseencaquena narori, piquempetacantaquena naro patirite. Ja, nocoavetaca pimpincatsaritasanojeiteme, antsipatavacayeame ampincatsariventantejeiteme. ⁹Ari nocarajeitaqueri itsipapee itiancane Tasorentsi, oquempetamotaquena ipeajeitaquena nampirentsi: itseencajeitaquena atiripee. Aisati oquempetaca isareetaquena iroyeetena; yamenashejeitaquena maaroni: inampirepee Tasorentsi, aisati atiripee. ¹⁰Nopincatsataqueri Quirishito, irootaque picantajeitantanari: “Te pioteji”. Iro cantaincha piquemisantajeitaqueri avirori Quirishito, irootaque picantantari: “Niojeitaque narori”. Picantajeiti: “Tecatsi irimatimate iriori Pavoro, oshequi amajeitaque ainti”. Oshequi pineapincatsatashitaja avisati, nainti pitseencajeitaquena. ¹¹Ari notasheapinitaqueni, nomiretapinitaqueni, noquitsaatsaratani nomaatsara, ipasanatapi-nyeeetanani, noquenaquenatapinitaqueni; irosati meeca. ¹²Nocantatiani nopomerentsitapinitacaro nantaveeti. Ariorica iquisatsayeetaquena, nocantiri Tasorentsi: “Pineshi-noncatajeri yora quisaquenari”. Ariorica iquisasanoyeetana, te nompiatearjii.

¹³Ariorica itseeayocoyeetaquena, cameetsa noneanatavaqueri. Queario, ipinqueetaquena, iquempetacanteetaquena cajara, icanteeti: “Te incameetsateji Pavoro”. ¹⁴Te iro nosanquenatantempiro oca novashiventaajeitempi, irointi noshiacantimpi notomipee nonintasanotiri; nocoaque noncavintsayempi, nonquen-

queshiretacayempi. ¹⁵Timatsi oshequi oamejeitimpiri piquemisantiri Quirishito, iro cantaincha te intimeji oshequi ashitempineri. Pamene, nocamantajeitaquempiro oca cameetsatsisiri piquemisantantacariri Jesoquirishito, irootaque apaniro nainti noshia cantantimpiri notomipee, nishintopee. ¹⁶Irootaque nocantasanojeitantimpiri: “Pishiasanojeitena”.

¹⁷Notiancaquempiri Timoteo, noshia cantaqueiri iriori notomi nonintasanotiri. Iquearioventiniri Avincatsarite paitarica yantiniriri. Inquenqueshiretacayempiro jaoca ocantari nocamantacotapinitiri Quirishito, jaocarica anta yapatotimentariri. ¹⁸Pishemetaarantaque, pijitaarantavetaca eiro nojatashitimpitsi narori. ¹⁹Ariorica inintacaaquena Avincatsarite, nocoa que intsipaita nojatashijeitempi. Eiro noquemisantashitapaarotsi irineane yora shemetatsiri, irointi niotapaaque otimirica imatacaqueriri Tasorentsi. ²⁰Ariorica ipincatsariventaquee Tasorentsi, eiro aneanatashiveeta, irointi amayetero icoacaaqueeri. ²¹¿Paita picoajeitaqueri? ¿Picoajeitaquempa nonquisatsajeitapeempi? ¿Irompa picoajeitiri nonintajeitapeempi, cameetsa noneshinoncajeitapeempi?

Iconoayetacari quemisantatsiri caari cameetsatsi.

5 ¹Icamanteetana picarajeitaqueri airori iashiane. Yaanirotajiro shirampari irinirotsori yaavetari iriri. Tecatsi quempetearineri: yora caari ioterine Tasorentsi te iriapiniteroji yaavetari iriri. ²Avintiquea pishemenirojeitaque. ¿Paita caari poashirejeitanta? Ariorica pampatotimentapiniteari Tasorentsi, eiro pishine-tiriti impocanirotapee iriori. ³Te noncarajeivetempiji, iro cantaincha noquenqueshireacojeitaquempi. Oquem-petimotaquena ariorica nosaviquimojeita-

quempime, nocantantimpiri te oncameetsateji ⁴irantero iashiane. Itasorentsitaque Avincatsarite Jesoshi, irio matacaaquenarori nocantacoventantariri yoranqui. Ariorica pampatojeitea, piojeite noquenqueshirejeitaquempi narori. ⁵Pishineteri Satanashi iraanirotanajeri, iroasanqueta-yerita. Impoiji ariorica inquenqueshireta-jea, ari iravisacotaje coajica impocajerica Avincatsarite Jesoquirishito.

⁶¿Paita pishemenirojeitancari? Tempa piojeiti otimirica tapiacaarori tanta capichaji, omatasanotaquero maaroni tanta, otapiacaajeitacaro. ⁷Pojocajeri yora noshia cantimpiri tapiacaarori tanta, pinquempejiteantearori tanta iroaquerari, caari tapiacha. Eirorica pojoquiri, iquempejeitaricari iriori itsipapee quemisantatsiri. Pineaquero, yoyeetaqueri Quirishito, ishiaqueri ovisha yoantapiniyeetariri ora quitaiteri Yavisantaniri. ⁸Meece, ariorica aveshireimenteari, tsame ancameetsanaque: eiro amatavitantitsi. Eiro aquisatsi, eiro antapinitirotsi caari cameetsatsi.

⁹Nosanquenatantimpirori peerani, nocantajeivetaquempi eiro piconoaritsi antirori tsinane caari yai. ¹⁰Te nonquensatacoteriji caari quemisantatsi antirori caari yai, yora coasanotirori yashiyetari ishaninca, amatavitantatsiri incoshite, quenquetsatacavetarori yovetsicashiyetari. Te noncantempiji: “Eiro pitsipataritsi caari quemisantatsi”. Tecatsi pincantajeite pojocavacayea, tempa pincanteani pineapiniteri irisavique. ¹¹Iro cantaincha nosanquena-tacotiri yora cantatsiri: “Narotaque piyemisantaririnte”. Ariorica yantiro tsinane caari yai, eiro quiso poajeitiriti. Aisati pinquempejeiteri yora coasanotirori yashiyetari itsipapee, aisati quenquetsatacavetarori yovetsicashiyetari impeemeri itasorentsitate, quisatsatashita-

riri ishaninca, aisati shinquitachari, aisati coshitantatsiri. Aitaque nocantaquempi, eiro poimotaritsi quempetariri nocantaquempiri. ¹²¿Arimpa pincante jaoca incanteari caari quemisantatsi? Eiro. Tempa irinti pincante yora piyemisantari-rinte. ¹³Irintiquea Tasorentsi oasanquetayerineri caari quemisantatsi. Meeca pojocajeitajeri yora caari cameetsatatsi picarajeivetari: eiro pijitashitaritsi quemisantatsiri.

6 ¹Ariorica pinquisaqueri piyemisantari-rinte, ¿ocameetsatimotimpimpa paventapeempari caari quemisantatsi incantantempiri jaocarica pincantajeiteari? Tempa oncameetsateme paventapeemparime piyemisantaririnte irinti. ²Tempa pioti yora quemisantatsiri yoameetsantiri Tasorentsi irimatero incantacoventajeiteri maaroni atiri, jaocarica incantajeiteari. Ariorica pincantacoventajeiteri coajica maaroni atiri, ¿paitaquea caari pimatantaro meece pincantacoventajeiteri piyemisantari-rinte? ³Tempa pioti pincantajeiteri coajicani inampire Tasorentsi jaocarica incantajeiteari. Pincantacoventajeiteririca iriori, ¿eirompa pimatiri pincantacoventajeiteri meece pishaninca avirori? ⁴Otimirica meece piquisavacamentari, ¿paita paventantariri yora caari quemisantatsi incantantempiri jaocarica pincantajeiteari? ¿Paita incantempiri iriori? ⁵Iro nocantantimpiri, nocoaque pimpashiventanaquea. ¿TecatSIMpa quemisantatsiri ioterone incanteri itsipapee jaocarica incanteari? ⁶Iro cantaincha piquisaqueri piyemisantaririnte, aisati paventacari caari quemisantatsi. ⁷Patsipetashijaitacaropaventajeitacari joeshi, tecatsi incantea iramitacojeitempi. Te oncameetsateji paventeari. Iro cameetsavetachari pishineteri incoshiyeetempita.

⁸Te oncameetsateji pantavacaajeitea. Jero aisati picoshitavacaajeita. Pantapini-jeitiri piyemisantaririnte. ^{9,10}Yora caari cameetsatatsi eiro yareetatsi anta

ipincatsaritinta Tasorentsi. Tempa piotiro, eiro picomitarotsi. Eiro ijatitsi anta ipincatsaritinta yora antirori tsinane caari yai, aisati yora quenquetsatacaashitarori yovetsicashiyetari, aisati aimentarori ijina, aisati tsinampairiri ishiramparirinte, aisati coshitantatsiri, aisati coasanotirori yashiyetari itsipapee, aisati shinquitachari, quisatsatiriri ishaninca, aisati amatavitiriri ishaninca icoshitantariri. Tecatsi catsini incantajeitea iriori irareetajea anta ipincatsaritinta Tasorentsi. ¹¹Aitaque piquempejeiveitaniri. Iro cantaincha yoameetsajeitaquempi Avincatsarite Jesoquirishito, aisati Ishire Tasorentsi: yaacameetsataquempi, ipeaquempi itomi Tasorentsi.

¹²Icanteeti: “Ocameetsati nantero paitapeerica caari itsaneacotee Jesoshi”, iro cantaincha ariorica antashitearo paitapeerica, tecatsi amate: tempa antsipetashitaquearo. Te ancoyeji ametasanotearo caari inecameetsata itsipapee quemisantatsiri. ¹³Otimi avari aquemari. Aisati otimi asheito onantari avari. Iro cantaincha coajica eiro otimajitsi ayeari aisati asheito iroori. Impeajero Tasorentsi, eiro otimitsi inquitequi. Tempa atsipetashitaro anevetaro paitapeerica. Te iro irovetsicantee antero caari ai, irointi yovetsiquimentee Avincatsarite anquenchirejeitanteariri iriori. Aisati iquempeta, iquenqueshiretapienjeitaquee arori. ¹⁴Otimi itasorenca Tasorentsi, irootaque imatantarori yoitinaajiri Avincatsarite, aisati irimantan-tajeitajeeri aroripee.

¹⁵Avatsapee arori irootaque iraco Quirishito iriori: iyempita, iroqui, iiti, maaroni. Tempa piotiro oca. Arojeitaque-rica ivatsa Jesoshi, ¿ocameetsatimpia antero tsinane neayetiriri itsipapee shirampari? Tempa oquempevetaca antacaqueri Jesoshi tsinane. Teve, te oncameetsateji. ¹⁶Ariorica yantiro

shirampari tsinane, oquempetimotacari Tasorentsi yaasanotaquero. Tempa piotiro. Isanqueneyeti: “Apite inaveitani shirampari aisati tsinane, iro cantaincha ariorica iraavacayea irampanirojeitanaque, te oncameetsateji irijocavacayea”.
¹⁷Iro cantaincha ariorica quiso airi Avincatsarite, aquempetacari iriori.

¹⁸Eiro pantirotsi catsini caari pai, eiro pantiritsi catsini caari pai. Paitapeerica pashini pantayetaqueri, poashinoncaqueri itsipapee pishaninca; iro cantaincha yora antirori otsipapee tsinane, yashinoncaja irisati. ¹⁹Tempa pioti otimantacaro pivatsa Ishire Tasorentsi. Itiancaquempiro Tasorentsi quiso oantaquempiri. Te meeca aviro pincatsariventachane avisati, irinti Tasorentsi pincatsariventimpiri.

²⁰Yoavisacotantajimpiri, oshequi opomerentsitimovetacari: tempa itianquiri itomi icamimentaquee. Meeca, paitapeerica pantayetaqueri, pimataqueneri Tasorentsi, irineacameetsatanteeteariri.

Iquenquetsatocotiri aatsinimeri ijina.

7 ¹Ari chapinqui pisanquenatantaquenari, timatsi pisampitaquenari. Meeca nancanaquempi. Queario ocameetsatasanoti eiro paitsi pijina. ²Iro cantaincha ariorica pintimashitea, pantirocari tsinane caari pai; aisati tsinane, antiricari shirampari caari ai. Irootaque ocameetsatantari paasanoteta pijina, aisati aasanoteta tsinane ojime. ³Cameetsa irishinetearo ijina oneeri, aisati onquem-peteri iroori, oshineteari irineero. ⁴Ijina eiro opincatsatajatsi irosati, irointi ocameetsati ompincatsateri ojime. Aisati inquempetea iriori ojime, eiro ipincatsatashitajatsi irisati, irointi impincatsatero ijina. ⁵Eiro pitsaneapitsatarotsi pijina; aisati tsinane, eiro pitsaneapitsataritsi pijime. Ariorica pincantavacayea: “Eirotsita aneavintsatavacaajatsi

aparopee quitaiteri; iotea anquenquetsatayeri Tasorentsi”, ari cameetsa. Iro cantaincha impoiji pineavintsatavacayea aisati. Pamene, terica pimatero pimaashitea, yantacaimpicari Satanashi caari cameetsatsati. ⁶Te noncantasanovetempiji: “Payero pijina”, iro cantaincha pincoaquerica paye, ocameetsati paye.

⁷Nocoavetaca pinquempejitenanarori, iro cantaincha inashitacaajeitaquee Tasorentsi, te amoncaratavacaajeiteaji. Jeri aparo, timatsi imatacaqueri. Jeri itsipa, onashita imatacaqueriri iriori. ⁸Yora caari aatsi ijina, aisati camajinantachari, noncamantajeitempi: cameetsa pinquempejitenanarori, pintimashijeitea. Aisati onquempejitea tsinane, cameetsa ontimashijeitea iroori. ⁹Iro cantaincha eirorica pimatirotsi pintimashitea, cameetsa paajeta aisati. Cameetsa paye, te oncameetsateji pincoashiveetea paye. Aisati oquempeta tsinane, te oncameetsateji oncoashiveetea ayeta. ¹⁰Meeca noncamantasanotero aatsiri ojime. Te naro camantasanoterone, irintiquea Avincatsarite camantasanoterone: te oncameetsateji pojoqueri pijime. ¹¹Ariorica pojoqueri, ari pintimashitasanotanaquea. Eirorica pitimashitatsi, pampiitajeri paajeri aisati pijimentavetacari. Aisati, te oncameetsateji irojocajero shirampari ijina. ¹²Meeca noncamanteri itsipapee, te irio Avincatsarite camanterineri: otimirica ayemisantaririnte ijina caari quemisantatsi, ariorica ocoaque aasanoteri, te oncameetsateji irojocajero. ¹³Aisati, tsinane, iriorica pijime caari quemisantatsi, ariorica icoaque quiso iroasantempji, te oncameetsateji pojocajeri.

¹⁴Otimirica tsinane quemisantatsiri, irinti ojime te inquempeteariji itseencaririnte; inashitacaari Tasorentsi, icanti: “Iriotaque ojime quemisantanari.

Irootaque iriri otomipee. Nocoacaasano-jeitaqueri inquemisantajeitajena maaroni”. Aisati oquempetaca ijina quemisantatsiri, terica onquemisante. Te onquempetajearoji otseencaroronte; inashitacaacaro Tasorentsi, icanti: “Irootaque ijina quemisantanari. Irootaque iriniro itomipee. Nocoacaasano-otaquero onquemisantajena, aisati nocoasanotaque inquemisantajeite itomipee quemisantanari”. ¹⁵Terica onquemisante ijina ayemisantaririnte, oncoaquerica ojocajeri, ari ojocajerita. Aisati ojime ayemisantaririnte, terica inquemisante iriori: incoaquerica irojocajero, ari irojocajerota. Tecatsi meeca canterine yora quemisantatsiri quiso iroantearori ora coatsiri ojocajeri. Aisati onquempeteari quemisantatsiri tsinane. Ariorica icoaque ojime irojocajero, tecatsi canterine quiso oanteariri. Te incoyeji Tasorentsi anquisavacaajeitea. ¹⁶Tsinane, ariorica quiso poyeri pijime caari quemisantatsi, tempa ariorica poavisacotacantajeri. Aisati oquempetaca avirori, shirampari: ariorica quiso poyero pijina caari quemisantatsi, tempa ariorica poavisacotacantero?

¹⁷Aitaque icoyeajeitaquempi Tasorentsi. Cameetsa pantajeiteneri Avincatsarite paitarica icoacaimpiri avirori. Irootaque nocantajeitaqueriri quemisantatsiri jaocarica yapatojeitacari. ¹⁸Peerani icoyeajeitaquempi Tasorentsi. ¿Pijivata-quempa pitoyeantaca? Aitanaji, eiro pipeajirotsi. Avirori pashini, terica pintoyeantea, eiro picoitsi meeca pintoyeantea, aitanaji. ¹⁹Ariorica pitoyeantani, tecatsi oncantempi oavisacotempi. Aisati oquempetaca, terica pintoyeantea, tecatsi oncantempi. Iro cameetsasananotatsiri anquemisantero icantajeiteeri Tasorentsi. ²⁰Jaocarica picantajeitaniri peerani icoyeantaquem-

piri, aitaque pincanteari. ²¹Icoyean-
taquempi Tasorentsi, ¿avirorica
pimantaari? Eiro piquenqueshiretirotsi.
Iro cantaincha iroimpacajempirica
amanantimpiri, cameetsa pisoquijanaje.
²²Icoyean-
taquempi Avincatsarite,
avirorica pimantaari pinaveitani, ari
oquempetaca yoimpacacoventajimpi: eiro
meeca iperantimpitsi camaari. Avirorica
caari pimantaari pinaveitani, meeca
oquempetaca yamanantimpi Quirishito,
meeca incantempi iriori paitapeerica
pantayeteneriri. ²³Oquempetaca
yamanantaquempi iriori, oshequi
pivinaro: tempa oshequi ipomerentsiven-
taquempi yoavisacotaquempi. Eiro
pipeajatsi meeca ivimantane atiri.
²⁴Irootaque, noyemisantaririnte,
noncamantantempirori oca: jaocarica
picantajeitaniri peerani icoyeantaquem-
piri, aitaque pincanteari; iro cantaincha,
quiso poanajeri Tasorentsi.

²⁵Meeca nonquenquetsacotero caari
neavintsatiri shirampari. Tecatsi incanta-
sanotena Avincatsarite, iro cantaincha
noncamantempi noquenqueshiretiri
narori. Ineshinoncataquena, irootaque
caari namatavitantimpi. Piojeitiro oca.
²⁶Irotaintsi ompomerentsitimotasanoei-
tee, irootaque noquenqueshiretantacarori
oca. Jaocarica picantajeitari meeca,
aitaque pincanteari. ²⁷Paaquerica pijina,
eiro pojocajirotsi. Pitimashitarica meeca,
eiro picoitsi paye pijina. ²⁸Ariorica paye
pijina, cameetsa. Aisati ariorica aye ojime
ora caari neavintsatiri shirampari,
cameetsa; iro cantaincha oshequi
pinquematsicajeitaquearo. Ariorica paye,
oshequi ompomerentsitimotasanoeita-
quempi. Te noninteji ompomerentsitimo-
tempi, irootaque nocantantimpiri: “Eiro
pai meeca”.

²⁹Meeca noncamantempi, noyemisanta-
ririnte: eiro osamanititsi irojocacaashi-
yeetempiro pantayevetanariri Avincatsa-

rite icoacaimpiri. Otimirica pijina, iro cantaincha pinquearioventeneri iriori Tasorensi icoacaimpiri. ³⁰Ariorica poashiretaquea, ariorica pinquimoshiretaque; iro cantaincha eiro piquenqueshiretotsi, irointi pinquearioventero pantaveeteneri. Ariorica pamanantayete, iro cantaincha eiorica osamanititsi pineero pamanantayeveteari. ³¹Eiro osamanititsi piveshireimentearo timayetatsiri quipatsiqui, impoiiji eiro pimatirotsi piveshireimentearo. Cameetsa pisavicajeiveta meeca, ainiro pamejeitacari, iro cantaincha opashiniyetanaque maaroni aneayetiri quipatsiqui; coajica ompomerentsitimojeitempi. ³²Nocoaque eiro picantashiretapinitanaque. Yora timashitachari, iquenqueshiretapinitiro icoayetiri Avincatsarite, icoaque inquimoshiretacayeri. ³³Irintiquea yora aatsiri ijina, iquenqueshiretapinitiro maaroni yantapiniyetiri ishanincha: icoaque inquimoshiretacayero ijina, ³⁴oshequi iquenqueshiretaque paitapeerica. Ora tsinane timashitachari aisati caari neavintsatiri shirampari: oshequi oquenqueshirejeitiro icoayetiri Avincatsarite, ocamantaqueri: “Paitarica pincoacayenari, ari nomataquempiro. Paitarica pincoacayenari nonquenqueshireteri, ari nonquenqueshiretero”. Iro cantaincha ora aatsiri ojime oquenqueshiretiro maaroni yantapinijetiri atiri, ocoaque onquimoshiretacayeri ojime. ³⁵Iro nocamantajeitantimpirori oca, nocoaque namitacojeitempi, te noninteji nompomerentsitacayempi. Noninti cameetsa pisavicajeite, aisati piojeite pantasanojeiteneri Avincatsarite paitapeerica incoacayempiri. ³⁶Pamene, otimirica pishinto caari neavintsatiri shirampari. Ariorica pineaqueri antearotaque, picoaque meeca paacayero; ari cameetsa. Ayeta, eiro otimitsi pantane. ³⁷Ariorica pincoasanote pintsaneemparro, ari

ocameetsatasanoti, eiro piquemisantashitaritsi yora ashereayetimpiri, irointi pantero picoasanotiri avirori, paitarica piquenqueshiretiro. ³⁸Pineaqueri, ariorica paacayero pishinto, ocameetsati; iro cantaincha ariorica pintsaneemparro, ocameetsatasanoti. ³⁹Ariorica aye tsinane ojime, ari quiso oanaqueri, irosati incamanteari. Ariorica incamaque, ari oshinetantari aajeta pashini ojime onintasanotiri. Iro cantaincha apatiro aaje quemisantiriri Avincatsarite. ⁴⁰Ariorica oncantatiyempani ontimashitea, naamaaca onquimoshiretasanotanaque. Ari naamaaca yoametaquenaro Ishire Tasorensi oca nocamantaquempiri.

Iquenquetsatacotiri ivatsa yoyeetinirori yovetsicashiyetari ijitasorensitiri.

8 ¹Meeca noncamantempiro jaoca pinceritiri ivatsa yoyeetinirori yovetsicashiyetari ijitasorensitiri. Ijijeiveta atiripee iotasanoi jaoca incanteriri ivatsa. Iro cantaincha, ariorica ayotashitea, ashemeticari. Te incoacaasanooteji Tasorensi ayotashitea, irointi icoacaasanoaquee anintavacaajeitea avametavacaasanoantanaqueari antimantajeiteari cameetsa. ²Itimirica jivetachari ioti, irisati amatavitajancha: te iriotasanooteji. ³Iro cantaincha ariorica aninteri Tasorensi, iroamejeitee irinti. ⁴Pisampitacoventaqueri ivatsa yoyeetaquenero ijitasorensitiri yovetsiqueetiri. Ari ayojeiti te ontasorensiteji yovetsicashiyetari. Itimi apaniro Tasorensisanori, te intimeji itsipa. ⁵Ainiro timayetatsiri anta inquitequi aisati aca quipatsiqui ijitasorensitashitari atiri. Ainiro onaveta oshequi ijitasorensitashiyetari, oshequi ivincatsaritepee. ⁶Ayojeiti ainti itimi apaniro Tasorensi, yora Apa. Iriotaque timacaquerori maaroni aneayetiri, aisati yovetsicajeitaquee arori. Irisati

vetsicanontaincha. Timatsi aisati Avincatsarite apaniro: yora Jesoquirishito, vetsicajeitirori maaroni timayetasiri, vetsicajeitaqueeri aisati arori.

⁷Iro cantaincha ainiro ayemisantaririnte caari iojeitiro oca nocamantaquempiri. Peerani yameyataroni aparopee iquenquetsatacaapiniveitaroni yovetsicashiyetari atiripee. Ariorica yorarin ivatsa yoyeetini-rori, ijivetacarini ashisanori yora ijitasorentsiyeetiri. Te irioveteaji; ariorica iroashiteari meeca ivatsa yoyeetini-rori yovetsiqueetiri, oshequi inquenqueshireanaquea, irijivetea te oncameetsateji iroyeari. ⁸Ariorica ayeari ivatsa, tecatsi oncantimoneenteari Tasorentsi. Ayearirica, tecatsi incantee ivatsa. Antitearirica, eiro yoameetsashireetejsi. ⁹Cameetsani poyeari, iro cantaincha pantacairicari caari cameetsatatsi yora caari iotatsi. ¹⁰Irineempirica caari iotatsi poaca anta ovancoqui ijitasorentsiyeetiri, icanticari: “Ioti irinti. Nonquempeteari, noyari ivatsa yoyeetini-rori ijitasorentsiyeetiri”. ¹¹Piotasanoti, ocameetsatantari poari. Irintiquea, te irioteji. Ariorica iroashiteari, oshequi inquenqueshiretanaquea: “Terica oncameetsateji nantaquerica. Otimi meeca nantane”. Iriotaque piyemisantaririnte, icamimentaqueri Quirishito. ¹²Te oncameetsateji pantacayeri caari cameetsatatsi. Te irioveteaji, piquenqueshiretacairicari. Aisati irineacotaquempi Quirishito, te oncameetsateji pantaqueri. Tempa icantaquee: “Pininta-jeiteri pishaninca, eiro pantacairitsi caari cameetsatatsi”. ¹³Irootaque nocantantimpiri: ariorica noaqueari ivatsa, irosati nantacanteariri noyemisantaririnte caari cameetsatatsi, eiro catsini nojaritsi ivatsa aisati. Nantacairicari caari cameetsatatsi.

Icantiri Pavoro: “Pinquempejeitena”.

9 ¹Tempa ishinetaquena Tasorentsi paitapeerica. Tempa itiancana. Tempa noneasanotaqueri Avincatsarite Jesoshi. Tempa iriotaque matacaaquena-

rori noquemisantacaaquempi. ²Terica iriojeiteji itsipapee itiancaquena Tasorentsi, iro cantaincha piotasanoejitaque avinti itiancaquena. Avirojei iotacajeite-rine atiripee itiancana Avincatsarite.

³Ainiro tseencaquenari, cantanari: “Te intianquempiji Tasorentsi”. Jero oca nocantavaqueriri: ⁴“Tempa ocameetsati ayea aisati ire. ⁵Ariorica nonquenayeta-naque nonquenquetsatacayeteri ashaninca; ontimeme nojina, tempa oncameetsateme nontsipatanaquearome. Aitaque imatapiniyetiro itsipapee itiancane Avincatsarite, aisati irirentipee, aisati Sejashi. ⁶¿Apanirompa nompomere-mentsiventaro nompinatero noyari? Aisati iquempetana Verenave, ipomere-mentsiventaro iriori yoari. ⁷Noshiacantem-piro: tempa ipinatapiniyeetiri soraro. Ariorica apomere-mentsitaro apanquitiro ova, tempa aisati avaquearo. Ariorica ashentapinitiri avirapee, tempa irapinitiro otsomi”. Irootaque nocanta-queriri yora tseencaquenari.

⁸Noquenquetsatacotaquero anepinijejitaqueri, iro cantaincha ¿paita ocantiri isanquenatiniri Moishishi? ⁹Jero oca ocantiri: “Eiro pipashicavantetiritsi vaca aticaitirori tirico itaquireantarori”. ¿Apanirompa vaca iquenqueshiretiri Tasorentsi? Teve. ¹⁰Tempa aisati arori oshiacantaquee isanquenareni. Oamejei-taquee paitarica antajeitaqueri. Ariorica inquivanetaquero quipatsi impanquitan-tearori, icoaque yora quivaneteroneri iraarantayetajero oitsoqui, coajica. Aisati iquempetaca yora taquireeroneri, icoaque iraarantayetajero oitsoqui iriori.

¹¹Pamene, oshiacantaca nopanquitiro pishirequi irineane Tasorentsi. ¿Opomere-mentsitimotimpimpa meeca pimpaarante-naro noyari, noitsaare, paitapeerica?

¹²Ariorica pipaarrantashiyetari itsipapee, tempa oncameetsateme pimpaarantaque-name narori. Iro cantaincha tecatsi

pimpena. Piquemisantaquero peerani oca cameetsatsiri nocamantacotiriri Quirishito. Oshequi opomerentsitimota- quenani, iro cantaincha te noncoyeniji nojocacayempero piquemisantaqueni, irootaque caari nocoacotantimpini paitapeerica. ¹³Pamene. Yora antaveeta- tsiri ivancoqui Tasorentsi yaapinitiro yoari anta, yoaro. Aisati yora oaqueneriri Tasorentsi virantsipee anta yoapinitini- rinta, yoarantari ivatsa. Tempa piotiro. ¹⁴Aisati oquempetaca, icanti Avincatsa- rite: “Cameetsa impaaranteeteri coiteimo- tariri yora quenquetsatirori oca cameetsa- tsiri”.

¹⁵Ocameetsateme naarantitempirome paitapeerica, iro cantaincha tecatsi naitempi. Aisati te iro nosanquenatimen- tempi pimpantenari paitapeerica. Noquimoshiretaque tecatsi noncoacotem- pini; arioricame ayename notashe, eiro nocantimpitsi: “Pimpena noyeari”. Ayenata, noncameta. ¹⁶Ariorica nocamantacotiro oca cameetsatsiri, tecatsi noncantea noshemete. Tecatsi noncantea nomajerete, aisati nonquen- queshiretea: “Te nomateneri Novincatsa- rite icoacaavetaquenari”. ¹⁷Noncoasano- tericame nocamantanti, impinatename Tasorentsi. Iro cantaincha te noncoave- teaji, tempa iperanataquena. ¹⁸¿Paita meeca impinatenari? Oncameetsata- queme noncoacojeitempime, iro cantain- cha te noncoyeji. Apatiro noveshireimen- taquempi piquemisantajeiti.

¹⁹Impinayeetename, nompeaqueame iratirite pinatenanemeri, incantapinite- name paitapeerica nantapinitenerimeri. Iro cantaincha nopomerentsiventashijeit- acari oshequi atiri noquemisantacantaja- riri. ²⁰Ariorica nocarajeitaqueri jorio, noquempejietacari iriori, noquemisanta- cantajariri. Ariorica nocarajeitaqueri quemisantirori isanquenare Moishishi, noquempejietacari iriori, noquemisanta-

cantajariri. Iro cantaincha te nompinca- tsatearaji meeca isanquenare Moishishi, te nompomerentsiventearaji. ²¹Ariorica nocarajeitaqueri caari quemisantiro isanquenare Moishishi, noquempejita- cari iriori, noquemisantacantajariri. Te noavisajeroji icantiri Tasorentsi; noquemisantajeitaquero icantiri Quirishito. ²²Aisati, ariorica nocarajeita- queri caari matasanotiro inquemisante, noquempejivetacari iriori, noquemisan- tacantasanotacariri. Aitaque noquempe- jivetacari maaroni atiripee noquemisan- tacantajeitacariri. ²³Iro noquempetapini- jeitantariri irioripee inquemisantajeitan- tearori oca cameetsatsiri nocamantajei- tiriri. Aisati narori, noveshireimentearo oca cameetsatsiri.

²⁴Pamene, tempa piojeiti ishiaeitanaca oshequi shirampari iriojeitanteari janicarica anaacotantaintsineri. Iranaaco- tantaque apaniro yora shiasanotanain- chari, ari impeeteri icanteetiro premio. Aisati pishiyeri avirori, pishiasanotana- que, paantearori premio. Ariorica pishintsiventero icoacaimpiri Tasorentsi, ari paaque. ²⁵Irisati cavintsaaiancha maaroni coatsiri iranaacotante ariorica irishiye. Irootaque icavintsantari irisati irimatantearori irishiasanote iraanearori amatseerenti. Oshintsiti opatsai, iro cantaincha oca amatseerenti ayeri arori, eiro opatsaitsi irointi, irootaque ocamee- tsatantari ashintsiventasanotero. ²⁶Te nontipitipiyetanaque noshianaca, irointi catinca noshianaca nomatantearori nanaacotante. Pashini noshiacantempiri capojavacaachari. Icapojavacaasanotaca iriotanteari janicarica anaacotantaintsi- neri. Oquempevetaca aisati nocapojasa- notiri itsipa, te noncapojaiteashiteaji; noquearioventiniri Tasorentsi icoacaa- nari, ²⁷noshintsiventasanotaqueneri; noperanataja narosati. Oshequi noquen- quetsatacaajeitiri itsipapee, te noncoyeji

incantena Tasorentsi coajica: “Te pimatasanotenaroji nocoacaavetimpiri”.

Iquenquetsatacotiri jorioni, peerani; aisati yoametaqueri quemisantatsiri.

10¹Meeca, noyemisantaririnte, noncamantempi piotanteari jaoca icantajeitari jorioni anta caaraiteriqui, peerani. Otsimancapinijeitanaquerini mencori; aisati otencareajataqueneri incajare, nianqui yaniijeitanaque pirijapatsariqui. ²Anta mencoriqui aisati incajarequi yoamejeitiri Tasorentsi iojeitantacari iqumisantajeitaqueri peerani Moishishi. ³Yoapinijeitacaro yoari ipapinijeitaqueriri Tasorentsi. ⁴Irapinijeitanaquero nija ipapinitiriri, ora soquijatsatsiri mapiqui. Yoaqueneri Tasorentsi ora mapi, oshiacaaventiri Quirishito, oijajeitanaqueriri. ⁵Iro cantaincha te iriveshireempaji Tasorentsi. Te iriveshireimentajeiteariri oshequi yora atiripee, irootaque icamajeitantacari anta caaraiteriqui. ⁶Pinquenqueshireajeitero oca piojeitanteari icoacaimpiri Tasorentsi. Piquempejeitaricari jorioni: picoirocari caari cameetsatsi. ⁷Eiro piquemisantirotsi ijitasorentsitashiyetari. Aitaque imataarantaquero peerani. Osanquenatacari: “Isavicajeitaque atiri, yoajeitaca aisati iraaajeitaque. Impoiji icatiajeitanaca, imaticajeitanaque, omaninquejeitanaque”. ⁸Queariyea, aquempejeitaricari arori: ineavintsataarantavacaaca caari yai, irootaque icamaarantantacari 23,000 atiri aparoni quitaiteri. ⁹Ineantaarantacari Avincatsarite, iriotanteari inquisheririca, irosati itiancantacanari oshequi maranque. Ari yatsicajeitaqueri, icamajeitaque. Queariya, ashiiricari arori, aneantaricari Tasorentsi. ¹⁰Aisati icantimataarantanaqueri, irootaque ipoyerearantantacariri yora inampire Tasorentsi. Queariya, aquempejeitaricari arori.

¹¹Iro imatantayetacarori oca, anquenqueshireanteari. Isanquenayeetironi, ayojeitantajari meeca. Irovetaicha omoncaratajea impocantajeiri Jesoquirishito. ¹²Meeca, ariorica picanti: “Noncantiyempani nainti nonquearioventero nonquemisante”, nocantimpi narori: “Paamaventea, pantirocari caari cameetsatsi”. ¹³Ainiro aquenqueshirejeitiro antero caari cameetsatsi: ashi avajeitiro maaroni atiri. Iro cantaincha ariorica aventeari Tasorentsi, iramitacajeitee eiro antantarotsi. Eiro yamataviteetsi, iramitacotasanojeitee eiroquea antantarotsi caari cameetsatsi aquenqueshirevetacari.

¹⁴Irootaque, nonintane, noncamantantempirori oca: “Eiro catsini piquemisantirotsi yovetsicashiyeetari ijitasorentsitiri”.

¹⁵Ainiro piotantari, meeca pinquenqueshirejeitero oca nocantimpiri. ¹⁶Ariorica ancanteri Tasorentsi: “Irove, Apa, aviro panarori oca nireri”, tempa aquempetavacaapinijeitaca, aveshireimentajeitaro iriraja Quirishito yaparajatimentaquee. Aisati, ariorica acarajapinitiro tanta, tempa aquempetavacaapinijeitaca, aveshireimentajeitaro ivatsa, aquenqueshirejeitiri icamimentajeitaquee. ¹⁷Ari ocarati avapinijeitari tanta aparo. Aisati oquempeveta, oshequi anajeiveta, iro cantaincha amoncaratavacaajeitaca, ashanincajeitacari Quirishito: tempa apaniro ini irinti.

¹⁸Pinquenqueshirejeitero yamejeitacari joriopee. Ariorica yoajeitacari ivatsa yoiniriri Tasorentsi, tempa ishanincatavacaajeitaca iriori. ¹⁹Jero oca nosampitempiri: ¿Tasorentsimpa oca yovetsiqueeyetiri? Tempa yatsipetashita yoapinitiniro ivatsa. ²⁰Jero oca noncamantasanotempiri. Ainiro yoaqueneri ivira. Iro cantaincha caari oni Tasorentsi yoaqueneri, irinti camaari. Te nonintacayempiji pishanincateari camaari. ²¹Ariorica pirimenter

Avincatsarite, eiro pimatirotsi pirimentero camaari aisati. Ariorica poimenteari Avincatsarite, eiro pimatirotsi poimenteari camaari aisati. ²²¿Arimpa picoaque inquisaquempi Avincatsarite? ¿Panaacojeitirimpa pishintsitasanoti?

²³Icanteeti: “Ocameetsati nantero paitapeerica caari itsaneacotee Jesoshi”, iro cantaincha ariorica antashitearo paitapeerica, tecatsi amate, tempa antsipetashitearo. Eiro amitacojeiteetsi paitapeerica antashiyeveteari. ²⁴Eiro piquenqueshireacotapinitirotsi picoayevevari avirori, irointi pinquenqueshireacotapiniteri icoayetiri itsipapee. ²⁵Ariorica ipimantayeti ivatsa, poyeari. Eiro pisampitacoventiriti: “¿Jaoca pairiri? ¿Irimpa yoyeetinorori ijitasorentsiyee-tiri?” Ariorica pamananteri ivatsa, eiro pisampitacoventiriti, pijiticari ariorica poyeari eiro picameetsashiretanajitsi. ²⁶Ocantini Sanquenarentsi: “Irio Avincatsarite ashiyetarori quipatsi aisati maaroni timantajeitarori”.

²⁷Ariorica incajemempi caari quemisantatsi iroacayempi. Ariorica picoaque pijate, poajeiteariyea maaroni impajeitavaquempiri. Eiro pisampitacoventiriti ivatsa, eiro pijititsi ariorica poyeari, eiro picameetsashiretanajitsi. ^{28,29}Iro cantaincha incanteempirica: “Jeri yoca ivatsa, yoyeetinorori ijitasorentsiyee-tiri”. Ari pinquenqueshireteri yora camantaquempiri: yaamaacari ariorica iroyeari, eiro icameetsashiretanajitsi. Irijiterica te oncameetsateji iroyeari, eiro poaritsi avirori. Avinti piovetaca tecatsi incantempi ivatsa, iro cantaincha pincavintsayeri yora caari iotatsi.

Naamaaca intime cantatsineri: “Ishineta Tasorentsi noyeyari paitapeerica, ¿paita itsaneacotashitantanariri yora caari iotatsi? ³⁰Ariorica avapinijeitari, acantapinijeitiri: ‘Iriove, Apa, aviro panariri noayetari’. Ariorica ampasonqui-

teri, ¿paita icantimentanteeriri ayearirica?” ³¹Ari noncamantempi. Ariorica poajeitea, aisati ariorica pirajeite; iro cantaincha paitapeerica pantayeteri, panteneri Tasorentsi icoacaimpiri, iriveshirementantempiri. Impojiquea incantajeite atiri: “Tempa icameetsati Tasorentsi. Cameetsa isavicacaajeitiri quemisantajeitiriri”. ³²Pantacairicari caari cameetsatatsi yora jorio, yora caari joriotatsi, aisati yora quemisantajeitiriri Tasorentsi. ³³Paitapeerica nantayeteri, noninti namitacojeiteri atiri. Te naro intacotajanchane narosati, irointi nintacotapinijeitari iriori itsipapee atiri. Iro nomatapinijeitantanariri iravisacojeitantajeari.

Antayetiri tsinane quemisantayetatsiri.

11 ¹Pimoncarajeitaquena, noquempetaca narori nomoncaratacari Quirishito. ²Piquenqueshiretapinitaquena, aisati piquenqueshiretiro maaroni noametaquempiri, irootaque noneacameetsatantaquempiri. ³Jero oca, piotero: irio Quirishito cantajeitiriri atiri paitarica irantajeiteri; irio shirampari cantajeitirori ijina; aisati irio Tasorentsi cantiriri Quirishito. ⁴Pamene yora shirampari, ariorica iquenquetsatacari Tasorentsi, aisati ariorica icamantanti, te irameteaji impashicainatea. Ariorica impashicainataquea, te impincatsateriji Quirishito. ⁵Irointiquea tsinane, ariorica oquenquetsatacari Tasorentsi, aisati ariorica ocamantanti, opashicainatapinitaca. Terica ompashicainatea, te ompincatsateriji ojime: oquempetomotacaro amee-tiro oishi. ⁶Terica oncoyeji tsinane ompashicainatea, ari ocameetsati aisati amee-rotata oishi. Iro cantaincha ariorica opashiventaca amee-tero, cameetsa ompashicainatea.

⁷Te oncameetsateji impashicainatea shirampari: iquempevetacari Tasorentsi,

aisati ipincatsatiri. Aisati oquempetaca tsinane, opincatsatiri shirampari. ⁸Ijivata-queri yovetsiqueetiri shirampari. Iro imerequi yovetsiqueeti tsinane; irointi omerequi tsinane, te irovetsiqueeteroji shirampari. ⁹Yovetsiqueetiri peerani shirampari, impoiji yovetsiqueetiniri tsinane. Irointi tsinane, tecatsi irovetsiqueetene.

¹⁰Ocameetsati ompashicainatea tsinane iriotantajeiteari inampire Tasorentsi opincatsatiri ojime. ¹¹Pamene, te ontimashiteaji tsinane, te intimashiteaji shirampari. Icoaque Avincatsarite ancoiteavacayea. ¹²Iro imerequi shirampari yovetsicaqueri tsinane, aisati meeca otimapinitiri tsinane otomi. Irinti Tasorentsi veticajeitiriri maaroni.

¹³¿Paita piquenqueshiretiri avirori? Ariorica onquenquetsatacyeri tsinane Tasorentsi, ¿cameetsampa ompashicaina-reajea? ¹⁴Te amejeiteaji anquishipejeite arori shirampari. Eirome apashiventame intimeme quishipenti. ¹⁵Irointi tsinane, tempa aneacameetsajeitiro oquishipetirica oishi: irootaque opashicainatari.

¹⁶¿Timatsimpa coatsiri impiatsatena? Noncamantempi: nametacaro oca nocamantaquempiri, aisati yamejeitacaro maaroni quemisantajeitiriri Tasorentsi.

Yoametantiro yoimentapinijeitari Jesoshi.

¹⁷Timatsi pashini noncamantempiri. Te noneacameetsateroji oca pantajeitiri ariorica papatojeita: te oncameetsateji, te oameetsashirejeitempiji. ¹⁸Nojivate noncamantempero oca. Icamanteetana ariorica papatojeita piquemisantantapinitari, picantavacaajeita. Naamaavetaca queario icamanteetana. ¹⁹Picantavacaajeitaca piojeitantacariri janicarica quearioventasanotirori iquemisanti.

²⁰Ariorica papatojeita, poajeiveta, iro cantaincha te poimentajeiteariji Avincatsarite. ²¹Ariorica poapinijeita,

paanontajeitanaca poari avirori, poapitsa-jeitacari itsipapee. Te poyevacava-queaji. Itasheanaque aparopee, ishinqui-tanaca itsipapee. ²²¿Paitasa pantajeitiri? Tempa otimi pivanco poanteari, piranteari. ¿Pipincaquerimpa yora pocashitiriri inquemisanteri Tasorentsi? ¿Pishirontimentarimpa yora caari ashitaarantacha? ¿Jaocampa noncantem-piri? ¿Ariompa noneacameetsatempi? Teve.

²³⁻²⁵Irio Avincatsarite oametnarori oca novaaquempirica. Peerani, tsiteniriqui, ari yaaquero Avincatsarite Jesoshi tanta. Icantiri Iriri: “Irove, Apa, aviro panarori oca noyeari”, impoiji icarajaquero. Icanti: “Jero oca tantaca: ariorica poapinitearo, pinquenqueshiretapinijeitena. Tempa narotaque camimentajeitempineri”. Ari yoajeitaca. Impoiji yaaquero aisati iramento. Icantajeitiri: “Jero oca oja, ariorica pirapinijeitero, pinquenqueshirejeitena, piotasanajeite amparajatimentajeitempi niraja pavisacojeit-antajeiri. Ariorica noncamimentempi, piotanaque eiro namatavitimpitsi, nomatem-piro maaroni nocamantaquempiri”. Irosati yananincantanaja tsiteniriqui, irosati yaanteetacari. ²⁶Ari meeca poapinijeitero, pirapinijeitero, poametantapiniteariri atiri icamimentajeitaquee Avincatsarite. Pimatapinijeitero, irosati impocantajeiri.

²⁷Ariorica poimenteari, ariorica pirimenter, pinquenqueshireempa: eiro pantashitarotsi. Ainiro irantane yora antashitarori: itseenquiro ivatsa Avincatsarite, itseenquiro iriraja. ²⁸Pijivate piotacotea avisati, otimirica pantane. Piotacotearica te aneeroji pantane, ari poyearo, aisati pirero. ²⁹Te oncameetsateji avashiveetearo, aisati irashiveetearo. Terica anquenqueshiretasa-noteri Avincatsarite, tempa avamempeacaro, iramempeacaro: ontime antane.

³⁰Irootaque pojoquiitaarantantacari, aisati caari pishintsiyetanta. Irootaque aisati icamaarantantacari pishanincapee.

³¹Ariorica ayotacotea arosati otimirica antane, ocameetsati ajivate anquenqueshireempa ancameetsatantajeari; impoji-quea, ariorica avajeitimenteari Quirishito, eiro yoasanqueteetsi Tasorentsi. ³²Tempa aisati ocameetsati incantacoventee Avincatsarite, aisati iroasanque-tee, oncanteataquea eiro ajatantatsi Sharincaveniqui. Te incoacaajeiteeji antsipajeiteari maaroni yora tseencantatsiri. ³³Meeca, noyemisantaririnte, ariorica pampatojeitea poimentajeiteari Avincatsarite, poyeavacaavaqueatsita. ³⁴Ariorica pintasheasanotaque, pijivate poyea anta pivancoqui. Eiro papatoshijeitatsi pinquemanteorari poyeari: otimicari pantane. Ariorica nareetempi nontsoteapeempiro, noameyetempiro pashini.

**Iquenquetsatacotiro omatacaajeitaqueeri
Ishire Tasorentsi.**

12 ¹Meeca, noyemisantaririnte, noameyetempiro maaroni omatacaajeitaquempiri Ishire Tasorentsi. Te noncoyeji pincomijeitearo, irointi nocoaque piojeitavaquero. ²Piojeiti peerani te pinquemisantajeiveiteani. Piquemisantashyveitaroni povetsicashiyetari, pijitasorentsivetari. Tempa omasontijeitaque iroori. ³Nocoaque piojeitavaquero oca. Ariorica oneaveeta-caaqueri Ishire Tasorentsi atiri, eiro icantitsi: “Te incameetsateji Jesoshi”. Aisati oquempetaca, eirome oametirime, eiro icantime: “Irio novincatsarite Jesoshi”.

⁴Onashiyetaca omatacaajeitaqueeri, iro cantaincha apaniro oni Ishire Tasorentsi. ⁵Onashiyetanaca oca antajeitiniriri Avincatsarite, iro cantaincha apaniro ini irinti. ⁶Onashiyetaca antajeitaqueneriri, iro cantaincha apaniro ini irinti Tasorentsi. Tempa iriotaque matacaajeiteerori maaroni. ⁷Oamejeitaquee Ishire intacota-

vacantajeitacari. ⁸Iotacaayetaqueri aparopee, cameetsa iquenquetsatantacari; irio itsipapee oametaqueri, cameetsa yoametantaqueerori ioyetiri. Ocarati oameyetiriri apaniro: ora Ishire Tasorentsi. ⁹Irosati matacaayetiriri itsipapee ishijetacaro icantayetiri Tasorentsi; itsipapee omatacaqueri yoavisacoyetiri mantsiaripee. ¹⁰Irosati matacaayetiriri itsipapee itasoncantayeti. Pashini omatacaqueri icamantantayeti. Pashinipee iotacaqueri ioyetavaqueri quenquetsatacaantatsiri: iriorica quenquetsatacari riri camaari, irompa terica irio. Pashini, omatacaayetiri ineanatashiyetaro pashinipee neantsi. Pashini aisati omatacaayetiri yovaaeenoro ora icantaqueeri. ¹¹Onashiyetaca oamejeitaqueri, iro cantaincha aparoni oni oamejetiriri: irootaque Ishire Tasorentsi. Paitarica onintacaayetiriri, irootaque oameyetiriri, omatacaqueri.

¹²Pamene: apaniro onaveta avatsa, iro cantaincha ainoro aiti, aco, aqui, ayempita, maaroni. Oshequi onaveta, iro cantaincha apaniro onaveta avatsa. Aisati iquempeta iriori Quirishito. ¹³Apaniro onaveta Ishire Tasorentsi. Otasoncakoventajeitaquee, irootaque ashanincatava-caajeitantacari, oquempetacaajeitaquee apaniro anajeiti. Acarajeitiri jorio, itsipapee caari joriotatsi; itsipapee pimantaari inaveta, pashinipee te impimanteeteriji. Quiso oajeitaquee Ishire Tasorentsi: apaniro oni.

¹⁴Apaniro oni avatsa, iro cantaincha timatsi anitantari, ajiricantari, amenantari, aquemantari, oshequi. ¹⁵Te oncanteji aiti: “Te naro iraco, te naro ivatsa iriori”. Tempa irootaque aiti avatsa, te onashiteaji. ¹⁶Te oncanteji ayempita: “Te naro iroqui, te naro ivatsa iriori”. Pineaquero, tempa irootaque ayempita avatsa, te onashiteaji. ¹⁷Ioteamerica avatsa apajaquironi, ¿jaoca ancanteameri anquemanteameri? Ioteamerica

aquemantari, ¿jaoca ancanteameri anquemeencatanteameri? ¹⁸Iro cantaincha cameetsa yovetsicayetaquero Tasorentsi avatsa: aquemantari, amenantari, aniitantari, maaroni. Paitarica icoiri, imayetaquero. ¹⁹Iotaquearicame aqui anaqueme, ¿jaoca ancanteameri? ²⁰Apaniro oni avatsa, iro cantaincha otimi aiti, aqui, ayempita, aco, maaroni. ²¹Tecatsi oncantea aqui oncantero aco: “Te pincanteji”. Aisati aito, te oncanteroji aiti: “Te nonintempji”. Teve, te oncanteroji.

²²Timatsi avatsapeequiniri paitapeerica, ajivetaro otimashita, iro cantaincha ocameetsasatanotaque otimayeti. ²³Aisati oquempeta, ainiro apashiventacari, iro cantaincha ocameetsati ontme. Apashiquiro caari acoi onconijate. ²⁴Te ampashiqueroji caari apashiventaca. Iro cantaincha cameetsa yovetsicayetaquero avatsa yora Tasorentsi. Ocameetsati ontimajeite ora caari aneacameetsaveta. ²⁵Imataquero oca oncavintsavacaajeitanteari aiti, aqui, maaroni. Tecatsi oncantejeitea onquisavacaajeitea. ²⁶Ariorica ocatsitaque aparo, ari aquemaquero maaroni avatsapeequi. Tecatsirica oyerone aparo, tempa aquimoshireventa-jeitaquero.

²⁷Avirojeitaque ivatsa Quirishito. Avirojeitaque iiti, iraco, iroqui, iyempita, maaroni. ²⁸Ari acarajeiti oshequi quemisantajeitiriri Tasorentsi. Ijivataque Tasorentsi itiancaqueri aparopee iquenquetsati. Pashini itiancaqueri icamantanti. Pashini itiancaqueri yoametanti. Impoji pashini itiancayetaqueri itasoncantayetaque, pashini yoavisacoyetiri mantsiaripee, pashini intacotanta, pashini icantayetiri quemisantatsiri paitarica irantayeteri, pashini ineanatashiyetaro pashinipee neantsi. ²⁹¿Itiancajeitaqueempa anquenquetsate maaroni? ¿Acamantantajeitimpa

maaroni? ¿Avametantajeitimpa maaroni? ¿Atasoncantajeitimpa maaroni? ³⁰¿Avaviasacojeitirimpimpa maaroni mantsiaripee? ¿Amajeitaquerompimpa maaroni aneanatashiyetaro otsipapee neantsi? ¿Amajeitaquerompimpa maaroni avaaqueneri ashaninca oca icantiriri? ³¹Iro cantaincha cameetsa pincoacotasanoiteri Tasorentsi irimatacayempiro cameetsatatsiri. Meecca noametasanotempiro cameetsasatanotatsiri.

Cameetsa anintavacaajeitea.

13 ¹Ariorica amatero aneanatashitearo otsipapee neantsi, ariorica amatero anquero irineane inampirepee Tasorentsi, iro cantaincha eirorica anintajeitiri itsipapee, tempa antsipetashijeitaquearo, ayotashiyevetearo aneaveete. Aquempetarocari campana, ocantashita, teeiin, teeiin. Aquempetarocari tamporo ocantashita, tin, tin, tin. ²Ariorica ayotitayetearo caariquera ineeti, ariorica ayotitayetearo maaroni imanayevetacari Tasorentsi, ariorica amayetero maaroni ioyetiri atiri, ariorica anquearioventero anquemisantanoiteri Tasorentsi, irotaque amatanteerori avayetajero toncaaripee: iro cantaincha eirorica anintasanotiri itsipapee, antsipetashijeitearo ayotashiyevetearo maaroni, eiro acameetsatitsi. ³Ariorica ampashiyeteari ashinoncaincari maaroni timimojeiteeri, ariorica anquearioventeneri Tasorentsi anquenquetsatacoteri, irotaque inquisanteeri atiri, intaimentee-tanteerori; iro cantaincha eirorica anintasanotiri itsipapee, antsipetashijetearo maaroni, tecatsi amatimateneri Tasorentsi.

⁴Ariorica anintasanojeiteri itsipapee, eiro ashintsititsi anquisheru, irointi aneshinoncateri, eiro aquishmentiritsi imayetaqueri iriori, eiro ashemetitsi.

⁵Ariorica anintasanoteri itsipapee, eiro

antirotsi caari cameetsayetatsi apashiventacari, eiro antirotsi acoasanotiri arori, irointi anteneri inintacayeeri iriori; eiro ashemaritsi, eiro aquenqueshiretapinitirotsi caari cameetsatatsi yantayetiri.

⁶Ariorica aninteri itsipapee, eiro aveshireimentarotsi caari cameetsatatsi, irointi aveshireimentera queariotasanotatsiri, ⁷eiro aperataritsi, eiro aamaaritsi, eiro atseenquiritsi, irointi ancavintsayeri aisati intacoteari.

⁸Eiro acantatiani ancamantante, eiro acantatiani aneaveetashitearo otsipapee neantsi. Eiro acantatiani ayotashivetearo paitapeerica, irointiquea ancantaitatiyempani anintavacaajitea. ⁹Te ayotasojeiveiteaji, te ancamantantasanojeiveiteaji. ¹⁰Coajica omoncarataquearica cameetsatasanotatsiri, eiro acoajirotsi oca cameetsayevetachari. ¹¹Peerani ajananequiveitani, aquempeveitani jananequi aneaveetashita, ayotashiveta capichaji, aquenqueshireaveta capichaji. Anteariantapaacari, ajocanaquero ajananequiveitani. ¹²Meeca oquempetaca amenaacotaqueri Tasorentsi amenaarontsiqui, te inconijatasanoteji. Coajica amenavorotasanotapeeri inquitequi. Meeca ayojeiveitari capichaji, coajica ayotasojeitapaajeri, oquempetaca iotasanoaquee meeca. ¹³Meeca acantatiani aquemisantajeitaqueri Tasorentsi, ayojeiti eiro yamataviteetsi, anintavacaajitaca. Iro cameetsatanotaintsiri anintavacaajitaca.

Iquenquetsacotiri neanatashiyetarori
otsipapee neantsi, aisati camantantatsiri.

14 ¹Pincoasanojeite pinintajeiteri itsipapee. Aisati pincoasanotero pimatero maaroni omatacaaqueeri Ishire Tasorentsi, pincamantantajeiteariri itsipapee. ²Ainiro atiri omapocashitacari ineanatashitanacaro otsipapee neantsi. Te inquemavaqueriji atiri, irintiquea Tasorentsi. Tecatsi quemavaquerone

icantiriri. Omanavetaca oca oneanatacaairi Ishire Tasorentsi. ³Iro cantaincha yora oametantirori irineane Tasorentsi, yoametaqueri atiri, iveshireacaacari, iquimoshiretacaqueri. ⁴Yora neanatashitarori pashinipee neantsi yoametaja irisati, iro cantaincha yora camantantatsiri yoamejeitiri maaroni iyemisantaririnte. ⁵Nocoaveta pineanatero otsipapee neantsi, iro cantaincha nocoasanotaque poametantero irineane Tasorentsi. Oshequi imataque irinti camantantatsiri: iotacaajeitiri iyemisantaririnte. Intimerica ovaayeeroneri irineane yora neanatashitachari, ocameetsati aisati. Irojeitavaquero quemisantatsiri, inquemavaquero.

⁶Pamene, noyemisantaririnte: noneanatashitapeempirome otsipasato neantsi, tempa nantsipetashitaquearome. Nocoapinitaque namitacojeitimpi, tempa irootaque nocamantantimpirori caari pioti, irootaque niotacaantaquempirori. Tempa nocamantimpiro irineane Tasorentsi. Tempa noametaquempi. ⁷Te aneeji shiovirentsi, jaaviquirentsi, caari oni atiri. Ariorica osamejencataque, joa, joa, joa, te ayoteji paitarica oncantemeri. ⁸Pamene, itioyeeitiniri soraro iriotanteari irimanatea, tiii, tiii. Iro cantaincha ariorica osamejencataque, çariompa iriojeitaque irovetsicajeitaquea irimanatanteari? ⁹Aisati piquempetacaró. Ariorica pineanatashitearo caari iquemeetavaque, vero, vero, çjaoca incanteari inquemanteetavaquearori pincanterimeri? Tempa ari pantsipetashitaquearome pineaveeteme. ¹⁰Aca quipatsiqui ainiro oshequi neantsipee. Onashiyetanaca, iro cantaincha te incomijencatearóji yora ashitarori irineane. ¹¹Iro cantaincha terica anquemavaquero irineane neanavetachari, te irishanincateeeji, aisati te ashanincatearóji iriori.

¹²Tempa picoajeitaque omatacaajei-tempi Ishire Tasorentsi, ari pincoasanotaque meeca omatacayempi poametasanoteri piyemisantaririnte. ¹³Irootaque noncamantantempirori oca: ariorica pineanatero neantsi caari iojeiti, iro cantaincha pincanteri Tasorentsi iramitacotempi pimatantearori povaayeneri piyemisantaririnte picantavetacariri. ¹⁴Ariorica noneanatantari Tasorentsi neantsi caari noneanatapiniti, noquensatsatacavetacari noshirequi, iro cantaincha te nioteroji noncantayeterimeri. ¹⁵¿Paita nanteri narori? Ariorica nonquensatsatacayeri Tasorentsi, nonquensatsatacayeri noshirequi, iro cantaincha oncameetsate aisati nonquenshiretero paitarica noncanteriri. Ariorica nompampoyeaventero Tasorentsi, nompampoyeaventero noshirequi, iro cantaincha ocameetsati aisati nonquenshiretero paitarica nompampoyeaventaqueriri.

¹⁶Pamene, ariorica pinquenshiretaquea: “Icameetsasasanoti Tasorentsi”, iro cantaincha pincomitsatearorica pineane, ¿jaoca incanteari inquemantajeitearori yora iroaquera tsipajeitimpi? Eiro iotavaquerotsi paitapeerica pincanterimeri. ¹⁷Ariorica pimpasonquitasanoteri Tasorentsi, iro cantaincha terica onconijateji, tecatsi pincantea poameteri itsipapee. ¹⁸Nanaacojeitaquempi noneanatashitaro neantsi caari ioyeeti, irootaque nopasonquitariri Tasorentsi. ¹⁹Iro cantaincha ariorica ampatotimentajeiteari Tasorentsi, nonintasanotaque noneanatantearo noquemasanotaqueri, noametanteariri itsipapee. Ariorica noneanatashitearome oshequi neantsi caari iquemeeti, eiro ocameetsatime. Nantsipetashitearome, vero, vero. Cameetsataque noneanatero aparopee neantsi iquemajeitaqueri. ²⁰Meeca, noyemisantaririnte, eiro pishiiritsi

jananequi: pinquenshiretasanotanaquea. Eiro catsini piquenshiretirotsi caari cameetsatatsi: pinquempetajeari iroaquera timatsi, te inquenshireteroji iriori. Iro cantaincha ariorica pinquenshiretasanotanaquea, cameetsa pinquempeteari antearipee, timatsiri iotantari. ²¹Jero oca ocantiniri Sanquena-rentsi: “Icanti Avincatsarite: ‘Nocantavetacari joriopee, iro cantaincha te inquemisantenaji. Coajica nontianqueneri itsipapee atiri, nashitarori irineane, incamantaveteari, iro cantaincha aisati iriori, eiro iquemisantavaquenatsi’ ”. ²²Irootaque noncamantantempirori oca: ineanatashiyetacaro otsipapee neantsi iriojeitanteari caariquera quemisantatsi yoametaquee Tasorentsi. Te irineanatashiyeteneri quemisantatsiri iroameteri. Ocameetsati avameteri quemisantatsiri irineane Tasorentsi. Tequera avameteriji irinti caari quemisantatsi: tequera inquemeroji.

²³Pamene, noncamantempiro: pampatotimentajeitearica Tasorentsi, ariorica pineanatashijeitaquearo otsipapee neantsi caari iojeiti: vero, vero. Jeri inqueapee itsipapee atiri, caari quemisantatsi; tempa incantapaaque: “Jo, pamenerite yoca, itsaviataque”. ²⁴Iro cantaincha ariorica poametante aneanequi, ari inquemapaquero caari quemisantatsi, ariorica itsipapee atiri. Inquemapaquempi, iriotanteari te incameetsateji, otimi irantane. Onquenshiretacayeri maaroni iquemajeitapaquero. ²⁵Inquenshiretanajero maaroni imanavetacari ishirequi. Intiyeroashiteari Tasorentsi, impincatsateri. Incantempi: “Queario, itsipatasanojeitaquempi Tasorentsi”.

²⁶Pineaquero, noyemisantaririnte. Ariorica pampatojeitea, cameetsa impampoyee aparato, iroametante itsipa, incamantante pashini, itsipa irineanatero neantsi caari piquemajeiti, pashini

irovaajeneri quemisantatsiri icantaqueriri. Iro cantaincha, paitapeerica pantajeiteri, pantero poamejeitanteariri piyemisaririnte. ²⁷Intimerica neanantearoneri neantsi caari iquemeeti, cameetsa irineanate ariorica apite, ariorica mava: eiroquea oshequi. Eiro itsipatavacajaajtatsi irineanajeite. Irijivate aparo, impoiteri itsipa. Cameetsa intime ovaajenerine pishaninca icantaqueriri. ²⁸Terica intime ovaajenerine icantiriri, cameetsa irimajeretanaque, eiro ineanatashijeitatsi apatojeitainchari, irointi cameetsa irineanashirete ishirequi, aisati irineanateri Tasorentsi ishirequi. ²⁹Cameetsa iroametero irineane Tasorentsi, incarataque camantantatsineri apite, ariorica mava. Irintiquea itsipapee, inquenqueshiretasanojeitero icamantayetaqueriri. ³⁰Ariorica iroameteri Tasorentsi pashini savicatsiri caari iojeiveta, ocameetsati irimajeretanaque. Ariorica irivecarataquero yora jivatatsiri iquenquetsati, ari impoiji iriori iroametante. ³¹Cameetsa incamantacotero irineane Tasorentsi apaniro, impoiji aparo pashini, iriojeitanteari maaroni, inqimoshirejeitanteari. ³²Yora camantantirori irineane Tasorentsi, cameetsa irimajerete, ariorica ijivataque ineanataque itsipa. ³³Te incoyeji Tasorentsi onconoanatavacaaeye aneanepeteccatsi anquemantavaquearori, irointi icoaque amajerejeitanaque anquemajeitantearori.

Ariorica yapatotimentapinitari Tasorentsi maaroni yoameetsajeitiri, amejeitaca ³⁴tsinane omajerejeitaque. Te oshinetanteaji oneanate. Cameetsa onquemisante, tempa aitaque ocanti Sanquenarentsi. ³⁵Ocoirica iote paitapeerica, cameetsa osampiteri ojime anta ovancoqui. Te oncameetsateji oneanate pampatotimentajeitaririca Tasorentsi. ³⁶Pamene, te avirojei intearone poametantajeitero

irineane Tasorentsi. ¿Pijitaquempa apaniro piotiro? ³⁷¿Picarajeitirimpa camantantatsiri? ¿Picarajeitirimpa quemisantirori Ishire Tasorentsi? Nocoaque iriotavaquero iriori oca: oca nosanquenatimpiri, irootaque irineane Avincatsarite. ³⁸Eiorica iquemisantirotsi pishaninca oca, eiro piquemisantajeitiritsi iriori. ³⁹Meeca, noyemisaririnte, pincoasanojeite pincamanteri itsipapee irineane Tasorentsi. Iro cantaincha eiro pitsaneacotaritsi irineanayeetero neantsi caari piquemajeiti. ⁴⁰Poameetsatero paitapeerica pantayeteri. Te oncameetsateji pineanaveete: pimajerejeite maaroni, pinquemisanteri aparo neanatsineri.

Iquenquetsatacotaqueri Jesoshi, itinaantajari, aisati antinaantajeari arori.

15 ¹Meeca, noyemisaririnte, nonquenqueshiretacaajempiro aisati nocamantitaquempiri: tempa ocameetsataque, piquemisantitavacaro; irosati meeca picanta piotasanoti queariotaque, te ontseeantsiteaji. ²Irootaque oavisacojeitempineri, ariorica pincantatitempani pinquemisantasanotero. Iro cantaincha ariorica pinquemisantamempashitearo, eiro oavisacotimpitsi. ³Nojivati novaaquempiro oca icamantiteetaquenari: ainiro antajeitaqueri caari cameetsatsi, irootaque icamimentantajeitaqueri Quirishito. Imoncarataquero ocamantacotitariniri Sanquenarentsi. ⁴Yoiminqeetaqueri omoroqui. Ocarataque mava quitaiteri itinaantanajari aisati. Imoncarataquero aisati ocamantacotitariniri Sanquenarentsi. ⁵Inijaacari Sejashi, aisati inijaajeitajari yora iroamereni, icarataque 12. ⁶Impoiji inijaajeitajari oshequi ayemisaririnte, yapatotavacajeita. Yanaaquero 500 neajeitaqueriri. Aneatsiquera oshequi, iro cantaincha icamaarantaque aparopee.

⁷Impoiji inijaajari Santiago, aisati inijaajari maaroni itiancanepete. ⁸Impoita-

jana narori, inijaajana. Oquempevetaca impoiiji notimaque. ⁹Itiancaquena, iro cantaincha te nonquempeteariji itsipapee itiancane, te noncameetsateji: tempa noquisaveitarini maaroni quemisantiriri Tasorensi. ¹⁰Ineshinoncataquena Tasorensi, irootaque noquempetantajari meeca. Te irantsipetashiteaji ineshinoncataquena. Ipomerentsiventajari Tasorensi itsipapee yora itianquiri, iro cantaincha nanaacojeitajiri nainti, nopomerentsiventasanotajari. Te nomatashitearoji narori, irointi ineshinoncataquena, nomatantacaroni. ¹¹Ariorica noquenquetsatacaajeitimpipi, iriorica itsipapee itiancane quenquetsatacaajeitimpipi: te ompashiniteji. Aitaque omoncaratavacaaca nocamantajeitimpipi: ariorica piquemisantaquero, aitaque pavisacotaje.

¹²Pamene, nocamantajeitaquempi: “Icamaque Quirishito, itinaanaja aisati”. Piquemisantajeitavaquena. ¿Paitasa picantaarantancari te itinaaajeji camayetaintsiri? ¹³Eirome itinaajame camaintsiri, eirome itinaajame iriori Quirishito. ¹⁴Eiroricame itinaajame, natsipetashitacarome nocamantantayeti, patsipetashitacarome avirori piquemisantajeitaque. ¹⁵Aisati piotaqueme notseeayacotacari Tasorensi. Pineaquero, tempa nocamantacotaqueri: “Yoitinaajiri Quirishito”, iro cantaincha eirome itinaajame camayetaintsiri, eirome yoitinaajirime iriori. ¹⁶Eirome itinaajame camaintsiri, eirome itinaajame Quirishito iriori. ¹⁷Eirome itinaajame, patsipetashitajitacarome piquemisantajeitaque; ainrome ontimimotempime caari cameetsatsi, ¹⁸aisati incanteanime irijatapiniteme Sharincaveniqui camajeitatsiri, aisatime iriori yora quemisantajeivetariri Quirishito. ¹⁹Aisati arori, eirome atinaajame, atsipetashitacarome aquemisantavetacari meeca Quirishito, avashinoncaasanotaqueame, anaacojeita-

querime maaroni atiri ashinoncaajeitachaneri.

²⁰Iro cantaincha itinaasanotaja Quirishito, ijivajeitaqueri maaroni pashini camajeitatsiri. ²¹Timatsi yantaqueri yora Aran, irootaque acamajeitancari meeca. Aisati iquempetacari, timatsi yantaqueri iriori itsipa shirampari, yora Quirishito, irootaque antinaajeitantajeari. ²²Ashanincajeitacari Aran, irootaque acamajeitancari. Aisati oquempetaca, ashanincajeitacari Quirishito, irootaque iroaneajeitantajeeri. ²³Ijivajeitaqueme iriori. Impoiiji, ariorica impocaje, intinaajeitanaje maaroni quemisantajeitiriri. Aitaque oncanteari: ariorica omoncarataquea, antinaajeitanaje, maaroni. ²⁴Impoiiji irivecarayero maaroni, impoyereajeri Quirishito maaroni caari pincatsatiri: pincatsarijeivetachari, jivatacantantavetachari, savicacaantatsiri, maaroni. Incanteri Tasorensi: “Meeca, Apa, pimpincatsariventero avinti maaroni timajeitatsiri”. ²⁵Impincatsariventante Quirishito irosati intsoncajeitantajeari maaroni quisajeivetacariri. ²⁶Impoiiji eiro icamajitsi aisati atiri. ²⁷Ocantini Sanquenarentsi: “Ipeaqueri Tasorensi Quirishito pincatsariventiriri maaroni timajeitatsiri”. Tempa ocanti: “Maaroni timajeitatsiri”, iro cantaincha eiro ipincatsariventiritsi Iriri: tempa iriotaque peaqueriri pincatsari. ²⁸Coajica aitaque iranaacojeiteri Quirishito maaroni timajeitatsiri, impincatsariventajeiteri maaroni. Apaniro irinti Iriri, tecatsi incanteri impincatsariventero irinti. Incanteri: “Apa, aviro nopincatsati, panaacojeitana maaroni, pipincatsaritanotaque avinti”. Queario, Tasorensisanori ini irinti, pincatsarisanori ini.

²⁹Pamene, timatsi vaotisantimentariri camaintsiri. Eirome itinaajame camaintsiri, tempa irantsipejitearome. ³⁰Aisati,

eirome atinaajame, tempa nantsipetashi-tearome nopomerentsiventapinitaro noquenquetsati. ³¹Piquemisantajeitaqueri Avincatsarite Jesoquirishito, irootaque noveshireimentantajeitaquempiri: queario oca nocantaquempiri. Aisati oquempetaca, queario oca noncamantempiri: te nioteji jaocarica oncarate iroimenteenaro noquenquetsati. Maaroni quitaiteri timatsi coavetachari iroimentero. ³²Anta Ejesoqui iquisasantaquena savicayetsiri, oshequi opomerentsitomaquena. Oquempetomovetaquena noipiavajiri maniti oyenanemeri. Oshequi opomerentsitaca. Pamene, eirome atinaajame, tempa nantsipetashitaquearome. Eirome atinaajame, eirome aquenqueshiretirime Tasorentsi: tsame avajeitea, tsame ashinqueitea; impoiiji ancamaque, ari acarati. ³³Eiro pishinetiritsi tseencantatsiri iramatavitempi. Tempa queario icanteeti: “Eiro quiso poiritsi tseencantatsiri: yantacaimpirocaari cameetsatsi”. ³⁴Pinquenqeshireempa, eirome papiitajirotsi aisati caari cameetsatsi. Picaratapinijetiri caari iojetiri Tasorentsi: ¿paita caari pipashiventanta?

³⁵Ariorica irisampitee tseencantatsiri: “¿Jaoca incanteari intinaantanajeari camaintsiri? ¿Jaoca oncanteari ivatsa, ariorica intinaaje?” ³⁶Te inquenqeshireempaji. Eirorica opanquitatsi oitsoqui quipatsiqui, eirome oshioquitsi. ³⁷Ariorica ampanquitero oitsoqui, te ampanquitero ovatsa, ominca, oshi, maaroni: atsatairo ampanquitero oitsoqui. Ariorica ampanquitero arori tirico, ariorica pashini oitsoqui, ³⁸iro cantaincha itimacaaquero Tasorentsi ovatsa, ominca, oshi, maaroni; imataquero inintacaaquerori. Tirico oitsoquitacairo oitsoquisanori iroori. Caniri otimi ovatsasanori iroori. Aisati oquempetaca maaroni shiocayetsiri. ³⁹Te irimoncaratavacaajeiteaji maaroni timajeitatsiri. Ainiro atiri, inashita iriori poshiniri. Inashita aisati vanquitachari.

Inashita aisati shima. ⁴⁰Ainiro timatsiri quipatsiqui, aisati timatsiri inquitequi. Icameetsajeitaque, iro cantaincha inashiye-taca, te irimoncaratavacaajeiteaji. ⁴¹Iporei catsirincaiteri. Inashita yora cashiri, iquitasanteti irinti. Inashita aisati yora impoquero, iquitaporoquiti. Aisati inashijetaca impoquero: aparo quitasantevetachari, yorari pashini, te.

⁴²Aisati ashiaquero arori, ariorica antinaanaje: eirome aquempetajatsi meeca. Intijeete, ari ampatsajeitanaque. Antinaajerica, eirome apatsajitsi aisati. ⁴³Te oncameetsateji oca intijeeterica, iro cantaincha oncameetsatanotaque tinaajanchaneri. Meeca te ashintsiteji, irompa antinaajerica, ashintsitanotanaje. ⁴⁴Oca avatsa itijeetiri, tempa ametacaro quipatsi atimajeitanto. Ariorica antinaanaje, onashitanajea avatsa, ametantapaajearori asavicajeitapaaje anta inquitequi. Otimi avatsa quipatsiqiniri, ontimaje coajica aisati savicajantsineri inquitequi. ⁴⁵Ocanti Sanquenarentsi: “Aneatsiri inaveitani yora jivataintsiri shirampari, yora Aran”. Irinti yora impoitiriri, yora Quirishito, oaneantatanotsiri ini, ainiro itasorenca irinti. ⁴⁶Tempa ojivataque meeca oca avatsa asavicantacari aca quipatsiqui; coajica ontimaje avatsa iroaqueratajantsineri, savicajantsineri inquitequi, irointi. ⁴⁷Iponeaca yora jivataintsiri Aran quipatsiqui, oshanincataro ivatsa quipatsi. Yora apitetapaintsiri iponeaca inquitequi. ⁴⁸Isavicaveitani quipatsiqui Aran, aisati aquempetacari maaroni timajeitatsiri aca quipatsiqui. Isaviqui inquitequi itsipa, aisati anquempetacari maaroni jatatsineri inquitequi. ⁴⁹Aisati oquempetaca: ashiajeitaquero meeca ivatsa yora quipatsisati, coajica ashiapajero ivatsa yora inquitesati.

⁵⁰Irootaque, noyemisantaririnte, noncamantantempirori oca: tecatsi oncantea

oca avatsaca ojate anta ipincatsaritinta Tasorentsi, tempa ompatsaye. Tecatsi oncantea ojate anta te impatsaajeitenta savicajeitatsiri. ⁵¹Pamene, noncamantempiro oca manavetachari: eiro acamajeititsi maaroni, iro cantaincha ampashinijeitana maaroni. ⁵²Ari intioyeete, ayojeitanteari omoncarataca. Intsipaita ampashinijeitanaque, oquempetaca amatsioqui aparo, ari omataca, matsio. Intioyeete, irosati irointinaantajeitajeari Tasorentsi maaroni camajeivetainchari; eiro ipatsaajeitajitsi aisati. Aitaque, ampashinijeitanaque maaroni. ⁵³Ashi airo apatsaajeiti, iro cantaincha eiro apatsaajeitajitsi aisati. Ashi airo acamajeiti, iro cantaincha eiro acamajeitajitsi aisati. ⁵⁴Ompatsaajeitanaque oca avatsaca maaroni, iro cantaincha ontimaje avatsa caari patsaanetajantsine. Ancamajeitanaque maaroni, irompa coajica, eiro acamanejeitajitsi. Impoiji omoncarataquea oca isanquenayeetiri: ⁵⁵“Ariove. Eiro apiitajatsi ancamajeitaje aisati. Eiro aquenqueshiretajatsi ancame. Cameetsave. Meeca eiro atsaroacaajeitarotsi ancame”. ⁵⁶Ariorica antayetero caari cameetsatsi, ari antsaroacaaquearo ancame. Timatsi aisati isanquenare Moishishi, camantaqueeri: “Ainiro pantane”. ⁵⁷Irio oavisaacojeitaqueeri Avincatsarite Jesoquirishito. Ariove. Cameetsa ini Tasorentsi. Eiro atsaroacaajeitarotsi ancame. ⁵⁸Irootaque, noyemisantaririnte nonintasanotiri, noncamantantempirori oca: pinquearioventeneri Avincatsarite paitapeerica panteneriri, eiro piperashireatsi, pincantatiyempani pinquearioventero. Piojeitaque eiro patsipetashitarotsi pimpomerentsiventeari.

**Yapatotiniri quemisantatsiri
jerosaresati iirequite.**

16 ¹Meeca nonquenquetsatacoteri quirequi pampatoteneri ayemisantaririnte ashinoncaajeitachari anta Jerosarequi. Oca nocamantimpiri,

nocamantaqueri aisati quemisantatsiri anta Carashiaqui. ²Maaroni tomincoqui ocameetsati pampatotapiniteneri jerosaresati piirequite, pinquemoyeneri. Jaocarica incarate piirequite, pinquemoyearanteneri. Pintearo pampatotiteanari meeca, opomerentsitimotimpicari ariorica nareetapaaquea. ³Aisati nocoaque pincoyeitea aanajenerine. Ariorica nareetapeempa, nosanquenate-neri jerosaresati, iriotantavaqueariri. Irosati antiancanteari Jerosarequi. ⁴Pincoajeiterica nojate narori, ari nontsipajeitanaqueari.

⁵Coajica nojate noneajeitempi, iro cantaincha nocoaque nojatapainte Maseroniaqui. ⁶Ariorica osamani nosaviquimojeitempi, ariorica nosarintsitacotaque. Impoiji pincavintsaajeitavaquena, jaocarica nojateri aisati. ⁷Ariorica noneapaajempi, te noninteji noshintsitanaque navisanakuempi. Nocoaque osamani nosaviquimotanaquempi, irishinetarica Avincatsarite. ⁸Nosavianaquetsita aca Ejesoqui, irosati omoncaratanteari Pentecoshiteshi. ⁹Icoacaajeitaviquena oshequi nonquenquetsatacaajeitanaqueri. Oshequi iquemisantajeiti. Itimi aisati oshequi quisajeitakenari.

Ivetsajeitacari iyemisantaririnte.

¹⁰Irareetapeempirica Timoteo, pineshinoncaajeitavaqueri. Tempa iquempetaviquena narori, oshequi yantaveetiniri Avincatsarite. ¹¹Eiro pitseencavaqueritsi. Ariorica omoncaratapaaquea impiaje aca, aisati cameetsa pineshinoncatavajeri, cameetsa irareetitantajeari aca. Noyeaqueri, aisati itsipapee ayemisantaririnte. ¹²Aisati nocantavetacari ayemisantaririnte, Aporo. Nocantasanovetacari irijateme irineempime, intsipatearime itsipapee quemisantatsiri. Te incoyeji irijate meeca. Ariorica coajica irijatanaque.

¹³Paamayeariyea, yamatavitimpicari. Pinquearioventajeitero pinquemisantasa-nojeite. Eiro pitsaroajeititsi. Pishintsiven-teneri Tasorentsi maaroni. ¹⁴Tsame anintajeiteri ashanincapee, paitapeerica anteneriri. ¹⁵Piojeitiri, noyemisantari-rinte, yora Eshitejana aisati ishaninca iriori. Ijivajeitiri Acayasati iquemisanta-jeiti. Iquearioventaquero icavintsaajeitiri maaroni ayemisantaririnte yoameetsan-tiri Tasorentsi. Tecatsi canterine, iotashitaca icavintsavacaajeitaca. ¹⁶Ipomerentsitaca yamitacotasanojei-timpi, paitapeerica yantayetimpiri. Nocoaque pinquemisantajeitavaqueri iriori, aisati pinquemisantajeitavaqueri maaroni quempejeitariri. ¹⁷Noveshirei-mentavacari yora areejeitachari: yora Eshitejana, Jorotonato, aisati Acaico. Ainirojeitatsi aca, oquempetimotaquena avirojeitaquerica tsipajeitaquenari aca. ¹⁸Iquimoshiretacaquempi chapinqui, meeca iquimoshiretacaapaquena narori.

Cameetsa pineacameetsajeitavaqueri iriori.

¹⁹Yovetsatasanojeitaquempi maaroni apatotimentariri Tasorentsi aca Ashiaqui. Aisati yovetsajeitimpi Aquira aisati iroori Pirishira, aisati maaroni apatotapinijeitachari anta ivancoqui. Tempa iriojeitaque quemisantajeitiriri Avincatsarite. ²⁰Yovetsajeitaquempi maaroni ayemisantaririnte. Ariorica povetsatavacaaquea, cameetsa paacameetsatavacaajeitea. ²¹Narotaque Pavoro vetsajeitimpiri. Narotaque sanquenajeitimpirori. ²²Irijeteta Sharincaveniqui maaroni caari ninterine Avincatsarite. Pishintsite, Novincatsarite, pimpocaje. ²³Cameetsa irineshinoncajeitempi Avincatsarite Jesoshi. ²⁴Tempa aquemisantajeitiri Jesoquirishito, irootaque meeca nonintasanojeitantimpiri.

Narotaque sanquenajeitimpirori oca: *Pavoro*

YORA PAVORO YAPIITAJINIRI AISATI ISANQUENATAJINIRI CORINTOSATI

Yovetsajeitacari.

1 ¹¿Ainirampi corintosati? Narotaque aca Pavoro sanquenajeitimpirori. Peerani itiancaquena Jesoquirishito noquenquetsatacotaqueri, irootaque inintacaquenari Tasorentsi. Notsipatari aca ayemisantaririnte Timoteo nosanquenajeitimpi. Nosanquenajeitimpiro maaroni quemisantajeitatsiri ara corintotqui aisati Acayaqui. ²Nocoaque irineshioncajeitempi Apa Tasorentsi, aisati cameetsa irisavicacaajeitempi. Nocoaque aisati inquempetaquempi iriori Avincatsarite Jesoquirishito.

Tsame aveshireimentajeiteari Tasorentsi.

³Tempa icameetsatasanotaque Tasorentsi, yora iriri Avincatsarite Jesoquirishito. Iriotaque neshinoncajeitaqueeri, veshireacaajeitaqueeri. ⁴Ariorica ashinoncaajeive-taca tempa yoveshireacaajeitaquee. Pamene, intacaro yoveshireacaajeitaquee arori, ayojeitancari aveshireacaajeiteari yora itsipapee ayemisantaririnte, ariorica irashinoncayea iriori. ⁵Ariorica oshequi anquematsicatimenteari Quirishito, oshequi aisati iroveshireacaajeitaquee. ⁶Iro noquemaatsicatantacarori nocoaque oshequi piveshireimentajeiteari Tasorentsi, aisati poavisacojeitanteari. Ariorica noveshireimenteari, nocoaque aisati piveshireimenteari avirori: piojeitaque ariorica pinquematsicatearo paitapeerica,

iroveshireacaajeitempi pamavetantearori. ⁷Niotasanotaque ariorica pinquempejeitena pinquematsicatearo avirori paitapeerica, aisati pinquempejeitena piveshireimentajeiteari Tasorentsi.

⁸Nocoaque piojeite, noyemisantaririnte, oshequi catsini noquematsicayetacaro anta Ashiaqui. Oshequi nashinoncaaca, te capichaji. Nojivetaca ari noncamaque.

⁹Queario, niotaque tecatsi noncantea noavisacotajea narosati, irootaque naventantacariri Tasorentsi. Apaniro irinti imataquero yoavisacotaquena: tempa aisati imatiro yoitinairi camaintsiri. ¹⁰Ari yoavisacotaquena, caari nocamanta; aitaque iroavisacotajena aisati, niotaque incanteani iroavisacotapinitena. ¹¹Pamitacojeitena, pincanteri Tasorentsi iramitacotena. Impoiiji, ariorica iriojeite itsipapee iquemisantaquempi Tasorentsi, yoavisacotaquena, oshequi iriveshireimentajeiteari Tasorentsi iriori.

Yora Pavoro icantiri corintosati: “Tsame aveshireimentavacaajeitea”.

¹²Ari yamitacotaquena Tasorentsi, ineshinoncataquena, irootaque noquearioventantanariri nantaveetiniri. Te niotashiteaji paitarica nantiniriri, iro cantaincha yoametaquena iriori ocameetsatantari nomayetaqueneri. Niotaque pineacameetsataquero nantayetaqueri, aisati iquempetaca itsipapee atiri,

irootaque noquimoshiretantacari. ¹³Te ompomerentsiteaji pineanatero oca nosanquenatimpiri, aisati te ompomerentsiteaji piojeitavaquero. Nocoaque piotasanojeitavaquero. ¹⁴Capichaji piquemavetacaro nocamantaquempiri peerani, aisati capichaji piquemisantavaquena. Ariorica impiapaaje Avincatsarite Jesoshi, noveshireimentajeitempi, iro cantaincha nocoaque pinquemasanotero nocamantitaquempiri piveshireimentajeitantenari meeca.

Irijateme Pavoro irineerime corintosati.

^{15,16}Ari niotaque piveshireimentavetaquena, pineacameetsavetaquena, irootaque noquenqueshireantavetacari noneajantempime. Nojivajeitempime noneajeitanajempime, impoiji novaanaqueame anta Maseroniaqui. Impoiji noneapaajempime aisati, impoijiquea novaanaajeame Joreaqi. Apite aveshireimentavacaajeiteame. ¹⁷¿Ariompa nocoaque namatavitempi? ¿Noquempetacarimpa amatavitantatsiri cantashitachari: “Ari”, aisati: “Eiro”? Te nonquempeteariji. Te noncoyeji nainti namatavitempi. ¹⁸Tempa queariotaque icantiri Tasorentsi, te iramatavitanteji. Aisati narori, te noncantapinitempiji: “Ari nomataquero”, impoiji: “Eiro nomatirotsi”. ¹⁹Ari nocarataqueri Shirivano, jeri Timoteo nocamantajeitaquempi jaoca icantari Jesoquirishito, yora Itomi Tasorentsi. Te incanteji iriori: “Ari nomataquero”, impoiji: “Eiro nomatirotsi”. Apatiro icantapiniti: “Ari nomatasanotero”, impoiji imataquero. ²⁰Queario imajeitaqueenero maaroni icantaqueeri Tasorentsi. Irootaque nocantajeitantariri maaroni atiri icameetsataque, impincatsajeitantariri iriori. ²¹Aquemisantajeitaqueri Quirishito, irootaque itasoncaventantaqueeri Tasorentsi ashanincatavacaajeitancari. Aisati timatsi icoacaajeita-

queeri antajeiteri, maaroni. ²²Itasoncaventajeitaquee maaroni, aisati itiancaqueero Ishire quiso oajeitantaqueeri. Meeca ayojeitaque eiro yojocajeiteetsi.

Icamantajiri paita caari ijtanta irineajeri.

²³Iro caari nojatanta noneajempiri peerani, te noncoyeji nonquenquejaimentempiro pantajeivetacari, te noncoyeji noashiretacaajeitempi. Ioti Tasorentsi te nontseeyaji. ²⁴Te noncoyeji noncantapinijeitempi pinquemisantajeitena, tempa piquemisantasanojeitaqueri Tasorentsi. Irointi nocoaque noveshireacaajeitempi, maaroni.

2 ¹Noquenqueshiretaque: “Eiro meeca nojatitsi noneeri yora corintosati. Napiitacaajiricari noashiretacaajeari, aisati noashiretacotaricari narori”. ²Ariorica noashiretacayempi, tempa aisati narori noashiretacojeitempi. Impoiji, ¿janica veshireacaajeitenaneri? Ariorica noneajeitajempi piveshireajaitanajea, ari noveshireanajea narori. Irompa eirorica piveshireajatsi, eiro noveshireajatsi narori. ³Peerani nosanquenatantimpirori noshintsitsajeitaquempi pojocajeitantarori caari cameetsatatsi pantajeitaqueri. Te noncoyeji noashiretacojeitempi, irointi ocameetsati noveshireacojeitempi. Niotaque ariorica pineajeitavaquena nonquimoshiretapaaque, ari piveshireimentajeitavaquena avirori. ⁴Peerani nosanquenajeitantaquempironiri, oshequi noashiretacojeitaquempi catsini, oshequi niracojeitaquempi. Iro cantaincha te noninteji noashiretacaajeitempi, irointi nocoaqueni piojeite oshequi nocavintsajeitaquempi catsini.

Icantiri Pavoro: “Pincavitsaajeri yora antaveitaroniri caari cameetsatatsi”.

⁵Queario noashiretacovetacari yora aavetarori iashiane, iro cantaincha tempa

avirojeitaque oashiretasanotainchari. ⁶Ari poasanquetaajeitaqueri yora aavetarori iashiane, irootaque yojocantajarori yantaveitaniri, meeca moncaratata. ⁷Meeca eiro piquisajiritisi aisati, irointi pincavintsaajeiteri. Piveshirecaajeiteari, te aninteji aiquero irijatatiye iroashiretasanotanaquea catsini. ⁸Nocoaque meeca piotacayeri queario picavintsaasanojeitaqueri. ⁹Irootaque nosanquenatantimpirori peerani: nocoaqueni noneantajeitaquempi. Nocoaqueni niote queariorica piquemisantsanotaquena. ¹⁰Janicarica picavintsaajeitiri, aisati narori noncavintsayeri. Ariorica irantimojeitaquee ashaninca caari cameetsatatsi, icoaque Quirishito eiro aquishmentiritisi, aisati icoaque ancavintsaajeiteri. Irootaque nocavintsantacariri. Aisati avirori, nocoaque paacameetsatavacaajeitea. ¹¹Aisati te noncoyeji irantacaajeiteero Satanashi caari cameetsatatsi. Niotaque oshequi icoaveta iramatavijeiteeme.

Icamantaquee Pavoro paita ipasonquitantiriri Tasorentsi.

¹²Ari chapinqui nareetaca Toroashiqui, nocamantajeitaqueri savicayetsiriri jaoca icanta Quirishito yoavisacotanti. Oshequi yamitacotaquena Avincatsarite, oshequi yaacameetsajeitaquena savicajeitatsiriri, oshequi iquemisantajeiti. ¹³Nocoaveta-paacari Tito, iro cantaincha te noneeriji. Oshequi noquenqueshiretaqueri, irootaque novaantanajari Maseroniaqui. ¹⁴Ari nocantani narori nopasonquitapinitiri Tasorentsi. Aquemisantaqueri Quirishito, irootaque itasoncacoventajetantaqueeri, imatacaajeitantaqueerori maaroni icoacaajeitaqueri. Meeca iotacojeitaqueri maaroni savicajeitatsiriri. ¹⁵Ari aquemisantajeitaqueri Quirishito, aisati ashanincajeitacari, irootaque inecameetsajeitantajeeri Tasorentsi. Acarajeitaqueri savicatsineri inquitequi,

aisati jatatsineri Sharincaveniqui.

¹⁶Avamejeivetari aparopee, iro cantaincha itseencajeitaquee, irootaque irijatan-teari iriori Sharincaveniqui. Yora itsipapee avamejeitaqueri, ari iquemisantajeitaquee irinti, irootaque irijajeitan-teari inquitequi. Incantaitiyempani irisavicajeite cameetsa. Oshequi noquenqueshiretasanotaquerove: ashinetiricari irijajeite Sharincaveniqui. Eirome yamitacotaname Tasorentsi, eiro nomatirome nonquemisantacaajeiteri itsipapee. ¹⁷Ainiro oshequi oametantashijeivetarori irineane Tasorentsi iraan-teariri quirequi. Te nonquempeteariji nainti. Itiancaquena Tasorentsi noametantero irineane, iotaque nocoasanotaque noametantero. Aisati yamitacotaquena Quirishito.

Iquenquetsatacotiri iotacairiri atiri cameetsa yoametanti.

3 ¹Ari pineanatavaquero nojivataquempiri nosanquenataquempiri. ¿Pijitaquempa meeca oshequi noshemeti narori? ¿Picoaquempa intime pashini sanquenatacotenaneri camantempineri nocameetsatirica? Aisati narori, te noncoacayempiji pisanquenatacotena, pincamanteri pashini ashaninca nocameetsataque. ²¿Paita noncoantearori? Iojeitaque atiri oshequi noquenqueshirejeitaquempi, oshequi nocavintsaajeitaquempi. Iojeitaque iriori te namatavijejitempiji. ³Te pisanquenatacotenajipi paperiqui, iro cantaincha noquemisanta-caajeitaquempi, aisati oameetsataquempi Ishire Tasorentsi, yora aneasanotatsiriri. Meeca ioshirejeitaquena atiripee queario itiancaquena Quirishito, te namatavitan-teji.

Yamitacotaqueri Tasorentsi Pavoro imayetaquero icantaqueriri.

⁴Niotaque queario oca nocamantajeitaquempiri. Noquemisantaqueri Quirishito,

irootaque yamitacotantanari Tasorentsi nomayetaquero nocantaquempiri. ⁵Te nomatashitearoji apaniro, irinti Tasorentsi matacaaqueenarori. ⁶Iriotaque iotacaanari jaoca icanta meeca yoavisacotanti. Peerani otimini isanquenare Moishishi camantajeiteeri paita icoacaaqueeri. Iro cantaincha eirorica amoncarajeitirotsi, ajate Sharincaveniqui. Iro cantaincha iroaquera meeca itiancajeiteero Tasorentsi Ishire, aajeitanajeeneri asavicantajeiri anta inquitequi. ⁷Peerani intacaro Tasorentsi, isanquenataquero mapi. Ineantacariri Moishishi, oshipaquireanaque ivoro, shipaquirerere; impoiji yoirincapaaja. Ari ineantajeitavajariri ishaninca opeavetanaja ishpaquirei, iro cantaincha te irimajeiteeroji iramenavoro-jeitajeri: irosati icanta yatsioquintaqueri. Ari maaroni caari moncaratiro ocantiri isanquenare ijajeitaque Sharincaveniqui. ⁸Ari isanquenatantarori Tasorentsi mapi, oshipaquireanaque ivoro Moishishini, yoanaque cavaco, aisati yoajeitanaque cavaco maaroni ishaninca. Meeca ainiro Ishire Tasorentsi, quiso oajeitaquee, aisati coajica osavicaaajeitajee anta inquitequi. Tempa aitaque avasanojeitapaaque cavaco, sorerere. ⁹Yora caari moncaratiro ora sanquenarentsi yamaqueri Moishishi irijajeite irinti Sharincaveniqui, iro cantaincha ishpaquireacaaquero Tasorentsi ivoro Moishishi. Iro cantaincha ayojeitaque meeca yoameetsajeitaqueri Tasorentsi maaroni quemisantajeitiriri, ayojeitaque corajica aneajeitajeri anta inquitequi irishpaquireacotasanojeitajee. ¹⁰Peerani aneameetsajeivetaro isanquenare Moishishi, iro cantaincha meeca te aneameetsasatanotajearo. Timatsi meeca cameetsasatanotatsiri catsini: yoameetsajeitaquee Tasorentsi, asaviquimojeitapaajeri anta ocameetsaite-tinta catsini. ¹¹Ocameetsavetaca isanquenatiniri Moishishi, iro cantaincha eiro

ocantaitatiani onttime. Irisavicacaasano-jeitajee Tasorentsi inquitequi, ancantaitatiyempani: tempa ocameetsasatanotaque irointi, catsini.

Iotacaajeitaquee Avincatsarite, te incoyeji intime amatavijeiteeneri.

¹²Ari ayojeitaque queario asaviquimo-jeiteri Tasorentsi, irootaque caari apashiventanta aquenquetsatacaajeitaqueri atiri. ¹³Te anquempejeiteariri Moishishini, ipashicavorotaca irinti: te incoyeji irineajeiteri ishaninca ompeana-jea ishpaquireavorovetaca. ¹⁴Iro cantaincha te inquenqueshireajeiteaji joriopee. Icantani ineanatapinivetaro isanquenare Moishishi, iro cantaincha te iriotacoteroji. Apatiro Quirishito matirori iriotacaajeiteri. ¹⁵Queario, irosati icantajeita meeca. Ariorica irineanatero isanquenare, te iriotacoteroji: tecatsi incantea inquemero. ¹⁶Iro cantaincha ariorica iraventeari Avincatsarite, iriotacayeri eiro yamataviantajatsi irisati; irointi iriotasotanana-que. ¹⁷Ainiro Avincatsarite Ishire, oamejeitaquee eiro apomerentsiventiro isanquenare Moishishi. ¹⁸Meeca tecatsi amatavijeiteeneri, irointi timatsi ayojeitiri. Ayojeitaque icameetsasatanota-que Avincatsarite. Otasoncaventajeita-quee Ishire anquempejeitanteariri. Meeca aquempejeivetacari capichaji. Acantani apashinitapinitanaque. Coajica anquem-petasanojeitapaajeri, ancameetsasano-jeitapaaje.

Cameetsa iquenquetsatacotiro Pavoro irineane Tasorentsi.

4 ¹Tempa icavintsaaajeitaquee Tasorentsi, irootaque itiancantanari nonquenquetsatacayeri atiripee. Meeca eiro nojocajirotsi. ²Te noninteji namata-viteri ashanincapee: te incameetsateji yora pashini amatavijeitiriri. Te nompashiniteroji irineane Tasorentsi,

aisati te noncamantashiteariji atiri ocameetsayetaque icoayetiri iriori: namatavitiricari. Irointi queario noamejeitaqueri atiri. Piojeitaque, aisati iotaque Tasorensi queario oca nocantaquempiri. ³Intimerica caari iotatsi jaoca incanteari iravisacotantajeari, iriojeitaque jatatsineri anta Sharincaveniqui. ⁴Yamatavitaqueri Satanashi caari imatantaro iriote. Tempa iriotaque ivincatsarite maaroni tseencantatsiri. Te incoacayeriji iriote jaoca incanteari iravisacotaje; te irinintacayeriji iriojeite oshequi ipincatsariti Quirishito, Tasorensi ini. ⁵Te naro quenquetsacotachane, irinti Avincatsarite Jesoquirishito noquenquetsacotiri. Noquemisantaqueri irinti, irootaque nocoantacari nintacojeitempi. ⁶Peerani, yovetsicantarori Tasorensi quipatsi, otsiteniveitani, iro cantaincha icanti: “Onquitaitetanaque”. Ari oquitaitetanaque, irootaque meeca amenajeitanti paitapeerica. Aisati meeca iotacaajeitaquee jaoca icantari Quirishito, ayotantacari oshequi ipincatsaritaque Tasorensi.

**Irio Tasorensi matacaaqueeri
aquenquetsati.**

⁷Te noshintsivatsateji narori, aisati nojoquuitapinitaca piojeitantacari tecats catsini nomate apaniro, irinti Tasorensi matacaaqueenarori noquenquetsacotiri. Irootaque ocameetsatantari pimpincatsajeiteri, eiroquea pipincatsatashitanatsi narori. ⁸Oshequi yoashinonqueetaquena, iro cantaincha te irojocayeenaroji noquenquetsati; oshequi noquenqueshiretaque, iro cantaincha te noashireteaji. ⁹Oshequi iquisheetaquena, iro cantaincha te irojoquenaji Tasorensi; ipasanatapiniyeetaquena, iro cantaincha te iroyenaji. ¹⁰Oquempetaca peerani itimi oshequi coapinivetainchari iroyerime Jesoshi, aisati itimi oshequi coapinivetachari

iroyename narori. Apaniro Jesoshi yoavisacotapinitaquena, iojeitantacari atiri aneanaji ini. ¹¹Queario, ariorica anquemisanteri Jesoshi, aitaque incantajeiteari, incoajeite iroajeitee. Coajica, ari ancamaajeitaque, iro cantaincha maaroni neajeitaqueeri meeca iojeiti aneasanotaji ini Jesoshi. ¹²Noquenquetsati, irootaque icoanteetacari iroyena; iro cantaincha piquemisantajeitaque, irootaque pintimajeitanteari anta inquitequi, pincantaitatiyempani.

¹³Tempa isanquenatini peerani yora ayemisantaririnteni: “Noquemisantaque, irootaque noquenquetsacantariri noshaninca irineane Tasorensi”. Aisati noquempejeitacari narori: noquemisantaque, irootaque noquenquetsacantajeitaquempiri. ¹⁴Ayojeitaque ainiro yora oitinaajiriri Avincatsarite Jesoshi. Coajica irointinaasanojeitajee arori, antsipajeiteari Jesoshi. Impoiji quiso avajeitanajeri iriori. ¹⁵Oshequi noquematsicatimentajeitaquempi, ineshinoncajeitantajimpiri Tasorensi: aisati irineshinoncajeiteri itsipapee atiri. Impoiji pimpasonquijeiteri maaroni, pincantajeite: “Tempa icameetsati Tasorensi”. ¹⁶Meecari, meeca, oshequi amaojeitaque, coajica anteashipajeitanaque, ancamajeitanaque; iro cantaincha eiro aquenqueshireajeitirotsi. Tempa icantani Tasorensi iveshireacaajeitaquee maaroni quitaiteriqui. ¹⁷Meeca capichaji yoashinoncaajeitaquee tseencantatsiri, iro cantaincha te antsipetashiteaji ashinoncaaca. Capichaji aneaquero meeca, iro cantaincha ioti Tasorensi, impoijiquea cameetsa irisavicacaajeitajee anta inampiqui. Ancantaitatiyempani asavique cameetsa, eiro oquempetajatsi aca. ¹⁸Eiro aquenqueshiretasanojeitirotsi pomerentsiyetachari aisati timayetsatsira aca quipatsiqui. Coajica tempa ompeajeitanajee maaroni aneajeitaqueri aca. Irointi

anquencheshiretasanotero caari
aneapiniti meeca: ora timajeitatsiri
inquitequi. Eiro opeajatsi irointi.

**Iquenquetsatacotiro
aquimoshirejeitantajari.**

5 ¹Ayojeitaque ariorica ancamaajeite aca,
antimajeite inquitequi. Ontime avatsa
cameetsari irovetsicajeeneri Tasorensi, te
irio atiri vetsicajeerone. Ancantaitiyem-
pani asavique anta. ²Aca quipatsiqui
oshequi meeca ashinoncaapinijeitaca aisati
oshequi aquencheshirejeitaque; oshequi
acoajeitaque onttime avatsa iroaquerari anta
inquitequi. ³Eiro apatiro onttime ashire,
irointi onttime aisati avatsa. ⁴Meeca oshequi
aquencheshirejeitaque: te ancoajeiveteaji
ajocajero oca avatsa, iro cantaincha
acoasanotaque avatsa iroaqueratajantsineri.
Acoaque ampashinitanaje ontimanteari
avatsa caari tsoncanetajanchane. ⁵Iriotaque
Tasorensi tasoncaventajeitajeeneri ontiman-
teari pashini avatsa iroaqueratajantsineri.
Quiso oajeitaquee Ishire ayojeitantacari
queario intasoncaventaquee, ⁶irootaque
aquimoshirejeitantacari. Ayojeitaque
atimajeiti aca quipatsiqui, tequeratsita
antsipatasanoteari Avincatsarite. ⁷Tequera
aneajeitero inampi, iro cantaincha
aquemisantaque, ayojeitantacari anejero
coajica. ⁸Aveshireimentajeivetari Avincatsa-
rite aca quipatsiqui, iro cantaincha
acoasanoveta antsipatasanoteari anta
jenoqui, anampitasanotearo. ⁹Ainirotatsi-
quera asaviqui aca, acoasanotaque
iriveshireimentajeitee. Aisati, ajaterica anta
ancoaque iriveshireimentajeitee. ¹⁰Coajica
incantacoventajeitee Quirishito. Ariorica
meeca antayetero cameetsatsisiri,
incavintsaajeitee; ariorica antayetero meeca
caari cameetsatsi, iroasanquetaajeitee.

Iquenquetsatacotaja irisati Pavoro.

¹¹Oshequi apincatsajeitaqueri Avinca-
sarite, irootaque aquemisantacaantajei-

taririri atiri. Ioti Tasorensi nopincatsata-
sanotaqueri, nocoaque piojeitero aisati
avirori. ¹²Te noncoyeji noneatsatajea
narosati, iro cantaincha te aisati
noncoyeji pimpashiventacotena. Yora
cantimataquenari, oshequi ishemetaque
irinti, ishemetimentayetaquero yantaje-
tiri, iro cantaincha te incameetsashireteji.
Icantimataquena iriori, iro cantaincha
nocoaque pimpiateari. ¹³Icanti: “Te
iriotacoteaji Pavoro”, iro cantaincha
apatiro nantiniri Tasorensi icoacaaque-
nari. Otimi niotantari nintacotantaquem-
piri. ^{14,15}Oshequi inintaquena Quirishito,
icavintsaasanotaquena. Niotaque
icamimentajeitaquee maaroni: meeca
oquempvetaca acamaajeitaque maaroni,
eiro amatapinitantajarotsi aisati caari
cameetsatsi. Aisati icoacaaquee eiro
antanontajatsi arosati, irointi anteneri
iriori icoacaaqueeri: tempa icamimenta-
jeitaquee arori, itinaanaja aisati.

¹⁶Peerani nojivetacari Quirishito atiri
ini, te niövetearini Tasorensi ini. Iro
cantaincha meeca niotasanotaqueri,
niotaque jaoca icanta. Aisati yora
ayemisantaririnte, eiro atseenquiritsi:
tempa inecameetsajeitaqueri Tasorensi.
¹⁷Ariorica iquemisantaqueri ashaninca
Quirishito, ari inashitacaacari iriori; eiro
yantapinitirotsi yantaveitaniri, irointi
impashinitanaje. ¹⁸Iriotaque intacarori
Tasorensi. Itiancaqueri Quirishito
icamimentajeitaquee, yoameetsajeita-
quee, yaacameetsatantaqueeri iriori.
Meeca icoaque ancamanteri itsipapee
atiri inquemisante, iraacameetsatanteariri
iriori. ¹⁹Pineaquero, itiancaqueri
Quirishito iroameetsajeitee arori,
irineacameetsajeitantajeeri. Eiro
iquencheshiretajirotsi aisati caari
cameetsatsi antajeivetaniri. Meeca
itiancajeitaquee arori ancamantajeiteri
itsipapee icoaque Tasorensi iraacamee-
tsajeiteri, maaroni. ²⁰Queario,

itiancaquena Quirishito: novaajimpuro irineane Tasorensi. Aisati iriori Quirishito icoacaaquempi pinquemisanteri iraacameetsatantempiri Tasorensi. ²¹Tecatsi irante Quirishito caari cameetsatatsi, iro cantaincha itiancaquero iriri icamimentajeitaquee. Oquempetimo-vetacari yantaquero iriori caari cameetsatatsi. Irootaque meeca yoameetsatantajeitajeri Tasorensi.

Jaoca icantapinita Pavoro.

6 ¹Meeca nantiniri Tasorensi icoacaaqueneri, irootaque nocantantimpiri: icavintsaaanojeitaquempi. Eiro meeca pitseenquiritsi. ²Jero oca ocantiri irineane: “Picantaquena, aisati noquemisantaquempi; moncarataca pavisacotantajeri, irootaque nintacotantaquempi”. Meeca aisati narori noncamantempi: moncarataca meeca pinquemisante, pavisacotantajeri. ³Tecatsi nante, tecatsi pinquisantenari; cameetsa noamejeitaquempi piojeitancari pavisacojeitaje. ⁴Nocantani nantaveetiniri Tasorensi, noquearioventaquero, piojeitancari queario nopincatsatanotaquero. Nocantani nantaveetiniri, iro cantaincha oshequi noquematsicatimentacari, nashinoncaapinitaca, maaroni. ⁵Ipasantaquena soraro, yoiminqeapinitaquena. Iquisapinijeitaquena atiripee. Oshequi opomerentsitimotaquena noquenquetsatacaajetiri atiripee. Nosaaquitapiniti tsiteniriqui. Noquemapinitaquero notasheni. ⁶Iro cantaincha cameetsa nosaviqui, niotasantaquero irineane Tasorensi, oshequi namavetaquero iquisaquena caari quemisantatsi, piojeitancari queario nantaveetiniri Tasorensi. Amitacotapinitaquena Ishire Tasorensi, nocavintsantapiniti, ⁷queario oni oca noametantapinitiri, te nontsee-yaji. Itasoncacoventapinitaquena Tasorensi, yojocaventaquena, aisati

imatacaquena noquemisantacaquero itsipapee atiri icameetsatantajeri. ⁸Ainiro pincatsataqueneri aisati shirontimentaqueneri. Ainiro neacameetsataqueneri aisati cantimataqueneri. Ainiro quemisantaqueneri aisati tseencaqueneri. ⁹Te iriojeitenaji atiripee, iro cantaincha iotaquena Tasorensi. Isareajevetaquena atiri iroyename, iro cantaincha aneatsina noni. Oshequi noneacatsiyetacaro, iro cantaincha iquempoyeaquena Tasorensi. ¹⁰Noashiretacojeitacari ashanincapee, iro cantaincha noveshirementacari Tasorensi. Nashinoncaavetaca narori, iro cantaincha noamejeitaquero ashanincapee cameetsa yoveshirementantajariri Tasorensi. Tecatsi nashitaarantea, iro cantaincha ipaquena Tasorensi maaroni coiteimotaqueneri.

Oshequi icavintsaajeitaquero Pavoro yora corintosati.

¹¹Noyemisantaririnte, nocamantasanojeitaquempi maaroni noquenqueshiretaquero, tecatsi nomanapitsatempi. Oshequi nonintajeitaquempi. ¹²Te nompashiventaji narori noquenquetsatacaimpi, iro cantaincha naamaaca ainiro pipashiventajeta avinti. ¹³Ari noquempetacaantajeitaquempi notomipee, nishintopee: oshequi nocavintsaajeitaquempi. Aisati nocoaque pincavintsaajeitena narori.

Icantiri Pavoro: “Te pinquempetasanoteariji tseencantsiri”.

¹⁴Eiro quiso poiritsi yora caari quemisantatsi. Pamene, ariorica acameetsataque, ¿aquempetarimpa caari cameetsatatsi? ¿Ashanincajeitarimpa? Oquempetaca quitaiteri aisati tsiteniri: te omoncaratavacayeeji, onashita. ¹⁵¿Ishanincatarimpa Quirishito yora Satanashi? Ariorica aquemisantaque, ¿aquempetarimpa tseencantsiri? ¹⁶¿Omoncaratavacaacampa ivanco

Tasorensi aisati ovanco isheroncayetiri atiri? Pamene, quiso yoajeitaquee Tasorensi, yora aneasanotatsiri, tempa peerani isanqueneyetironi irineane iriori: “Quiso noajeitanaqueri maaroni quemisananari, eiro nojocajeitiritsi. Nontasoncaventajeiteri, aisati impincatsajaitena. ¹⁷Pinijantareajeri tseencantatsiri, eiro quiso poajeitiritsi, eiro pantayetirotsi caari cameetsatsi. Impoiji naacameetsatasanojeitempi maaroni, ¹⁸nontomintajeitajempi, nishintojeitajempi, pincantajeitena: ‘Apa’. Irootaque icantaqueriniri Avincasarite, yora Tasorensisanori”.

7 ¹Ari, nonintane, ayojeitaquero oca icantaqueri Tasorensi. Eiro meeca antayetirotsi caari cameetsatsi, aisati eiro aquenqueshiretirotsi. Tsame cameetsa ampincatsatasanojeiteri Tasorensi, anquearioventajeiteneri icocayeeri.

Yora Pavoro iveshireimentajeitacari corintosati.

²Nocoaque paacameetsajaitena. Piojeitaque te noashinoncaajeitempiji, te nantacaajeitempiroji caari cameetsatsi, te namatavijitempiji. ³Te noncantempiji ainiro pantane, teve. Tempa nocamantaquempi oshequi nocavintsaajeitaquempi, oshequi nonintajeitaquempi. Nocantani noquenqueshireitaquempi aca quipatsiqui. Aisati ariorica noncamaque, noncanteani nonquenqueshireitapaajempi anta inquitequi. ⁴Te nonquenqueshireacotempiji, niotaque piquemisantaquena, irootaque noveshireimentantaquempiri, noquimoshireventantaquempiri. Oshequi yoashinonqueetaquena, iro cantaincha noveshireimentasanojeitaquempi.

Ineacameetsajeitaqueri Pavoro corintosati.

⁵Peerani, nareetantacari Maseroniaqui, te nomateroji nomaoreapee: yoashinoncaapiniyeetaquena. Aisati oshequi

notsaroashiretanaque. ⁶Iro cantaincha tempa iveshireacaapinijeitaquee Tasorensi. Itiancaquenari yora Tito, irootaque noquimoshiretantacari. ⁷Ari noveshireimentacari Tito iriori, itsipataquena. Aisati icamantapaaquena paacameetsajaitavaqueri chapinqui, aisati iveshireimentaquempi. Icamantaquena picoiteajeitaquena, aisati piquenqueshiretanaca: eiro papiitajirotsi oca pantaveitaniri peerani. Aisati icamantaquena pinintajeitaquena. Noquemantavacariri icantapaaquena, oshequi noquimoshiretanaque. ^{8,9}Nosanquenatantaquempirori peerani, noquenqueshiretacaajeitaquempi. Poashirejiveitanaca, iro cantaincha impoiji pojocaquero pantaveitaniri, paventajeitajari Tasorensi. Te nantsipetearoji nosanquenaajeitaquempiro, te noashinoncaajeitempiji. Peerani aquenqueshirejeitanaca, iro cantaincha meeca aquimoshirejeitaque. ¹⁰Icoaque Tasorensi avashiretanaquea ajocantearori caari cameetsatsi antajeitaqueri, ampashinantajeari. Impoiji ancanteri iroavisacojeitee. Ariorica amatero oca icoacaaqueeri, anquimoshirejeitanaque. Yoashirejiveitaca aisati iriori tseencantatsiri, iro cantaincha te iraventajeitariji irinti Tasorensi, irootaque ijatantacari Sharincaveniqui. ¹¹Poashirejeivetacani, iro cantaincha meeca piquearioventaquero piquemisantajeitaque. Picoajeitaque cameetsa pisavicajeitanaque. Oshequi piquenqueshirejeitaca, aisati pitsaroajeitaque, irootaque picoantacari namitacojeitempi. Piquemisantasanojeitaquena, aisati pojocacaaqueri yoranqui yantaniroveitaniri. Pitsoteaquero maaroni nocantajeitaquempiri, meeca cameetsa pisavicajeiti. ¹²Nosanquenatantaquempirori nocoacaaquempi pamitacoteri yoranqui antacotiriri iriri, aisati yora iriri, pamitacoteri. Iro cantaincha nocoacaasantaquempi piojeitaque

pinintasanojeitaquena. Tempa irootaque icoacaquempiri aisati Tasorentsi.

¹³Ari meeca noveshireimentajeita-quempi, aisati noveshireimentavajari Tito. Oshequi iquimoshiretapaaque, icamantapaajana: “Cameetsa isavicacaa-jeitavaquena”. ¹⁴Chapinqui, tequeratsitani irijatashitempi, nocamantavaqueri: “Icameetsajeitaque corintosati, cameetsa iraacameetsatavaquempi”. Ari yareetan-taquempiri iotaque queario nocantaque-riri, te nontseeyaji. Aisati oquempetaca, te namatavijeiitempiji avirojei. ¹⁵Oshequi inintajeitaquempi: iotaque piquemisanta-jeitavaqueri aisati pipincatsajeitavaqueri. ¹⁶Aisati narori, noveshireimentajeita-quempi: niotaque pantapinitaqueri icoacaquempiri Tasorentsi.

Oshequi icavintsanti yora maseroniasati.

8 ¹Meeca, noyemisantaririnte, nocoaque noncamantempi oshequi ineshinoncajeitaqueri Tasorentsi maaroni yora ayemisantaririnte anta Maseronia-qui. ²Oshequi yoashinoncaajeivetacari ishanincepee, iro cantaincha oshequi iveshireimentajeitacari Tasorentsi. Aisati te irashitaarantasanoveteaji, iro cantain-cha oshequi yapatojeitiniri quemisanta-sirsi quirequi, ipiriri. Iojeitaque yashinon-caajeitaca ayemisantaririnte anta Jerosarequi. ³Te capichaji imperi, oshequi ipaqueri. Te iriojeiteji intsaneem-pari iirequite. Tecatsi canterine: “Pincavintsayeri piyemisantaririnte”. Irisati iotashitacha icavintsairi. ⁴Icantasa-notaquena: “Nocoaque namitacojeiteri noyemisantaririnte”. ⁵Ari niövetaca imperi quirequi, iro cantaincha imapoca-quena icantajeitaquena: “Nanteneri Tasorentsi paitarica icoacaanari, aisati nantempro paitarica pincantaquenari. Pincamantena paitarica icoacaquenari Tasorentsi”. ⁶Ari chapinqui intanacaro Tito icantaquempi: “Pampatoteneri

jerosaresati piirequite”. Ari cameetsa papatojeitaqueneri. Meeca nontiancajem-piri aisati incantajempi pampatotasano-jeiteneri aisati piirequite, pincavintsaa-sanojeiteri piyemisantaririnte.

Icantiri Pavoro corintosati: “Pintacoteari ashinoncaincari anta Jerosarequi”.

⁷Oshequi panaacojeitaqueri pashinipee piyemisantaririnte: panaacotaqueri piquemisantasanojeiti, piquenquetsatasa-nojeiti, piotasanojeiti, piquearioventasa-notiniri Avincatsarite icoacaimpiri, aisati pinintasanojeitaquena. Meeca nocoaque panaacojeiteri pineshinoncatasanojeiteri ashinoncaincari. ⁸Te noncoyeji nompera-natempi pimpajeiteri ashinoncaincari, iro cantaincha ariorica pimpasanoteri, piotacaajeiteri itsipapee queario pininta-sanojeitaqueri piyemisantaririnte.

⁹Tempa aisati oshequi ineshinoncajeita-quee Avincatsarite Jesoquirishito. Oshequi yashitaarantaca anta inquitequi, aisati oshequi catsini ipincatsaritini, iro cantaincha ipocantacari aca quipatsiqui, yojocanaquero maaroni cameetsayeta-tsiri. Yashinoncaavetapaaca: tecatsi timimotajerine, itseencajeitaqueri ishaninca, maaroni. Yashinoncaimenta-quee arori, oncanteata cameetsa irisavica-caajeitajee anta inquitequi. ¹⁰Nocoaque pintacotasano-teari yora ashinoncaajeita-chari anta Jerosarequi: tempa avirojeita-que intasanotacarori peerani. ¹¹Picoajei-taque pintacoteari: meeca, intimerica piirequite pintacotenteariri, jentsite, pampatoteri pimpacotenteariri. ¹²Ocameetsati picoaque pincavintsayeri. Ari itimirica piirequite, tempa ari pimataquero avinti pimperi. Iro cantain-cha terica intimeji piirequite, eiro nocantashitimpitsi pimperi. ¹³Te noninteji ompomerentsitimojeitempi, aisati eiro opomerentsitimojeitiritsi itsipapee. ¹⁴Timatsi pashitaarantajeitaca,

meeca pincavintsayeri yora ashinoncaincari. Coajica ariorica irashitaarantaquea iriori, aisati ariorica pashinoncaajeitaquea avirori, impojiquea impiatempincavintsaajectempincavirori. ¹⁵Tempa ocantini Sanquenarentsi: “Yora piotasanovetacarori mana, te ontimimotajeriji aisati timaarantajantsine. Irintiquea yora aatsiri capichaji, te irashinoncayeaji irinti. Aitaque, imoncaratavacaajeitaca maaroni”.

Intianqueri Tito irineajeri aisati corintosati.

¹⁶Ari iquempetaquena Tito, oshequi inintajeitaquempi, irootaque nopasonquiantacariri Tasorentsi. ¹⁷Nocantaqueri: “Pijatashitajeri aisati corintosati, pineeri”. Iro cantaincha te apaniro narori noncoacayeri, irisati coashitacha irineajempi aisati. ¹⁸Nontianquempiri itsipa ayemisanrarinte intsipatanaqueari. Oshequi iquenquetsatapinitiro irineane Tasorentsi, irootaque iojeitantacariri maaroni quemisantatsiri. Aisati avirori, piquemacojeitaqueri. ¹⁹Aisati itiancajeitaqueri ayemisanrarinte intsipatanaquena narori anta Jerosarequi, iramitacotena naanajeneri ashinoncaincari quirequi. Oshequi icavintsaajectaqueri ayemisanrarinte, irootaque incantanteari jerosaresati: “Icameetsataque Tasorentsi”. Aisati iriojeitanaque oshequi acavintsaajectaqueri. ²⁰Ari icarataque oshequi quirequi pintianqueneriri, oshequi picavintsaajectaqueri. Irootaque nocoantacariri intime tsipatenaneri naanajeneri. Icanteetancari: “Picoshitaqueri”. ²¹Te apaniro noncoaque irineacameetsatena Tasorentsi, aisati nocoaque irineacameetsajeitena ashanincapee. ²²Aisati pineavajeri pashini ayemisanrarinte nontianqueri. Niotaqueri, iquearioventaquero iquemisantaque. Nocamantaqueri oshequi piquemisantajectaque aisati oshequi

picavintsantajectaque, irootaque icoasanotantacariri irijate irineempi. ²³Yora Tito, quiso yoapinitaquena, yamitacotapinitaquena nintacojectaquempi. Aisati yora intsipajeiteari irineempi, iriojeitaque itiancaneppee ayemisanrarinte aca. Cameetsa inajeiti, quemisantasantatiriri Quirishito. ²⁴Ari oshequi nocantapinijectaqueri quemisantatsiri aca: “Icameetsajectaque corintosati”. Ariorica pineavaqueri yoca, paacameetsatasantatavaqueri iriojeitanteari queario oca nocantaqueriri.

Icamantaqueri paita icoacantariri irineshinoncajecteri jerosaresati.

9 ^{1,2}Jero oca nocantaquempiri: “Pintacoteari piyemisanrarinte”. Iro cantaincha tempa piotasanotaque picavintsaajectaqueri. Niotaque te pintsaneempariji piirequite, irootaque nocamantantariri maseroniasati: “Ocarataque meece apanoni osarinti icoacantariri corintosati intianqueneri jerosaresati quirequi”. Iotacojectaquempi, irootaque icoasanojeitantacariri inquempejectempiri, irintacojectantea iriori. ^{3,4}Ari nocantajeitaqueri: “Icoaque corintosati intianqueneri jerosaresati iirequite”. Meece nontianqueri yoca irijivatanaquena, incantempiri pimpiotasantanteariri. Nimpoitanaje narori noneajeitempi, ariorica intsipatanaquena itsipapee maseroniasati. Ariorica irineapaaquempi pivioncaqueneri jerosaresati piirequite, iriojeitapaque queario nocantaqueriri, aisati eiropashiventatsi narori. ⁵Ari nocantaqueri yoca ayemisanrarinte irijivatanaquena, pampatojeitanteariri piirequite. Avirojei cantashitachari peerani: “Nintacoteari ashinoncaincari”, te naro cantasanotempine.

⁶Ariorica pampatoteri piirequite, piquempvetacariri panquiveetatsiri: ariorica impanquitero oshequi oitsoqui, irayero

coajica oshequi, impiotero. Iro cantaincha impanquiterorica capichaji, ari capichaji iraye. ⁷Piojeitaque jaoca incarate quirequi picoaqueri pimperiri. Aitaque incarataque pimperiri. Eiro pitsaneashiretaritsi, aisati eiro piperanataritsi itsipapee. Iro icoaqueri Tasorentsi ariorica pintacoteari, pinquimoshiretanaque. ⁸Tempa ioti Tasorentsi icavintsaasantaquempi catsini, eiro ishinetajimpitsi pashinoncaajeitea. Intimacayempiro maaroni coiteimotaquempiri, impanotempiro ontimanteari pintacotanteariri aisati itsipapee. ⁹Tempa aitaque ocantini Sanquenarentsi: “Te pantsipetashiteaji pintacojeitari ashinoncaincari, eiro catsini ipeacotarotsi Tasorentsi picavintsanti”. ¹⁰Yora Tasorentsi ipapinitiri panquiveetsiri oitsoqui impanquitantea-rori, aisati ipapinijeitaquee avajeitari. Tempa aisati irishequianaquempiro timimojeitempineri ontimanteari pincavintsaajeitantariri ashinoncaincari. ¹¹Aiquero irovanaaquempiro Tasorentsi, pintacotasantanteariri itsipapee. Impoiji impasonquijeiteri iriori Tasorentsi, irineacameetsatanojeiteri. ¹²Ariorica intacotantea arori, ampananoteri ashinoncaincari coiteimotacariri. Iro cantaincha aisati avamejeiteri impasonquijeiteri Tasorentsi. ¹³Ariorica pincavintsaajeiteri piyemisantaririnte, iriojeitanaque iriori queario aviojeitaque quemisantasanojeitiriri Quirishito. Aisati iriojeitanaque te pintsaneempariji piirequite, irointi oshequi pintacotantaca, impoiji irineacameetsajeiteri Tasorentsi. ¹⁴Oshequi iquenqeshirejeitatuempiri, aisati oshequi icantapinitiri Tasorentsi iramitacojeitempi. Iojeitaque oshequi catsini ineshinoncajeitatuempiri Tasorentsi. ¹⁵Tsame ampanonquijeiteri, tempa icavintsaasanojeitaquee catsini.

Icamantacoventaja irisati Pavoro.

10 ¹Ari itimi quisaquenari, cantajeitatuempiri: “Ariorica itsipajeitatuempiri Pavoro, itsarocaaajeitatuempiri.

Ariorica itimi arejiqui ipacantaquempiri sanquenarentsi, iquisatsataquempiri”. Ari timatsi noninti noncamantempiri. Tempa ineshinoncajeitatuempiri Quirishito, te irishintsitsateji: aisati noninti nonquempetempiri narori. ²Timatsi yora cantimpiri: “Te iranteroji Pavoro icoacaavetariri Tasorentsi, irointi yantashitacaro icoayetiri iriori”. Terica irimajerete iriori, pamenavaquenayea eiro nontsarocaa-paaritsi, irointi nonquisatsatapaqueri. Iro cantaincha te noncoyeji nonquisatsajeitatuempiri, irointi nocoaque aacameetsatavacaajeitea maaroni. ³Aca quipatsiqui timatsi camaari quisaajeitatuempiri: tecatsi ancantea amanateri; te inquempejeiteariji atiripee amanajeitantariri. ⁴Te ontimeji amanatanteariri, iro cantaincha timatsi irinti Tasorentsi tasoncacoventajeitatuempiri ampiajeitantariri camaari. ⁵Timatsi yora piatsatacariri Tasorentsi, aisati cantiriri ashaninca: “Eiro piquemisantiritsi Tasorentsi”. Iro cantaincha itasoncacoventajeitatuempiri Tasorentsi aimajerentajeitantariri maaroni piatsajeivetacariri, aisati anquemisanta-canteariri, irishiretasanotanteariri Quirishito. ⁶Aisati anta pinampiqui, niotaque piquemisantajeitatuempiri, iro cantaincha naamaaca itimaarantaque aparopee piatsataquenari. Irintiquea yora piatsataquenari, noncanteri Tasorentsi iroasanquejeiteri.

Icantiri Pavoro:

“Narotaque itiancane Quirishito”.

⁷Ainiro caveaquenari, aisati tseencaquenari. Ijivetaquena te naro itiancane Quirishito. Icantacotashitaca irisati: “Naro itiancane Quirishito”, iro cantaincha noncantempiri nainti: narosantaquena nainti itiancane. ⁸Nocantapinitatuempiri itiancaquena, iro cantaincha queariotaque oca nocantimpiri. Icoacaquena Avincatsarite nonquemisantaacaasanojei-

tempi: te incoacayenaji nontseencacaajei-tempi. Nantiniri icantaquenari, irootaque caari nopashiventanta. ⁹Eiro pijititsi notsarocaaajeitimpi, irootaque noquisatsatantaquempiri nosanquenatitaquempiri peerani. ¹⁰Timatsi cantimpiri: “Isanquenatashita Pavoro, te irioteji. Iquisatsashitaquempi. Ariorica impoque aca, pineavaqueri tecatsi pimpincatsatimente-riri. Te irioteji inquenquetsatacaasanojei-tempi”. ¹¹Pincamanteri iriori: “Ariorica irarejeitempi Pavoro, incamantasanta-paajempiro oca isanquenajeitimpiri. Eiro ipashinitrotsi irineane”.

Te oncameetsateji ashemete, irointi aveshireimenteari Avincatsarite.

¹²Ari inecameetsajeitashitaja irisati yora tseencajeitanari. ¿Paita noncoanteari nonquempejeiteari iriori? Icantajeitaque: “Nomoncaratavacaajeitaca nainti, nocameetsatasanojeitaque”. Queario, imoncaratavacaajeitaca, iro cantaincha te iriojeiteji, te aneroji iojeitantari. ¹³Te noninteji noneacameetsatashitea narosati: apatiro nocoaque nomataqueneri Tasorentsi maaroni icoacaquenari. Niotaque icoacaquena nonquemisanta-caasanojeitempi avirori. ¹⁴Te nanteroji caari icoacaana, iro cantaincha tempa narotaque intasanotacarori noquenque-tsatacaajeitaquempi peerani. Narotaque nainti camantajeitaquempiri ariorica pinquemisantajeiteri Quirishito, iroavisa-cojeitempi. ¹⁵Te noninteji noncantashitea nomataquero nainti imataqueri iriori: tempa onashiyetaca. Nocoaque aiqero pijajeitatie avirori pinquemisantasanojeitanaque. Impoiji novaanafea narori, ¹⁶nonquenquetsatacaajeiteri itsipapee atiri aisati, yora caariquera iojeitatsi. Eiro nompoitiritsi itsipapee quenquetsatacan-tatsiri, eiro nocantashitatsi naro quemisantacairiri yora iquemisantacairi iriori. ¹⁷Te oncameetsateji ashemetimen-

tero amataqueri arori, irointi ocameetsati aveshireimentearo imatacaajeitaqueeri Avincatsarite. ¹⁸Te incameetsateji neacameetsatashitachari irisati, irintiquea cameetsatsatsiri yora inecameetsatiri Avincatsarite.

Yora Pavoro iquenquetsatacotaja irisati, aisati iquenquetsatacotiri quisaqueriri.

11 ¹Nocoaque nonquenquetsatacota-jea aisati. Terica aneroji niotan-tari, iro cantaincha, eiro pishemanatsi. ²Pamene, tempa icoasanotapiniti shirampari irayero caari neiri shirampari. Ariorica oneaqueri pashini shirampari impiincaquero, irojocajero. Aisati noquempetaca narori, nocoaque nonque-misantacaasanotempi irineacameetsatasa-notantempiri Tasorentsi, eiro yojocantim-pitsi. ³Peerani yora maranque yamatavi-taquero Eva. Queariya, iquempetacantim-picari yoranqui: yamatavijeitimpicari. Piquemisantasanojeivetacari Avincatsa-rite, pipincatsatasanojeivetacari. Yojocacaimpircari amatavitantatsiri. ⁴Te pinquenqueshiretimateaji. Piquemisanta-shijeitavacari maaroni jatashijeitimpiri. Onashita oca iquenquetsatacotaqueri Jesoshi. Nocoacaquempi oamejeitempi Ishire Tasorentsi, icoacaquempi iriori iroamejeitempi camaari. Nocamantajeita-quempi pinquemisanteri Jesoshi pavisacojeitantajeari, onashita yoamejei-taquempiri iriori amatavijeitimpiri. ¿Paita piquemisantajeitantariri? ⁵Itseencajeivetana iriori, iro cantaincha ¿paita noncoanteari nompincatsateri iriori? ⁶Yaamaavetaquena te nonquen-quetsate cameetsa, iro cantaincha timatsi nioyetiri. Piojeitakuena, piojeiti timatsi nioyetiri.

⁷Pamene, peerani iroaquera noquemi-santacantaquempiri, tecatsi noncoacoti-majeitempi, iro cantaincha naamaaca ocameetsaveta noncoacotempime.

⁸Naaque iirequite ipaquenari itsipapee quemisantatsiri nomatantarori noamejeitaquempi. ⁹Nosaviquimojeitantimpiri, nashinoncaavetaca, iro cantaincha te noncamantempiji. Impoiji iponeaca Maseroniaqui quemisantatsiri, ipapaaquenari aisati quirequi. Tecatsi catsini noncoacojeitempi avirori. ¹⁰Niotaque irootaque icoacaaquenari Quirishito. Meeca noncamantajeiteri maaroni acayasati tecatsi noncoacojeitempini peerani. ¹¹¿Paita noncamantanteariri? ¿Pijitimpia te nonintajeitempi? Ioti Tasorentsi queario nonintasanojeitaquempi. ¹²Iro cantaincha nocoaque niotaacasanojeitempi te nonquempeteariji yora itsipapee oamejeivetimpiri, amatavijeitimpiri. Pipinatiri, irootaque yoamejeitantaquempiri iriori. Naroquea nainti, tecatsi noncoacotempi. ¹³Te intianqueriji irinti Tasorentsi. Yamatavijeitaquempi. Ishiacantashitaca itiancane Quirishito. ¹⁴Aitaque icanta, yamatavianta, iquempetacari Satanashi, yamatavianta iriori. Ishiacantashitacari iriori inampire Tasorentsi. ¹⁵Aitaque icantari quemisantiriri camaari: ishiacantashitaca iquemisantiri Tasorentsi. Iro cantaincha coajica impiateari Tasorentsi, iroasanquetajeiteri.

**Yora Pavoro yanaacojeitiri
quisaqueriri, iotasanoti.**

¹⁶Nampiitajempro: eiro pijitashitanatsi te aneroji notantari. Pijitenarica caari iotatsi, pinquenqueshiretero oca: capichaji nonquenquetsatacotajea narosati. ¹⁷Te incamantenaji Avincatsarite nonquenquetsatacotea, te incoacayenaji noshemetashitea. ¹⁸Iro cantaincha ishemejeiti irinti yora quisajeitaquenari: meeca nonquempeveteari narori, noshemete. ¹⁹Pijijeiveta piojeitaque avinti, pitseencaquena, iro cantaincha piquemisantashitaquena. ²⁰Irintiquea

yora amatavijeitimpiri, te pintseenqueriji irinti. Oshequi iperanajeitaquempi, yaapitsajeitaquempiri piirequite, ishemitimojeitaquempi, aisati ipasavoronirojeitaquempi. ¿Paitaquea? ²¹Queario, te nioteji nonquempeteari.

Ari ainiro oshequi ishemetimentiri: meeca nonquempeteari, oshequi noshemetimentaquero narori, onquempe-teame te aneroji notantari. ²²Ishementimentaquero ijoriotaque. Tempa narotaque narori jorio. Ishanincatacari Ishiraeri, yora icoyeane Tasorentsi. Aisati noquempetacari narori. Icanti: “Noshanincatacari Avaramani”. Aisati narori, noshanincatacari. ²³Icantashiveta: “Nantiniri Quirishito icoacaaquenari”. Oshequi nainti nanaacotaqueri. ¿Paitaquea noshemetantacari? Oshequi noquearioventaquero nantiniri Quirishito icoacaaquenari, irootaque yoiminqueanteetapinivetaquenari caravosoqui, ipasatapiniyeetaquenari. Oshequi nocamapinivetaca. ²⁴Yora nojorioririnte ipasatapinitaquena, tac, tac, tac, tac, ocarataque 39 ipasataquena. Pashini quitaiteri aisati 39 ipasanatajana, tac, tac, tac. Aisati iquempetajana pashini quitaiteri, ocarataque quitaiteri apapacaroni. ²⁵Pashini quitaiteri ipasatapinitaquena, tac, tac, tac. Impoijini aisati ipasatajana, tac, tac, tac. Iro aisati ipasatajana. Iro ipasatantanari inchaquipee. Pashini aisati ipichanayetaquena mapi, pitsec, pitsec, pitsec. Aisati noquenavetanjaja pitotsiqui antearojaqui incajare. Jero otsitianaque, irovetaincha nompiinqueme. Impoiji aisati noquempe-tapinitaca, nompiinqueme. Aparoni quitaiteri notsatajatata nianquijaqui, noquitaitetacotaque. ²⁶Oshequi noquenaquenayetanaque noquenquetsatantacari. Oshequi nompiinqueme eniqui. Oshequi icoshitapinitaquena coshitantatsiri, yoashinoncaapinitaquena. Iroyename

noshaninca, aisati itsipapee atiri. Iroyename savicatsiri nampitsiqui. Notimpinacavetaca inchatoshiqui, nashinoncaavetaca anta. Iroveta incha nompiinqueme antearojaqui incajare. Yoashinoncaaquena shiavetachari iqumisanti. ²⁷Oshequi opomerentsitimo-taquena, oshequi nashinoncaapinitaca. Oshequi te nomateroji nomaye tsiteniriqui. Noquemapinitaquero notashe aisati nomire. Oshequi quitaiteri te ontimeji noyari. Noquemaquero noatsincare, te ontimeji noicoro.

²⁸Aisati nocantani noquenqueshiretapanitaqueri ayemisantaririnte, nocoacaasanaotaqueri inquemisantasanojeite.

²⁹Ariorica yoashiretaca ayemisantaririnte, noashiretaca narori. Itimirica oashinoncairiri, noquisacotacari narori.

³⁰Ari noshemevetaca, iro cantaincha nocamantajeitaquempiro oca piojeitan-teari te naro matashitearone, irinti Tasorentsi matacaanarori paitapeerica.

³¹Iriotaque Iriri Avincatsarite Jesoquirishito, tsame ancantaitatiyempani ampincatsajeiteri maaroni. Iotaque iriori te nontseeyaji. ³²Peerani ipincatsariventantini yora Aretashi. Itianquiri ivincatsaririnte ipincatsariventanti anta Tamashicoqui. Iriotaque aacantenanemeri.

Icoacoajeivetaquena soraropee, ³³iro cantaincha yaanaquena ayemisantaririnte anta tantotsiqui shoncarori nampitsi. Yataitacaanaquena irosati omoroquinta, impoini yoaniitacotajana quipatsiqui. Irootaque nomatantarori noshiapitsatacari pincatsari aacantenanemeri.

12 ¹Pamene, te oncameetsaveteaji nonquenquetsatocotapinita narosati, iro cantaincha nocoaque noncamantempi noneaqueri narori. Aisati noncamantempi icamantaquenari Avincatsarite. ^{2,3}Ocarataque meeca 14 osarinti yaanaquena Avincatsarite anta inquitequi jenoqui, anta ocameetsaiteta-

sanoti catsini. Ojataquerica novatsa, te nioteji: apanirorica ojataque noshire. Ioti Tasorentsi irinti. ⁴Tecatsi noncantea noncamantempiro maaroni noquemaqueri anta. Arioricame nomavetaquea-rome, eiro icoacaanarotsi Tasorentsi noncamantempiro. ⁵Oshequi noveshireimentayetacaro noneayetaqueri, iro cantaincha tecatsi noncantea noshemetimentearo. Irointi noncamantempi te noncameetsateji narori. Tecatsi nomate narori: iriotaque Tasorentsi matacaanarori paitapeerica, irootaque noveshireimentantariri. ⁶Noveshireimentaquaerome nantaqueri narori, eirome otimime niotantari. Aisati nontseyame: pineaquero, tecatsi nomate apaniro. Te noninteji noncamantempiro nomayetirica narori. Timatsi pineacotaquenari aisati piquemacotaquenari: moncarataca, eiro novaimpirotsi aisati.

⁷Timatsi oshequi iotacaquenari Tasorentsi, iro cantaincha te incoacayenaji noshemetimentearo. Irootaque ishinetantariri Satanashi yoashinoncaaquena, noquematsicatatantarori nojoquiiitaca. ⁸Ocarataque mava nocantavetacari Avincatsarite: "Poavisacotajena", ⁹iro cantaincha icantaquena: "Noncavintsayempi, moncarataca. Eiro noavisacotimpitsi, iro cantaincha nontasoncacoventempi pamavetantarori". Meeca noveshireimentacaro oca noquematsicatacari: niotaque meeca itasoncacoventaquena Quirishito. ¹⁰Iriotaque noveshireimentasanotacari. Te noshintsiteji, ishirontimentajeitaquena itsipapee, noquematsicayetacaro paitapeerica, iquisheetapinitaquena, nashinoncaapinitaca, iro cantaincha noveshireimentacari Quirishito. Iotaque te noshintsiteji, iro cantaincha ishintsitacaquena.

**Cameetsa isavicaque
Pavoro anta Corintoqui.**

¹¹Pineaquero, oshequi noquenquetsatocotajana narosati. Oncameetsateme pineacamee-

tsatename, pinquenquetsatacotename, iro cantaincha, te. Irootaque noquenquetsatacotantajari narosati. Te noncameetsateji narori, tecatsi nomatasanote. Iro cantaincha te iranaaçojeitenaji yora oamejeivetimpiri pineacameetsajeivetari. ¹²Peerani, notsipatantaquempiri, jentsiquero noamejeitaquempi, niotacaasanojeitaquempi queario itiancasanotaquena Tasorentsi. Pineacojeitaquena imatacaaquena notasoncantayetaque, nomayetaquero caari pineapiniti. ¹³Nintacojeitaquempi, maaroni. Noquempetacaanta-jeitaquempi maaroni quemisantatsiri anta otsipapeequi nampitsi. Apatiro avinti, te noncantajeitempiji: “Pimpena coiteimotaquenari”. Ocameetsaveta noncantajeitempime piojeitanteameri. Eiro piquishimentanarotsi te noncamantempiji peerani.

¹⁴Irotaintsi meeca nojate noneajantempi aisati. Eiro opomerentsitimojeitimpitsi, tecatsi noncoacojeitempi. Apatiro nocoaque pinquemisantajeitena. Noquempetacaajeitaquempi notomipee. Atomipee te impapiniteji coiteimoteeri, ainti apapinitiri coiteimotariri irinti. ¹⁵Nocoaque nainti nonquearioventasanotempiro maaroni nantaqueri pinquemisantasanojeitanteari. Oshequi catsini nonintasanojeivetaquempi avinti, iro cantaincha avirori, te pimpiate-naji pincavintsayena. ¹⁶Ari picantajeiti: “Queario, tecatsi incoacojeitee Pavoro, iro cantaincha timatsi ionirotantari iriori. Aamaaca yamatavijeitaquee, yaantarori paitapeerica”. ¹⁷¿Timatsimpa yaitaquempiri yora notiancaquempiri? ¹⁸Chapinqui notiancaquempiri Tito aisati notiancaqueri itsipa ayemisantaririnte. ¿Timatsimpa yaitaquempiri iriori? Tempa iquempetacaquena narori: tecatsi incoacojeitempi.

Oshequi iquenqueshiretaque Pavoro.

¹⁹Pijitashijeivetaca apatiro nocoaque pineacameetsajeitena. Noquemisantakeri Quirishito, noshaninca, irootaque nocoantacari nonquemisantacaajeitempi.

Iotaque Tasorentsi queario nocantaquem-piri. ²⁰Oshequi noquenqueshiretaca meeca. Naamaaca ariorica noneajeitapaaquempi eiro noneacameetsatasanojeitapaimpitsi. Aisati naamaaca eiro pineacameetsatavaquenatsi narori. Naamaaca noneapaaquempi piquisatsatavacaaca, piquisavacaaca, picantimatavacaajeitaca, otimi oshequi cantaantsi, pishemejeitaque, maaroni; te pisavicajeite cameetsa. ²¹Naamaaca ariorica nareetajempi aisati noashiretacetapeempi. Iro noashiretacetantempiri, yoametaquena Tasorentsi te oncameetsateji pantajeitaqueri. Nompashiventacayeari yora caari jocajiro caari cameetsatsi yantapiniyetaqueri: yora mayempiyetirori tsinane, aimentarori ijina, airori iyashiane, maaroni.

Icoaque Pavoro

inquemisantacaasanojeiteri corintosati.

13 ¹Ari ocarataque apite noneantajantimpiri peerani, meeca noneajantempi aisati. Ari ocantini Sanquenarentsi: “Intimerica apite, ariorica mava neacoterineri ashaninca irantero caari cameetsatsi, piotasanotaque queario yantasanotaquero, oncameetsatanteari poasanquetaajeiteri”. ²Peerani apitetaque nocantajeivetacari yora antirori caari cameetsatsi, aisati meeca nosanquena-jeitaqueneri iroimpacantajearori oca yantayetaqueri. Eirorica yoipacajirotsi eiro nocavintsaajiritsi aisati. ³Impoiji piojeitanaque queario novaajeitimpiri irineane Quirishito. Te intsarocajeitempiji iriori, irointi oshequi ipincatsariventajeitaquempi, itasorentsitanotaque. ⁴Ipajacotanteevetarari peerani Jesoshi, te irishintsiveteaji, iro cantaincha itasoncavoentaqueri Tasorentsi, yanantajari meeca. Te noshintsijeiteji narori, noquempevetacari Quirishito peerani. Iro cantaincha itasoncaventaquena, nomatantarori nopincatsariventajeita-

quempi. ⁵Piotacojeitea avisati, piojeite queariorica piquemisantasanojeitaque. Tempa pioti quiso yoajeitaquempi Quirishito, itasoncaventajeitaquempi. Terica quiso iroyempi, te pinquemisan-teji.

⁶Nocoaque piojeitaque avirori noquemisantasanoaque nainti. ⁷Nocantapinitiri Tasorensi iramitacojeitempi eiro pantantarotsi caari cameetsatatsi. Te noncoaveteaji pineacameetsatashitena, irointi nocoasanoaque pincameetsatasanojeitanaque. Irompa nainti, eirorica pineacameetsatana. ⁸Tecatsi noncantea nompashinitero irineane Tasorensi: tempa oqueariotasanotaque; nocoaque pinquemisantasanojeitero, maaroni. ⁹Iro nocoacaasanojeitaquempi pinquemisantasanojeite. Ariorica pinquemisantasanojeite, moncarataca, eiro ocantimoneentantsi pitseencanarica. Aitaque nocantiri Tasorensi iramitacojeitempi pinquemisantasanojeitanteari. ¹⁰Noshintsitsajeitaquempi meeca, oncanteata ariorica nareejeitempi tecatsiquea noshintsitsati-

mentapeempiri aisati. Icoacaaquena Tasorensi nompincatsariventante, iro cantaincha te noncoyeji noasanquejeitempi, irointi namitacojeitempi pinquemisantasanojeitanteari.

Ivetsajeitari.

¹¹Ari, noyemisantaririnte, piveshirei-mentajeiteari Quirishito. Pinquenque-shirejeitea, eiro papiitajirotsi aisati caari cameetsatatsi. Poveshireacaava-caajeitea, paacameetsatavacaajeitea, impoiqi quiso iroajeitempi Tasorensi. Tempa oshequi inintajeitaquee, cameetsa isavicacaajeitaquee. ¹²Piquemisantasanojeitirica, paacameetsatasanojeitajatsi aisati. ¹³Ivetsajeitimpi maaroni ayemisantaririnte aca. ¹⁴Nocoaque meeca irineshinoncajeitempi Avincatsarite Jesoquirishito, irinintajeitempi Tasorensi, aisati quiso oajeitempi Ishire.

Ari ocarati nosanquenajeitimpi:
Pavoro

YORA PAVORO ISANQUENATINIRI CARASHIASATI

Ivetsatari Pavoro carashiasati.

1 ¹⁻²¿Savicajeitatsimpi, carashiasati? ¿Tecatsimpa oajeitempine? Narotaque aca Pavoro sanquenatimpirori oca. Te naro itiancane atiri, te incantenaji atiri: “Pinququetsate”. Irintiquea tiancana yora Jesoquirishito noquenquetsatacapinitiri atiri. Aisati iriri iriori itiancaquena: yora oitinaajiriri. Nocarajeitaqueri aca quemisantajeitatsiri, nosanquenajeitaquempi noyemisantaririnte, maaroni. ³Nocantapinitiri Apa Tasorensi: “Pineshinoncajeiteri carashiasati, cameetsa pisavicaajeiteri”; aisati iriori nocantiri Avincatsarite Jesoquirishito. ⁴Tempa irisati shinetaicha peerani ipajacotanteetariri, irootaque inintacaaqueriri Apa Tasorensi. Te ancameetsajeiveiteani, irootaque ipajacotimentantaqueeri, aisati yoavisacojeitantajeeri, maaroni. Te incoacayeriji tseencantatsiri irantacaajeitajeero caari cameetsatsi. ⁵Tsame aneacameetsatasa-nojeiteri Tasorensi, ancantaitiyempani. Aitaque ancantajeiteari.

Itimi aparo oavisacotantatsiri: yora Jesoquirishito.

⁶Noquenqueshireacotaquempi, jaoca picantajeitacari. Icoyeaquempi Tasorensi, irootaque ineshinoncatantaquempi Quirishito. ¿Picitamitacampa pojocajerome piquemisantiri? ¿Pijitimpa eiro imatirotsi iroavisacotajempi?

¿Picoaquempa pashini oavisacotempineri? ⁷Queario nocamantajeivetaquempi jaoca pincanteari pavisacotantajeeri. Eirorica piquemisantana, eiro pavisacotajitsi. Iro cantaincha timatsi pashini, comitacaajeitaquempi. Icoaque pashini irantacaajeitempime, icantavetimpi: “Eiro imatirotsi Quirishito iroavisacotempi”.

⁸Ariorica nompashiniterome oca nocamantitaquempi, oncameetsateme iroasanquetaquename Tasorensi, intianquenname Sharincaveniqui. Aisati inquempetea iriori, ariorica impashiniterome inampire Tasorensi, oncameetsateme aisati iroasanquejeiterime Tasorensi. ⁹Aitaque nocamantitaquempi, meeca nampiitajempi: intimerica pashiniteroneri nocamantitaquempi, aitaque iroasanquetaqueri Tasorensi. ¹⁰¿Janicampa nocoakeri nonquimoshiretacyeri? ¿Iriompa atiripee? Teve, tempa irinti Tasorensi. ¿Iriompa atiri nocoaque noveshireacayeari? Noncoaqueme noveshireacayeari atiri, tecatsi noncanteame nantenerime Quirishito.

Jero oca icamantapinitiriri Pavoro.

¹¹Meeca, noyemisanraririnte, piojeitaque nocamantajeitaquempi jaoca acantajeitajari avavisacojeitantajari. Te irio atiri ashitearone irineane. ¹²Caari ini atiri iotacaanarori oca, te irio oametenarone atiri. Irinti Jesoquirishito iotacaanarori maaroni. ¹³Piojeitaque jaoca nocantaveitaniri peerani: naro jorio,

nomoncaratanoveitaroni maaroni yamejeitari noshanincepee. Piojeitaque aisati noquisaveitarini maaroni quemisantajeitiriri Tasorentsi. Nocantirive, nocoaveitani nojocacaajeiterime iquemisantajeiti. ¹⁴Queario, nomoncaratanovetacaro maaroni yamejeitacari noshaninca: nanaacojeitaqueri maaroni noshiramparirinte. Aitaque, nomatasanoveitaroni maaroni yamejeitaniri noshanincani peeraniniri. ¹⁵Iro cantaincha peerani, tequeratsitani nontimemi, iotitanani Tasorentsi. Ineshinoncatitanani, irootaque icoyeantajanari yoavisacotajana. ¹⁶Inijaaquenari itomi, noneasantajariri: nioti jaoca icantari. Caari pinajeiveta noshaninca, iro cantaincha icoacaaquena nocamantajeitajimpiri jaoca icantajeitaqueeri yoavisacojeitantaqueeri. Te nosampitashiteariji itsipapee atiri: “¿Paita nanteri?” ¹⁷Tempa itiancaquena Tasorentsi irinti noquenquetsati. Te nojateji Jerosarequi nosampiteri itsipa itiancane: yora ijivataqueri itiancaqueri, ainti nojataque Araviaqui. Impoiji nopianaja aisati Tamashicoqui.

¹⁸Ari mava osarintsi nosavicanaque, impoiji nojatanaque Jerosarequi, irosati noneantapaacari Sejashi. Ocarataque quitaiteiri 15 nosaviquimotaqueri. ¹⁹Aisati noneaqueri Santiago, yora irirenti Avincatsarite. Te noneeriji itsipapee iroamereni Jesoshi. ²⁰Ineaquena Tasorentsi, iotaque te nontseeyaji. Queariotaque oca nosanquenataquempiri. ²¹Impoiji aisati noquenayetanaque anta Shiriaqui aisati Shirishiaqui. ²²Tequerani iriojeitenani quemisantajeitiriri Quirishito anta Joreaqui, ²³irointi iquemacotashitaquena noquemisantaji. Icantajeitaque: “Iquisajeiveiteeni maaroni, icoaveitani impoye-reajeiteeme, iro cantaincha meeca icamantajeitaqueri atiri: ‘Pinquemisantejeiteri Quirishito’”. ²⁴Iveshireimenta-quena quemisantajeitatsiri anta,

icantajeiti: “Tempa icameetsati Tasorentsi, yoavisacotaqueri Pavoro”.

Ipianaja aisati Pavoro Jerosarequi.

2 ¹Ari opeeraniitanaque, ocarataque 14 osarintsi, ari nopianaja Jerosarequi. Notsipatanacari Verenave aisati naanajiri iriori Tito. ²Iotacaaquena Tasorentsi ocameetsati nojataque. Apaniro nojatashijeivetacari yora jivatacaajeitiriri ayemisantaririnte, te nojatashijeiveteariji maaroni quemisantejeitatsiri. Nocamantasanotaqueri oca nocamantapinijeitimpiri. Nosampijeitiri: “¿Ocameetsatimpa oca nocamantajeitiriri yora itsipapee atiri? ¿Natsipetashitarompa?” Icantajeitana: “Je, cameetsa; te pantsipetashitearoji”. ³Pamene, notsipatacari iriori Tito. Caari ini jorio, iro cantaincha te incantajeiteriji: “Pintoyeantea”. ⁴Aisati itimi iriori cantavetachari: “Naro piyemisantaririnte”, iro cantaincha caari ini. Te noncajemeriji: iqueashitapaaca anta noametavacaajeitanta. Iro iqueantacari, icoaque iriote nomoncarajeitirorica isanquenare Moishishi, icoajeiveta intoyeantacaajeiteeme. Te irioteji avavisacojeitaja maaroni quemisantajeitaqueriri Jesoquirishito, te imperanajeiteji Quirishito amajeitero yamejeitacari joriopee. ⁵Te nonquemisan-timateriji yora amatavitenanemeri. Nocoasanotaque piotasanotero jaoca acantajeitajari avavisacotantajari.

⁶Tecatsi pashini incantena yora jivatacaajeitantsiri. Te incantenaji: “Impeajeitajea itsipapee atiri jorio iravisacotantajeari”. Pamene, peerani iroamereni Jesoshi inaveitani, iro cantaincha te nompincatsatashiteariji. Tempa iquempejeitaquee arori: ioti icomijeita iriori. Aisati iriori Tasorentsi, te impincatsateariji: iotiri icomijeita, tempa atiri ini. ⁷Tecatsi imperanatenata, irointi icantaque: “Queario, itiancaqueri

Tasorentsi Pavoro iquenquetsatacairi itsipapee atiri, icamantajeitiri jaoca incanteari iravisacotantajeiri. Iquempetaca itiancaqueri Petero icamantajeitiri ashanincasanori arori”.⁸Queario, yora Tasorentsi itiancaqueri Petero iquenquetsatacajeitiri joriopee. Naroquea nainti, itiancaquena noquenquetsatacajeitiri itsipapee atiri.⁹Pineaquero, ijivatacanti Santiago, Sejashi, aisati Joa. Ari iojeitaque iriori itasoncacoventajana Tasorentsi. Yaacameetsajeitavaquena, aisati yaacameetsajeitavaqueri Verenave; icantajeitaquena: “Queario, aquempetavacaajeitaca. Oquempetaca noquenquetsatacajeitiri narori ajorioririnte, pijajeite avinti pinquenquetsatacaajeiteri itsipapee atiri”.¹⁰Apatiro aisati icantaquena: “Pincavintaajeiteri ashinoncaincari”. Tempa aitaque nametacaro nocavintsaapinitiri.

Yantiri Sejashi anta Antioquiaqui.

¹¹Iro cantaincha ijatantacari Sejashi Antioquiaqui, yantaquero caari cameetsatatsi, irootaque nocantantacariri. Meeca noncamantempiro jaoca ocantari.
¹²Yareetantapaacari yoacotapinivetacari caari joriotatsi. Ocameetsataque oca, iro cantaincha impoiji yareejeitapaaca itiancane Santiago. Yora Sejashi itsaroacaavacari yora cantatsiri ocameetsati amoncarajeitero isanquenareni Moishishi avavisacotantajeiri, irootaque itentareantancariri yora yoacojeivetacari. Irointiquea oca, te oncameetsateji.
¹³Impoiji ineacojeitaqueri yora itsipapee jorio yantaqueri Sejashi, iquempejeitacari: itentareashitanajari iyemisantarininte, ipashiventacaajeitacari intsipajeitajeiri. Iojeivetaca te oncameetsateji intentareeri, iro cantaincha aisati iquempejeitacari Verenave.¹⁴Ari impoiji nareetapaaja narori. Noneantapaacariri Sejashi te intsipajeiteariri itsipapee atiri,

niotaque te irimoncarateroji oca queario-tatsiri acamantajeitiriri atiri: “Yoavisacotashijeitee Jesoquirishito, te incantajeiteeji amoncaratero isanquenare Moishishi avavisacotanteari”. Ari napatojeitaca maaroni quemisantajeitatsiri. Nocantacari Sejashi: “Tempa aviro jorio, iro cantaincha te pinquempetasanotajeiri ashanincasanori, irinti piquempetaca itsipapee ashaninca. Pamene, ¿paitasa picoacaantacariri yora itsipapee atiri inquempejeitee arori?”¹⁵Arojeitaque jorio, ashí airo ajoriojeiti. Te anquempeteariji itsipapee atiri: te iriojeiterini peerani irinti Tasorentsi.¹⁶Iro cantaincha piojeitaque ariorica amoncarajeitaquerome maaroni isanquenareni Moishishini, eirome ineacameetsateeme Tasorentsi, ioti antajeitaquero caari cameetsatatsi. Ariorica ashireteari Jesoshi, anquemisanteririca, ari incavintsaasanojeitaquee Tasorentsi, eiro iquenqueshiretajirotsi aisati caari cameetsatatsi antajeitaqueri. Ari ashirejeitacari Jesoshi, aquemisantaqueri, irootaque ineacameetsajeitanta-jeeri Tasorentsi, iquempetacantaquee te antajeiteroji caari cameetsatatsi. Te inquenqueshireteroji amoncarataquero-rica isanquenare Moishishi. Te irineacameetsatashiteariri yora moncarajeiterone-meri maaroni ocantari isanquenare Moishishi”. Irootaque nocantaqueriri Sejashi aisati maaroni nojorioririnte.

Eiro oavisacoteetsi isanquenare Moishishi.

¹⁷Pamene, ¿paita aventantacariri Quirishito? Tempa acoaque iroameetsajeitajee. Tempa oamejeitaquee isanquenareni Moishishi ainiro antane, irootaque aventantacariri Quirishito. ¿Yantacaajeitaqueempa Quirishito caari cameetsatatsi? Teve, te irantacaajeiteeroji.¹⁸Ari notseencaquero isanquenare Moishishi, eiro oavisacojeiteetsi. Noncantempiri-came meece: “Tsame amoncaratero

isanquenare Moishishi avavisacotantajeiri”, tempa ontimeme nantane. ¹⁹Pineaque, te noncanteji narori: “Nomoncarayetaquero isanquenayetiniri Moishishi”. Oquempetaca nocamaque, te nonqueshiretajeiroji. Oametaquena eiro nomatirotsi maaroni ocantiri, aisati oametaquena noquemisantaqueri Tasorensi. Iriotaque irinti oaneaquenari, naneantacari meeca; irootaque noquemisantantacariri narori. Ipajacotaca Quirishito coroshiqui, icamaque, torein. Oquempetaca notsipatacari narori coroshiqui, nocamaque, torein, ²⁰irootaque caari noquemisantantari cantavetanari: “Pinquemisantero isanquenare Moishishi pavisacotantajeiri”. Queario, aneatsiquera noni, iro cantaincha te naro aneashitachane apaniro, irinti quiso yoana Quirishito. Iriotaque itomi Tasorensi noquemisantaqueri, matacaanarori maaroni cameetsatsiri nantayetiri. Inintasanotaquena, ishinetacotaca yoyeetaqueri, icamimentaquena irootaque yoameetsatantquenari. ²¹Te irantsipetashitearoji Tasorensi ineshinoncajeitaquee. Iro cantaincha, pijiticari ariorica pimincarajeitaquero isanquenare Moishishi ari pavisacojeitaquee. Paventaquearoricame isanquenare, tecatsi pincantea pinquemisanteri Quirishito. Eirorica piquemisantiritisi, tempa yatsipetashitaca icamimentajeitaquempi.

Ariorica aquemisanti,
quiso oajeitaquee Ishire Tasorensi.

3 ¹Meeca, carashiasati, te aneroji piotantari. ¿Janicampa amatavijei-timpiri? Peerani nocamantajeitaquempini ipajacotimentajeitaquee Jesoquirishito yoavisacotantajeeri. Piotasanojeivetacaroni, meeca picomitanajaro. ²Aparonosampijeitempi: ora Ishire Tasorensi, ¿paita quiso oajeitantaquempiri? ¿Irompa

pimincarajeitaquero isanquenare Moishishi quiso oajeitantaquempiri? Tempa iro quiso oantaquempiri pishiretacarocamantitaquempiri. Tempa pinqueshiretempa. ³Piquemisantantacari peerani, ¿paita oavisacojeitaquempiri? Tempa iro Ishire Tasorensi. ¿Paitasa picoantacari meeca pimincarajeitero isanquenare Moishishi? ¿Arimpa omatacaajeitaquempi icoacaajeitaquempiri Tasorensi? ⁴Oshequi pineacatsitimentari Jesoquirishito. ¿Patsipetashitarompa? ¿Ariompa pintseencanajeri meeca? ⁵Pamene: tempa itiancaquempiro Tasorensi Ishire. Tempa itasoncacoventapinitaquempi. ¿Paita itasoncacoventantaquempiri? ¿Irompa pimincarapinitaquero isanquenare Moishishi? Teve. Tempa pishiretacari, irootaque itasoncacoventantaquempiri.

Ishiretacari Avarama Tasorensi,
irootaque inecameetsatantacariri.

⁶Tempa aisati piquempetacari Avaramani. Ishiretaroni peerani maaroni icantaqueriri Tasorensi, irootaque inecameetsatantacariri, oquempetaca te iranteroji caari cameetsatsi. ⁷¿Janica meeca shanincatanotajariri Avaramani? Tempa yora quempetasanotajariri: yora shiretasanotajariri Tasorensi, quemisantasnotiriri. ⁸Ora irineane Tasorensi oquenquetsacotiri itsipasatipee atiri. Ocantitani coajica inquemisantajeitaje atiri iravisacotantajeeri. Yora Tasorensi peerani icamantaquerini Avaramani, icantiri: “Pishiretaquena, irootaque notasoncacoventantaquempiri. Aisati nonquempetacari yora itsipapee atiri: ariorica irishiretena, nontasoncacoventaqueeri”. ⁹Aitaque icanta, itasoncacoventajetiri maaroni quemisantsiri, iquempetacantajeitaqueriri Avarama. ¹⁰Ainiro inaveta coatsiri irimoncarajeiterome

maaroni isanquenareni Moishishi, iravisacotantajeami. Te irimateroji, irootaque iroasanquetantajeitariri Tasorentsi, intiancajeiteri Sharincaveniqui. Pineaquero, ocanti Sanquenarentsi: “Iroasanquejeiteri Tasorentsi yora caari moncaratasanojeitiro maaroni isanquenatiniri Moishishi”.¹¹ Pineaquero, tecatsi ancantero amoncarajeitero ora sanquenarentsi. Eiro ajititsi amoncaratasanojeitero avavisacotantajeami. Eiro inecameetsatashijeiteetsi Tasorentsi, irointi icantaque: “Ariorica pishiretena, ari noneacameetsajeitaquempi, impoiji pincantaitiyempani paneajeitanaje inquitequi”.¹² Aisati isanquenareni Moishishi, te oamejeiteeji ashireteari Tasorentsi avavisacotantajeami, irointi oamejeitaquee ancantatiyempani amoncaratasanotero ocantayeteeri, avavisacotantajeami.

Yantaqueeneri Quirishito.

¹³Te amoncaratapiniteroji isanquenareni Moishishi, irootaque incantantee-meri Tasorentsi: “Pijate Sharincaveniqui”. Te amoncarajeiteroji, iro cantaincha icamimentaquee Jesoquirishito, yoaviscojeitaquee. Tempa ocantitani Sanquenarentsi: “Yora pajacotachaneri inchatoqui incamimentera maaroni antirori caari cameetsatatsi”.¹⁴ Ari icamimentajeitaqueri pashinisatipee atiri, yoaviscojeitantariri maaroni quemisantajeitiriri. Aisati iquempejitani iriori yora Avaramani, iquemisantini, irootaque yavisacotantajari. Aisati Ishire Tasorentsi, quiso oajeitaquee maaroni arori quemisantajeitiriri. Irootaque icashiacaicatariniri Avaramani peerani.

Ichashiacaicatariniri Tasorentsi Avaramani.

¹⁵Pinquenqueshiretero, noyemisantarininte, oca amejeitacari. Ariorica acoaque ancashiacyeri ashaninca amperi paitapeerica, asanquenateneri acashia-

caqueriri, iriotasanotantearori. Aisati asanquenatero avajiro. Impoiji tecatsi ancantea ampashinitapinitero, eiro amatirotsi amataviteri yora acashiacaqueri paitapeerica.¹⁶ Aisati iriori Tasorentsi, icantiri Avarama: “Ariorica pinquemi-santena, ari noavisacotajempi”. Aisati icantaqueri: “Nontianqueri pishaninca, coajicani, iroaviscojeitajeri maaroni quemisanterineri”. Pamene, te incanteriji: “Nontiancajeiteri oshequi oavisacojeitem-pine”. Teve. Irinti iquenquetsatacotaqueri aparoni ishaninca, oavisacotantatsineri: yora Quirishito.¹⁷ Pineaquero, otimi icantaqueriniri Tasorentsi Avaramani peerani. Icantacariniri, tequerani ontimeni isanquenareni Moishishi. Impoiji ocarataque osarints 430, ari isanquenatacaqueri Tasorentsi Moishishi. Te impashiniteroji oca icamantacariniri yora Avarama, te iramatavite-riji.¹⁸ Incoaque Tasorentsi amoncaraterome isanquenare Moishishi avavisacotanteameri, eiro aquempetarime Avarama. Te ontimeniji irimoncaratan-tearomeri. Te iranteroni iriori ocantiri isanquenare Moishishi, irointi iquemisan-taqueri Tasorentsi, irootaque icantantacari: “Noavisacotempi”.

¹⁹Ari, ¿paita otimantacari isanquenare Moishishi? Iotacaajeitaquee ainiro antane, irootaque acoajeitancari oavisacojeiteeneri. Ipocaque Quirishito, te meeca ancoajeroji isanquenare Moishishi. Tempa iriotaque Quirishito ishaninca Avarama: yora icamantitaniri peerani Tasorentsi: “Nontiaquempiri coajica oavisacotempineri”. Aisati noncamantempiro oca: yora Tasorentsi icantiri inampire: “Pincamantaiteeri Moishishi noneane”. Impoiji iriori Moishishi yovaaqueneri atiripee irineane Tasorentsi.²⁰ Irintiquea Avarama iriotasana-taque neanatasanaotaqueriri Tasorentsi, tecatsi ovayenerine irineane. Apaniro

icamantaqueri, apaniro ini. ²¹Peerani icantiri Tasorentsi Avarama: “Ariorica pinquemisantena, noavisacotempi”. Ari impoiji isanquenatacari Moishishi, otimantacari isanquenare. ¿Onashitampa oca icantaqueriri Moishishi? Teve. Meeca ayojeiti te oavisacojeiteeji isanquenare Moishishi, tecatsi oncante oameetsatasa-nojeitee. ²²Oamejeitaquee sanquenarentsi ainiro antanepee maaroni. Te amajeite-roji icoacaaqueeri Tasorentsi. Iro cantaincha timatsi icantajeitaqueeri maaroni arori shirejeitariri: ariorica anquemisanteri Jesoquirishito, aitaque iroavisacojeitaquee.

²³Peerani, oshequi operanajeitaquee isanquenare Moishishi, oquempetacari variria, ariorica iroiminqueaquee caravosoqui. Oquempetacantaquee oquempoyeajeitaquee irosati ipocantacari yora aquemisantajeitaqueri. ²⁴Aisati isanquenare Moishishi oshiaqueri oametantatsiri: oamejeitaquee ainiro antane, acoantacari anquemisantajeiteri Quirishito, iroameetsajeitantajeeri, inquempetacantajee te anteroji caari cameetsatatsi. ²⁵Meeca ayojeitaqueri Quirishito, aquemisantaqueri. Aitapaji. Te ancoajeji meeca oametajeeneri anquemisanteri: tempa moncarataca.

**Arojei quemisantatsiri,
aquempejeitacari Avaramani.**

²⁶Aquemisantajeitaqueri Jesoquirishito, irootaque itomintantajeitaqueeri Tasorentsi. ²⁷Pamene, aisati avaotisantimentari, iojeitantacari atiri aquemisantaqueri, aisati ashanincajeitacari. ²⁸Meeca acarajeitaqueri jorio, caari joriotatsi, aisati acarajeitaqueri pimantaari, caari pimantacha, shirampari, tsinane, maaroni: amoncaratavacaajeitaca aquemisantajeitaquee. Iro cantaincha jaocarica acantajeitari, eiro aquenqueshi-retirotsi. Pineaquero, ariorica ashaninca-

tacari Jesoquirishito, ashanincatavacaajeitaca. ²⁹Aisati oquempetaca, ariorica aquemisantaqueri Quirishito, aquempejeitajari Avarama. Tempa icantirini peerani Tasorentsi: “Pinquemisantenarica, aitaque nontasoncacoventaquempi”. Irootaque icantajeitaqueeri meeca arori, eiro yamataviteetsi, irootaque aquempejeitantajariri Avaramani arori.

**Jaoca acantaveitaniri peerani, tequerani
impoqueni Quirishito.**

4 ¹Piotacotiri yameyetacari ashitaaran-tachari. Itimirica itomi, icoaque imperi maaroni yashiyetari. Aisati icantiri ishaninca: “Ariorica noncamaque, pinquempoyeajeneriya notomijaniqui maaroni nashiyetari. Ariorica irantearitanaje, ari pimpajeri maaroni”. Ari icoaque imperi maaroni; tempa iriotaque ashijeivetariri itomi maaroni, iro cantaincha ainiroquera ijananequiti, tequeratsita impincatsateaji. Oquempetaca te irishineteriji nampirentsipee impimantayetero iroaararo nampitariri, aisati tequera irishineteri itomi impimantayetero iroaararo. ²Itimi quempoyejiriri, aisati quempoyejiniriri yashiyetari. Ariorica omoncaratapeempa icantaqueriri iririni, aitaque irishineteri paitapeerica. ³Aitaque aquempevetaniri peerani arori, tequerani impoqueni Quirishito. Oquempoyeaveiteeni isanquenare Moishishi, oamejeiveiteeni antapinijeitironi pomerentsiyetachari. Aquemisantashiyevetaroni icantayetiri atiri, iperanajeiteeni. ⁴Impoiji omoncarataca icantaqueriri Tasorentsi. Itiancaqueri itomi, otimaqueri tsinane, jorio inavetapaaca, ipomerentsimenta-queru isanquenare Moishishi. ⁵Ayojeita-que opomerentsitaca amajeitero ocantayetiri isanquenare Moishishi. Aquempeveitarini pimantaari, iro cantaincha yoavisacojeitajee, irootaque itomintasanajeitantajeeri Tasorentsi.

⁶Tempa meeca arojeitaque itomipee, irootaque itiancantajeitaqueerori Ishire Itomi, quiso oajeitaquee. Irootaque meeca acantajeitantajariri: “Apa Tasorentsi”. ⁷Te arojei meeca pimantaari, meeca arojeitaque itomipee Tasorentsi. Ineshinoncajeitaquee, timatsi icashiaca-aqueeri maaroni.

Ariorica apomerentsiventajaro isanquenatiniriri Moishishi joriopee, aquempetacari pimantaari.

⁸Peerani, te piojeiveitarini Tasorentsi, pijitasorentsijeiveitarini irovetsicane Tasorentsi. Tecatsi incantajeitea intasorentsite. ⁹Iro cantaincha meeca piojeitaqueri Tasorentsisanori, tempa aisati iriotaque iojeitaquempiri. ¿Paita picoajeitantacari pinquempetajea peerani? ¿Picoaquempa pinquempetajea aisati pimantaari? ¿Paita pinquemisantashitanteariri caari tasorentsitatsi? Eiro imatirotsi iroavisacotempi. ¹⁰Pinashita-caapiniyetaro quitaiteeripee, cashiripee, osarintsipee, paitapeerica. Iro pinashita-caapiniyetantarori picoajeiveta irineacameetsatempime Tasorentsi. ¹¹Oshequi nocantashireti meeca. ¿Natsipetashitampa nopomerentsiventimpí noamejeivetimpí?

Iquenqueshireyeteri Pavoro.

¹²Meeca, noyemisantaririnte, pinquempejeitena: eiro pipomerentsiventajarotsi isanquenare Moishishi. Tempa nojocajiro narori, meeca noquempejeitajimpi avirori, te pimpomerentsiventearoni peerani, te pioveitearoni. Nojatashitan-timpiniri peerani, te pintseencajeitavaquenaji. ¹³Aisati piojeitaque nocamantantapaaquempiniri jaoca pincanteari poavisacotea, nojoquuitapaaca narori. ¹⁴Pipincayevetari mantsiyetatsiri, iro cantaincha te pimpincavaquenaji nainti, cameetsa poisavicavaquena. Impoqueri-

came inampire Tasorentsi, pincavintsayerime; aisati impoquericame Jesoquirishito, pincavintsayerime iriori. Iro cantaincha narotaque nainti areetaquem-piri. Oquempetaca pincavintsaavaquerime iriori, picavintsaasanotavaquena narori. ¹⁵Peerani piquimoshirementavaquena, ¿paita caari piquimoshirejeitanta meeca? Peerani picavintsaajeitaquena catsini. Arioricame noncantempime: “Pinquitsoreajenaro poqui, pimpenaro”, ari pimpaquenarome, arioricame pimataquerome. Niotaque oshequi pinintसानोjeitaquena. ¹⁶Ari queariosanotaque oca noamejeitaquempiniri, ¿meecampame piquishimentaquenaro?

¹⁷Queariompia: icoaque iroveshireacayempi yora amatavitimpiri, iro cantaincha eiro yamitacotasantimpitsi. Icoaque pintseencajeitena, pinquemisantanteariri irinti, piveshireimentanteariri irinti.

¹⁸Pamene, ocameetsati ancoaque ancavintsaavacaajeitea, eiro amatavitava-caajeitatsi. Ariorica nontsipatempí, ocameetsati ancavintsaavacaajeitea, aisati ariorica nonteentareanajempi, ancavintsaavacayeani aisati. ¹⁹Aisati, noshaninca, noquempetaca: oshequi noquenqueshireacotaquempi catsini, tequera pimoncarateroji icoacaaquempiri Quirishito, tequera pinquempeteari iriori. Nonquenqueshireacotempini, noncanteani, irosati pinquempetanteariri.

²⁰Nocoasanovetaca nontimimotanajempime, cameetsa nonquenquetsatacana-jempime. Te niotacotempiji paitarica noncantempiri ontimanteari piotanteari.

Ariorica aquemisantaque, avavisacojeitaca; eiro amoncaratajirotsi isanquenare Moishishi avavisacotantajeari.

²¹Ariorica pijivetaca pimoncarataquero isanquenare Moishishi pavisacotantajeari, pincamantena: ¿piotasantitrompa ocantiri isanquenare? ²²Ocanti itimini

itomi Avarama apite. Aparo ashi inampire yamanantiri. Irio pashini ashi ijinasanori, te iramananteroji irointi. ²³Yora otomi inampire iquempetasanojeitacari itsipapee jananequipee. Iro cantaincha inashita irinti otomi ijina. Icantitacaroni Tasorensi: “Intime pitomi”. Impoji omoncarataca icantaquerori, itimaque. ^{24,25}Ainiro oshiacantaqueri oca tsinane apite. Opajita nampirensi Acara. Oshiacantaqueri iroori pomereventsiventirori isanquenare Moishishi. Isanquenataquero iriori icantaqueriri Tasorensi anta toncaariqui timatsiri anta Araviaqui, pajitachari Shinai. Otomi ora nampirensi, iquempetajaro iriniro: nampirensi ini iriori, ainiro peranatariri. Aisati oshiacantaqueri nampirensi joriopee timayetsiri meeca Jerosarequi: yatsipetashitacaro ipomereventsiventajetacaro isanquenare Moishishi, maaroni. ²⁶Iro cantaincha ainiro pashini tsinane: ijinasanori Avarama. Oshiacantaqueri iroori savicatsineri pashiniqui Jerosare, timatsiri anta jenoqui. Arojei savicatsineri anta, anampijeitearo irointi. Te arojei nampirensi, te ampomereventsiventearoji isanquenare Moishishi, eiro apomereventsiventarotsi catsini. ²⁷Irootaque isanquenatacotaqueniri Isayashini: “Pishiravarovetaca, iro cantaincha piveshireanaquea. Tequera pintimeri pitomi, iro cantaincha pinquimoshiretasannotanaque, irishequiasanotanaque pisarippee, eiro ishequititsi osarippee pinampire”.

²⁸Meeca, noyemisantaririnte, aquempjeitacari ainti Isaca. Ainiro icashiacaqueriri Tasorensi Isaca, aisati ainiro icashiacaajeitaqueeri arori. ²⁹Peerani, yora Ishimairi, yora otomi nampirensi, iquisapinitaqueri irirenti: yora Isaca. Aisati oquempetaca, yora coatsiri amoncarajeitero isanquenare Moishishi iquisapinijeitaquee arori: tempa arojeita-

que quiso oajeitaquerori Ishire Tasorensi. ³⁰Jero oca ocantiri isanquenatiniri Moishishi: “Icantiri Tasorensi Avarama: ‘Pintiancajero ora pinampire aisati otomi. Yora Ishimairi, eiro iquempetasanotaritsi otomi pijinasanori. Yora Isaca irashitasanotajearo maaroni timimojeitimpiri’”. ³¹Pineaqueero, noyemisantaririnte, te ashanincajeitearoji ora nampirensi, eiro apomereventsiventarotsi isanquenare Moishishi. Irointiquea ashanincajeitacari itomisanori Avarama: yora Isaca. Aquemisantaque, irootaque itomintaqueeri Tasorensi.

Pincoyeanontea: terica pininte pimpeajea jorio, ari pinquemisanteri Quirishito.

5 ¹Tempa peerani yoavisacotajee Quirishito, irootaque meeca ocameetsatantari ajatasanojeiteri. Te incoyeji anquempetajeari pimantaari. Eiro piccoitsi imperanayeetempi pimayetero paitapeerica pavisacotantajeari. ²Pinquemisantasanotena. Narotaque Pavoro camantimpirori oca. Ariorica pintoyeantea, pijiticari oavisacotempi; patsipetashitarocari paventavetacarinini Quirishito, eiro imatirotsi iroavisacotempi. ³Noncamantajempi aisati: ariorica pintoyeantea pavisacotantajeari, ocameetsati pimoncarajeitero isanquenare Moishishi, pintsoteaqueero maaroni catsini. Eirorica pimoncarajeitrotsi maaroni, eiro pavisacotajitsi. ⁴Ariorica pininti pimoncaraajeitero sanquenarentsi irineacameetsatan-tempiri Tasorensi, te pincoyeji irineshinoncatempi. Pitseenquircari Quirishito. ⁵Iro cantaincha ariorica ashinetero Ishire Tasorensi oamejeitee anquemisante, ayojeitaque irimoncaratero Tasorensi maaroni icantaqueri. Aitaquequea ayojeitaque iroameetsatasanojeitee. ⁶Ariorica aquemisantasanotaqueri Jesoquirishito, eiro isampiteetsi Tasorensi: “¿Pitoyeantampa?” Teve. Te inquenqueshireteroji. Ariorica

anquemisante, ari anintajeiteri itsipapee atiri. Irootaque icoacaaqueeri Tasorensi.

⁷Peerani cameetsa piquemisantajeiveitani. Pishiretasanojeivetacaroni quearioyetsatsiri. ¿Janicampa jocacaaquempirori piquemisanti? ⁸Te irijocayempiro irinti Tasorensi. Iriotaque coyeaquempiri iroavisacotempi. ⁹Otimirica tapiacaarori tanta capichaji, ari otapiacaacaro oshequi tanta, otsoteanaquero, maaroni. Aisati oquempetaca, aparoni amatavitantatsiri yamatavijeitiri oshequi atiri. ¹⁰Noshiretacari Tasorensi, niotaque inquenqeshiretaajempi, pinquempjeitantajenari. Te niojei janicarica ashereaquempiri, iro cantaincha coajica iroasanqueteri Tasorensi. ¹¹Timatsi cantanirotatsiri nocamantiri atiri irimoncaratero isanquenare Moishishi. Noncantempime: “Pintoyeantea pavisacojeitantajeari”, eiro nocamantimpime: “Icamimentaquee Quirishito coroshiqui yoavisacojeitajee”. Impoji eirome iquisaname joriopee. ¹²Timatsi yora cantanivetimpiri pintoyeantea, oshequi yashereajetaquempi. Nocoaveta narori iraitsoquirempame iriori.

**Ariorica pinintavacaajeitea,
ari moncarataca.**

¹³Meeca, noyemisantaririnte, noncamentempi. Icoyeaquempi Tasorensi iroavisacojeitempi, te irinintacayempiji pimpomerenstiventearo isanquenareni Moishishi. Yoavisacojeitaquempi, iro cantaincha te irishinetempiji pantero paitapeerica picoiri. Icoaque pinintavacaajeitajea maaroni, aisati pincavintsavacaajeitajea. ¹⁴Jero oca isanquenatiniri Moishishi: “Oquempetaca avisati cavintsaaajancha, aisati pinquempjeiteri itsipapee, pincavintsaaanojeiteri, pinintasanojeiteri”. Ariorica amajeitaquero oca, cameetsa. Moncarataca. ¹⁵Iro cantaincha piquisavacaajeitaca, oshequi picatsimajeitaque: oquempetaca patsicavacaajeitaca, aisati oquempetaca pipatsareavacaajeitaca, patsare. Ariorica pincatsimajeite,

aitaque pimpoyereavacaajeitajea; eiro pimajeitirotsi pinquemisantajeite.

**Acoajeivetari arori, aisati
ocoacajeitaqueeri Ishire Tasorensi.**

¹⁶Noncamantasanotempi: pincantero Ishire Tasorensi oamejeitempi paitapeerica panteri. Eiro pantirotsi caari cameetsatsi picoayevetari avirori pantajeitemeri. ¹⁷Timatsi caari cameetsatsi acoayevetari antajeiteri arori, aisati timatsi ocoacavetaqueeri Ishire Tasorensi antacayeemeri. Te omoncaratavacayejaji. Onashiyetaca, irootaque caari amajeitantaro cameetsayetsiri antemeri. ¹⁸Ariorica anquemisantero Ishire Tasorensi paitarica antacayeeeri, eiro aquenqeshiretirotsi amoncaratero isanquenare Moishishi.

¹⁹Ayojeitaquero caari cameetsatsi antapinijeitiri: ineavintsatiro shirampari caari yai, oneavintsatiri tsinane caari ai, antavintsatavacaajeita: acantirove, te ampashiventeajaji. ²⁰Aisati ashiaacantaqueri paitapeerica ajitasorensitashiyetari, amatsitanti, aquisavacaajeita, aquisatsatavacaajeita, anevetaro paitapeerica yashiyetari ashanincepee, atsimaaajencata, te ancavintsavacayejaji, te aacameetsatavacaajeitejaji, irointi aquisashireavacaajeita. ²¹Aisati anintitaqueri aitayeteri irovaararo ashaninca, avanti, ashinquejeita, maaroni. Peerani nocamantitimpini: “Queariompiya. Ariorica antapinitero maaroni ocapee, eiro amatirotsi ajate anta ipincatsarintinta Tasorensi”. Meeca nampiitajempiro: “Queariompiya. Pantirocari caari cameetsatsi”.

²²Iro cantaincha Ishire Tasorensi oamejeitaquee anintavacaajeitaca, aquimoshirejeitaque, aveshireajeitaca, eiro aquisavacaatsi, acavintsavacaaca, acameetsataque, eiro amatavitantitsi, ²³aneshinoncatavacaaca, eiro antayetirotsi caari cameetsatsi acoavetari antemeri. Te ontsaneapitsateeriji isanquenare Moishishi maaroni oca. ²⁴Yora pajacojeitachari coroshiqui icamajeitaque,

torein: tecatsi irantaje aisati. Ariorica aquemisantaqueri Jesoquirishito, oquempetaca arosati pajacotajancha, oshiacantaca acamaque, tecatsi ancantea ancoajeitaje antajero caari cameetsatsi. ²⁵Iro cantaincha oshiacantaca oaneajee aisati Ishire Tasorentsi, iotacaajeitajee aisati. Tsame ancantero oamejeitee paitapeerica antayeteri. ²⁶Eiro ashemetitsi, aquisacaari-cari itsipapee. Eiro anintashireitiritsi ioyetiri iriori.

Jero oca pashini yoameyetiriri Pavoro.

6 ¹Noyemisantaririnte, ariorica pineeri pishaninca yantiro caari cameetsatsi, pincanero Ishire Tasorentsi oametempi pincavintsayeri. Queariya, piquishiricari, jentsiquero pineanateri. Queariompiya pantirocari avirori caari cameetsatsi. ²Pincavintsaavacaajeitea. Ariorica pincavintsante, pimataquero yoamejeiteeri Quirishito. ³Itimirica shemetatsiri, yamatavijataja irisati. Te incameetsateji iriori. ⁴Pinquenqueshireempa: piote ocameetsatirica pantayetiri. Ariorica ocameetsati pantayetiri, pinquimoshiretanaque. Eiro pishemetitsi, eiro pitseenquiritsi itsipapee, ⁵tempa ainiro antajeitiri maaroni.

⁶Ocameetsati ampapiniteri oamejeiteerori irineane Tasorentsi maaroni coiteimojeitacari. Te ancoveji incoiteayetearo paitapeerica. Irinti quemisantajeitiriri pajeiterineri. ⁷Queariompiya, eiro pamatavijeitajatsi avisati, te incoacayeeji Tasorentsi antseencajeiteri. Paitapeerica apanquiyetiri, aayetajero oitsoquipee oshanincasanori iroori. ⁸Oshiaquero ariorica antapinitero caari cameetsatsi acoajeivetari, ari ajate Sharincaveniqui. Ariorica antapinitero ocoacaqueeri Ishire Tasorentsi, ari ancantaitatitempani asavique inquitequi. ⁹Eiro aperatarotsi antapinitero cameetsatsiri. Ariorica ancantaititempani antapinitero, ari impinajeitaquee coajicani Tasorentsi. ¹⁰Ari ocameetsati ancavintsaajeiteri

itsipapee atiri, aiqvero ajatatiye ancavintsaasanojeiteri ayemisantaririnte.

Ari yovecarataquerori isanquenare.

¹¹Narotaque Pavoro sanquenatimpirori oca: pineaquero, antearo nosanquenataquero. ¹²Yora coanirovetachari pintoyeantea, icoaque yora ijorioririnte irineacameetsanirojeiteri. Te irinintaniroteji inquisajeiteri. Incantempime: “Icamimentaquempi Quirishito coroshiqui yoavisacojeitajimpi”, ari inquisajeiterime ishaninca. ¹³Maaroni yora toyeantachari te irimoncarateroji isanquenare Moishishi, iro cantaincha icoanirovetaca pintoyeantea avirori irishemetanteari. Irishemetimentempime, incanterime ishaninca: “Pineaquero, notoyeantacaacari. Iquemisantajeitaquena”. ¹⁴Iro cantaincha te oncameetsateji noshemete nainti, irointi nocoaque noveshireimenteari yora Avincatsarite Jesoquirishito: yora pajacotimenteari coroshiqui. Meeca oquempetimotaquena nopajacotaca narori. Nocamaque, te meeca noncoayetajeroji caari cameetsatsi icoayetiri atiri, te nonquenqueshiretajeroji caari cameetsatsi. ¹⁵Eiro yavisacotashitatsi maaroni toyeantachari, aisati eiro yavisacotashitatsi caari toyeantacha. Iro cantaincha ariorica impashinitacaajee Tasorentsi, ari avavisacotajea. ¹⁶Ariorica piquemisantaquero oca, ari ishanincataquempi Tasorentsi, aisati nocoaque cameetsa irisavicacayempi, aisati nocoaque incavintsayempi.

¹⁷Meeca eiro pashereanatsi, eiro pipiatsatanatsi. Narotaque antaveetiniriri Jesoshi, irootaque iquishimentantanarori tseencantatsiri, irootaque namashiyetanacari novatsapeequi.

¹⁸Meeca, noyemisantaririnte, nocoaque irineshinoncajeitajempi aisati Avincatsarite Jesoquirishito. Tempa aitaque icantapinijeitimpiri.

Ari ocarati. Narotaque sanquenatirori oca: *Pavoro*

YORA PAVORO ISANQUENAJEITINIRI EJESOSATI

Ivetsajeitari Pavoro ejesosati.

1 ¹¿Savicajeitatsimpi, ejesosati? ¿Tecatsimpa oajeitempine? Narotaque Pavoro sanquenajeitimpirori oca. Itiancaquena Jesoquirishito noquenque-tsatacotiri, irootaque icoacaaquenari Tasorentsi. Meeca nosanquenajeitimpiro maaroni quemisantajeitatsiri, maaroni quearioventiniriri Jesoquirishito icoacaa-jeitaquempiri. ²Nocoaque irineshinonca-jeitempi Apa Tasorentsi, cameetsa irisavicacajeitempi. Aisati iriori Avincatsarite Jesoquirishito: irineshinonca-jeitempi, aisati cameetsa irisavicacaa-jeitempi.

Icoacaaquee Tasorentsi ayojeiteri.

³Tsame ancamantajeiteri atiri icamee-tsatanoti catsini Tasorentsi: yora iriri Avincatsarite Jesoquirishito. Aquemisan-taqueri Quirishito, meeca icantajeitaquee Tasorentsi: “Pisaviquimojeitena coajica anta inquitequi jenoqui”. Tempa aisati meeca oshequi icavintsaajeitaquee, aveshireimentasanotacari catsini, oquempetaca asaviquimojeitaqueri inquitequi. ⁴Peerani, tequerani irovetsi-queroni quipatsi, icoyeajeititaqueeni, iotitacani iroavisacojeitee Quirishito. Iquenqeshiretitacani: “Noameetsatasa-nojeiteri maaroni quemisantajeiterineri notomi”. Meeca inecameetsajeitaquee, iquempetacantajeitaquee te anteroji caari cameetsatsi. ⁵Inintasanajeitaquee

catsini, irootaque itiancantacariri Jesoquirishito icamimentajeitaquee. Aitaque icantitani peerani: “Nontominta-jeiteari iriori quemisantatsineri”. Irootaque icoacaaajeitaqueeri maaroni. ⁶Meeca ashanincajeitacari Itomi inintasa-notiri, irootaque ineshinoncajeitanta-queeri. Icavintsaasanojeitaquee catsini. Tsame ancantaitatitempani ancamanta-jeiteri atiri: “Icameetsatasaanotaque Tasorentsi”. ^{7,8}Ineshinoncatasanojeita-quee maaroni, inintasanajeitaquee catsini. Itiancaqueri Itomi icamimentajei-taquee, aparajatimentajeitaquee iriraja. Icavintsaasanojeitaquee, meeca te inquenqeshiretajeroji aisati caari cameetsatsi antajeitiri. Tempa aitaque yoavisacojeitaquee. Iotacaaajeitaquee, otimantacari ayojeitantajari. ⁹Aisati iotacaaajeitaquee paita itiancantacariri Quirishito: te ayojeiveitearoni peerani. Aitaque, peerani icoitacani intianqueri iroavisacojeitajee. ¹⁰Jero oca icoacaa-jeitaqueeri maaroni: coajica impincatsarita-sanotanaque catsini Quirishito. Ariorica omoncarataquea, irampatojeitaquee maaroni catsini: inquiresati aisati maaroni quipatsisati. Impoiji impincatsa-riventajeitaquee, maaroni.

¹¹Ari aquemisantajeitaqueri Quirishito, meeca timatsi icoacaaajeitaqueeri Tasorentsi. Tempa icoyeajeitaquee peerani, catsini: tequerani irovetsi-queroni quipatsi. Timatsi aisati icashiacaajeita-queeri: irimajeitaqueero maaroni

icantaqueeri. ¹²Narojeitaque jorio jivajeitatsiri noquemisantajeitaqueri Quirishito, irootaque icoantacari Tasorentsi nompincatsajeiteri, aisati noncamantajeiteri atiri: “Icameetsatasanotaque Tasorentsi”. ¹³Aisati avirojei: piquemacojeitaqueri Quirishito. Piquemaque ipocashjeitaquee yoavisacojeitaquee. Queario oni, irosati piquemisantantacari. Peerani icantajeitaquee Tasorentsi: “Ariorica pinquemisantaquena, quiso oajeitempi Noshire”. Meeca quiso oajeitaquempi, ayojeitantacari pishanincatacari Quirishito. ¹⁴Ariorica quiso oajeitaquee, ayojeitaque queario, intoteajeero Tasorentsi maaroni icantitaqueeri. Eiro yamataviteetsi. Tempa queario irajeitanajee inampiqui antsipajeitanteariri iriori. Tempa icameetsatasanotaque. Tsame aisati ancamentajeiteri maaroni atiri: “Icameetsataque Tasorentsi”.

Ipsonquitiri Pavoro Tasorentsi.

¹⁵Noquemacojeitaquempi avirori, piquemisantasanojeitaqueri Avincatsarite Jesoshi, aisati pinintasanajeitaqueri piyemisaririnte. ¹⁶Irootaque nocantantari Tasorentsi: “Ariove pimatacaaqueeri ejesosati”. Nocantani nopasonquitacoventajeitimpi, aisati nocantiri Tasorentsi iramitacojeitempi. ¹⁷Noquenquetsatacaapinitiri yora iriri Avincatsarite Jesoquirishito: tempa icameetsatasanotaque. Nocantiri: “Piotacaajeiteri ejesosati, piotacaajeiteri jaoca picanta avirori. ¹⁸Piotacaasanojeiteri, iriojeitantearori jaoca noncantajeiteari, coajica: tempa ocameetsatasanotaque catsini anta inquitequi”. Tempa yashjeitaquee, irootaque nocoantacari piojeite ocameetsatasanojeiti maaroni icashiacaajeitaqueeri. ¹⁹Oshequi catsini itasorentsitanotaque, te ompeempaji itasorenca. Itasoncaventajeitaqueri maaroni

quemisantajeitiriri. Peerani iotacaajeitaquee itasorentsitanotaque, ²⁰tempa yoitinaajiri Quirishito. Yaanaajiri anta inquitequi, aisati isavicaajiri anta iracosanoriqui icaratajiri ipincatsariventantajeiti. ²¹Icantaqueri: “Notiomi, nocoaque pimpincatsariventajeiteri maaroni pincatsarijeivetachari, savicacantajeivetachari, jivatacaantajeivetachari, maaroni. Pimpincatsariventajeiteri maaroni timajeitatsiri meeca, aisati pimpincatsariventajeiteri maaroni timajeitajantsineri coajicani”. Ari yanaacojeitiri maaroni, ipincatsaritanotaque catsini. ²²Aisati icantaqueri: “Avirotaque cantacanterone jaocarica oncantayeteari paitapeerica, aisati pimpincatsariventajeiteri maaroni quemisantajeitimpiri. ²³Impincatsajeitempi iriori. Tempa piquempetasanotaquena narori, pitasorentsitanotaque catsini, picantani pitasoncaventajeitaqueri maaroni quemisantajeitimpiri”.

Itasoncaventajeitiri Tasorentsi quemisantajeitiriri.

2 ¹Peerani, avirori, te piojeiveitarini Tasorentsi, pantapiniveitaroni caari cameetsatsi, irootaque pijajeitanteameri Sharincaveniqui: iro cantaincha yoavisacojeitaquempi Tasorentsi, irootaque pijajeitantajeari inquitequi, paneasanojeitapaaje anta. ²Piquempejeiveitarini yora itsipapee tseencantatsiri, piquemisantaveitarini Satanashi, yora pincatsariventiriri iamaaririnte tasoncantavetachari. Iriotaque pincatsariventajeitiriri maaroni piatsajeitariri Tasorentsi. ³Tempa peerani aquempeveitarini yora tseencantatsiri, antapiniveitaroni caari cameetsatsi acoajeiveitaroni. Acantani, antapiniveitaroni paitapeerica acoaveitaniri, paitapeerica aquenqueshireveitaniri. Irootaque iquishmentantavetaqueerori Tasorentsi, iquempetacaantaquee itsipapee atiri.

^{4,5}Peerani, antapiniveitaroni caari cameetsatsi, ashi aironi: te ayojeiveitearini Tasorentsi, aisati ajajeiteme Sharincaveniqui. Iro cantaincha yashi yoiro icavintsaasanojeitaquee, oshequi inintasanojeitaquee. Peerani yoaneajiri itomi, icantani meeca yaneanaji. Meeca aisati yoavisacojeitaquee arori, ancantaitatitempani asaviquimojeiteri inquitequi. Tempa ineshinoncajeitaquee, irootaque yoavisacojeitantajeeri.

⁶Icamaque Quirishito, impoiji yoitinaajiri Tasorentsi. Aisati arori aquempevetacari, ipashinitacaaquee Tasorentsi arori, aveshireimentajeitacari meeca Quirishito; aisati ayojeiti ancarajeiteri coajica anta inquitequi. ⁷Incantaitatitempani iriotacaaajeitajee, oshequi catsini ineshinoncatasanojeitaquee, icavintsaasanojeitaquee: yashi yoiro. Iro icavintsaajeitantaqueeri ashanincatacari Jesoquirishito. ⁸Piquemisantaqueri, irootaque yoavisacotantaquempiri Tasorentsi: tempa oshequi ineshinoncatasanojeitaquempi. Tecatsi pincantajeitea poavisacojeitajea avisati, irintiquea yoavisacotashijeitaquempi. ⁹Arosatime oavisacotajanchaneme, tempa ashemejeiteme. ¹⁰Iro cantaincha itasoncaventajeitaquee Tasorentsi ashanincajeitantacariri Jesoquirishito, icoaque antayetero cameetsayetatsiri. Peerani, tequerani antimeni, otimini icoacaajeitaqueeri antayeteri. Icoaque ancantaitatitempani antapinijeitero.

Ariorica aquemisantaqueri Quirishito, ari aquempetavacaajeitaja maaroni: jorio aisati pashinisatipee atiri.

¹¹Te avirojei jorio. Ipincajeitaquempi iriori, icanti: “Te iriojeiteriji pashinipee atiri Tasorentsi, te intoyeanteaji”. Ijijeiveta iotiri irinti Tasorentsi.

¹²Pinquenqueshirejeitero jaoca picantajeitani peerani: te pinquemisantajeivei-

tearini Quirishito, te pishanincajeiteariji joriopee, te piojeiveitearoni icantayetiri Tasorentsi, aisati te piojeiveitearoni icashiacaajeitaqueeri. Te pioveitearini Tasorentsi, aisati te pioveiteani icoaqueni irineshinoncajeitempi. ¹³Queario, peerani te piojeiveitearini Tasorentsi, oquempetaca pitimini arejiqui catsini. Iro cantaincha icamimentajeitaquempi Quirishito, aparajatimentajeitaquempi iriraja. Meeca piquemisantaqueri, pishanincajeitacari. Irootaque piojeitantacariri Tasorentsi, quiso poasanojeitantacariri. ¹⁴Peerani narori, aisati maaroni nojorioririnte, noquisajeiveitimpini: narori aisati iriori maaroni pishanincapeeni, aisati piquisajeiveitanani avirori. Iro cantaincha yoavisacojeitaquee Quirishito, ipeajiro aquisavacaajeiveitani, cameetsa isavicacaajeitaquee. Meeca aquempetavacaajeitaja maaroni. ¹⁵Icamimentaquee, eiroquea apomerentsiventantarotsi isanquenareni Moishishi, tecatsi oncantajeitee. Peerani onashitacaajeiveiteeni, te ashanincatavacaajeiveiteani. Iro cantaincha meeca ashanincajeitacari Quirishito, aisati ashanincatavacaajeitaca maaroni, aquempetavacaajeitaja, ¹⁶acatsimareavacaajeitaja maaroni. Iro acatsimareavacantajeitajari, ashanincajeitajari yora pajacotimentajeitaqueeri coroshiqui. Meeca eiro atsipetashitarotsi anquemisantero isanquenareni Moishishi avavisacotantajeeri. Meeca aneacameetsajeitiri Tasorentsi maaroni: noshaninca aisati pishaninca.

¹⁷Narojeitaquee jorio: niojeivetaca jaoca icantari Tasorentsi, niojeivetaro irineane, iro cantaincha te nonquemisantajeiteriji. Avirojei, avinti, te piojeiveitearini catsini, oquempetaca pitimini avirori arejiqui. Iro cantaincha ipocaque Quirishito, icamantajeitaquee maaroni jaoca acantajari ashanincatavacantajeitajari, aquempetavacantajeitajari. ¹⁸Oshequi imataqueeneri

Quirishito, irootaque amajeitancacarori aquenquetsatacaajeitiri Tasorentsi. Aisati Ishire Tasorentsi oamejeitaquee aquenquetsatacaajeitiri. ¹⁹Peerani te pioveitearini Tasorentsi, te pishanincaveitearini. Iro cantaincha meeca, pinashijeitaca; piquempejeitacari itsipapee quemisantatsiri, piojeitaqueri Tasorentsi, pishanincajeitacari. ²⁰⁻²²Meeca noshiantempiro. Ariorica avetsiquero avanco, tempa ajivataque amenero cameetsari quipatsi, impoiji amenero otincamipee cameetsatsiri, quisotatsiri. Impoiji atancotashitaquero maaroni inchaquipee, ashiticaquero oshipee, maaroni. Ariorica antsonquero pancotsi, asavicaque. Aisati aquempejeitacaro, ariorica aquemisantaque. Ijivataque yora itiancanepee Tasorentsi aisati yora camantantatsiniri icamantajeitaquee jaoca icantari Jesoquirishito: icameetsataque, imataquero yoavisacojeitaquee. Tempa iriotaque meeca Avincatsarite. Impoiji ashequiajeitaque maaroni quemisantatsiri, aisati otasoncaventajeitaquee Ishire Tasorentsi aquempetavacaajeitantajari: tempa ashanincajeitacari Quirishito, maaroni. Meeca yashijeitaquee Tasorentsi, quiso yoajeitaquee.

Yantayetiri Pavoro.

3 ¹Te avirojei jorio, iro cantaincha nonintajeitaquempi. Nocavintsaajeitaquempi, nocamantaquempi: “Ariorica pinguemisantajeiteri Jesoquirishito, ari iroavisacojeitempi”, irootaque yoiminqueanteetaquenari caravosoqui. ²Tempa ineshinoncataquena Tasorentsi, irootaque nomatantarori noquenquetsatacaajeitimpi. ³Iotacaaquena caari iojeitini itsipapee, tampatica yoametaquena. Aitaque nosanquenajeitaquempiro, novaajimpuro icamantaquenari. ⁴Ariorica pineanatero oca nosanquenataquempiri, piojeitavaquero oca niotacotaqueri

Quirishito, caari ioyeetini peerani. ⁵Te irioveitearoni yora peeraniniri, iro cantaincha Ishire Tasorentsi iotacaajeitaquena: narojeitaque itiancanepee Quirishito aisati quenquetsatacoyetiriri. ⁶Te avirojei jorio, iro cantaincha iotacaaquena ariorica pinguemisantajeite, pavisacojeitanaque. Pimoncarajeitacari noshanincapee narori: ainiro cameetsayetsatsiri icashiacaajeitaqueeri Tasorentsi. Aisati ashanincatavacaajeitaca: noshaninca aisati pishaninca avirori. Ariorica piquemisantaqueri Quirishito, irimoncarajeitaquempiro maaroni icantajeitaquenari narori. ⁷Irootaque oca noquenquetsatacotapinitaqueri. Ineshinoncataquena Tasorentsi, aisati itasoncaventaquena, nomatantacarori noquenquetsati.

⁸Pamene, noquemisantaveta; iro cantaincha te nonquempeteariji itsipapee quemisantatsiri: tecatsi nomataque narori. Iro cantaincha ineshinoncatashitaquena Tasorentsi, itiancaquena nocamantajeitaqueri itsipapee atiri jaoca icantari Quirishito icavintsaasanojeitaquee catsini. Te ayotacotashiteariji, irointi oamejeitaquee Ishire. ⁹Aisati itiancaquena nocamantajeitaquempi icoaque iroavisacojeitempi avirori, aisati maaroni itsipapee atiri. Aitaque peerani catsini icoaqueni iroavisacojeitempi, iro cantaincha te irioyeetini peerani iroavisacojeitempi, iroaquera iotacaajeitaquee. Iriotaque vetsicajeitiriri maaroni timajeitatsiri. ¹⁰Meeca icoaque iriotacajeiteri maaroni yora inquitequiniri: yora cantacaantayetatsiri aisati yora pincatsariyetatsiri. Iriojeitanaque inquitequiniri oshequi itasoncaventajeitaqueri Tasorentsi quemisantajeitiriri, impoiji iriojeitanaque ainiro iotantari catsini Tasorentsi, yashi yoiro ioti catsini. ¹¹Aitaque icoitacani peerani iriojeite maaroni inquitequiniri. Ainiro imayetaqueeneri

Avincatsarite Jesoquirishito, iotantacari yora inquitequiniri oshequi ioti Tasorentsi catsini. Irootaque icoacaqueriri.

¹²Aquemisantaqueri Quirishito, irootaque ayotantacari ocameetsataque anquenquetsatacyeri Tasorentsi, inquemisantavaquee. Eiro atsaroacaaritsi. ¹³Piojeitaque noamejeitaquempi, irootaque oshequi yoashinoncanteetaquenari, iro cantaincha eiro poashiretacojeitanatsi, irointi pinquimoshirejeite.

**Yora Pavoro icantiri Tasorentsi:
“Pamitacojeiteri ejesosati”.**

¹⁴Oshequi ioti Tasorentsi, oshequi imataqueeneri, irootaque nopincatsantacariri, aisati noquenquetsatacapinitantacariri. ¹⁵Iriotaque ashijeitaqueeri, maaroni quemisantajeitaqueriri. Asavicajeiti arori aca quipatsiquica, ainiro isaviqui pashini inquitequi, iro cantaincha ashanincajeitacari. ¹⁶Icameetsasanaotaque catsini Apa, itasorentsisanaotaque catsini, irootaque nocantantacariri incantero Ishire ontasoncaventempi, impoiiji ontimasanotanaque piotanteari. ¹⁷Nocantaqueri inquemisanta-caasanojeitempi, pishiretapinitanteariri Quirishito. Aisati, nocoaque pishirejeita-queero jaoca icanta Tasorentsi inintasanojeitaquempi, pinquemisantasanojeitariri. ¹⁸Ariorica pishiretasanoaqueari, pinquem-peteari itsipapee quemisantatsiri, piotasano-jeite oshequi catsini inintasanojeitaquee Quirishito, te capichaji. Yashi yoiro inintasanojeitaquee, icantani. ¹⁹Nocoaque piojeite inintasanojeitaquee, iro cantaincha te ayojeiteji paita inintantajeiteeri. Ariorica piojeitaque inintasanojeitaquee, nocoaque aisati pishiretasanojeiteari Tasorentsi aisati nocoaque irimatacaasanojeitempiro catsini maaroni icoacaajeitaquempi.

Tsame ampincatsajeiteri Tasorentsi.

²⁰Ari itasoncaventasanojeitaquee Tasorentsi, oshequi intacojeitaquee,

yoanaaqueero maaroni acoacojeitaque-riri. Tecatsi ancantea antsoteajeitero anquenqueshirejeitero maaroni imajeita-queeneri. ²¹Tsame maaroni quemisanta-jeitiriri Jesoquirishito ampincatsajeiteri Tasorentsi; tsame ancamentapinijeiteri atiripee icameetsatasanoti, ancantaitati-yempani. Aitaque ancantajeiteari.

Tsame anquempetavacaajeitea, maaroni.

4 ¹Noquemisantaqueri Avincatsarite, irootaque yoiminqeanteetaquenari aca caravosoquica. Meeca noncantajei-tempi: cameetsa pisavicaajeite; icoyeajei-taquempi Avincatsarite, meeca pimajeite-neri maaroni icoacaajeitaquempi. ²Eiro pishemejeititsi, pincavintsantajeite, eiro pishemajeitaritsi pishaninca, irointi pinintajeiteri, eiro piquishiritsi. ³Pincan-tajeitero Ishire Tasorentsi oamejeitempi pinquempetavacaajeitanteari, cameetsa paacameetsatavacaajeitanteari. ⁴Maaroni quemisantatsiri ashanincatavacaajeitaca, aisati ainiro Ishire Tasorentsi apaniro, ora quiso oajeitaqueeri. Amoncaratavacaajei-taca: icoyeajeitaquee Tasorentsi, ayojeita-que irimajeitaqueenero maaroni icantajeitaqueeri, irootaque aveshirei-mentasanotantacariri. ⁵Icarataque Avincatsarite apincatsajeitaqueri apaniro, amoncaratavacaajeitaca aquemisantajei-taqueri arori, aisati amoncaratavacaajei-taca avaoitisatimentajeitacari. ⁶Itimi aparo Tasorentsi: yora Apasanori arori. Ipincatsariventajeitaquee maaroni arori, itasoncaventajeitaquee, quiso yoajeita-quee maaroni.

**Onashiyetaca imatacaajeitaqueeri
Quirishito.**

⁷Ineshinoncaajeitaquee Quirishito, iro cantaincha onashiyetaca imatacaajeita-queeri. ⁸Ora irineane Tasorentsi oquenquetsatacotitarini, ocantitani: “Irovancanajeirica Quirishito coajica

inquitequi, iranaacojeiteri maaroni camaari quisajeivetacariri; irinti atiripee, irimatacaajeiteri paitapeerica”.⁹ ¿Paita ocantantari: “Irovancanajea”? Aitaque iponeanacari peerani inquitequi jenoqui, irosati isavicantapaacari aca quipatsiquica. Impoiji yovancanaja aisati.¹⁰ Yora aniireatsiri aca quipatsiquica yovancanaja aisati anta inquitequi jenoqui. Anta ipincatsariventajeitaquee aisati itasoncaventajeitaquee maaroni, catsini.

¹¹Imatacaasanojeitaqueri quemisanta-jeitsisiri yantajeitaquero paitarica icoacaajeitaqueriri: itiancanepée, camantantatsiri, quenquetsatacaantatsiri, jivatacaantatsiri, oametantatsiri, maaroni.¹² Ari imatacaajeitaquee arori, aisati iriori maaroni quemisantajeitiriri, irootaque amajeitantarori antaveitiniri. Aisati imatacaajeitaquee aquemisantacaa-sanojeitaqueri maaroni quemisantajeive-tariri Quirishito.¹³ Ari incanteani irimatacaajeitee, irosati amoncaratavacanteari anquemisantasanojeite, aisati ayotasano-jeitantariri iriori. Icoaque ayotasanojei-teri anquempetasanojeitantariri iriori.

¹⁴Peerani aquempeveitarini jananequi, te amatasanojeiveitearoni antajeivetaniri. Aquemisantashijeivetacarini amatavijeitaqueerini, te ayoveiteani. Iro cantaincha te incoyeji Tasorentsi anquempetajeari jananequi, irointi icoaque anquempeteari antearipee, icoaque ontimasanote ayojeitanteari.¹⁵ Icoasanoaque ancavintsaasanojeiteri itsipapee, cameetsa ancamantajeiteri irineane: tempa queariotasanoaque. Icoaque aiqero ajatatiye anquempetasanojeitanaqueari Quirishito: yora Avincatsarite.¹⁶ Aquemi-santajeitaqueri, irootaque ashanincatava-caajeitancari; aisati yoamejeitaquee amitacotavacaajeitancari, aisati yoamejeitaquee amajeitancanariri maaroni icoacaajeitaqueeri. Aisati yoamejeitaquee anintavacaajeitancari.

Icantiri: “Eiro piquempetajatsi peerani”.

¹⁷Meeca novaajempio icoantaqueri Avincatsarite, noncamantempio icoacaa-quempiri. Te incoacayempiji pinquempe-tajeari caari quemisantatsi: yatsipetashi-jeita iriori yaamaashiyetacaro paitapeerica, te inquenqueshireempaji.¹⁸ Te iriojeiteriji Tasorentsi, oquempetaca te ontimeji ishire. Te irinintajeiteji inquenqueshireteri, te incoajeiteji irioteri, irootaque caari irimatantearo Tasorentsi iroaneasanojeiteri irisaviquimojeitantea-riri anta inampiqui.¹⁹ Yantapinitashita-caro caari cameetsatsi, iro cantaincha te impashiventajeitaji. Imayempitapinjieiti, itsinampavacaajeita, maaroni.²⁰ Yora Quirishito, te iroamejeitempiji pinquem-peteari yora tseencantatsiri.²¹ Tempa piquemacotaqueri Jesoshi, queario noamejeitaquempi jaoca icantari.²² Ari meeca eiro piquempetajatsi peerani. Pashi poironi te pincameetsateni. Pininta-sanotironi pantayetironi caari cameetsa-tatsi, irootaque pamatavitantajari avisati.²³ Eiro piquenqueshiretajirotsi piquenque-shireveitaniri peerani, irointi pinquen-queshiretajero cameetsatsiri.²⁴ Pimpashinijeitanaque: eiro pantashitajarotsi caari cameetsatsi, irinti pinquempejei-tajea Tasorentsi, tempa icameetsatasano-taque.

Icamantajeitiri Pavoro irantayeteri.

²⁵Meeca eiro pamatavitantajitsi aisati, irointi tampatica pineanateri pishaninca. Pamene: ariorica ashanincatacari Quirishito, ashanincatavacaajeitaca, maaroni.²⁶ Ariorica pinquisashireaquea, eiro pantasanotirotsi caari cameetsatsi. Aisati, ariorica pinquisashiretaquea, pishintsite pincatsimareajea aisati,²⁷ oncanteataquea eiro catsini imatima-tantimpitsi camaari irantacayempio caari cameetsatsi.²⁸ Ariorica picoshivei-

tani, eiro papiitajirotsi pincoshitaje, irointi pintsameete. Pantaveetanontea avisati, aisati pincavintsayeri ashinon-caincari.

²⁹Eiro pineanatarotsi caari cameetsatatsi, irointi pineanantearo cameetsayetatsiri. Cameetsa poametavacayea, piveshireacayeari pishaninca.

³⁰Terica pisavique cameetsa, oashiretanaca Ishire Tasorentsi. Eiro poashireta-caarotsi: tempa irootaque quempoyeajetaquemperi. Oncanteani onquempoyeajetaquempi irosati pijatanteari inquitequi.

Anta inquitequi pavisacotasantapaaje catsini. ³¹Meeca eiro piquisatsi, eiro pitsimaajencatatsi, eiro picatsimatantsi, eiro piquisatsatantsi, eiro picantimatantsi. Eiro catsini piquishiritsi itsipapee, ³²irointi pincavintaajeiteri, pineshinoncajeiteri. Piquemisantaqueri Quirishito, meeca te inquishmentemproji Tasorentsi pantayetaqueri, irointi icavintsaajeitaquempi: aisati pinguempejeiteri pishaninca iriori, eiro piquishimentiritsi yantayetaqueri, irointi pincavintsayeri.

5 ¹Tempa avirojeitaque itomipee Tasorentsi inintasanotiri: ari meeca pinguempejeiteari. ²Inintajeitaquempi Quirishito, irisati shinetaicha ipajacoyeetiri, icamimentajeitaquempi. Inecameetsasananotaquero Tasorentsi oca imataqueri itomi. Oquempetaca inintajeitaquempi Quirishito, aisati pinguempeteri pishaninca, pinintasanajeiteri.

³Eiro pantirotsi caari pai, eiro pitsinam-pantitsi catsini, eiro pinevetarotsi yashijeitari itsipapee: quemisantatsiri te irantapiniteroji oca. ⁴Eiro picantatsatacotirotsi tsinane, eiro pincantatsatacotiritsi shirampari. Ocameetsati pimpashiventacayearo maaroni caari cameetsatatsi. Te oncameetsateji pishineventearo, eiro pishirontimentarotsi. Irointi ocameetsataque ampasonquiteri Tasorentsi: tempa

icavintsaasanojeitaquee. ⁵Jero oca noncamantempiri, piotasanoavaquero: eiro ijatitsi inquitequi yora antapinitirori caari yai, aisati eiro ijatitsi tsinampaanta-tsiri, aisati nevetitayetariri iroaararo itsipapee. Yora nintasanotirori irashitaa-rantea iquempetacantaquero iroorica Tasorentsi inintantarori. Pineaquero, eiro ijatitsi irinti anta ipincatsarijeitinta Quirishito aisati Tasorentsi. ⁶Ainiro coavetachari iramatavitempi: oshequi irineanatashivetempi, vero, vero. Incamantashijeitempi ocameetsati pimajeitero oca caari cameetsatatsi, iro cantaincha eiro piquemisantiritsi. Iroasanquejeitaqueri Tasorentsi maaroni caari quemisantiri. ⁷Eiro catsini piquempetaritsi.

Icantiri: “Pintimajeite quitaiteriqui”.

⁸Peerani oquempetani pitiminsi tsiteniriqui: pantapinitirori caari cameetsatatsi. Iro cantaincha yoameetsataquempi Quirishito, oquempetaca itimacaajimpi quitaiteriqui. Meeca cameetsa pisavicaque, onquempetanteari pintime quitaiteriqui. ⁹Ariorica antime quitaiteriqui, ancavintsante, antime cameetsa, tampatica aneanate. ¹⁰Piojeiteiro icoacaquem-piri Avincatsarite, impoiji pimamatero. ¹¹Eiro pantirotsi yantayetiri timajeitatsiri tsiteniriqui, irointi piotacaajeiteri te oncameetsateji oca yantajeitaqueri. ¹²Nopashiventacaacaro noquenquetsatacotiro yantajeitiri, ora imanavetacari. ¹³Ariorica piotacayeri te oncameetsateji yantajeitiri, onconijataque maaroni yantajeitaqueri. Impoiji iriotanaque te incameetsateji. Impoiji ariorica incoaque incameetsatanaque, onquempetajea irisavicaque iriori quitaiteriqui. ¹⁴Tempa icanteeti: “Ariorica pimaaque, pintinaanaje. Ariorica picamaque, pintinaanaje aisati. Iriotacaasano-tempi Quirishito, irisavicacayempi quitaiteriqui”.

¹⁵Pinquenqueshiretasanotero paitapeerica pantayeteri: eiro piquempetaritsi

caari iotatsi, irointiquea ocameetsati ontimasanote piotanteari. ¹⁶Ariorica ompomerentsitimojeitempi, iro cantaincha pinquearioventero pantero cameetsa-yetatsiri. ¹⁷Eiro pantashiyetarotsi paitapeerica, irointi pijivate pinquunque-shiretasanotea. Piojeitero paitapeerica icoacaaquempiri Avincatsarite: impoji pimamajeitero irointi. ¹⁸Eiro pishinquitatsi, te oncameetsateji catsini: irointi pinquemisantasanotero Ishire Tasorentsi oamejeitantempiri. ¹⁹Oshequi pincantapiniteri pishaninca: “Tempa icameetsataque Avincatsarite”, aisati pimpampoyeaventapinijeiteri Tasorentsi, piveshireimenteari. ²⁰Pipincatsataqueri Avincatsarite Jesoquirishito, irootaque itasoncacoventantaquempiri Apa Tasorentsi. Meeca pimpasonquitapiniteri. ²¹Ariorica pipincatsatiri Quirishito, pimpincatsatavacajeitea, paacameetsatavacajeitea.

Ocameetsati incavintaasanotero shirampari ijina, aisati ocameetsati ompincatsateri tsinane ojime.

²²Tsinane, ¿pipincatsatirimpa Avincatsarite? Ari, aisati pinquempeteri pijime, pimpincatsateri iriori. ²³Iquempetaca Quirishito ipincatsariventajeitiri quemisantajeitiriri, aisati inquempetea shirampari, impincatsariventero ijina. Tempa oshequi icavintaajeitaquee Quirishito, irootaque yoavisacojeitanta-jeeri. ²⁴Oquempetaca aquemisantajeitaqueri Quirishito, ocameetsati tsinane onquemisantapiniteri ojime. ²⁵Iquempetaca Quirishito inintasanojeitaquee, irosati icamimentantaqueeri, avirojei shirampari, cameetsa pinintasanotero pijina.

²⁶Pineaquero, inintajeitaquee Quirishito, icamimentajeitaquee, irootaque yoameetsantajeiteeri. Ariorica anquemisantajeitero irineane Tasorentsi aisati avatotsajeitea, iroamee-

tsatasanojeitee Quirishito anquearioventajeiteneri maaroni icoacajeitaqueeri. ²⁷Icoaque irineacameetsajeitee arori, aisati iriori maaroni itsipapee quemisantatsiri; eiro otimimojeiteetsi caari cameetsatsi. Icoaque ancameetsatasano-tanaque, eiro catsini otimi antane. Pineaquero, oshequi inintajeitaquee. ²⁸Aisati, shirampari, pinintasanojeitero pijina. Oquempetaca picavintaaja avisati, pincavintsayero pijina. Yora cavintsairori ijina, icavintaaja irisati. ²⁹Te amatapiniteaji anquisajea arosati, irointi acavintaaja arosati, aneshinonca-taja arosati. Aisati, iquempetaquee Quirishito arori, ariorica aquemisantajeitiri, ³⁰icavintaajeitaquee; tempa ishanincajeitaquee, quiso yoajeitaquee. ³¹Ocanti Sanquenarentsi: “Ariorica iraque shirampari ijina, irojocanaqueri iriri, aisati iriniro, quiso iroanaquero ijina. Yora shirampari aisati ijina ishiaquero apaniro ivatsa iriori: quiso iroavacayea, te oncameetsateji irojocavacayea”. ³²Opomerentsivetaca anquemerero oca, iro cantaincha oshiaqueri Quirishito aisati maaroni quemisantajeitiriri, apaniro anajeitaque: iotaca ashanincatavacajeitaca, aquempeavacajeitaca. ³³Ari nampiitajempiro: iquempetaca icavintaaja irisati shirampari, ocameetsati incavintaasanotero ijina, incanteani. Aisati ocameetsati ompinca-tsateri tsinane ojime.

Jaoca ancantiriri atomipee aisati ashijeiteeri.

6 ¹Jananequi, ariorica piquemisantaqueri Avincatsarite, icoacaaquempiri pinquemisantajeiteri aisati ashijeitimpiri. ^{2,3}Otimini peerani oshequi icantapinivetacariniri Tasorentsi peeraniniri, iro cantaincha te incantapiniteriji: “Ariorica pinquemisantena, ario peerani pintimenei quipatsiqui”. Impojiquea icantirini:

“Ariorica pimpincatsateri piri, aisati pimpincatsatero piniro, cameetsa nosavicacayempi; peerani pintimene avinti quipatsiqui, eirotsita picamitatsi”.⁴ Shirampari, eiro pishemaritsi pitomipee, iquisacari; irointi poamejeiteri icantayetiri Avincatsarite, aisati poamejeiteri impincatsateri.

Jaoca incanteriri ivatorote aisati iratirite.

⁵Intimerica amanantimpiri, pinquemisanti, pimpincatsateri. Oquempetaca pantiniri Quirishito maaroni icoacaquempiri, panteneri amanantimpiri maaroni icoacaquempiri iriori.⁶Eiro pamataviritirsi. Eirorica yamenimpitsi, pincanteani pantaveeteneri: tempa aisati pantaveetiniri Quirishito. Pincoasanotaque panteneri Tasorentsi maaroni icoacaquempiri.⁷Te irio pantaveetasanotene atiri, irintiquea pantaveetini Avincatsarite.⁸Piojeite ariorica pantapinero cameetsatsiri, impinatempi. Impinateri pimantaari, caari pimantacha, maaroni.⁹Aisati amanantiriri atiri: pincavintsaajeiteri pamanantanepee, tempa nocantaqueri inquemisantempi. Eiro piquisapinitirsi. Eiro pipeacojeitarotsi: avirojeitaque ipincatsariventajeitiri Quirishito, aisati ipincatsariventajeitiri pamanantane: pimincaratavacajeitaca.

Quemisantsiri ishiaqueri soraro.

¹⁰Apanivaniji noncamantempi: pincanteri Avincatsarite impincatsariventajeitempi, aisati intasoncacoventajeitempi.¹¹Iquempetaca yaventapinitaro soraro ashivotatsiri iitsaare eiro imatantaritsi oyerinemeru, paventajeiteari Tasorentsi eiro imatantimpitsi camaari, yora amatavijeitempinemeru.¹²Te irio ampiatea atiri aneyetiri, irinti apiataca caari conijayetatsi: yora pincatsariventiriri camaari, jivajeitiriri camaari, pincatsariventiriri maaroni tseencanta-

tsiri, antirori caari cameetsatsi, maaroni camaari catsini. Iquisajeitaquee iriori.¹³Oquempetaca yaventayetaro soraro ashiroyetatsiri, paventeari avirori Tasorentsi poimpianteariri camaari. Iroashinoncaayempime, iro cantaincha eiro imatasanotimpitsi, panaacotajeri. Pintsoteyeteneri Tasorentsi maaroni icoacaajeitaquempiri; eiro pojoquirotsi piquemisanti.¹⁴Pinquemisantasananaque, pinquenqueshirejeitero queariotasannotatsiri eiro yoashinoncantimpitsi camaari: oquempetaca yaventaro soraro ishiticatsaqui eiro imatantari yora quisavetariri. Pincameetsasananaque eiroquea imatantimpitsi camaari: pinquempetanteariri soraro, yaventaro ipashicanejitari.¹⁵Oquempetaca soraro isapatotanaca cameetsa iquenayetantari, ari pivetsicaquea pinquenayetanaque, pincamanteri atiri jaoca incanteari iravisacotantajeari.¹⁶Aisati ainiro soraro yojocaari, yojocantarori parashetatsiri chacopi caari iquentanteetari. Aisati avirori, pinquemisanteri Tasorentsi, eiroquea imatantimpitsi camaari irantacayempi caari cameetsatsi.¹⁷Aisati, oquempetaca soraro ipashicainatacaco ashio yavisacotantari, paventeari avirori Tasorentsi pavisacotantajeari: impoiiji eiro imatimpitsi camaari. Ainiro aisati ivesamento soraro imatantariri iisane: oshiaquero irineane Tasorentsi oamejeitaquee Ishire amatanteariri camaari.¹⁸Pinquenquetsatacapiniteri Tasorentsi. Paitapeerica oncoacayempiri Ishire, pincanteri. Pincamanteri coiteimotaquempiri. Eiro piperaventarotsi pinquenquetsatacayeri: pincantapiniteri: “Pincavintsaajeiteri noyemisantaririnte”.¹⁹Aisati pincanteri iramitacotena narori, eiro nopashiventanta nonquenquetsatacaajeiteri atiri. Noncamantajeiteri caari iojeiveitani: iroavisacojeiteri Tasorentsi maaroni quemisantajeiterineri.

²⁰Nocamantapinitaqueri atiri, irootaque yoiminqueanteetaquenari aca caravosoquica. Pincanteri iramitacotena cameetsa noncamantapiniteri atiri, eiro nomanirotsi. Tempa irootaque icoacaaquenari Tasorentsi.

²¹Ariorica irareetea Tiquico, incamantapaaquempi jaocarica nocantacari, aisati incamantempi paitarica nantayetaqueri. Iriotaque ayemisanraririnte nonintasanotiri, iquearioventiniri Avincatsarite maaroni icoacaaqueriri. ²²Irootaque notiancantacari, nocoaque piojeite jaocarica nocanta-

cari. Aisati nocoaque iriveshireacaajei-tempi. ²³Meeca, noyemisanraririnte, nocoaque cameetsa irisavicacayempi Apa Tasorentsi, nocoaque iroamejeitempi pinquemisantasanojeite aisati pinintasanojeiteri pishaninca. Aisati nocoaque inquempetacayempi iriori Avincatsarite Jesoquirishito. ²⁴Ariorica pincanteani pinintasano-teri Jesoquirishito, nocoaque irineshinoncajeitempi Tasorentsi, maaroni.

Narotaque sanquenajeitimpirori:
Pavoro

YORA PAVORO ISANQUENATINIRI JIRIPOSISHATI

Yovetsajeitari Pavoro jiriposhisati.

1 ¹¿Savicajeitatsimpi jiriposhisati? ¿Tecatsimpa oajeitempine? Narotaque Pavoro sanquenajeitaquempirori, nocarataqueri aca iriori Timoteo. Narotaque antaveetiniriri Jesoquirishito icoacaaquenari. Nosanquenajeitimpino maaroni noyemisantaririnte: quenquetsatantajeitatsiri aisati amitacojeitiriri quemisantatsiri, maaroni. ²Nocoaque irineshinoncajeitempi Tasorentsi, aisati cameetsa irisavicacaaajeitempi. Aisati nocoaque inquempetacaaajeitempi Avincatsarite Jesoquirishito.

Ipasonquitiri Pavoro Tasorentsi.

³Ariorica noquenqueshirejeitaquempi, nopasonquitapinitiri Tasorentsi. Avirojeitaque nopasonquitimentiri. ⁴Aitaque nocantani noquenquetsatacapinitiri Tasorentsi, nocantapinitiri: “Pincavintsaajeiteri jiriposhisati”, aisati noveshireimentajeitaquempi. ⁵Picantani pamitacotapinijeitaquena avaraquero irineane Tasorentsi, acamantajeitiri atiri jaoca icantajari yavisacotantajari. Irootaque nopasonquitimentantimpiri. ⁶Ocameetsataque oca pantapinijeitaqueri, tempa irio Tasorentsi antacaaquempirori. Niotaque incantatiyempani, irimatacapinitempi, irosati impocantajeiri Jesoquirishito. Ariorica impocapaaje iriori, ari moncaratapaaca maaroni pantajeitaqueri. ⁷Tempa ocameetsataque noneacameetsajeitaquempi,

aitaque oshequi nonintasanajeitaquempi. Ariorica nonapiniti caravosoqui, noquenquetsatacotiri Jesoquirishito, aisati ariorica yoisoquijana, aisati noquenquetsatacotiri. Nocamantapinitiri yora pincatsaripee paita noquenquetsatacotantariri Jesoquirishito; aisati nocamantiri oqueariotasanotaque irineane Tasorentsi. Iro cantaincha picantani avirori picavintsaasanajeitaquena, aisati ineshinoncajeitaquee Tasorentsi. ⁸Iotaque iriori oshequi nocoiteajeitaquempi. Oshequi inintasanajeitaquee Jesoquirishito, aisati noquempetaca narori, oshequi nonintasanajeitaquempi. ⁹Aisati nocantiri Tasorentsi iramitacojeitempi, nocoaque aiquero pijatatiye pinintasanajeitiri itsipapee. Aisati nocantiri iroamejeitempi iriori piotasanojeitianteariri, aisati ontimimojeitiantempiri piotanteari: aiquero pijajeitatiye. ¹⁰Nocoaque piojeite pantero cameetsatatsiri, eiroquea pantirotsi caari cameetsatatsi. Nocoaque pincameetsatasanojeitanaque, eiro otimitsi pantane; pincantaitiyempani, irosati impocantajeiri Jesoquirishito. ¹¹Tempa yoameetsatasanojeitimpi, meeca nocoaque cameetsa pisavicajeite, iramitacojeitempi iriori. Impoiji maaroni atiri impincatsajeitiri Tasorentsi, incantajeite: “Tempa icameetsatasanoti Tasorentsi”.

Itimi Pavoro caravosoqui, iro cantaincha ovaraana irineane Tasorentsi.

^{12,13}Noncamantempi, noyemisantaririnte: yoiminquetaquena, iro cantaincha te nantsipetashitearoji nosaviqui aca

caravosoqui. Nocantani nocamantajeitiri atiripee jaoca incanteari iravisacojeitanta-
tajeari. Iquemajeitaquena maaroni soraropee: yora shentajeitirori ivanco pincatsari. Aisati pashinpee atiri, iquemajeitaquena. Iojeiti tecatsi nante, irointi yoiminqeashiyeetaquena; apatiro noquenquetsacotiri Quirishito. Eirome notimime aca, eirome iojeitajime jaoca incanteari iravisacotantajeari. ¹⁴Ineapaaquena ayemisantaririnte jaoca nocantari aca, irootaque iveshireimentajeitancacari Avincatsarite. Meeca te intsaroajeiteji, irointi icoasanojeitanaque incaman-
tajeiteri maaroni atiri irineane Tasorentsi.

¹⁵Ainiro oshequi quenquetsacotiriri Quirishito. Ineaquena aparopee oshequi noquemisantacaajeitiri atiripee, irootaque iquisaneentantaquenari, aisati ipiatsatantaquenari; icoaque iranaacojeitena impincatsarite. Iro cantaincha ainiro pashini cavintsasaanotaquenari, ¹⁶oshequi inintajeitaquena irinti.

Iojeitaque iriori notimi aca caravosoqui noncamantajeitantariri pincatsaripee paita noquenquetsacotantariri Jesoquirishito, noncamanteri jaoca incanteari iravisacotantajeari. ¹⁷Yora quisaquenari, te incoacayeriji atiri inquemisantajeitena, irintiquea coantsi iranaacotena inquemisantacaajeiteri atiripee. Te irantaveetasanoteneri Quirishito, irointi icoaveta iroashinoncayename aca caravosoqui.

¹⁸Ari, oncanteata inquisenata. Aparopee iquisaneentaquena, yora pashini icavintsaquena, iro cantaincha iquenquetsacojeitaqueri Quirishito, irootaque noquimoshiretantacari narori. Noncanteani nonquimoshiretasanotaquene. ¹⁹Niotaque ariorica inquenquetsate, ari cameetsa nontime narori. Tempa picantaqueri Tasorentsi, irootaque yamitacotantaquenari, aisati amitacotaquena Ishire Jesoquirishito.

²⁰Te noncoyeji nompashiventea, irointi nocoasanotaque narori cameetsa nonquemisantasanoteri Quirishito; nocoaque nonquempetajea peerani, te nontsaroyeji. Arioricampa iroyeetaquena meeca, irompa eirorica yoyeetanatsi, iro cantaincha paitapeerica nanteneriri, nocoasanotaque incantajeite atiri: “Tempa icameetsatasanoti Quirishito”. ²¹Eirotsitarica yoyeetanatsi meeca, irosati noncanteani nonquemisantasanoteri Quirishito. Ariorica noncamaque, ocameetsasanotaque aisati: tempa noneasanoteri anta inquitequi; irootaque nocoasanotaqueri. ²²Eirotsitarica nocami, ari noncanteani nomateneri Avincatsarite paitapeerica icoacaaquenari. Tempa ocameetsataque. Aisati, ariorica noncamaque, ocameetsataque. Te nioteji paitarica nocoasanotaqueri. ²³Nocoasanovetacaro apite. Nocoaque noncame, nojatashitantariri Quirishito, quiso noanteariri. Tempa ocameetsasaanotaque. ²⁴Iro cantaincha aisati ocameetsasaanotaque noncanteani nanee, namitacojeitantempiri avirori. ²⁵Naamaaca meeca eirotsita yoyeetanatsi, eirotsitarica nojatitsi inquitequi. Nosaviquimojeitempi namitacojeitempi pinquemisantasanojeite, aisati piveshireimentajeiteari yora piquemisantaqueri. ²⁶Ariorica nojatashijeitajempi aisati, piveshireimentavajena, aisati piojeitanotaque icameetsasaanotaque Jesoquirishito.

Icantiri: “Cameetsa pisavicajeite”.

²⁷Jero oca pinquenqueshiretasanoteri: piquemisantaqueri Quirishito pavisacotantajari, meeca icoaque cameetsa pisavicajeite, pantapinijeitero maaroni icoacaaquemperi. Ariorica nojatashijeitempi nocoaque noneajeitapeempi piquearioventajeitaquero piquemisanta-
jeite maaroni. Eiroricampa nojatashijeitimpitsi, iro cantaincha nocoaque nonquemacojeitempi pincaratavacaajei-

tea, pimpomerentsiventearo pincamantajeiteri atiri: “Ariorica pinquemisanteri Quirishito, iroavisacotempi”.²⁸Eiro pitsarocaaajeitaritsi yora quisajeitempine: impoji inquenqueshirejeitanaquea: “¿Paita caari itsarocantana?” Iriojeite iriori irijajeite Sharincaveniqui, iriojeite aisati yoavisacojeitaquempi Tasorentsi.²⁹Icavintsaajeitaquempi Tasorentsi, inintacaaajeitaquempi pinquemisantajeiteri Quirishito. Iro cantaincha aisati inintacaaajeitaquempi pineacatsitimentajeiteari.³⁰Aitaque amoncaratavacaajeitaca apomerentsiventajeitiniri. Peerani pineajeitaquena nopomerentsiventiniri. Meeca aisati piquemacojeitaquena, oshequi nopomerentsiventiniri.

Eiro picavintsaatsi avisati, irointi pincavintsaajeiteri itsipapee.

2¹Tempa ocameetsati piveshireimentajeiteari Quirishito. Inintajeitaquempi, irootaque ocameetsatantari piveshireimenteari. Tempa quiso oajeitaquempi Ishire Tasorentsi. Tempa piojeiti picavintsanti. Tempa piojeiti pishinoncatanti.²Ari meeca nocoaque cameetsa pisavicaajeite, paacameetsatavacaajeitea, pinintavacaajeitea. Cameetsa omoncaratavacaajeitea paitapeerica pincoajeiteri aisati paitapeerica pinquenqueshirejeiteri. Ariorica pantajeitero oca, ari nonquimoshiretanaque.³Paitapeerica pantajeiteri, eiro piquisavacaajeitatsi, eiro pishemejeititsi. Eiro pijijeititsi picameetsatasanoti, eiro pijijeititsi panaacojeitaqueri itsipapee, irointi pinquenqueshirejeite: “Icameetsatasanojeiti itsipapee, yanaacojeitaquena icameetsati”.⁴Ocameetsaveta pincavintsayeaya avisati, iro cantaincha ocameetsatasanoti aisati pincavintsaajeiteri itsipapee.

⁵Pinquempejeiteari Jesoquirishito: te incavintsayeaji irisati, irointi icavintsaaj

jeitaquee arori.⁶Iriovetaca Tasorentsisanori inaveta, iro cantaincha icantiri iriri: “Apa, nioti aquempetavacaajeitaca, Tasorentsi anajeiti,⁷iro cantaincha nocoaque nompeapeempa atiri, nantempiro maaroni picoacaquenari”. Ari yojocanaquero ipincatsaritantaniri, itasorentsitantaniri. Ari itimantapaacari peerani quipatsiqui, yatiritasanotapaaque:⁸iquempejeitapaaque arori. Te impincatsarivetapeempaji, irointi ipincatsataqueri iriri. Irisati coaintsi ipajacoyeetaqueri coroshiqui, icamimentajeitaquee arori. Irootaque inintacaaqueri iriri.⁹Iro cantaincha impoji yaajiri jenoqui, cameetsa isavicaajiri catsini. Ipeavajiri aisati pincatsarisanori, yanaacojeitapaqueri maaroni timajeitatsiri.¹⁰Icoaque Tasorentsi ampincatsajeiteri Jesoshi, catsini: yora jenoquiniri, arori quipatsiquiniri, yora ishaavijiniri, maaroni. Aiquero ajatatiye, ampincatsatanojeiteri catsini.¹¹Aisati ancantasanojeite: “Iriotaque Jesoquirishito Pincatsarisanori”, impoji aacameetsatanojeitantariri catsini yora Apa Tasorentsi.

¹²Ari, noshaninca, picantani piquemisantapinijeitaquenani. Notsipatantimpiniri piquemisantajeitaquenani. Meeca te nontsipajeitempiji, iro cantaincha nocoaque pinquemisantanojeitena aisati. Tempa yoavisacojeitaquempi Tasorentsi: meeca pimpincatsatanojeiteri, panteneri maaroni icoacaajeitaquempiri.¹³Tempa itasoncacoventapinitaquempi, picoajeitantacari pimayetaquero cameetsayetatsiri. Tempa ocameetsataque maaroni icoacaajeitaquempiri, aitaque yamitacotapinijeitaquempi pimataquero.¹⁴Pimatasanojeitero maaroni icoacaquempiri: eiro pishemarotsi, eiro pipiatsaritsi iriori.

¹⁵Ariorica panteneri Tasorentsi maaroni icoacaquempiri, eiro otimitsi pantane,

irointi pincameetsashiretanaque. Tempa itomintajeitaquempi, ishintojeitaquempi. Yoameetsatasanojeitaquempi. Ara pinampiqui picarajeitaqueri oshequi tseencantatsiri: te incameetsateji, te irioteriji Tasorentsi. Oquempetaca tsiomentotsi otsiotaca amenantari, ari cameetsa pisavicajeite piotacaajeitantaeriri yora tseencantatsiri. ¹⁶Oquempetaca pitsiotacaró tsiomentotsi pamenantari tsiteniriqui, aisati poamejeiteri pishaninca irineane Tasorentsi irineantapaajearori iriori inquite, incantaitatiyempani iraneapaaje anta. Ari pimamajeitero oca; impoiji, impocajerica Quirishito, nonquimoshirementajeitaquempi. Niotanaque te nantsipetashitearóji noamejeitaquempi. ¹⁷Meeca piquemisan-tajeitaque. Tempa narotaque quemisanta-caajeitaquempiri, irootaque icoanteetacari iroyeetena. Arioricampa iroyeetena meeca, iro cantaincha niotaque aiqero pijatatiye pimpincatsatasanotanaqueri Tasorentsi. Irootaque noquimoshiretantacari, aisati nocoaque pinquimoshireventena avirori. ¹⁸Queario, ocameetsati pinquimoshirejeitanaque, anquempetava-caajeitantaerari, anquimoshiretasanojeitan-teari, maaroni.

Itianquiri Pavoro Timoteo.

¹⁹Ariorica incoacayena Avincatsarite Jesoshi, nocoaque intsipaite nontian-quempiri Timoteo. Ariorica impiaje aisati aca, incamantapaajena jaoca picantajeitari, nonquimoshiretanteari. ²⁰Te noncarateriji itsipa quempetearine iriori: oshequi icoaque incavintsaajeitempi cameetsa pisavicajeitantaerari. ²¹Ainiro pashinipee: iquenqeshirejeitaquero paitapeerica icoayetiri iriori, te inquenqeshiretapiniteróji icoaqueri Jesoquirishito. ²²Iro cantaincha piojeita-que icameetsataque Timoteo, iqueario-ventiro yamitacotaquena noquenquetsa-

tacaqueri atiri: nocamantajeitiri jaoca incanteari iravisacotanteari. Oshequi yamitacotaquena, iquempetacantaquena narorica iriri. ²³Irootaque nocoantacari nontianquempiri. Ariorica niotasanoataque iroyeetena, irompa eiorica, ari intsipaite nontianqueri Timoteo incamantapeempi. ²⁴Aisati naamaaca irishineta Avincatsarite nojatashijiteitemi. Eiro osamanititsi, ari nareetapaajempi.

Iquenquetsatacotiri Epajororito.

²⁵Chapinqui pitiancaquenari ayemisan-taririnte Epajororito, oshequi intacota-quena. Icarataquena, nantaveejeitiniri Avincatsarite. Oquempetaca soraropee iquearioventiniri iyapitanote paitapeerica yantiniriri, nocarataqueri Epajororito noquearioventiniri Avincatsarite maaroni nantiniriri; te nomperaventearóji icoaca-quenari. ²⁶Oshequi icoiteajeitaquempi. Piquemacojeivetacari yojoquuitaca, oshequi poashiretacovetacari. Meeca iquenqeshiretaquempi, te incoyeji poashiretacoteari. ²⁷Queario, yojoquuita-sanovetaca, irovetaincha incameme, iro cantaincha ineshinoncatajiri Tasorentsi, yoavisacotajiri. Aisati narori, ineshinon-catajana, te incoacayenaji incamimotena. Ioti nashinoncaavetaca, te incoacayenaji noashiretacoteari. ²⁸Meeca nocoasano-taque nontiancajempiri. Ariorica pineajeita-vajeri, pinquimoshireventajeitavajeri, impoiji eiro noashiretacotimpitsi. ²⁹Paacameetsatavajeri, pinquimoshire-ventavajeri; tempa irio quemisaniriri Avincatsarite. Pimpincatsatavaqueri, aisati pimpincatsajeiteri iriori maaroni quempejeitacariri. ³⁰Tempa yantaveeti-niri Quirishito, irootaque yojoquuitanta-cari, irovetaincha incameme. Oshequi intacotapinitaquena: iquempetaquempi pintacotapinijeitename, pintimeme aca. Te incavintsayeaji irisati, irootaque incamanteameri.

**Paamayeariyea yora coatsiri
impeacaajeitempi jorio.**

3¹Aisati, noyemisanrarinte, noncantajeitempi: pinquimoshireventajeiteari Avincatsarite. Te noshemearoji oca nosanquenatapinitimpiri, tempa ocameetsati pinquemapinitero. ²Paamayeariyea yora coatsiri impeacaajeitempi jorio: te incameetsateji. Paamayeariyea, yoashinoncaimpicari, icoaveta intotacayempime. ³Atsipetashita atotiro ameshina, eiro oameetsateetsi, eiro oavisacoteetsi. Iro cantaincha Ishire Tasorentsi oamejeitaquee apincatsasanojeitiri Tasorentsi, irootaque yoameetsajeitanteeri, yoavisacojeitanteeri. Aveshireimentajeitacari Jesoquirishito, ayojeitaque tecatsi ancantajeitea avaviscotajea arosati.

⁴Arioricame amaterome avaviscoteame arosati, tempa narosati oavisacotajanchaneme. Oshequi nomayevetaca, nanaacojeivetacari itsipapee. ⁵Iroaquera notimapaqueni, 7 nomaacotapaaque, ari itoyeanteetaquena. Narotaque ishanincani Ishiraerini. Aisati noshanincatacari Vejamini. Narotaque joriosanori, nashi noiro. Nomoncaratasanotaquero isanquenare Moishishi, tempa naro variseo. ⁶Nocoasanoveitani catsini nonquemisanterime Tasorentsi, irootaque noquisajeitancariri yora quemisantajeitiriri: nojijeiveitarini yamatavijeitiri atiri. Cameetsa nomoncarataquero isanquenare Moishishi, tecatsi incanteenani: “Ainiro pantane”. ^{7,8}Noveshireimentaveitaroni maaroni nantiniri, noshemeveitani, iro cantaincha meeca niotaque natsipetashitacaroni. Queario, natsipetashijeitacaroni maaroni. Meeca eiro noquencheshiretajirotsi nantaveitaniri, irintiquea Jesoquirishito nompincatsate. Niotaque ipincatsariventsanotaquena, noveshireimentasanotacari, icameetsatasanotaque. Te

noquencheshiretajeroji maaroni nantaveitaniri peerani: te oncameetsateji, nojocanaquero nantaveitaniri, oquempetaca ajocapinitiro cajara. Te noquencheshiretajeroji jaoca nocantaveitaniri, notseencaja narosati; meeca nopincatsataqueri Quirishito irinti, noquemisantakeri. Nocoasanotaque nompincatsatanaqueri, irootaque nojocajeitantarori maaroni nantaveitaniri. ⁹Nocoaque noshanincatasanotaqueari. Te noncameetsatashiteaji narori: nomoncarayevetaro isanquenare Moishishi, iro cantaincha te oameetsantenaji. Irointiquea noquemisantakeri Quirishito, irootaque yoameetsatantaquenari irinti. Aitaque, yoameetsajeitiri Tasorentsi maaroni quemisantajeitiriri. ¹⁰Nocoaque niotasanoteri Quirishito. Oquempetaca itasoncacoventajiri Tasorentsi yoitinaantajariri, nocoaque intasoncacoventapinitena narori. Aisati, oquempetaca oshequi icatsitimentajeitaquee, nocoaque noncatsitimentero narori; oquempetaca icamimentajeitaquee, nocoaque nantaveetenero narori irosati iroimentanteenarori. ¹¹Impoiji ariorica intinaajeitanaje maaroni camaintsiri, nocoasanotaque nontinaanaje narori, nontsipanteariri Tasorentsi.

Icamantacotaja irisati Pavoro.

¹²Tequeratsita nomayetero oca noquenchetsatocotaqueri, tequeratsita noncameetsatanote. Iro cantaincha nocoasanotaque nomamatenero catsini, tempa yoavisacotajana Jesoquirishito nomatantearori. ¹³Pineaquero, noyemisanrarinte: te noncantempiji nomatasanoyetaquero maaroni nocoaquero nomateri. Te noquencheshiretajeroji maaroni nantaveitaniri, irointiquea iotaca noquencheshiretasanotiro maaroni nantenero Quirishito, aisati nocoasanotaque catsini quiso noanaqueri iriori. ¹⁴Noquemisantakeri, irootaque

icoantacari Tasorentsi nojate inquitequi, nosaviquimotapaajeri iriori. Meeca noquearioventiro nantaveetasanotiniri impinatantenari coajica anta jenoqui. ¹⁵Nocoaque pinquempejeitena, maaroni quemisantasanoatsiri. Terica pinquempejeitenaji, iriotacaajeitempi Tasorentsi tequerata omoncarateaji pinquemisantasanojeite. ¹⁶Iro cantaincha pinquearioventero pimatasanotero maaroni icoacaaquempiri. Tempa aitaque iotacaaquempiro maaroni.

Icoaque Pavoro anquempejeiteari iriori.

¹⁷Noyemisantaririnte, pinquempejeitena. Aisati piotacojeiteri itsipapee, iquempejeitanarica. Impoiiji pinquempejeitena maaroni: pinquemisantasanojeiteri Quirishito. ^{18,19}Peerani nocamantaquempi ainiro oshequi quishiriri Quirishito: yora pajacotimentero coroshiqui. Meeca napiitajimpro: queario icarati oshequi quishiriri. Te impincatsajeiteriji Tasorentsi, irointi iveshirementaro yoari: oquempetaca ipējajiro yoari itasorentsite. Oncameetsateme impashiventajeiteame, iro cantaincha ishemetashijeitaca. Iotaca iquenqueshirejietiro jaoca icantajeitari aca quipsisiqui. Coajica irijajeitanaque Sharincaveniqui. Niraacojeitaqueri narori. ²⁰Iro cantaincha acoaque anampitasanotearo ainti inquitequi. Coajica imponeaquea inquitequi yora oavisacojeiteeri: yora Avincatsarite Jesoquirishito. ²¹Yashi yoiro itasoncanti, imatantarori paitapeerica icoaqueri. Intasoncacoventapaajee arori, impashinipaajeenero avatsa, anquempetanteariri iriori. Meeca ashi airo apatsaajeiti, acamajeiti; iro cantaincha coajica anquempejeiteari iriori, oncameetsatanotanaque avatsa, catsini: eiro apatsaajeitajitsi, eiro acamajitsi.

4 ¹Ari, noyemisantaririnte, oshequi nonintajeitaquempi, oshequi nocoteajeitaquempi, oshequi noquimoshireventaquempi, oshequi noveshirei-

mentajeitaquempi. Quiso poajeiteri Avincatsarite, poijatasanojeiteri. Queario, oshequi nonintajeitaquempi. ²Meeca noncamantero Evoria aisati Shintique eiro oquisavacaatsi. Cameetsa oncanteri Avincatsarite iramitacotero aacameetsatavacayea. ³Meeca noncamantempi, noshaninca, tempa atspatavacaaca antaveetiniri Avincatsarite: nocoaque pamitacotero ora tsinane aacameetsatavacajea aisati. Peerani opomerentsiventavetaroni ocamantajeivetari atiri jaoca incanteari iroavisacotantajeiri: ocarajeivetaquenani, aisati iriori Queremente, aisati pashini amitacojeitanari. Osanquenajeitaca ivajiropee yora amitacojeitanari anta jenoqui, isanquenatacotaca maaroni savicatsineri inquitequi.

Pinquimoshireventeri Tasorentsi.

⁴Pincantaitiyempani pinquimoshireventajeiteri Avincatsarite. Nampiitajempro: pinquimoshireventasanojeiteri, maaroni. ⁵Nocoaque irojeite atiri picavintsantasanojeiti. Eiro pipeacotarotsi: irotaintsi impocaje Avincatsarite. ⁶Eiro picantashirejeititsi. Pincantaitiyempani pinquenquetsatocayeri Tasorentsi, pincanteri paitarica picoiri. Paitapeerica pincoajeiteriri, ari pincamanteri. Aisati pimpasonquitapinijeiteri. ⁷Impoiiji inquimoshiretacaasanojeitempi Tasorentsi catsini. Yanaacotasanojeitaquēe arori, te amateroji anquimoshiretacaasanojeiteri itsipapee, te ayoteroji. Ariorica pinquemisanteri Jesoquirishito, incanteani Tasorentsi inquimoshiretacaajeitempi, iriveshireacaajeitempi. ⁸Apanivaniji, noyemisantaririnte, noncamantempiro oca. Pincasanojeite eiro pamatavitanti, irointi tampatica pineanaajeite, pincameetsate, pineshinoncatante, pintacotantea, pincavintsante, pinintavacaajeitea. Queario, pincanteani pinquenqueshiretasanotero maaroni cameetsaye-

tatsiri, irootaque pinquenqueshirejeteri maaroni inecameetsajetiri Tasorentsi. ⁹Pantapinijeitero maaroni noamejeitaquempiri, maaroni nocamantajeitaquem-piri, maaroni piquemajeitavaquenari. Paitapeerica pineaqueri nantaqueri narori, ari pantajeitero avirori. Impoiji quiso iroajeitempi Tasorentsi: yora veshireacaajeitimpiri.

Yora jiriposhisati oshequi ineshinoncajeitaqueri Pavoro.

¹⁰Peerani piquenqueshirejeivetaquena, impoiji pipeacovetajana; iro cantaincha meeca piquenqueshirejeitajana aisati, picavintsaajeitaquena, irootaque noquimoshiretasanotantacari. Tempa icameetsataque Avincatsarite. Te pimpeacotasantenaji, iro cantaincha te pimaveitearoni pincavintsaajeitena. ¹¹Te noncamantempiji ainiro coiteimotaquenari paitapeerica: teve. Te oshequiteji timimojeitanari, iro cantaincha niotaque meeca noquimoshiretashita. ¹²Nameta-caro te nashitaaranteaji, aisati nameta-caro ariorica nashiyetearo paitapeerica. Nioyetaquero maaroni: niotaque noquemacarano anaro, aisati niotaquero notasheaque. Niotaque nashitaarantaca, aisati niotaque nashinoncaaca. ¹³Tempa quiso yoana Quirishito, imatacaaquena, irootaque nomatantarori paitapeerica icoacaquenari Tasorentsi. ¹⁴Iro cantaincha pineshinoncajeitaquena. Piojeitaque nashinoncaavetaca, irootaque picavintsaajeitantaquenari.

¹⁵Aisati piojeiti jaoca ocantani peerani, iroaquerani noquenquetsatacantaquem-pini ara pinampiqui, nintacojeitaquempi. Nojatantajari aisati, noponeanaja Masero-niaqui, nojayetaque pashinipeequi

nampitsi. Avirojei pintacojeitavaquena, pipashijeitavaquenaro coiteimojeitaquenari. Te inquempejeitempiji yora quemisantajeitatsiri anta pashinipeequi nampitsi. ¹⁶Aisati, nosavicanacari anta Tesaronicaqui, pitiancajeitaquenaro coiteimotaquenari. Impoiji pashini pipacantajana aisati. ¹⁷Te noncoacaavetempiji pimpapinitena paitapeerica, irointi nocoasantaque pimayetero cameetsatsiri, cameetsa impinatasanojeitantempiri Tasorentsi. ¹⁸Ipapaaquenaro Epajororito maaroni pipacantaquenari. Ocameetsatanoti oca pantaqueri, oquempetaca irio pipaqueri Tasorentsi maaroni. Inecameetsataquero, iveshireimentaquempi. Meeca otimimotasantaquena paitapeerica, tecatsi pashini coiteimotenane; moncarataca. ¹⁹Piquemisantasanotaqueri Jesoquirishito, irootaque irintacojeitantempiri Tasorentsi, impajeitempi maaroni coiteimojeitaquempiri. Ashitaarantincari ini iriori, te irimashitsateji. Tempa ipincatsaritanoti, icameetsatanoti.

Ivecarataquero Pavoro isanquenare.

²⁰Tsame ampincatsatananojeiteri Apa Tasorentsi, ancantaitatitempani. Aitaque ancantasananojeiteari. ²¹Novetsajeitimpini, aisati novetsajeitari maaroni iriori quemisantiriri Jesoquirishito. Ivetsajeitaquempi aisati maaroni ayemisanrarinte aca. ²²Aisati ivetsajeitaquempi maaroni quemisantsiri: yora iratiritepe Sesari, maaroni. ²³Nocoaque irineshinoncatasananojeitempi Avincatsarite Jesoquirishito. Piveshireimentaajeiteari, maaroni.

Narotaque sanquenataquempirori oca: *Pavoro*

YORA PAVORO ISANQUENATINIRI COROSASHISATI

Ivetsajeitari Pavoro corosashisati.

1 ^{1,2}¿Savicajeitatsimpi, corosashisati?
¿Tecatsimpa oyempine? Narotaque
Pavoro sanquenatimpirori oca. Narotaque
itiancane Quirishito, irootaque noquen-
quetsatantari: irootaque inintacaquenari
Tasorensi. Nocarataqueri aca ayemisan-
taririnte Timoteo. Nosanquenajeitimpino
maaroni quemisantasannotiriri Tasorensi
ara pinampiqui: avirojeitaque noyemisan-
taririnte quemisantasanojeitiriri
Quirishito. Nocoaque irineshinoncajei-
tempi Apa Tasorensi, aisati nocoaque
cameetsa irisavicacaajeitempi.

Ipasonquitacoventiri Pavoro corosashisati.

³Nocantani nocantapinitiri Tasorensi
iramitacojeitempi, aisati nopasonquitapi-
nitiriri Tasorensi: yora iriri Avincatsarite
Jesoquirishito. Avirojeitaque nopasonqui-
tacoventiri. ⁴Oshequi noquemacota-
quempi, piquemisantasannotiriri Avincatsa-
rite, aisati oshequi pinintasanajeitiriri
ayemisanraririnte. ⁵Peerani piquemaque-
roni ariorica pinquemisante, pavisacotaje.
Queario oca piquemaqueri. Aisati
piojeitavaqueroni cameetsa irisavicaca-
yempi Tasorensi anta inquitequi. ⁶Oca
piquemaqueri ojatacoyetanaque maaroni
nampitsipeequi. Piquemantacarori
avirori, piojeitavaquero queario
ineshinoncajeitaquee Tasorensi. Ari
piquemisantaquero, irootaque pipashini-

tantajari. Aisati iquempjeitaquempi
pashinipee atiri, ipashinijeitaji iriori.
⁷Tempa irio Epajarashi quenquetsata-
caimpiniri peerani. Iquempetaquena,
icantani yantaveetiniri Quirishito.
Cameetsa yantaveetiniri, irootaque
notiancantacariri peerani iquenquetsata-
caimpi. ⁸Icamantaquena piquemisanta-
quero Ishire Tasorensi, irootaque
pinintasanajeitancacariri itsipapee atiri,
⁹irosati nocantantacariri Tasorensi:
“Pamitacojeiteri noyemisanraririnte anta
Corosashiqui”.

**Icantiri Pavoro Tasorensi: “Pamitacojeiteri
quemisantajeitimpiri anta Corosashiqui”.**

Ari nocantani nocantapinitiriri Tasoren-
tsi: “Piotacayeri corosashisati maaroni
picoacaqueriri”. Aisati nocantiriri:
“Nocoaque pintianqueneri Pishire
oametasanojeiteri, iotacaasanojeiteri”.
¹⁰Aisati nocantiriri iramitacotempi
cameetsa pisavique, piveshireacaasanojei-
tanteariri, pimayetantearori cameetsaye-
tatsiri. Tempa irio Avincatsarite,
irootaque ocameetsatantari amajeiteneri
oca. Aisati nocantiriri iramitacotempi
piotanteariri, aiqero pijatatiye. ¹¹Pashini
aisati nocantiriri irimatacantempirori:
tempa irio Tasorensisanori, icameetsata-
sanoti. Irimatacayempino pimatapinitan-
tearori cameetsayetatsiri: eiro pishemaro-
tsi, irointi pinquimoshireventero. ¹²Aisati
nocantiriri Apa iramitacotempi pimpason-

quitanteariri. Tempa yoameetsajeitaquee, ivetsicashireajeitaquee ajajeitantajeari anta icashiacaajeitaqueenta. Ancarajeitapaajeri maaroni ayemisanraririnte anta oquitaitetasanotinta catsini.

Iquenquetsatacotaqueri Jesoquirishito.

¹³Peerani oquempevetaca atimaveitani anta otsitenitananotinta: apincatsaveitarini camaari. Iro cantaincha yoavisacojeitajee Tasorentsi, irootaque apincatsantajariri Itomi: yora inintasanotiri.

¹⁴Icamimentajeitaquee arori, avavisacojeitantajari. Icavintsaasanojeitaquee, meeca eiro iquenqueshireacotajeerotsi caari cameetsatsi antajeitini.

¹⁵Te inconijateji Tasorentsi, iro cantaincha iconijataque itomi, iquempetasanotacari. Peerani, irio jivatatsiri itimi irinti, tequerata ontimayete oca aneayetaqueri.

¹⁶Tempa iriotaque vetsicajeitiriri maaroni: inquiresati, quipatsisati, conijayetatsiri, caari conijayetatsi, maaroni. Ari yovetsicajeitiri caari conijayetatsi: yora pincatsarijeitatsiri, jivatacaajeitantatsiri, savicacaajeitantaatsiri, maaroni. Iriotaque Quirishito vetsicajeitiriri maaroni. Te irovetsicashiteariji, irointi yovetsicantari impincatsajeiteri iriori. ¹⁷Iriotaque Quirishito intasanotacarori itimi, catsini.

Icantaqueri maaroni yovetsicane: “Aitaque pincantajeiteari”. ¹⁸Iro aito iotacairori avatsa maaroni. Eirome otimime, eiro aneime. Aisati iquempetaca Quirishito: ipincatsariventajeitaquee arori, aisati maaroni itsipapee quemisan-tiriri; eirome itimime, eiro ayojeitirime Tasorentsi, eiro aquemisantajeitime, eiro avavisacojeitajame. Irio jivatiriri maaroni tinaajeitajanchaneri, yanaacojeitaqueri ipincatsaritananoti. Queario ipincatsaritananoti catsini, ¹⁹itasorentsitasanotaque catsini: irootaque icoacaqueriri iriri.

²⁰Peerani aquisajeiveitarini Tasorentsi,

iro cantaincha icamimentajeitaquee Quirishito coroshiqui, yaparajatimenta-queero iriraja. Yoameetsajeitaquee, meeca aneacameetsajeitajiri Tasorentsi, aisati ineacameetsajeitaquee arori. Aisati inquiresati, ineacameetsajeitiri Tasorentsi; aisati iriori, ineacameetsatiri. Ari imataquero Quirishito, cameetsa asavica-jeitantari maaroni.

Iquenquetsatacotiri corosashisati.

²¹Ari, peerani te pinquenqueshiretapi- niterini Tasorentsi, piquisajeiveitarini. Piquenqueshireveitaroni caari cameetsa- tatsi, aisati pantapiniveitaroni, caari piquenqueshiretantarini Tasorentsi. ²²Iro cantaincha yatiritapaaque Jesoquirishito, impoiiji icamimentaquempi, yoameetsa- quempi, irootaque pineacameetsatantariri Tasorentsi, aisati ineacameetsatantimpiri iriori. Inequempi picameetsasananota- que, iquempetacaantaquempi te aneajeroji meeca pantane. Meeca eiro icantajimpitsi: “Ainiro pantane”. ²³Iro cantaincha icoaque ancantaitiyempani anquemisanteri. Aiquero ajatatiye, anquemisantasanotanaque. Pamene, ovaaranaca irineane Tasorentsi maaroni nampitsipeequi. Ocamantajeitee jaoca ancanteari avavisacotantajeari. Tempa naro ovaaraquerori, nocarajeitaqueri itsipapee ovaaraayetaquerori; aisati icamantaquempiro Epajarashi. Pishireta- caro, piotantacari pavisacotaji. Meeca eiro piperaventarotsi.

Yoametiri Pavoro caari iojeiveitani.

²⁴Oshequi iquematsicataro Quirishito yoavisacojeitantacariri maaroni quemisantajeitiriri, meeca ishiacantaquee arori ivatsasanori iriori. Aisati narori, noquempetacari: ainiro noquematsicati- mentaquempiri, noquemisantacantanta- quempi, irootaque noquimoshiretanta- cari. Moncarataca meeca. ²⁵Icantaquena

Tasorensi: “Pamitacojeiteri maaroni piyemisantaririnte, aisati poametasanojeiteri noneane”. ²⁶Ari meeca noamejeitempiro caari iojeiveitani inampirepee Tasorensi, aisati caari iojeiveitani atiripee. Meeca iotacaajeiteero Tasorensi, aisati iriori maaroni itsipapee quemisantajeitiriri. ²⁷Icoaque meeca piojeiteero oca imajeitaquempiri: ocameetsatasanoti catsini. Te avirojei jorio, iro cantaincha quiso yoasanojeitaquempiri Quirishito, irootaque piojeitantacari cameetsa pisaviquimojeiteri Tasorensi, coajica. ²⁸Iriotaque Quirishito noquenuetsatacotiri. Nocantajeitiri atiri: “Pantirocari caari cameetsatsi”. Aisati noametasanojeitiri iriotosanotanteariri Quirishito, irishiretsanotanteariri. Impoiji iriotacojeiteri atiripee, icameetsatasanoti. ²⁹Irootaque nopomerentsitimentaquempiri, caari noperaventantimpi. Irio Quirishito shintsitacaaquenari, itasoncaventaquena nomatantacari.

2 ¹Nocoaque piojeite nocantani nopomerentsitacoventimpi noquenuetsatacairi Tasorensi: nocantapinitiri iramitacotempi, aisati noquempetacoventiri yora ayemisantaririnte anta Araoriseaqui. Aisati iriori nopomerentsitacoventajeitiri maaroni caari neana. Nocantapinitiri Tasorensi iramitacotempi ²piveshireajeitantajeari, pinintava-caajeitantajeari. Aisati nocoaque ontimimotasanotempi piotanteari, nocoaque piotasanoteri yora imanaqueniri Tasorensi. Meeca iotacaajeitimpi: piojeitiri, iriotaque Quirishito. ³Iotasanoti catsini, otimasanoti catsini iotantari. Te amateroji anquenueshiretero maaroni iotiri irinti.

Icantiri Pavoro: “Yamataviyeetimpicari”.

⁴Queariompia, yamataviyeetimpicari: irootaque noamejeitantimpirori maaroni oca. ⁵Queario, te nontsipajeitempiji, iro

cantaincha oshequi noquenueshiretaquempi. Noveshirementaquempi: cameetsa pisavicajeiti, aisati piquemisan-tasanojeitaque. ⁶Tempa peerani pishiret-acari Avincatsarite Jesoquirishito, irootaque yoavisacotantaquempiri. Irosati pincanteani: pishireteari maaroni quitaiteriqui, paitapeerica panteri. ⁷Noshiacantempiro: ora panquirentsi, irootaque ovaritsa shiocacairori, aisati irootaque shintsitacairori. Aisati pinquempeteari avirori, quiso poyeri Quirishito iriotacantempiri, aisati irishintsitacantempiri. Pincantaitiyempani pinquemisanasanoteri, tempa irootaque yoameyeetimpiri. Aitaque pincantajeiteari, pimpasonquijeiteri Quirishito, tempa icavintsaasanojeita-quee.

⁸Queariompia: eiro piquemisantritsi yora coavetachari iramatavijeitempi. Iroamejeitempime atiripee maaroni iquenueshireyetiri, aisati maaroni ioyevetari: oca yoameyevetariri ishanincani iriori, intasanotacarori itimi, iro cantaincha te ontampaticateji. Yamatavimpicari. Te incoacayempiji iriori pinquemisantero yoametimpiri Quirishito.

⁹Peerani iquemetaquee Quirishito avatsa arori, iro cantaincha itasorensitanotaque catsini, yashi yoiro. ¹⁰Ariorica quiso poyeri, intasoncaventapinijeitempi, incantaitiyempani, eiro pashinoncanta-jatsi catsini. Ipincatsaritanotaque catsini, yanaacotasanojeitiri maaroni itsipapee pincatsarivetachari. ¹¹Yora joriopee, itoyeantajeita: yojocaquero imeshina. Meeca oquempevetaca pitoyeantaca avirori, iro cantaincha yojocacaaquempiro Quirishito caari cameetsatsi pantiniri. Meeca eiro acoirotsi antapinitero caari cameetsatsi: tempa ipashinitacaajeitaquee. ¹²Ariorica pivaotisaajeitaca, oquempetaca pitsipata-

cari Jesoshi: picamajeitaque, aisati pitijajeitaca. Tecatsi pincantero pincoayetero pantero caari cameetsatatsi: tempa oquempetaca picamaque. Itinaanaja aisati Quirishito, meeca oquempetaca pitinaajeitanaja aisati: meeca pinashijeitaja. Iro pinashijeitantajari, pishiretacari yora Tasorentisanori: yora oitinaajiriri Quirishito. ¹³Peerani oquempetimojeitaquempi picamaque, te pinquenqueshireterini Tasorentsi, irointi pantapiniveitaroni caari cameetsatatsi. Te pioveitearini Tasorentsi. Meecaquea icavintsaajeitaquempi: te inquenqueshiretajeiroji aisati caari cameetsatatsi pantajeiveitaniri. Meeca piquempetacari Quirishito: piojeitiri Tasorentsi, aisati coajica pisaviquimojeiteri anta inquitequi. ¹⁴Pamene: peerani oshequi apomerentsiventavetaro isanquenareni Moishishi avavisacotantajeameri, iro cantaincha te amoncarajeiteroji. Ayojeitanaque otimini antane, irootaque ajatanteameri ishaaviji. Iro cantaincha icamimentajeitaquee Quirishito coroshiqui, yoavisacojeitaquee. Meeca eiro apomerentsiventirotsi sanquenarentsi avavisacojeitantajeari. ¹⁵Peerani, icamantacari Quirishito coroshiqui, iotacaajeitaquee tecatsi incantajeitee camaari iroashinoncaajeitee. Itsaneacoventaquee, eiro ishinetiritsi camaari irantanatee.

**Eiro piquenqueshiretirotsi
yoameyevetimpiri atiripee.**

¹⁶Te oncameetsateji inquishimentempiro pishaninca poapinitari aisati piraapinitiri. Ainiro quitaiteripee inashitacaari joriopee, aisati imaoreajeitanti. Irosati yantironi: maaroni osarintsi, maaroni cashiri, aisati maaroni saavaro. Terica pimocarateari avirori, eiro pishinetiritsi inquishimentempiro. ¹⁷Peerani icantani yametapinijeitaro joriopee, iquenqueshireantariri Tasorentsi, iro cantaincha

meeca yareetaca Quirishito. Irosanori irinti, ampincatsajeiteri. Moncarataca, ari ocarati: eiro meeca apiitapinitajirotsi yamejeitari joriopee. ¹⁸Queariompia, eiro pishinetiritsi iramatavitempi. Icoacaimpicari pinquempeteari iriori, icantimpicari: “Pimpincatsateri inampire Tasorentsi pavisacotantajeari. Noneaquero caari ineapiniyeeti: ¿pineaquerompa avirori?” Ishemeteve. Eiro piquenqueshiretirotsi incantavetempiri, itseevani. ¹⁹Te inquenqueshireteriji yora Jivajeitaqueeri, te irioteriji. Aroquea ainti, ariorica anquenqueshireteri Quirishito, iriotacajeitee, iramitacojeitee quiso avavacaajeitea, amatanotantearori icoacaqueeri Tasorentsi.

²⁰Icamaque Quirishito, aisati oquempvetaca pitsipatacari picamaque avirori. Meeca eiro piquenqueshiretajirotsi yoameyevetimpiri atiripee: eiro oavisacotimpitsi. ¿Paita patsipetashitantarori pantashiyevetacaro icantimpiri iriori? ²¹Icantanirovetimpi: “Ariorica picoaque poavisacotea, eiro pipamitiritsi yora, eiro poaritsi yora, eiro pantiritsi”. ²²Tempa icantashitacaro atiri oca, yoametashtimpiro. Pamene, tempa ashi airo avapinijeitaro avari: ariorica ayearo, poyere; tecatsi oncantero ashire. ²³Ariorica antiteari, ajiticari ayoti, ajiticari aquemisantasanoti, ajiticari te ashemete, ajiticari ashinoncaimentacari Tasorentsi. Iro cantaincha atsipetashitacaro atita. Ariorica antitaquea, acantani acoaquero caari cameetsatatsi, aisati ashemetaque.

Icantiri Pavoro: “Cameetsa pisavicajeite”.

3 ¹Peerani te piojeiveitearini Tasorentsi, pijajeiteme Sharincaveniqui; iro cantaincha icamimentajeitaquempi Quirishito, yoavisacojeitaquempi. Impoiiji itinaanaja; irootaque meeca piojeitantariri Tasorentsi, eiro pijajeititsi Sharincaveniqui, ainti pijajeite inquitequi: anta

isaviquinta Quirishito iracosanoriqui Tasorentsi, icaratiri ipincatsaritanotaque. Meeca pincoasanotanaque pisavica-jeite anta, pintsipajeitantariri. ²Pinquenqueshirejeitea jaoca pincanteari anta inquitequi, eiro piquenqueshiretapiniyetajirotsi jaoca pincantajeiteari aca quipatsiquica. ³Oquempetaca picamaque, eiro meeca piquenqueshireyetajirotsi timayetatsiri quipatsiquica, eiro piquempetajatsi peerani. Iro cantaincha yoaneajeitaquempi Tasorentsi, pintimajeitapaaje inquitequi. Iquempoyeaquempi, inquempetacantajempi Quirishito. ⁴Coajica impiaje quipatsiquica Quirishito, yora oaneajeitaqueeri. Cameatsa impincatsaritapaaje, ancarajeitapaajeri ampincatsaritapaaje arori.

Icanti Pavoro: “Eiro papiitajirotsi caari cameatsatsi pantaveitaniri peerani”.

⁵Eiro catsini papiitajirotsi caari cameatsatsi pantaveitaniri peerani. Shirampari, eiro pantirotsi caari pai. Tsinane, eiro pantiritsi caari pai. Eiro pimayempitantapinititsi. Eiro pinevetarotsi tsinane. Eiro pinevetaritsi shirampari. Eiro pinevetasanotarotsi vaararontsi: piquempetacantarocari irio pitasorentsitsipinintantarori. ⁶Oshequi imayetiro atiripee, irootaque inquisanteariri coajica Tasorentsi. ⁷Peerani pantapiniveitaroni, pashi poironi. ⁸Pojocajeitajero meeca: eiro piquisavacaajeitajatsi, eiro pitsimajencatavacaajatsi, eiro picatsimatavacaajatsi, eiro picantimatavacaajeitajatsi, eiro pineaveetantajarotsi caari cameatsatsi, ⁹eiro pamatavitavacaajeitajatsi. Tempa pinashijeitaja meeca, eiro papiitajirotsi pantaveitaniri. ¹⁰Meeca pimpashinitasanotanaquea, pincameetsatasanojeitanaque, pinquempajeiteari yora Vetsicanaquempiri peerani. ¹¹Te inquenqueshireteroji Tasorentsi jaocarica acantajeitari: ariorica ajorioti, terica; ariorica

atoyeanta, terica. Te inquenqueshireteroji jaocarica aponeacari, paitapeerica ayoyetiri, arorica pimantaari, terica impimanteetejei. Irointi iquenqueshiretacetee aquemisantiririca Quirishito.

Jaoca icantajeitari quemisantatsiri.

¹²Pamene, tempa icoyeajeitaquempi Tasorentsi. Icoaque pincameetsatasano-
naque, aisati inintajeitaquempi. Icoacajeitaquempi pashi poyero pincavintsante, pishinoncatante. Eiro pishemetitsi, eiro pishema, eiro piquisa. ¹³Pintacotavaca-
yee: eiro pipiataritsi quisavetempineri, irointi pincavintsayeri. Tempa icavintsaimpi Avincatsarite, meeca pishiacoteri, pincavintaajeiteri itsipapee. ¹⁴Jero oca pimatasanoteri: aiqero pinintavacaasanojeitea catsini, maaroni. Pineaquero, ariorica anintavacaajeitea, ari ancameetsatasanojeitanaque maaroni. ¹⁵Nocoaque piveshireimentajeiteari yora Quirishito. Irootaque icoyeajeitantaquem-
piri, icoaque piveshireajeitanajee, maaroni. Icoaque anquempetavacaajeitea, maaroni quemisantatsiri. Aisati icoaque ampasonquijeiteri Tasorentsi. ¹⁶Pinquenqueshiretasanotero irineane Quirishito. Pincanteri iriotacajeitempi cameetsa poametavacaajeitantaajeiri. Icavintaajeitaquempi Tasorentsi, meeca pimpasonquijeiteri. Poametavacaajeitea pimpampoyeaeventajeiteri. ¹⁷Te ancoajeiteji impashiventacajeitee Avincatsarite Jesoshi, irootaque nocoacantaquempiri poameetsayero maaroni pantayeteri. Ocameetsati anquenqueshiretapiniteri, ampasonquijeitantariri Tasorentsi.

Icantiri jaoca ancanteriri ashanincepee.

¹⁸Tsinane, pimpincatsateri pijime, irootaque icoacaquempiri Avincatsarite. ¹⁹Shirampari, pinintasanotero pijina, eiroquea piquishirotsi. ²⁰Jananequi, pinquemisantapiniteri ashijeitimpiri,

paitapeerica incantempiri. Irootaque iveshireimentari Avincatsarite. ²¹Itimirica pitomipee, eiro piquisatsatiritsi: pishemashireacaaricari. ²²Pimantaari, pinquemi-santasanoteri yora amanantimpiri, paitapeerica incantempiri. Eiroquea pamataviritiritsi: eirorica yamenimpitsi, iro cantaincha eiro piperatarotsi pintsameeteneri. Ariorica pipincatsatiri Avincatsarite, ari pishintsiventeneri pivatorote. ²³Paitapeerica panteneriri, pishintsiventeneri. Pinquempetacanteri pishintsiventiniri Avincatsarite, te irio atiri. ²⁴Piotasannotaque pantapinitaqueneri Avincatsarite Quirishito, irootaque pinatempineri coajica, iroaneasannotajempi anta inquitequi. ²⁵Irintiquea yora antapinitirori caari cameetsatsi: iroashinoncayeri irinti. Paitapeerica antajeitaqueri, timatsi incanteeri arori, tecatsi ancantea amataviteri.

Icantiri Pavoro:

“Pinquenquetsatacapiniteri Tasorentsi”.

4 ¹Itimirica atiri pamanantiri, cameetsa pineshinoncateri, pincavintsayeri. Tempa pioti itimi anta inquitequi pivincatsarite avirori: iotaque maaroni pantajeitaqueri. ²Pincantaitiyempani pinquenquetsatacapiniteri Tasorentsi, pimatasanotero catsini. Queario, ariorica pinquenquetsatacayeri, pimpasonquitapiniteri aisati. ³Tempa nocamantapinitiri atiripee jaoca incanteeri iravisacotantajeeri, irootaque yoiminqueanteetaquenari meeca caravosoquica. Aisati pincanteri Tasorentsi iramitacotena noncamantajeiteri atiripee jaoca icantajeitaqueeri Quirishito yoavisacotantajeeri. ⁴Nocoaque cameetsa nontsoteeneri, inquemasantearori. ⁵Aisati avirori, ariorica pincarajeiteri caari quemisantayetatsi, cameetsa pisavique, aisati cameetsa poamejeiteri, eiro piperaventarotsi. ⁶Ariorica pinquenquetsatacayeri,

pincavintsayeri. Eiro pashereiritsi: vero, vero, vero. Ariorica irisampitempi paitarica, piote cameetsa panqueri incoanteari iriori inquemisante.

Iquenquetsatacotiri Tiquico.

^{7,8}Meeca nontianquempiri Tiquico, ayemisantaririnte nonintasanotiri. Iquempejeitaquena, iquearioventiniri Avincatsarite paitapeerica yantiniriri. Incamantapaaquempi jaoca nocantacari nosavicaque. Irootaque nontiancanteariri, piotanteari jaoca nocantajeitari aca. Aisati nocoaque iriveshireacayempi. ⁹Intsipatanaqueari Tiquico pishaninca Oneshimo. Irisati iriori ayemisantaririnte, iquearioventiniri Avincatsarite paitapeerica yantiniriri. Nonintasanotiri. Ari incarate apite camantapeempineri maaroni nantajeitiri aca.

Ivetsajeitari corosashisati.

¹⁰Ainiro aca yoiminqueetaqueri aisati yora Arishitaraco, ivetsajeitaquempi. Aisati ivetsajeitaquempi Maricoshi, yora iraniri Verenave. Tempa nocamantaquempi chapinqui: ariorica irareetempi Maricoshi, pineshinoncataqueri. ¹¹Jeri aisati Jesoshi, yora pajitachari aisati Joshito, ivetsataquempi. Jorio inajeiti, iro cantaincha icarajeitaquena noquenquetsatacojeitiri Tasorentsi, jaoca icanta ipincatsariventaquee. Aisati oshequi iveshireacaaquena. ¹²Ainiro aisati pishaninca Epajarashi, ivetsajeitaquempi. Irisati iriori antaveetiniriri Jesoquirishito. Icantani icantapinitiri Tasorentsi iramitacotempi pincameetsanteari, aisati pimatantearori maaroni icoacajeitaquempiri Tasorentsi. ¹³Noncamantempi: queario, ipomerentsiventasanajeitaquempi. Aisati ipomerentsiventiri yora araoriseasati, jeri aisati iyeraporishisati. ¹⁴Aisati ivetsajeitaquempi Irocashi: yora aavintantatsiri nonintasanotiri. Aisati ivetsajeitaquempi yora Temashi.

¹⁵Novetsajeitari maaroni ayemisantaririnte anta Araoriseaqui, aisati novetsataro Ninaja, aisati novetsajeitari maaroni quemisantapinijeitatsiri anta ovancoqui. ¹⁶Pineanajeiteneri nosanquenare maaroni quemisantatsiri aviroriqui. Impoiji pinceriteri yora araoriseasati irineanateneri maaroni iyemisanraririnte iriori. Aisati pineana-

jeitero ora nosanquenajeitiniriri iriori.

¹⁷Jero oca pinceriteri Ariquipo:

“Pimamatero maaroni icoacaquempiri Avincatsarite”.

¹⁸Ainirona nosaviqui aca caravosoqui, eiro pipeacotanatsi. Nocoaque irineshi-noncajeitempi Tasorentsi.

Ari ocarati. Narotaque sanquenajeitim-pirori: *Pavoro*

IJIVATAQUE PAVORO ISANQUENAJEITINIRI YORA TESARONICASATI

Ivetsajeitari Pavoro tesaronicasati.

1 ¹¿Savicajeitatsimpimpa ara, tesaronicasati? ¿Tecatsimpa oajeitempine? Narotaque aca Pavoro, nocarajeitiri Shirivano aisati Timoteo. Nosanquenajeitaquempiro maaroni noyemisantaririnte ara. Tempa avirojeitaque shanincajeitariri Apa Atasorensite aisati Avincatsarite Jesoquirishito. ²Nocoaque irineshinoncajeitempi aisati cameetsa irisavicacaajeitempi.

Oshequi iquemisanti tesaronicasati.

Nocantatiani nopasonquitiri Tasorensi: nopasonquitimentajeitempi aisati nocantiri iramitacotempi. ³Ariorica noquenquetsatacairi, noquenqueshiretapinitimpi, nocantapinitiri: “Pintasoncaventero tesaronicasati”. Oshequi pishirejeitacari aisati pinintajeitaqueri, irootaque pantaveetantacanariri maaroni icoacaajeitaquempi. Aisati noquenqueshiretaquempi, piquearioventiro pishiretacari Avincatsarite Jesoquirishito, piojeitaque eiro yamatavitimpitsi. ⁴Noyemisantaririnte, icantani inintaquempi Tasorensi. Niojeitaque icoyeajeitaquempi, irootaque itomintajeitantaquempi. ⁵Piojeitaque peerani nocamantajeitaquempi jaoca pincanteari pavisacojeitantajeari; te noncantashiteaji. Oamejeitaquempi Ishire Tasorensi, otasoncacoventajeitaquempi, piojeitanta-

carori queariosanotaque nocantaquem-piri. Aisati ocameetsajeitaque maaroni nantajeitaqueri, irootaque piotantacari queariotasanotaque nocantaqueri.

⁶Paitarica pineacotaquena nantaqueri, ari piquempejeitaquena. Aisati pimataquero paitarica piquemacotaqueri yantayetiri Avincatsarite Jesoshi. Piquemisantaquero maaroni nocamantaquempi, irosati piquemaatsicamentantacarori, iro cantaincha piveshirementacaro Ishire Tasorensi. ⁷Ari cameetsa pisavicajeitaque, irootaque icoantajeitacari inquempejeitempi maaroni ayemisantaririnte anta Maseroniaqui aisati Acayaqui. ⁸Aitaque povajeitanaquero Irineane Avincatsarite. Te apaniro inquemacotempi yora maseroniasati aisati acayasati, irointi iquemacojeitaquempi maaroni itsipapee atiri piquemisantasanotaque. Te noncamantajeiteriji narori, ⁹irointi iquenquetsatacotashijeitaquempi maaroni. Iojeitaque peerani nojatashitantaquempi, pojocajeitajiro maaroni povetsicashiyevetari pijitasorentsivetari. Paventajeitacari Tasorensisanori, yora aneasanotsarsi; meeca pantaveetaqueneri icoacaajeitaquempi iriori. ¹⁰Icamaque peerani Jesoshi, yora Itomi Tasorensi, impoiji yoitinaajiri aisati. Coajica, inquisajeitaqueri maaroni caari cameetsatsati, iro cantaincha eiro atsaroacaajeitaritsi ainti: tempa yoavisa-cojeitaquee. Meeca paamaajeiteari Itomi:

piojeitaque impocaje, imponeaquea inquitequi.

Yantayetiri Pavoro Tesaronicaqui.

2^{1,2}Peerani, tequerani nojateni pinampiqui, oshequi noneacatsitacaroni anta Jiriposhiqui, aisati ishirontimenteetaquena. Aisati oshequi opomerentsitimoquena ara pinampiqui, iro cantaincha te nontsaroapeeji. Aitaque, yamitacotaquena Tasorensi, nomatantacarori nocamantajeitaquempi Irineane. Te nantsipetashitearoji noquivantajeitaquempi. Tempa, noyemisantaririnte, piojeitaquero maaroni oca.³Noquemisan-tacantaquempiniri, te noncoyeni namata-vijeitempi. Tampatica noametaquem-pini: te nontseeyaji.⁴Iotitaca Tasorensi cameetsa novaayempiro irineane, irootaque itiancantanari nocamantim-piro. Te nonintasanoveteaji irineacameetsa-jeitena atiri, irointi nocoasanotaque irineacameetsatena Tasorensi. Iriotaque iotasannotirori maaroni aquenqueshire-jeitiri.⁵Te noninteji cameetsa noveshirea-caashijeitempi, te noncantashijeitempi: “Picameetsatasanojeitaque”. Namata-veitempicari. Ioti Tasorensi te irio nonintimentempi piirequite.^{6,7}Tempa narojeita-que itiancane Quirishito noquenquetsati, irootaque ocameetsantavetari noncantempime: “Pimpincatsajeitena”. Iro cantaincha te noncoyeji pimpincatsa-jeitena, aisati te noncoyeji impincatsa-jeitena itsipapee atiri. Ariorica atsotairi tsinane otomipee, ari ocavintsairi. Aisati noquempetacantapaaquem-pini peerani: nocavintsaajeitapaaquempi, te noshintsi-tacaajeitapeempiji.⁸Oshequi noneaca-meetsajeitapaaquempi, oshequi noninta-jeitapaaquempi, irootaque nocamantan-tapaaquempirori irineane Tasorensi. Meeca, paitapeerica nantayetaqueri, nocantatiani noquenqueshiretapini-jeita-quempi.

⁹Piojeiti, noyemisantaririnte, oshequi nopomerentsitacaro nantaveeti quitaiteriqui aisati tsiteniriqui. Te nonintajeiteji pimpomerentsiventenaro avirori pimpashiyetena paitapeerica. Nocamantajeitaquempi Irineane Tasorensi.

¹⁰Pineajeitaquena noquemisantasanta-que, cameetsa nosavicajeitaque, te onttimeji nantane. Aisati ineajeitaquena Tasorensi, cameetsa nosaviquimojeita-quempi, noyemisantaririnte.¹¹Jero oca noshicantempiri: tempa cameetsa yoametiri shirampari itomipee. Piojeita-que noquempetacantajeitaquempi notomipee, nocantajeitaquempi pinquemisante, noveshireacaajeita-quempi, aisati noamejeitaquempi¹²cameetsa pisavicajeite iriveshireimen-tantempiri Tasorensi. Tempa icoyeajeita-quempi pisavicajeitantajeari anta ipincatsaritinta, anta ishiquaireacojeiti-rinta maaroni.

¹³Peerani, noquenquetsacantapaa-quempiniri, pishiretasanotavacaro Irineane Tasorensi. Te pijitavaqueroji iro nashi noneane, irointiquea piotaquero iroosanotaque irineane Tasorensi, tempa queario oni. Piquemisantaque, irootaque opashinitacantajimpiri, oameetsatanta-jimpiri. Irootaque nocantantacariri Tasorensi: “Ariove, iquemisantaquero tesaronicasati pineane”. Aitaque nocantani nocantapinitiri.¹⁴Ari, noyemi-santaririnte, piquempejeitacari yora quemisantajeitiriri Jesoquirishito anta Joreaqi. Iquisajeitaqueri jorio ayemisan-taririnte anta, aisati iquempejeitaquempi pishaninca ara pinampiqui, iquisajeita-quempi iriori.¹⁵Yoacantajeitaqueri jorio Jesoquirishito, aisati peerani yoajeitaque-rini camantantatsiniri. Aisati iquempejei-taquena narori: iquisajeitaquena, te incoacaajenaji noshanincatajeari. Te onimoteriji Tasorensi yantanirojeita-queri: tempa iquisanirojeitaqueri maaroni

itsipapee atiri. ¹⁶Oshequi itsaneacotapini-vetaquena nonquenquetsatacaajeitempi avirorije, maaroni caari joriotatsi. Te incoacaajeivetempiji pavisacojeitaje. Ai quero ijatatii yantaquero caari cameetsatsi, iro cantaincha meeca iquisaqueri Tasorentsi, queario iroasan-quetaajeiteri.

Icoaque Pavoro irineajeri aisati tesaronicasati.

¹⁷Noyemisaririnte, te ancaratavacaajeivetempiji, meeca oshequi nocoiteajeitauempí. Te aneavacaajeitajeaji, iro cantaincha te nompeacotempiji. Oshequi nocoaque aneavacaajeitajea aisati. ¹⁸Nocoajeivetaca nonquivantajeitajempime. Aisati narori nocoapinivetaca nojatashitempime apaniro, iro cantaincha yoipiavajana Satanashi. ¹⁹Coajica impocapaaje aisati Avincatsarite Jesoquirishito. Iotaque iriori avirojeitauque noquemisantacaajeitauqueri. Ariorica impocaje, nonquimoshiretimentajeitempi, noveshireimentajeitempi, oshequi nonquenquetsatacojeitempi. ²⁰Queario, noveshireimentasanojeitauempí meeca, noquimoshiretimentasanojeitauempí.

3 ¹Oshequi noquenqueshirejeivetaquempí, iro cantaincha tecatsi noncantea nareetajempí narori. Naamaaca ocameetsati nosavique apaniro aca Atenashiqui, ²iro cantaincha nocoaque notianquempiri irinti Timoteo. Tempa iriotaque ayemisaririnte, tempa iquempejeitauquee antajeitiniri Tasorentsi, aquenquetsatacojeitiri Quirishito, acamantajeitiri atiri yoavisa-cotantauque. Ari yareetapaquempí Timoteo, yamitacotapaquempí piquemisantasanotaque, aisati iveshireacaajeitapaquempí. ³Pamene, timatsi quisajeitauempiri, iro iquisantauempiri piquemisantauqueri Jesoshi. Iro cantaincha eiro picantashiretanaquetsi, tempa piotitacani

intime quishempineri. ⁴Notsipatantaquempiniri, nocamantitauempini: “Ariorica pinquemisante, inquisaquempí tseencantatsiri”. Aitauque piojeitauque meeca moncarataca nocamantitauempiniri, ⁵irootaque oshequi noquenqueshireantauempiri. Notiancaqueri Timoteo notianteari irosatirica piquemisantajeiti. Naamaavetaquempí yantacaquempíro camaari caari cameetsatsi. Ariorica pinquemisanterime camaari, natsipetashitacarome noquemisantacaajeitauquempí peerani.

⁶Ari meeca yareetapaaja aisati Timoteo. Ineaitimpí, meeca ocameetsati oca icamantapaajanari: “Irosati icanta tesaronicasati, iquemisantasanojeitauque, aisati inintasanojeitauqueri itsipapee. Ineacameetsajeitauquempí, icoteajeitauquempí”. Aisati narori, oshequi nocoiteajeitauquempí avirori. ⁷Oshequi nashinoncaaca narori aca, iquisheetaquena. Iro cantaincha niotaque picantatiani piquemisantajeitauque, irootaque noveshireimentantajeitauempiri. ⁸Meeca noquimoshirejeitanaque, niojeitauque piquearioventaquero piquemisantaqueri Avincatsarite. ⁹Oshequi catsini noveshireimentaquempí, irootaque nopasonquitantacariri Apa Tasorentsi aisati Avincatsarite Jesoquirishito. Tempa yamenacojeitauquee maaroni. ¹⁰Noquenquetsatacaapinitiri Tasorentsi: quitaiteriqui aisati tsiteniriqui. Nocantiri: “Nocoaque pintianquena noneajeri aisati tesaronicasati”. Aisati nocoaque intianquena namitacojeitempi pinquemisantasanojeitanteari eiroquea pitseencashiretantajatsi. ¹¹Nocoaque irareetacayena ara pinampiqui. ¹²Nocoaque iramitacotempí cameetsa pinintasanotavacaajeitea catsini, aisati pinintasanojeiteri catsini itsipapee. Nocoaque pimoncarajeitena, nonintasanojeitauquempí avirori. ¹³Nocoaque iroameetsashiretasa-

notempi catsini, pinquempetantariri iriori. Coajica impocaje Avincatsarite Jesoshi, intsipajeitaqueari maaroni quemisantajeitiriniri, yora yoameetsajeitiriniri. Ari, impocajeiterica, nocoaque irineacameetsajeitempi Tasorentsi: tempa irio Apa arori.

Icantajeitiri: “Cameetsa pisavicajeite, pinintajeiteri itsipapee, panteneri Tasorentsi icoacaquempiri”.

4 ¹Meeca, noyemisantaririnte, nocoaque pimajeitero oca noncantempiri: irootaque icoacaimpiri Avincatsarite Jesoshi. Noamejeitaquempiro jaoca pincantajeiteari piveshireacantajejariri Tasorentsi. Ari pimatapinita- quero peerani: aiqero pijatatiye meeca, pimatanotero. ²Piojeitaquero icantaquempiri Avincatsarite Jesoshi, novaajimpiro narori. ³Icoasanotaque Tasorentsi pincameetsatanojeitanaque. Aisati te incoyeji pineavintsatero tsinane caari pai, ⁴irointiquea icoaque quiso poasanotero pijinasanori. Cameetsa paasanotero, pincavintsayero. ⁵Eiro piquempetaritsi caari quemisantiri Tasorentsi: inevashitacaró tsinane, iotashitaca icoashitaca irineavintsatero. ⁶Aisati icoaque eiro pimatirotsi itsaneayetacari. Eiro pineavintsatitayetiritsi ijina pishaninca. Ariorica pantacoteri, iroasanquetasanotempi Avincatsarite. Tempa oca nocamantasanotitaquempiro peerani. ⁷Te incoacaajeiteeji Tasorentsi anquempe-teari otsiti aneavintsayetero tsinane, irointi icoacaajeitaquee ancameetsatana- que.

⁸Yora caari mayeterone oca nocanta- quempiri, te irio impiatsatea atiri, irinti ipiatsataca Tasorentsi: yora tiancaquem- pirori Ishire. ⁹Pinintavacaajeitaca: tempa iriotaque Tasorentsi oamejeitaquempi- rori. Maname nosanquenatajempime aisati: “Pinintajeiteri piyemisantaririnte”,

tempa nantsipetearome. Tempa picantani pinintavacaajeitaca. ¹⁰Queario, pininta- jeitaqueri ayemisantaririnte: maaroni yora maseroniasati. Meecca, noshaninca, noncantempi aisati, aiqero pijatatiye pinintasanoeiteri catsini. ¹¹Pincoajeita- naque pisavicajeite cameetsa. Eiro pashereiritsi itsipapee. Eiro paamaacota- ritsi. Pantaveetapinite, paanteari coiteimojeitimpiri. Tempa nocamantita- quempiro oca. ¹²Ariorica pimajeitero, ari irineacameetsajeitempi maaroni caari quemisantatsi, aisati eiro ocoiteimojei- timpitsi paitapeerica.

Intinaajeitanaje camajeitaintsiri, aisati impocaje Quirishito.

¹³Meecca, noyemisantaririnte, noninti noncamantempiro jaoca incantajeiteari yora ayemisantaririnte, camajeitaintsiri. Nocoaque piotasanotero. Eiro piraacota- sanotiritsi, eiro piquempetaritsi yora caari iotatsine antinaajeitaje. ¹⁴Ayojeita- que icamaque Jesoshi, aisati itinaanaja. Aisati inquempejeitaqueari maaroni quemisantaajeitaqueriri, camajeivetain- chari: irointinaajeitajeri Tasorentsi. Ariorica impocapaaje aisati Jesoshi, intsipajeitaqueari. ¹⁵⁻¹⁷Jero oca noncamantempiri, irootaque irineane Avincatsarite. Coajica impocaje, aisati intianqueri Tasorentsi inampirepee, incanteri: “Meeccaquea pijajeite pampato- jeiteri maaroni quemisantaajeitanari”. Irosati intiotantaquearo itiore, aisati incajemapaaque yora jivatacaajeitiriniri. Irosati irisaviincantapaqueari Avincatsa- rite, imponeaquea inquitequi jenoqui. Eirotsitarica acamajeititsi arori, eirotsita ajivajeitiritsi camajeitaintsiri ajajeite jenoqui. Intinaajeitavajetsita quemisanta- jeitiriniri Quirishito. Impoijiquea ajajeite, antsipajeitanaqueari camajeivetainchari. Iraayeetanaquee anta mencoriqui, antonquotavaqueari Avincatsarite anta

inquitequi. Impoiji ancantaitatijempani quiso avanaqueri. ¹⁸Pincamantajeiteri maaroni ayemisantaririnte oca nocamantaquempiri, piveshireantajeiteari, maaroni.

5 ¹Te nonintacayemproji nosanquena-tempiro jaoca oncarate impocantajeiri Jesoshi. ²Yora coshitantsiri: ariorica incoshite, irimananaquearo tsiteniri. Aisati iquempetacari Avincatsarite, imanaquero jaoca oncarate impoque: tempa piojeitaquero oca. ³Ariorica incanteete: “Cameetsa meeca asavicajeite, tecatsi antanateene”, ari omapoquaqueri irashinoncaaquea. Inquempetearo tsinane tsomontetatsiri. Omapoquaquero antsicaneentaquero, tecatsi oncantero ompeajeero.

⁴Iro cantaincha, noyemisantaririnte, piojeitaque avinti: te onquempetomotempiji pintime tsiteniriqui. Eiro imapoquimpitsi Avincatsarite, eiro iquempetacaantimpitsi yora coshitantatsiri, imapoquiri ishaninca icoshitiri. ⁵Aitaque piojeitaque, oquempetomotimpi pitimi quitaiteriqui. Te arojei caari iojeitatsi, te antimeji tsiteniriqui. ⁶Te inquenqueshireteaji itsipapee, iro cantaincha eiro aquempejeitaritsi arori. Tsame anquenqueshirejeitea ainti, aamaajeitajeiri Avincatsarite. Eiro ashinquitatsi, irointi anquenqueshireempa. ⁷Imaapiniyeeti tsiteniriqui, ishinquitapiniyeeta tsiteniriqui, ⁸iro cantaincha aquenapinijeitaque ainti quitaiteriqui, eiro ashinquitatsi. Ariorica imanatapinita soraro, ipashicanejitacaro ashiro, aisati ipashicainatacaro. Yaventacaro, eiro aveantaritsi ivesamento oyerinemeru. Tsame anquempejeiveteari iriori, iro cantaincha aventeari Tasorentsi, irinti: anquemisanteri, aninteri, ayotaque ari iroavisacojeitaquue, impoiji eiro imatanteetsi yora camaari. ⁹Te incoyeji Tasorentsi inquisajeitee, irointi icoaque iroavisacojeitee, ariorica

anquemisanteri Avincatsarite Jesoquirishito. ¹⁰Icamentajeitaquue maaroni, aneatsiri aisati camaintsiri, antsipajeitanteari maaroni. ¹¹Irootaque noncantantempiri: poametavacaajeitea maaroni piveshireajeitanteari, piotasanoejanteari. Tempa aitaque pimajeitaquero meeca.

Jero oca icoacaaqueriri Pavoro irantajeiteri.

¹²Noyemisantaririnte, pimpincatsajeiteri maaroni quemisantacajeitimpiri, tempa ipomerentsiventimpiro maaroni. Tempa irio Avincatsarite tiancaqueriri, irootaque ipincatsariventajeitantaquem-piri aisati yoamejeitantaquempiri.

¹³Cameetsa yantaveetapiniti, irootaque ocameetsatantari pimpincatsatasanojeiteri, pinintasanoejiteri. Aisati nonintaque paacameetsatavacaajeitea maaroni.

¹⁴Meeca nocoaque noncamantajeitempi, noyemisantaririnte, nocoaque pincantajeiteri yora peranti eiro iperatatsi. Yora tsaroashenti, piveshireacayeari. Pamitacojeiteri yora caariquera materone inquemisantasanote. Jentsiquero poamejeiteri maaroni, eiro piquisatsajeitiritsi.

¹⁵Ariorica iroashinoncayeetempi, eiro pipiataritsi, irointi pincavintaavacaapini-jeitea. Aitaque pincanteari, pincavintaapini-jeiteri maaroni atiri. ¹⁶Piveshireimentapiniteari Tasorentsi, ¹⁷pinquenquetsatacaapiniteri. ¹⁸Jaocarica incanteetempi, pincanteri: “Irove, Apa, iroashinoncayee-tenata; aviroquea avinti noveshireimenta-quempi”, irootaque icoacaaquempiri. Tempa avirojeitaque quemisantajeitiriri Jesoquirishito.

¹⁹Pincantasanojeitero Ishire Tasorentsi oamejeitempi, eiro pipiatsajeitarotsi. ²⁰Eiro pitseenquirotsi icamantimpiri itiancane Tasorentsi. ²¹Piotasanotavaquero maaroni iroametempimeri itsipapee. Ariorica

ocameetsatasanoti, ari pishiretearo. ²²Paamaa-ventearo maaroni caari cameetsatatsi.

Ivetsajeitari Pavoro.

²³Yashi yoiro isavicacaajeitaquee Tasorentsi cameetsa. Nocoaque iroameetsashiretasanojeitempi. Nocoaque iramitacotempi poameetsajeitero maaroni piquenqeshiretapinijeitiri aisati maaroni pantapinijeitiri. Cameetsa inquempoyeajempi irosati impocantajeiri Avincatsarite Jesoquirishito. ²⁴Icoyeaquempi Tasorentsi,

eiro meeca yamatavijeitimpitsi, aitaque irimataquero maaroni icantajeitaquempiri. ²⁵Noyemisantaririnte, nocoaque pincantapinijeiteri Tasorentsi: “Pamitacoteri Pavoro”. ²⁶Pincanteri maaroni ayemisantaririnte ara novetsajeitari. ²⁷Aisati nocoacaquempi pineanajeiteneri maaroni pishaninca oca nosanquenajeitaquempiri. ²⁸Nocoaque incantaitatijempani irineshinoncajeitempi Avincatsarite Jesoquirishito. Narotaque sanquenajeitimpirori oca: *Pavoro*

YAPIITAJIRO PAVORO ISANQUENAJEITINIRI TESARONICASATI

Yovetsajeitajari aisati Pavoro tesaronicasati.

1 ¹¿Savicajeitatsimpimpa, tesaronicasati? ¿Tecatsimpa oajeitempine? Narojeitaque aca Pavoro, Shirivano, aisati Timoteo; nosanquenajeitajimpiro, aisati nosanquenajeitajiniri iriori maaroni noyemisantaririnte ara. Tempa avirojeitaque quemisantajeitaqueriri Apa Atasorents site aisati Avincatsarite Jesoquirishito. ²Nocoaque irineshinoncajeitempi aisati cameetsa irisavicacaajeitempi.

Iquemisantaque tesaronicasati, aisati inintavacaajeitaca.

³Ocameetsati nopasonquitacoventapini-
timpi, noyemisantaririnte. Aiquero
pijatatii piquemisantasanojeitanaque
aisati pinintavacaasanojeitanaca. Irio
nopasonquitapinitiri Tasorentsi.
⁴Queario, nocamantajeitiri itsipapee
quemisantiriri picantatiani piquemisanta-
jeiti. Oshequi iquisheetaquempi, aisati
oshequi yoashinoncaajeitaquempi, iro
cantaincha te pojoqueroji piquemisanti.
⁵Pineaquero, cameetsa ipincatsariventa-
quempi Tasorentsi. Ishinetacoventajeita-
quempi pineacatsijeitacaro maaroni oca,
pincameetsashireantajeiri, pintsipajeitan-
teariri anta ipincatsaritinta.
⁶Iro cantaincha icoaque Tasorentsi
impiateari yora oashinoncaajeitaquem-
piri, aitanaquempa irineashiitetemparota

iriori. ^{7,8}Meeca yoashinonqueeveta-
quempi, iro cantaincha coajica cameetsa
irisavicacayempi Tasorentsi, pincarajei-
tena narori. Coajica irimapocapaaquee
Avincatsarite Jesoshi, imponeanaquea
inquitequi, intsipatapaaqueari inampire-
pee shintsitasanotatsiri. Irishipaqueire-
paaque, inquempejeitapaaquearo
paamari. Cameetsa irisavicacaajeitapaa-
quee, iro cantaincha iroasanquejeitapaa-
queri maaroni caari quenqueshireterine:
maaroni yora caari quemisanterone
icantayevetariri. ⁹Incantaitiyempani
irineacatsitacaaqueari anta Sharincaveni-
qui, eiro catsini ineiritsi iriori Avincatsa-
rite. Eiro ineiritsi impincatsaritanote,
eiro ineiritsi intasoncantasano yete.
¹⁰Ariorica impocaje Avincatsarite,
impincatsajeitavaqueri maaroni atiri
yoameetsajeitiri, aisati iramenasanojeita-
vaqueri catsini maaroni quemisantajeiti-
riri. Piquemisantajeitavaquero peerani
maaroni nocamantajeitaquempiri,
irootaque pincarajeitanteariri ariorica
impocaje. ¹¹Ari icoyeajeitaquempi
Atasorents site, meeca nocantapinitiri
iramitacojeitempi, nocoaque iriveshirei-
mentasanojeitempi. Aisati nocantapinitiri
irimatacaajeitempiro maaroni cameetsa-
tatsiri icoacaquempiri panteneriri.
Ariorica pinquemisantasanojeiteri,
pantajeiteneri icantaquempiri; aisati
nocantapinitiri intasoncaventajeitempi
pimatasanotantearori. ¹²Irineajeitempi

atiri cameetsa pisavicajeitaque, irootaque impincatsajeitanteariri Avincatsarite Jesoshi. Iojeiti atiri aviro quemisantiriri Jesoshi, irootaque irinecameetsajeitan-tempiri. Tempa oshequi ineshinoncajeita-quee Atasorensite, aisati Avincatsarite Jesoquirishito.

**Iquenquetsatacotaqueri Jesoshi,
impocantajeari.**

2^{1,2}Meeca, noyemisantaririnte, piojeitaque impocaje Avincatsarite Jesoquirishito. Impocajerica, ari irampa-tojeitapaajee maaroni, ancarajeitanteariri iriori. Meeca noninti noncamantempi: eiro picantashirejeititsi, aisati eiro pitsaroejeititsi. Ariorica incanteetempi: “Areetapaaja Avincatsarite”, eiro pishiretarotsi incanteetempiri. Ariorica incanteetempi: “Oametaquena Ishire Tasorensi, ocanti pocaji”. Ariorica incanteetempi: “Noneaqueri narori”. Ariorica incanteetempi: “Ocanti isanque-nare Pavoro areetaja”.³Yamataviyeetimpicari. Eiro pishiretimatarotsi incantempiri. Tequera omoncarateaji impocantajeari Jesoshi. Irijivajeite oshequi atiri inquisajeiteri Tasorensi, impiajeiteari. Aisati intime yora janirotsatineri Sharincaveniqui, yora jivajeitiriri quisapinitiriri Tasorensi.⁴Inquisaniroteri Tasorensisanori, aisati inquisajeitero maaroni ijitasorensitashivetari atiri. Incantanirote: “Itimayeveta oshequi tasorensiyevetachari, iro cantaincha nanaacojeitaqueri nainti. Notasorensitasanotaque catsini”. Irisavicanirotaque anta ivancoqui Tasorensi, incantanirota-que: “Naro nainti Tasorensisanori, pinquemisantajeitena”. Ari, impoijiquea impocaje Quirishito, irinti.

⁵Peerani notsipajeitantimpiniri, nocamantitaquempironi maaroni oca. Tempa ainiro piquenqueshiretaquero.
^{6,7}Impocanirotitaqueame yora quisasano-

taqueriri Tasorensi, iro cantaincha timatsi tsaneacariri. Timatsi yantanirove-tacari meeca, iro cantaincha imanaquero. Te oncameetsateji oca yantanirotaqueri. Ainiroquera tsaneacariri, irootaque caari iconijatanta. Ariorica omoncaratapaa-quea impocantajeari, irijate yora shentiriri tsaneacariri, impoiji impocani-rotasanotapaaque. Piojeitiri yora tsaneacariri: tempa irio Tasorensi.⁸⁻¹¹Ari inconijatasanotapaaque yora caari quemisantanirotiro icantiri Tasorensi. Iro impocanteari intianqueri yora Satanashi. Irimatacayeri paitapeerica, intasoncantayete: incoapaaque avajeita-vaqueri cavaco. Aisati incoapaaque iramatavijeitapaaqueri atiri, maaroni. Irantanirotapinitero caari cameetsatatsi, iramatavitasanotanteariri maaroni yora jatatsineri Sharincaveniqui: queario, te incoajeiteji iriojeitero tampaticatatsiri oavisacojeiterinemeru. Ari irishineteri Tasorensi iramatavijeiteri, inquemisanta-jeitero tseeiyantsi. Iro cantaincha imoita-paaqueri Avincatsarite Jesoshi, intasonca-paaqueri, iroapaaqueri. Irishipaqueaco-tapaaqueri, impoyereapaajeri, poyere.
¹²Impoiji iroasanquetaasanoteri Tasorensi maaroni caari quemisantiro queariota-sanotatsiri: yora veshireimantarori caari cameetsatatsi.

¹³Iro cantaincha nopasonquitapinitiri Tasorensi. Avirojeitaque, noyemisantari-rinte, nopasonquitacoventajeitiri. Inintajeititaquempini Avincatsarite. Peerani catsini icoyeajeititaquempini Tasorensi iroavisacojeitempi. Ari oameetsatasanojeitaquempi Ishire, aisati pishirejeitacaro quearioyetsatiri, irosati yoavisacojeitantimpiri.¹⁴Narotaque ovaajimpirori oca icamantaquempiri pavisacotantajari. Icoyeajeitaquempi pinquempeteari Avincatsarite Jesoquiri-shito, pincarajeiteri pimpincatsarijeite.
¹⁵Pincantaitatijempani pinquemisantasa-

nojeite. Eiro pipeacojeitarotsi maaroni noametaquempiri peerani notsipatantaquempiri. Aisati eiro pipeacojeitarotsi maaroni nosanquenajeitaquempiri.

¹⁶Oshequi inintajeitaquee Avincatsarite Jesoquirishito, aisati Apa Atasorensite. Icantaitiani iveshireacaajeitaquee. Ineshinoncajeitaquee, irootaque ayojeitantacari irimajeiteero maaroni icantajeitaqueeri. ¹⁷Nocoaque iriveshiraacaajeitempi. Aisati, paitarica pantapiniteri, paitarica pincanteri, nocoaque irimitacotapinitempi.

Icantajeitiri Pavoro: “Jero oca pantajeiteri”.

3 ¹Meeca, noyemisantaririnte, noncamantempi. Noninti pincanteri Avincatsarite iramitacotena noshintsitacantearori novaajero irineane, aisati impincatsajeitantariri maaroni quemajeitavaqueroneri, inquempejitempi avirori. ²Timatsi caari cameetsajetatsi coatsiri iroashinocayena. Pincanteri Tasorensti iroavisacotena. Te meeca inquemisantajeiteji maaroni atiri. ³Eiro yamatavitimpitsi Avincatsarite, cameetsa pishireteari. Iramitacotempi piveshireimentasanotanteariri, aisati irojacaacotentempi: eiro ishinetiritsi camaari irantacayempiro paitapeerica. ⁴Iriotaque Avincatsarite iotacaaquenari pimatapinitaqueru maaroni nocantimpiri. Aitaque pincantaitatitempani pinquemisantena. ⁵Avincatsarite Quirishito icantaitiani iquearioventiniri Tasorensi maaroni. Nocoaque irimatacaajeitempiro pinquempeteari iriori. Aisati nocoaque irimatacaajeitempiro pinintasanojeiteri.

⁶Meeca, noyemisantaririnte, noncamantempiro oca icoacaquempiri Avincatsarite Jesoquirishito. Ariorica iperatata piyemisantaririnte, eiro piquempetaritsi. Te nonquempeteariji narori; pineajeitaquena, te nomperateaji

nainti. ⁷Piojeitaque ocameetsatimojeitimpi pinquempejitena avirori. Peerani, notsipatantaquempiniri, te nomperateaji. ⁸Ariorica pipayetaquenaro noari, nopinataquero. Aitaque nantaveetapinitaque quitaiteriqui aisati tsiteniriqui. Nopomerentsiventacaro maaroni coiteimojeitaquenari oncanteata tecatsi pimpomerentsiventenari avirori.

⁹Ocameetsavetaca noncoacotempime paitapeerica, iro cantaincha nonintaque nonijayempiro ocameetsati pantaveetapinite, eiro piperatatsi. ¹⁰Notsipatantaquempiri nocamantajeitaquempiro oca: yora caari antaveetatsine, eiro yoatsi.

¹¹Noquemacotaqueri picarajeitacariri peranti. Te irantaveeteji, irointi iquenayeti yaamaacotashitari ishaninca, ineaveetashita, vero, vero. Te oncameetsateji. ¹²Tempa ineajeitaquee Avincatsarite Jesoquirishito, irootaque nocamantajeitantimpirori oca. Pincantasanojeiteri irimajerejeite, insameejeite, impomerentsiventero coiteimojeitacariri.

¹³Noyemisantaririnte, eiro piperatarotsi pintacotantajeitea. ¹⁴Pioteri yora caari quemisantiro oca nosanquenatimpiri. Eiro piquempetacaasanotiritsi piyemisantaririnte, oncanteata iroashiretanteari.

¹⁵Eiro piquishiritsi, irointi cameetsa poametasanoteri: tempa iriovetaca piyemisantaririnte. ¹⁶Tempa cameetsa isaviqui Avincatsarite, meeca nocoaque cameetsa irisavicacaajeitempi maaroni quitaiteriqui, jaocarica pisavicajeiteri. Nocoaque quiso iroajeitempi.

¹⁷Narotaque nainti Pavoro vetsajeitaquempiri. Pineaquero nosanquenare piotanteari narosanoata pacantaquempirori. Aitaque nametacaro: ariorica nosanquenatapinitiniri ayemisantaririnte, nosanquenajeitininiri novajiro. ¹⁸Nocoaque irineshinoncajeitempi Avincatsarite Jesoquirishito.

Ari ocarati: *Pavoro*

IJIVATAQUE PAVORO ISANQUENATINIRI TIMOTEO

Ivetsatari Pavoro Timoteo.

1 ¹¿Savocatsimpi, Timoteo?
¿Tecatsimpa oyempine? Narotaque Pavoro sanquenatimpirori oca; itiancaquena Avincatsarite Jesoquirishito noquenquetsati, aisati itiancaquena Tasorentsi. Iriotaque matirori yoavisacojeitee, ayotasanajeiti te intimeji pashini oavisacotantatsine. ²Noquemisantacaquempi peerani, irootaque noshiacantantimpiri notomisanori. Nocoaque irineshinoncatempi Apa Atasorentsite, incavintsayempi, cameetsa irisavicacayempi. Aisati inquempetacayempi Jesoquirishito, yora Avincatsarite.

Isaviqui Timoteo Ejesoqui.

³Nojatantacari Maseroniaqui, nocantasannotanaquempi: “Pisavicavaquetsita aca Ejesoqui”. Nocoacaaquempi pincantimenter amatavitantatsiri; pincantajeiteri: “Eiro poametantirotsi tseyantsi”.
⁴Pincantajeiteri ayemisanrarinte: “Eiro piquemisantashitarotsi iquenquetsatashiyetari”. Pincanteri aisati: “Eiro pishiretashitarotsi iquenquetsatacotashiyetari maaroni peeraniniri. Patsipetashitarocari paamaashiyetearo paitapeerica. Tecatsi oncantempi ocapee oamejeitempi. Ainiro icoacaaqueeri Tasorentsi: ariorica ashireteari irinti, ari iroamejeiteero”.
⁵¿Paita nocamantantimpirori oca? Irootaque nocamantantimpirori nocoaque pincameetsashiretanaje, nocoaque

pintime cameetsa, eiroquea poashiretanatsi; nocoaque pinquemisantasanotanaque. Ariorica pimajeitaquero oca, aitaque pimataquero aisati pinintasanojeiteri itsipapee. ⁶Ainiro comiyetacarori aparopee, iquenquetsatacotashiyetaro irinti caari ioyeti, yatsipetashitaca icantavacaimentaro. ⁷Icoayeveta iroametanterome icantacantiniri Moishishini, iro cantaincha te iriotimate-roji icantavetari. Te iriotimateroji paitarica icamantacotasanoventari, vero, vero: ishiaqueri eroti.

Iquenquetsatacotiro icantacantiniri Moishishini.

⁸Ayojeiti ocameetsati icantacantiniri Moishishini, iro cantaincha acomitarocari. ⁹Piotasannotavaquero oca noncamentipiri: arojeitaque yoameetsatane Tasorentsi, te aro irisanquenateene Moishishini. Irinti isanquenatini yora caari quemisantiro irineane Tasorentsi: yora piatsatariri, caari quemisantiri, yora caari cameetsatsi, antapinitirori caari cameetsatsi, caari quenqueshiretiri Tasorentsi, oiriniri iririni, oironiri irinironi, oantatsiri, ¹⁰neavintsatirori caari yai, ora neavintsatiriri caari ai, yora tsinampairiri ishramparirinte, noshicantatsiri, tseyari, maaroni. Aisati isanquenatiniri maaroni quisayetiriri yora oametantayetirori cameetsatsiri. Tempa irio Tasorentsi sanquenatacaqueriniri Moishishini. ¹¹Cameetsa oni oca

noametantiri. Itiancaquena Tasorentsi noncamantacoteri irinti, ioti nomataque-neri icantaquenari. Cameetsa oca nocamantacotiriri: tempa icameetsasasanti irinti.

Yantayetiri Pavoro.

¹²Icoyeaquena Avincatsarite Jesoquirishito nanteneri paitapeerica icoacaquenari. Iotaque nomoncarateneri maaroni icoacaquenari: iotaque eiro namataviritirsi. Aisati imatacaquenaro nantayetiniriri, irootaque nocantantariri: “Ariove, pimatacaquenaro”. ¹³Peerani nocantima-veitarini, noshemetimoveitarini, aisati noquisajeiveitarini maaroni quemisantiriri. Iro cantaincha tequerani nioveitearini Quirishito, tequerani nonquemisantaveiteani. Te nioveiteani paitarica nantayetiniriri, irootaque icavintsantaquenari. ¹⁴Ineshinon-catasanotaquena catsini Avincatsarite: yoametaquena noquemisantiri Jesoquirishito, aisati nonintasanotiri. ¹⁵Queariotaque oca noncamantempiri, cameetsa pinquemisantavaquero. Ipcapaaque aca quipatsiquica Jesoquirishito yoavisacojeitaqueri caari cameetsajeitatsi. Nanaacojeitaquempi maaroni, te noncameetsaveiteani catsini. ¹⁶Irootaque icavintaantaquenari, ijivataquena narori ineshinoncataquena, te inquishenaji. Irootaque ayotantacari aisati inquempejeiteri iriori maaroni quemisanterineri coajica: irineshinoncajeiteri, incantaitiyempani intimasanojeitantajeari anta inquitequi. ¹⁷Incantaitiyempani Atasorentsite impincatsariventajeitajee arori. Tecatsi incantea incame. Yashi yoiro imana. Apaniro itasorentsi. Tsame ancantaitiyempani ampincatsasanojeitanaqueri, ancamantapinjeitanaqueri atiri icameetsasasanti. Aitaque ancanteari.

Jero oca icantayetiriri Pavoro Timoteo.

¹⁸Piotaque, Timoteo, noshiacantaquempni notomi. Pinquemisanterero oca

noncantempiri. Tempa peerani Tasorentsi, icantajeitaqueri ayemisantaririnte: “Oshequi irimatenaro Timoteo nocoacaqueriri”. Irosati yovaajeitantaquerori arori. Meeca pimamatero icamantacotaquempi. Píoti yora soraropee ishintsiventiniri iyapitanote paitapeerica icantiriri. Meeca, pinquempeteari, pishintsiventeneri paitapeerica panteneri Avincatsarite, ¹⁹pinquemisantasano-tanaqueri. Ariorica píoti ocameetsati pantero paitapeerica, ari pimamatero. Ainiro yora iovetachari te oncameetsateji paitapeerica, iro cantaincha yantashitacaro, impoiiji yojocajiro iquemisanti. ²⁰Aitaque imataquero Imeneo aisati Arijantero: yojocajiro iquemisanti. Te oncameetsateji oca, irootaque nocantantacari iriori: “Iroashinoncayempita Satanashi”; oncanteataquea iriotanteari pashini ashaninca eiro icantimatantaritsi iriori Tasorentsi.

Icantiri: “Pincanteri Tasorentsi iramitacojeiteri maaroni atiri”.

2 ¹Ari nojivataque noncamantempiri oca: pinquenquetsatacayeri Tasorentsi, pincanteri iramitacojeiteri maaroni atiri, pimpasonquitacoventeri. ²Aisati pincanteri iramitacojeiteri pincatsaripee aisati maaroni pashini ivincatsaririnte, impoiiji cameetsa asavicajeitanteari, eiro itimitsi ashereaajeiteeneri. Aisati cameetsa amatasanotero anquemisantajeiteri Tasorentsi, ampincatsajeiteri. ³Cameetsa ancamantapiniteri Tasorentsi oca, irootaque icoiri; tempa iriotaque oavisacojeitaqueeri. ⁴Icoasanotaque iriori avavisacojeitajea maaroni, aisati icoaque ayojeitero queariotatsiri, maaroni. ⁵Maaroni asavicajeiti arori aca quipatsiquica. Ainiro Tasorentsi apaniro, isaviqui irinti inquitequi. Te anepiniteriji, iro cantaincha ainiro aparani shirampari vaapiniteerori irineane: yora Jesoquiri-

shito. Aisati apaniro yovaaqueneri Tasorentsi aneane arori, ashanincatantacariri. ⁶Yora Quirishito, irisati coashitacha, icanti: “Nocoaque noncamimentajeiteri maaroni atiri noavisacojeitantariri”. Ari imataqueenero ayojeitantariri. ⁷Ipeaquena camantantatsiri, itiancaquena noamejeiteri maaroni atiri inquemisantajeitero oca queariotatsiri. Te nontseejaji, queariotaque oca nocantimpiri.

**Jaoca ancanteari
anquenquetsatacayeri Tasorentsi.**

⁸Ari nocoaque anquenquetsatacaajeiteri Tasorentsi, maaroni. Ariorica anquenquetsatacayeri, cameetsa asavicajeite: te oncameetsateji anquisheru itsipapee, te oncameetsateji antseenqueri Tasorentsi. ⁹Aisati nocoaque onquitsaatea tsinane cameetsa, eiro ocoitsi irineveyeetearo, aisati cameetsa onquenqueshiretea. Te oncameetsateji ontsiricoishitero oishi irineveyeetantarori, aisati te oncameetsateji oaneencashitearo oro, aisati perata. Aisati te oncameetsateji oshemetacayero oitsaare pinatasanotachari: ineveyeetarocari. ¹⁰Irointi ocameetsati oneshinoncatante: ari ocameetsavetari omajeiterome maaroni quemisantajeitiriri Tasorentsi. ¹¹Ocameetsati onquemisantasanoteri tsinane shirampari, aisati omajerete, iotantearori paitapeerica. ¹²Te noshineteroji tsinane oametante, aisati te oncameetsateji omperanateari shirampari, irointi ocameetsati omajerete. ¹³Ijivataqueri Tasorentsi peerani yovetsicaqueri Aran, impoji iroori yovetsicaquero Eva. ¹⁴Te iramataviteriji Satanashi Aran, irointi yamatavitaque tsinane, impoji antaquero caari cameetsatatsi: te onquemisanteriji Tasorentsi. ¹⁵Iro cantaincha ariorica oncavintsayeri tsinane otomipee, oncantatijempani onquemisanteri Tasorentsi, onintajeiteri oshanincapee, cameetsa osavique,

cameetsa onquenqueshiretaquea, ari oavisacotaquea.

**Jaoca incanteari yora jivatacaajeitiriri
iyemisanraririnte.**

3 ¹Queario oca icanteetiri: “Ariorica icoaque shirampari irijivatacaajeiteri iyemisanraririnte, tempa ocameetsati oca icoaqueri”. ²Ariorica irijivatacaajeiteri iyemisanraririnte, te oncameetsateji ontime irantane. Cameetsa iraye ijina aparoni, te oncameetsateji irishinquitaa, cameetsa inquenqueshiretanaquea, incameetsashirete, cameetsa irineshinoncatavaqueri quivanterineri, cameetsa iriotasanote iroametante. ³Te oncameetsateji irirapinitero quepishijatasanotatsiri, te oncameetsateji inquishea; irointi cameetsa incavintsante, cameetsa irisavique, te oncameetsateji irinintasanoteri quirequi. ⁴Cameetsa iroametapinitero ijina, cameetsa iroametapinijeiteri itomipee, inquemisantajeiteariri iriori, eiroquea iptsajaitantaritsi, cameetsa irisavicantajeiteari. ⁵Eirorica imatirotsi inquemisantacayeri itomipee, aisati ijina: ¿jaoca incanteari irintacoteari maaroni yora quemisantajeitiriri Tasorentsi? ⁶Te oncameetsateji irijivatacante iroaquera quemisantatsi: ishematicari. Iquempetaricari camaari, ishemetaque peerani, impoji yoasanquetaqueri Tasorentsi. ⁷Cameetsa iriojeiteri yora caari quemisantajeitatsi, incantajeite: “Icameetsati yora jivatacaajeitiriri quemisantatsiri”. Impoji eiro imatantaritsi incantimajeiteri, aisati eiro imatantaritsi camaari irantacayeri caari cameetsatatsi.

**Iquenquetsatacotiri amitacotapinitiriri
iyemisanraririnte.**

⁸Yora amitacotapinitiriri iyemisanraririnte: cameetsa irishiyeri yora jivatacaajeitiriri, incameetsashiretanaque. Te oncameetsateji iramatavitante. Aisati te

oncameetsateji irirero oshequi cachojari. Aisati te oncameetsateji inquenqueshire-
teri quirequi iroshequiyeri. ⁹Cameetsa
inquearioventero inquemisantasano-
maaroni yoameyetiriri Tasorensi, aisati
ocameetsati iriote te aneroji irantane.
¹⁰Pijivate pamenasanoteri, piotasanoteri
icameetsatasanotirica. Ariorica piojeita-
que icameetsatasanoti, ari pincanteri
iramitacojeiteri quemisantajeitatsiri.
¹¹Aisati onquempeteari ijina, oncamee-
tsashiretanaque: te oncameetsateji
oncantimatante, te oncameetsateji
oshinquitea, te oncameetsateji amata-
vitate. ¹²Yora amitacotantatsiri, cameetsa
iraye ijina aparoni. Cameetsa iriote
inquemisantacaasanoteri itomipee:
impincatsateri iriori iriri. Aisati cameetsa
iriote inquemisantacaajeiteri maaroni
saviqimojeitiriri. ¹³Ariorica cameetsa
iramitacojeiteri iyemisantaririnte, ari
impincatsayeeteri, aisati irimatero
inquemisantasano-teri Jesoquirishito, eiro
itsaroacaaritsi.

**Iquenquetsatocotiri
quemisantajeitiriri Jesoshi.**

^{14,15}Nocoavetaca intsipaita nareetitapeem-
pime, iro cantaincha eirorica nomatirotsi.
Irootaque nosanquenatantimpirori oca:
nocoaque piote jaoca acantajeitari.
Icoyeajeitaquee Tasorensi: tempa
arojeitaque quemisantajeitiriri. Aneatsiri ini.
Ayojeitiro oca queariotasanotatsiri:
cameetsa anquearioventero avayetero.
¹⁶Queario, te ayotashiteaji jaoca icantari
Tasorensi, iro cantaincha iotacaajeitaquee
Quirishito. Tasorensi ini, iro cantaincha
yatiritapaaque. Ora Ishire, irootaque
iotacaajeiteeri itasorensitaque. Yora
inampirepee Tasorensi yamenacoventajeita-
queri Quirishito. Acamantacojeitaqueri arori
maaroni nampitsipeequi, iquemisantajeita-
queri savicajeitatsiri. Yovancajiri iriri aisati
inquitequi, cameetsa isavicapaaji catsini.

**Quearioyeya yoameyeetimpircari
tseeysantsi.**

4 ¹Jero oca ocamantasanojeitee Ishire
Tasorensi. Coajica, irotimataints
impocantajeeri Quirishito, intime
jocajeiteroneri oca queariotatsiri aquemi-
santajeitiri. Inquemisanteri amatavijeite-
rineri, ovaayetirori yoameyetiriri camaari
iriori. ²Iramatavitate yora atiri, iro
cantaincha irishiacanteame iquemisanti.
Tecatsi incantea iriote te oncameetsateji
oca icantayetiri. ³Intsaneapiniteari
shirampari iraye ijina, aisati intsanea-
quearo tsinane aye ojime. Aisati intsanea-
pitsataqueeri avajeiteari avari yovetsica-
queeri Tasorensi. Aquemisantajeitiri
Tasorensi, ayojeiti queariotaque
yoamejeitaqueeri irinti. Aitaque icoaque
ampasonquitacoteri ayeeri, irosati
avanteariri. ⁴Ocameetsajeitaque maaroni
yovetsicaqueri Tasorensi. Ariorica
ampasonquiteri, cameetsa avajeiteari,
eiro apinquiritsi. ⁵Yoameetsantaqueeri
Tasorensi avajeitari. Ariorica ampason-
quiteri, aisati anquenqueshiretero
irineane, ocameetsati avapinijeiteari
maaroni.

**Pinquearioventeneri Tasorensi
maaroni icantayetimpiri.**

⁶Ariorica povajeiteneri ayemisantari-
rinte oca nocantimpiri, ocameetsati.
Tempa pishiretapinitacaro, oametasano-
taquempi. Ariorica poamejeiteri itsipapee
nocamantimpiri, ari incantempi Jesoqui-
rishito: "Cameetsa oca pantaquenari".
⁷Eiro pishiretarotsi oca iquenquetsashi-
tari tseearyi: te oncameetsateji pinquen-
queshiretapinitero. Irointiquea pinquea-
rioventero pinquemisantasano-teri
Tasorensi, irinti. ⁸Ocameetsaveta
pinquenaveete aisati pintsameete,
oshintsitasanotantajeeri pivatsa; iro
cantaincha ocameetsatasanoti catsini

pinquearioventeneri Tasorentsi paitapeerica panteneriri. Eiro patsipetarotsi irointi: cameetsa pisavique meeca, aisati cameetsa pisavique coajica anta inquitequi. ⁹Queariotasanotaque oca nocamantaquempiri. Ocameetsataque irishirejeitearo maaroni atiri. ¹⁰Apomerentsiventacari atiri, aquematsicatimentacari inquemisantajeitantajeari. Aneatsiri ini Tasorentsi, ayojeiti eiro yamataviteetsi: iriotaque oavisacojeitiriri maaroni atiri. Queario, yoavisacotasanojeitiri maaroni quemisantajeitiriri.

¹¹Pincantajeiteri atiri irimamajeitero oca nocantimpiri, poametasanojeiteri. ¹²Evancariquerampi, iro cantaincha eiro pishineyeteritsi intseenqueetempi. Paitapeerica pantayetaqueneriri Tasorentsi, cameetsa pimayetero, inquempetantempiri piyemisanraririnte: pineanate cameetsa, pisavique cameetsa, pinintajeiteri itsipapee, pinquemisanteri Tasorentsi, poameetsantero maaroni pinquenqueshireyeteri. ¹³Coajica noneajan-tempi. Meeca pineanatapiniteneri ayemisanraririnte irineane Tasorentsi, piveshireacaapiniteari, poametapiniteri. Pincantatiyempani, irosati nareetantapaajeari. ¹⁴Peerani icamantacotantaquempiri, aisati icantantarriri jivatacaantatsiri Tasorentsi iramitacotempi, aisati yajiricainataquempi, irosati imatacaantaquempiri Tasorentsi. Meeca eiro piperaventarotsi oca imatacaaquempiri. ¹⁵Pimatapinitero oca imatacaaquempiri, iriotasanojeitantajeari maaroni atiri pimatasanoaquero. ¹⁶Pinquenqueshiretasanotero paitarica pantayeteri, aisati paitarica poameyeteriri: pinquearioventajeitero. Ariorica pimajeitero oca, ari poavisacotacantajeiteri maaroni quemajeitempineri, aisati pavisacotaje avirori.

Jaoca pinceriteri itsipapee pishaninca.

5 ¹Eiro piquisatsitiritsi anteashipari; irointi cameetsa pineanateri, pinquempetacanteri irio piri avirori,

cameetsa pincavintsayeri. Aisati evancaripee, pinquempetacanteri pirenti. ²Ora anteashiparo, pinquempetacantero piniro. Aisati evancaropee, pinquempetacantero pitsiro: eiro piquenqueshiretirotsi pantero. ³Ariorica ontimashitajea camajimentaaro, terica intime neshinoncatajerone, pineshinoncateroyea avinti. ⁴Iro cantaincha itimirica otomi, oshinto, iriorica osari, cameetsa irineshinoncatero iriori. Irootaque icoiri Tasorentsi cameetsa ayojeite ancavintsayeri ashanincasanori arori. Cameetsa ampajeiteri ashijeiteeri coiteimojeitacari. Tempa peerani ipajeitaquee maaroni coiteimojeitaqueeri arori. ⁵Ariorica otimashitasanotaja camajimentaaro, apaniro oquenqueshiretasanotiri Tasorentsi irinti, te intimeji pashini neshinoncateroneri. Ocantani: tsiteniriqui, quitaiteriqui, oquenquetsatacapinitiri Tasorentsi, ocantapinitiri paitarica ocoayeteri. ⁶Iro cantaincha ainiro pashini, onashita irointi: ocoaque onquimoshiretashitea. Aneavetaca, iro cantaincha eiro oneiritsi Tasorentsi. ⁷Pincamantajeiteri maaroni quemisantatsiri irimamajeitero oca nocantimpiri, oncanteata eiro otimitsi irantane.

⁸Ocameetsati aneshinoncajeiteri itsipapee ashaninca, aisati ashanincasanori arori, aneshinoncatasanoteri. Eirorica aneshinoncaturitsi, eiro acantitsi: “Noquemisanti narori”. Teve. Te incameetsateji tseencantatsiri, iro cantaincha terica aneshinoncateri ashaninca arori, anaacojeitajiri ainti yora tseencavetachari, te ancameetsatanotejii catsini. ⁹Ariorica omoncarataquero camajimentaaro 60 osarintsite, ari pincertero intacojeiteari maaroni ayemisanraririnte. Ocameetsataque aisati aaveitaniri aparoni ojimeni, te oshequiyerini. ¹⁰Ocameetsati pineacojeitaquero omayetaquero cameetsayetatsiri:

intacojeitacari otomipee, oneshinoncajeitacueroi itsipapee, amitacojeitacueroi maaroni quemisantajeitiriri Tasorentsi, oavintsaaajeitacueroi ashinoncaincari, oquearioventaquero omayetaquero cameetsayetsiri. Ariorica pineacojeitacuero omayetaquero oca cameetsayetsiri, ari ocameetsati pincantero intacojeiteari quemisantajeitatsiri ashinoncaajeitachari. ¹¹Iro cantaincha eiro picantirotsi ora camajimentaaro caari anteshipatsi. Ocoiricari shirampari antashiteari. Ocoicari aaje aisati, ojocajiricari Quirishito. ¹²Ojivavetaca ocantavetacari: “Nonquemisantasanotempi”, iro cantaincha impoiji amatavitaquero. Irootaque iroasanquetantearori. ¹³Aisati operatacari, oquenaquenayeticari pancotsipeequi, oneaveetashitacari, vero, vero, oquempetaricari tsiroti. Aamaashitaricari oshaninca, oneanatanarocari caari cameetsatsi.

¹⁴Irootaque nocoantacari aaje aisati camajimentaaro, tequeratsitarica anteashiparote. Cameetsa intime otomipee. Cameetsa oncoteneri ojime iroyeari, aisati otomipee. Cameetsa ontijeneri iitsaare, onquiveneri iitsaarepee, maaroni. Ariorica cameetsa ontime, tecatsiquea incantea atiri incantimajeitee. ¹⁵Jero imayetaquero Satanashi aparopee: yojocacaajiro oquemisantavetacari Quirishito. ¹⁶Itimirica oshanincasanori camajimentaaro, cameetsa iriotashitea incavintsayero iriori. Te oncameetsateji incanteri quemisantajeitatsiri: “Pincavintsaaajeiteroyea avinti”. Timatsi pashini camajimentaaro, savicatsiri apaniro: tecatsi oshanincasanori cavintsayeroneri. Irooquee irointi, cameetsa incavintsaaajeitero yora quemisantajeitatsiri.

**Jaoca ancantajeiteriri yora
jivatacaajeiteeri.**

¹⁷Cameetsarica ijivatacanti yora jivatacaajeitiriri quemisantatsiri, ocamee-

tsati impinatasanoteri. Cameetsa inquemisantasanoteri aisati. Ariorica ipomerentsiventaquero iquenquetsati aisati yoametsanti, cameetsa impinatasanoteri. ¹⁸Aitaque ocanti Sanquenarentsi: “Eiro pipashicavantetiritsi yora vaca aaticaitirori tirico, pishineteri iroyea. Tempa yaaticaitimpiro paantarori oitsoqui”. Aisati ocanti: “Ocameetsati impinayeeteri yora antaveetiniriri”.

¹⁹Eiro piquemisantashitaritsi aparo cantacotashitearineri jivatacaajeitimpiri, piquemisantirocari tseyantsi. Iro cantaincha incarataquerica neasanoterineri 2, ariorica 3, ari pishiretearo oca incamantempi. ²⁰Queariorica otimi yantasanotaquero, ari pincanteri: “Eiro papiitajirotsi aisati oca pantaquero”. Cameetsa iriojeitero maaroni quemisantatsiri oca pincanteriri, inquenqueshirejeitanteari, iriojeitanteari eiro yantantarotsi iriori caari cameetsatsi. ²¹Ayojeitaque icarajeitaquee Atasorentsite, aisati Jesoquirishito. Aisati icarajeitaquee inampirepee iriori. Irootaque nocantantimpiri pimamajeitero pincanteri antirori caari cameetsatsi. Eiro pipincatsatashitaritsi jivatacaavetimpiri avirori. Ocameetsati pimincaratavacajeitea avirori. ²²Eiro pipeashitaritsi shirampari jivatacaajeiterineri quemisantatsiri, eiro pipamiinatashitaritsi. Pijivate piotasanteri. Eiro pishinetiritsi itsipa irantero caari cameetsatsi: ariorica pishineteri, ontime pantane avirori. Pantirocariya avirori caari cameetsatsi.

²³Eiro apatiro piriyo nija, irointi pirero aisati ovaja capichaji. Oameetsatajempiro pamporetsa picatsiti. Apinitaquempi pimaore, iro cantaincha oshintsitacayempi ovaja. Ariorica pirapinitero capichaji, ari oavisacotajempi, aisati oshintsitacajempi. ²⁴Oconijataque caari cameetsatsi yantaniroyetiri aparopee atiri; iojeitaque incantacoteri Tasorentsi:

“Ainiro yantane”. Ainiro pashini manave-tacarori yantayetiri, iro cantaincha coajica onconijate aisati maaroni yantayetiri iriori. ²⁵Aisati, ariorica antayetaquero cameetsayetatsiri, oconijataque aparopee, inecojeitaqueero atiri. Iro cantaincha tequera onconijateji maaroni cameetsatsiri antajeitaqueri: coajica onconijatasanaotaque maaroni. Aitaque oncanteari.

Jero oca icantajeitiriri pimantaari.

6¹Yora amanantiriri iveranaro, iperanasanotacarari. Iro cantaincha ariorica iquemisantaque yora pimantaari, ocameetsati impincatsateri yora amanantiriri. Impoiji tecatsi incanteete incantimateri Tasorentsi, aisati tecatsi incanteete: “Te oncameetsateji oca yoametiriri quemisantatsiri”. ²Ariorica iquemisantaque yora amanantajiriri, te oncameetsateji incante yora pimantaari: “Iriotaque meeca noyemisantaririnte, nomoncaratavacaaca. Eiro meeca nopincatsatiritsi”. Irointi cameetsa irantaveetasanoteneri: tempa irio iyemisataririnte yantaveetiniri, irootaque inintantariri. Irootaque, Timoteo, poamejeiteriri maaroni, pincantajeiteri maaroni irimajeitero.

**Iquenquetsatacotiri
oametantirori tseyantsi.**

³Ainiro quenacaashitacarori oca noametiriri. Te irishiretearorji ora queariotatsiri yoametiriri Avincatsarite Jesoquirishito. Aisati te irishiretearorji oca oamejeitaqueri anquemisanteri Tasorentsi. ⁴Oshequi ishemeti, iro cantaincha te aneroji iotantari. Te irioteji. Isampitacotashitacarorji paitapeerica. Ineanatashiniroveetaca, vero, vero. Impoiji iquisashireaqueri itsipapee, iquisatsataqueri, icantimataqueri, yaamaacotacarari yantiro caari cameetsatsi. ⁵Iquisavacaajitaca

yora quenqueshiretirori caari cameetsatsi, te inquenqueshireterorji queariotatsiri. Iquemisanteriromempeaca, ijitashivetaca ari irayeme paitapeerica. ⁶Iro cantaincha ariorica anquemisantasanoteri Tasorentsi, aisati aveshireimenteari, ari asavicasanojeitanaque cameetsa.

⁷Atimantapaacarari peerani, tecatsi amapaaque. Aisati onquempetea, ariorica ancamaque, tecatsi aanajeri aisati. ⁸Iro cantaincha timatsirica avajeitari aisati aquitsaajetari, aitapaaji, eiro aiquero acoanaitii aisati. ⁹Irintiquea yora coatsiri irashitaarantea yantanerotashiyetacarorji paitapeerica irishequiantearorji irovaararo. Omapocashitapaacarari yantaquero paitapeerica. Te inquenqueshireteaji, icoashitacarorji caari cameetsayetatsi, impoiji incamaquerica, irijate Sharincaveniqui. ¹⁰Ariorica ancoasanotaque ashiyetearo paitapeerica, aitaque antaquero caari cameetsatsi. Oshequi quemisantavetachari yojocajiro iquemisanti. ¿Paita yojocantarorji? Tempa icoaque irashiyetearo paitapeerica, iro cantaincha impoiji oshequi inquenqueshiretanaquea, iroashiretasanaotanaquea catsini.

**Icantiri: “Pinquearioventeneri
Tasorentsi pantaveeteneri”.**

¹¹Iro cantaincha avinti, piquearioventiniri Tasorentsi paitarica icantimpiri. Pinevetarocarari avirori paitapeerica. Pincoasanote pincameetsatasanaotaque avinti. Pimpincatsateri Tasorentsi, pinquemisantasanoteri, pinquearioventeneri maaroni icoacaquempiri, pantaveeteneri; pinintasanajeiteri itsipapee, pineshinoncajeiteri. ¹²Ariorica opomerentsivetaca piquemisantasanoteri Tasorentsi meeca, iro cantaincha ocameetsatasanoteri pimataquero. Pinquearioventeneri icoacaajetimpiri. Eiro pipeacotarotsi: pincantai-

tatijempani panee inquitequi. Icoyeanquempi Tasorentsi iroaneantajempiri anta inquitequi. Tempa irootaque picantaqueri avirori, icarajeitaque oshequi quemajeitavaquempiri. Queariotaque picantaqueriri. ¹³Tempa irio Tasorentsi oaneajeiteeneri inquitequi, maaroni. Aisati peerani Jesoquirishito, te intsaroacayeariji Pontsio Pirato, yora oacantaqueriri. Icantiri: “Queario, narotaque pincatsari”. Meeca icarajeitaquee Tasorentsi aisati Jesoquirishito, yamenacoventajeitaquee. ¹⁴Irootaque noncantantempirori oca: pintsoteaquero maaroni nocantimpiri, eiro picomitarotsi. Pincantatijempani, pimatasanotero irosati impocantajeari Avincatsarite Jesoquirishito. ¹⁵Ioti Tasorentsi jaoca oncarate impocantajeari, iriotaque cantatsineri. Iquimoshiretaque iriori. Apaniro ini, itasorentsitasanotaque catsini, ipincatsariventajeitiri maaroni pincatsariventavetariri atiri, ijivatacaajeitiri maaroni jivatacaajeivetariri atiripee. ¹⁶Apaniro irinti eiro itsoncatsi, eiro icamitsi catsini. Anta itiminta otimi quitaiteri catsini, tecatsi ancantea ajatashitero. Te intimeji neerineri Tasorentsi. Tecatsi ancantea aneajeiteri. Ocameetsati ampincatsatasanojeitanaqueri maaroni. Icantatiani ipincatsariventanti irinti, yashi yoiro. Aitaque icanta.

Jero oca icantiriri ashitaarantincari.

¹⁷Pincanteri ashitaarantincari eiro ishemetitsi. Aisati pincanteri eiro iveshirementarotsi yashiyevetari, tempa ari ompeajea, coajica. Irintiquea Tasorentsi iriveshireimentea. Ipapini-jeitaquee maaroni coiteimojeitaqueeri aquimoshirejeitantari. ¹⁸Oshequi iroaararo iriori ashitaarantincari. Pincamanteri meeca irineshinoncajeteri ishanincapee, oshequi irineshinoncateri. Te oncameetsateji irimashitsate. Cameetsa incavintsante, irointi. ¹⁹Ariorica irimayetaquero oca, cameetsa. Impinateri Tasorentsi coajica anta inquitequi, anta incantatijempani iraneapaaje cameetsa.

Ivecarataquero isanquenare.

²⁰Meeca, Timoteo, otimi icantaquempiri Tasorentsi pantaqueneri. Ari pimamateneriqueti, eiro pamatavitiritsi. Eiro pishiretashitarotsi cantaantsi. Ainiro oametantayevetarori paitapeerica, ijiveta ioti, iro cantaincha te omoncaratavacayeaji icantiri. Eiro pishiretashitarotsi yoametashiyevetimpiri. ²¹Ijitashivetaca yora ioti, iro cantaincha, te irioteji. Irootaque caari iquemisantanta. Ari, nocoaque irineshinoncatempi Tasorentsi.

Narotaque sanquenatimpirori oca:
Pavoro

YAPIITAJINIRI PAVORO ISANQUENATAJINIRI AISATI TIMOTEO

Ivetsatajari aisati Pavoro Timoteo.

1 ^{1,2}¿Ainirompi, Timoteo? ¿Tecatsimpa oyempine? Narotaque Pavoro sanquena-tajimpirori oca. Itiancaquena Jesoquirishito noncamantajeiteri maaroni atiri ariorica inquemisantajeiteri Jesoquirishito, ari iroaneajeitajeri anta inquitequi. Irootaque icoacaaquenari Tasorentsi. Notiomi, nonintasanotimpi. Nocoaque irineshinonca-tempi Tasorentsi, aisati Avincatsarite Jesoquirishito. Aisati nocoaque incavintaasa-notempi, cameetsa irisavicayempi.

Ipasonquitacoventiri Pavoro Timoteo.

³⁻⁵Noquenquetsatacapinitiri Tasorentsi maaroni quitaiteriqui, aisati tsiteniriqui. Paitaricapee nanteneriri, nocoasano- taque noveshireacayeari. Tempa peerani yantaveeti- nirini iriori yora noshanincani. Peerani, nojocantanaquempiriranqui, poashiretanaca, piraaca. Oshequi meeca nocoiteaquempi. Nocoaveta noneajempime aisati, noveshirei- mentasanotajempime. Noquenqueshiretajimpi, oshequi piquemisantasano- taque, picantani. Piquempetacaró pisaro Iroira, aisati piniro Eonise: oquemisantasanojeiti iroori. Nioti ainiro- tatsi piquemisanti, irootaque nopason- quitacoventantimpiri.

**Eiro pipashiventacaarotsi
pinquemisantacayeri atiri.**

⁶Piquemisantaqueri Tasorentsi, irootaque noncantantempiri: peerani, nopamiinatanta-

quempiri, aisati nocantantacariri Tasorentsi iramitacotempi, timatsi imatacaaquempiri. Meeca pimatasanotero maaroni imataca- aquempiri. ⁷Te incoyeji antsaroacayeari atiri, irointi icoasano- taque anquearioventeneri maaroni. Icoaque anintajeiteri atiri; aisati icoaque ontimimojeitee ayojeitanteari, cameetsa asavicajeitanta- jeari. ⁸Eiro pipashiventacaarotsi pinquenquetsatacoteri Avincatsarite. Aisati, eiro pipashiventaca- natsi; noquemisantaqueri Avincatsarite, irootaque yoiminqueanteetaquenari meeca caravosoquica. Oshequi noneacatsitimenta- cari Quirishito, cameetsa pinquempetena avirori. Aitaque irimatayempiro Tasorentsi maaroni icoacaaquempiri. ⁹Peerani, tequerani irovetsiqueroni oca quipatsica, iotitaqueeni anquemisanteri Jesoquirishito. Icoyajeititaqueeni cameetsa asavicajeitan- teari. Te ancameetsaveiteani, iro cantaincha timatsi icoacaaqueeri. Ineshinoncatashijeita- quee, yoavisacojeitaquee. ¹⁰Ipcapaaque quipatsiquica Jesoquirishito, yora oavisaco- jeitaqueeri. Meeca ayotasanojeitaquero maaroni imataqueeneri Tasorentsi. Eiro meeca atsaroitsi ancame. Ayojeiti ariorica ancama- naque, eiro ajatitsi ainti Sharincave- niqui. Cameetsa oni oca icamantajeiteeri: yoaneasanojeitaquee, ancantaitiyempani asaviquimojeiteri inampiqui.

¹¹Itiancaquena Tasorentsi noncamanta- jeiteri atiri oca cameetsatsisiri, aisati noamejeiteri. ¹²Irootaque noneacatsitan- tarori maaroni aca caravosoquica. Iro

cantaincha te nompashiventeaji. Niotasanotiri yora noquemisantiri: niotaque eiro yamatavitanatsi, irootaque nocantantacairiri: “Pinquempoyeajena”. Niotasanoti inquempoyeajena irosati impocantajeari. ¹³Queariotasantaque maaroni noametaquempiri, te namatavitempiji. Pimoncaratero maaroni nocantaquempiri. Pinquemisanteri Jesoquirishito, pinintasanoteri. ¹⁴Quiso oajeitaquee Ishire Tasorentsi. Timatsi omatacaquempiri, ari pimamatero cameetsa.

Jaoca icantajeitiriri Pavoro.

¹⁵Piotti vojocajeitaquena ashiasati: Jijero, Eromojeneshi, maaroni. ¹⁶Nocoaque incavintsayeri Avincatsarite Oneshijoro, aisati ishaninca iriori. Intacotapinitaquena Oneshijoro, te impashiventeaji iquivantana aca caravosoquica. ¹⁷Timantacari aca Oromaqui, icoacoayetaquena, irosati ineantapaquenari aca. ¹⁸Piotasanoti aisati oshequi yamitacotaquena anta Ejesoqui. Coajica, impocajica Avincatsarite, aitaque incavintaapaajeri.

Incantiri: “Pincantaitatitempani pantaveeteneri Tasorentsi”.

2 ¹Meeca, notiomii, tempa ineshinonca-taquempi Jesoquirishito, irootaque nocantantimpiri pishintsiventeneri maaroni pantayeteneriri. ²Timatsi piquemitaquenari, tempa picarajeitaqueri oshequi pashini quemajeitaquenari. Ari poameyeteri pashini ashaninca, inquearioventeneri Tasorentsi iroametante iriori. Irovaajeneri aisati itsipapee oca noametaquempiri. ³Yora soraropee cameetsari inecatstimentapinitari ivincatsarite. Pinquempeteari avirori, eiro pitsaroitsi pineacatsitimenteari Avincatsarite Jesoquirishito. ⁴Aisati te iriompapinitateaji soraro, te impanquiveeteji, irointi apatiro iqueario-

ventiniri iyapitanote inintacairiri. ⁵Ocameetsati yora aatiquirori perota inquemisanteri yora jivatacairiri. Eiorica iquemisantasanotiri, eiro ipashiyetaritsi oca ipapinitiriri anaacotantatsiri. ⁶Yora panquiveetsari, ariorica intsameetacotasanotero ivanquire, ari irayero oshequi oitsoqui, coajica. Te irantsipetearoji itsameetacotiro. ⁷Pinquencheshretasanotero oca noshiacantimpiri, ari iriotacaasanotempiro Avincatsarite.

Pinquencheshireteri Jesoquirishito.

⁸Pinquencheshireteri aisati Jesoquirishito, yora ishanincani Iravirini; yoyeevtacari, iro cantaincha itinaanaja aisati. Irootaque oca nocamantapinijeitiriri atiri, iravisacojeitantajeari. ⁹Nocantani noquenquetsatacaajeitiri atiripee, irootaque noneacatsitantacarori meeca. Yoisoeyetaquena, iquempetacanteetaquena oayeri. Iro cantaincha tecatsi incanteero iroisotero irineane Tasorentsi: tempa ovaaranaca irointi. ¹⁰¿Paita noneacatsitantacarori maaroni oca? Irio noneacatsitimentiri maaroni atiri icoyeaqueri Tasorentsi, incantaitatitempani irisavicanteari cameetsa anta inquitequi. Iriotaque Jesoquirishito oavisacoterineri. ¹¹Queariotaque oca icanteetiri: “Ariorica ancamimenteri Quirishito, ari antsipatapaajeri anta inquitequi, asaviquimotapaajeri. ¹²Ariorica ampomerentsiventeneri antayeteneri paitapeerica meeca, iro cantaincha coajica ancarajeiteri ampincatsarijeite. Ariorica ancantari atiri: ‘Te nioteriji Jesoquirishito’, aisati incantacotee iriori: ‘Apa, te nioteriji yoca’. ¹³Ariorica amataviteri, iro cantaincha eiro yamataviteetsi irinti. Irimoncarataquero maaroni icantaqueeri”. ¹⁴Tempa icarajeitaquee Avincatsarite. Pincantapiniteri atiri eiro icantavacaimentarotsi paitapeerica yoameyetiriri.

Yatsipetashitacaro icantavacaimentaro oca, icomitacaaricari yora quemajeiterineri. ¹⁵Pantasanoyeteneri Tasorentsi, incantantempiri: “Cameetsa maaroni pantaquenari”, impoiji eiro otimitsi pimpashiventanteari. Piotasaniro irineane Tasorentsi, meca poametantero cameetsa; tempa tampatica oametanti irointi. ¹⁶Eiro pishiretarotsi cantaantsi, eiro picantavacaatsi: pojocacaasanotiricari atiri inquemisanterime Tasorentsi. ¹⁷Oshiaquero patsaarontsijenca, ariorica aaquee, ontsoncanaquee maaroni atsempequiqui, ampatsayetanaque. Yatsipetacaro icantavacaanirotaca yora Imeneo aisati Jireto. ¹⁸Icomijeitacaro quearioyetatsiri. Icantaniroto: “Aitanaji. Itinaajivetaja itsipapee, iro cantaincha eiro atinaajeitajatsi ainti”. Iquenqueshiretacaajeitaqueri maaroni quemajeitaqueriri. ¹⁹Piotoero ocaocantiri irineane Tasorentsi: “Iotasaniroto Tasorentsi maaroni quemisantajectiriri”. Aisati ocanti: “Intimerica cantatsine: ‘Noquemisantiri Avincatsarite’, ocameetsati irojoquero caari cameetsatatsi yantayetiri”. Aitaque ocantaqueri. Irineane Tasorentsi oshiaquero antearo mapi: te ompashinitapiniteaji.

²⁰Anta ivancoqui ashitaarantincari timatsi oshequi iveratote. Ainiro pinatasanotachari, yovetsiqueetiro oro aisati perata. Ainiro caari pinatacha, yovetsiqueetiro inchato aisati quipatsi. Ora pinatachari, iveshireimentacaro: icoaque irameniteri maaroni ishaninca. Ora caari pinatacha onantari cajara. ²¹Ariorica poameetsataquea avisati, pojocaqueorica caari cameetsatatsi pantapinijeitiri, ari pinquempetearo perato pinatasanotachari; iriveshireimentempi Avincatsarite, incoaque irineajeitajempi maaroni. Impoiji pimataqueneri paitarica incoacaquempiri. ²²Eiro catsini piquenqueshiretirotsi caari cameetsayeta-

tsi yantayetiri evancaripee. Irointiquea pincoasanotanaque pincameetsatanaje, pinquemisantasananaje, pininteri itsipapee, pincarajeiteri itsipapee cameetsayetatsiri: maaroni yora aventasanotariri Avincatsarite. ²³Eiro picantavacaimentashitarotsi caari ayotasojeiti: piquisavacaacari. ²⁴Ariorica antaveeteneri Avincatsarite paitapeerica, te oncameetsateji anquisejeiteri ayemisantaririnte; irointi cameetsa ancavintsayeri itsipapee, cameetsa avameteri, eiro ashemaritsi, ²⁵cameetsa avameteri yora quisajeitaqueeri. Cameetsarica avameteri, impoiji ariorica inquenqueshiretanaquea, irojocajero caari cameetsayetatsi inquemisantearori queariotatsiri. Iramitacoteri Tasorentsi. ²⁶Yamatavivetacari camaari: Otimaveta icoacaavetacariri, irotaque yantantavetacananari iriori; iro cantaincha iroavisacoteri Tasorentsi, ariorica inquemisanteri.

**Jaoca incanteari
amatavitantatsinero, coajicani.**

3 ¹Piotoero oca: coajica, ariorica omoncarataquea impocantajeiri Jesoshi, oshequi ompomerentsitimoteari quemisantsiri. ²Irisati nintajanchane atiri, incoasanoteri quirequi, irishemete, irishirontimenteari itsipapee, incantimateri Tasorentsi, impiatsateari ashitariri, eiro ipasonquitiritsi neshinoncaterineri, eiro iquenqueshiretiritsi Tasorentsi. ³Eiro iotirotsi incavintsayeri itsipapee, eiro iotitsi incatsimareajea, incantimatante, eiro ipashiventacaarotsi irantayetero tsinapee, inquisanaquea, inquisayeteri cameetsayetatsiri, ⁴iramataviyeteri ishanincasanoripee, irantashiyetearo paitapeerica, eiro iquenqueshiretatsi, irishemetasanote, incoanaque inquimoshiretashitea, eiro icoitsi irioteri Tasorentsi. ⁵Inquemisantamempeshiteari

Tasorentsi, iro cantaincha eiro ipincatsatiritsi. Eiro piquempetaritsi avirori. ⁶Inqueavancoteri itsipapee atiri, iramatavitapeero tsinanepée. Te onquenqueshiretasanoteaji, irootaque irimatantearori iramatavitapeero. Oshequi antaqueru caari cameetsatsi, ocoasanotaque antayetero. ⁷Oshequi oquemisantashiyetacari pashini oamenirotirori, iro cantaincha te iotasanoeroji queariotatsiri. ⁸Peerani yora Janeshi aisati Jampireshi ipiatsacarinini Moishishini, te incoacayeriji joriopee inquemisantajeiteri. Aisati iquempetacari meeca yora amatavitantatsiri: te incoacayeriji atiri inquemisantero queariotasanoatsiri. Te oncameetsateji oca iquenqueshireyetaqueri, iquemisantamempeashitaca. ⁹Eiro icantatiani irimatero oca. Tempa peerani iotacojeitiri yora piatsacariniri Moishishini. Aisati coajica iriojeitanaque atiri queario amatavitantaque yora amatavitantatsiri.

**Pinquemisantasanotero
queariotasanoatsiri.**

¹⁰Piotacotasanoatiquena. Piotaquero noameyetimpiri. Piotaquero nantayetiri. Piotaquero nocoqueri nomayeri narori nantayeri. Piotaque aisati noquemisanteru Tasorentsi, noquearioventiniri maaroni, nonintakeri, te noshemearoji nocatsitimentaqueri. ¹¹Aisati pioti iquishimentapiniyeetaquenaro noquemisanti. Piotaque aisati noquematsicatapinitacaro anta Antioquiaqui, Iconioqui, aisati Irishitaraqui. Oshequi iquisajeitiquena savicajeitatsiri anta. Iro cantaincha yoavisacotapinitiquena Avincatsarite. ¹²Queario, iquisheetiri maaroni quemisantiriri Jesoquirishito, ariorica icoasanotaque inquemisantasanoteri. ¹³Aiquero irijatatiye iramatavitasanoatante yora caari cameetsatsi, aisati oametantirori tseyyantsi. Aisati yora camaari iramataviteri iriori. ¹⁴Aviroquea avinti,

pincantaitiyempani pishiretanaquearo maaroni noamejeitaquempiri. Tempa piotaque eiro namatavitimpitsi. ¹⁵Peerani, pijananequiveitani, yoameyee-taquempiro irineane Tasorentsi. Irootaque oametaquempirori piquemisanteru Jesoquirishito, pavisacotantajari. ¹⁶Iriotaque Tasorentsi sanquenatacantaquerori irineane, maaroni. Oamejeitaqueero queariotasanoatsiri, terica oncameetsateji antaqueri, ocamantaquee. Oamejeitaquee jaoca ancanteari avameetsatantajeari arosati, aisati oamejeitaquee ancameetsajeitanaque. ¹⁷Irootaque otimantacari irineane Tasorentsi, ancameetsasanoatantajeari. Impojji tecatsi ancantea ancomitea, irointi antasanojeitero maaroni icoacaqueeri Tasorentsi.

Iveshireacaacari Pavoro Timoteo.

4 ¹Coajica impocaje Jesoquirishito impincatsaritapaaque. Ariorica impocaje, ari irinjajajaitapaaqueero yantayetiri maaroni aneajeitatsiri aisati maaroni camajeitaintsiri. Incamantajeitee jaoca incantajeiteeri. Ayojeiti icarajeitaquee meeca, aisati icarajeitaquee Tasorentsi, irootaque meeca nocamantantimpirori oca. ²Pinquenquetsatapinitero irineane Tasorentsi maaroni quitaiteriqui. Jaocarica incarateri catsirincaiteri, jaocarica pisaviqueru, eiro catsini pimajeretitsi, irointi pinquenquetsatacayeri maaroni atiri. Terica oncameetsateji oca yantaqueru, ari pincanteri, aisati pintsaroteri. Pincantajeiteri cameetsa irisavicajeite. Jentsiquero poametasanojeiteri itsipapee, eiroquea piquisatsatiritsi. ³Coajica, ariorica cameetsa avamejeiveteari atiri irineane Tasorentsi, iro cantaincha eiorica iquemisantajeitirotsi. Eiro icoirotsi, irointiquea incoasanojeite oamejeiterineri tseyyantsi. Irooquea icoasanoatakeru inquemero, irointi. ⁴Eiro

iquemisantirotsi irineane Tasorentsi, irointi inquemisantashitearo iquenquetsashiyetari atiri. ⁵Aviroquea, avinti, paamaventea: piquempetaricari. Ariorica pincatsitimeri Avincatsarite, eiro poashiretatsi. Pinquemisantacayeri itsipapee. Pimatananotaqueneri Tasorentsi maaroni icoacaquempiri.

Iquenqueshiretiri Pavoro.

⁶Iro nocamantantimpirori oca, irotaintsi iroyeetena, irotaintsi nojate narori inquitequi. ⁷Nopomerentsiventasanotiniri Avincatsarite, nomataqueneri maaroni icoacaqueneri, te namataviteriji. ⁸Coajica, impocajerica Avincatsarite, impashiyetenaro cameetsayetatsiri. Eiro ipanarotsi apaniro narori, irointi impajeiteri maaroni atiri, yora yoameetsantaqueri: arojeitaque maaroni aamaajeitacari. Tempa cameetsa icantacoventajeitaquee maaroni.

Pashini icamantajiriri aisati.

⁹Pishintsite pimpoque pineena. ¹⁰Yora Temashi, icoaque iriveshireimentearo timayetatsiri quipatsiqui. Yojocanaquena, ijatanaque Tesaronicaqui. Yora Queresente, ijatanaque Carashiaqui, yora Tito ijatanaque Taramashiaqui. ¹¹Apanivaniji Irocashi, itsipataquena. Ariorica pimpoque, pamaquenari Maricoshi, oshequi nocoaque iramitacotena. ¹²Aisati ijatanaque yora Tiquico. Notianquiri iriori Ejesoqui. ¹³Aisati pamaquenaro noicoro noanajiri Toroarequi, otimi anta

ivancoqui Caripio. Aisati pamaquenaro maaroni sanquenarentsipee, aisati novaperitepee. ¹⁴Yoashinoncaasanotaquena Arijantero, yora vetsicapinitirori ashiro. Coajica iroasanqueteri Avincatsarite. ¹⁵Paamayeariyea avirori, yoashinoncaimpicari. Oshequi iquishmentaquenaro nocantajeitaqueriri.

¹⁶Ijivatantacari pincatsari isampitacoventana, te intimeji cantacoventaneneri, ishiapitsajeitanaquena. Te noncoyeji iroasanqueteri Avincatsarite. ¹⁷Irintiquea irinti, quiso yoana. Itasoncaventaquena, nomatantarori noquenquetsatacaajeitiri itsipasati atiri, maaroni. Iroashinonqueetenname, iro cantaincha yoavisacotaquena Avincatsarite. ¹⁸Ariorica iroashinonqueetaquenename aisati, niotaque ari iroavisacotajena aisati; irisavicacayena inquitequi, anta ipincatsaritinta iriori. Tsame ampincatsatasanojeiteri, aitaque ancantaitiyempani.

¹⁹Novetsataro Pirishira, aisati iriori Aquira. Aisati novetsatari maaroni ishaninca Oneshijoro. ²⁰Ainiroquera Erashito, isaviqui anta Corintoqui. Navisantacarori Miretoqui, noneanajiri Torojimo: ijoquiiata. ²¹Pishintsite pimpoque, tequeratsita onquimojate. Ivetsajeitimpi Eovoro, Pororente, Irino, Iraoria, jeri maaroni ayemisantaririnte.

²²Nocoaque incavintsayempi Avincatsarite, irineshinoncatasanotempi.

Narotaque sanquenatimpirori oca: *Pavoro*

YORA PAVORO ISANQUENATINIRI TITO

Ivetsatari Pavoro Tito.

1 ¹¿Ainirompi Tito? ¿Tecatsimpa oyempine? Narotaque Pavoro sanquenatimpirori oca. Nocoasanotaque nanteneri Tasorentsi paitapeerica incoacayenari. Itiancaquena Jesoquirishito nonquemisantacaasanojeiteri maaroni atiri, yora icoyeaqueri Tasorentsi. Aisati niotacaasanoteri queariotasano-tatsiri inquearioventantearori inquemisante. ²Peerani, tequerani irovetsiquerori quipatsi, icantitacani Tasorentsi: “Noaneasanojeiteri maaroni nocoyeajeita-queri, nosavicacaajeiteri aca inquitequi”. Te iriotmateroji Tasorentsi iramatavitan- tate. Ayojeitaque ancantaitatitempani aneajeitanaje anta inquitequi. ³Meeca omoncarataca iriojeitantearori maaroni atiri irineane Tasorentsi, yora oavisaco- jeitaqueeri. Irootaque itiancantaquenari noncamantajeiteri atiripee. ⁴Peerani noquemisantacaquempi, irootaque meeca noquempetacantantaquempiri notomisanori. Nocoaque irineshinonca- tempi Tasorentsi, cameetsa irisavicaca- yempi, aisati inquempetacayempi Jesoquirishito, yora oavisacojeitaqueeri.

Jaoca incantajeiteari yora jivatacaajeitiriri quemisantatsiri.

⁵Peerani nojocanaquempi anta Queretaqui, pamitacotantariri ayemisan- taririnte iquemisantasanotancari. Aisati nocantaquempi: “Ariorica pinquenayeta-

naque anta maaroni nampitsipeequi, pincoyeajeiteri jivatacaajeiterineri ayemisanraririnte, yora quemisantacaye- rineri”. ⁶Meeca noncamantempi. Te oncameetsateji irijivatacantashitea; irointi ariorica cameetsa isaviqui, aisati otimirica ijina aparoni, aisati ocameetsa- tirica iquemisantajeitaque maaroni itomipee, aisati icantacoyeetiririca itomipee: “Cameetsa iriori, te impiatsa- tanteaji”, ari iriotaque jivatacaajeiterineri ayemisanraririnte. ⁷Pineaquero, ariorica incoaque irantaveeteneri Tasorentsi, acoajeitaque arori incameetsatasanote. Te oncameetsateji impiatsatantea, inquishempa, irishinquitempa, irantanay- eteri itsipapee, iramataviteri itsipapee iraitanteariri iirequite aisati iroaararo. Te oncameetsateji maaroni oca. ⁸Irointiquea ocameetsati irintacoteari itsipapee, irinintero maaroni cameetsayetatsiri, inquenqueshiretanaquea, inquemisantasa- notanaque, incameetsatasanotaque, iriote iraamaaventea irisati eiro yantantarotsi caari cameetsatatsi. ⁹Cameetsa inqueario- ventero inquemisantasanoteri irineane Tasorentsi, ora avamejeitaqueriri, irimatantearori iroametantasanoteri iriori queariotatsiri. Aisati iriotasanote iroameteri yora tseencantatsiri.

¹⁰Ainiro oshequi caari quemisantiri jivatacaajeivetariri, neaveetashitachari, amatavitantatsiri, maaroni. Aitaque icantajeita yora cantaniriojeitashitariri quemisantatsiri: “Pimpeajeitajea jorio,

maaroni”. ¹¹Nocoaque poimajerentaniro-
jeiteri. Yojocacaaniroyetaqueri oshequi
quemisantatsiri iqumisanti. Te oncamee-
sateji oca yoametantanirotiri. Apatiroti
icoaque iraitashiteari quemisantatsiri
iirequite. ¹²Ainiro aparó, yora quenque-
tsatacairiri ishaninca, icanti iriori: “Yashi
yoiro queretasati yamatavítanti, icatsima-
tanti. Oashenti ini”. ¹³Queariotaque oca
icantaqueri. Ari pintsarotanasojeiteri
yoranqui, inquemisantanasojeitantarori
queariotatsiri. ¹⁴Te oncameetsateji
ashiretashitearo iyenquetsare jorio, aisati
icantashiyetari yora tseenquirori queario-
satanotatsiri. ¹⁵Ariorica acameetsati
arori, aneacameetsateji maaroni
ashanincapee, eiro aamaajeitaritsi. Iro
cantaincha irinti, te incameetsateji, aisati
itseencanti, irootaque caari ineacameetsa-
tantari ishanincapee; irointi yaamaashi-
jeitari. Queario, eiro imatirotsi
inquenqueshireyetero cameetsayetatsiri.
¹⁶Icantanirojeiveta yoranqui: “Niotiri
Tasorentsi”, iro cantaincha te irisavique
cameetsa, irootaque ayotantacari
itseeyani, te irioteriji. Te incameetsateji
catsini yoranqui, ipiatsatanta, te irioteji
irantero cameetsatsatsiri.

Yoameyetiri paitapeerica.

2 ¹Aviroquea, avinti, cameetsa
pinquenquetsatero queariotasanota-
tsiri. ²Poameteri yora antearipee eiro
ishinquitatsi, cameetsa irisavique,
cameetsa inquenqueshiretanaquea,
inquemisantanasotanaquea, irinintasanota-
naqueri itsipapee, inquearioventeneri
Tasorentsi maaroni. ³Aisati pinquempe-
tero antearopee, poametero cameetsa
osavique, onquemisantanasote. Te
oncameetsateji oncantimatante, aisati te
oncameetsateji irapinitero quepishijari.
Cameetsa osavique iriojeitanteari
itsipapee quemisantatsiri jaoca incanta-
jeiteari. ⁴Aisati cameetsa oametero

evancaropee onintasanoteri ojime aisati
otomipee. ⁵Oametero aisati onquenque-
shireempa, oncameetsate; cameetsa
oncoteneri oshaninca, antsiteneri,
onquiveneri iitsaare, maaroni oncavin-
tsante, onquemisantanasoteri ojime.
Impoiji tecatsiquea incanteetero intseen-
queetero irineane Tasorentsi.

⁶Aisati poameteri evancaripee inquen-
queshiretanasojeitanaquea iriori,
cameetsa irisavicajeite. ⁷Aisati avirori,
cameetsa pisavicanaque, iriojeitanteari
atiri jaoca incantajeiteari incavintsante
iriori. Cameetsa poametante, tempa
piotasanoi yamenacotimpi Tasorentsi.
⁸Cameetsa pinquenquetsatacayeri atiri,
oncanteata eiro otimitsi inquishimentem-
piri. Impoiji impashiventea coavetachari
impiatsatempime, eiro otimitsi
incantimatantempiri. ⁹Pincamanteri
pimantaari inquemisantanasoteri
amanantiriri, irimatasanoteneri maaroni
icantaqueriri. Te oncameetsateji
impiatsateari, ¹⁰te oncameetsateji
incoshiteri. Irointi ocameetsati iriotasa-
note yora amanantiriri eiro yamatavítiri-
tsi catsini. Impoiji incoasanojeite atiri
inquemisanteri yora oavisacojeitaqueeri,
incantajeite: “Ocameetsati oca iquenque-
tsatacoyeetiriri Tasorentsi”.

Paita ayojeitancari ineshinoncajeitaquee Tasorentsi.

¹¹Meeca ayojeitaque ineshinoncajeita-
quee Tasorentsi, icoaque iroavisacojeite-
ri maaroni atiri. ¹²Ari ineshinoncajeitaquee,
yoametaquee ajocajero atseencanti, aisati
ajocajero icoajeitiri tseencantatsiri.
Ayojeiti ocameetsati maaroni quitaiteri
anquenqueshiretanaquea, ancameetsata-
naquea, anquemisantanasotanaqueri
Tasorentsi. ¹³Meeca ayojeitaque
aamaajeitajeari Tasorentsi: yora
Avincatsarite Jesoquirishito. Tempa irio
oavisacojeitaqueeri. Ayojeitaque

impocaje, eiro yamataviteetsi, irootaque aquimoshirejeitantajari. Aneajeitavajeri, impincatsaritapaaque. ¹⁴Antapinjajeita- quero caari cameetsatatsi, iro cantaincha icamimentajeitaquee yoavisacotantajeita- jeeri, yoameetsatantajeitajeeri, ashanin- catasanojeitantajariri iriori, acoasanojei- tantacari antapinitero cameetsayetatsiri irointi. ¹⁵Pincamantasanojeiteri maaroni atiri oca nocamantaquempiri. Tempa itiancaquempi Tasorentsi, ari pincaman- tasanojeiteri atiri inquemisantasanojeita- naque. Terica oncameetsateji yantayetiri, cameetsa pincamantasanojeri. Eiro pishinetiritsi intseencajeitempi.

Pashini icantayetiriri.

3 ¹Pincamantajeiteri ashaninca impinca- tsajeiteri maaroni jivatacaajeitiriri aisati pincatsariventajeitiriri, inquemisantajeiteri. Pincanteri ocameetsati incoajeitanaque irantajeitero cameetsayetatsiri. ²Pincantajei- teri eiro icantimatiritsi itsipapee, eiro iquisatsatavacaajeitatsi, eiro iquisatsi, irointi cameetsa incavintsaajeiteri maaroni atiri. ³Peerani te anquenqueshireveiteani arori, te anquemisantaveiteani, amatavitantaveitani, antapinitashiveitaroni maaroni acoanirota- shijeitaniri, aisati antashiveitaroni maaroni anintashijeivetaniri. Acantani antapiniveita- roni caari cameetsatatsi, aquisatsicaveitarini itsipapee, aquisaveitani, aquisavacaajeivei- tani. ⁴Iro cantaincha iotacaajeitaquee Tasorentsi, yora oavisacojeitaqueeri. Iotacaajeitaquee icavintsaajeitaquee, inintasanojeitaquee. ⁵Yoavisacojeitaquee. Te antajeivetearoji cameetsatatsiri iroavisaco- jeitanteeri, iro cantaincha icavintsaashijeita- quee. Avaotisajeitaca, yoaneasanojeitaquee, opashinishirejeitaquee Ishire. ⁶Aquemisanta- jeitaqueri Jesoquirishito, yora oavisacojeita- queeri, irootaque itiancasanojeitantaqueeri Tasorentsi Ishire, te intsaneemparoji. ⁷Ineshinoncajeitaquee, irootaque yoamee- tsatantaqueeri, aisati icanti ancantaitiyem-

pani antimajeite inquitequi. Ayojeitaque eiro yamataviteetsi. ⁸Queariotaque oca icamantaqueeri. Nocoaque pincantajeiteri quemisantajeitiriri Atasorentsite irimajeitero maaroni oca, pincamantasanojeri. Ocamee- tsajeitaque maaroni oca: eiro yatsipetashijei- tarotsi.

Jero oca pashini icantiriri Pavoro Tito.

⁹Eiro pisampitacoventirotsi caari iotasanoyeeti, aisati eiro pishiretashitaro- tsi iquenquetsatocotashitaniri yora intacaroniri. Eiro piquishimentarotsi isanquenareni Moishishi, eiro piquisatsa- timentarotsi. Patsipetashitarocari, eiro oametimpitsi. ¹⁰Intimerica amataviyeteri- neri quemisantatsiri inquisavacaajeitan- teari, pincamanteri eiro yamatavitanti. Terica inquemisantempi, aparo pampiita- sanoteri. Iro cantaincha terica inquemi- santempi, eiro picantajiritsi: “Noyemisan- taririnte”. ¹¹Iquemisantiro tseeyantsi iriori. Te oncameetsateji yantayetiri, ainiro yantane.

¹²Nontianquempiri Aretemashi; tericampa, irioricampa Tiquico. Ariorica pineavaqueri, pishintsite pijate Nicopori- shiqui: aitaque pineavaquenari anta. Nocoaque nonquimojantsitacotanaque anta. ¹³Pintacoteshi yora Senashi, aisati Aporo. Yora Senashi ioyetiro icantayetiri pincatsaripee. Pimpavaqueri maaroni coiteimotariri ariorica irovaanajea. Te oncameetsateji oncoiteimoteari paitapee- rica. ¹⁴Ocameetsati iriojeitanaque ashanincapee arori incavintsaantajeite. Ocameetsati iramitacoteri yora ashinon- caincari. Ocameetsati irimayetero maaroni cameetsayetatsiri. ¹⁵Ivetsajeita- quempi maaroni nocarajeitaqueri aca. Novetsajeitari maaroni quemisantatsiri ara, nintajeitanari. Nocoaque irineshinon- cajeitempi Tasorentsi.

Narotaque sanquenatimpirori oca: *Pavoro*

YORA PAVORO ISANQUENATINIRI IRIORI JIREMONA

Ivetsatari Pavoro Jiremona.

¹¿Savicatsimpi, Jiremona? ¿Tecatsimpa oyempine? Narotaque Pavoro sanquena-timpirori oca. Nosaviqui meeca aca caravosoquica. Noquenquetsatacotaqueri Jesoquirishito, irootaque yoiminqeanteetaquenari. Nocaratiri ayemisantaririnte Timoteo nosanquenatimpiro oca. Nonintasanotaquempi. Piquempejeitaquena, antavejeitiniri Tasorentsi paitapeerica. ²Meeca novetsataro Apia, ayemisantaroronte. Aisati novetsatari Ariquipo, yora noshiaacantaqueri nosoraroririnte. Yora soraropee iquearioventiniri iyapitanote maaroni icoacairiri. Aisati iriori Ariquipo, imoncarataquena, noquearioventajeitiniri Tasorentsi maaroni icoacaajeitaquenari. Aisati novetsajeitari maaroni ayemisantaririnte apatotapinitachari pivancoqui. ³Nocoaque irineshinoncajeitempi Apa Atasorentsite, cameetsa irisavicacaajeitempi. Aisati inquempetacaajeitempi Avincatsarite Jesoquirishito.

Iveshireimentari Pavoro Jiremona.

⁴Icamantapiniyeetaquena picantani piquemisantiri Avincatsarite Jesoshi, aisati pinintajeitiri maaroni quemisantsiri yoameetsantiri Tasorentsi. Irootaque nocantapinitantariri Atasorentsite: “Ariove pimatacaqueri Jiremona pamitacotasanoteri catsini”. ⁶Nocantiri

iriotacaasanojeiteri maaroni ashaninca piquemisantacaajeitiri. Cameetsa iriotacaasanojeiteri intacotasanojeitee Quirishito. ⁷Meeca niotaque, nonintane, pinintajeitiri itsipapee quemisantsiri yoameetsantiri Tasorentsi, aisati piveshireacaajeitari, irootaque noquimoshireimentantaquempiri, aisati noveshireimentantaquempiri.

Icantacoventiri Oneshimo.

⁸Niotti naro itiancane Quirishito: ishinetaquena noncamantempiro paitarica panteri, ⁹iro cantaincha anintavacaaca, irootaque caari nocoanta noncantempi: “Jero oca pantayeteri”. Ari nanteashipataque meeca. Noquenquetsatacotiri Jesoquirishito, irootaque yoiminqeanteetaquenari caravosoquica. ¹⁰Timatsi noquemisantacaqueri aca, noshiaacantaqueri meeca notomi. Ipajita Oneshimo: iriotaque noncantacoventeri. ¹¹Te iramitacoveitempiniji, iro cantaincha meeca oshequi iramitacotempi avirori, aisati iramitacotena narori.

¹²Nontiancajeri meeca impiashitanajempi aisati. Nonintasanotaqueri catsini. ¹³Nocoasanovetaca quiso iroyename aca, iramitacotasanothename aca caravosoquica: onquempeteame arime pintimeme aca, pamitacotename avirori. Noquenquetsatiro irineane Tasorentsi, irootaque notimantacari meeca aca. ¹⁴Iro cantaincha te nioteji paitarica picoiri avirori. Te

noninteji noncantasanotempi pintacotena: aviro avinti cantatsine. ¹⁵Peerani ishiapitsavetaquempi, meecaquea incantaitiyempani quiso iroajempi.

¹⁶Peerani pamanantane inaveitani. Iro cantaincha meeca iriotaque piyemisantaririnte pinintasanotajeri. Oshequi nonintaqueri narori, meeca pinintasanotavajeri avirori. Ocameetsati pininteri pamanantane, iro cantaincha ocameetsatananoti pinintasanoteri catsini piyemisantaririnte.

¹⁷Pamene, tempa aquempeavacaaca arori. Ari meeca noninti pineshinoncatavaqueri, pinquempetacantename pineshinoncatavaquename naroricame areetapainchaneme. ¹⁸Ariorica icoshitaquempi, aisati ariorica irevitaquempi, ari pincoacotenaro narori maaroni. ¹⁹Narotaque nainti Pavoro sanquenatimpirori oca. Nompinaventajeri paitapeerica irevitaquempiri. Pinquenqueshiretero oshequi nocavintsaquempi: pioti eirome notimime, eirome pavisacotajime.

²⁰Tempa, nonintane, piquemisantiri

Avincatsarite, meeca nocoaque pincavintsayena narori. Tempa piquemisantiri Quirishito, meeca nocoaque piveshireacaajena.

²¹Niotaque ari pinquemisantena, irootaque nosanquenatantimpirori oca. Aitaque niotaque ari pimatenaro maaroni nocantaquempiri, aitaque povanaashitavaqueanari maaroni nocantaquempiri. ²²Aisati nocoaque pivetsiquenaro nosavicantapeempiri. Niotaque ariorica pincanteri Tasorentsi, irishinetena noneajempi aisati. ²³Ainiro nocarataqueri Epajarashi aca caravosoquica. Iquempetaquena iquenquetsatacotiri Jesoquirishito, irootaque yoiminqeanteetacariri iriori. Ivetsatimpi. ²⁴Aisati ivetsajeitaquempi Maricoshi, Arishitaraco, Temashi, Irocashi, maaroni. Icarajeitaquena nantajeitiniri Atasorentsite paitapeerica. ²⁵Nocoaque irineshinoncatempi Avincatsarite Jesoquirishito.

Narotaque sanquenatimpirori oca:
Pavoro

ISANQUENAYEETINIRI IJORIORINTE

**Yanaacotaqueri Quirishito itsipapee
itiancanepee Tasorentsi, ipincatsaritanoti.**

1 ¹Peerani yora Tasorentsi yoamejeitaqueri yora quenquetsatacantayetsiniri. Aparopee ineanotiri Tasorentsi, irio itsipa iquemashitacari ineanatiri, irio itsipa ineiri inampire, irio itsipa aisati imishitacaacari, maaroni. Aiquero yovainiri, aiquero yovainiri, yoamejeitaqueri. Impoiji iriori yovaajeitaqueneri yora ashanincepeeni. ²Meccaquea yoametasanojeitaquee itomisanori iriori Tasorentsi. Tempa iriotaque irinti anaacojeitiriri atiri ipincatsariti. Icantiri peerani: “Notiomi, aviro vetsiqueroneri quipatsi, inquite, maaroni; pincantacantayetero maaroni”. Ari imoncarataqueneri icantaqueriri. ³Ishiasanotaqueri iriri, ishipaquireasanotaque, ipincatsaritanotaque. Tempa yanaacojeitiri atiri ipincatsariti. Ariorica irinintanaque irimayetaquero paitapeerica, intasoncaque. Ari imajeitaquero maaroni icantajeitiri catsini: apatiro ineanataque, mataca. Peerani ainironi antayetironi caari cameetsatatsi, irootaque caari acameetsatantaveitani. Iro cantaincha ipocaque irinti icamimentajeitaquee yoameetsajeitantajeeri. Ipianaja aisati anta inquitequi, isavicaapaaji iracosanoriqui Tasorentsi, icaratiri ipincatsarijeiti.

**Yanaacotaqueri Quirishito inampirepee
Tasorentsi, ipincatsaritanoti.**

⁴Irisati aisati anaacojeitiriri inampirepee Tasorentsi, ipincatsaritanoti, tempa icantiri Tasorentsi: “Notomi”. Ishaninca-

tasannotacari. ⁵¿Icantirimpa Tasorentsi inampire: “Aviro notomi, meeca notomin-taquempi”? Te intominteariji inampire-pee, irintiquea irinti Quirishito.

¿Icantirimpa inampirepee: “Narotaque pirintajeitari, notomintajeitaquempi”? Te incanteriji. ⁶Aisati peerani, ipocantacari itomi quipatsiquica, icanti: “Nocoacaajeitaqueri maaroni nonampirepee impincatsajeiteri notomi”. ⁷Icanti Tasorentsi:

“Notiancapinitiri nonampirepee yovaajiniri ashaninca noneane, ishintsitasanojeiti. Ainiro shiaarantaquerori paamari”.

⁸Iro cantaincha icantiri Itomi irinti:

“Oshequi pipincatsariti, oshequi pitasorentsi: pincantaitiyempani.

Ocameetsasananotaque pineane, oqueariotasanotaque. ⁹Oshequi pinintacaajeitaqueri atiri intime cameetsa; te pinintacaajeiteriji catsini irantero caari cameetsatatsi. Noveshireacaasanota-

quempi, panaacojeitaqueri itsipapee piveshireasanotanaca avinti”. ¹⁰Aisati icantiri: “Pincatsari”; tempa icantiri:

“Oshequi pipincatsariti avirori. Peerani povetsicaquero quipatsi, inquite, aisati maaroni timantajeitarori. ^{11,12}Coajica ompeajeitanajea, irompa avinti pincantaitiyempani pintime. Oquempeta

maatsaraantsi yojoqueetiro irantajeari iroaquerari, aisati pinquempetacantajero iroori quipatsi: pojocajero povetsicantajeiri pashini. Irompa avinti, eiro pipashinitatsi, eiro pipeatsi catsini”. ¹³¿Icantirimpa Tasorentsi inampire: “Pisavique

nacosanoriqui irosati impincatsarijeitan-tempiri quisajeivetimpiri”? Te incanteriji, irinti icanti itomi irinti. ¹⁴Tempa irio inampirepee antayetininiri icoacaaajeita-queriri: yamenacoventajeitaqueri maaroni yora oavisacotajanchaneri.

**Ocameetsati anquemisantasanojeiteri
Itomi Tasorentsi.**

2 ¹Icoacaasanojeitaquee Tasorentsi anquenqueshiretasanotero maaroni icantajeitaqueeri Itomi: tempa oquearior-tasanotaque, te oncameetsateji ampeacotearo icantaqueeri. ²Tempa oquearior-tasotaque maaroni icantajeitiriri inampire-pee, aisati yoasanquetaajeitaqueri Tasorentsi maaroni caari quemisantajeit-tavaqueri: ineacarove. ³Meeca oshequi ipomerentsiventajeitaquee Itomi yoavisa-cojeitantajeeri. Ariorica antseencajeiteri, ¿pijittimpa eiro yoasanquetaajeiteetsi iriri? Ijivataque Avincatsarite iriori yoamejeitaqueri iroamerepee jaoca ancantajeitari avavisacotantajeitajeari; impoijiquea yovaajeitaqueero arori yora quemajeitaqueriri. ⁴Janicarica icoacaapi-niyetiri Tasorentsi itasoncantayeti, imatacaaqueeri; aisati omatacaajeitiri Ishire paitapeerica, caari amati arori. Ari aneajeitaqueri, ayojeitantacari quearior-taque icantiri Tasorentsi.

**Coajica impincatsajeiteri maaroni
atiri Jesoshi.**

⁵Ari meeca nonquenquetsatocotero pashini quipatsi onta inquitequiniri: ora asavicajeitantapaajeari coajica. Eiro anta ipincatsariventajeitajeetsi inampirepee Tasorentsi, ⁶eiro catsini. Tempa peerani icantirini Iravirini Tasorentsi: “Te nonquempetempiji avinti, te nontasorents-tejeji narori. ¿Paita piquenqueshiretanta-nari? Tecatsi pinquenqueshirementenari. Aisati, ¿janicampa yora poneachaneri inquitequi, yora atiritapaatsineri? ¿Paita

pineacameetsatantariri iriori? ⁷Ariorica impocapaaque quipatsiqui, eiro imoncaratapaajaritsi pinampire ipincatsariti. Iro cantaincha eiro osamanitasanotitsi iranaacotajeri aisati, impincatsaritasano-taje. Pisavicacaajeri cameetsa, pimpeajeri pincatsarisanori. ⁸Pincanteri: ‘Pincanta-cantajeitero maaroni. Ari impincatsajei-tempi maaroni timajeitajantsineri’”. Irootaque isanquenatiniri Iravirini. Pineaquero, icantiri: “Pincantacantajeita-jero maaroni, impincatsajeitempi maaroni timajeitajantsineri”. Tequera omoncarateaji maaroni, iro cantaincha ⁹ayojeitaque peerani iponeanaca Jesoshi inquitequi, ipocaque quipatsiqui. Te impincatsaritasanotapeeji, te irimoncaratapaajeariji inampire Tasorentsi ipincatsariti. Oshequi yoashinonqueeveta-cari, icamimentajeitaquee, irootaque caari ajejeitantea Sharincaveniqui. Irio tiancaqueriri Tasorentsi ayojeitantacari oshequi ineshinoncajeitaquee. Meeca cameetsa isavicapaaaji inquitequi, ipincatsaritasanotapaaji aisati.

Icamantaquee paita icamantacari Jesoshi.

¹⁰Ari yovetsicajeitaquee maaroni, irootaque meeca ampincatsajeitanteariri maaroni; tempa itasoncaquee atimajei-tantacari meeca. Oshequi iqematsicati-mentajeitaquee, irootaque ocameetsatan-tari ampincatsajeiteri, avavisacojeitanta-jeari; tempa aitaque icoaque intominta-jeitajee Tasorentsi maaroni, icoaque iraajeitajee inquitequi. ¹¹Ari yoameetsa-jeitaquee Jesoshi, meeca acantajeitiri Iriri iriori: “Apa”. Irootaque caari ipashiventacantee Jesoshi icantajeitee: “Iye”, aisati: “Tsio”. ¹²Tempa ocanti Sanquenarentsi: “Icantiri Quirishito Iriri: ‘Noncamantajeiteri iyepee aisati tsioppe jaoca picanta; noncarajeiteri nonpampo-yaventajeitempi’”. ¹³Ocanti pashini Sanquenarentsi: “Noncarajeiteri iyepee

aisati tsiopée nonquemisantajeiteri Tasorentsi”. Iro pashini ocanti: “Apa, pineaquena aca, nocarajeitiri aisati pitomípee, aisati pishintopee. Irootaque pitimacantacariri noshanincajeitajeari”.¹⁴Arojeitaque atiri itomípee Tasorentsi, irishintopee; caamani anajeitaque. Ari iquempejeitapaaquee Jesoshi, icamimentajeitapaaquee. Intsoncajeiteri camaari, coavetachari iroajeiteeme aisati irajeitanaqueeme Sharincaveniqui.¹⁵Peerani atsaroacaajeiveitaroni ancamajeiteme, acantatiani; meeca te antsaroajeitanajeji, irointi aveshireajeitanaja.¹⁶Te irio irintacotapeempa Jesoshi inampirepee Tasorentsi, aintiquea intacojeitapaaca arorípee: maaroni joríopee.¹⁷Ari yatiritapaaque, irirentijeitapaaquee; iquempejeitapaaquee arori, irootaque iotantacari ineshinoncajeitaquee aisati icantaqueri Tasorentsi irineshinoncajeitee iriori. Aisati imajeitacuero maaroni icoacaajeitacueri Tasorentsi, icamaque yoamee-tajeitacuariri maaroni antirori caari cameetsatatsi, meeca yaacameetsajeitaquee Tasorentsi.¹⁸Oshequi iquematsitacaro iriori; aisati ineantavetacari camaari, irantacayerime caari cameetsatatsi. Meeca arorípee, ariorica anquematsicayetearo paitapeerica, aisati ariorica irineantavetaquee camaari, ioti irinti Jesoshi aitaque ocantari. Irootaque iotantacarori intacojeitaquee.

Yora Quirishito, yanaacotaqueri Moishishini ipincatsariri.

3¹Meeca, noyemisantaririnte, noncamantempi te pinquempejeitearíji yora caari quemisantatsi: icoyeajeitacuempi avinti Tasorentsi pintsipajeitacuariri anta inquitequi. Pinquenshirejeitacuere Jesoshi, jaoca icanta: iquempejeitacari maaroni itiancanepée Tasorentsi, icamantajeiteero maaroni icoacaqueeri Tasorentsi. Aisati iquempe-

tacari yora ivincatsarite saserote: yovaa-jiniri Tasorentsi acoacotiriri arori.²Peerani yora Tasorentsi icantaqueri Moishishi: “Cameetsa poamejeiteri pishanincapee, piotacaajeiteri maaroni nocoacaajeitacueri”. Ari iquearioventacueneri Moishishi maaroni icantaqueri Tasorentsi. Yora Jesoshi yanaacotasantaqueri Moishishi, iquearioventasantacueneri Tasorentsi maaroni icantaqueriri, catsini.³Tempa aneacameetsasantacueri yora vetsiquirori ivanco: te aneacameetsasantacueri ivanco irointi. Tempa irio iotatsiri irinti yovetsiqui: te ioteji pancotsi ovetsicajea irosati. Aisati ocameetsati aneacameetsasantacueri Jesoshi, oshequi ipincatsariri; eiro aneacameetsasantacueri Moishishi irinti, te impincatsaritasanteji.⁴Timatsi vetsiquirori maaroni pancotsípee, iro cantaincha yovetsicajeitacueri Tasorentsi maaroni timajeitatsiri, catsini.⁵Ari cameetsa iquearioventiniri Moishishi Tasorentsi maaroni icoacaajeitacueri, iro cantaincha iquempetacari inampire. Intavetacaro yoamejeitaquee capichaji yantayetiri Tasorentsi.

Iquisaqueri Tasorentsi tseenquiriri aisati piatsatariri.

⁶Iro cantaincha, Quirishito irinti, iquearioventasantiniri Tasorentsi maaroni icoacaqueriri. Caari ini inampire, irinti itomisanori. Ariorica ancanteani ashirejeiteari, ayojeitacueri irajeitanaquee anta inquitequi, irootaque ocameetsantari anquimoshirejeite, impíji ayojeitacueri ashanincajeitacari Tasorentsi.⁷Jero oca osanquenatacaqueriniri Ishire Tasorentsi yora Iravirini: “Meeca pinquemajeitacuero icantiri Tasorentsi.⁸Eiro piquishirtsí, eiro pitseenquiritsi: eiro piquempetaritsi yora piatariniri peerani. Ipiavetacari peerani Tasorentsi anta caaraiteriqui, ijivetani eiro yoasanquetaritsi.⁹Icantini

iriori: ‘Queario ipiajeivetaquena narori pishanincani peerani. Ocarataque 40 osarintsi natsipetashita notasoncacoventiri. ¹⁰Iro cantaincha ipiajeitaquena, irootaque noquisajeitancariri narori, nocantaquerini: Oshequi pitseencaquena, te pinquenqueshiretanjaji. Te pincoajeiteji piojeite paitarica nocoacaajeitaquempiri. ¹¹Noquisaqueri, irootaque nocantasano-tancariri: Eiro pareejeitatsi anta Canaqui, aisati eiro pareejeitatsi aca ocameetsaitetica’”. Irootaque isanquenatiniri peerani Irvirini.

¹²Queariompia, noyemisantaririnte, pitseenquiricari Tasorentsi: te oncameetsateji. Yanei irinti, icantani. Iro cantaincha ariorica pintseenqueri, pimpeacoteari: eiro piquenqueshiretanjiritsi aisati. ¹³Irointi ocameetsati meeca pinquemisan-tacaapiniteri pishaninca maaroni quitaiteri: coajica eiorica pimatirotsi. Eiorica iquemisantajeiti meeca, incanteani irampiitapinitero caari cameetsatatsi, irametearo: impoiji oshequi iramatavitaquea, eiro icoitsi catsini inquemisante. ¹⁴Ariorica ancantaitiyempani ashireteari Quirishito, ayojeitanaque ancarajeiteri ajajeitanaque inquitequi: eiro yamataviteetsi. ¹⁵Iro cantaincha pinquenqueshiretajero isanquenatiniri Irvirini: “Meeca pinquemajeitavaquero icantiri Tasorentsi. Eiro piquishirtsji, eiro pitseenquiritsi: eiro piquempetaritsi yora piatacariri peerani”.

¹⁶Peerani yora ejipitosati oshequi yoashinoncaajeitaqueri maaroni intacanta-jeitaqueeri. Ari icantajeitiri Moishishi: “Tsame, naajeitanajempi pashiniqui quipatsi, cameetsaquea asavajeitanta-jeari”. Icantajeiti: “Cameetsa, tsame ajajeite maaroni”. Iro cantaincha tempa iriojeitaque piajeitacariri Moishishi aisati Tasorentsi. ¹⁷Irootaque ishemantacariri Tasorentsi. Ocarataque 40 osarintsi ishemacari. Oshequi yantajeitaquero

iriori caari cameetsatatsi, irootaque ishinetantacariri icamajeitaque anta caaraiteriqui. ¹⁸Te inquemisantajeiteriji, irootaque icantasano-tancariri: “Eiro pareejeitatsi anta ocameetsaiteti”.

¹⁹Pineaquero, itseencajeitaqueri Tasorentsi, irootaque caari yareejeitanta iriori anta ocameetsaitetinta.

Icoaque Tasorentsi areejeitea anta ocameetsaitetinta.

4 ¹Pamene, icantajeitaquee Tasorentsi: “Ariorica pinquemisantajeitena pisaviquimojeitena aca nonampiqui, aca ocameetsaitetica”. Iro cantaincha queariompia, piquempetaricari yora peeraniniri caari areetachani. ²Ocameetsatanotini ora icashiacaavetacariniri Tasorentsi, aisati ocameetsati oca icashiacaajeitaqueeri arori. Iro cantaincha te inquemisantajeiteni iriori, irootaque yatsipetashitancarori icaman-tiri.

³Ariorica aquemisantasano-taqueri Tasorentsi, ari areetasano-taquea anta ocameetsaitetinta, iro cantaincha eiro yareetatsi yora caari quemisantiri. Tempa icantaquerini Tasorentsi: “Noquisaqueri, irootaque nocantasano-tancariri: ‘Te pinquemisantenaji, irootaque eiro pareetantatsi anta ocameetsaitetinta’”. Peerani, tequerani irovetsiqueroni quipatsi, yovetsiquitavetanari irisavican-teameri, iro cantaincha te irareejeiteaji. ⁴Ayojeitaque yovetsicajeivetacaro maaroni, moncarataca. Tempa ocani Sanquenarentsi: “Ocarataque 6 quitaiteri yovetsicajeitancarori Tasorentsi maaroni; moncarataca. Impoiji, quitaiteri 7 yoipacaquero yovetsicantaque, ari ocarati”. ⁵Ari yovetsicavetanari, iro cantaincha te inquemisantajeiteriji irioripee, irootaque icantantari aisati Tasorentsi: “Eiro catsini yareejeitatsi aca ocameetsaitetasanotica”. ⁶Ari ocameetsa-

taque ora icantaqueriniri Tasorensi, iro cantaincha eiro yareejaitatsi iriori yora icantaqueniri: pineaquero, te inquemisantajeiteji. Iro cantaincha intimaarantaje areetajanchaneri. ⁷Icanti Tasorensi: “Meecaquea nocoacaajeitaqueri atiri inquemisantajeitena irareejitantajeari jenoqui”. Irootaque isanquenatacaqueriniri Iravirini: “Meeca, ariorica pinquema-vaqueri Tasorensi inquenquetsataca-yempi, eiro piquishiritsi, eiro pitseenquiritsi”.

⁸Arime irareetacaajearime Josoe ishanin-capee anta ocameetsaitetinta, çarimpa impoji irisanquenatacaquerime Tasorensi Iraviri: “Coajica irareejitea quemisantajeitanari anta ocameetsaitetinta”? ⁹Irootaque ayojeitantacari coajica ajajeitaje maaroni quemisantatsiri anta ocameetsaiteti, eiro anta apomerentsitapaajatsi antsameejitaje. ¹⁰Peerani itsoncantacarori Tasorensi yovetsicayetaque, yoipacaquero, tecatsi irantaje aisati. Aisati arorijeji, ariorica ajajeite irioriquinta, anquempjeitapaajeari, amaoreajeitapaaje, tecatsi antajeitapaaje. ¹¹Tsame ancoasanojeitajero areejitaje anta: eiro apiatsataritsi, eiro atseenquiritsi. Eirorica aquemisantasanotiri, eiro areetajaritsi. ¹²Aneatsiri ini Tasorensi, oshequi itasorensiti; imatasanotaquero maaroni icantajeitiri. Tecatsi ompomerentsitimoteari, ioti jaoca ocantari aquenqeshireantari aisati ashire; ioti catsini jaoca acantari; iotiro maaroni aquenqeshirejeitiri aisati maaroni acoajeitiri. ¹³Tecatsi materone irimanapitsateari: ineasanojeitaquee maaroni; jaocarica asavicajeitiri, ineajeitaquee. Itsoteayetiro quipatsi, maaroni; iquenqeshirejeitaquee maaroni.

**Yora Jesoquirishito iquempevetacari
ivincatsarite saserote.**

¹⁴Ari ijataji Jesoshi anta inquitequi, itsipatapaajari iriri, yora Tasorensi. Ainiro meeca icantiri Iriri: “Pincavintsaa-

jeiteri quemisantajeitanari”, iquempevetacari yora ivincatsarite saserotepee, irootaque ocameetsatantari ancantaitati-yempani anquemisantajeiteri. ¹⁵Yatirita-paaqueni peerani, iquematsicayetacaro paitapeerica, aisati yora caamari iriori irantacayerime caari cameetsatsi, iro cantaincha tecatsi irante. Iotiantaqueerori irinti maaroni aquematsicayetari aisati jaoca icantaqueeri camaari. Ioti opomerentsitimojeitaquee, iro cantaincha icavintsasanojeitaquee. ¹⁶Eiro meeca atsaroacaajeitajaritsi anquenquetsatacayeri Tasorensi: ayojeitaquee irineshinoncajeitaquee, incavintsasanojeitaquee. Eiro ishineteetsi ashinoncaajeitea.

**Icoacaqueriri Tasorensi
yora ivincatsarite saserote.**

5 ¹Ari ipeaqueri Tasorensi atiri ivincatsarite saserote, icoacaapinitiri iramanacoventajeitee arori. Irio vaaqueriniri Tasorensi paitarica apajeitiriri. Antajeitiro caari cameetsatsi, irootaque maaroni osarinti yoantanariri saserote Tasorensi aparoni virantsi cameetsari, itaaqueneri. Impoji yaacameetsajeitaquee maaroni quemisantatsiri, iquempe-tacantajeitaquee te antajeiteroji caari cameetsatsi. ²Ari iquempejeitaquee arori, atiri ini; te irimateroji intime cameetsa catsini, irointi timatsi yantiri iriori caari cameetsatsi. Irootaque iotantacari icavintsaaajeitaquee ariorica antero arori caari cameetsatsi. ³Aisati ariorica yoiniri Tasorensi ovisha, iquenqeshiretiro antaneppee arori, aisati irantane iriori. ⁴Te irisati peashitachane ivincatsarite saserote, irinti peaqueri Tasorensi; oquempetaca peerani ipeaqueri Aaro isaserotetantacari.

⁵Aisati iquempetaca Quirishito: te irisati peashitachane quempetearine saserote, irinti peaqueri Apa Tasorensi. Tempa icantiri peerani: “Aviro notomi,

meeca quitaiteri notomintaquempi”.

⁶Pashini aisati icantiri: “Pincantaitati-yempani pisaserotetanaque, pinquempeteari iriori Merequiserequi”.

⁷Peerani, yatiritantapaintaniri

Quirishito, oshequi iquenquetsatacapinitiri Iriri, iraaanotacani, aisati ijaquitacani; icantiri: “Apa, ariorica noncame niotaque pimatajena pointinaajena”. Ari oshequi ipincatsataqueri Tasorentsi, irootaque imatantacarori iriori icoacairiri.

⁸Queario, itomi Tasorentsi ini, iro cantaincha iquemisantiri Iriri, irootaque iquematsicatantacarori paitapeerica.

Meeca ariorica anquemisante arori, aisati anquematsicatearo paitapeerica, iotiro irinti jaoca ocantari. ⁹Ari imatasanotaquero maaroni icoacairiri iriri, iquemisantasanotaqueri: irootaque imatantarori aisati yoavisacojeitiri maaroni quemisantanojeitiriri iriori. Meeca eiro ajajeititsi Sharincaveniqui, ainti ajajeite inquitequi, ancantaitatiyempani asavicajeitapaaje.

¹⁰Iriotaque ishiacantaqueri Tasorentsi ivincatsarite saserote, icanti: “Irio iquempetaca notomi Merequiserequi iriori”.

Tequera inquemisantasanote yora isanquenatiniri.

¹¹Nocoavetaca nontsoteajeitempirome maaroni oca, noametasanojeitempirome. Otimaveta piotantavetari, iro cantaincha te pinquemisantavaquenaji, irootaque caari piquemantavacaro. ¹²Ocameetsateme poamejeiterime meece itsipapee, iro cantaincha ainirotsatsi picoajeiti oamejeitempineri. Picoajeiti nampiitajempiro caari pomerentsitsi. Piquempetacari jananequi: coatsimpi pantsomite, te paveeroji pantsiquero poyeari. ¹³Queario, piquempejeitacari jananequi, coatsimpi pantsote: tequera piotasanojeitero Irineane Tasorentsi oamejeiteeri jaoca ancanteari ancameetsajetantajeari.

¹⁴Piotasanoiterime Tasorentsi, pincoajeiteme poyeari pantsicasanoiterime. Piotaqueme paita cameetsatatsiri antajeitaqueri, aisati piotaquerome caari cameetsatatsi eiro pantirome.

Icamantiri sanquenatirori paita isanquenatantanimiri.

6 ¹Eiro napiitapinitajimpirotsi oca noametacotapinitiriri Quirishito: te ompomerentsiteaji. Eiro meece picantajanatsi: “Pampiitapinitajenaro”. Ocameetsati aiqero pijatatiye piotasanoatanaquero maaroni icoacaajeitauempiri Tasorentsi. Nocantimpini peerani: “Eiro pantashiyetarotsi paitapeerica, eiro oavisacotimpitsi: tecatsi pincantea poavisacotajea avisati. Ocameetsati pinquemisanteri Quirishito pavisacotantajeari. ²Pivaotisatimentajeiteari iriojeitanteari atiri piquemisantiri. Ariorica pincanteri Tasorentsi iramitacoteri piyemisanteririnte, pipamijeitaqueri. Ariorica ancamaajeite antinaajeitanaje aisati, impoiiji incantacoventajeitee Tasorentsi”. Ari eiro napiitajimpirotsi oca piotitaniri, ³irointi ariorica irinintacayena Tasorentsi, noamempio iroaque-rari, caari piquemapiniti.

⁴⁻⁶Pamene. Ainiro ashaninca quemavetaroniri irineane Tasorentsi, iveshireimentavetacari Tasorentsi, amitacovetacari Ishire iroori. Iovetaca ocameetsati irineane Tasorentsi; iovetaca coajica impincatsariventajeitee Quirishito. Iro cantaincha yojocajiro iquemisantaveitani. Ariorica yojocajiro iquemisantiri Itomi Tasorentsi, oquempetaca icoaque irampitajerime aisati impajacotantajeari. Itseencaqueri, icoaque intseencacaajeiteeri itsipapee atiri, irishirontimentajeitanteariri Quirishito. Ari tecatsi incantajea inquemisantasanotaje yora quemisantaveitachaniri. Queariyea, piquempetaricariyea avirori. ⁷Ariorica cameetsa oparii

incani quipatsiqui aisati onintiro panquirentsi, otimaque yoajeitari yora panquitirori. Tempa iriotaque Tasorentsi oameetsantirori quipatsi onintantarori panquirentsi. ⁸Iro cantaincha ariorica pineaquoero oantsiqui saveshiniro aisati otsipapee totsequishi, tempa picanti: “Te oncameetsateji, tsame anquicojeitero, antaajeitero maaroni”. Queariyea, piquempetarocari avirori, irointi pinquempetearo cameetsari quipatsi.

Iveshireacaacari yora isanquenatiniri.

⁹Ari nocantavetaquempi: “Pitseenquicari”, aisati nocantimpi: “Piquempetarocari quipatsi oshiocantari saveshiniro”. Iro cantaincha, noshaninca, nonintajeitaquempi. Naamaaca cameetsa pisavicajeitaque, aisati iroavisacojeitempi Tasorentsi. ¹⁰Tempa icameetsataque, eiro ipeacotarotsi maaroni pantiniriri: ioti piquearioventaquoero icoacaimpiri, ioti picavintsaajeitiri piyemisantaririnte, picantani. ¹¹Nocoacaasanojeitaquempi pinquearioventajeitero pinintajeitiri itsipapee, pincanteani, irosati omoncaranteari impinatantempiri Tasorentsi. ¹²Eiro piperaventarotsi icoacaimpiri Tasorentsi, irointi pinquempejiteari yora itsipapee quemisantasanoiriri, quearioventiniriri maaroni icoacaajeitiriri iriori. Queario irineajeitero maaroni icashiacaajeitaqueriri.

¹³Pamene, ariorica ancoaque ayotacaasanoteri itsipapee ashaninca queario oni acantaqueriri, acantiri: “Toti Tasorentsi queario oni oca nocantimpiri. Yanaacojeitaquee irinti, ipincatsaritanoti. Ariorica namatavitempi, yoasanquetanacari”. Timatsi meeca icantaqueeri Tasorentsi, iro cantaincha tecatsi anacoterine irinti, tecatsi oasanquetayerine irinti. Apatiro icantiri Avarama: “Queario oca noncamantempiri nainti, tempa naro Tasorentsi: eiro nopashiniyetirotsi

noneane”. ¹⁴Impoiiji icantiri: “Queario, nontasoncacoventempi, oshequi nintacotempi; aisati noshequiaqueri pishaninca”. ¹⁵Ari yoyeasanotaqueri Avarama, impoiiji ineasanotaquoero maaroni icashiacaairi. ¹⁶Tempa ariorica ancoaque ayotacaasanoteri itsipapee ashaninca queario oni acantaqueriri, acantiri: “Toti Tasorentsi queario oni oca nocantimpiri. Yanaacojeitaquee irinti ipincatsaritanoti. Irimatacayena nontsoteaquempiro maaroni nocantimpiri. Ariorica namatavitempi, iroasanquetaquena iriori”. Ariorica ayotaque ipincatsatanotaque Tasorentsi, ari ashiretasanotearo icantaqueeri. ¹⁷Ari otimini icashiacaajeititacariniri Tasorentsi yora peeraniniri. Icoaqueni iriojeite eiro yamatavijeitiritsi, irootaque icantasanoitariri: “Queario oca noncamantempiri nainti, tempa naro Tasorentsi: eiro nopashiniyetirotsi noneane”. ¹⁸Ari oqueariotasanoaque irineane Tasorentsi: te iriojeji intseeja. Iro cantaincha aisati icantini: “Queario oca noncamantempiri”, ayotasanojeitanacari eiro catsini yamatavitantitsi. Meeca, ariorica aventeari iroavisacojeitaquee, ayotasanoaque irimataqueero oca icantaqueeri: iroavisacotasanojeitee. ¹⁹Ariorica ajojeitaque avavisacotaca, tempa aveshireasanotaca, eiro aquenqueshiretajatsi aisati. Ayojeitaque ocameetsataque anquenquetsatacaajeitiri meeca Tasorentsi, aisati coajica areejeiteari: tecatsi ticavaqueene. ²⁰Ijivajeitanaquee Quirishito, icamantacotaquee: iquempetacari yora Merequiserequi, ivincatsariteni saserote peerani.

Yora Merequiserequi yanaacojeitaqueri isaserotetasanoaque maaroni ishanincani Irevi.

7 ¹Ari meeca nonquenquetsacoteri yora Merequiserequi: peerani ipincatsariventajeitaqueri yora saremisati.

Aisati Tasorentsi iriori, yora savicatsiri inquitequi, ipeaqueri saserote, icanti: “Irio saserotetatsine yoca”. Ari itimi pashiniqui nampitsi Avarama. Yaajeitanaqueri iratiritepee, ijajeitanaque imanajeitiri yora iisaneentane, yora noshiquiriri itomitsori: oshequi inajeiveta, iro cantaincha ipoyerajeitaqueri maaroni, ivincatsaritepee, maaroni. Ari ipianaja Avarama, yoipiajiri itomitsori, aisati yamayetajiro ivararoni yora yovaitiri. Ipiantajari, itonquiotavacari Merequiserequi, icantiri Tasorentsi: “Pintasoncacoventeri Avaramaca cameetsa irisavican-teari”. ²Impoiji yaarantaji Avarama vaararontsi, ipaarantaqueri, icantiri: “Jeroa irashi Tasorentsi”. Otimirica 10, ari ipaqueri aparoni. Ari ipajita iriori Merequiserequi. Acantiri aneanequi: “Cameetsatsiri”. Ipincatsariventajetitiri saremisati. Ocantiri Saremi aneanequi: “Cameetsa asavicajeiti”. ³Ora sanquenarentsi tecatsi onquenquetsatacoteri iriri Merequiserequi. Tecatsi onquenquetsatacotero iriniro, icharine, tecatsi. Tecatsi onquenquetsatacotero itimantacari aisati icamantacari. Oquempevetaca icantani itimini, irootaque ishiantacariri itomi Tasorentsi; icantani iriori isaserotetanaque, icantapinitiri Tasorentsi: “Pintasoncaverteri maaroni quemisantinari”.

⁴Pineaquero, oshequi ipincatsaritini Merequiserequi. Intacantajeitaqueeniri peerani Avaramani, iro cantaincha ipincatsatiri, aisati ipaarantaqueri ivararoni imanatiniri. ⁵Pamene, impoiji catsini itimi ishanincani Avaramani: yora Irevi. Isanquenatacaqueri Tasorentsi Moishishi, isanquenatantarori: “Icoaque Tasorentsi impeaquea ishanincani Irevi saserotetatsineri. Nocoaque maaroni ijorioririnte impaaranteri iriori ivararo, ivira, maaroni: intimerica 10, ari imperi aparoni”. Pineaquero, ishanincani Avaramani inajeitini: ishanincani Irevi

aisati maaroni ijorioririnte. Ishanincatavacajeitaca. ⁶Iro cantaincha peerani yora Merequiserequi te irishanincatearini Avaramani, inashita iriori; iro cantaincha yaavaquero maaroni ipaarantaqueriri iriori, aisati icantacoventaqueri yora intacantajeitaqueeri: yora icashiacaqueri Tasorentsi. ⁷Pineaquero, yora Merequiserequi anaacotantatsiri ipincatsariti, irootaque icantantariri Tasorentsi: “Apa, pintasoncacoventeri Avaramaca cameetsa irisavican-teari”. ⁸Aca ashaninca inajeiti yora ishanincani Irevi, imoncarajeitaquee arorijeji, acamaajeiti, iro cantaincha yaapinitaqueri maaroni apajeitaqueriri. Iro cantaincha peerani yora Merequiserequi, inashita: oquempevetaca te incameji irinti, te oncanteji sanquenarentsi: “Icamaque”. ^{9,10}Peerani, ipaarantantariri Avarama vaararontsi, tequerani intimeni Irevi: itimi iriori impoiji. Iro cantaincha arime intimiteame, impaaranterime aisati iriori: tempa inquempetearime yora jivatatsiri itimi. Aisati inquempejeiterime maaroni ishanincapeeni Irevi: maaroni saserotetatsiri. Aitaqueme impincatsajeiterime Merequiserequi maaroni. Pineaquero, ajorioririnte ipincatsajeitaqueri saserotepee, irootaque ipaarantajeitantariri paitapeerica, iro cantaincha yora saserotepee ipincatsasanojeitaqueri Merequiserequi: tempa yanaacotantaque iriori isaserotetasanotaque, ipincatsaritanotaque.

Yora ishanincani Irevi, tecatsi incantee iroavisacojeitee.

¹¹Ari itimajeiveta yora ishanincani Irevi: yora Aaro aisati maaroni ishanincani iriori, isaserotejaque; aisati otimaveta isanquenajeitini Moishishi, oamejeitiri paitapeerica antajeitiri. Iro cantaincha tecatsi incantee iriorijeji iroameetsajeitee, iroavisacojeitee; irootaque itiancantacariri Tasorentsi

pashini saserotetajantsiri, quempetajariri yora Merequiserequi. ¹²Ari inashita yora saserotetatsiri, aisati meeca onashita icoacaajeitajeeri Tasorensi. ^{13,14}Itimaveta saserotepee shanincajeitacariri Irevi, aisati isanquenajeitaqueneri Moishishi, yoamejeitiri paitarica yantajeitaqueri. Iro cantaincha yora iroaqueratajantsiri saserotetajantsiri te irishanincateariji Irevi, irinti ishanincatacari Jora. Te irisaseroteteji itsipapee ishanincani Jora: te irisanquenajeitenerini Moishishi, te incanteriji irinti impeaquea saserote. ¹⁵Meeca itimi yora quempetariri Merequiserequi, inashita iriori, ayotantacari onashita icoacairiri Tasorensi. ¹⁶Te irishanincateariji Aaro ipeantacari saserote; irointi itasorensitaque aisati icantaitatiani yanei, irootaque ipeantacari saserote. ¹⁷Tempa icantirini Tasorensi peerani: “Pincantaitatiyempani pisaserotetanaque, pinquempeteari iriori Merequiserequi”. ¹⁸Otimavetani oca isanquenatiniriri ishanincani Aaro, iro cantaincha te incoyeji Tasorensi ampomerentsiventearo meeca. Antsipe-tearome, tecatsi oncantajeitee oavisacojeitee. ¹⁹Amoncarajeiteerome maaroni, eiro oameetsajeiteeme. Iro cantaincha irinti Quirishito aitaque irimatajee iraaajeitanajee anta Tasorensi. Te antsipetashiteaji aquemisantajeitaqueri irinti.

ICANTI TASORENSI: “QUEARIO, INCANTAITATIYEMPANI QUIRISHITO IRISASEROTETANAQUE”.

²⁰Te incantashiteaji Tasorensi, icantasanoti: “Queario oca noncamantempiri, tempa naro Tasorensi. Incantaitatiyempani Quirishito irisaserotetanaque”. ²¹Te inquempeteariji irinti ishanincajeini Aaro. Iro cantaincha icantiri Quirishito irinti: “Queario oca noncamantempiri, tempa naro Tasorensi. Te noncantashi-

teaji, eiro namatavitimpitsi. Avirotaque saserote, pincantaitatiyempani”. ²²Irootaque ayojeitantacari yanaacotantaque Jesoshi isaserotetasanotaque, imajeitaquee yoavisacojeitaquee. ²³Ari icarajeiveitani oshequi saserotevetachaniri, iro cantaincha icamapinijeitaque, yojocapinijeitaquero isaserotetataniri. ²⁴Irinti Quirishito, icantani itimi: irootaque imatantarori isaseroteti, icantani. ²⁵Imajeitaqueri quemisantajeitiriri: yoavisacotasanojeitaqueri maaroni coasanotatsiri iraanajeri Tasorensi. Icantani yanei, irootaque imatantarori icamantacoventajeitaquee.

²⁶Queario, ocameetsasanoti isaseroteventajeitaquee; tempa Tasorensi ini, te aneroji irantane, te iranteroji caari cameetsatsi; te inquempejeiteariji yora caari cameetsajetatsi isaviquimojeivetapaintaniri. Meeca isaviqui cameetsa anta inquitequi jenoqui. ²⁷Yora itsipapee saserotetatsiri, maaroni quitaiteiri yoapinitiniri Tasorensi ivirapee, itaapinitiniri. Iro yoapinitantanariri, oshequi iquenqueshiretaquero caari cameetsatsi yantajeitiri aisati yantajeitiri iriori iJORIORIRINTE. Tecatsi iroapinite irinti Quirishito, irointi apatiro icamimentajeitaquee: moncarataca, eiro yapiitajirotsi aisati. ²⁸Ari peerani isanquenatini Moishishi, icanti: “Impeajeitanaquea ishanincani Aaro saserote”. Atiri inajeiti iriori, yantajeitiro caari cameetsatsi. Iro cantaincha impoiji icanti Tasorensi: “Queario oca noncamantempiri, tempa naro Tasorensi: incantaitatiyempani Quirishito irisaserotetanaque”. Iriotaque Quirishito Itomi, te iranteroji caari cameetsatsi irinti, icantatiani icameetsasasanotaque.

**ISASEROTETANAQUE QUIRISHITO
ANTA INQUITEQUI.**

8 ¹Piotavaquero oca noncamantempiri: iriotaque Quirishito saserotetimenta-jeitaqueeri. Isaviquimotiri Tasorensi

anta inquitequi jenoqui, anta iracosanoriqui; icaratiri ipincatsarijeiti. ²Yora ishanincani Aaro iquenquetsatacapinitiri Tasorentsi anta pancotsiqui yovetsiquiri atiri, icantashitacaró: “Ivanco Tasorentsi”. Irinti Quirishito isavicasanoti anta Tasorentsi: te irio vetsiquerone atiri, irinti Avincatsarite vetsiquirori inampiriori. ³Yora ivincatsarite saserote ipapinitiri Tasorentsi paitapeerica; yoaqueneri virantsi, shemi; itaaqueneri. Irinti Quirishito, te iroyeneriji virantsi; irisati coaintsi yoyeetantacariri. Impoiji ijatashitaqueri Tasorentsi, icantapaqueri: “Narotaque nainti camimentajetaqueriri ashaninca, oavisacojeitaqueriri”. ⁴Intimeme meeca aca quipatsiquica, eirome isaserotetime; pineaquero, te irishanincateariri Aaro: iriojeitaque ishanincani Aaro tsoteaquerori isanquenatiniri Moishishi. ⁵Yantaveetapiniti anta icanteetirinta: “Ivanco Tasorentsi”, iro cantaincha te anta irisavicasanote Tasorentsi. Apatiro oshiacaventiro inampisanori anta inquitequi. Peerani, yovetsicantarori Moishishi, icantiri Tasorentsi: “Anta toncaariqui pajitachari Shinai noametasanotaquempiro jaoca pincanterori pancotsi: pimincaratasanotero nocantaquempiri”. ⁶Ocameetsavetaca ora isanquenatiniri peerani Moishishi, isaserotejeitantacari Aaro aisati ishanincani, aisati yamitacojeiveta-cari ajorioririnte. Iro cantaincha oca icantiri meeca Tasorentsi ocameetsasanaotaque, oshequi anaacotaquero isanquenatiniri Moishishi. Aisati iquempetaca, oshequi imatasanotaqueenero Quirishito, oshequi yanaacotaqueri Aaro. ⁷Oncameetsatanotaqueme isanquenatiniri peerani Moishishi, eirome icantirime pashini Tasorentsi.

⁸Tempa icantini Tasorentsi peerani: “Tequera omoncarateaji, te oncameetsasanoteji oca isanquenatiniriri Moishishi

Aaro”. Irootaque isanquenatacantacariri itsipapee quemisantatsiniri peerani: “Icanti Avincatsarite: ‘Coajica ontime pashini noncamantajeiteriri maaroni joriopee, onashitanaquea. ⁹Eiro oquempetajarotsi ora nocantaqueriri yora intacantacaroniri. Peerani isavicaveitani maaroni joriopee Ejipitoqui, iro cantaincha naajeitanaqueri pashiniqui quipatsi. Isanquenavetacaró Moishishi nocoacajeivetacariri, iro cantaincha te inquemisantajeitenaji. Irootaque caari namitacojeitantari. ¹⁰Meeca timatsi noncamantajeiteriri maaroni joriopee. Coajica niotacaasanojeitaqueri maaroni noncantajeiteriri, inquenqueshiretasanojeitero, eiro ipeacojeitarotsi. Impincatsatanosojetaquena, aisati nontasoncacoventajeiteri narori. ¹¹Eiro yatsipetashijeitatsi iroameta vacaajeitea, eiro icantavacaajeitatsi: “Noshaninca, pioteri Novincatsarite”. Aitaque iriotashijeitena maaroni: pincatsaritatsiri, caari pincatsaritatsi, maaroni catsini, iriojeitena. ¹²Noncavintaasanojeiteri maaroni antirori caari cameetsatsi, eiro noquenqueshireacotajiritsi aisati yantayetiri”. Irootaque icantitacari peerani Tasorentsi. ¹³Pineaquero, icantini: “Ontime pashini noncamantajeiteriri atiri, eiro oquempetajarotsi nocantiriri peerani”. Ari oca icantiri meeca, irootaque poyeetajarori icantiriri peerani.

Iquenquetsatacotiro pancotsi yantaveetantari saserotepee.

9 ¹Peerani icantajeitiri Tasorentsi intacantaqueeniri jaoca incantajeiteari inquemisantajeite, aisati icantiri jaoca oncanteari pancotsi irantaveetanteari saserotepee. ²Ari yovetsicajeitaqueroni pancotsi, imoncarataqueroni icantiriri Tasorentsi. Anta yantaveetapinitinta saserotepee icanteetiro irashi Tasorentsi. Otimi anta yoantarori vera itsiotari, aisati

otimi mesa. Anta mesaqui yoapinitiro tanta, ocarataque 12, aquenqueshirejei-tantarori ipapinijeitaquee Tasorensi avajeitari. ³Otimaque oticaashiro, ainiro araquerora tecatsi jatapinitatsine, icanteetiro inantasanotari Tasorensi iriori. ⁴Otimi ara itaapinitantarori casancapsari, iro yovetsicantarori oro. Otimi aisati cajo, ipashicantarori oro. Ara tsompoina, otimi coviti yovetsicantarori oro, tsompoina irointi iteyeetiro mana. Aisati otimi cajoqui iotiquiro Aaro, ora shiocashitachaniri peerani oshi. Aisati otimi ora mapi isanquenatacairiniri Tasorensi Moishishi. ⁵Anta otataroqui cajo ishiacantaqueri apite inampirepee Tasorensi ipajiyeetiri querovine. Ishiacantaca ainiro isavicaque Tasorensi. Yamenajeitaquero otataro cajo anta yoapinitiro maaroni osarintsiqui ivincatsarite saserote iriraja virantsi. Oquempetaca iquenqueshirejeitiri camimentajeiteeri, cavintsaajeiteeri. Eiro meeca notsoteasanotirotsi noncamantem-piro jaoca ocantayetari.

⁶Ari yovetsicajeitaquero peerani, imoncarataquero icantiriri Tasorensi Moishishi. Impoiji iqueapinijeiti saserote-pee, yantaveetapinijeiti. ⁷Iro cantaincha te irijatapinijeiteji oticaashiroqui araquerora. Aparoni ijati maaroni osarintsiqui irinti ivincatsarite. Ijivataque yoiniri Tasorensi virantsi, impoijiquea iqueanaque apaniro, yaanajiro iriraja, iteacaquero anta otataroqui cajo; icantiri Tasorensi: “Apa, pincavintsaajeitena, eiro piquishimentajeitanarotsi nantajeita-queri aisati yantajeitaqueri noshanince-pee; eiro piquenqueshireacojeitajanarotsi aisati”. ⁸Pineaquero, otimi oticaashiro, ticaajeitaqueriri itsipapee saserote aisati maaroni joriopee. Tecatsi incantajeitea irijajeite anta isavicantasanotariqui Tasorensi. Irootaque oshiacantajeita-queeri Ishire Tasorensi, ayojeitantacari

yora ishanincani Irevi tecatsi incantajei-tee irareetacaajeitee anta Tasorensi-quinta. ⁹Ocameetsati anquenqueshirejei-tero meeca ayojeitanteari: maaroni ipapinijeitaqueri Tasorensi, aisati maaroni yoapinitiniri aisati itaapinitiniri, te oameetsajeiteriji yora papinivetariri aisati taapinivetanariri. ¹⁰Peerani yoametashijeitari paitarica yantashijeit-ari; paitarica yoajeitari, aisati paitarica irajeitiri; yoametashijeitari jaoca incanteeri inquivapinitea, paitapeerica. Irootaque icoacaajeivetacariri Tasorensi atiri peerani. Iro cantaincha ari ocaratini, moncarataca. Ipcapaaque meeca Quirishito aamaajeitari. Meeca onashitaja icoacaajeitajeeri Tasorensi arori, iroaqueratajantsiri, ocameetsatanota-que.

Yora Quirishito yoameetsajeitiri maaroni antajeitirori caari cameetsajeitatsi.

¹¹Ipcapaaque Quirishito iquempvetapaajari ivincatsarite saserote, iro cantaincha ocameetsatanotaque oca yantapaa-queri irinti. Yantaveetini itsipapee saserote anta pancotsiqui yovetsiquiri atiri; iro cantaincha irinti, ijatasanotaque anta ivancosanoriqui Tasorensi: ocameetsatanotaque irointi anta inquitequi. ¹²Aca quipatsiqui yora ivincatsarite saserote ijatapiniti maaroni osarintsi, yaapinitiro iriraja chivo aisati vacajani-qui anta pancotsiqui tsompoina, ora icanteevetari inantasanotari Tasorensi. Iro cantaincha Quirishito irinti, icamimentajeitaquee, impoiji ijataji anta inquitequi isavicasanotinta Tasorensi. Ishiacantaca yaanajiro iriraja: caari oni iriraja virantsi, irointi irirajasanori iriori. Icantiri Tasorensi: “Pineaquero, nocami-mentajeitaqueri maaroni atiri noavisacotantajariri, incantaitiyempani irisavicantajeeri aca anampiquica”. Te irantsipeteaji irinti impiapinite, aparo

imataquero, ari ocarati. ¹³Ari peerani ariorica yantironi ashaninca caari cameetsatsi, yoaquero saserote vaca, iriorica chivo, iriorica vacajaniqui. Impoiji yaaquero iriraja, ipantaquero yora antirori caari cameetsatsi. Aisati itaaquero ivatsa, impoiji ipantaquero shirampari itsimenquitore virantsi. Impoiji icantajeitiri ishaninca: “Icameetsataji aisati yoca. Ocameetsati incarajeitajeri aisati quemisantatsiri”. ¹⁴Irintiquea Quirishito, icameetsatasanaotaque irinti, ocantani otimi ishire. Icantiri Tasorentsi: “Apa, nocoasanaotaque noncamimentajeteri atiripee, noavisacojeitanteariri”. Ari aparajatimentajeitaquee irirajasanori irinti, te iro iriraja virantsi: icamimentajeitaquee, meeca eiro atsipetajarotsi anquenqueshiretero caari cameetsatsi, ora jatacaajeiteenemer Sharincaveniqui, irointi anteneri Tasorentsi maaroni icoacaajeitaqueeri. Impoiji ancantaitiyempani asaviquimojeiteri anta inquitequi. ¹⁵Ari peerani apatiro ayojeitaquero isanquenare Moishishi, aisati antapinijeitaquero caari cameetsatsi, ajajeitanteameri Sharincaveniqui; iro cantaincha icamimentajeitaquee Quirishito, yoavisa-cojeitantajeeri. Meeca onashita icantajeitaqueeri Tasorentsi: “Ocameetsaiteti maaroni nocashiacaajeitaqueriri quemisantajeitanari nocoyeajeitaquero. Incantaitiyempani iroveshireimentajeitearo”.

**Yoamejeitaquee paita
icamimentajeitantajeeri Quirishito.**

^{16,17}Ari pinquenqueshiretero yamejeitacari ashanincapee. Otimirica ivaararopee, isanquenati paperiqui: “Ariorica noncame nocoaque irashiyetajearo noshanincapeeni”. Ari isanquenataquero ivajiroppee ashiyetajearone ivaararopee. Impoiji, ariorica incamaque, iriojeitanaque irio ashijetajearone. Eirotsitarica icami yora

sanquenatirori, eirotsita yaajeitirotsi vaararontsi. Iro cantaincha incamaque-rica, moncarataca: impoijiquea iraajeitero. ¹⁸Aisati oquempetacani peerani: otimi icantiriniri Tasorentsi ashanincani peerani. Tecatsi incantea Tasorentsi incame, iro cantaincha icamapinijeitaque poshiniri omoncaratan-tacari icantiriniri. ¹⁹Peerani icamantiri Moishishi maaroni icoacaajeitiriri ajorioririnteni, irosati isanquenatantarori. Impoiji icamantajeitiri ishaninca icantiriri Tasorentsi; impoiji aisati yoajeitaquero vacajaniqui aisati chivo, yaajatavaquero iriraja, iconoajataquero nija. Impoiji yaaquero iviti ovisha quitioncapitiri aisati casancashiri, yovincaquero ojaqui, isaitantariri ishanincapee. Aisati isaitaquero iroori oca isanquenatacaaque-ri Tasorentsi. ²⁰Ariorica isajeitaquero, icantajeitiri ishaninca: “Ari nocamantajeitaquempiro maaroni iroaquerari icamantaquenari Tasorentsi. Icanti: ‘Ariorica pinquemisantajeitena, nontasoncaven-tajeitempi’. Aisati avirori picantajeiti: ‘Cameetsa’. Irootaque nosaitantaquempirori meeca iriraja”. ²¹Impoiji isaitaquero aisati pancotsi iquemisantajeitantari, aisati isajeitaquero maaroni timayetatsiri tsoompoina. ²²Ari isanquenatini Moishishi: “Irootaque iriraja poshiniri oameetsajeitirori paitapeerica; aisati eirorica itimi camimenterineri atiri, amparajatimenteriri iriraja, eiro yavisacotajitsi”.

**Iquenquetsatacotiro paita
icamimentaqueeri Quirishito.**

²³Ari otimi oshiacantiri oca pancotsi aisati maaroni timajeitatsiri tsoompoina. Ocameetsati isajeitaquero yoameetsatan-tacarori. Iro cantaincha otimi inquitequi oca ishiacantajeitaquero, itimi aisati anaacotirori iriraja virantsi, oameetsa-sanotirori maaroni timajeitatsiri inquite-qui: ²⁴iriotaque Quirishito. Yora saserote-

pee ijatapiniti anta pancotsiqui yovetsica-
jeitiri atiri, ishiacanteetiro: “Inantari
Tasorentsi”. Irinti Quirishito ijatasano-
taji itimasanotinta Tasorentsi, icantacoventa-
jeitaquee. ²⁵Yora ivincasarite saserote
ijatapiniti anta inantariqui Tasorentsi,
yaapinitiro maaroni osarintsiqui iriraja
poshiniri: te irayeroji iriraja irashi iriori.
Te irijatapiniteji irinti Quirishito iraa-
pinitearori iriraja. ²⁶Arioricame iraa-
pinitearome iriraja Tasorentsi, oncamee-
sate incamapiniteme, peerani catsini:
yovetsicantarori quipatsi, irintearome
incamapiniteme, irosati meecame. Iro
cantaincha moncarataca peerani icaman-
tacari: aparoni icamaque, yoavisacojeita-
quee. ²⁷Ayojeitaque aparo acama-
jeitaque, toren, ari acarati; te ampiitapinero-
ji ancame. Ariorica ancamaque, impo-
iji incantacoventajeitaquee Tasorentsi. ²⁸Ari
oshequi anajeiveta, iro cantaincha aparo
icamimentajeitaquee Quirishito; imonca-
rataquero, eiro icamajitsi aisati. Impocaje
aisati coajica ancarajeitanotajeri,
ancarajeiteri aisati maaroni itsipapee
amaajeitariri meeca.

**Tecatsi oncantajeitee isanquenare
Moishishi oameetsajeitee.**

10 ¹Pamene, maaroni isanquenata-
cotaquerini peerani Moishishi
oshiacantaqueri yora pocapaintatsiniri,
cameetsasasanotatsiri. Yareetapainta,
oshequi itasoncaventajeitaquee. Icantiri
Moishishi Aaro: “Poapiniteneri Tasorentsi
virantsi maaroni osarintsiqui”. Ari
icantani ishanincani yoapinijeiveta-
ri, iro cantaincha tecatsi oncanteri oavisacojei-
teri yora quemisantirori isanquenatiniri
Moishishini. ²Arime oavisacojeiterime
yoca yoapinitiri, tempa iroimpacayerome
yoapinitiniri. Aisatime iroavisacotajeame
yora, eiro iquenqueshirejeitajirome aisati
yantayetiri. ³Iro cantaincha yoapinijeive-
tari ivira maaroni osarintsiqui, irosati

icanta oquenqueshiretacaapinitiri
yantayetiri. ⁴Tecatsi oncanteri iriraja
vaca aisati chivo oameetsajeiteri antirori
caari cameetsatsi. ⁵Ipocantacari
quipatsiqui peerani Quirishito, tempa
icantiri Tasorentsi: “Apa, te pineacamee-
tsasanotero-ji iriraja virantsi, te
oameetsajeiteriji antajeitirori caari
cameetsatsi. Irootaque pivetsicantana-
rori novatsa noncamimentajeitane-
arori maaroni atiri, noameetsajeitane-
arori. ⁶Te pineacameetsateriji maaroni ita-
apinijeivetimpiri atiri, aisati maaroni yo-
apinijeivetimpiri poameetsajeitane-
arimeri. ⁷Irootaque nocantimpiri: ‘Pamene,
Apa, nopocaque acantantempirori
maaroni picoacaaquenari. Nomonca-
tero maaroni isanquenatacotiteetaquena-
niri peerani’ ”.

⁸Pinquenqueshiretasanotero oca
icantirini Jesoshi: “Te pincoyeji, Apa,
iroajeitempiri atiri virantsi, intaapinije-
tempiri. Te pineacameetsatimenteariji
yora pavetimpiri maaroni isanquenata-
cotiniri Moishishi”. ⁹Impoiji icantiri:
“Pamene, Apa, pocaquena nantantem-
pirori maaroni picoacaaquenari”. Icantan-
tarori oca, icanti: “Ontimaite maaroni
yantavevetaniri ishanincani Irevi. Ontime
iroaqueratajantsineri”. ¹⁰Aparo
icamimentajeitaquee Jesoquirishito, eiro
yapiitajatsi incamaque aisati, imoncarata-
quero. Yoameetsasanojeitaquee, aisati
maaroni iriori quemisantajeitiriri,
iquempetacantajeitaquee te antero-
ji caari cameetsatsi.

**Te iroavisacotanteji virantsi yora yoyeetiri,
irinti Quirishito oavisacotantatsiri.**

¹¹Ari yantaveetapinitaque maaroni
saserotepee, yoapinitiniri Tasorentsi
virantsi, itaapinitiniri, iro cantaincha te
oameetsajeiteriji maaroni antirori caari
cameetsatsi. ¹²Iro cantaincha aparoni
icamimentajeitaquee Quirishito, yoamee-

tsajeitantajeeri, moncaratata. Impoiji isavicapaaji anta iracosanoriqui Iriri, ¹³yoyeaqueri irimatantearori icantaqueri-niri: “Coajica nontsoncajeiteri maaroni quisajeitaquempi”. ¹⁴Aparo icamimentajeitaquee maaroni: tempa icoyeajeita-quee Tasorentsi, yoameetsatasanojeita-quee. ¹⁵Aisati oametasanojeitaquee Ishire Tasorentsi queario nosanquenataquem-piri; tempa osanquenatacirini peerani-niri: “Icanti Tasorentsi: ¹⁶“Tempa narotaque Ivincatsarite jorio, irootaque noncantajeitanteariri: Te pimajeiteroji nocantaqueriri Moishishi, iro cantaincha coajica nonquenqueshiretacaajeitempiro maaroni nocoacaajeitaquempi, pintsoteajeitajero, piotasanojeitajero, maaroni’”. ¹⁷Impoiji aisati osanquenata-caoqueri: “Icanti Tasorentsi: ‘Eiro noquenqueshiretacotitajiritsi aisati caari cameetsayetatsi yantajeitaqueri’”. ¹⁸Pamene, ariorica icavintsaajeitiri Tasorentsi antirori caari cameetsatsi, aisati terica inquenqueshiretacotajeri aisati yantaqueri, eiro icoajitsi aisati camimenterineri iroameetsatanteariri. Pineaquero, inecameetsajeitaquee meeca.

**Icamantajeitaquee paita
icoacaajeitaqueeri arori.**

¹⁹Noyemisanraririnte, icamimentajeita-quee Quirishito, yaparajatimentajeita-queero iriraja yoavisacotantaqueeri. Meeca ayojeitaque inecameetsajeitaquee Tasorentsi, ocameetsatantari anquenque-tsatacapinijeiteri. ²⁰Peerani otimini pancotsiqui oticaashiro, ora caari ijatapinijeitantani atiri onta inantarinta Tasorentsi: tempa oticaajeitaqueri. Iro cantaincha icamimentajeitaquee Quirishito, caari otimantaja meeca ticaajeeneri. Yaneanaji aisati, irootaque ocameetsatantari meeca anquenquetsata-caapiniteri Tasorentsi. ²¹Isaserotetasano-

taque, ipincatsariventasanojeitaquee arori, aisati maaroni itsipapee quemisan-tajeitiriri Tasorentsi. ²²Yaparajatimenta-jeitaqueero iriraja, aisati avoatisatimen-tajeitacari. Irootaque meeca eiro atsaroa-cantaritsi Tasorentsi, ayojeitaque eiro yoipiajeiteetsi, irointi iraacameetsatasa-nojeitee. ²³Ayojeitaque irimataqueenero maaroni icantajeitaqueeri, eiro yamatavi-jeiteetsi: irootaque ocameetsatantari ancamentajeiteri itsipapee atiri oca aquemisantaqueri.

²⁴Tsame meeca anquenqueshirejeiteri itsipapee: anintajeiteri aisati ancavintsa-ajeiteri. ²⁵Timatsi ayemisanraririnte caari pocapinitatsi inquemisante: eiro piquem-pejeitaritsi avirori, irointi pampatotapini-jeitea poimoshirencavacaajeitanteari maaroni. Tempa ayojeiti eiro osamanititsi impocantajeeri Quirishito, irootaque ocameetsatantari aveshirementajeiteari aisati aveshireacaajeiteari itsipapee. ²⁶Pamene, ariorica ayojeitaque icamimentajeitaquee Quirishito, irootaque yoavisacotantaqueeri, ocamee-tsataque ashiretearo, anquemisantasano-jeiteri: tempa irootaque icantiriri Tasorentsi, oqueariotasanoataque. Te oncameetsateji catsini antseenqueri, te aneriji pashini oavisacoteeneri. ²⁷Aitaque coajica inquisajeitanaqueri Tasorentsi maaroni tseenquiriri, iroasanquetasano-jeiteri. Impoyereajeitajeri maaroni iisane, poyere. ²⁸Yora ajorioririnteni yoapinijeit-querini caari pincatsatiro isanquenare Moishishi. Itimirica apite cantatsiri, ariorica icarati mava cantatsiri: “Ainiro yantane, noneajeitaqueri”, ari yoajeita-queri ishaninca. Te incavintsaajeitimat-eriji. ²⁹Ariorica intseenqueri atiri Itomi Tasorentsi, aisati incanterica: “Yatsipeta-shita icamaque Quirishito, yatsipetashita yaparajataquero iriraja, eiro yoavisaco-teetsi”; aisati incantimaterorica Ishire Tasorentsi, ora cavintsaajeiteeri:

çpjiitimpa eiro yoasanquetiritsi Tasorentsi? Aitaque iroasanquetasanoaqueri, catsini: irineashiiteteartove, ironea caari iquemisantantari. ³⁰Tempa ayojeitiri, ayojeiti icanti: “Aitaque nompiajeiteari, noasanquetaajeiteri nainti”. Aisati icanti: “Queario noncantacoventajeiteri maaroni atiri, tempa naro pincatsariventacojeitiriri”. ³¹Ariorica intsencante atiripee, inquisaqueri Tasorentsi, yora aneasanotsiri: ocameetsati intsaroacaasanojeiteari catsini, yoashinoncairicari.

Icantiri: “Pinquearioventero pinquemisante, eiro pitsaroitsi pashinoncaimenteari Quirishito”.

³²Pinquenqueshirejeitajea jaoca ocantari peerani, iroaquerani piquemacotaquerini Quirishito. Iquishmentajeitaquempiro pishaninca piquemisanti, ³³ishirontimentajeitaquempi, yoashinoncaajeitaquempi. Aisati pineajeitaqueri yoashinoncaajeitaqueri itsipapee piyemisantaririnte. ³⁴Picavintsaapinitaqueri yora yoiminqearanteetaqueri. Ariorica icoshitaquempini pivaararo, piquimoshirejeitaqueni, picantini: “Irayerota. Coajica ontimasanoyetaje cameetsayetatsiri anta inquitequi, eiro itimajitsi coshitajeeneri anta. Ancantaitiyempani asavicajeite anta ocameetsaite-tinta catsini”. ³⁵Eiro pipeacotarotsi piquimoshireimentiri, aiqero pijatatiye pinquimoshirejeitanaque. Queario, impinatempi Tasorentsi. ³⁶Ocameetsati pincanteani pinquearioventero maaroni icoacaimpiri Tasorentsi, impojji irimatempiro icantaquempiri. ³⁷Tempa ocantani sanquenarentsi: “Irotajantsi ipocaje Avincatsarite, eiro osamanititsi, tempa icanti: ‘Nompocaje. ³⁸Ocameetsati inquemisantasanojeitena yora noameetsantiri. Iro cantaincha irojocajerorica iquemisanti, eiro noveshireimentajaritsi’”. ³⁹Te ancarajeiterijji arori yora jocajeiti-

rori iquemisanti: irijajeite iriori Sharinca-veniqui. Aquemisantajeiti ainti, ajajeite ainti inquitequi.

**Yantajeitiniri
quemisantasanoatsiniri peerani.**

11 ¹Piquemisantiri Tasorentsi piotasanoantacari irimatasano-tempiro maaroni icantaquempiri. Ainirotatsi oshequi caariquera aneajeiti, iro cantaincha aquemisantajeiti, irootaque ayojeitantacari aneajeitajero coajicani maaroni icashiacaajeitaqueeri. ²Iquemisantini yora peeraniniri, irootaque inecameetsatantari Tasorentsi. ³Aquemisantajiri arori, irootaque ayojeitantacari ineanataque Tasorentsi otimantacari quipatsi, inquite, aisati maaroni timantarori. Ineanataque otimantanacari: tecatsi irovetsicantarori. ⁴Iquemisantini Averini, irootaque inecameetsatitantacari Tasorentsi ipaqueri; irintiquea Caini, te inquemisanteji, irootaque caari inecameetsatantaro ipavetacari iriori. Inecameetsataqueri Tasorentsi Averini, irootaque inecameetsatitantacari ipaqueri. Icamaqueni iriori peerani, iro cantaincha ocameetsati anquempjeiteari: anquemisantajeite irineacameetsajeitanteeri Tasorentsi. ⁵Iquemisantini Enoco, caari icamanta. Aneatsi ini, yaanajiri Tasorentsi inquitequi. Tecatsi neajerine aisati: queario, yaasanotanajiri inquitequi. Tequerani irayerini, icantini: “Queario, noneacameetsatasanoaqueri Enoco”. ⁶Eirorica aquemisantiri, eiro inecameetsajeiteetsi. Intimerica coatsiri irareeteeri Tasorentsi, ocameetsati inquemisantasano-terari, aisati iriotasanoanaque impinateri coasanotatsiri irioteri. ⁷Aisati iquemisantini Noeni. Icantiriniri Tasorentsi: “Coajica ompoque antearo incani catsini, incajaretanaque maaroni. Pivetsiquero antearo pitotsi pavisacotanta-

jeari”. Ari iquemisantaqueri. Osarintsitasa-novetani, iro cantaincha yantaque pitotsi, yavisacotantajari, aisati yavisacojeitantajari maaroni saviquimojeitiriri. Te inquemisanta-jeiteji itsipapee ishaninca, irootaque yoasanquejeitantacariri Tasorentsi. Irintiquea Noeni yoameetsantiri: tempa iquemisantiri irinti. ⁸Aisati iriorini Avaramani, iquemisantirini Tasorentsi. Icantirini iriori: “Nocoaque pijate pashiniqui quipatsi, anta arejiqui: aitaque pisavicapeeri. Nompempro pashitasanoteari avirori; aisati nomperi pitomi, picharine, maaroni. Tsame pijate, nocoi nonijayempro”. Ari ijatanaque, iro cantaincha te irioteji jaocarica irijateri. ⁹Yareetantacari, ineapaqueri pashini atiri savicajeitatsiri. Oquempvetaca caari iipatsite, te irisavicasanoteji, irointi iquenayetaque; iro cantaincha icantani iquemisantiri Tasorentsi. Aisati iquempejeitaca Isaca aisati Jacovo: te irisavicasanoteji, te irivetsicajeiteji cameetsari ivanco, ¹⁰irointi iquenqueshirejitiro pashini inampi, caari yovetsiqui atiri. Iojeitaque coajica irajeitanajeri Tasorentsi anta inampiqui iriori, yovetsicaqueri iriori. ¹¹Oquemisantini Sarani: shiravaro oni, te intimeni otomi. Impoiji anteashipatanaque. Icantaquero Tasorentsi: “Coajica intime pitomi”, irosati oquemisantantacariri. Ocanti: “Eiro yamatavitanatsi Tasorentsi”. Impoiji itimaque. ¹²Aisati yanteashipatanotaqueni Avaramani, oshequitasanotaque irosarintsite. Te intimaveteaji catsini itomi, iro cantaincha impoiji itimacaquero ijina otomi. Meeca icarajeiti ishanincani oshequi catsini, tecatsi ancanteri ayojeiteri jaocarica icarajeitiri: iquempejeitacari impoquiroppe, tecatsi ancanteri ayojeiteri jaocarica icarajeitiri. Aisati iquempejeitacaro ovane impanequi anta otsapijaqui incajare, oshequi catsini.

¹³Ari icamajeitaque iriorijeji quemisantiniri: isavicajeivetani Canaqui, iro cantaincha te irineasanajeiteroiji maaroni

icantaqueriniri Tasorentsi. Iro cantaincha iojeitaque irineajero coajica. Icantajeitini: “Te nonampitasanotearoji quipatsica, te nosavicasanoteji aca”. ¹⁴Irootaque ayojeitantacari icoajeitaqueni irareejeitea pashiniqui nampitsi irinampitasanotantapaajearori. ¹⁵Incoajeitajeme impiajeitanajeme anta Ejipitoqui iponeantacari, ari irijajeiteme. ¹⁶Iro cantaincha icoajeitaque irijajeite cameetsaiteriqui nampitsi: ora timatsiri inquitequi. Irootaque yoveshireimentantacariri Tasorentsi iriori: te impashiventacaimateariji, itomintasanoteitacari. Aisati yovetsicajeitini isavicajeitantari.

¹⁸Peerani icantirini Tasorentsi Avaramani: “Meeca itimi pitomi papanirorite, pipajitiri Isaca. Iriotaque ashijeitarineri pincharinentayetajeari, maaroni. Tecatsi itsipa ashitearine”. ¹⁷Ari yevancaritapaini Isaca, irosati ineantantarriri Tasorentsi Avarama, iriotanteari queariorica iquemisantanotiri. Icantiri: “Poyenari pitomi papanirorite, pintayenari”. Ari iquemisantirini, icantiri: “Ari, nojate noyeri”. ¹⁹Iquenqueshiretaca: “Icantana Tasorentsi: ‘Iriotaque ashijeitarine pincharinentayetajeari, maaroni’. Tequera intime itomi iriori, iro cantaincha icantaquena: ‘Poyeri’. Naamaaca ariorica noyeri, irointinaajeri”. Ijatanaque, irotaintsi iroyerime, iro cantaincha icantiri Tasorentsi: “Eiro poiriti, irointi noneantimpi. Meeca niotaque pipincatsatanotaquena”. Ari oquempetimovetacari Avarama yoitinaajiniri itomi, yaneanaji aisati.

²⁰Aisati iquemisantini Isacani, irootaque icantacoventantariri Jacovo aisati Esao. Icantiri Tasorentsi: “Pintasoncacoventerenti notomi apite”. Irootaque itasoncacoventantaririri oshequi.

²¹Aisati iquempetani Jacovoni, iquemisantini. Irotaintsi incame, iro cantaincha ititacaro iotiquiuro; yoivotashitacari

Tasorensi, icantiri: “Pintasoncacoventa-jeiteri itomipee Jose”. ²²Aisati iriorini Jose, iquemisantini. Peerani itimini Ejipitoqui, aisati maaroni ishaninca, iro cantaincha iotaque iraajeitanajeri joriopee anta iipatsitequi iriori. Irootaque icantantariri ishaninca: “Irotaintsi noncame. Coajica, ariorica pijajeitanaje aipatsitequi arori, paajeitanajeroyea notonquini, pintijapaajero”.

²³Peerani icantajeivetarini yora ivincatsarite ejipitosati: “Noshaninca, pineaqueri yoshequiajeitanaque joriopee: te oncameetsateji. Pijajeite piviincajeiteri maaroni itomipee, iroaquera timayetsiri”. Ari yora iriri Moishishi iquemisantini, aisati iriniro: ipincatsajeitirini Tasorensi, irootaque icantantari: “Eiro apincatsaritsi irinti ivincatsarite ejipitosati. Icameetsataque atomi, eiro ashinetiritsi iroviinquiteeri”. Ari imanapitsataqueri, caari yoantari. ²⁴Ari impoiji oneaqueri Moishishi irishinto pincatsari. Oquenqueshireti: “Eiro noiritsi, irointi nonquempetacantajeri notomi, intime novancoqui”. Impoiji yantearitanaque. Iquemisantaqueri Tasorensi, irootaque icantantari: “Te noncoyeji noshaninca-teari ejipitosati, naro jorio”. ²⁵Iotaque iquemisantajeiti joriopee, irootaque yoashinoncaajeitancariri ejipitosati. Iquimoshirejeivetaca ejipitosati, iro cantaincha te oncameetsateji itimajeiti, irootaque caari icoanta Moishishi irishanincajeiteari. ²⁶Te incoyeriji iirequite ejipitosati saviquimovetacari, irinti icoasanotaque iquemisantiri Quirishito, iquematsicatimentacariri iriori. Iotaqueni coajica impinateri Tasorensi. ²⁷Iquemisantini, iotaque te inconijateji Tasorensi, iro cantaincha iotaque quiso yoiri; irootaque caari itsaroacantari pincatsari, aisati ishiapitsajeitancariri ejipitosati, yaajeitanaqueri maaroni ijorioririnte. ²⁸Aisati iquemisantiri

Tasorensi, yora cantiriri: “Meece tsiteniri nontianqueri nonampire iroyeri itomipee tseencajeitanari, yora jivatatsiri itimi. Iro cantaincha ariorica poyeri ovisha, pisaiteiro pivanco iriraja, iravisanteari yora oantatsiri, tecatsiquea incanteri pitomipee”. Ari iquemisantaqueri Moishishi, aisati iquemisantaajeita-queri ijorioririnte, caari icamajeitanta itomipee. Iro apajitantarori quitaiteiri: “Yavisantaniri”.

²⁹Aisati iquemisantajeitini maaroni joriopee. Ishiapitsajeitacari yora isorarotepee ejipitosati. Yoijajeivetanacari, iraaaverime. Jero oticajeitaqueri joriopee antearoja incajare, tecatsi inquenajeitanaje. Iotaque Tasorensi iquemisantajeitiri, irootaque iteencareajantacarori incajare, oquipatsitanaque nianqui. Jentsipaite yavisajeitanaque intatiqero maaroni joriopee. Yoijajeive-tapaacari ejipitosati, iro cantaincha yoipajatajiro Tasorensi incajare, aajeitaqueri soraropee.

³⁰Aisati iquemisantajeitini joriopee anta Jericoqui. Itantacotasanojeitaca savicajeitatsiri, iticajeitavaqueri joriopee. Iro cantaincha icantiri Tasorensi: “Pishoncajeitanaquearo nampitsi, paniijeitanaque. Aparo quitaiteiri, aparo pishoncajearo; otsipa aisati, otsipa aisati, irosati 7 quitaiteiri”. Ari omoncaratapaaca quitaiteiri 7, irosati otireantanaca tantotsi. Icamajeitanaque tseencantatsiri, savicajeitatsiri. ³¹Otimi anta aparoni tsinane, pajitachaniri Arava. Peerani oshequi antayetirini shiramparipee caari ai. Oquemisantaji iroori, amitacotantariri itiancaneppee Josoe iramenero nampitsi. Te oncameji irointi anta Jericoqui, te onquempeteariji itsipapee tseencajeitancatsiri.

³²¿Paita pashini nonquenquetsatocoteri? Oshequitanaque meece nosanquenare, iro cantaincha itimi oshequi catsini

itsipapee quemisantajeitiriri Tasorentsi: Quereo, Varaca, Santso, Jete, Iraviri, Samoiri, aisati itsipapee quenquetsatacantatsiniri. Eiro meeca notsoteirotsi yantayetiri maaroni. ³³Iquemisantajeitirini Tasorentsi, itsoncajeyantavacariri oajeiterinemeri. Iquemisanti itsipapee imatantarori cameetsa ipincatsariventajeitiri ishaninca, aisati imatantacanariri Tasorentsi icantaqueriri. Yojoqueevetari manitimashiqui, iro cantaincha iquemisantini, irootaque caari yoantarini. ³⁴Pashini yojoqueevetari paamariqui, iro cantaincha te intayeaji. Impesheeterime itsipapee, iro cantaincha yoavisacotaarantaqueri Tasorentsi. Imantsiataarantaque, iro cantaincha yoavisacotaarantaqueri, ishintsitacaarantaqueri. Imatacaarantaqueri manatachari. Yoimishiaarantaqueri manaterinemeri quemisantatsiri. ³⁵Oquemisanti tsinaneppee, irootaque itinaantajari ojimeni, aisati otomipee. Yoashinoncaaranteetaqueri itsipapee quemisantatsiri, yoatsinaaranteetaqueri; icantiri: “Ariorica pojocajero piquemisanti, ari cameetsa noimpacajempi”. Iro cantaincha icantiri: “Eiro nojoquirotsi noquemisanti. Coajica cameetsa irisavicacayena Tasorentsi”. ³⁶Ari ishirontimentaarantacari, ipasanataarantaqueri, tac, tac, tac; yoisotaarantaqueri carenatsaqui, yoiminquiaarantaqueri, ³⁷ipichaarantaqueri mapi, pitse, pitse, pitse. Itotaqueri ichaquireaqueri, chaquire. Ipesaarantaqueri, peti. Itsipapee te inquitsaateaji cameetsa, irointi iquitsaatashitacari imeshina ovisha aisati imeshina chivo; ocoiteimotacari paitapeerica, iquisheetaqueri, yoashinonqueetaqueri. ³⁸Iquenayetanaque caaraiteriqui aisati toncaariqui. Imanapitsayetacari quisaqueriri anta omoropeequi toncaari. Icameetsatasanojeitaqueni, iro cantaincha te iracameetsaniroteaririji yora tseencantatsiri. ³⁹Ari iquemisantajeitaqueni, irootaque

ineacameetsatantacariri Tasorentsi, irinti; iro cantaincha te irineasanojeiteroiji maaroni icantajeivetacariri. ⁴⁰Ocameetsatasaanotaque icoacaajeitaqueeri Tasorentsi: te incoacaajeiteririji yora peeraniniri irijivajeitee irineajeitero, irointi icoaque amoncaratavacaajeitea aneajeitero maaroni.

Icantiri: “Pinquearioventeneri Tasorentsi icoacaimpiri, eiro pishemashireatsi”.

12 ¹Ari oshequi iquemisantajeitaqueni maaroni yocapee noquenquetsatacojeitaqueri. Meeca oquempetaca yapatotashijeitaquee, yamenacojeitaquee iriojeitan-teari paitarica antajeiteri arori. Noshiacantempiro: tempa yamejeita evancaripee ishiajeita iriotanteari janicarica anaacotantsineri. Ariorica irishianaque, tecatsi inqijianaque, irointi yojocanaquero iitsaare irishiasanotanteari. Aisati ocameetsati ajocajero caari cameetsatsi antajeivetari amatantearori maaroni icoacaajeiteeri Tasorentsi, anquearioventero. ²Ancanteani anquenqeshirejeiteri Jesoshi, yora oavisacojeitaqueeri peerani, aisati iriotaque aajeitanajeeneri coajica inquitequi. Oshequi iquematsicatimentajeitaquee coroshiqui peerani, oshequi yoashiventajeitaqueri iriori. Iro cantaincha iotaque irisavicacajejitajee cameetsa anta inquitequi, irootaque iquematsicatimentantaqueeri. Meeca isaviqui iriori anta iracosanoriqui Tasorentsi, icarajeitaqueri ipincatsariventajeitaquee. ³Oshequi peerani iquisajeitaqueri tseencantatsiri, oshequi yoashinoncaajeitaqueri. Meeca ocameetsati pinquenqeshiretasanojeiteri, impoiji eiro poashiretatsi, eiro pishemashireatsi.

Yoasanquetaaqueri Tasorentsi quemisantatsiri antirori caari cameetsatsi.

⁴Ari picantayevetari antirori caari cameetsajeitatsi: “Pojocajero pantayetiri”,

iro cantaincha tequera inquishmentajei-tempiro. Tequera iroimentempiro, tequera iroashinoncaimentempiro.

⁵¿Pipeacotarompa itomintaquempi Tasorentsi? Pinquenqeshiretajero aisati oca isanquenatacaqueriri peeraniniri:

“Notiomi, ariorica noasanquetayempi, eiro piquisanatsi, tempa narotaque pivincatsarite. Aisati ariorica noasanquetayempi, eiro pishemashireanatsi.

⁶Ariorica irantero nonintane caari cameetsatsi, noasanquetaapiniteri. Nocoaque niotacanteariri te oncameetsateji irampiitapinitero. Ariorica noasanquetayempi piotanteari notomintasanotaquempi”.

⁷Ariorica iroasanquetaajeitempi Tasorentsi, eiro pishemashireatsi. Inintajeitaquempi, itomintajeitaquempi, irootaque yoasanquetantaquempiri.

Tempa amejeitaro arori avasanquetaapinijeitiri atomipee. ⁸Maarori shirampari yoasanquetaajeitaqueri itomipee. Eiorica yoasanquetaimpitsi Tasorentsi, te aviro itomi, irishinto: te pishanincateariji.

⁹Yoasanquetaajeitaquee ashijeiteeri, iro cantaincha tempa apincatsajeitaqueri. Tempa aisati ocameetsati ampincatsajeiteri Tasorentsi ashijeiteeri, ancantaitatiyempani asavicanteari anta inquitequi.

¹⁰Yora ashijeiteeri yoasanquetaajeitaquee aisati yoamejeitaquee ayojeitantacari asavicajeiti cameetsa aca quipatsiqui: eiro osamanititsi, ari ancamaque. Aisati yora ashijeiteeri te iriojeiteji maaroni, irointi yaamaashiyeta iriori; ainiro iquisashitee. Irintiquea Tasorentsi, te iramaashiyeteaji irinti, cameetsa yoasanquetaajeitaquee, cameetsa yoametasanojeitaquee. Impoiji ancarajecteri iriori ancantaitatiyempani ancameetsasanojeitapaaje. ¹¹Ariorica yoasanquetayee, tempa avashirevetanaca, te anquimoshirevetanajeaji. Iro cantaincha impoiji aquenqeshiretanaja,

ayotaque yoamejeitaquee anquimoshirejeitanaque aisati ancameetsatanaque.

Icantiri:

“Piveshireimentajeiteari Tasorentsi”.

¹²Piquempejeivetaca pimaotsajeitaque. Pintinaanaje, pishintsitanaje: queario iquishmentajeitaquempiro piquemisanta-jeiti, iro cantaincha piveshireajeitanaquea. ¹³Pinquearioventero icoacaimpiri Tasorentsi. Piveshireacaajeiteari piyemisantaririnte oashirejeivetachari inquemisantasanojeitanteari iriori.

¹⁴Pincoasanojeite paacameetsajeiteri maaroni itsipapee atiri, eiro piquishiritsi. Aisati pincoasanotaque pintime cameetsa: eiorica pitimi cameetsa, eiro pimatirotsi pinquemisantacaajeiteri itsipapee, eiro iojeitiritsi Avincatsarite. ¹⁵Pamitacotavacaajeitea, poametavacaajeitea, iriojeitanteari maaroni ashanincaptee ineshinoncajeitaqueri Tasorentsi. Piquisashireajeitiricari pishaninca, te oncameetsateji. Ariorica piquisavacaajeitea, eiro pitimajeititsi cameetsa, aisati pojocajeitirocari piquemisanti. ^{16,17}Piojeitaque paita yantaquerini Esao. Iriotaque itomi Isaca; Esao iriotaque jivatatsiri itimi; irinti Jacovo, impoitatsiri. Ari yamejeitaca ashijeiteeri icantacoventasanotiri jivatatsiri itimi itomi, intasoncacoventanteariri Tasorentsi. Aisati icantiri: “Aviro poyeetajenaneri, ashiyetajearone timimoyetanari”. Aisati inquempeterime iriori Isaca, incavintsaasanoiterime Esao. Iro cantaincha pashini quitaiteri oshequi iquemaquero iriori itashe, impoiji ineaqueri irirenti otimi oshequi yoari. Icantiri: “Iye, pimpena noyeari: aasanotaquena notashe”. Icantiri: “Ariorica icantacoventaquena nainti apa, aisati incantena nompoyeetajeari, ari nompaquempiro poyeari”. Icantiri: “Ari, aviroyeampa. ¿Paita noncoanteari nainti incantacoventena coajica? Irotaintsi

noncame meeca”. Ari ipaqueri yoari. Impoiniji iquenqueshireavetanaja Esao, oshequi irasanovetanaca, icantavetari iriri: “Apa, nocoasanotaque pincanteri Tasorentsi nompoyetantajempiri”. Icantiri: “Eiro. Nocantacoventaqueri meeca pirenti. Impoiji meeca picantaquena”. Te incoyeji Esao intasoncaven-terime Tasorentsi, irointi itseencaqueri. Eiro piquempejearitsi meeca aviroi.

Cameetsa icavintsaajeitaquee Tasorentsi meeca: eiro aquempetaritsi peeraniniri, yora tsaroacajeitacariniri.

¹⁸Te pineajeiteroji inajeitaqueri peeraniniri anta toncaariqui shinaiquiniri, itsaroajeitancari. Icamantancariniri Tasorentsi Moishishi maaroni icoacajeitaqueriri, ineaquero omapocanaca otaashitaca paamari, aisati otsitenitanaque quitaiteriqui, ineaquero antearo tampea. ¹⁹Iquemajeitaquero ishaninca aisati antearojenca itioti aisati iquemajeitancariniri Tasorentsi, itsaroacajeitacari catsini, icantajeiti: “Eiro pineanajeitanatsi aisati, oshequi notsaroacajeitaquempi. Nocamicari”. ²⁰Icanti Tasorentsi: “Te noncoyeji impoque aca toncaariqui atiri aisati ivira. Impoquerica aca ivira, pimpichaaajeiteri, poyeri”. Ari itsaroajeitanaque maaroni atiri, catsini. ²¹Aisati iriori Moishishi, itsaroacajeitacaro maaroni inajeitaqueri; icanti: “Oshequi notsaroanaque, irootaque nopioncantancari”. ²²Avintipee, te pijajeiteji Shinaiqui, irootaque caari pitsaroajeitanta. Irointi oquempetaca pijajeitaque anta pashiniqui toncaari, pajitachari Sio, ora timatsiri anta Jerosarequi: shiaquerori inampi Tasorentsi. Pineaquero, oquempetaca pijatasanotaque pashiniqui Jerosare, ora inquitequiniri: parejeitacari Tasorentsi, icavintsaasanojeitaquempi, irootaque caari pitsaroajeitanta. Ainiro anta oshequi catsini inampire, yapatotimenta-

jeitacari, ipampoyeaventajeitaqueri, maaroni. ²³Anta intime maaroni quemisantatsiri itomintajeitacari Tasorentsi, maaroni savicasanotatsineri anta: ainiro osanquenataca meeca ivajiro, maaroni. Ainiro Tasorentsi, yora cantacoventajeitaqueeri, maaroni. Ainiro aisati maaroni yora quemisantajeitatsiniri peerani; yoameetsajeitaqueri Tasorentsi, cameetsa isavicajeiti meeca inquitequi. ²⁴Aisati oquempetaca pareetaca Jesoshiqui, yora oamejeiteeri maaroni icantajeitaqueri Tasorentsi. Peerani yoaqueri Caini irirenti Averi, irootaque yoasanquetantacariniri Tasorentsi Caini. Yoayaqueri aisati Jesoshi, iro cantaincha icamimentajeitaquee irinti, icavintsaajeitantaqueeri Tasorentsi.

²⁵Pinquemisantajeiteriyea yora quenquetsatacaajeitimpiri, pipiatsatari-cari. Peerani ipiatsajeitacari ashanincani Moishishi. Ishaninca inaveta, iro cantaincha te inquemisanteriji, irootaque yoasanquetimentajeitancariniri Tasorentsi. Caari ini atiri coatsine inquenqueque-tsatacayempi meeca, irinti Tasorentsi. Oshequi yanaacotantaque ipincatsariti. Eirorica piquemisantritsi irinti, tempa iroasanquetasanojeitempi catsini.

²⁶Peerani anta Shinaiqui iquenquetsatacantacariniri Tasorentsi Moishishi, inicaquero quipatsi. Iro cantaincha icantirini iriori: “Coajica apanivani nonicajero aisati quipatsi, iro cantaincha aisati nonicacoteri inquiresati maaroni”. ²⁷Ari icantini: “Apanivani nonicajero aisati”. Aitaque intsonquero maaroni nicajeitachaneri, maaroni caari quisotasannotatsi. Ontimmarantanaque irointi caari nicachane. ²⁸Ari coajica asavicajeitanta-jearo anta pashiniqui quipatsi, ora caari tsoncanetachane: anta impincatsariventasanojeitee. Irootaque ocameetsatantari ampasonquitasanojeiteri, anquearioventeneri maaroni icoacaaqueri; tsame

ampincatsatasanojeiteri maaroni. Ocameetsati intsarooacaajeiteari maaroni caari pincatsatiri, ²⁹tempa intsoncasanojeitaqueri maaroni tseecajeitiriri, impoye-reajeitajeri, maaroni: poyere.

Icantiri: “Pintimajeite cameetsa”.

13 ¹Ari, pinintavacaasanojeitea: pinquempetacanteri itsipapee irio pirenti pinintasanotiri. ²Ariorica irareetempi caari pineapiniti, paacameetsatavaqueri. Ainiro aacameetsatavaqueriri caari ineapiniti, ijivetari ishaninca ini yora yaacameetsatiri: jaa, irinti inampirepee Tasorensi inajeiti. ³Pincavintsaajeiteri maaroni ayemisanraririnte, yora yoiminqueeyetiri: pintimeme anta caravosoqui, tempa pincoaqueme cavintsaajempinemer avirori. Pincavintsaajeiteri maaroni yoashinonqueeyetiri: tempa pishanincajeitacari. ⁴Ocameetsati aye ajina; ocameetsati iroori tsinane aye ojime. Ocameetsati irineero shirampari ijina; ocameetsati oneeri tsinane ojime. Iro cantaincha iroasanquetaajeiteri Tasorensi maaroni aimentarori ijina aisati maaroni aimentariri ojime. Aitaque iroasanquetaajeiteri maaroni antirori caari yai. ⁵Eiro picoitsi poshequiyeri piirequite, irointi piveshireimentearo timimojeitimpiri. Tempa icanti Tasorensi: “Eiro noshinetimpitsi pashinoncayea, quiso noajeitempi”. ⁶Irootaque ocameetsatantari ancantapinijeite: “Niotaque intacotapinitaquena Avincatsarite, eiro noquenqueshireatsi. Tecatsi incantena atiri iroashinoncayena”.

⁷Pinquenqueshiretasanoteri jaoca icantari yora quemisantacajeitimpiri: yora oamejeitimpirori irineane Tasorensi. Pinquenqueshiretasanoteri maaroni imajeitaqueri, impoiji pinquempejeiteari iriori, pinquemisantasanojeite. ⁸Te impashinitapiniteji Jesoquirishito, irosati icanta: peerani, meeca, irosati coajica.

⁹Eiro piquemisantirotsi yoametantashiye-tari atiripee. Tempa ocameetsati anquemisantero yoamejeiteeri Tasorensi, yora neshinoncajeiteeri. Ainiro cantimentajeiteerori paitarica avajeiteameri, iro cantaincha yatsipetashitacaro: te oameetsajeiteriji irioripee, aisati eiro oameetsajeiteetsi arori. ¹⁰Ari icamimenta-jeitaquee Quirishito, avavisacojeitanta-jari; irintiquea yora cantiriri saserotepee: “Poyenari novira navisacotantajeari”, yatsipetashijeitacaro, eiro yavisacotajitsi. ¹¹Ari yora ivincatsaritepee saserote yoapinitiri virantsi aisati yaajatapinitiro iriraja anta ivancoqui Tasorensi. Icantiri Tasorensi: “Ainiro irantane noshaninca, irootaque noantariri virantsi piotanteari icoaque pincavintsayeri. Jero oca iriraja”. Impoiji yaajeitanaquero ivatsani virantsi anta arejiqui, itaqueri. ¹²Aisati iquempe-tacantaqueri Jesoshi, yaajeitanaqueri arejiqui yoantacariri: te ari iroyeri nampitsiqui. Iro cantaincha icamaque yoameetsajeitantaqueeri.

¹³Ariorica irishirontimentee tseencantsiri, ariorica iroashinoncaajeitee, iro cantaincha ocameetsati ancanteani anquemisanteri Jesoshi. Tempa ishirontimentajeitacari iriori, yoashinoncaajeita-queri. ¹⁴Caari oni anampisanori oca quipatsi, irointiquea acoajeitaque anampitasanotearo anta inquitequi. ¹⁵Ariorica aquemisantaqueri Jesoquirishito, ocameetsati ancantapinijeiteri itsipapee: “Oshequi icameetsataque Tasorensi, oshequi nopincatsatiri”. ¹⁶Pincanteani pantayetero cameetsayeta-tsiri aisati pincavintsaajeiteri itsipapee: irootaque icoacaajeitaquempiri Tasorensi.

¹⁷Pinquemisantajeiteri yora quenquesatatacaajeitimpirori irineane Tasorensi, pimpincatsajeiteri. Ocameetsati iroamejeitempi iriori cameetsa, pincameetsashirejeitantajeari. Coajica

irisampitavaqueri Tasorensi: “¿Paita poametaqueriri yora piquemisantacaajeitaqueri? ¿Cameetsampa iquemisantaquempi?” Ari incamanteri. Tempa cameetsa iranqueri: “Je, cameetsa iquemisantajeitaquena”. Iro cantaincha eirorica piquemisantiri, incanteri: “Teve inquemisantenaji”, impoji iroasanquetempi Tasorensi. ¹⁸Te nioteji ainirorica nantane, naamaaca te aneroji; iro cantaincha nocoaque pincanteri Tasorensi oncanteata eiro otimantatsi catsini. ¹⁹Aisati pincanteri oncanteataquea nareetitantajempiri aisati, aneavacantajeiri. ²⁰Aisati noncanteri iramitacojeitempi avirori. Niotaque inquemisantena Tasorensi, tempa itasoncacoventajeitaquee: icoaque irisavicacaajeitee cameetsa. Peerani aisati yoitinaanajiri Avincatsarite Jesoquirishito: yora cantacoventajeitaqueeri, amenacoventajeitaqueeri. Yamenacoventajeitaquee, iquempetacari ashitariri irovishate, yamenajeitiri. Icamimentajeitaquee ayojeitantacari queario icantaqueeri Tasorensi: “Noavi-

sacojeitempi, nosavicacayempi aca nonampiquica, pincantaitiyempani”. ²¹Nocantaqueri: “Poameetsatasanojeiteri noshaninca, pimatacayeri cameetsayeta-tsiri irantajeitantempirori maaroni picoacaajeitaqueriri: tempa iquemisantajeitaqueri Jesoquirishito”. Aisati nocantajeitimpi avirorije: “Pimpincatsatasanojeiteri Quirishito, pincantaitiyempani. Aitaque ancantajeiteari”.

Ivecarataquero isanquenare.

²²Noshaninca, te oshequiteji oca nosanquenajeitimpiri: pinquenqueshiretasanojeitero. ²³Piojeitaque yoinminqueetaqueri Timoteo caravosoqui, iro cantaincha isotoanaji meeca. Ariorica jentsipaite irareetea aca, nontsipatanajeiri ara pinampiqui, noneajeitapaajempi. ²⁴Novetsajeitacari maaroni quenquetsatcantatsiri aisati maaroni ayemisantaririnte. Ivetsajeitaquempi maaroni itariasati. ²⁵Nocoaque incavintsajeitempi Tasorensi, maaroni. Aitaque incanteari. Ari ocarati.

ISANQUENATIRI SANTIACO

Yovetsajeitari Santiago ijorioririnte.

1 ¹¿Savicajeitatsimpi, nojorioririnte, maaroni? ¿Tecatsimpa oyempine? Meeca nosanquenajeitaquempiro, maaroni jayetanaintsiri pashinipeequi nampitsi. Narotaque Santiago sanquena-jeitaquempirori oca, narotaque antaveetiniriri Tasorentsi aisati Avincatsarite Jesoquirishito. Novetsajeitaquempi, maaroni.

Icantiri: “Ariorica ompomerentsitimojeitempi paitapeerica, iro cantaincha pinquemisantasanojeite”.

²Meeca, noyemisantaririnte, noncamantempi: ariorica ompomerentsitimojeitempi paitapeerica, ocameetsati pinquimoshiretasanojeitanaque catsini.

³Piotasanojeitero oca: ariorica ompomerentsitimotempi, paventeari Tasorentsi, ari iramitacotaquempi pinquemisantasanojeitantajeari, pincanteani. ⁴Cameetsa pincantaitatiyempani pinquemisantasanojeite, impoiji pincameetsashirejeitanaque, pivetsicashireasanojeitanaquea: pimajeitantarori maaroni icoacaajeitaquempiri Tasorentsi.

⁵Terica piotero icoacaimpiri Tasorentsi, pincanteri: “Piotacayena paitarica pincoacayenari”, ari irimataquero iriotacaasanotempi, eiro ishemimpitsi.

⁶Iro cantaincha, ariorica pincanteri, cameetsa pinquenqueshiretasanojeite: “Niotaque iquemaquena Tasorentsi,

irimataquenaro oca nocoacotiriri”. Eiro pitseencajiritsi. Ainiro itsipapee quenque-tsatacaavetariri Tasorentsi, iro cantaincha itseencanti. Timatsi icoacovetariri, iro cantaincha yaamaaca eiro iquemiritsi. Iquenqueshirevetaca: “Meeca iquemaquena Tasorentsi”, iro cantaincha impoiji iquenqueshiretaca: “Te inquemnaji Tasorentsi”. Ari iquempetacaro ora otavoncare anta incajarequi. Otatsincajataquero tampea, ojocajataquero, opiapinitantari. ⁷Quearioya, piquempetaricari yora tseencantatsiri. Eiro pijititsi irayero iriori paitapeerica incoacovetariri Avincatsarite. ⁸Yora tseencapinitatsiri, iperaventajeitacaro maaroni yantayevetari.

⁹Ainiro oshequi ayemisantaririnte caari ashitaarantacha, iro cantaincha ocameetsati inquimoshiretasanojeitanaque: tempa inecameetsataqueri Tasorentsi iriori.

^{10,11}Aisati ocameetsati yora ashitaarantachari iriveshirementajeiteari Avincatsarite; eiroquea iveshirementarotsi yashiyetari, tempa eiro osamanititsi incamanteari, irijocayetanaquero maaroni timimovetariri. Ocameetsati iriote iquempetacaro oteaquei tojari: oshintsiti ocamapiniti. Ocameetsaitetanaque, iro cantaincha impoiji ijenoquitapaaque catsirincaiteri, icatsirincatanotapaaque. Oshimpeshitanaque tojari; oshimpetanaque oteaquei, aisati ojireanaque. Pineaquero, eiro osamanititsi incamanteari yora ashitaarantachari,

irijocajeitanaquero maaroni timimovetari. ¹²Ariorica pincoajeivetea pantero caari cameetsatatsi, iro cantaincha eirorica pantiro, pinquimoshiretasanotanaque, aisati impinatasanotempi Tasorentsi: irisavicacaasanotempi anta inampiqui iriori, pincantaitiyempani panee anta. Aitaque icantitarini: “Nosavicacaajeiteri anta inquitequi maaroni nintasanojeitanari”.

¹³Ariorica pinquenqueshiretea pantero caari cameetsatatsi, eiro picantashitatsi: “Icoacaaquenaro Tasorentsi”. Pamene, te incoyeji Tasorentsi irantero irinti caari cameetsatatsi, aisati te incoacayeriji itsipapee irantero. ¹⁴Ariorica anquenqueshiretero antero caari cameetsatatsi, impoiji ancoanaque antero. ¹⁵Impoiji, ariorica ancoaque antero, antasanotaquero; ontimanteari antseenque, aisati ajatanteari Sharincaveniqui.

¹⁶Eiro picomitarotsi, noyemisantaririnte nonintasanotiri. ¹⁷Iriotaque Tasorentsi cavintsaajeiteeri, pasanojeiteeri maaroni cameetsasasanotatsiri. Iriotaque vetsiquiriri catsirincaiteri, cashiri, impoquiropee, maaroni timayetatsiri. Te impashinitapiniteji Tasorentsi, irosati icantani icavintsaanojeitaquee. ¹⁸Icoaque Tasorentsi ashanincajeiteeri, irootaque itomintantaqueeri. Itimacaaqueero irineane, oametasanojeitaquee queariotasanoatsiri. Aquemisanotaquero, irootaque itomintantaqueeri. Ijivajeitaquee arori, iro cantaincha impoiji intomintajeiteeri oshequi itsipapee atiri aisati.

**Jero oca icoacairiri Tasorentsi
quemisantatsiri.**

¹⁹Piojeitavaquero oca, noyemisantaririnte nonintasanotiri: ocameetsati ajivate anquemero icantaqueeri itsipa, eiro ashintsititsi aneanateri, eiro ashintsititsi anquishea. ²⁰Ariorica anquishea, tecatsi ancantea anteneri Tasorentsi cameetsatatsiri. ²¹Irootaque nocantantimpiri: te

pincameetsashirejeiteji. Te oncameetsateji catsini pantayetaqueri: pojocasanojeitajero maaroni oca. Pishiretearo cameetsa irineane Tasorentsi, oca piquemaqueri. Ariorica pinquemisantasanotero, ari oavisacotaquempi. ²²Pimatasanotero ocamantimpiri irineane: eiroquea piquemashitarotsi, oncanteaquea eiro pamatavitantajatsi avisati. Te oncameetsateji pinquemashitearo, irointi pinquemisantasanotero. ²³Yora quemashitarori, yora caari antasanotiro ocantaqueri, te iriotasanoteji jaoca icanta; yatsipetacaro iquemavetaro, te inquenqueshiretajeeroji aisati. Ishiaqueri amenavorovetachari amenaarontsiqui: ²⁴yamenavoroveta ivoroqui, impoiji ijatanaji, te inquenqueshiretajeaji aisati jaocarica ocantacari ivoro. ²⁵Iro cantaincha yoavisacojeitaquee ainti, irootaque ocameetsatantari ancantaitiyempani anquenqueshiretapinitero irineane Tasorentsi itimacaaqueeneri: tempa ocameetsasasanoti. Eiro aquemashitarotsi, irointiquea amayetero ocantayetiri, anquimoshirejeitantajeeri.

²⁶Ariorica ajitashitaquea queario aquemisanti, iro cantaincha ariorica aquisatsapinitiri itsipapee, amatavitaja arosati: tequera anquemisantasanoteji, irointi atspetashitaca aquemisantamempeaca. Pineaquero, icoaque Apa Tasorentsi ayojeite eiro ashintsitsatiritsi ashanincapee. ²⁷Icanti ariorica anquemisantasanotanaque, ancavintsayeri yora ashinoncaincari: yora jananequi camatsiri iriri, iriniro. Aisati ancavintsayero camajimentaaro, eiro antayetirotsi yantayetiri tseencantatsiri. Irootaque icoacaanojeiteeri Tasorentsi.

Cameetsa anintavacaajeitea.

2 ¹Tempa, noyemisantaririnte, piquemisantajeitiri Avincatsarite Jesoquirishito. Icameetsasasanoti irinti. Te incoacayempiji pincavintsaapinitashi-

teari apaniro yora ashitaarantachari, irinti caari ashitaarantacha pipincashirea-queri. ^{2,3}Anta papatopapinijeitanta: ariorica iqueapaaque quitsaatachari cameetsari iitsaare, yaniyotaro pinatasa-notachari oro. Irio pineacameetsatava-queri irinti, picantavaqueri: “Jeroa savicamentotsi cameetsari, pisavicapee”. Ariorica iqueapaaque caari ashitaarantacha, quitsaatachari maatsaraantsi, pipincashireaavaqueri, picantavaqueri irinti: “Ari ara pincatiapee. Tecatsi pisavicanteari”. ⁴Aparopee pineacameetsajeitiri, itsipapee pipincajeitaqueri. Te paacameetsatavacaajeitea: tempa pijiveta pinashijeita, irootaque pipincavacaantacari. Te oncameetsateji oca piquenqueshirejeitiri.

⁵Pinquemisantena, noyemisantaririnte nonintasanotiri. Tempa icoyeaqueri Tasorentsi yora caari ashitaarantacha inquemisantasanotanteariri iriori, irisavicanteari anta ipincatsaritinta. Icanti: “Nosavicacaajeitiri aca nonampiqui maaroni nintajeitanari”. ⁶Irompa avinti, pipincashireaqueri yora caari ashitaarantacha. Tempa irio ashitaarantincari quisajeitaquempiri. Tempa irio oashinoncaapinijeitimpiri, coatsiri iroiminqueacantapinijeitempi caravosoqui. ⁷Tempa iriojeitaque cantimatiriri Jesoshi. Ja, irinti, icameetsatasanoti, iriotaque cavintsaajeitaquempiri.

⁸Timatsi icantitacani Avincatsarite: “Oquempetaca avisati cavintsaajanca, aisati pinquempejeiteri itsipapee, pincavintsaajeiteri iriori, paacameetsajeiteri”. Ariorica pimataquero oca, ocameetsatasanoti. ⁹Iro cantaincha ariorica pipincashireaqueri ashinoncaincari, te paacameetsatavacaajeiteaji: te oncameetsateji oca. Tempa ocanti Sanquenarentsi: “Terica paacameetsatavacaajeitea, ainiro pantane”. ¹⁰Pimoncarataqueroricame maaroni ocantiri isanquenatiniri

Moishishini, iro cantaincha otimirica aparo caari pimoncarati, ainiro pantane: oquempetaca tecatsi meeca pimoncaratea. ¹¹Icantini: “Eiro paimentarotsi pijina. Eiro paimentaritsi pijime”. Irisati cantatsiri: “Eiro poanti”. Terica paimentearo pijina, terica paimenteari pijime, iro cantaincha ariorica poanti, ainiro pantane: te pimpincatsateroji icantayetiniri peerani Moishishini. ¹²Coajica, ariorica incantacoventempi Quirishito, tempa incavintsasaanotempi. Aisati pinquempejeiteri maaroni pishaninca: pincavintsasaanojeiteri itsipapee, cameetsa pineshinoncatsateri. ¹³Eirorica pineshinoncatiritsi itsipapee, eiro ineshinoncatimpitsi avrori Quirishito. Ayojeiti ineshinoncatapinitaquee, irootaque eiro atsaroajeitantatsi ariorica incantacoventajeitaquee.

**Ariorica aquemisantasanotaqueri
Tasorentsi, anteneri icoacaaqueeri.**

¹⁴Pamene, noyemisantaririnte: icantashitarica ashaninca: “Noquemisanti”, iro cantaincha terica incavintsayeri itsipapee, ¿ocameetsatimpa? Te, te oncameetsateji. Tempa iqemisantashiveeta: ¿jaoca incanteari iravisacotantajeiri? ¹⁵Ariorica piotaque ocoiteimotacari piyemisantaririnte iitsaare aisati iroyeari, pincavintsayeri. ¹⁶Eiro picantashitaritsi: “Cameetsayea pijate. Cameetsa pinquitsaatea. Cameetsa pinquemaquea”. Eirorica pipavaqueritsi oca coiteimotacari, ¿picavintsasaanotirrimpa? Te. ¹⁷Pineaquero, ariorica aquemisantashita, terica aneshinoncatari itsipapee, te oncameetsateji: atsipetashitacaro aquemisantamempeaca.

¹⁸Intimerica cantempineri: “Piquemisantashiveeta avinti; irompa nainti, nantaveetiniri Tasorentsi icoacaaque-nari”. Queario irinti icantaqueri. Eirorica pantaveetiniri Tasorentsi, ¿jaoca

oncanteari piotacantenari piquemisanta-
sanotiri? Cameetsa nantaveetiniri nainti,
piotanteari noquemisantasantotiri.

¹⁹Pishirevetaro apaniro ini Tasorensi, ari
cameetsa. Aisati ishirenirojeivetaro iriori
camaaripee, irootaque itsaroanirotanta-
cari, ipioncanirotantacari; iro cantaincha
eiro yavisacotajitsi. ²⁰Tempa, noshaninca,
ontime piotantari. Tempa pincoyeji piote.
Eirorica antaveetiniri Tasorensi icoacaa-
queeri, atsipetashitacaro aquemisanta-
mempeaca. ²¹Pinquenqueshireteri yora
ashanincani intacaroniri: yora
Avaramani. Iroaquenerime Tasorensi
Isaca anta yoapinitinirinta virantsipee.
Tempa irootaque icantantari Tasorensi:
“Noneacameetsataqueri Avarama”.

²²Pineaquero, te inquemisantashiveteaji,
iointi yantaveetiniri Tasorensi aisati
paitapeerica icoacaqueriri. Yantaveeti-
niri, irootaque omoncaratantacari
iquemisantasantaque. ²³Omoncarataca
sanquenarentsi, cantatsiri: “Iquemisantiri
Avarama Tasorensi, irootaque icantanta-
cari Tasorensi: ‘Noneacameetsataqueri
Avarama’”. Aisati icanteeti: “Iro
Avarama inintane Tasorensi”.

²⁴Pineaquero. Ariorica apatiro
onavetea inquemisantamempeempa atiri,
tecatsi incantea Tasorensi irineacamee-
tsateri. Irompa ariorica inquemisantasa-
noteri aisati irantaveeteneri icoacairiri,
ari irineacameetsataqueri. ²⁵Aisati
oquempetaca Arava: ora neavintsatapini-
vetariri pashinipee shirampari anta
Jericoqui. Ocavintaajaaitavaqueri
maaroni yora itiancanepee Josoe.

Onijavaqueri pashini avotsi inquenanta-
naqueari irishiapitsatantanaqueariri yora
quisaqueeriri. Oca antaqueeneri Tasorensi,
irootaque ineacameetsatantacarori.

²⁶Eirorica aneencajitsi, tempa camasano-
taquee anaque; aisati oquempetaca,
eirorica antiniritsi Tasorensi icoacaave-
teeri, te anquemisantasantejei.

**Ariorica aneaveetashitea,
antirocari caari cameetsatsi.**

3 ¹Pamene, noyemisantaririnte,
noametanti narori. Coajica, ariorica
incantacoventajeitee Tasorensi,
incantena: “Pamene, oshequi poamejeive-
tacari itsipapee: ¿paita caari pimatantaro
avirori picantavetacariri iriori? Oncamee-
tsateme pimatasantoterome avinti”.
Tempa piotiro. Irootaque nocamantan-
timpirori oca: eiro picoashitatsi
poametante. Icoasantaque Tasorensi
pimajeitero maaroni picantaqueri.
²Tempa aneanatantajeitaro caari
cameetsatsi. Intimericame caari
neanatantaro caari cameetsatsi,
iriotaque cameetsasananotsiri catsini;
iotaque yantapinitaqueero cameetsatsiri,
paitapeerica yantayetiri. ³Atimpatacota-
pinitiri cavayo ivantequi iquemisanta-
teeri. Orijaniqui onaveta atimpatacotan-
tariri, iro cantaincha amatantacari
aquenacairi anteari cavayo. ⁴Pinquenque-
shiretero aisati antearo pitotsi. Antearo
onaveta, aaveaquero antearo tampea
aanaquero. Iro cantaincha oquenacaana-
quero oomarojaniqui, jaocarica inintiri
yora comatirori. ⁵Aisati oquempeta
anene: orijaniqui onaveta, iro cantaincha
oshequi omayeti: irootaque avametanta-
riri atiri, aisati aquisatsatacantariri.
Oquempetacaro amorecaque paamari,
capichaji onavetaca, iro cantaincha
omataquero otaaquero antearo ovaantsi.
⁶Aisati oquempetacaro, ariorica capichaji
ancante, iro cantaincha aquisacaajitacari
oshequi atiri, antacaajitacari caari
cameetsatsi. Tempa iriotaque sharinca-
venisati oamejeitaqueerori aneanatantaro
caari cameetsatsi, irootaque oshequi
aquisavacaajitantacari.

⁷Ari ayojeitaque avamejeitaqueri
poshiniripee, tsimeripee, maranque,
shimapee, maaroni. Avamejeitaqueri,

avirajeitari. ⁸Iro cantaincha te intimeji oametachane irisati irimajerete eiro ineanatantaro caari cameetsatatsi. Ashi airo aneanatantaro caari cameetsatatsi. Oashinoncaajeitaquee piantatsiri, ari oamaaquee irerorica, iro cantaincha aisati oashinoncaajeitaquee caari cameetsatatsi aneanatashiyetari, irootaque ijajeitantacari oshequi atiri Sharincaveniqui. ⁹Acantapinitaque: “Icameetsatanoti yora Apa Avincatsarite”. Iro cantaincha aisati acantimanirotiri atiri: tempa ishiavetari iriori Tasorentsi. ¹⁰Otimi avante aparoni, iro cantaincha irootaque aneshinoncatantariri ashaninca, aisati aquisatsantariri. Te oncameetsateji, noyemisantaririnte, anconoayetero aneshinoncatsateri aisati aquisatsateri. ¹¹Noshiacantempiro: anta osoquijatiro omoronaja nija, ariorica opochajati, ariorica ocachojati. ¿Arimpa omataquero pochajari aisati cachojari, apite? ¹²¿Arimpa omataquero naranca ontimantearo manco oitsoqui? ¿Arimpa omataquero ova ontimantearo oitsoqui iyera? Aisati eiro omatirotsi cachojari ompeajea pochajari. Aisati aquempejeitaro: terica ancameetsashirete, eiro amatirotsi aneanatapinitero cameetsayetsatsiri.

Iquenquetsatacotiro iotantari.

¹³¿Piotimpa piquenqueshireta? ¿Timatsimpa piotantari? Ari cameetsa pintime: eiro pishemetitsi, irointi cameetsa pineshinoncatante, cameetsa aisati pinquenqueshiretaquea. ¹⁴Ariorica pinquisashiretasanotaqueri itsipapee, aisati ariorica pincatsimashireaqueri, eiro pishemetitsi. Eiro pamatavitantitsi: eiro pijitashitatsi picameetsati, eiro pijititsi pioti. ¹⁵Ariorica pantaniroyetaquero oca caari cameetsayetsatsi, te irio oametempirone Tasorentsi, irinti atiri oametempirori, aisati camaari. Te iro oametempirone

Ishire Tasorentsi. ¹⁶Pineaquero, ariorica pinquisashireavacaaquea, ariorica pincatsimashireavacaaquea, eiro pimatirotsi pisavicajeite cameetsa, irointi pantapinijeitero caari cameetsatatsi, maaroni. ¹⁷Iro cantaincha ariorica irinintacaquempiro Tasorentsi ontime piotantari, pincameetsashiretanaque, eiro piquisatsi, pincavintsante, eiro pipiatsataritsi itsipapee, pashi poyero pineshinoncatante, poameetsatanotero maaroni pantayeteri, eiro pitseencashireritsi itsipa, eiro pamatavitantitsi. ¹⁸Paitarica apanquitiri, ayero oitsoqui. Aisati oquempetaca, ariorica cameetsa ancavintsanaqueri itsipapee, ari irineacameetsataquee Tasorentsi.

Iquenquetsatacotiri caari coatsine incavintsante.

4 ¹¿Paita piquisavacantajeitaro? Tempa pineveyetaro vaararontsi, irootaque piquisavacaajeitantacari. ²Picoajeivetacaro paitapeerica, iro cantaincha te payeroji. Poantaque. Pineveyetaro yashiyetari itsipapee, iro cantaincha te payeroji, irootaque piquisavacaajeitantacari. Iro caari paantaro picoayevetari, te pincantasanoteriji cameetsa Tasorentsi. ³Picantavetari, iro cantaincha caari paasanotanta, te oncameetsateji ora picoasanovetacari: picoaveta pincavintsayea avisati. ⁴Pishiaquero aimentariri ojime: ocoaqueri pashini shirampari, oquisaqueri ojime. Ariorica pinintayetiro maaroni timayetsatsiri quipatsiqui, piquisaqueri Tasorentsi. Maaroni nintatsiri irishanincateari tseencantatsiri iquishiri Tasorentsi. ⁵Jero oca ocantiri sanquenarentsi: “Itiancajeiteero Tasorentsi Ishire iriori, iro cantaincha meeca icavintsaasanotaquero: te incoyeji antseenquero”. Te oncantashiteaji sanquenarentsi, te antsipetashiteaji osanquenataca. ⁶Oshequi ineshinoncata-

sanojeitaquee Tasorensi, irootaque ocantantacari sanquenarensi oca: “Iroashinoncayeri Tasorensi yora shemetatsiri, iro cantaincha ineshinonca-jeitaqueri yora caari shemetatsine”.

⁷Irootaque nocantantimpiri: pishineta-cotea, paitarica irinintacaaquempiri Tasorensi. Irintiquea camaari, pimpiateari, impoiji ari irojocanjempi.

⁸Pinquenqueshireteri Tasorensi, quiso iroantempiri irinti. Pantapiniveitaroni caari cameetsatatsi: meeca pojocajero maaroni oca pintimantajeari cameetsa. Oshequi pitseenquirini Tasorensi; pincanteri meeca: “Poameetsashiretajena, pinquenqueshiretacayenaro cameetsatatsiri”. ⁹Pinquenqueshiretajea, poashiretea; te oncameetsateji maaroni pantapinitiri. Pishirontimentavetacaro caari cameetsatatsi: oncameetsateme poashiretanaqueame; piquimoshireventavetacaro: oncameetsateme poashiretasanotanaqueame, irointi. ¹⁰Pincanteri Avincatsarite: “Te noncameetsateji, te nomatimateroji cameetsayetatsiri. Nocoaque pincavintsayena”. Ari incavintsaquemp, iroameetsatajemp, iramitatocempi.

¹¹Eiro, noyemisantaririnte, picantimatavacaaajatsi. Ariorica pincantimateri pishaninca, aisati ariorica pincante ainiro irantane, pitseencaquero isanquenareni Moishishi. Tempa ocanti: “Pinintavacaa-jeitea”. Iro cantaincha picanti avinti: “Te oncameetsateji ocantiri isanquenareni Moishishi. Te noncoyeji nonintavacaa-jeitea”. Ariorica pincante: “Te oncameetsateji isanquenareni”, te pinquemisanteroji, irointi pitseencaquero. ¹²Pamene, apaniro icantacantanti irinti Tasorensi, aisati apaniro icantacoventajeitaquee maaroni. Oshequi ipincatsariti. Irio matirori yoavisacojeitiri quemisantiriri aisati intianqueri tseenquiriri Sharincaveniqui. Aviroquea, avinti, çjanicampa cantanirontimpiri: “Pincantimateri pishaninca”?

Isanquenatacotiri yora iomparitachari aisati ashitaarantincari.

¹³Pamene, picantayeveta: “Meeca nojate nampitsiquinta: terica meeca, ari osaitequera nojatananote. Anta noavisaita aparoni osarinti: niomparitea, oshequi naye paitapeerica”. ¹⁴Iro cantaincha te piotacoteaji osaitequera, paitarica oyempineri. Aneavetatsimpi meeca, iro cantaincha piquempetacaro mencorijenca. Te osamaniteji omencoritee, impoiji jentsipaite opeanaja. Aisati avirori, eiro osamanititsi irosati pincamanteari. ¹⁵Irointiquea pincante: “Ariorica irinintacaaquena Avincatsarite, eirotsitarica nocamitsi, ari nomataquero coajica paitapeerica”. ¹⁶Pamene meeca, oshequi pishemeti, pineacameetsatashitaja avisati: te oncameetsateji. ¹⁷Ariorica pivotaroro cameetsatatsiri, iro cantaincha te pimateroji, ainiro pantane.

Jero oca icamantiriri yora ashitaarantincari.

5 ¹Meeca, ashitaarantincari, noncamantempi: piraajeitea coajica, pincavintsaajeitea, irotaintsi oshequi pinquematsicajeitearo. ²Ompatsaayetanaque maaroni pashijeivetari. Intsonquitatejempiro sancori piitsaarepee. ³Oyechariyetanaque maaroni ashiryetatsiri pashiyevetari: oro, perata, maaroni. Ariorica oyechariyetanaque, irioyeetempi pipiotashitacaro, iro cantaincha te pimpinateriji yora patiritepee. Ontsoncaquea ashiryetatsiri, aisati avirori, pijate Sharincaveniqui, eiro pineajirotsi aisati pashijeiveitaniri. ⁴Pamene, pamatavijetaqueri maaroni patirite, te pimpinatasa-noteriji, irootaque pipiotantarori pivaararo oshequi. Iquisatsajeitaquempipatiritepee. Iotaquero Avincatsarite: tempa ipincatsariventajeitiri maaroni timajeitsiri. Ioti te pincavintsanteji,

irootaque iroasanquetantempiri. ⁵Avisati quenqueshireacotajancha, te pinquenqueshireteriji itsipapee iriori, piveshireimentaro pashiyetari. Noshiacantempiro: ariorica inquejitaque pivira, ari pincanta-jeiteri pishaninca: “Tsame ayeri novira; quejitaque, moncarataca avanteariri”. Aisati iquempetaca Tasorentsi, icanti: “Oshequi timimojeitiriri, moncarataca noasanquetanteariri”. ⁶Poashinoncaasanoaqueri cameetsayetsirsi: te pimpashitimateariji coiteimojeitacariri, irootaque icamantacari, torein; iro cantaincha te inquisavetempiji. Irintiquea meeca quishempineri Tasorentsi.

Paamayempari Avincatsarite.

⁷Noyemisantaririnte, paamayempari Avincatsarite, irosati impocantajeari. Pinquenqueshireteri yora panquiveetsirsi, yoyeaquero ivanquire oitsoquitantajeari. Oparii incani, yoyeaquero. Osamani aisati, ari oparijai aisati. Coajica, ariorica ontimanaje oitsoqui, oshequi ontimanaque ovinaro, impoiji iroveshireimentearo panquitirori. ⁸Aisati avirori, pincanteani paamaajeari Avincatsarite, eiro osamanititsi impocantajeari: piveshireimenteari. ⁹Eiro, noyemisantaririnte, picantimatavacaajei-tatsi. Ariorica pincantimatavacayea, icantimpicari: “Ainiro pantane”. Quempejitapaaque meeca yora Cantacoventajetaqueeri, irotajantsi impocaje. ¹⁰Pinquenqueshireteri yora camantantatsiniri peerani. Itiancaqueri Avincatsarite, irootaque iquenquetsatacotantariniri. Peerani ipomerentsiventinirini, peerani yaamaacarini iriori Avincatsarite impocanteari. Meeca, aisati pishiajeiteri avirori. ¹¹Pamene, ariorica pinquearioventeneri Avincatsarite paitapeerica, pinquimoshiretanaque. Ontimerica pinquematscatimenteariri, iro cantaincha pinquimoshireventeri. Piquemacojei-

taqueri Joponi, iquearioventiniri Avincatsarite maaroni yantayetiniri. Impoiji icavintsaqueri, aisati ineshinoncataqueri. Piojeiti yashi yoiro icavintsanti, ineshinoncatanti.

Eiro picantashitatsi.

¹²Pamene, noyemisantaririnte. Paitapeerica pinquenquetsatacoteri, ariorica pintseeeya, eiro catsini picantashitatsi: “Ioti Tasorentsi otampaticati nocantiri, terica ontampaticateji oca nocantiri, nocoaque iroasanquetayenata”. Pincanterica: “Ario, nantempiro”, ario pimamatero. Pincanterica “Eiro nantirotsi”, eiro pantirotsi. Eiro catsini pamatavitanti: ariorica pamatavitante, iroasanquetaaquempi Tasorentsi.

Pinquenquetsatacayeri Tasorentsi.

¹³¿Picarajeitirimpa ashinoncaincari? Cameetsa pincanteri Tasorentsi incavintsayeri, iroavisacoteri. ¿Picarajeitirimpa quimoshiretatsiri? Pincanteri impampayeaventero Tasorentsi. ¹⁴¿Picarajeitirimpa mantsiari? Pincanteri incajemerita yora jivatacaajeitiriri quemisantatsiri. Cameetsa incanteri Avincatsarite iroavisacoteri, aisati intiritapeeri quejitsi. ¹⁵Ariorica inquemisantasanote, ari iravisacotaje yora mantsiari. Irio Avincatsarite oavisacotajerine. Otimirica caari cameetsatsi yantayetiri, aisati incavintsayeri, eiro iquenqueshiretajirotsi aisati. ¹⁶Irootaque noncantantempiri: ariorica pantero caari cameetsatsi, pincamantavacaajea aisati pincantajeteri Tasorentsi: “Pincavintsaajeitena, navisacojeitantajeari”. Yora shirampari yoameetsantiri Tasorentsi, ariorica icantiri, oshequi imatasanotaqueneri. ¹⁷Atiri inaveitani peerani Iriashini, iquempetaquee arori. Icantasantiri Tasorentsi: “Eiro poarijajirotsi meeca incani. Pinquenqueshiretacayeri

noshaninca”. Ari avisanaque mava osarintsi, te ompariajeji incani quipatsiqui. ¹⁸Icantajiri aisati: “Meeca nocoaque poariajero aisati incani”, impoiiji opariaji, aisati oshiocanaji ivanquirepee joriopee.

¹⁹Pamene, noyemisanrarinte: ariorica pincarajeiteri jocavetajearoneri oca queariotasanotatsiri iquemisantavetari, pinquenqeshiretacaajeri, pinquemisanta-caasanotajeri. ²⁰Piojeitero oca: yantaveta-

caro caari cameetsatatsi, iquenashiveetaca, irijateme Sharincaveniqui, iro cantaincha poavisacotajeri eiro ijatantatsi. Otimimotasanovetajeri yantayetiri oshequi, iro cantaincha inquemisantajerica aisati, incavintsayeri Tasorentsi, eiro iquenqeshiretajirotsi aisati yantavetacari.

Narotaque sanquenatimpirori:
Santiago

IJIVATAQUE PETERO ISANQUENATINIRI IYEMISANTARIRINTE

Ivetsajeitari.

1 ¹¿Ainirompi noyemisantaririnte?
¿Tecatsimpa oyempine? Narotaque
Petero sanquenajeitimpirori oca.
Narotaque itiancane Jesoquirishito
noquenquetsati. Nosanquenajeitimpirori
maaroni nojorioririnte, quemisantajeiti-
riri Quirishito, jaocapeerica pisavicajeitiri
anta Pontoqui, Carashiaqui, Caparoshia-
qui, Ashiaqui, Vitiniaqui, maaroni.
²Peerani icoyeajeitaquempi Apa Tasoren-
tsi, icoaque intomintajeitajempi. Aisati
oameetsashirejitaquempi Ishire piquemi-
santantacariri Jesoquirishito: icamimen-
tajeitaquempi, aparajatimentajeita-
quempi iriraja yoavisacotantaquempi.
Nocoaque irineshinoncatasanojeitempi,
aisati cameetsa irisavicacaasanojeitempi.

**Tsame ampasonquijeteri Tasorentsi,
tempa icavintsaasanojeitaquee.**

³Tsame ancamantajeiteri ashanincapee:
“Icameetsasanoataque Tasorentsi: yora
Iriri Avincatsarite Jesoquirishito”.
Icavintsaasanojeitaquee, yashijeitaquee:
oquempevetaca iroaquera atimaji aisati,
irootaque ashaninecatantacariri. Yoitinaa-
jiri itomi, irootaque ayojeitantacari
antinaajeitanaje arori, ancantaitiyem-
pani aneajeitapaaje anta inquitequi.
⁴Ainiro yovetsicajeitaquempiri pisavica-
jeitantapaajeari anta inquitequi.
Oncantaitiyempani ontime, ocameetsa-

tasanoataque, eiro otsoncatsi, ainiro
iquempoyeaquempiro. ⁵Piquemisantajei-
taqueri Tasorentsi, irootaque itasoncaco-
ventantaquempiri; iquempoyeajeita-
quempi irosati impocantajeari. Impoijini
pineajeitero maaroni yovetsicajeitaquem-
piri.

⁶Queario, ariorica ompomerentsitimo-
jeitempi paitapeerica, iro cantaincha eiro
osamanititsi irosati pineantearori
pinampi anta inquitequi. Ariorica
pinquencheshiretero oca, tempa ocamee-
tsati pinquimoshireimentearo. ⁷Ari yora
vetsiquirori oro icotaquero, ojananaca,
impoiiji yojocajiro ovitsijare quipatsi.
Impoiji ineantacaro paamariqui,
iriotantearori iotasanoatatarica oro. Aisati
iriori Tasorentsi ineantapinijeitaquempi
iriotanteari piquemisantasanoatatarica.
Ora oro, oshequi opinavetaca, iro
caincha ompeaquea; irompa ainti
aquemisantaque, eiro apeatsi. Irootaque
ineacameetsasanoatatariqueeri, ariorica
aquemisantasanoataque. Impoiji, ariorica
impoque, incantajeitapaaquee: “Noneaca-
meetsajeitaquempi: pincarajeitena anta
inquitequi, pintsapajeitena ampincatsari-
jeite”.

⁸Tequera pineajeiteri, iro cantaincha
pinintajeitaqueri, piquemisantajeitaqueri,
piveshireimentasanoatataricatsini.
⁹Piquemisantajeitaqueri, irootaque
yoavisacotantaquempiri, pishanincajei-
tantacariri. ¹⁰Peerani yora camantacovei-

tariniri Tasorensi icoajeiveitani irioteme jaoca ancanteari avavisacojeitantajeari. Isanquenatacovetacari Tasorensi, iojeivetani icavintsanti, iro cantaincha te iriotasanoteji. ¹¹Timatsi oamejeitaqueriri Ishire Quirishito, iro cantaincha te inquemasanojeitavaqueroji. Oametaquerini, ocanti: “Oshequi iroashinoncayea, incamaque; impojini impincatsaritanaje”. Iquenqueshirejeitacani: “¿Janicampa oquenquetsatocitiri? ¿Jaoca oncarate impincatsaritantajeari?” ¹²Iro cantaincha icamantaquerini Tasorensi: “Eiro pineiritsi avirori, irintiquea neajerine impoitanajantsineri intimaje coajicani”. Tempa arojeitaque meeca iquenquetsatacotiniri. Meeca otiancaquena Ishire Tasorensi noquenquetsatacaajeitaquempi, nocamantajeitaquempi yoaviscotanti Quirishito. Aitaque icoasanojeiveta inampirepee Tasorensi iriotasanotero jaoca acantajari avaviscotantajari.

Oshequi icavintsaajeitaquee Tasorensi, tsame aveshireimenteari.

¹³Meeca pinquenqueshirejeitanaquea, cameetsa pisavicajeite. Piojeite ariorica impocaje Jesoquirishito aneajeitavaqueri, aisati oshequi incavintsaajeitapaaquee; ari piveshireimentajeiteari. ¹⁴Tempa irio Tasorensi ashijeitimpiri. Ari pinquemisantajeiteri. Peerani te piojeiveitarini, irootaque pantashitantaveitaroniri caari cameetsatsi. Meecaquea piojeitiri: eiro piquempetajatsi aisati. ¹⁵Icameetsasasanaotaque yora coyeajeitakuempiri yoaviscotajimpi: meeca pinquempejeiteari iriori, poameetsantasanoyetero maaroni pantayeteri. ¹⁶Tempa peerani isanquena-yeetironi oca icantitacani Tasorensi: “Nocameetsasasanaotaque narori, irootaque nocoantacari pincameetsasasananaje avirori”.

¹⁷Ari meeca pirintajeitacari: ocameetsati piojeite iojeitaquempi maaroni,

itsoteajeitaquempi. Ari incantacoventempi, inquenqueshirejeiteiro jaoca ocantari maaroni pantajeitiri. Ocameetsatirica, ari iraacameetsatempi. Terica oncameetsateji pantayetiri, iroasanquetayempi. Pimpincatsajeiteri meeca, cameetsa pisavicajeite irosati preejeitan-teari inquitequi. ¹⁸Peerani patsipetashiveitaroni pantashiveitaroni yamejeitaniri ajorioririnteni, iro cantaincha yoavisoajeitaquempi Tasorensi. Te impinaventempiroji perata aisati oro yoaviscotantimpiri. Te oncanteji, coajica ari onsoncayea iroori. ¹⁹Irintiquea itiancaqueri itomi, yora inintasanotiri catsini. Icamintaquempi irinti, aparajatimantaquempi iriraja pavisacojeitajari. Ariorica yantiro ajorioririnte caari cameetsatsi, yamejeitari yoiniri Tasorensi ovisha, itaquereni. Apatiro yoiniri cameetsasasanotatsiri ovisha. Aisati iquempetaca iriori Quirishito, icameetsasasanaotaque: tecatsi irantane. ²⁰Peerani, tequerani ontimeni quipatsi, icantini Tasorensi: “Coajica nontianqueri notomi quipatsiqui iroavisojeiteiri atiripee”. ²¹Ari ipocaque, icamintajeitaquempi, impoiji yoitinaajiri Tasorensi, yaanajiri aisati anta ocameetsaitetinta. Meeca piojeitaque queario icavintsaasanojeitaquempi, ari cameetsa pinquemisantajeiteri, piojeite iriootaque savicacajeitempineri anta inquitequi.

²²Ari piquemisantaquero maaroni yoamejeitaquempiri Tasorensi, tempa otampaticasasanaotaque maaroni icantaqueri. Meeca yoameetsashirejeitaquempi, aisati icoacajeitaquempi pinintasanojeiteiri maaroni piyemisantarinte. Pinquearioventero, pinintavacaasanojeitea catsini. ²³Peerani otimimpipi piniro, meeca piquempejeitacari ashijeitimpiri, pincamajeite avirori. Iro cantaincha meeca piquemisantaquero irineane Tasorensi, ocantani otimi. Aisati

yashijeitajimpi, piquempejeitajari iriori: pincantaitiyempani pintime inquitequi.

²⁴Tempa ocanti Sanquenarentsi:

“Ashiaquero tojari: oshintsiti ocami, oshintsiti opatsai. Timatsi amajeivetacari, iro cantaincha oquempetaca oteapee tojari: ompeajea, onsoncajea. ²⁵Iro cantaincha oncanteani ontime irineane Avincatsarite: eiro opeatsi irointi”.

Irootaque irineane noamejeitaquemperi: icavintsaajeitaquee Tasorensi, yoavisacojeitaquee. Tempa ocameetsataque.

2¹Meeca eiro piquisatsi, eiro pamatavitanti, eiro pishemeti, eiro paamaari pishaninca, eiro picantimatiritsi. ²Yora iroaquera timatsi yatsotapinitiro otsomi iriniro, irootaque iqueveantacari. Aisati meeca avirori, pincoasanotero irineane Avincatsarite: pineanatapinitero, pinquenqeshiretapinitero, piotasanotanteariri iriori. ³Tempa piojeitaque icavintsaasanojeitaquempi, ineshinoncajeitaquempi. ⁴Ariorica avetsiquero mapipanco, ajivatero avatiyero quisotacayerone mapi avanquetantearori oshanincapee. Eirorica otimi, eiro oquisotitsi pancotsi. Iriotaque Quirishito shiaquerori mapi, iro cantaincha yaneasanoti irinti, aisati yoaneajeitaquee arori. Itseencajeivetacari ashanincapee, iro cantaincha inecameetsatasanotaqueri Tasorensi irinti. Eirome itimime, eiro avavisacotajame. ⁵Avirojei, piquempejeitacaro mapipee yoanqueyeetaqueri jenioquiji. Yoaneajeitaquempi avirori, pincantaitiyempani anta inquitequi. Piquempejeivetacaro pancotsi, isavicantari Tasorensi; pantajeiteneri maaroni icoacajeitaquemperi. Piquemisantajeitaqueri Jesoquirishito, irootaque inecameetsatantarori maaroni pantajeitineri. ⁶Irootaque ocantiniri Sanquenarentsi: “Icanti Tasorensi: ‘Nontianqueneri joriopee Quirishito, oshequi noneacameetsataqueri. Nocoyeaqueri iroavisacojeiteri

maaroni quemisantajeiterineri, eiro yashinoncaajatsi iriori’”.

⁷Avirojeitaque quemisantajeitiriri, tempa pineacameetsajeitaqueri.

Irintiquea maaroni tseencajeitiriri, te irineacameetsateri. Oquenquetsatacotaquerini Sanquenarentsi, ocanti: “Yora vetsiqueronemeri pancotsi itseencaquero mapi, icanti: ‘Te oncameetsateji’. Iro cantaincha inecameetsatasanotaqueri Tasorensi.” Pineaquero, itseencajeitaqueri jorio Quirishito, iro cantaincha inecameetsatasanotaqueri Tasorensi.

⁸Aisati ocanti Sanquenarentsi: “Yora Quirishito ishiaquero mapi itsitincacari atiri ipariantacari. Queario, te iriojeitavaqueri, icomijeitavacari”. Pineaquero, jero oca ishiacantaqueri: iro caari iojeitantari, te inquemisanteroji icantavetacari Tasorensi, irootaque iroasanquetaajeitanteariri. ⁹Iro cantaincha icoyeasanojeitaquempi yoavisacojeitantaquemperi. Pantaveejeitiniri yora Pincatsarisanori. Yoameetsajeitaquempi, pishanincatasanojeitacari Tasorensi. Te piojeiveiteani, oquempetaca pitimini meeca tsiteniriqui; iro cantaincha icoyeajeitaquempi, iotacaasanojeitaquempi, oquempetaca pitimi meeca quitaiteriqui. Meeca icoacaaquempi pincamantajeiteri atiri: “Ocameetsatasanotaque yantajeitaqueeneri Tasorensi”. ¹⁰Peerani te pincameetsaveiteani, iro cantaincha meeca pishanincajeitacari Tasorensi. Peerani te piojeiveiteani icavintsaavetaquempi, meeca piojeiti, piveshireimentajeitacari.

Cameetsa pisaviquimojeiteri itsipapee atiri.

¹¹Noshaninca, piojeitaque nonintajeitaquempi. Te pishanincatasanojeiteariji yora pisaviquimojeitiriri, tempa pinampitanotearo inquite. Eiro pantashiyetarotsi caari cameetsayetatsi yantayetiriri itsipapee atiri iriori. Ariorica pantashiyetearo, eiro picameetsashiretitsi. ¹²Icanta-

shijeiveta itsipapee atiri: “Te incameetsa-
jeiteji joriopee”, iro cantaincha cameetsa
pisavicajeite, iriojeitanteari queario
piquemisantajeitaqueri Tasorentsi.
Impoiiji inquemisante iriori, aisati ariorica
impocapaaje Quirishito, incantajeite:
“Tempa icameetsataque Tasorentsi”.

**Pinquemisantajeiteri
pincatsariventajeitiriri pishaninca.**

¹³Ariorica piquemisantaqueri Avinca-
tsarite, ocameetsati pinquemisantajeiteri
aisati iriori pincatsariventajeitimpiri aca
quipatsiqui. Pinquemisantajeiteri yora
pincatsariventajeitiriri maaroni savicajei-
tatsiri, ¹⁴aisati pinquemisantajeiteri
maaroni itiancaneppee. Itianquiri iroasan-
quejeiteri caari cameetsatsati irisavica-
jeite. Irintiquea cameetsatsatsiri isaviqui
irineacameetsateri. ¹⁵Ainiro caari iotiri
Tasorentsi, icantimatiri quemisantatsiri.
Irootaque icoantacari Tasorentsi pisavica-
jeite cameetsa inquenqueshirejanteari,
irimajerejanteari. ¹⁶Ari piquemisanta-
jeitaqueri Tasorentsi, meeca te incoyeji
imperanajeitimpi iriori pinquemisantajei-
teri pincatsariventajeitimpiri aca
quipatsiqui, tempa ocameetsati piotashi-
tea pimpincatsajeiteri. Te oncameetsateji
pantajeitero caari cameetsatsati. ¹⁷Paaca-
meetsajeiteri itsipapee atiri, pinintajeiteri
ayemisanrarinte, pimpincatsajeiteri
Tasorentsi, aisati pimpincatsajeiteri yora
pincatsariventajeitiriri pishaninca.

Yoamejeitiri nampirentsipee.

¹⁸Nampirentsi, pinquemisantajeiteri
yora nampitimpiri, pimpincatsajeiteri.
Eiro apaniro pipincatsatiri cavintsaa-
quempiri, neshinoncatimpiri; irinti
pimpincatsateri aisati peranatimpiri,
quishimpiri. ¹⁹Pamene, ariorica iquisashi-
taquempi nampitimpiri, tempa iotaquero
Tasorentsi; aisati ariorica yoashinoncash-
taquempi, iotaquero aisati. Eiro pipiatsa-

taritsi nampitimpiri. Ariorica piquemisan-
tiri Tasorentsi, tempa ari incavintaasa-
nojeitimpi coajica. ²⁰Pamene, ariorica
pamataviteri nampitimpiri, ariorica
impasatimentpiro. Eirorica pipiatsave-
tari, iro cantaincha locameetsatimpa
pamatavitaqueri? Eiro inecameetsatim-
pitsi Tasorentsi. Iro cantaincha ariorica
impasatashitimpi yora nampitimpiri
aisati te pimpiatsateari, ari irineacamee-
tsatimpi Tasorentsi. ²¹Irootaque icoacaa-
quempiri: eiro pipiatsataritsi yora
quisashitimpiri. Pinquenqueshireteri
iriori Quirishito: oshequi inecatitimen-
taquempi, icoaque pinquempeteari.
²²Tecatsi irante irinti caari cameetsatsati,
aisati te iramatavitanteji. ²³Te impiatsa-
teariri yora quisatsajeitaqueriri, aisati te
inquisatsateriri yora oashinoncaajeitiriri.
Iroitiquea iquenqueshiretaqueri iriri,
yaventacari, iotaque ari irintacoteari
iriori. ²⁴Icamimentajeitaquee anta
coroshiqui, eiroquea iquenqueshiretanta-
jarotsi aisati Tasorentsi caari cameetsata-
tsi antajeitiri. Meecaquee meeca, eiro
antapinitajirotsi aisati caari cameetsata-
tsi, irointi antapinite cameetsatsatsiri.
Oshequi inecatitimentajeitaquee, eiro
ashinoncantatsi arori. ²⁵Piojeitaque yora
ovisha te aneroji iotantari: oshequi
iquenashiyeta. Eirorica itimitsi shenterine
impeaarantaquee. Aitaque piquempejei-
veitarini ovisha, te piojeiveiteani. Iro
caincha timatsi meeca Shentajeitim-
piri, iquemoyeasanojeitaquempi.

**Yora shirampari aisati ijina, ocameetsati
iraacameetsatavacayea.**

3 ^{1,2}Tsinane, pimpincatsateri pijime.
Terica inquemisante meeca, iro
caincha ocameetsati irineaquempi
piquemisantasanoaque aisati cameetsa
pisaviqui. Impoiijiquea irineacameetsa-
tempa, aisati arioricampa pimateri
pinquemisantacayeri. ³Eiro apatiro

pincoashitea poameetsanero piishi, poaneenquea, pinquitsaatea, paitapeerica. ⁴Irointiquea pincoasanote pincameetsa-shiretanaque, pineshinoncatsateri pijime. Irootaque icoacaasanotaquempiri Tasorentsi. ⁵Aitaque oquempjeitaniri peeraniniri quemisantiriri Tasorentsi: cameetsa osaviquini, opincatsatirini ojime. ⁶Ora Sarani oquemisantirini Avaramani, oshequi opincatsatarini. Ariorica pintime cameetsa, pinquempe-tearo, impoiji eiro pitsaroacaaritsi pijime: eiro otimitsi inquishmentempiri.

⁷Aisati shirampari: te omoncaratempiji pijina, te oshintsitananoteji, irootaque nocantantimpiri pincavintsayero, pineacameetsatero. Tempa pimincarata-vacaaca, icavintsaajetaquempi Tasorentsi pisavicajeitanteari coajica anta inquitequi. Eirorica picavintsairo pijina, eiro iquemisantimpitsi Tasorentsi ariorica pinquenquetsatacaaveteari.

Corajica iroashinoncayeeteri antirori cameetsatsiri.

⁸Aisati noncantajeitempi maaroni: pinquempetavacaajeitea, pineshinoncata-vacaajeitea, pinintajeiteri piyemisan-taririnte, pincavintsaavacaajeitea, eiro pishemejeititsi. ⁹Terica oncameetsateji yantimotaquempiri pishaninca, eiro pishemaritsi; ariorica inquisatsatemp, eiro pipiataritsi. Pincanteri Tasorentsi incavintsayeri. Irootaque icoyeajeitanta-quempiri Tasorentsi: icoaque incavintsa-ajeitempi. ¹⁰Tempa irootaque ocantiniri Sanquenarentsi: “Pincoaquericca pinquimoshiretanaque aisati pisavique cameetsa, eiro piquisatsatiritsi pishaninca, aisati eiro pitseeyatsi. ¹¹Eiro pantayetirotsi caari cameetsayetatsi, irointi pantayete cameetsayetatsiri. Pincoasanotaque pintime cameetsa.

¹²Yamenapinijeitiri Avincatsarite maaroni quemisantajeitiriri, ishentajeitiri. Iquema-

pinitiri ariorica iquenquetsatacairi. Iro cantaincha te incavintsayeriji antapinitirori caari cameetsatsati”.

¹³Pincoasanoterica pantapinitero cameetsatsatsiri, ¿ariompa intime coatsiri iroashinoncaayempi? ¹⁴Ariorica intime aparo quisashitempineri, iro cantaincha intasoncacoventempi Tasorentsi. Eiro pitsaroacaaritsi yora quisashitimpiri, eiro picantashiretitsi, ¹⁵irinti pimpincatsatasa-noteri Quirishito. Ariorica irisampiyee-tempi: “¿Paita piquemisantantacariri Jesoquirishito?” Ari cameetsa pancan-queri, eiro piquisatsatanaqueritsi. Pincamanteri paita pioletacariri iraanajempiri inquitequi. ¹⁶Eiro catsini pantirotsi caari cameetsatsati. Impoiji iriotanaque yora quisaquempiri irio Quirishito oameetsantimpiri. Impoiji aisati impashiventanaquea, iriotanaque te oncameetsateji incantimatemp.

¹⁷Ariorica incoacayempi Tasorentsi iroashinoncayeetemp, iro cantaincha oncameetsate pashinoncaimentearo cameetsayetatsiri pantayeteri. Te oncameetsateji pashinoncaimentearo caari cameetsayetatsi pantayeteri.

Yantayetaqueri Quirishito.

¹⁸Ari te ancameetsajeiteji arori, oshequi antayetaquero caari cameetsatsati, iro cantaincha icameetsatasaanotaque irinti Quirishito. Icamimentajeitaquee irinti, yoavisacojeitaquee; icoaque aneajeitanta-jeiriri Tasorentsi. Icamasanovetaca; iro cantaincha ishire, te oncameji. ¹⁹Icaman-tacariri, ijashiretapainti anta Sharincaveni-qui, anta yoaquerinta Tasorentsi camaari-pee aisati ishireni tseencantatsiniri. Ari iquenquetsatacaapaqueri. ²⁰Peerani, te inquemisantajeiteni iriori ishaninca Noeni. Yovetsicantavetacaroniri ivito, icantapinijeivetacariri ishaninca peerani: “Pinquemisantajeiteri Tasorentsi”, iro cantaincha te inquemisantajeiteriji. Ari

peerani yamavenavetacari Tasorentsi, iro cantaincha impoiji ishemanacari, itiancaquero antearo incani, incajaretanaque, maaroni. Aanaqueri maaroni, itsitiajeitanaque, pomiririri. Ari icarati avisacotajantsiri pitotsiqui ocho. ²¹Ari ishiajeivetacarini iriori vaotisaajeitachari meeca. Ariorica avaotisaataquea, te iro ancaate, irointi ashiacantiro icamimenta-jeitaquee Jesoquirishito, aisati itinaanaja, yoavisacojeitaquee. Aisati ashiacantiro aventari Tasorentsi yoameetsashirejeitanaqueeri. ²²Ari meeca ijataji Jesoquirishito anta inquitequi, isaviquimotapaajiri Tasorentsi iracosanoriqui: icaratiri ipincatsariventajeitee. Aisati oshequi ipincatsajeitiri inampirepee, itsipapee pincatsarivetachari, maaroni.

4 ¹Ari piojeitaque otimi oshequi iquematsicatarari Quirishito, te incoyeji eiro iquematsicataro. Aisati avirojei, eiro picoajeititsi eiro piquematsicatarotsi paitapeerica. Pamene, ariorica pinquematsicataro paitapeerica, eiro picoajitsi pantapinitero caari cameetsatsi ²aisati icoayetiri atiripee. Irointiquea pincoasanotanaque panteneri Tasorentsi paitapeerica incoacayempiri, irosati pincamanteari. ³Peerani pantaveitaroni yantapiniyetiri yora tseencantatsiri: moncaratata, eiro papiitajirotsi aisati. Jero itsinampanti iriori, yantayetiro caari yai, ishinquitapinita, imayempitavacaapinijeita, iquisavacaajeitaca, ipincatsatashitacaro ijitasorentsitashitari. ⁴Te iriojeiteji iriori, icanti: “¿Paita caari iquempetantana quemisantatsiri?” Yoajeitanaquempi cavaco, irosati icantimajeitanaquempi. ⁵Iro cantaincha coajica impoque Quirishito incantacoventajeiteri maaroni atiri: aneajeitatsiri aisati camajeitatsiri. Irisampijeiteri tseencantatsiri: “¿Paita piquisantacarari quemisantanari? Te oncameetsateji”. Eiro yaquiritsi, oshequi impashiventanaquea. ⁶Peerani yora

Jesoshi iquenquetsatacaajeitaqueri savicaveitachaniri, icamantajeitaqueri: “Ariorica pinquemisante, pincantaitatiyempani pintime anta inquitequi”. Ari icamajeitaque: tempa yantajeitaquero caari cameetsatsi, irootaque icamajeitancari, iquempejeitacari maaroni atiri. Iro cantaincha yoitinaajiri Tasorentsi maaroni quemisantajeitiriri, isavicacajeitaqueri anta inampiqui. Meeca iquempejeitacari Tasorentsi: eiro icamajeitajitsi aisati.

Tsame ancavintsayeri ayemisanraririnte.

⁷Pamene, irotaintsi omoncarataquea incantacoventantajeiteeri Tasorentsi. Cameetsa pisavicajeite catsini, pinquearioventero pinquenquetsatacapinijeiteri. ⁸Pincoasanojeite catsini pinintavacaajeitea. Ariorica pinintavacaajeitea, eiro piquenqueshiretirotsi caari cameetsatsi yantayetiri itsipapee, irointi pincavintsaavacaajeitea. ⁹Pincanteani pineshinoncajeitavaqueri maaroni quivantempineri. ¹⁰Tempa otimi imatacaaquempiri Tasorentsi, ari pimamatero pintacotanteeriri pishaninca. Piotacaajeiteri iriori icavintsaajeitaqueri Tasorentsi. ¹¹Ariorica pinquenquetsatacayeri pishaninca, pinquearioventero povaajeneri irineane Tasorentsi. Ariorica pintacoteari pishaninca, pincerteri Tasorentsi iramitacotempi, aitaque irimatacaaquempiro. Ariorica anquemisantasanoteri Jesoquirishito, incantajeite itsipapee atiri: “Tempa icameetsatasanoti Tasorentsi”. Tsame aneacameetsajeiteri maaroni, ampincatsajeiteri: ancantaitatiyempani. Aitaque ancantajeiteari.

Icantiri: “Ariorica pinquematsicamenteari Quirishito, pinquimoshiretanaque”.

¹²Noshaninca, oshequi nonintajeitauquempi. Niotaque oshequi yoashinonqueetaquempi. Eiro poanaquetsi cavaco,

aitaque yoashinonqueetiri aisati itsipapee quemisantajeitatsiri. ¹³Tempa aisati yoashinonqueetaqueri iriori Quirishito, meeca piquempejeitacari: ari pinquimoshirejeitanaque. Aisati, coajica impincatsaritapaaque irinti, irosati pinquimoshireventasantanteariri. ¹⁴Ariorica inquisimenteeyetempiro piquemisantiri Quirishito, pinquimoshiretanaque: tempa aitaque itasoncacoventaquempi Tasorentsi. Quiso oajeitaquempi Ishire, aisati coajica cameetsa pisaviquimoteri anta inquitequi.

¹⁵Iro cantaincha eiro poantitsi, eiro picoshititsi, eiro pantayetirotsi caari cameetsayetatsi, eiro pashereiritsi pishaninca, maaroni. Ariorica inquisimenteeyetempiro ocapee, pineashiitetea-rove. ¹⁶Iro cantaincha ariorica pinquemisantasanoteri Quirishito, irootaque inquisimentanteetempirori, eiro otimitsi pimpashiventimenter. Irointi pincante: “Tempa icameetsataque Tasorentsi, ishinetana noquematsicatimentacari Quirishito”. ¹⁷Pamene, irotaintsi incantacoventajeitee Tasorentsi: irijivajeitee maaroni arori itomintajeitari, impoiiquea iriori tseencajeitiriri. Ariorica irintacojeitee arori, tempa iroashinoncaasanojeiteri yora caari quemisantajeitiri. ¹⁸Tempa ocantini Sanquenarentsi: “Ari yoavisacojeitaqueri Tasorentsi yora quemisantajeitiriri yoameetsajeitaqueri, iro cantaincha irovetaincha irijajeiteme Sharincaveniqui. Irintiquea yora tseenquiriri Tasorentsi, yantapinitiro caari cameetsatsi: tempa ari irashinoncaasanoataquea irinti”. ¹⁹Ariorica pantiniri Tasorentsi icoacaquempiri, irootaque picatsitimentantacariri, ocameetsataque. Pinquearioventero pantayetero cameetsayetatsiri. Pincanteri Tasorentsi: “Pinquempoyejena”. Tempa iriotaque vetsicaquempiri, inquempeyeasanotempi, eiro yamatavitimpitsi.

Yora Petero yoametaqueri jvatacaajeitiriri iyemisantaririnte.

5 ¹Jero oca nosanquenateneriri quenquetsatacaantatsiri. Tempa narotaque narori quenquetsatacaantatsiri. Peerani noneasanotaqueri Quirishito ineacatsitacaro oshequi. Aisati coajica, ariorica impoque Avincatsarite impincatsariventantapaaque, nontsipateari nompincatsariventante narori. Ari meeca timatsi noninti noncamantajeitempiti: ²yora ashitariri irovishate intacojeitacari irovishate. Aisati avirori, pintacotapinijeiteari ashanincapee piquemisantacaajeitaqueri. Avisati coashitachane, eiro itimitsi peranatempineri. Te iro pinquenquetsatacaapinijeitanteariri paitanteariri iirequite, irointi pincoasanoataque pintacojeiteari. ³Eiro pishintsitsajeitiritsi, irointi cameetsa pintime, inquempejeitantempiri iriori. ⁴Coajica impoque yora pincatsariventajeitajeeri, iraaajeitanajee, irisavica- caajeitapaajee anta inquitequi. Ancantaitiyempani asavicajeite anta ocameetsaiteti catsini.

⁵Aisati evancaripee, noncamantempi: pimpincatsajeiteri maaroni timacaajeitimpiri. Eiro pishemejeititsi, irointi cameetsa pincavintaavacaajeitea. Yora Tasorentsi iquisaqeri yora shemetatsiri, iro cantaincha ineacameetsajeitaqueri caari shemejeitatsi. ⁶Pimpincatsajeiteri iriori: tempa itasorentsitasanoataque, ipincatsaritasanoataque; impoiiji irisavica- caajeitempi cameetsa catsini. ⁷Eiro piquenqueshireatsi, eiro poashiretatsi. Otimirica piquenqueshireyetiri, pincanteri Tasorentsi: “Oshequi noquenqueshireaca. Pamitacotena eiro noquenqueshireantajatsi aisati”. Ariorica pincanteri, ari piveshireimenteari iriori. ⁸Queariompia: paamayeari camaari. Oshequi catsini iquenaquenayetaque, icoaveta irojocacaajeiteerome aquemisan-

tajeiti maaroni: eiro catsini aquemisan-
tantajatsi. Iquempetacari anteari maniti,
ariorica itasheasanotaque: yoari
iovintsane, itsoncasanotaqueri, te intimeji
timaarantajantsine. ⁹Pinquemisantasano-
teri Avincatsarite pimpiatanteariri
camaari. Queario ontimayete pinquema-
tsicayeteari, iro cantaincha tempa aisati
iquempejeitaquempi iriori ayemisanitari-
rinte anta otsipapeequi quipatsi. ¹⁰Eiro
osamanitasanotitsi pinquematsicatearo:
ioti Tasorentsi pipincatsataqueri
Quirishito, ari impoiji irajaiteanaquempi
anta inquitequi. Pincantaitatiyempani
pisavicapaaje anta ocameetsaitetasano-
tinta catsini. Yashi yoiro icavintsanti:
iroameetsantasanojeitempi, iriveshirea-
caajeitempi, impeavajempi pincatsari
avirori, eiro picantashiretajitsi aisati.

¹¹Tsame maaroni ampincatsatasanojei-

teri, ancantaitatiyempani. Iroove, icamee-
tsatasanotaque catsini.

¹²Jeri yoca Shirivano, iriotaque
aanajempirone oca nosanquenare.
Oshequi noneacameetsatiri: iriotaque
ayemisanraririnte, iquearioventiro
iquemisanti. Ari nocamantaquempi
oshequi icavintsaasanojeitaquempi
Tasorentsi, queario nocantaquempiri.
Meece pinquemisantasano-
teri, piveshirei-
menteari iriori. ¹³Ivetsajeitaquempi
maaroni ayemisanraririnte aca Vavironia-
qui, tempa irisati icoyeane Avincatsarite
iquemisantajeitiri. Aisati ivetsajeitimpi
noamere Maricoshi. ¹⁴Paacameetsatava-
caajeitea maaroni, pincavintsaavacaajei-
tea. Nocantiri Tasorentsi: “Pincavintsa-
ajeiteri maaroni quemisantiriri pitomi,
cameetsa pisavicacaajeiteri”.

Narotaque sanquenajeitimpirori: *Petero*

YAPIITAJINIRI PETERO ISANQUENATINIRI IYEMISANTARIRINTE

Ivetsajeitari.

1 ¹¿Ainirompi noyemisantaririnte?
¿Tecatsimpa oyempine? Narotaque
Shimo Petero sanquenajeitimpirori.
Narotaque itiancane Jesoquirishito, nantiniri
iriori paitarica icoacaaquenari. Tempa
amoncaratavacaajeitaca aquemisantajeita-
queri Tasorentsi aisati Jesoquirishito, yora
oavisacojeitaqueeri. Irootaque yoameetsajei-
tantaqueeri. ²Ari piojeitaqueri, irootaque
oshequi incavintsaajeitantempiri aisati
cameetsa irisavicacaajeitantempiri.

Ocameetsati anquearioventeneri Tasorentsi maaroni antajeiteneri.

³Ari icoyeajeitaquee Tasorentsi ancamee-
tsajeitanteari aisati cameetsa asaviquimojei-
tanteariri anta ocameetsaitetinta. Ariorica
ayojeiteri, intasoncacoventajeitaquee
cameetsa asavicajeitanteari aisati cameetsa
anquemisantanteariri. ⁴Oshequi intasonca-
coventajeitaquee anquimoshireimentantajei-
teariri catsini, irimataqueenero maaroni
icantaqueeri. Iramitacojeitee eiro acoantaro
antero caari cameetsatsati. Aisati iramitaco-
jeitee anquempjeitanteariri iriori. ⁵Ariorica
acoajeitaquee intasoncacoventajeitee,
ocameetsati ajivataque anquemisanteri.
Ariorica anquemisanteri, impoji ocamee-
tsati ancameetsatanaque. Ariorica ancamee-
tsataque ocameetsati aisati ayotasanotana-
que paitarica icoacaaqueeri. ⁶Ariorica
ayotaque paitarica icoacaaqueeri, ocamee-

tsati aisati aamaventanaquea arosati
amatantearori. Ariorica aamaventanaquea
arosati, ocameetsati anquearioventero
icoacaaqueeri. Ariorica anquearioventero
icoacaaqueeri, ocameetsati aisati ampincat-
satasanotanaqueri. ⁷Ariorica ampincatsata-
sanotanaqueri, ocameetsati aisati anintajei-
tanaqueri maaroni ayemisantaririnte,
ancavintsaajeitanaqueri maaroni ashaninca-
jei. ⁸Ariorica pimatasanojeitanaquero
maaroni ocapee, ari oshequi pimataqueneri
Avincatsarite Jesoquirishito, aisati
piotasanotanaqueri. ⁹Yora caari majeitiro
ocapee te iriotasanoteriji Avincatsarite, te
inquenqueshireteroji icavintsairi. Oshequi
yantajeitironi caari cameetsatsati, iro
cantaincha icavintsaasanotaqueri, yoamee-
tsataqueri, te inquenqueshireajeroji aisati.
¹⁰Meecca, noyemisantaririnte, pinqueario-
ventasanotero panteneri Tasorentsi maaroni
icoacaajeitaquempiri, te oncameetsateji
irantsipetashitearo icoyeauquempi
pijatanteari anta inquitequi. Aisati eiro
pojoquirotsi piquemisantiri, ¹¹oncanteata-
quea iraanantajempiri anta inquitequi, anta
icantani ipincatsariventanti Avincatsarite
Jesoquirishito: yora oavisacojeiteeri.

Icantiri: “Eiro pipeacotarotsi oca nocantaquempiri”.

¹²Te iroaquera pinquemajeitero oca
nocantaquempiri: piojeitironi, aisati
pimayetaquero cameetsa. Iro cantaincha
nampiitajempiro aisati nonquenqueshireta-

caajempio. ^{13,14}Iotacaquena Avincatsarite Jesoquirishito eiro osamanititsi noncamanteari. Iro cantaincha nonquenqueshiretacaajetempio irosati noncamanteari. ¹⁵Impoiji, ariorica noncame, eiro pipeacotantarotsi, irosati pinquenqueshiretantapinitearori.

Tampatica oamejeitaquee irineane Tasorentsi.

¹⁶Tempa nocamantajeitaquempi coajica impocaje aisati Avincatsarite Jesoquirishito, oshequi impincatsaritapaaque. Queario oca nocantaquempiri, te noncamantajeitempiro naamaashijeitacari. Tempa narojeitaque neasanojeitaqueriri Jesoshi peerani ishpaquireaque aisati itasoncantayetaque. ^{17,18}Peerani ijatantacari Jesoshi toncaariqui, noijatanaqueri narori, aisati itsipapee iroamere; noneasanojeitaqueri ishpaquireanaaque, aisati noquemajetavaqueri Apa Tasorentsi, yora cameetsatasannotatsiri. Icanti: “Iriotaque yoca notomi nonintasanotiri, oshequi noneacameetsatasanojaqueri”. Irosati nopincatsatasanojeitancariri Jesoshi. ¹⁹Timatsi aisati isanquenajeitirini yora camantantatsiniri peerani: iotacaasanojeitaquee queario impocasanotaje Quirishito, impincatsariventajeitajee. Ocameetsati pinquenqueshiretasanojeitero ocantiri Sanquenarentsi piotanteariri jaoca icanta. Oquempetacaro atsiota tsiteniriqui: eiorica atsiota, eiro aneitsi. Ari ocameetsati pincanteani pinquenqueshirejeitero, irosati impocantajeiri; impoiji iriotacaasanojeitempi, onquempetimojeitempi oquitaitetasanoti. ^{20,21}Nocoaque piotasanojeitero oca: ora isanquenare yora camantantatsiniri otampaticasannotaque. Te irioteniji intacarori, yora camantantatsiniri, caari oni irineane iriori; irointi oamejeitaqueri Ishire Tasorentsi, isanquenatantacarori irineane.

Iquenquetsatacotiri amatavitantatsiri.

2 ¹Ari peerani itimini quenquetsatacaajeitiriniri joriopee, iro cantaincha yamatavijeitirini, aisati intime meeca

amatavijeitempineri avirori. Iroamejeitempiro tseeayantsi, intseeayacoteari Tasorentsi. Tempa ayojeitaque icamimentajeitaquee Jesoshi ajajeitanteari inquitequi, iro cantaincha incantanirote yora amatavitantatsineri: “Eiro apincatsatiritsi Jesoshi”. Irootaque iroasanquetasanotanteariri Tasorentsi. ²Intime oshequi ojjajeiterineri: inquempejeiteari, irantayetero caari cameetsatsi; irootaque intseenqueetanteariri Quirishito.

³Oshequi iramatavijeitempi, iroametashiyetempio paitapeerica iraitantempiriri piirequite. Peerani icanti Tasorentsi:

“Aitaque noasanquetasanojeiteri yora amatavijeiterineri quemisantatsineri”.

Queario, eiro osamanititsi irijajeite Sharincaveniqui. ⁴Peerani yora inampirepeeni, ipiatsajeitacarini Tasorentsi, yantayetaquero caari cameetsatsi. Ari yoasanquetaajeitaqueri, yojocajeitaqueri anta Sharincaveniqui, anta otsiteniitasannotinta. Aitaque itimaqueri iriori anta, irosati incantacovenanteariri Quirishito.

⁵Pamene, peerani yoamaajeitaquerini Tasorentsi yora ishanincapeeni Noe. Te impincatsajeiteriji Tasorentsi, irootaque itiancantacanariri incani aajeitaqueri.

Tecatsi pashini iroavisacote, irinti Noe aisati ishanincasanori iriori, caratatsiri 7. Tempa iriotaque quenquetsatacaajevetacariri ishanincapee, camantajeivetacariri jaoca incanteameri iravisacojeitantajeameri. ⁶Peerani itaajeitaqueri Tasorentsi maaroni soromasatini, aisati maaroni comorasatini; itaajeitaquero ivancopee, irovararo, maaroni. Otaaca maaroni, poyere. Ocameetsati meeca anquenqueshirejeitero yantaqueri Tasorentsi ayojeitanteari iroasanquejeiteri maaroni caari pincatsatiri. ^{7,8}Ari icameetsataqueni Orotini; isavicaveitani anta, iro cantaincha te irineacameetsateroji oca yantajeitaqueri yora isaviquimojeitirini. Oshequi iquenqueshiretanaca maaroni quitaiteri:

“¿Paita caari iquemisantajeitanti Tasorentsi?” Ari inecameetsataqueri Tasorentsi iriori, irootaque caari itaantari.

⁹Ari iotasanaque Tasorentsi yoavisa-cojeitaqueri pincatsajeitiriri, eiro iquempetantaritsi tseencantatsiri. Irinti yora caari cameetsajeitatsi, iroashinon-caajeitajeri, irosati impocanteari incantacoventantajeiteariri. ¹⁰Aitaque iroasanquejeiteri maaroni coatsiri irantayetero caari cameetsayetatsi, antashiyetarori paitarica icoayetiri, jeri aisati yora tseenquiriri Avincatsarite. Tecatsi impincatsajeite, oshequi ishemejeiti, te intsaroyeji icantimajeitiri inampirepee Tasorentsi. ¹¹Ari isavicajeiti iriori anta Avincatsaritequi, aisati oshequi ishintsiti, oshequi ipincatsariti, iro cantaincha te impiateariji yora cantimajeitiriri.

¹²Iquempejeitacari iriori poshiniripee, tecatsi iriote. Iquenashiyeta, impoiji imanatiri atiri, yoaqueri, shemi. Yora tseencantatsiri icantimatashiyetaro caari ioti, irootaque irijajeitanteari Sharincaveniqui, intsipajeiteari camaari. ¹³Yoashinoncantajeiti meeca: coajica irashinon-caajeitaquea iriori. Iveshireimentashiyetaro timayetsiri meeca: te inquenqueshireteroji jaoca incanteari coajica. Te oncameetsateji yantajeitiri iriori, iro cantaincha yantacaajeitaquempiro caari cameetsatatsi pinquempejeitanteariri aviriori. ¹⁴Inevejeitaro tsinaneppee, icantani yantapinitiro caari cameetsatatsi: tecatsi incantero irijocajero, yashi yoiro. Yantacaajeitaqueri caari quenqueshirevetaro caari cameetsayetatsi. Yashi yoiro ineveyetaro vararontsi. Queario irijajeite iriori Sharincaveniqui.

¹⁵Te incoajeiteji intime cameetsa, irointi yantashiyetaro paitapeerica. Iquempejeitacari Varamani, itomini Veoro. Iquenquetsavetaroni peerani irineane Tasorentsi, iro cantaincha

inevetasanotaro vararontsi, te irantasano-teneriji Tasorentsi icoacaavetariri. ¹⁶Te inquemisanteriji, irointi yojjataqueri coatsiri imperi vaararontsi. Ari imapocaqueri irashinote ineanataqueri. Te irioteji irio neanatacairiri Tasorentsi. Ari iquenquejaqueri, ipiatsatacari, impoiji oshequi yoanaqueri cavaco iriori, aisati oshequi iquenqueshireanaca: te inquenqueshiretajeroji aisati vaararontsi. ¹⁷Ariorica pinqueacotero nija oncontejanteari, tempa pincoasanaque ontime nija. Iro cantaincha ariorica ompirijatanaje, te oncameetsateji, tecatsi payero nija. Ari yora amatavitantatsiri ishiaquero pirijatsiri nija: te incameetsateji. Oshequi inaveeti, vero, vero, iro cantaincha tecatsi iramitacotempi. Aisati iquempevetacaro mencori, ariorica pineaquero amaquero tampea: pijiti ompariye incani, iro cantaincha ariorica amatavitempi, te ompariye. Timatsi intimasantanteari iriori, yovetsicaqueri Tasorentsi anta otsiteniitananoti catsini. ¹⁸Oshequi ishemejeiti, aisati icantapiniti: “Pineaquero, nantashiyetacaro paitapeerica nocoayetiri”. Ari yamataviyetiri oshequi iroaquera quemisantavetachari: iroaquera yojcavetacaro caari cameetsatatsi yantayetiri, iro cantaincha yantacaanirotajiri aisati. ¹⁹Icantayetiri: “Tempa irio Tasorentsi oavisacotimpiri, te pimateroji poavisacotajea avisati. ¿Paita caari pantantaro paitarica picoayetiri? Tempa icavintsaaquempi, eiro iquishmentimpirotsi. Tsame pinquempetena narori”. Irootaque icantayevetari, iro cantaincha yamatavitananoti. Jero yantapinitiniri camaari icoacairiri iriori: iriotaque ivincatsarite. Iriome Tasorentsi ivincatsarite irantenerime icoacairiri iriori, cameetsa irisaviqueme. ²⁰Pamene, peerani yashinoncaajeivetaca: yantapinijeivetaroni caari cameetsatatsi yantajeitiri

tseencantatsiri. Impoiji iotajiri Avincatsarite Jesoquirishito, yoavisacotajiri. Iro cantaincha yapiitajiro ora yantapinijeiveitaniri. Meeca tecatsi incantacoventajea iroimpacajero aisati yantayetiri, irootaque irashinoncantasanteari catsini. ²¹Pineaquero, ocameetsaveta eiro iovetarime Tasorentsi. Yoameetsavetajari, aisati yoamevetajari, iro cantaincha ipiatsanirotacari yora cavintsaavetajariri. ²²Incanteetini: “Yora otsiti yoipiajaro iamarancane, yoajaro. Atsipetashitacari aquiviri shintori, tempa impianaje aisati intivironcajearo sampoatsa”. Queario icanteetiri. Aitaque iquempejeitari iriori yora quemisantavetachari, yapiitajiro caari cameetsatatsi.

Iquenquetsatacotiri Jesoshi, impocantajeari.

3 ^{1,2}Ari, noyemisantaririnte, piojeiti nonintajeitaquempi. Chapinqui nintantaquempirori nosanquenataquempiro, noquenqueshiretacaquempiro isanquenatiniri yora quenquetsatacotiriniri Tasorentsi peerani. Aisati noquenqueshiretacaquempiro maaroni yoamejeitaquenari Avincatsarite, yora oavisacojeiteeri. Impoiji itiancajeitaquena noquemisantacaajeitaquempi. Meeca napiitajimpiro nosanquenatajimpipinquinqueshiretasanotantearori. ³Piojeitaque eirositarica ipoquitatsi Avincatsarite, intime oshequi tseencantatsineri, irantashiyetearo paitapeerica incoanroyeteri iriori. Irishirontimentajeiteari Avincatsarite, ⁴incantajeite: “¿Incantimpa Quirishito impocaje? Iji, iji, iji. ¿Jaocari meeca? Tempa camaque peerani. Eiro ipocajitsi. Peerani yaamaavetarini yora intacaroniri iqemisantati, iro cantaincha te irineeriji, irosati meeca. Peeraniiteni. ¿Pijitimpa pineajeri avinti? Iji, iji. Irosati ocantani quipatsi, te ompashiniteaji”. Irootaque incantajeiteri tseencantatsineri.

⁵Te incoyeji inquenqueshiretero yantayetaqueri Tasorentsi. Peerani

icantaque iriori: “Ontimeta quipatsi, aisati ontimeta inquite”, irosati otimantacari. Ari yovetsicaquero quipatsi, ocontetapaaque incajarequi, meeca aisati oshoncacaro incajare. ⁶Aitaque ocantacari peerani, iro cantaincha impoiji yoasanquetaajeitaqueri yora ishanincani Noe. Iro yoasanquetantacari, te oncameetsateji intimeni. Ari opariaqueni antearo incani, ooncanaca maaroni quipatsi, aisati ipoyereajeitanaca tseencantatsiri. ⁷Aisati icanti Tasorentsi: “Coajica nontayero inquite aisati quipatsi, aisati nontaacojeiteri maaroni timantadori”. Tempa peerani icantini “Novetsiquero quipatsi”, irosati otimantacari. Meeca icanti: “Coajica nontaajero quipatsi”, tempa aisati irimatajero. Aisati tequerata omoncarateaji intaantajeorori, iro cantaincha coajica intayero, pomein, aisati intaacojeiteri maaroni tseencantatsiri, iroasanquetaajeiteri. ⁸Meeca pinquinqueshirejeitero oca, noshaninca: ajijeivetaro 1000 osarintsi peerani catsini. Iro cantaincha te irijiteroji irinti. Ineaquero te osamaniteji, oquempetivetacari aparoni quitaiteri. Ajijeitiro te osamaniteji aparoni quitaiteri, irioquea iriori ineaquero osamani, oquempetivetacari iro 1000 osarintsi. ⁹Pineaquero, ajijeivetaro opeeranitaque, tequera irimoncarateroji icantaqueeri: tequera impoque Avincatsarite. Iro cantaincha te irijiteroji irinti opeeranitaque. Eiro yamataviteetsi, iro cantaincha osamani onaveta yoyeacovetacari tseencantatsiri, icoaque inquenqueshiretajea eiro ijatanta Sharincaveniqui. ¹⁰Iro cantaincha coajica irimapocasanotapaquee Avincatsarite, impocaje. Antearo ontoncanaque inquite, ton; ontoncasanotanaquea, poyere. Intaasanotanaquea impoquiro, catsirincaiteri, cashiri, maaroni: pomein, intsoncasanotanaquea iriori, poyere. Aisati quipatsi, ontayea; aisati ontaacota-

sanojeitanaquea maaroni timajeitatsiri quipatsiqui, pomein, poyere.

Icamantiri jaoca oncanteari coajica.

¹¹Ari meeca ayojeitanaque ontsoncajeitajea maaroni aneajeitiri, irootaque ocameetsatantari anquenqueshiretanaquea, anquemisantasanoteri Tasorentsi, cameetsa antime catsini. ¹²Cameetsa aamaajeiteari Tasorentsi impocaje, cameetsa aisati antajeiteneri maaroni icoacaaqueeri irishintsitantajeari impocaje. Ariorica omoncarataquea, ontayea inquite aisati inquiresati ontsoncajeitanaquea, maaroni, poyere.

¹³Iro cantaincha timatsi pashini icantaqueeri, ayotanaque eiro yamataviteetsi. Icanti: “Pashini novetsicaje aisati inquite iroaquerari, aisati quipatsi iroaquerari. Oncameetsatasanotaje irointi, eiro itimajitsi antayetajeroneri caari cameetsatatsi”. ¹⁴Meeca, noyemisantaririnte, paamaajeitacaro icantaqueeri. Pincoasanotaque pintime cameetsa, aisati paacameetsatavacaajeitea; impoji ariorica impocaje, irineacameetsatasanotapaquempi. ^{15,16}Queario,

tequera impocaje, iro cantaincha yoyeajeitaqueri itsipapee atiri inquemi-santajeite iriori iravisacojeitantajeari. Irootaque isanquenajeitaquempiri Pavoro iriori, yora anintasanoejitiri. Oshequi iotacairi Tasorentsi. Timatsi pomerentsi-taarantainchari isanquenayetiri. Meeca yora caari iotatsi, yora caari quemisanta-sanotatsi, iquenacaashitacaro irineane Pavoro, te ontampaticateji incamantacotero. Aisati iquenacaashiyetacaro pashini irineane Tasorentsi, irootaque iroasanchejeitantariri.

Ivecarataquero isanquenare.

¹⁷Ari, noshaninca, nocamantaquempi jaoca oncanteari coajica. Nocamantajeitaquempi intime yora caari cameetsayeta-tsine, piatsajeitearineri Tasorentsi, iroametantero tseyantsi. Queariyea, piquemisaniricari, icomitacaimpicari. ¹⁸Pinquemisantasanoteri Avincatsarite Jesoquirishito, yora oavisacojeiteeri, piotasanotanaqueri. Tsame meeca aisati ampincatsatasanojeiteri, ancantaitatijempani. Aitaque ancantajeiteari, maaroni.

Narotaque sanquenajeitimpirori: *Petero*

IJIVATAQUE JOA ISANQUENATINIRI IROAMERE

Yora Ashitarori Irineane yoamejeitaquee jaoca ancanteari antimanteari inquitequi.

1 ¹¿Ainirompi, noamere? ¿Tecatsimpa oyempine? Narotaque aca Joa sanquenajeitimpirori oca. Meeca nosanquenatacotaqueri intasanotarori itimi. Tequerani ontimeni quipatsi, itimitani irinti. Iriotaque Ashitarori irineane, oamejeitaqueeri jaoca ancantajeari antimajeitantajeari anta inquitequi, ancantaitatiyempani. ²Itsipatarini Apa Tasorentsi, impoiji ipocaque aca quipatsiqui. Noneapinijeitaqueri, namenapinijeitaqueri, noquemapinijeitaqueri, nopamitapinijeitaqueri: meeca nocamantajeitaquempi jaoca icantari, aisati nocamantajeitaquempi jaoca incantajeitajeeri aneasanojeitantajeari anta inquitequi.

³Ari yora noneasanojaqueri, noquemasanojaqueri, iriotaque noquenquetsatacotaqueri. Meeca noncamantasanotempi, pinquempetantenari narori. Aquempejeitacari Apa, aisati aquempejeitacari itomi: yora Jesoquirishito. ⁴Meeca nosanquena-jeitempiro oca pinquimoshiretasanojeitanteari.

Ishiasanojaquero Tasorentsi quitaiteri.

⁵Meeca noncamantempiro icamantajueneri iriori. Ishiasanojaquero Tasorentsi quitaiteri, te intsitenitimateji: te irantero-ji irinti caari cameetsatatsi.

⁶Ancanterica: “Noquempetacari”, iro cantaincha ariorica antapinitero caari

cameetsatatsi, aquempetacaro aquenana-que tsiteniriqui: antseeyashitaca, amatavitantaque. ⁷Iro cantaincha icameetsatasanojaque Tasorentsi, iquempetacaro iquenanaque irinti quitaiteriqui. Ariorica cameetsa asavi-que, oquempetaca aniitanaque quitaiteriqui, ashiaqueri iriori: aquempetavacaajeitaca. Icamimentaquee Jesoshi, yora Itomi Tasorentsi: aparajatimentaquee iriraja yoavisacojeitantajeeri, yoameetsajeitan-jaqueeri. ⁸Ancanterica: “Te nantero-ji caari cameetsatatsi”, arosati amatavita-jancha, tequera ayotimateroji queariota-sanotatsiri. ⁹Te iramataviteji Tasorentsi, icameetsataque. Ariorica ancamanteri: “Ainiro nantane”, incavintsaa-jeitee, iroameetsajeitee, maaroni. ¹⁰Ancanteri-rica Tasorentsi: “Te nantero-ji caari cameetsatatsi”, ancantempe aisati: “Te pioteji, pitseeyani”. Ancantericame: “Te anero-ji nantane”, te ashiretearoji irineane.

2 ¹Meeca, noamere, nosanquenajeitem-piro eiro pantantarotsi caari cameetsa-tatsi. Timatsi Apaqui Cantacoventajeita-queeri: yora Jesoquirishito, icameetsata-anojaque. Ariorica antero caari cameetsatatsi, incantacoventee. Incanteri iriri: “Pincavintsayeri yora quemisantanari”. ²Ainiro antajeitiri maaroni, iro cantaincha icamimenta-jaquee coroshiqui. Te apaniro incamimenta-jeiteri ashanincepee arori, irointi icamimenta-jaqueeri maaroni atiri. Yoameetsajeitaquee Tasorentsi, aisati iriori

maaroni quemisantajeitiriri, eiro
iquishimenteerotsi caari cameetsatsi
antajeitaqueri, eiro yoasanquetaajeiteetsi.

**Quemisantiriri Tasorentsi,
iriotaque iojeitiriri.**

³Ariorica antapinijetaquero icantaqueeri
Tasorentsi, ayotavacaajeitaca ashanincata-
cari. ⁴Ainiro cantashitachari: “Noshanincata-
cari Tasorentsi”, iro cantaincha te irantene-
riji icantavetariri. Iriotaque tseeyari, irisati
amatavitajancha. ⁵Ariorica antasanotiro
icantaqueeri Tasorentsi, arojeitaque
nintasanojeitiriri. Irootaque ayotavacaanta-
cari aquempetasanojeitacari. ⁶Ancanteraica:
“Quiso noanaqueri Tasorentsi”, cameetsa
ancantaitatiyempani ashiasanoteri, asavique
cameetsa.

⁷Nonintane, te naro intearone oca
nocamantimpiri. Peerani intajeitaqueeroni
Tasorentsi icamantajeitaqueeroni. Peerani
piquemaquero. ⁸Te ayoveiteani, oquempeti-
mojeiveiteeni atimini tsiteniriqui, iro
cantaincha ipocapaaque iotacaajeitaqueeri,
oquempetaca iquitaitetacojeitaquee.
Irootaque meeca napiitantimpirori. Iqueario-
ventiro Quirishito inintajeitaquee. Aisati
avirori, pinquearioventero, pinintajeiteri
itsipapee. ⁹Ancantashitearica: “Noqueni
quitaiteriqui, niotiri Tasorentsi”, iro
cantaincha anquisheririca ashaninca,
ainiroquera aqueni tsiteniriqui. ¹⁰Ariorica
aninteri ashaninca, anquenasanotanaque
quitaiteriqui, eiro aisati antapinitirotsi caari
cameetsatsi. ¹¹Ariorica anquisheri
ashaninca, oquempetaca aquenashitanaca
tsiteniriqui, ainiro antapinitiro caari
cameetsatsi. Te ayoteji jaocarica
aquenaqueri, oquempetaca otsitenitimota-
quee, te aneroji amenanteari.

**Eiro pinintasanotirotsi
yantapiniyetiri tseencantatsiri.**

¹²Noamere, otimi pantajeitiriri, iro
cantaincha yoavisacojeitaquempi Jesoshi.

Irootaque meeca nosanquenatantimpirori
oca. ¹³Avirojei shirampari: piojeitaqueri
yora intasanotarori itimi, irootaque
nosanquenatantimpirori oca. Avirojei,
evancari: te panteneri camaari icoacaave-
taquempiri, irootaque nosanquenatantim-
pirori oca. ¹⁴Avirojei jananequi: piojeitiri
Apa, irootaque nosanquenatantimpirori
oca. Avirojei shirampari: piojeitaqueri
yora intasanotarori itimi, irootaque
nosanquenatantimpirori oca. Avirojei
evancari: pishintsijeitanaque, piqueario-
ventaquero piquemisantaquero irineane
Tasorentsi, aisati te pinquemisantimate-
riji camaari, irootaque nosanquenatantim-
pirori oca. ¹⁵Eiro picoasanotirotsi
pantero yantapinijetiri tseencantatsiri.
Eiro picoasanotirotsi timayetatsiri
quipatsiqui. Ariorica pinintasanojeitero,
eiro pimatirotsi pinintasanojeiteri
Tasorentsi. ¹⁶Aitaque acantajeitari:
aquenqueshirejetaquero paitarica
acoasanotaqueri anteri. Acoasanotaquero
paitarica aneayetaqueri, ashemetimenta-
quero ashiyetari. Te irio oameteerone
Apa, irinti atiri oamejeiteerori. ¹⁷Ompea-
najea timayetatsiri quipatsiqui, aisati
ompeajeitanajea maaroni acoajeivetari.
Iro cantaincha ariorica anteneri Tasoren-
tsi icoacaaqueeri, ancantaitatiyempani
antimeni anta inampiqui.

**Iquenquetsatacotiri
tseeyacojeitacariri Quirishito.**

¹⁸Noshaninca, irotaintsi impocaje
Quirishito, eiro osamanitiitsi. Piquemaco-
taqueri yora pashini pocatsineri, yora
amatavitantatsineri, cantatsineri: “Te
iratiritapeeji Jesoshi, te imponeempaji
inquitequi. Caari ini Quirishito”. Ipajiyee-
tiri yora cantatsiri: “Antiquirishito”.
Noncamantempi, yareejitaca. Timatsi
meeca oshequi amatavitantatsiri,
irootaque ayojeitancari eiro osamaniti-
tsi impiasanotaje Quirishito. ¹⁹Peerani

icarajeiveiteeni yora amatavitantatsiri, iquemisantaveitani, iro cantaincha meeca yojocajeitaquee. Te inquempetasanojeiteeji. Inquempetaqueeme, quiso iroajeitaqueeeme, iro cantaincha yojocajeitaquee. Meeca ayotasanojeitaqueri te inquempejeiteeji, te inquemisantajeiteji. ²⁰Avintiquea itiancajeitaquempiro Tasorentsi Ishire, quiso oajeitantiimpiri. Piotasanojeitaquero. Te pishiyeriji yora caari ioterone queariotatsiri: te irioteji irinti. ²¹Piojeitaquero queariotatsiri, irootaque nosanquenatantimpirori oca. Piotaque te intseeyaji caari tseeyacha. ²²Tseeyari ini yora cantashitachari: “Yora Jesoshi, caari ini Quirishito”. Itseenquiri Apa. Itseenquiri Itomi, icantashita: “Caari ini Quirishito”. ²³Yora tseenquiriri Itomi, te irioteriji Apa. Yora cantasanotatsiri: “Quirishito ini Itomi Tasorentsi”, iriotaque iotasannotiriri Apa. ²⁴Pincantaitiyempani pinquenqueshiretero oca piquemaqueri peerani. Ariorica pinquenqueshiretasanotero, quiso poyeri Itomi, aisati Apa. ²⁵Jero oca icashiaaqaqueri: “Pincantaitiyempani pisavique nonampiqui”.

²⁶Ari nosanquenatacotaqueri yora amatavitempinemeri, ²⁷iro cantaincha itiancajeitaquempiro Tasorentsi Ishire, quiso oanaquempi. Te pincoyeji pashini oametempineri. Quiso oanaquempi, ari meeca otsoteaquempiro maaroni, oametasanotaquempi. Tampatica oametaquempi, te ontseeyaji. Tempa oamejeitaquee quiso ayeri Quirishito: ari quiso poyeri.

Yashijeitacari Tasorentsi.

²⁸Meeca, noamere, quiso poyeri Quirishito. Coajica impocaje. Ariorica pincanteani quiso poyeri, ari piveshireimentavaqueari, eiro pipashiventacaavacari.

²⁹Ari ayojeitaque icameetsataque Tasorentsi. Incameetsataquerica iriori atiri, ari ayojeitaqueri itomintajeitacari Tasorentsi.

3 ¹Icantajeitaquee Tasorentsi: “Avirojeitaque notomipee, nishintopee”. Queario icantaque. Pineaquero, oshequi inintasanojeitaquee Tasorentsi. Te irioteriji tseencantatsiri jaoca icantari, irootaque caari iotantee arojei itomi. ²Meeca, nonintane, avirojei itomipee Tasorentsi, irishintopee. Tequera ayojeiteji jaocarica ancanteari, coajicani. Ariorica impiaje aca quipatsiqui, amenajeitavaqueri jaocarica icantari. Impoijiquea ashiasanojeiteri iriori. ³Aamaajeitajari impocaje, irootaque acoajeitancacari meeca ancameetsajeitanaque: anquempejeitajeari iriori, icameetsataque. ⁴Ariorica antaquero caari cameetsatsi, te anquemisanteroji icantavetaqueeri Tasorentsi. Te oncameetsateji ampiatsatearo icantaqueeri. ⁵Tempa piojeitaque ipocaque peerani aca quipatsiqui yoavisacojeitajee. Piojeitaque aisati te iranteroji irinti caari cameetsatsi. ⁶Ariorica quiso avanaqueri, eiro antirotsi arori caari cameetsatsi. Yora antapinitirori caari cameetsatsi te irineeriji Jesoshi, te irioteriji jaocarica icantari, aisati te irishanincateariji.

⁷Noamere, yamataviyeetimpicari. Ariorica antapinijeitiro cameetsatsiri, aitaque acameetsajeitanaque: amoncarajeitacari Tasorentsi, icameetsataque. ⁸Yora antirori caari cameetsatsi, ishanincatacari camaari: tempa iriotaque intasanotacarori caari cameetsatsi. Ari ipocapaaque Itomi Tasorentsi. Iro ipocashitasanotiri irojocacaajeri maaroni yantanitirori camaari. ⁹Ariorica itomintajeitaquee Tasorentsi, eiro antapinijeitirotsi caari cameetsatsi. Itomintaque, irootaque quiso oantaqueeri Ishire, aquempejeitacari. Irootaque caari antapinijeitantajaro caari cameetsatsi. ¹⁰Irootaque ayotantacari ashanincajeitacari Tasorentsi. Yora caari materone cameetsatsiri, te irishanincateariji

Tasorensi. Aisati iquempeta yora caari ninterine ishaninca, te irishanincateariji, irootaque ayotantariri ishanincatacari camaari. ¹¹Jero oca intaquempiri Tasorensi icamantaquempiro peerani: “Cameetsa pinintavacaajeitea”. ¹²Eiro pishiiritsi Caini: ishanincatacari camaari. Yoaqueri irirenti. ¿Paita yoantacariri? Yashi yoiro te incameetsateji, iro cantaincha ineaqueri irirenti cameetsa oni oca vantayetaqueri, irootaque yoantacariri.

Pinintajeiteri piyemisanrarinte.

¹³Noyemisanrarinte, inquishepíríca tseencantsiri, eiro poanaquetsi cavaco. ¹⁴Anintajeitaqueri ayemisanrarinte, irootaque ayojeitancari ancantaitiyempani asavique inquitequi. Peerani te ayoveitarini Tasorensi, iro cantaincha meeca ayojeitajiri. Yora caari ninterine ishaninca, incantaitiyempani intime irinti Sharincaveniqui. ¹⁵Yora qushiriri ishaninca, iriotaque oayeri. Piojeitaque eiro itimitsi oayeri inquitequi.

¹⁶Yora Quirishito irisati coaintsi icamimentajeitaquee, irootaque ayojeitancariri inintajeitaquee. Aisati arori, te oncameetsateji antsaroacayearo ancamimentero ayemisanrarinte. ¹⁷Jeri ashitaarantachari: ineavetaririca yashinoncaaca iyemisanrarinte, terica icoye incavintsayeri, ¿inintirimpa Tasorensi? ¹⁸Noamere, te oncameetsateji ancantashijeitea: “Nonintiri noshaninca”. Iro cantaincha cameetsa aneshinoncajeiteri, anintasanojeiteri, ¹⁹irootaque ayojeitancari aijatasantiriri Tasorensi, te aneroji antane. ²⁰Ayotirica otimi antane, ¿paita inquenqueshireteri Tasorensi? Tempa itsoteiro maaroni, iojeitaque maaroni antajeitiri.

²¹Aisati, nonintane, ariorica ayojeite te aneroji antane, ayojeite aisati ocameetsati anquenquetsacaapinijeiteri Tasorensi. ²²Ariorica anquemisantero

icantaqueeri, aisati amateneri icoacaaqueeri, ayojeitaque ariorica anquenquetsatacayeri, aitaque inquemaquee. ²³Jero oca icantaqueeri: “Pinquemisanteri notomi Jesoquirishito. Pimoncarateneri icantaquempiri iriori: ‘Pinintavacaajeitea’”. ²⁴Ariorica anquemisanrajeitero icantaqueeri, quiso avanaqueri. Aisati iriori, quiso iroajeitaquee. Itiancajeitaquee Ishire, irootaque ayojeitancari quiso yoajeitaquee.

Piojeiteri maaroni oamejeitempineri.

4 ¹Nonintane, eiro piquemisanshijeitaritsi maaroni oamejeitempineri: yamatavimpicari. Ariorica incantempi: “Itiancaquena Tasorensi”, iro cantaincha pijivateri pisampiteri paitarica iroamejeitempini, piotantariri queariorica itianquiri Tasorensi. Aca quipatsiqui timatsi oshequi coavetachari iramatavijeiteeme. ²Jero oca piotantariri otianca nepee Ishire Tasorensi: incantajeite irinti: “Yatiritapaaque Jesoshi, iponeaca inquitequi. Iriotaque Quirishito”. Iriotaque shanincatacariri Tasorensi. ³Iro cantaincha te intianqueriji Tasorensi yora caari cantatsi: “Quirishito ini Jesoshi”. Iriotaque antiquirishito. Piquemacojeitaqueri icanteeti: “Impoque tseyacotearineri Quirishito”. Ainiro meeca tseyacojeitariri. ⁴Noamere, yashijeitaquempi Tasorensi, quiso yoajeitaquempi. Tempa ipincatsaritasanotaque irinti, yanacojeitaqueri maaroni coavetachari iramatavijeitempime. Irootaque caari piquemisanantari yora tseyachari. ⁵Tempa ishanincajeitacari iriori tseencantsiri, irootaque inquenqueshirejeitancarori icoayeri atiri. Iquemisanajeitavaqueri ishaninca iriori. ⁶Aroquea ainti, ashanincajeitacari Tasorensi, iquemisanajeitaquee maaroni iotiriri, irootaque ayotantariri quiso oajeitaqueri Ishire Tasorensi: ora

oamejeitiriri queariotasannotatsiri. Yora caari ioterine Tasorentsi, te inquemisan-tajeiteeji, irootaque ayotantacariri yamatavijeitaca irinti.

Tsame anintavacaajeitea.

⁷Nonintane, tsame anintavacaajeitea. Iriotaque Tasorentsi intasanotacariri yoamejeitaquee anintavacaajeitanteari. Ariorica anintajeitiri itsipapee, arojeitaque itomipee Tasorentsi, ayojeitiri. ⁸Yora caari nintiri ishaninca, te irishanincateariji Tasorentsi: irishanincataquearime, inquempetaquearime, tempa yashi yoiro inintajeitaquee. ⁹Irootaque ayotantacariri inintajeitaquee, itiancaqueri Itomi irapintite quipatsiquica yoavisacojeitajee, ancantaitatitempani asaviquimotantajeiriri anta inquitequi. ¹⁰¿Janica nintasanotantatsiri? Te anintasanoteriji Tasorentsi, irinti inintasanojeitaquee. Itiancaqueri Itomi, icamimentajeitaquee, yoavisacojeitantajeeri. Meeca te inquenqeshiretaje-roji Tasorentsi antajeivetari, eiro yoasanquejeiteetsi.

¹¹Pineaquero nonintane, inintasanojeitaquee Tasorentsi catsini. Irootaque ocameetsatantari anintavacaajeitea arori. ¹²Tecatsi neerine Tasorentsi, iro cantaincha ariorica anintavacaajeitea, quiso iroajeitanaquee Tasorentsi, aiquero ajatatiye anintasanojeitanaqueri. ¹³Itiancajeitaqueero Ishire, quiso oajeitaquee. Irootaque ayojeitantacariri quiso avajeitakeri arori, aisati quiso yoajeitaquee iriori. ¹⁴Itiancaqueri Apa Itomi aca quipatsiquica yoavisacojeitajee, maaroni. Noneajeitakeri, meeca nocamantacojeitakeri. ¹⁵Ancanterica: “Iriotaque Jesoshi Itomi Tasorentsi”, quiso iroajeitanaquee Tasorentsi. Aisati anquempeteitea arori, quiso avanaqueri: anquempetavacaajeitea maaroni. ¹⁶Ari ayojeitaque inintaquee, ashirejeitacarori. Yashi yoiro inintajeitaquee. Ariorica ashi

ayero anintavacayea arori, quiso avanaqueri Tasorentsi, aisati quiso iroanaquee iriori.

¹⁷Coajicani ancamaajeitaque, iro cantaincha eiro atsaroacaaritsi Tasorentsi. Ariorica aveshireimenteari, ayotanaque anintasanojeitakeri arori, aitaque amoncaratacari iriori Jesoquirishito.

¹⁸Ariorica ayojeitaque inintajeitaquee, eiro atsaroacaaritsi. Ariorica inintasanojeitaquee catsini, ¿jaoca ancanteari antsaroacanteariri? Ayojeitericame iroasanquejeitaquee, aitaque antsaroacayearime. Yora tsaroacaariri Tasorentsi, tequeratsita iriote irinintasanoeriri.

¹⁹Ijivataquee Tasorentsi inintajeitaquee, tsame meeca anintajeiteri arori. ²⁰Incanteeterica: “Nonintiri Tasorentsi”, iro cantaincha inquisheririca ishaninca, tseyari ini. Terica irinintajeiteriji ishaninca iriori, tecatsi incanteri irininteri Tasorentsi. Pineaquero, terica irimatero irininteri ishaninca ineapinitiri, ¿jaoca incanteari irinintanteariri Tasorentsi? Te irineeriji irinti. ²¹Jero oca icantajeitakeri Quirishito: “Ariorica anintiri Tasorentsi, aisati anquempeteri ashanincaptee, anintajeiteri”.

Ocarataque mava iotacaajeitakeri Quirishito ini Jesoshi.

5 ¹Ariorica ayojeitakeri Jesoshi iriotaque Quirishito, aitaque yashijeitaquee Tasorentsi. Ariorica anintiri Apa, anintiri aisati Itomi. ²Ariorica anintiri Tasorentsi, anquemisantero icantaqueeri, ayotanteari anintajeitiri maaroni yashijeitacariri. ³Ariorica anintasanoeriri Tasorentsi, anquemisantsanoeriri icantaqueeri. Te ompomerentsitasanoteaji anteneri icantaqueeri. ⁴Ariorica yashijeitaquee Tasorentsi, eiro aijatiritsi tseencantatsiri. Iro caari aijatantari, aquemisantaqueri Tasorentsi. ⁵¿Janica caari oijatiri tseencantatsiri? Tempa yora iotiriri

Jesoshi, cantatsiri: “Iriotaque Jesoshi Itomi Tasorentsi”.

⁶Peerani, ipocantacari Jesoquirishito quipatsiquica, ivaotisataca aisati icamimentajeitaquee, ayojeitancari Quirishito ini. Te apatiro ivaotisataca, aisati icamimentajeitaquee. Aisati oamejeitaquee Ishire Tasorentsi jaoca icantari. Tampatica oamejeitaquee. ⁷Ocarati mava iotacaaqueeri Quirishito ini: ⁸Ishire Tasorentsi, ivaotisataca Jesoshi, aisati icamimentajeitaquee. Omoncaratavacaaca, iotacaajeitaquee jaoca icantari Jesoshi. ⁹Tempa ashirejeitacaro icamantaqueeri atiri, iro cantaincha yanacojeitaqueri Tasorentsi, queario yoametantaque irinti. Icamantacotasano- taqueri itomi. ¹⁰Ariorica aquemisanta- queri Itomi, aquenqeshiretasanotaqueri. Yora caari quemisantiri Tasorentsi, te irishiretearoji icamantacotiriri Itomi: itseencaqueri Tasorentsi, ijitiri irio tseeyachari. ¹¹Aquemisantaqueri ainti Itomi, irootaque irisavicacantajeitajeeri Tasorentsi anta inampiqui, ancantaitati- yempani. ¹²Aitaque incantaitiyempani iraneaje inquitequi maaroni iotiriri Itomi. Yorari caari iotiri, tecatsi incantea irisavique anta inquitequi.

Icantiri: “Pinquenquetsatacaapiniteri Tasorentsi”.

¹³Piquemisantaqueri Itomi Tasorentsi, meeca nosanquenajeitimpiro piotanteari pincantaitiyempani panee anta inquite- qui. ¹⁴Eiro apashiventatsi anquenquetsa- tacayeri: timatsi icoacaaqueeri ancantapi-

niteriri. Ariorica amoncarataquero ayojeitaque ari inquemisantaquee.

¹⁵Ayojeitaque paitarica ancanteari, inquemisantaquee. Aitaque irimataquee- nero oca ancanteari. ¹⁶Ariorica pineeri piyemisantaririnte yantaquero caari cameetsatatsi, iro cantaincha terica intseenqueriji Tasorentsi, pincantacoven- teri iroavisacotanteari. Timatsi yantaqueri pashini tseencantasanotsiri: ariorica pineacotaqueri, piotanaque irijate irinti Sharincaveniqui. Te noncan- tempiji pincantacoven- teri irinti. ¹⁷Te oncameetsateji catsini antayetero caari cameetsatatsi, iro cantaincha eiro ajitashitatsi irijate Sharincaveniqui maaroni antayetirori.

¹⁸Ayojeiti ariorica yashijeitaquee Tasorentsi, te antapinintajeroji caari cameetsatatsi. Yojocoventaquee Itomi, tecatsi incantee camaari.

¹⁹Ayojeitaque ashanincajeitacari Tasorentsi. Irintiquea maaroni tseencantatsiri, ipincatsariventajeita- queri camaari. ²⁰Ayojeitaque ipocaque peerani Itomi Tasorentsi, iriotaque iotacaajeitaqueeri, ayojeitantariri yora Tasorentsisanori. Ashanincajeitacari iriori, aisati ashanincajeitacari Itomi, yora Jesoquirishito. Aisati iquempetacari iriri, Tasorentsisanori ini iriori. Yoaneajeitaquee, ancantaitiyempani aneajeitanaje anta inquitequi.

²¹Noamere, piquemisantirocari ijitasorentsitashiyeetari.

Ari ocarati. Narotaque sanquenajeitim- pirori: *Joa*

YAPIITAJIRO JOA ISANQUENATINIRI IROAMERE

Ivetsajeitari.

^{1,2}¿Ainirompi tsio? ¿Ainirompi, nioti? ¿Tecatsimpa oajeitempine? Narotaque jivatacaajeitaqueriri ayemisantaririnte aca. Niotaque, tsio, aviro icoyeaque Tasorentsi piotantacariri, aisati icoyeajeitaqueri pitomipee. Queario, nonintasanojeitaquempi. Te apaniro nonintajeitaquempi narori, aisati iquempejeitaca maaroni ayemisantaririnte: inintajeitaquempi. Oshequi ashirejeitacaro irineane Tasorentsi, aitaque ancantaitatitempani, tempa queariotasanotaque ocamantajeitaqueeri. ³Oshequi inintajeitaquee Apa Tasorentsi, aisati itomi, yora Avincatsarite Jesoquirishito, queario oni oca yoamejeitaqueeri. Aisati incantaitatitempani incavintsaajeitee, irineshinoncajeitee, irisavicacaajeitee cameetsa.

Intime coajica oshequi tseyyacotearine Quirishito.

⁴Ari noneayetaqueri aparopee pitomipee, oshequi noveshireimentajeitacari. Cameetsa isavicajeiti, iquemisanta-jeitaquero queariotatsiri yoamejeitaqueeri Apa Tasorentsi, aisati yantiniri maaroni icoacaajeitaqueeri. ⁵Meeca, noshaninca, nocoaque nonquenqueshiretacaajempiro intajeitaqueero Tasorentsi yoamejeitaqueeri peerani: ocameetsataque anintavacaajeitea, maaroni. Te naro intearone noamejeitempiro oca. ⁶Ariorica aninteri Tasorentsi, amajeiteneri maaroni

icoacaajeitaqueeri. Ari icoacaajeitaquee ashi ayero anintavacaajeitea, maaroni, anquearioventero. Tempa irootaque icantajeitaqueeri peerani.

⁷Itimi meeca oshequi amatavitanta-tsiri, yoametantiro tseyyantsi, icantajeiti te imponeempaji Jesoshi inquitequi, te iratiritapeeji. Aisati icanti te inquempejeiteeji arori, caari ini Quirishito. Yora tseyyacotariri Quirishito iquishiri iriori, te incoyeji anquemisanteri. ⁸Paamayeariyea: yamatavitimpicari. Oshequi piqueario-ventaquero pantapinitiniri Tasorentsi icoacaquempiri; ariorica pincanteani, eiro patsipetashitarotsi, impinatempiri iriori. Iro cantaincha paamayeari yora coatsiri iramatavijeitempi: ariorica poijsataqueri, pantsipetearo maaroni pantayevetanariri Tasorentsi, tecatsi impinatempiri. ⁹Pojoquiricari Quirishito: eirorica pishiretarotsi yoamejeitaqueeri iriori, te pioteriji Tasorentsi. Iro cantaincha ariorica pincanteani pishiretearo yoamejeitaqueeri, pioteri aisati Iriri: quiso iroajeitanaquempi Apa aisati Itomi. ¹⁰Irijatashitempirica atiri iroamejeitempi, piotavaqueri paitarica yoametacotapinitiriri Quirishito. Terica ontampaticate oca icoavetari iroametempiri, eiro paacameetsatavaqueritsi: eiro pisavica-cairitsi pivancoqui, eiro piquemisanti-ritsi catsini. ¹¹Ariorica paacameetsatavaqueri, pishanincajeitacari: aitaque

pincarajeitaqueri poametantero
tseeyantsi. Te oncameetsateji catsini.

Ivecarataquero isanquenare.

¹²Timatsiquera oshequi pashini
nocoaque noncamantajeitempiri, iro
cantaincha te noninteji nosanquena-
tempiro. Nocoaque nojate noneempi.

Ariorica aneavacaajeitea, noncaman-
tasanotempiro maaroni. Aisati
anquimoshirejeitanaque maaroni.

¹³Ainiro aca otomipee pireento.
Tempa iriojeitaque icoyeaqueri
Tasorentsi. Ivetsajeitaquempi. Ari
ocarati.

Narotaque sanquenatimpirori: *Joa*

MAVATAPAAQUE ISANQUENATINIRI JOA IROAMERE

Ivetsatari Joa Cayo.

¹¿Ainirompi Cayo? ¿Tecatsimpa oyempine? Narotaque Joa, jivatacaajeitiriri ayemisantaririnte aca. Queario, oshequi nonintaquempi.

Cameetsa pintacotapiniteari ayemisantaririnte.

²Noncamantempi, nonintane, nocantacoventapinitaquempi: nocantiri Tasorentsi intasoncakoventempi cameetsa pisavicanteari. Niotaque piquemisantsanotaque, aisati nocantacoventimpi pishintsivatsasasanteari. ³Ainiro areejitachari ayemisantaririnte, icamantapaaquena piquearioventiro pisaviqui cameetsa, aisati piquemisantsanotaqueri Tasorentsi, irootaque noquimoshireimentaquempiri. ⁴Ariorica noquemacotaqueri noshaninca iquemisansanotaque, aitaque noquimoshiretsanotaque. ⁵Nonintane, piquearioventaquero picavintsaajeitaqueri ayemisantaririnte, pitsoteaqueri: yora poneayetachari pashinipeequi nampitsi, maaroni. Cameetsataque. ⁶Icamantajeitaquena maaroni ayemisantaririnte aca, oshequi pinintajeitavaqueri. Ariorica irareetajempí aisati pinampiqui, ocameetsataque pintacoteari; ariorica irijatanahe, pimpajeitavajeri coiteimojeitariri: irootaque icoacaaquempiri Tasorentsi. ⁷Iquenaquenayetanaque iquenquetsataco-

tapinitiri Jesoquirishito, tecatsi incoacojeiteri yora caari quemisantatsi, ⁸irootaque ocameetsatantari intacojeiteari arori, amitacojeiteri inquenquetsatero irineane Tasorentsi: tempa queariotasanotaque ocamantayetaqueeri.

⁹Timatsi nosanquenavetanariri ayemisantaririnte anta, iro cantaincha te impincatsatenaji yora Iriotereshi. Icoaveta irijivatacanteme iriori.

¹⁰Ariorica nareejitempi nonquenqueshi-retacaajeitapaaquempi jaoca icantari: itseeyacotaquena, icantimataquena. Aisati, ariorica yareevetari ayemisantaririnte anta, te irineshinoncatavaqueriji. Aisati iquisaqueri yora neshinoncatavaqueriri areejitachari, aisati te irinintacaajeiteriji incarajeiteri inquemisantejeite.

¹¹Nonintane, te oncameetsateji catsini oca yantayetaqueri yoranqui: eiro piquempetaritsi. Irinti pinquempetea antirori cameetsasasanoyetatsiri. Yora antapiniyetirori cameetsatsiri, iotiri Tasorentsi; yora antapiniyetirori caari cameetsatsi, te irioteriji. ¹²Queario, icameetsasasanotaque Irimitirio. Tempa ineacameetsajeitaqueri quemisantejeitatsiri aca, aisati noneacameetsataqueri, aisati avirori pineacameetsataqueri.

¹³Timatsiquera oshequi nocoaque noncamantempiri, iro cantaincha te noncoyeji nosanquenatempiro.

¹⁴Naamaaca irotaintsi noneempi: ariorica

aneavacayea nontsoteaquempiro,
noncamantempiro maaroni. ¹⁵Cameetsa-
yea pisavique. Ivetsajeitaquempi ashanin-

capee aca. Aisati ashanincapee ara,
novetsajeitari, maaroni.

Narotaque sanquenatimpirori oca: *Joa*

YORA JORASHI ISANQUENATINIRI IYEMISANTARIRINTE

Ivetsajeitari Jorashi iyemisantaririnte.

¹¿Ainirompi, noyemisantaririnte? ¿Tecatsimpa oajeitempine? Narotaque Jorashi sanquenajeitimpirori oca, narotaque antaveetiniriri Jesoquirishito; narotaque irirenti Santiago. Ari niotaque icoyeajeitaquempi Apa Tasorentsi, irootaque piquemisantajeitaririri, aisati oshequi inintajeitaquempi. Iquempoyeaventajeitaquempi, pineanteariri coajica Jesoquirishito. ²Nocoaque incavintsaajeitempi, cameetsa irisavicacaajeitempi. Aisati nocoaque paacameetsatavacaajeitea maaroni, pinintavacaajeitea.

Icantiri: “Paamayeariyea coatsiri iramatavitempi”.

³Piojeitaque oshequi nonintajeitaquempi. Tempa yoavisacojeitaquee Tasorentsi. Meeca noquenqueshirevetaca noncamantempime jaoca icantajeitaquee: itasoncaventajeitaquee, icavintsaajeitaquee, maaroni; iro cantaincha meeca eiro nocamantimpitrosi oca. Timatsi meeca pashini noninti noncamantempiri, irointi. Nocoacaquempi pinquearioventero pinquemisantero yoamejeitaquempiri Tasorentsi, te ompashinitapiniteaji. Eiro piquemisantiritsi yora itsipapee coajeivetachari iramatavijeitempime. ⁴Ainiro yora cantatsiri: “Noquemisanti”, iro cantaincha yamatavitanti. Ioti icavintsaajeitaquee Tasoren-

tsi, yoavisacojeitaquee. Meeca icantashijeitaquempi yoranqui: “Cameetsa antajeitaquero paitarica acoajeitiri, eiro iquisheetsi Tasorentsi”, iro cantaincha irointi yamatavitanti. Te impincatsajeite-riji Avincatsarite Jesoquirishito, irootaque irijatanteari Sharincaveniqui. Tempa irootaque ocantiri Sanquenarentsi.

⁵Timatsi piotasanojeitaqueri, iro cantaincha noninti nonquenqueshireta-caajempiro aisati. Peerani oshequi yashinoncaajeitaca maaroni joriopee anta Ejipitoqui, iro cantaincha yoavisacojeitaqueri Tasorentsi, yaajeitanaqueri pashiniqui quipatsi. Iro cantaincha iconoajeitacari joriopee tseenquiriri Tasorentsi, irootaque yoantacariri iriori. ⁶Aisati itimaveitani inquitequi inampireni Tasorentsi, icameetsaveitani catsini, iro cantaincha ipiatsatacari Tasorentsi. Meeca te irisavicajeji anta ocameetsaite-tinta, ainti yojocaqueri Tasorentsi oshaaviji, anta otsitenitanasotinta. Aitaque isavicaqueri irosati incantacotentanteariri, iroasanquetasantanteariri. ⁷Aisati iquempejeitaca yora soromasatini aisati comorasatini, aisati maaroni ishanincapeeni iriori: oshequi yantajeitaquero caari cameetsatatsi. Yantajeitaquero iashianepee, itsinampaavacaajeitaca, maaroni. Ari yoasanquetaajeitaqueri Tasorentsi, maaroni; irootaque ayojeitan-tacariri otimi Sharincaveni, iroasanquetaa-

jeitanteariri maaroni antapinitirori caari cameetsatsi: incantaitiyempani inquematsicatearo paamari. ⁸Iro cantaincha te inquenqueshireteaji yora amatavitantatsiri. Icantani yantayetaquero iashiane, itsinampavacaaca; itseencaqueri ivincatsarite, ishirontimentajeitacari; icantimajeitaqueri yora inampirepee cameetsari Tasorentsi.

⁹Peerani icanteetini: icamantacaniri Moishishi, icoaveta Satanashi iranaaque-rime anta Sharincaveniqui. Aisati iquempetaca Miyeri, yora ivincatsarite inampirepee Tasorentsi: icoaveta iranaaque-rime iriori inquitequi. Ari icantavacaaca apite. Ari yora Miyeri oshequi itsarocaari Satanashi, oshequi ipincatsataqueri, irootaque caari ipiatsatantari. Apatiro icantiri: “Irinti Tasorentsi piatempineri”. Irootaque icantaqueriri.

¹⁰Noshaninca, yora amatavijeitimpiri te iriojeiteji irisavique cameetsa, iro cantaincha icantimajeitaquere arori ariorica atimi cameetsa. Te aneroji iotantari, iquempejeitacari avira: yantashijeitaro paitarica icoiri. Irootaque iroasanquejeitanteariri Tasorentsi, ¹¹irashinoncaajeitaquea. Iquempejeitacari yora Caini, yora oiriri irirentini. Iquempejeitacari yora Varama: ipinayee-tiri quirequi, irootaque yantantarori caari cameetsatsi. Iquempejeitacari aisati yora Core: ipiatsatacari peerani Moishishini. Tempa iroasanquejeiteri Tasorentsi, maaroni.

¹²Pamene, ariorica papatotapinita poajeita, picoajeiveta pinintavacaajeiteame, pincavintaavacaajeiteame. Iro cantaincha icarajeitaquempi yoranqui, caari pimatasano tantaro cameetsa. Te iriojeiteji iriori impashiventea, oshequi yoajeitaca, te inquenqueshireteriji itsipajeitari. Oshequi ineaveetashita, vero, vero, iro cantaincha te iramitacojei-

tempiji. Iquempetacaro mencori amatavijeitimpiri: amavetaro antearo tampea, pijitashijeiveta ompariye incani, iro cantaincha, te. Iquempetacaro inchato caari timatsi oitsoqui, te oncanteji, ocameetsati anchaquero, amponquiti-reajero, antaajero. ¹³Tempa pineapinijetiro otsapijaqui opitsishimoretaque, te pineacameetsateroji: ari iquempejeitari iriori, te oncameetsateji yantayetiri, oncameetsateme impashiventeame. Pishiacantavetacari impoquiro iotacaim-piri jaoca pinqueneri, iro cantaincha yamatavijeitaquempi. Irijatanaque iriori anta otsitenitanotaque, incantaitiyempani irisavique. ¹⁴Peerani catsini iquenquetsatacotaquerini Enoco, yora ishanincani Aran, icantini: “Pamene, coajica impoque Avincatsarite, incarajeiteri oshequi catsini inampirepee.

¹⁵Iroasanquetaajeitapaqueri maaroni caari cameetsajeitatsine. Iriojeiteri maaroni tseencajeitiriri: ipiatsajeivetacari, icantimajeivetacari, irootaque iroasanquetaajeitanteariri”. ¹⁶Ari iquisashirejeitanaca, icantimajeitaqueri ishaninca, icoasanotaque irantapinitero caari cameetsatsi, oshequi ishemejeitaque. Ipincatsatamempeashitacari ishaninca iramatavitanteariri.

¹⁷Ari, noshaninca, oshequi nonintajeitaquempi, irootaque nocoacantimpirori pinquenqueshiretasanotero icantayetimpirori itiancaneppee Avincatsarite Jesoquirishito.

¹⁸Tempa icamantajeitaquempini: “Coajica pineasanojeitavaqueri tseencantasano tatsiri, irantashijeitearo paitapeerica icoaqueri iriori”. ¹⁹Iriojeitaque amatavijeitiriri itsipapee, irootaque iquisavacaajeitantacari; oshequi itseencantajeiti, te quiso oyeri Ishire Tasorentsi.

Icamantiri Jorashi icoacaqueriri.

²⁰Ari, nonintane, pinquemisantasanojeiteri avinti Tasorentsi, impoji pimatasanojeitero

pintime cameetsa. Pincoasanotero Ishire oametasanojeitempi pinquenquetsacayeri. ²¹Pincoasanojeite irinintajeitempi Tasorentsi. Piojeitaque incavintsaajeitempi Avincatsarite Jesoquirishito, irajeitanaquempi anta inquitequi, pincantaitiyempani pisaviquimojeiteri. ²²Pincavintsaasanojeiteri yora caari iojeitiri Tasorentsi, poametasanojeiteri. ²³Poavisacojeiteri pishaninca, itaacari anta Sharincaveniqui. Queariompia, piquempetari-cari yora piquemisantacajeitaqueri. Eiro pantimatirotsi catsini caari cameetsatsi yantajeitiri iriori.

^{24,25}Tempa timatsi Tasorentsi apaniro, aisati iriori Avincatsarite Jesoquirishito:

yora oavisacojeitaqueeri. Ainiro itasorenca irinti, iquempoyeasanojeita-quempi eiro pantimatantarotsi caari cameetsatsi. Iraajeitanaquempi inquitequi: anta ocameetsaitetasanota-que catsini. Aitaque anta anquimoshire-ventajeitapaajeri, maaroni. Tsame meeca ancamentajeiteri atiri: “Icameetsatanoti Novincatsarite, ipincatsaritanoti, itasorentsitanoti”. Aitaque ancantaitiyempani ancamentapinjeiteri itsipapee, eiro ajocajirotsi. Aitaque ancantaitiyempani.

Narotaque sanquenajeitimpirori:
Jorashi

ICAMANTIRI TASORENTSI JOA PAITARICA IRANTAYETERI JESOQUIRISHITO.

Intanacaro Joa isanquenare.

1 ¹Intasanotacaro Tasorentsi, icamantaqueri Jesoquirishito, impoiiji yovaajiniri iriori inampire, impoiiji iriori yovaajanaro narori, meeca novaajeitempiro avirori. Nopincatsataqueri Tasorentsi, aisati piquempejeitaca, pipincatsajeitakeri avirori; meeca icamantajeitaquee paitarica iranteri Jesoshi: eiro osamanititsi irimatantearori. ²Ari oshequi iotacaquena Tasorentsi aisati Jesoquirishito: ainiro icamantaquenari aisati inijaquenari. Meeca noncamantajeitempiro jaoca ocantari. ³Iroimoshirenajeiteri Tasorentsi maaroni neanateroneri oca nosanquenajeitaquempiri aisati maaroni quemajetavaqueroneri. Iro cantaincha eiro iquemashitarotsi, irointi irimatasanotero ocantaqueriri inquimoshiretanteari. Pamene, eiro osamanititsi irimatantearori Jesoshi maaroni oca noquenquetsatacotiriri.

⁴Narotaque Joa sanquenatirori oca. Nosanquenajeitaqueeneri savicajeitatsiri anta Ashiaqui, aisati iriori yora quemisantajeitatsiri anta 7 nampitsipeequi. ¿Ainirojeimpi, maaroni? Ainiro Tasorentsi iriori, irosati icanta: itimini peerani, irosati meeca; irosati incanteani, coajica. Nocamantaqueri: “Pincavintsaa-jeiteri noyemisantaririnte anta Ashiaqui, cameetsa pisavicacajeiteri”. Irosati nocantaquerori Ishire, ora quiso oiriri

ipincatsariventanti. ⁵Irosati nocamantaqueriri Jesoquirishito: tempa cameetsa yovaajeitaqueero arori icantaqueriri Tasorentsi. Iriotaque nijantajirori itinaanaja, aisati ipincatsariventajeitiri pincatsarivetachari aca quipatsiquica. Oshequi antajeivetacaro caari cameetsatatsi ajajeitanteameri Sharincaveniqui, iro cantaincha oshequi ineshinoncajeitaquee, yaparajatimentaquerero iriraja, yoavisacojeitantaqueeri. ⁶Icantajeitaquee: “Pincarajeitena ampincatsarijeitaje, aisati pinquenquetsatacapiniteri Apa: pincanteri iramitacojeiteri piyemisantaririnte”. Tsame ampincatsatasanojeiteri maaroni, ancantaitiyempani. Aitaque ancantajeitari.

⁷Pamene, inquenapaaje mencoriqui, aitaque aneajeitavajeri maaroni. Aisati irineajeitavajeri pajacojeivetacariri peerani. Ari intsaroacajeitavaqueari maaroni tseencajeitiriri, iriraajeitanaquea, jii, jii. Queario, aitaque oncanteari. ⁸Te impashinitapiniteji Avincatsarite, itasorentsitaque, irosati icantani: peerani, aisati meeca, aisati coajicani. Icantani: “Narotaque intacarori maaroni, aisati narotaque vecarayeroneri maaroni”.

Ijivataqueri ineaqueri Joa.

⁹Ari, noyemisantaririnte, aquempetavacaajeitaca: aquemisantajeitakeri Jesoshi, irootaque yoashinoncapinijeitantaqueeri tseencantatsiri. Ipincatsariventajeitaquee

Jesoshi, irootaque amavejeitantarori. Noquenquetsatiro irineane Tasorentsi aisati noquenquetsatacotaqueri Jesoshi, irootaque yojocanteetaquenari aca ovoyejaqui ipajiyeetiri Patimoshi. ¹⁰Ari tomincoqui noquenqueshiretasanotaqueri Tasorentsi, irosati noquemantacariri iquenquetsatacaaquena. Antearojenca ineanataquena, iquempetacari tiorentsi; jajencaitaque irineane, ¹¹icantaquena:

—Pisanquenatero maaroni nonijaayempiri, impoji pimpacanteri quemisantajeitsatsiri anta Ejesoqui, Eshimirinaqui, Perecoaqui, Tiatiraqui, Sarireshiqui, Jirarerejaqui, jero Araoriseaqui. Ocarataque inampipee 7.

¹²Nopitsocashitanacari yora quenquetsatacaaquenari; ari noneaqueri onantari veera, ocarataque 7, yovetsiqueetiro oro. ¹³Nianqui noneaqueri isatecaca quempetariri Jesoshi, yora poneainchari inquitequi peerani, iquempetapaaca yatiritantapaacaniri. Iquitsaataro tsantsashitsari iitsaare, onaque inejiqui quempevetarori ishiticatsaqui, yovetsiqueetiro oro.

¹⁴Oquitamaroishitanotaque iishi, oquempetacaro ampeji aisati sharaca: quitamaro catsini. Oquempetacaro iroqui paamari amorequi. ¹⁵Oshipaquireaque iiti, oquempetacaro ashirotsatsiri saancanatatsiri. Antearojenca ineanati, iquempetacaro oshequi ovarijare antearo, sooo. ¹⁶Yajiricaqueri iracosanoriqui 7 impoqui; ocontetapaaque ivantequi ivesamento, otsaampiti apite omititsaqui; oshipaquireasanotaque ivoro, oquempetacari catsirincaiteri, ishiquireasanotaque, shipaquirerere. ¹⁷Noneantacariri, notaanaque iitiqui, toren. Oquempetacata nocamaque. Ipamitaquena iracosanoriqui, icantaquena:

—Eiro pitsaroacaanatsi, narotaque intasanotacarori maaroni, aisati narotaque vecarayerone maaroni. ¹⁸Naro aneasanotatsiri. Nocamasanovetaca, iro

cantaincha naneanaji aisati; meeca noncantaitiyempani nanee. Eiro nocamajitsi aisati. Narotaque cantajeiterine ariorica incame atiri, eiorica icamitsi; narotaque cantajeiterine janicarica jatatsineri inquitequi aisati janicarica jatatsineri Sharincaveniqui. ¹⁹Meeca pisanquenatero oca pineaqueri, aisati pisanquenatacotero nantayeteri coajica. ²⁰Meeca noncamantempero caari pioti incaranqui. Pineaqueri impoqui najiricaqueri: ishiaqueri yora jivatacaajetiriri quemisantajeitsatsiri anta 7 nampitsipeequi. Meeca piotaque nopincatsariventajeitiri. Aisati ora onantari veera: oshiaqueri maaroni quemisantajeitsatsiri anta nampitsiquinta. Meeca piotaque quiso noajeitanaqueri.

Isanquenajeitiniri quemisantajeitsatsiri anta Ejesoqui.

2 ¹Jero aisati icantaquenari Jesoshi: —Jero oca pisanquenateneriri yora jivatacaajetiriri quemisantajeitsatsiri anta Ejesoqui: “Meeca noncamantempero icamantaquenari yora ajiriquiriri impoqui iracosanoriqui: yora aniitatsiri anta onantariqui veera, caratatsiri 7.

²ICantimpi: ‘Niotaquero pantayetaqueri, niotaquero pipomerentsiventaquenaro nocoacaimpiri, te pishemearoji. Niotaquempi te pishinetimateriji piyemisanrarinte irantapinitero caari cameetsatsi. Ainiro jatashivetimpiri cantashitachari: “Narotaque itiancane Quirishito”, iro cantaincha piotaqueri iramataviterime quemisantatsiri: niotaque te pishineteriji inquenquetsatacayempi. ³Niotaque oshequi pineacatsimentaquena, iro cantaincha te pishemearoji, te pojocajeroji pantayetaquenari.

⁴Iro cantaincha ainiro pojocaqueri aparo: peerani pinintasanovetaquena; meecari, meeca te pinintasanotenaji. ⁵Pinquenque-shirejeitea jaoca picantaniri peerani; te

pinquempejeiteaji meeca. Pinquenqueshi-rejeitea pinquempejianteari peerani, iroaquerani piquemisantajeitaque.

Pinquenqueshireempa, pinintasanojeitajena aisati. Eirorica pinintajanatsi, nojatashitimpicari, notsoncajeitimpicari.

⁶Iro cantaincha timatsi noneacameetsa-tantimpiri: te pineacameetsateroji yantayetaqueri oijajeitiriri Nicorashi, yantashiyetaro caari yai. Aisati narori, te noneacameetsateroji yantajeitiri.

⁷Otimirica piquemantari, pinquemavaquero oca nocamantaquempiri. Peerani otimini Erequi inchato oaneantatsiri: arioricame iroyearome peeraniniri, incantaitiyempanime iraneeme. Meeca ainiro quempevetarori anta ocameetsaite-tinta, anta Tasorensiqui. Ariorica cameetsa pisavicajeite aisati pimatapinitaquenaro nocoacaimpiri, onquempetaquea poaquearo inquitequi oaneasanojeitimpineri: queario pincantaitiyempani pisavicajeite anta inquitequi”.

Irootaque isanquenatacaaquenari Jesoshi.

Isanquenajeitiriri quemisantajeitatsiri anta Eshimirinaqui.

⁸Aisati icantaquena Jesoshi:

—Jero oca pisanquenajeiteneriri yora jivatacaajeitiriri quemisantajeitatsiri anta Eshimirinaqui: “Meeca noncamantempiro icamantaquenari yora intasanotacarori maaroni, vecarayeroneri maaroni. Icamaque peerani, impoiji itinaanaja.

⁹Icantimpi: ‘Niotaquero pantayetaqueri, niotaquero oshequi picatsimentaquina, niotaquero pashinoncaimentaquina: iro cantaincha eiro pipeacotarotsi nompinatanotempi anta inquitequi. Niotaque oshequi icantimajeitaquempi yora shiavetariri quemisantatsiri. Icantanro-jeiveta: “Noquemisanti”. Jaaquea narori, te inquemisantajeitenaji, irinti iquemisan-taniroti Satanashi. ¹⁰Queario, oshequi

pinquematsicatearo, iro cantaincha eiro pitsaroashiretitsi. Yora camaari iroimin-quearantacantempi caravosoqui, icoaque iriotantempiri queariorica piquemisantasantaquina. Oncarate 10 quitaiteri oshequi pineacatsiyetaro paitapeerica. Pinquearioventenaro maaroni nocamantaquempiri, irosati pincamanteari; impoiji nompinatanotempi, aisati pincantaitiyempani panee anta nonampiqui. ¹¹Otimirica piquemantari, pinquemavaquero oca nocamantaquempiri. Ariorica cameetsa pisavique aisati pimatapinitenaro nocoacaimpiri, eiro pijatitsi avirori Sharincaveniqui”.

Irootaque isanquenatacaaquenari Jesoshi.

Isanquenajeitiriri quemisantajeitatsiri anta Percamoqui.

¹²Aisati icantaquena Jesoshi:

—Jero oca pisanquenateneriri yora jivatacaajeitiriri quemisantajeitatsiri anta Percamoqui: “Meeca noncamantempiro icamantaquenari yora ashitarori ivesamento, tsampitatsiri apite omititsa-qui. ¹³Icantimpi: ‘Niotaquero maaroni pantayetaqueri, niotaque ara pisaviquira itimi aisati oshequi pincatsatiriri Satanashi: queario isaviquimojeitimpi iriori. Niotaque piquemisantasantaquina, te pojoquenaji. Peerani itimini pinampiqui Antipashi: yora quenquetsa-tacotanari, antanarori maaroni nocoacairiri. Pineacojeitaqueri yoyeetaqueri, iro cantaincha te pojocajeiteroji piquemisantaquina. ¹⁴Iro cantaincha ainiro pantayetiri caari noninti. Noshiacantempiro: ainiro yoametaqueriniri Varama peerani Varaca; impoiji iriori yantacaajeitaqueri pijrioririnteni caari cameetsatsi: ipincatsatashijeitaro yovetsicayetiri atiri aisati yantapiniyetiro caari yai. Ainiro meeca picarajeitiri shiaqueriniri yora Varama: yantacaarantaquempi pipinca-

tsatashiyetaro yovetsicane atiri aisati pantashiyetaro caari pai. ¹⁵Queario iriojeitaque oijajeitiriri Nicorashi. Te oncameetsateji yantajeitaqueri: yantacaa-jeitimpicari yantayetiri iriori. ¹⁶Pinquenqueshirejeitanaquea, eiro piquempetajatsi chapinqui. Eirorica pojocajeitirotsi pantayetiri, nojatashijeitimpicari nompoyereajeitapeempi. Ainiro novesamento novantequi nompesajeitan-tapeempiri, peti, peti, peti. ¹⁷Otimirica piquemantari, pinquemavaquero oca nocamantaquempiri. Ariorica cameetsa pisavique aisati pimatapinitaquenaro nocoacaimpiri, nompaquempi poyeari caari conijatsi, oquempetaca nopashi-jeitacari peeraniniri mana. Aisati nomperi quitamarori mapi, nosanquena-tero mapiqui ivajiro iroaquerari: iriotoero iriori ivajiro, iro cantaincha eiro iotirotsi itsipapee”.

Irootaque isanquenatacaaqueenari.

Isanquenajeitiniri quemisantajeitatsiri anta Tiatiraqui.

¹⁸Aisati icantaquena Jesoshi:

—Jero oca pisanquenateneriri jivataca-jeitiriri quemisantajeitatsiri anta Tiatiraqui: “Meeca noncamantempiro icamantaquenari Itomi Tasorentsi: oquempetacaro iroqui paamari amorequi, aisati oshipaquireaque iiti, oquempetacaro ashirotsatsiri saancanata-siri. ¹⁹Icantimpi: ‘Niotaquero pantayeta-queri. Niotaque pinintavacaajeitaca, piquemisantajeitaquena, pintacojeitacari pishaninca, piquearioventaquenaro maaroni nocoacajeitaquempiri. Aiquero pijatatiye pimatasañojeitanaquero. ²⁰Iro cantaincha ainiro pantiro caari noninti: pishinetaquero ora Jesavere oamejeitaqueri quemisantinari yantayetantacarori caari yai aisati iquemisantantacarori yovetsicayetiri atiri. Ocantaveta: “Noquenquetsatocotapinitiri Tasorentsi”, iro cantaincha amatavitapinijeit-queri quemisantajeitanari. ²¹Noyeaveta-

caro onquenqueshireanaeame; iro cantaincha te oncoyeji onquenqueshiretea, te oncoyeji ojocayetajero antayetiri caari ai. ²²Meeca noncamantempi: nojoquuitaca-yearo, aisati eirorica iquenqueshireajeitatsi yora quemisantajeitirori, noashinoncaasano-jeiteri iriori catsini. ²³Queario noajeiteri maaroni oijajeitirori Jesavere, nontsoncajei-teri, maaroni. Impoiji iriojeitanaque maaroni quemisantajeitatsiri niotaquero maaroni iquenqueshirejeitiri atiri aisati niotaquero maaroni icoajeitaqueri. Ocamee-tsaticara pantajeitaqueri, aitaque noncavin-tsaasanojeitempi; iro cantaincha terica oncameetsateji, aitaque noashinoncaajei-tempi. ²⁴Yorari pitsipapee, caari quemisan-tiro Jesavere, aisati caari antasanotiniri icantavetariri Satanashi, tecatsi noncantajei-teri; ²⁵irointi incanteani inquemisantena irosati nareetantapaajeari. ²⁶Ariorica pimatapinitaquenaro maaroni nocoacaa-quempiri irosati nareetantajeari, ari nompeajempi pincatsariventajeiterineri oshequi atiri. ²⁷Oquempetaca narori, icantaquena Apa nopincatsaritantacari, aisati noncantempi avirori pimpincatsarita-sanotantanaqueari. Ariorica ompariaque coviti, omporocapaaque maaroni, poyere; aisati pinquempetea avirori: pimpyereajei-tajeri maaroni caari quemisantajeitana, poyere. ²⁸Pimpincatsaritanotanaque, oshequi noaneenquempi, pinquempeteari impoquiro anteariteaquiri. ²⁹Otimirica piquemantari, pinquemavaquero oca nocamantaquempiri”.

Irootaque isanquenatacaaqueenari Jesoshi.

Isanquenajeitiniri quemisantajeitatsiri anta Sarireshiqui.

3 ¹Impoiji aisati icantaquena Jesoshi: —Jero oca pisanquenateneriri jivatacaajeitiriri quemisantajeitatsiri anta Sarireshiqui: “Meeca noncamantempiro icamantaquenari yora quiso oirori Ishire Tasorentsi: yora ajiriquiriri 7 impoquiro.

Icantimpi: ‘Niotaquero maaroni pantayeta-
queri; ijitashiyeetimpi avirojeitaque
quemisantincari, iro cantaincha niojeitimpi
nainti oshequi pitseenqui. ²Queariompia,
pitseencasanotajicari, pijaticari Sharincave-
niqui. Te onimoteariji Tasorentsi pantayeta-
queri. Piquemisantaveta: pinquenqueshire-
jeitea meeca pinquemisantasannotanteari.
³Pinquenqueshiretasanotanajero noneane
piquemaqueri peerani: pishiretasanotana-
jearo, pinquenqueshiretanajea. Eirorica
piquemisantasannotajana, nojatashitempi,
noasanquetayempi. Te piojeiteji jaoca
oncarate nojatashitantempiri: noquempeta-
cari coshinti, te pioteji jaocarica oncarate
irijatashitantempiri incoshitantempiri.
⁴Oshequi pitseencantajeiti, iro cantaincha
ainiro timaarantaintsiri quemisantaquenari:
cameetsa isavicajeiti irinti. Pantajeitaquero
caari cameetsatatsi noshiacantaquempiro
piquipatsitiro piitsaare; irintiquea quemisan-
tanari, te inquipatsiteroji iitsaare;
noneaquero oquitetaque, oquitamarotasano-
taque. Queario icameetsataque noneacamee-
tsatantacariri. ⁵Maaroni antajeitaquerori
nocoacaajeitaqueriri inquitsaataqueoro ora
quitamarotasannotatsiri catsini. Ainiro
osanquenataca ivajiropee maaroni savicatsi-
neri inquitequi. Nompeajero ivajiropee
tseencajeitanari, iro cantaincha eiro
nopeajirotsi ivajiropee antirori maaroni
nocoacairiri. Aisati noncamanteri Apa:
“Iriotaque yoca quemisantaquenari”. Irosati
noncamantajeiteriri maaroni inampirepee.
⁶Otimirica piquemantari, pinquemavaquero
oca nocamantajeitaquempiri”.

Irootaque icantajeitaqueriri Jesoshi
sarireshisati.

**Isanquenajeitiniri quemisantajeitatsiri
anta Jirarerejaqui.**

⁷Aisati icantaquena Jesoshi:

—Jero oca pisanquenateneriri
jivatacaajeitiriri quemisantajeitatsiri anta
Jirarerejaqui: “Meeca noncamantempiro

icamantaquenari yora cameetsatasanota-
tsiri, yora Quirishitosanori. Iriotaque
ishanincani Iravirini, impincatsariventa-
sanotee. Incanterica: ‘Intspatena yoca’,
eiro itimitsi tsaneemparine. Incanterica:
‘Eiro itsipatanatsi yora’, tecatsi areetaca-
yearine. ⁸Icantimpi: ‘Niotaquero pantaye-
taqueri. Peerani nocoacaitaquempi:
“Pinquenquetsatero noneane, namitaco-
temp”. Ari pimatitaquenaro, irosati
meeca pimataquenaro: tecatsi incantee-
temp iroimajerenteetempi. Te pishequi-
jeiteji, aisati te pimpincatsarijeiteji, iro
caincha piquearioventajeitaquenaro
nocantajeitaquempiri. Picantajeitaqueri
atiri: “Noquemisantaqueri Jesoquiri-
shito”, te pimpashiventacayenaji. ⁹Ainiro
ashaninca quemisantiriri Satanashi,
irootaque iquisantaquempiri, iro cantain-
cha icantashita: “Noquemisantiriri
Tasorentsi”. Te inquemisanteriji,
itseeyani. Coajica nareetacaajeitajeari
aviroriqui intiyoashitantapeempiri,
impincatsatashitantapeempiri: iriojeitana-
que oshequi nonintajeitaquempi.
¹⁰Yoashinoncaajeivetaquempi, iro
caincha piquearioventaquero nocanta-
quempiri, te pishemearoji, irootaque
nojocaacoventantaquempiri. Coajica
noneantajeiteari maaroni savicajeitatsiri
quipatsiqui notanteari jaoca icantajeita.
Ompomerentsitimojeitaqueari maaroni
atiri; iro cantaincha, queario nojocaaco-
ventajeitempi. ¹¹Pamene, eiro osamaniti-
tsi naretantajempiri. Pincanteani
pinquemisantajeite, impoji tecatsi
tsaneavaquempine pijatanaque inquite-
qui; pisavicapaaje anta, pincantaitatijem-
pani. ¹²Ariorica pimataquenaro maaroni
nocoacaajeitaquempiri, ari nosavicacaa-
sanotempi anta itiminta Tasorentsi: eiro
pipajatsi aisati. Nosatoncaatemp
pivancainaqui ivajiro Tasorentsi
iriotanteeteari pishanincatacari. Aisati
nosatoncaatemp ovajiro inampi Tasoren-

tsi: ora Jerosare iroaquerari poneachaneri inquitequi. Impoiji iriotanteeteari pinampitaro avirori. Aisati nosatoncaatempí novajiro narori, iroaqueratajantsiri, iriotanteeteari ashanincatavacaajeitaca. ¹³Otimirica piquemantari, pinquemavaquero oca nocamantaquempiri’”.

Irootaque isanquenatacaaquenari Jesoshi.

Isanquenajeitiniri quemisantajeitatsiri anta Araoriseaqui.

¹⁴Aisati icantaquena Jesoshi:

—Jero oca pisanquenajeiteneriri jivatacaajeitiriri quemisantajeitatsiri anta Araoriseaqui: “Meeca noncamantempiro icamantaquenari yora Queariotasanotatsiri, ovaajeerori ora icantaqueeri Tasorentsi: iriotaque Quirishitosanori. Iriotaque intarori yovetsicantaque: imataquero maaroni icantaqueriri Tasorentsi. ¹⁵Icantimpi: ‘Niotaquero maaroni pantayetaqueri. Pinquearioventenarome nocoacaimpiri, noshiacantempime catsirincajari; pintseencasante-name, noshiacantempime catsincajari. Niotaque te pinquearioventenaroji nocoacaimpiri, iro caintaincha te pintseencasantenaji; irootaque noshiacantantaquempirori saavajari. Eirorica picoi pincatsirincajate, ari pincatsincajate; aisati oquempetaca, eirorica picoi pinquemisantasante, ari pintseencasante: eiro piconoirotsi. ¹⁶Te noncoyeji nirero saavajatsiri: noquishocajataquero, ontimaite. Aisati avirori, te noneacameetsatempiji.

¹⁷Picantajeiveta: “Naro ashitaarantajeitachari, oshequi nomayetaque, tecatsi coiteimotajenane”. Picomitaca: te pioteji pashinoncaaca; pashinoncaasanotaca, tecatsi timimotempine, piquempetaca picaaratsempequitaque. Te piotasanoteriji Tasorentsi: oquempetaca te pameneji. ¹⁸Meeca noncantempí:

pamanenaro oro cameetsatasanotatsiri, ontimimotantempiri pashitaarantantajeiri. Aisati pamanenaro quitsaarentsi quitamarori pinquitsaantantajeiri eiro ineanteetajimpitsi, eiro pipashiventantajatsi. Pamanenaro aisati aavintarontsi pincajoquitajeiri, pamenantajeiri. Pineaquero, ariorica pincantena, ari nonquemisantaacasantempí, noameetsajitempi eiro pipashiventantatsi, niotacaasanojeitantajempiriri Tasorentsi. ¹⁹Ariorica nonintasanotiri ashaninca, noametiri, aisati noasanquetairi, iriotanteari eiro yantantajarotsi caari cameetsatsi. Meeca eiro pitseencantitsi, irointi pinqueshireempa: pincoasantaje pioteri Tasorentsi. ²⁰Pamene, oquempetaca nocatiapaaca saiteriqui, nocoaque noneempi. Ariorica pineavaquena aisati povetsatavaquena, nonqueapaaque, nosaviquimotapeempi aisati noimotapeempi. Nocoasantaque ashanincatavacaajeitaquea. ²¹Tempa nomataqueneri Apa maaroni icoacaquenari, impoiji nosaviquimotaqueri, notsipatajari nopincatsariventanti. Meeca pinquempetajena: ariorica pimataquenaro maaroni nocoacaajeitaquempiri, ari pisaviquimotena pintsipatena ampincatsariventantajeite. ²²Otimirica piquemantari, pinquemavaquero oca nocamantajeitaquempiri’”.

Irootaque isanquenatacaaquenari Jesoshi.

Iquenquetsatacotiri Tasorentsi aisati saviquimojeitiriri.

4 ¹Impoiji namenajaji aisati, noneasantaquero inquite, tsompoina; oquempetaca ashitareaca ashitacorontsi. Impoiji noquemajiri aisati yora noquemaqueri incaranqui, ariorica ineanati ishiavetacari tiorentsi. Icantaquena:

—Caatanaque aca jenoquica. Noncamantempiro nantayeteri coajica.

²Irosati otentashiretantaquena Ishire Tasorensi, irosati inquitequi. Jeri noneapaaqueri Tasorensi, isaviqui isavicamentoqui ipincatsaritantari.

³Oshequi imarereataque, iquempetacaro mapi marereatatsiri: quitioncanirotatsiri, quenashinirotsiri, maaroni. Aisati ainiro anta savirensi, ishoncacaro isavicantari.

⁴Aisati oshoncacaro isavicantari oshequi pashini savicamentotsi, ocarataque 24. Anta isavicajeitaque 24 savicacantantsiri, pincatsarijeitatsiri. Iquitsaajeitaro iitsaare quitamaromaori, yamatseejeitaca. Iro yovetsiqueetiri iramatseere oro.

⁵Oponeca ivincatsarimentoqui Tasorensi quempetarori iporequi aisati itirei. Aisati inejitacaro tsioronsi, ocarataque 7: oshiacantaca Ishire Tasorensi. ⁶Aisati inejitacaro incajare, oshiaquero amenaaronsi.

Aisati anta inejitacari aparoni ivira, jeri itapiiqui itsipa, jeri iracosanoriqui aisati irampatequi itimi itsipapee ivira. Icarajeitaque 4. Otimi iroqui iriori ivoroqui aisati otimi iroqui itapiiqui. ⁷Ishiaqueri aparoni maniti; irio itsipa ishiaqueri vaca; irio itsipa ishiaqueri shirampari; irio itsipa ishiaqueri paquitsa, itimpavanquitanaca. ⁸Ari otimi ishivanquipee virantsi 6; oshequi iroquipee, jaocarica onayetaqueri. Icantani ipampoyea-ventajeitiri Tasorensi: quitaiteriqui, tsiteniriqui; te iroimpacayeroji. Jero oca ipampoyeapinitiri:

Icameetsataque, icameetsataque,
icameetsataque yora Avincatsarite
Tasorensi:

oshequi itasorensitaque, tecatsi
ompomerentsitimoteari.

Icantani itimi: peerani, irosati meeca,
aisati coajicani.

⁹Ari yapiitapinitiro:

Icameetsasananoti Tasorensi, oshequi
nopincatsatiri.

Oshequi nopasonquitiri yora
pincatsariventaquenari.

Icantani yanei, eiro icamitsi catsini.

¹⁰Ariorica iquemapinijeitavaqueri yora 24 savicacantatsiri, itiyeroashitapinijeitacari Tasorensi, ipincatsajeitakeri. Yaajeitaquero iramatseerepee yoaniijeitakeri iitiqui, ipampoyea-ventajeitiri:

¹¹Picameetsasananotaque, Novincatsarite, oshequi pitasorensitaque.

Ocameetsati noneacameetsajeitimpi,
nopincatsajeitimpi.

Niotaque tecatsi pomerentsitimotem-
pine: tempa pivetsicaquero
maaroni timajeitatsiri.

Picoaqueni peerani ontime paitapee-
rica, irootaque otimantacari
meeca.

Iquenquetsatacotiri Jesoshi,
ishiacantiri ovisha.

5 ¹Ari noneaquero aisati iracosanoriqui Tasorensi yampinaicaquero sanquenarentsi, osanquenataca tsompoinaqui aisati acaquero. Ari ampinaica aisati otsinetaca: ocarataque 7 otsinetaca.

²Jeri noneaquero inampire Tasorensi, shintsitanotatsiri, icantaveta:

—¿Janica cameetsasananotatsiri
irimantearori irampinaicareajero oca
sanquenarentsica, intsinecareajero?

³Ari namenajeivetanaca, tecatsi anquerine. Tecatsi materone irampinaicareajero: inquiresati, quipatsisati, sharincavenisati, tecatsi catsini. ⁴Te intimeji catsini cameetsasananotatsine, matasanoteroneri irampinaicareajero, irootaque niraantanacari: noashiretanaca te intimeji camantenane ocantayetiri sanquenarentsi. ⁵Impoiji icantaquena aparoni savicacaantatsiri:

—Eiro piraatsi. Timatsi ampinaicareaje-
roneri: yora ishanincani Jorani; iquempe-
vetari maniti, oshequi ishintsiti. Aisati
ishanincatarini Iravirini, aisati oshequi
ipincatsariti. Imataqueneri Tasorensi
maaroni icoacaajeitakeri, irootaque

irimatantajarori irampinaicareajero sanquenarentsi, aisati intsinecareajero.

⁶Ari ainiro anta Tasorentsi, jeri ivira, aisati yora savicacantajeitatsiri. Jeri noneaqueri isatecaca nianqui Ovisha, yamashitaca ora isatayeetaqueri peerani yoanteetacariri. Otimi itseequi 7, aisati iroqui 7: oshiacantaquero Ishire Tasorentsi, itiancaquero otsoteaquero quipatsi. ⁷Ari isavicaque Tasorentsi ivincatsarimentoqui, yajiriquiro iracosanoriqui sanquenarentsi, ampinaicapatitachari. Ari ijataque Ovisha iriori, yaapaaquero. ⁸Impoiji yora virantsi aisati yora savicacantayetatsiri itiyeroashijeitacari Ovisha. Yajiricajeitiro shiavetarori ijvaviquimento; yajiricajeitiro aisati shiavetarori tsota, yovetsiqueetiro oro: otimi tsoompoina casancapatsari. Oshiaquero iroori casancapatsari iquenquetsatacapinijeitiri quemisantsirsi Tasorentsi. ⁹Impoiji ipampoyeaventajeitiri Ovisha pampoyeantsi iroaque-rari:

Ocameetsati pajiriquero avinti sanquenarentsi, aisati ocameetsati pintsinecareajero ora otsineyetacara.
Tempa peerani yoyeetaquempi, aparajatimentajeitacari piraja maaroni atiripee, poavisacojeitantacariri irisaviquimo-jeitanteariri Tasorentsi, maaroni. Poavisacojeitaqueri timayetatsiri maaroni atiripee, nashiyetarori maaroni irineanepee.
Queario, poavisacojeitaqueri poneayetachari maaroni nampitsi-peequi, jaocarca isavicajeitiri.
¹⁰Pipeajeitaqueri pincatsarijeitatsiri aisati quenquetsatacapinijeitiriri Tasorentsi:
impincatsariventajeiteri maaroni savicajeitatsiri quipatsiqui, aisati incanteri Iriri irimitacojeiteri.

¹¹Impoiji namenajaji aisati, noneajeita-queri; aisati iriori oshequi catsini inampirepee Tasorentsi: te aparopee irine, oshequisano catsini. ¹²Antearojenca ipampoyeaventajeitiri:

Icameetsatasanotaque Ovisha yoyeetaqueri, iojeitaque maaroni timajeitatsiri oshequi itasorentsitaque, oshequi timimojeitiriri, oshequi ioti catsini, maaroni imayeta-queri catsini.
Tsame maaroni ampincatsajeiteri, aneacameetsajeiteri, aveshireimen-tajeiteari.

¹³Aisati noquemajeitaqueri maaroni savicajeitatsiri inquitequi, quipatsiqui, aisati maaroni camajeivetainchari: yora itijeevetacari quipatsiqui, aisati yovinqueevetari; ipampoyeajeitaque maaroni catsini:

Tsame aveshireimentajeiteari Ovisha maaroni, ampincatsajeiteri, aneacameetsaje-iteri, ancantaitatitempani.
Tempa itasorentsitasanotaque, icantani, peerani.

¹⁴Irosati icantantacari yora 4 virantsi:
—Aitaque ancantajeiteari, ampincatsa-tasanojeiteri.

Aisati itiyeroashijeitacari savicacanta-jeitatsiri, ipincatsajeitaqueri maaroni.

Itsinecareajiro sanquenarentsi.

6 ¹Ari ocarataque 7 otsinetaca sanquenarentsi. Noneacotaqueri Ovisha itsinecareajiro aparoni, irosati noquemantacari virantsi, antearojenca ineanati, iquempetacaro itirei, antearojenca. Icantiri quijacotariri cavayo:
—Caate, pimpoque aca.

²Irosati noneantavacariri jivatapain-sirsi: jeri iquijacotapaacari cavayo quitamarori, yajiricaquero iveane. Yamatseejetaqueri; coajica irijatanaque

inquisajeiteri quishiriri, incoaque iranaacojeiteri irimanateri, impoyereajeiteri.

³Impoiji itsinecareajiro otsipa, irosati icantantari itsipa virantsi:

—Caate, pimpoque aca.

⁴Jeri iquenapaaque itsipa cavayo, quitioncatasanotatsiri. Icanteetiri:

—Meeca poamejeiteri atiri irimanata-vacaajeitea, iroavacaajeitea.

Ari ipeetavaqueri antearo ivesamento.

⁵Impoiji yora Ovisha itsinecareajiro otsipa, irosati noquemantacari itsipa virantsi, icantiri:

—Caate, pimpoque aca.

Irosati noneantavacari iquenapaaque potsitari cavayo, yajiricapaaquero quijacotariri imoncaratantayetariri tenayetatsiri, paitapeerica. ⁶Irosati noquemantacari satecainchari virantsi nianqui, icanti:

—Te aneasanoteroji tirico aisati oquempetaca shinqui, irootaque opinatasantantacari. Irointi oreji orivo aisati ovaja, irootaque timasanotaintsiri.

⁷Impoiji itsinecareajiro otsipa, ocaratapaque meeca 4, irosati noquemantacari itsipa virantsi, icantiri:

—Caatanaque, pimpoque aca.

⁸Jeri noneavaqueri pashini cavayo, quiterivitiri; ipajita yora quijacotapaariri: Caamanentsi. Yoijatapairi pajitachari Sharincaveni. Icantavaqueri:

—Aviro cantacoventajeiterineri oshequi atiri anta quipatsiqui, nocoaque pimpeaarantajeiteri, peti, peti; paacanta-jeiteri itashe; pojoquitaacaranteari; pintianqueneri maniti irantsicaaranteri, irovamaaranteri.

⁹Impoiji itsinecareaquero otsipa, ocaratage meeca apapacaroni; irosati noneantacarori itaapinitantarori casanca-patsari. Itimi anta oshequi quemisantajeitatsiri, camajeivetainchari. Peerani iquenquetsajeitaquero irineane Tasoren-

tsi, icamantapinitiri atiri jaoca icantari Tasorensi, irootaque yoanteetacariri.

¹⁰Antearojenca icantajeiti camajeivetainchari:

—Novincatsarite, aviro pincatsariventajeitiriri maaroni savicajeitatsiri. Oshequi picameetsatanotaque, pitasorensitasanotaque. Niotaque otampaticatanoti pineane, te pamatavitantimateji. ¿Jaoca oncarate pinquisacoventajeitajena? ¿Jaoca oncarate poasanquetaajeitantariri iriori savicajeitatsiri quipatsiquinta, oajeitaquenari?

¹¹Ari ipajeitaqueri quitsaarentsi quitamarotasanotatsiri. Icantiri:

—Pimaoreavaquetsita. Tequera omoncarateaji noasanquetaasanojeitantariri oajeitaquempiri. Timatsiquera itsipapee piyemisantaririnte iroyeeteri. Piquemisantajeitaquena, irootaque yoanteetaquempiri; inquemisantajeitaquena itsipapee, irootaque iroanteeteariri iriori. Ariorica omoncarataquea, ari noasanquetaajeiteri maaroni oantatsiri.

¹²Impoiji itsinecareajiro otsipa, ocarataque meeca 6. Namenanaque, jero onicasanotanaque quipatsi, antearo onicanaca: nica, nica, nica. Itsitenitanotananaque catsirincaiteri, iquempetanacaro tsmenquito; irinti cashiri, quitioncatasanotananaque, iquempetanacaro irajantsi, quitionca catsini. ¹³Aisati ipariajeitanaque maaroni impoquiropee: iquempetacaro oitsoqui iyera ora iraacatsiri, ariorica otimi antearo tampea, ari ojireayetanaque.

¹⁴Opeanaca inquite, oquempetaca yampinaiqueetaquero sanquenarentsi. Opeaca maaroni quipatsi: toncaaripee, ovoyeja, maaroni; poyere. ¹⁵Aisati noneaqueri ivincatsaritepee atiri, jeri ivincatsaritepee soraro, ashitaarantincari, shintsiyetatsiri, ivatorote, iratiritepee, maaroni atiri: ishiajeitanaca omoroqui imperita. Aisati ishiajeitanaca mapipeequi anta toncaariqui.

¹⁶Icantajeivetacaro toncaari aisati mapi:

—Pimpariye, pintijajeitena, pimanena. Yaanacari Tasorensi, aisati yaanacari

yora Ovisha. Oshequi iquisaquena.

¹⁷Meeca iquisajeitaquena maaroni; meeca impoyereajeitena, poyere.

Isatoncaajeitiri ishanincapeeni Ishirairi.

7 ¹Impoiji noneaqueri inampirepee Tasorentsi, caratatsiri itsipasati, icatiajeitaca anta otsapitapaa quipatsi; ipeavaquero tampea, maaroni. Ipeasano-tavaquero maaroni, caari otimanta tampea quipatsiqui, incajarequi, inchatoqui, jaocarica. ²Impoiji aisati noneaqueri itsipa inampire Tasorentsi, iponeaca anta iquenapainta catsirincaiteri, yamaquero irisatoncaatanteariri atiripee. Icajemaco-jeitapaaqueri itsipapee, yora tsoncajeite-roneri coajica quipatsi aisati incajare.

³Icantiri:

—Eirotsita pitsonquitarotsi quipatsi, incajare, inchato, maaroni. Ajivatavaque-rita asatoncaajeiteri ivancainaqi maaroni quemisantajeitiriri Tasorentsi.

⁴Ari noquemaqueri icantaque jaoca icarajeitaqueri satoncaajeitainchari: icarajeiti 144,000 quemisantatsiri. Icarajeitaqueri ishanincani maaroni itomipee Ishirairi. ⁵Ari isatoncaajeita-queri ivancainapeequi: icarajeitaque ishanincani Jora 12,000, icarajeitaque ishanincani Oroveni 12,000, icarajeitaque ishanincani Cara 12,000, ⁶icarajeitaque ishanincani Asere 12,000, icarajeitaque ishanincani Nejatari 12,000, icarajeitaque ishanincani Manaseshi 12,000, ⁷icarajeitaque ishanincani Shimeo 12,000, icarajeitaque ishanincani Irevi 12,000, icarajeitaque ishanincani Isacara 12,000, ⁸icarajeitaque ishanincani Savoroni 12,000, icarajeitaque ishanincani Jose 12,000, icarajeitaque ishanincani Vejami 12,000. Ari isatoncaajeitiri ivancainaqi, maaroni.

⁹Impoiji namenanaaji aisati, jeri noneajeitaqueri oshequi catsini atiri aisati, yapatojeitaca: tecatsi ancantea

amoncarajeiteri jaocarica icarajeitiri. Inashijeitaca atiripee, onashijeitaca irineanepee, maaroni. Icatishijeitapaa-cari Tasorentsi, aisati anta itiminta Ovisha. Iquitsaajeitacaro quitamarori iitsaare, yajiricaajeitaquero compiroshi. ¹⁰Antearojenca icantajeitaque:

—Iriotaque oavisacojeitaqueeri yora Tasorentsi savicatsiri ivincatsarimento-qui, aisati yora Ovisha.

¹¹Ari itimi quempeji Tasorentsi yora savicacaajeitantatsiri aisati yora virantsi. Ishoncajeitacari oshequi catsini inampire-pee Tasorentsi, ipincatsajeitaqueri,

¹²icantajeiti:

Ariove, tempa oshequi ioti Atasoren-tsiti, oshequi itasorentsiti.

Tsame maaroni aveshireimentapini-jeiteari, aneacameetsatapinijeiteri, ampasonquitapinijeiteri, ampincatsatapinijeiteri; aitaque ancantaitiyempani.

¹³Impoiji isampitaquena aparoni savicacaantatsiri:

—¿Piotimpa janica yora quitsaajeita-chari quitamarori? ¿Piotimpa jaoca iponeajeitari?

¹⁴Nocantaqueri:

—Teve nioteji. Pincamantena: tempa pioti avinti.

Icantaquena:

—Iriojeitaque neajeitaqueriri yashinon-caajeitaca oshequi atiri; oshequi ineacatsitacaro iriori. Iquivantajeitaro iitsaare iriraja Ovisha, irootaque oquitamarotasanotantacari. ¹⁵Irootaque yapatotimentantacariri Tasorentsi, intacojeitantacariri anta ivancoqui. Icantani intacojeitacari: quitaiteriqui aisati tsiteniriqui. Ari quiso iroajeiteri Tasorentsi iriori, irojocaventajeiteri, maaroni. ¹⁶Eiro iquemajeitajirotsi aisati itashe, aisati eiro iquemajeitajirotsi imire. Eiro itaajeitajiritsi aisati catsirincaiteri, eiro iquemaatsicatarotsi aisati paamari.

¹⁷Ari yora Ovisha itsipatari Tasorentsi: iriotaque Ovisha shentajeiterineri maaroni quitsaajeitachari quitamarori, papinijeiterineri maaroni coiteimojeitacari. Iroimoshirencajeitaqueri, eiro ishinetiritsi iriraaajeitajea aisati.

8 ¹Impoiiji itsinecareajiro aisati, caratatsiri 7. Ari imajerejeitanaque maaroni savicajeitatsiri anta inquitequi. Osamanitapainti omajeretasanotanaque catsini.

Itiojeiti intayetarori inampirepee Tasorentsi, caratatsiri itsipasati.

²Impoiiji aisati noneaqueri 7 inampirepee Tasorentsi, icatiajeitaca Tasorentsi-qui. Ipeetaqueri 7 tiorentsi. ³Jeri aisati itsipa nampirentsi, icatiaca anta itaapini-tantaroriquinta casancapatsari, yovetsiqueetiro oro. Yajiricaquero onantajaniquitari yovetsiqueetiro aisati oro. Ari itaaqueneri Tasorentsi casancapatsari, oshiaquero oca iquenquetsatacapinijeitiri quemisantiriri Tasorentsi. ⁴Ari areetacari oyachaare Tasorentsi-qui, ocancajencatapaaque, oshequi inecameetsataquero. Aisati oquempe-taca, oshequi inecameetsataquero iquenquetsatacapinijeitiri quemisantajeitiriri. ⁵Impoiiji yora nampirentsi yaaquero paamari, yoaquero onantajaniquitari, ipishoncaquero quipatsiquica. Impoiiji antearojenca itireanaque, tiriririri; iporecanaque, porec, porec; aisati antearo onicaca quipatsi, nica, nica, nica. ⁶Irosati yovetsicantajeitanaca nampirentsi intiotanteari.

⁷Itiotaque jivataintsiri, tii, tii, tii; irosati opariantanaca quipatsiqui iriniqui, jero aisati paamari, oconoacaro aisati irajantsi. Otaarantaca timayetsiri quipatsiqui, otaarantaca inchatoshi; otaasanotaca iroori saveshi, tojari, maaroni, poyere.

⁸Impoiiji itiotaque apitetapaintsiri nampirentsi, tii, tii, tii; irosati noneanta-

carori quempetarori antearo toncaari, tainchari: ipishonqueetaquero incajare-qui, pocn. ⁹Opeaarantaca incajare irajantsi, icamaarantaque timatsiri incajarequi, aisati otsoncaarantaca pitotsipee.

¹⁰Impoiiji itioti mavatapaintsiri, tii, tii, tii; irosati noneantacarori shiaqueriri impoquiro iparianaque, itaapaaca, pomein. Iparianaque nijatenipeequi aisati anta ocontejayetapaaque nija. ¹¹Opeaarantaca quepishjari, irootaque icantanteetarori shiavetarori impoquiro: Quepishiri. Icamajeitanaque oshequi irajeivetarori nija.

¹²Impoiiji itioti aisati itsipasatitapaintsiri, tii, tii, tii; irosati itsitenitantavetanaca catsirincaiteri aisati cashiri. Aisati itsivacaarantayetanaque iriori impoquiro-pee, irosati otsitenitantavetanaca quitaiteriqui. Aisati ipeaarantayetanaque quitaporoquitatsiri tsiteniriqui. ¹³Ari namenana-ji aisati, noneantacariri anteari paquitsa yaranaque anta inquitequi. Aisati noquemaqueri, antearojenca ineanati, icanti:

—Jo, oshequi irashinoncaasanojeitanaquea catsini savicajeitatsiri quipatsiqui. Irotaintsi intiojeite yora itsipapee nampirentsi, caratatsiri mava, impoiiji irashinoncaasanojeitea maaroni atiripee.

Itioti impoitapaintsiri mava.

9 ¹Ari itioti itsipa inampire Tasorentsi, yora apapacorotapaintsiri, tii, tii, tii. Irosati noneantacariri impoquiro, iponeaca inquitequi, ipariaque quipatsiqui. Ipeetaqueri iyavitantarori omoro jatatsiri tsoompoina catsini, te aneroji oncaratapee, ²irosati antoo. Ari iyavireapaaquero, itatareapaaquero, jero ocontejencatapaaque oshequi oyachaare. Ojataque jenoqui irosati otsitenitantanaca jenoqui, aisati iriori catsirincaiteri itsitenitanaque. ³Impoiiji noneaqueri

tsinari, iquenantapaacaro cachaa, itsoteapaaquero quipatsi, imatacaaqueri Tasorentsi yoantaque, iquempetacari quitoniro. ⁴Icantiri:

—Poajeitearo ivanquirepee maaroni caari quemisantajeitana, yora caari satoncaajeitacha ivancainaqui. Eiro catsini poarotsi otsipayetari saveshi, tojari, inchatoshi, eiro catsini. ⁵Nocoaque pinquematsicacayeari maaroni caari quemisantajeitana, incarataque 5 cashiri, iro cantaincha eiro poamaajeitiritsi.

Ari yoajeitaqueri, oshequi icatsitaque, iquempetacari quitoniro. ⁶Ariorica omoncarataquea maaroni oca noneaqueri, ari incoajeivetanaquea atiripee incamaajeite; iro cantaincha eiro imatirotsi incame. Incoajeivetanajea iroajeame irisati, iro cantaincha eiro imatirotsi.

⁷Ari namenasanotaqueri tsinari: iquempetacari cavayo, ipashicayetaca ashiro eiro aveantiritsi sataamentotsi aisati chacopi. Yamatseetacaro shiirori oro. Orari ivoropee oshiaquero avoropee arori. ⁸Iviti oquempetacaro oishi tsinane, oquishipeti. Iraji oquempetacaro iraji maniti, antearoquijaji. ⁹Inejitonqui oshiaquero ashiro, ariorica yaranaque, antearojenca yaranaque, ishiaquero itirei, tiriririri. ¹⁰Irishi oshiaquero irishi quitoniro, ainiro itseequi. Ariorica yoaqueri atiri, icatsitasanotaqueri, ocarataque apapacaroni cashiri icatsitaque. ¹¹Ainiro ivincatsarite tsinaripee: iriotaque ivincatsarite maaroni camaari. Ipajita irineanequi jorio Avaroni; iro irineanequi quireshiasati ipajita Aporioni. Iro acantiri aneanequi arori: Poyereantatsiri. ¹²Aitaque icantari yora intacarori oashinoncaajeitiriri quipatsisati. Timatsiquera apite aisati.

¹³Impoiiji itioti itsipa inampire Tasorentsi, yora seishitapaintsiri, tii, tii, tii; irosati noquemantacariri itsipa neanata-

tsiri. Ari oponeacari irineane ora itaapini-tantaroriqui casancapatsari, vetsicachari oro. Otimi anta Tasorentsi, otiminta otseequi itsipasati. ¹⁴Icantiri tiotaintsiri:

—Pijate poimisoquijajeri yora 4 camaari yoisotiri Tasorentsi anta antearo-jaiqui eni: ora pajitachari Eojarateshi.

¹⁵Ari ijataque, yoimisoquijajeri camaaripee. Ari icantini Tasorentsi peerani: “Niotaquero jaoca oncarate impoyearantanteariri atiripee. Niotaquero jaoca oncarate omoncaranteari osarintsi, cashiri, quitaiteiri, aisati jaoca incarate catsirincaiteiri”. Meeca omoncarataca, irootaque yoimisoquijajertajari. ¹⁶Yora camaari ijivajeitaqueri oshequi catsini soraropee, icarajeiti 200,000,000. Niotaqueri, icantaquenari. ¹⁷Aisati noneajeitaqueri iyavayote.

Ipashicanejitaro quijacotariri quiraata-tsiri, oshiaquero paamari, ora morecasanotatsiri. Iito cavayopee oshiaquero iitopee maniti. Oponeaca ivantequi oshequi paamari, jero cachaajenca oshequi, jero morecasanotatsiri. ¹⁸Iroojeitaque poyearantajeitiriri atiripee: ora paamari, cachaajenca, jero morecasanotatsiri poneachari ivantequi cavayo.

¹⁹Irootaque yoantariri cavayo atiri: ivante aisati irishi. Iro irishi oshiaqueri maranque, ainiro oiototaca, yatsicantacariri atiri.

²⁰Ari itimaarantaque aparopee atiri, iro cantaincha te inquenqueshirejitempaji: te incoyeji catsini inquemisanteri Tasorentsi. Icantani yantapinitiro caari cameetsatsi, ipincatsatapinijeitiri camaari, aisati ipincatsatashijeitaro yovetsicayetiri: oroyeta-tsiri, peratayetatsiri, otsipa ashiroyetatsiri, mapitatsiri, inchatoyetatsiri, maaroni. Ijitasorentsitashiyetaro, iro cantaincha tecatsi oncantea amene, onqueme, aisati aniite. ²¹Icantani yoayeriti, imatsitanti, yantiro caari yai, icoshiti. Te inquenqueshiretimateaji catsini.

Ora sanquenarentsi quenquetsatacotirori timayetatsineri, coajica.

10 ¹Impoiji noneaqueri itsipa inampire Tasorentsi, shintsitasa-notatsiri. Iponeaca inquitequi, oshoncari mencori, itimaque savirentsi iitoqui jenioquiji. Ivoro oshiaqueri catsirincaiteri, ivori oshiaquero paamari.

²Yajiriquire sanquenarentsi, pinaicarea-chari. Iitisanori aaticajatapairori incajare, irointi irampate aaticapairori quipatsi.

³Antearojenca icajemapaaque, iquempetacari maniti icajemi, jan, jan. Impoiji itireanaque, icarataque 7, tiiriririri.

⁴Noquemantacariri itireanaque, irotaintsi nosanquenateme, iro cantaincha noquemaqueri icantaquena inquitesati:

—Eiro pisanquenatirotsi icantiri tireatsiri, pimanero.

⁵Ari noneajiri aisati inampire Tasorentsi, yora aatiquirori incajare aisati quipatsi: yovanquiro iracosanori inquitequi, ⁶icanti:

—Timatsi Tasorentsi aneasanotatsiri, icantani yanei, eiro icamitsi catsini. Yovetsicaquero inquite aisati maaroni timantajeitarori; yovetsicaquero quipatsi aisati maaroni timantajeitarori; yovetsicaquero incajare aisati maaroni timantajeitarori. Ioti iriori te nontseeayaji, irotaintsi meeca omoncaratea. ⁷Impoiji intiote yora inampire Tasorentsi, yora sietetapaintsiri. Ari onconijatapaaque manavetachari peerani: oca yoametiriri Tasorentsi quemisantajeitiriri peerani, yora quenquetsatacojeitiririni.

⁸Impoiji noquemajiri aisati jenoquisati quenquetsatacaaquenari incaranqui. Icantana:

—Pijate, paavaquero sanquenarentsi yajiriquire nampirentsi aatiquirori incajare aisati quipatsi.

⁹Irosati nojatashitantacariri, nocantapairi:

—Pimpenaro sanquenarentsi.

Icantavaquena:

—Jero, payero, poyearo; ariorica poaquearo, pineaquero opochati, oquempetaca ija pitsi. Iro cantaincha impoiji ompianeentaquempi.

¹⁰Ari naavaquero, noacaro. Opochave-taca, iro cantaincha impoiji opianeentaquena. ¹¹Impoiji icantaquena:

—Meeca pinquenquetsatacoteri aisati jaoca incantajeiteari coajica pashinipee atiri: nashiyetarori irineanepce, pincatsaripee, maaroni.

Iquenquetsatacotiri apite quenquetsatacantatsiri.

11 ¹Impoiji ipaquenaro Tasorentsi inchaqui, shiirori cotiquiirontsi, impoiji icantaquena:

—Jero oca pimoncaramentoca. Pijate meeca novancoqui, pimoncarataitero; aisati pimoncaratero itaantarori casanca-patsari, aisati pimoncarajeiteri maaroni quemisantajeitatsiri anta, jaocarica icarajeitiri. ²Eiroyea pimoncaratirotsi anta saiteriqui: irointiquea pimoncarate onta iquenantari caari quemisantajeitatsi. Incarataque 42 cashiri inquenayetanaque itsipapee atiri anta nonampiqui: ora Jerosare. Oshequi iroashinoncaajeiteri savicajeitatsiri. ³Nontianqueri apite quenquetsatacotenaneri, oncarate 1,260 quitaitei inquenquetsatapinite. Incantapinijeiteri atiri: “Pinquenqueshirejeitanaquea. Eiro papiitapinitirotsi caari cameetsatsi, irointi pinquemisantajeite, pintimajeite cameetsa”.

⁴Iquenquetsatacotitacarini peerani Sacariashini yora apitetatsineri, ishiacantaqueri orivo. Aisati ishiacantaquero onantari veera timatsiri anta Avincatsaritequi. Tempa iriotaque pincatsariventajeitiriri maaroni atiri. ⁵Intimerica coavetachaneri iroashinoncayerime yora apitetatsineri, omponeaquea ivantequi

iriori paamari, ontsoncasanojeiteri, ontaajeiteri, pomein. ⁶Oshequi irimatacaajeiteri Tasorentsi. Peerani inquenquetatapinite, iro cantaincha incoaquerica eiro oparii incani, eiro opariitsi, irosati irivecarantearori inquenquetsate. Aisati, incoaquerica, impeajero nija irajantsi. Aisati incoaquerica, iroashinoncaapinijeiteri maaroni savicajeitatsineri. ⁷Ariorica irimoncarataquero inquenquetsate, jeri aisati imponeaquea omoroqui tsoompoina covencatatsiri iriori. Inquisapeeri quenquetsatatsineri, iranaacotapeeri, iroapeeri, shemi. ⁸Imponaajeitaquea camajeitatsineri anta Jerosarequi, nianqui. Ishiacantaquero Tasorentsi Jerosare Soroma aisati Ejjipito; iro ishiacantantarori, oshequi yantapinijeitiro jerosaresati caari cameetsatatsi. Tempa aitaque ipajacoyeetaqueriri Jesoshi Jerosarequi. ⁹Oncarate mava quitaiteri imponaajeite nampitsiqui nianqui, irosati intampaticantajeari catsirincaiteri aisati. Impocajeite maaroni atiripee iramenajeiteri camaintsineri, irinashijeitanaquea amenajeiterineri: imponeaquea otsipapeequi nampitsi, onashiyetaquea irineanepee. Eiro ishinetiritsi intijeeteri. ¹⁰Inquimoshirejitanaque maaroni savicajeitatsineri, iro inquimoshiretanteari incamaque yora apite quenquetsatacaajeiveteineri: impashitavacaajeitea paitapeerica. Incantajeite:

—Tsame anquimoshirejeite. Camanirotaque yora quenquetsatacotirineri Tasorentsi: eiro imatajirotsi iroashinoncaajeitajee aisati.

¹¹Iro cantaincha tampatica catsirincaiteri intasoncajeri Tasorentsi, intinaajeitajeri apite, incatijaaitanaje. Ari intsarooaajeitanaqueari maaroni neajeitajerineri.

¹²Impoiji inquemacheri Tasorentsi, antearojenca incanteri:

—Caatanaje aca jenoqui.

Ari irijajeitanaque inquitequi, inquenantanaajeero mencori; irineajeitavajeri maaroni quisajeivetariniri. ¹³Irosati onicantanaquea quipatsica, ontireaarantanaque pancotsipee. Incarajeite camajeitaintsineri 7,000. Oshequi intsarooajeitanaque itsipapee, impoijiquea impincatsajeitaqueri, icantajeite:

—Tempa oshequi ipincatsariti Tasorentsi, itasorentsitasanoti.

¹⁴Irootaque omoncaratanteari apiteta-paintsiri iroashinoncaajeiteri Tasorentsi atiripee. Apanivaniji ora mavatapaintsineri.

Moncarataca ipincatsariventanti Tasorentsi.

¹⁵Impoiji itiotaque yora itsipa inampire Tasorentsi, yora sietetapaintsiri: tii, tii, tii. Noquemajeitaqueri savicajeitatsiri inquitequi, antearojenca icantajeite:

Meecaquea impincatsariventajeiteri Avincatsarite maaroni quipatsisati, incarateri Quirishito impincatsariventantajeite, incantaitatitempani.

¹⁶Impoiji yora 24 savicacaajeitantatsiri iponeaca ivincatsarimentoqui, irosati itiyeroashijeitancariri Tasorentsi: oshequi ipincatsajeitaqueri. ¹⁷Ipampoyeaventajeitiri:

Avirotaque, Novincatsarite, Tasorentsi sanori:

oshequi pishintsitaque, oshequi pipincatsaritaque.

Te pimpashinitapiniteaji, picantani pitasorentsitaaque.

Aisati pipincatsaritanotaque, meeca pimpincatsariventajeiteri maaroni atiri;

eiro pojocajirotsi, irosati pincanteani. Irootaque nopasonquijeitantimpiri.

¹⁸Iquisajeivetimpi atiripee, iro cantaincha meeca pipiajeitacari.

Poitinaajeitajiri camajeivetainchari, maaroni:

pipinajeitaqueri maaroni antaveetim-
pirori picoacaajeitaqueriri,
maaroni quenquetsatacojeitimpiri,
quemisantajeitimpiri, maaroni.

Pincatsajeitimpiri, pincatsariveitacha-
niri quipatsiqui, caari pincatsari-
veitachani, maaroni.

Cameetsa pisavicacaajeitaqueri
pinampiqui.

Irintiquea yora quisajeitimpiniri,
caari cameetsajeitatsini, poasan-
quetaajeitaqueri, pitiancajeitaqueri
Sharincaveniqui.

¹⁹Impoiji ashitoreanaca ivanco Tasoren-
tsi anta inquitequi, noneaquero
tsompoina cajo, ora onantari isanquenare
Tasorensi peerani. Aisati noneaquero
yamatsequi, matsec, matsec; aisati
antearojenca itirei, tiiriririri; aisati
onicanaca quipatsi, shique, shique,
shique; jero aisati opariitasanotaque
iriniqui, sacorororo.

Iquenquetsatacojaqueri Quirishito aisati yora maranquetatsiri.

12 ¹Impoiji otimi aisati noneaqueri
anta inquitequi, ishiacantaquee-
neri aisati Tasorensi, ayotanteari
irantayeteri coajicani. Noneaquero
tsinane, oquempetaca oquitsaatacari
catsirincaiteri, aaticaqueeri cashiri,
amatseetacari 12 impoiquiro. ²Otsomonte-
taque, irotaintsi intime, atsicaneenta-
quero, ocavintsaanaca, ocajemanaque:
—Ayavee, ayavee.

³Imapocaquero, ipocapaaque anteari
maranque, catsini; quitioncaitaque ini.
Ocarataque iito 7, aisati itseequi 10.
Yamatseegetaca iitopeequi. ⁴Irishi
inoshicaarantapaaqueri oshequi
impoiquiro catsini, sorororo; impoiji
ipishoncajeitaqueri quipatsiqui.
Icatiapaaca anta otiminta tsinane,
yoyeaquero ontimeri otomi, iroantava-
queariri. ⁵Ari otimiri otomi, yora

pincatsariventasanojeiterineri maaroni
atiri; tecatsi platearineri coajicani.
Imapoquiri Tasorensi, yaapitsatanaqueri
jananequi, yaanajiri inquitequi,
isavicacaapaaqueri ivincatsarimentoqui.
⁶Oshianaca tsinane anta caaraiteriqui,
anta yovetsicaqueneronta Tasorensi.
Ishentaquero anta cameetsa, ocarataque
1,260 quitaiteri.

Imanatavacaajeitaca anta inquitequi.

⁷Jero aisati imanatavacaajeitaca anta
inquitequi. Yora Miyeri, icarajeitaqueri
itsipapee inampire Tasorensi, iqinsajeita-
vaqueri yora maranque aisati inampire-
pee iriori; imanatavacaajeitaca. ⁸Irio
anaacotantatsiri inampirepee Tasorensi,
yojocajeitaqueri maranque aisati icarajei-
tiri, tecatsi incantea iriori impiajeitanaje
inquitequi. ⁹Ari yojocasanojeitaqueri
quipatsiqui, aisati maaroni inampirepee.
Iriotaque yora maranquetatsiri peerani:
ivincatsarite camaari, aisati ipajiyetteri
Satanashi. Peerani oshequi yamatavijei-
vetacarini atiripee, iro cantaincha eiro
imatajirotsi aisati. ¹⁰Impoiji aisati
noquemaqueri inquiresati, antearojenca
icanti:

—Meeca yoavisacotasanojeitaquee
Tasorensi, itasoncacoventajeitaquee,
ipincatsariventajeitaquee; aisati iriori
Quirishito ipincatsariventajeitaquee.
Cameetsataque. Icantani peerani
icantacojeitaquee Satanashi, aisati
maaroni ayemisantaririnte, icoapinive-
taca iroasanquejeiteeme Tasorensi:
icantani, quitaiteriqui, tsiteniriqui.
Meecaquea eiro imatajirotsi Satanashi
aisati. ¹¹Icamimentajeitaquee Ovisha,
aparajatimentajeitaquee iriraja, irootaque
caari imatantajaro Satanashi iroasanque-
tacantajee. Aisati aquemisantasanojeita-
queri Tasorensi, antajeitaqueneri
maaroni icoacaajeitaqueeri, irootaque
caari yoasanquetantajeitee. Ainiro

acarajeitaqueri camimentiriri Quirishito, te incoyeni inquempoyeempa irisati.

¹²Meeca aquimoshirejeitaque, acarajeitaqueri maaroni savicajeitatsiri aca inquitequi; ancanteani anquimoshiretasanojeitanaque. Iro cantaincha irashinoncaasanojeitanaquea maaroni quipatsisati. Oshequi iquisa Satanashi, ioti eiro osamanititsi irisavique quipatsiqui, oshequi iroashinoncaajeiteri savicajeitatsiri.

Yora maranque iquisaquero tsinane.

¹³Ari ipariapaaque maranque quipatsiqui, oshequi iquisapaaquero tsinane tomintariri otomi. ¹⁴Itasonquiro Tasorentsi otimantacari oshivanqui apite, oquempetacaro ishivanqui anteari paquitsa. Impoiji arapitsatanaqueri maranque, ojataque anta ocaaraiteapai. Anta intacoyeetacaro icarataque 42 cashiri. ¹⁵Impoiji yora maranque yaparajataquero oshequi nija catsini, oponeanaca ivantequi, chararara; icoaveta irooncajrome quipatsi, icoaveta areetepeemparome tsinane, ompiincanaqueme. ¹⁶Iro cantaincha ocavintsaquero quipatsi tsinane, otencareanaque, oquijatananaque maaroni nija quipatsiqui. ¹⁷Aiquero ijatatii iquisaquero tsinane. Te irimateroji iroori, irootaque ijatashitantariri itsipapee otomipee: maaroni yora antiniriri Tasorentsi icantaqueriri, aisati maaroni quemisantasantiriri Jesoshi; icoaveta intsoncajeiterime iriori.

Ari iquenquetsatacotaqueri covencatsiri.

13 ¹Impoiji nocatiaca impanequiqui, anta otsapijaqui antearoja incajare. Jeri noneavaqueri incajarequi icontetapaaque covencatsiri, otimi itseequi 10, jero iito 7. Otimi itseequiqui amatseerentsi; aisati isatoncaataca iitopeequi: ocantimatiri sanquenarentsi Tasorentsi. ²Ari ishiapaaqueri maniti. Iiti

oshiaquero iiti meeni; irointi ivante oshiaquero ivante maniti. Icantavaqueri maranque:

—Meeca nocoaque nomatacayempi, pinquempetantenari: oshequi pimayetaque, oshequi pimpincatsaritanaque, oshequi pincantacantayete.

³Amashitasanotaca catsini iito aparoni, naamaaca iroveta incha oamayerime amashitaqueriri. Yoajeitanaqueri cavaco maaroni atiri, icantajeiti:

—¿Paitaquea caari icamanta? Pamenerote iito, jooo, ¿paitaquea oaqueriri?

⁴Aisati ipincatsajeitaqueri maranque, icantajeiti:

—Pineaqueri, oshequi imatacaaqueri covencatsiri.

Aisati ipincatsajeitaqueri covencatsiri, icantajeiti:

—Pineaqueri, oshequi ishintsica, tecatsi materine impiateari.

⁵Impoiji yora maranque icantiri covencatsiri:

—Meeca pinquisanaqueri Tasorentsi, incarate 42 cashiri pimpincatsaritanatanaque.

Ari oshequi ishemetsataque, oshequi icantimataqueri Tasorentsi. ⁶Ari icantimataqueri iriori, icantimataquero inampi, aisati icantimajeitaqueri savicajeitatsiri anta. ⁷Aisati icantaqueri maranque:

—Pinquisajeiteri maaroni quemisantajeitiriri Tasorentsi, poashinoncaajeiteri. Aisati pimpincatsariventajeiteri savicajeitatsiri quipatsipeequi, pashiniyetiriri irineanepee.

⁸Aitake impincatsajeiteri maaroni atiripee. Apatiroquea irinti quemisantsiri, eiro ipincatsatiritsi. Aitake, tequerani irovetsiqueroni quipatsi, iotitacarini Tasorentsi maaroni quemisantajeiterineri. Aitake isanquenataqueroni ivajiropee, ipajititayetarini yora Ovisha camimentajeiterineri. ⁹Otimirica

piquemantari, pinquenqueshiretero oca nosanquenataquempiri. ¹⁰Icanti Tasorentsi: “Noiminqueajeiteri coajica maaroni oiminqeajeivetaquempineri. Nompesa-jeiteri maaroni pesajeivetempineri”. Meeca icoacaajeitaquee Tasorentsi ancantaitiyempani anquemisantajeiteri, anquearioventero.

Iquenquetsacotaqueri itsipa covencatsiri.

¹¹Impoiji noneaqueri itsipa covencatsiri, iponeaca irinti quipatsiqui tsoompoina. Iquempevetacari ovisha, otimi itseequi apite; icovencati ineanati. ¹²Oshequi ipincatsaritaque, iquempetacari itsipa covencatsiri, yora amashitachari iitoqui. Aisati icantajeitiri maaroni savicajeitatsiri:

—Pimpincatsajeiteriyea yora amashitachari iitoqui.

Ari ipincatsajeitavaqueri. ¹³Oshequi itasoncantayetaque yora apitetapaintsiri. Imayetaquero caari ineapinjjeiti ashanincapee. Ineajeitaqueri atiri yoariaquero paamari: oponeaca inquitequi, irosati quipatsiqui. ¹⁴Oshequi imayetaque, irootaque yamatavijeitantacariri oshequi atiri, ijitasorentsijeivetacari. Ariorica itsipatacari yora jivatiriri, oshequi imayetaque. Aisati icantajeitaqueri atiri:

—Jentsite, pishiacantajeiteri yoca jivataquenari, yoca ipesheevetacari. Pineaqueri, te incameji.

¹⁵Ari iquemisantajeitaqueri, yovetsica-jeitaque ishiantaro. Impoiji itasoncaquero, aneantacari, aisati oneanatantacari. Impoiji icantajeitaqueri atiri:

—Pimpincatsajeitero oca avetsicajeitaqueri: irootaque atasorentsite.

Ari ipincatsajeivetacaro. Irintiquea maaroni caari pincatsatiro, yoacantajeitaqueri. ¹⁶Aisati isatoncaatacantaqueri atiripee, maaroni. Isatoncaajeitaca iracosanoriqui, ariorica ivancainaqu,

maaroni: pincatsarijeitatsiri, caari pincatsarijeitatsine, ashitaarantajeitachari, caari ashitaarantajeitachane; yora yamananteetiri aisati yora caari yamananteeti: isatoncaajeitaca maaroni. ¹⁷Iro isatoncaajeitaqueriri ivajiro covencatsiri, yorari itsipapee isatoncaajeitaqueri inomerote. Icantajeitiri:

—Eirorica isatoncaajeita atiripee, eiro noshinetiritsi iramanantayete aisati impimantayete.

¹⁸Ocameetsati meeca ontime piotanteari, pinquenqueshiretero inomerote covencatsiri. Irootaque inomerote atiri, ocarataque 666: irootaque piotanteariri.

Iquenquetsacotaqueri Ovisha aisati yora pampoyeaventajeitiriri.

14 ¹Impoiji namenajai aisati, jeri noneaqueri yora Ovishatatsiri, icatiaca toncaariqui pajitachari Sio: otimi Sio Jerosarequi. Icarajeitaqueri maaroni quemisantajeitatsiri, satoncaajeitachari ivancainaqu i vajiro Ovisha aisati iriri. Icarajeitaque 144,000.

²Impoiji noquemajeitiri aisati inquite-sati, antearojenca irineane; iquempetacaro antearoja ovarijare, aisati antearo itirei. Iriojeitaque javioquijeitirori shiirori ijavioqui. ³Itimajeiti anta Tasorentsiqui, anta itiminta savicacantayetatsiri aisati yora itsipasati virantsi. Ari ipampoyeajeitiro pampoyeantsi iroaquerari; ocameetsajencataque, iro cantaincha tecatsi materone iriotoero: apaniro irinti 144,000 atiri oavisacojeitainchari. ⁴Te irantajeitajeroji caari cameetsatatsi iriori, icameetsajeitaque: aisati icantani yoiyajeitaqueri ovisha, jaocarica ijayetaqueri. Iriojeitaque quemisantajeitiriri Tasorentsi aisati Ovisha. ⁵Te intseeya-jeiteaji, aisati icameetsajeitaque, te irantajeitajeroji caari cameetsatatsi.

**Irotaintsi iroasanquejeiteri
Tasorentsi caari quemisantiriri.**

⁶Impoiji noneaqueri itsipa inampire Tasorentsi, yarayetanaque inquitequi nianqui. Iquenquetsatacaajeitaqueri maaroni savicajeitatsiri quipatsiqi, jaocarica otimayetiri inampipee, aisati jaocarica ocantayetari irineanepee. Icamantajeitaqueri jaoca incanteari iroavisacojeitantajeari. Irootaque icantapinijeitiriri Tasorentsi maaroni atiri peerani, te impashiniteroji. ⁷Antearojenca icanti icanti:

—Pimpincatsajeiteri Tasorentsi, pincantajeiteri pishaninca: “Icameetsataque Tasorentsi”. Pamene, moncarataca meeca iroasanquejeiteri maaroni caari quemisantajeitiriri. Pimpincatsatasanojeiteri: tempa iriotaque vetsiquirori inquite aisati quipatsi, incajarepee aisati nijatenipee, maaroni.

⁸Yojatanaqueri itsipa nampirentsi, icanti iriori:

—Peerani yora savicaveitachaniri Vavironiaqui yantacaapinijeitaquerini itsipapee atiri caari cameetsatsi, iro cantaincha meeca ipoyereajeitaqueri Tasorentsi vavironiasati. Eiro imatacaajeitajiritsi aisati paitapeerica.

⁹Impoiji yojatajiri itsipa nampirentsi aisati: yora mavatapaintsiri. Antearojenca icantapaaque iriori:

—Queariompia, pipincatsaticariri yora covencatatsiri, aisati ora ishiacantaro. Aisati pishinetaricari irisatoncaatempi pivancainaqui, ariorica pacoqui.

¹⁰Ariorica pimpincatsateri covencatatsiri aisati pishinetaricari irisatoncaatempi, ari inquisaquempi Tasorentsi; inquisasannotempi, eiro icavintsaimitimpitsi. Pinquematsicatasanoaqueo paamari, irineajeitempi maaroni inampire Tasorentsi aisati yora Ovisha. ¹¹Pincantaitiyempani pinquematsicatearo paamari; eiro

otsivacanetitsi, oncantaqueani: quitaiteriqui, tsiteniriqui, peerani catsini. Aitaque inquematsicajeitearo maaroni pincatsatiriri covencatatsiri aisati ishiacantaro, aisati maaroni satoncaajeitarori ivajiro.

¹²Pamene, ariorica pantapinitiro maaroni icoacaimpiri Tasorentsi, aisati ariorica piquemisantanasotaqueri Jesoquirishito, eiro pishemarotsi; ariorica pinquematsicatimentearo, iro cantaincha eiro patsipe-tashitarotsi.

¹³Impoiji noquemaquero aisati Ishire Tasorentsi anta inquitequi, ocantaquena:

—Jero oca pisanquenateri: “Inquimoshiretacayeari Tasorentsi maaroni camajeitatsiri, iquemasantirininirica Ivincatsarite. Queario, inquimoshireta-caasanoteari Tasorentsi, tempa iotiro maaroni yantajeitaqueniriri quipatsiqi; irisavicacaajeitaqueri cameetsa, irimaoreacaasanojeitajeri”.

¹⁴Impoiniji namenanaaji aisati, jero noneaquero mencori, oquitamarotasano-taque. Aisati noneaqueri shiaqueriri Atiritapaintsiri, isavicaque mencoriqui. Yamatsetacaro iramatseere, vetsicachari oro. Aisati yajiricaquero shiavetarori saviri, otsampitasanoaque. ¹⁵Impoiniji noneaqueri itsipa nampirentsi, iponeaca ivancoqui Tasorentsi. Antearojenca icajemacotaqueri yora savicatsiri mencoriqui:

—Moncarataca meeca pimpesacotero panquirentsi, sampataque meeca maaroni quipatsiquiniri. Pijate meeca pimpesacotero.

¹⁶Ari ipesacojeitaquero savicatsiri mencoriqui, peti, peti; yaajeitaquero maaroni panquirentsi quipatsiquiniri.

¹⁷Impoiji iponeaca ivancoqui Tasorentsi anta jenoqui itsipa nampirentsi. Aisati yamaque iriori shiavetarori saviri. ¹⁸Jeri ipocaque pashini aisati, iponeaca anta itaapinitironta casancapatsari. Iriotaque taarantirori paitapeerica. Antearojenca

icajemacotaqueri ishaninca ajiriquirori isavirite:

—Iracaque ovapee: pimpesajeitero maaroni timajeitatsiri quipatsiqui, paayetajero maaroni, pampatotero.

¹⁹Irosati ipesantarori maaroni ovapee anta quipatsiqui, yaayetajiro, yoajiro anta intsinacaitantarori Tasorensi: ishiacantaquero inquisasanojeiteri coajicani Tasorensi maaroni tseencajeitiriri. ²⁰Ari oniri itsinacaitantarori anta oantsiqui, te ari one nampitsiqui. Ari oponeanaca itsinacaitantaroriqui oshequi catsini irajantsi, ooncanaca quipatsiqui; oquimojatanaque, areetacaro ivantequi cavayo. Otsoteanaquero irajantsi 320 quiometro: ojatanaque antoo.

Yaajeitaquero inampire Tasorensi pajoqui oashinoncaajeiterineri atiri.

15 ¹Impoiji noneaquero anta inquitequi itsipapee, ishiacantiro aisati timayetatsineri coajica. Oshequi noenqueshiretaquero, oshequi noanaquero cavaco. Noneaqueri 7 inampire Tasorensi, oashinoncaajeiterineri atiri. Irioeitaque vecarayeroneri maaroni oashinoncayerineri atiri; omoncaratapaaquea inquisanaquea Tasorensi. ²Noneaquero aisati incajare, oshiaquero amenaron-tsi, oconoaro paamari. Noneajeitaqueri anta otsapajaqui icatiajeitaca caari pincatsajeitiri yora covencatsisiri, jero aisati ishiacantaro; iriojeitaque maaroni caari satoncaatacha ivajiro aisati inomerote. Ari yajiricajeitaquero shiavetarori ijavioqui Tasorensi.

³Ipampoyeajeitaquero ivampoyeane Moishishi, yora antaveetiniriniri Tasorensi. Aisati ipampoyeajeitaquero ivampoyeane yora Ovisha. Jero oca ipampoyeajeitaqueri:

Novincatsarite, tempa aviro Tasorensi, oshequi pimayetaque.

Oshequi pitasoncantayetaque, noanaquero cavaco pantayetaqueri.

Ocameetsayetaque pantayetaqueri, te pamatavitanteji.

Queario, pipincatsariventajeitaqueri savicajeitatsiri maaroni nampitsipeequi, picantani.

⁴Tempa, Novincatsarite, ocameetsati nompincatsajeitempi, aisati iriori maaroni savicajeitatsiri.

Ocameetsati noncamaantajeiteri atiri: “Icameetsati Tasorensi”; tempa queario, picameetsataque.

Imponeajeitanaquea maaroni nampitsipeequi impincatsajeitantempiri.

Tempa iriojeitanaque ocameetsataque pantajeitaqueri.

⁵Impoiji namenajaji aisati, noneaquero ashireanaca ivanco Tasorensi, ontá inquitequiniri. Noneasanotaquero anta ininta Tasorensi. ⁶Itimi pancotsiqui yora 7 inampire, yora oashinoncaajeiterineri atiri.

Noneaqueri isoquijanaque. Iquitsaajeitaro quitsaarentsi tsivitamaori, oquitamaromao-tasanotaque. Ainiro inejiqui shiirori ishiticatsaqui, yovetsiqueetiro oro. ⁷Aisati ainiro iriori aparoni virantsi, ipacojeitavakeri nampirentsi aparopee pajo. Ojaaca pajoqui oja, oashinoncaajeiterineri atiri. Oshiacantaqueri inquisheri Tasorensi coajicani tseencajeitiriri. Icantatiani yanei Tasorensi, eiro icamitsi irinti catsini.

⁸Oshequi ishpaquirei, oshequi itasorencia; ainiro oyachaare, ojaacaro pancotsi. Tecatsi incanteetero inqueajeitero pancotsi, irosati irimatantearori nampirentsi icantaqueriri Tasorensi.

Jaoca ocantari timatsiri pajoqui.

16 ¹Impoiji noquemaqueri ineanataque anta ivancoqui Tasorensi. Antearojenca icantiri yora 7 inampirepee:

—Meecaquea pijajeite pisacotero quipatsiqui oja pajoquiniri, irootaque shiaquerori iquisaca Tasorensi.

²Irosati iجاتantaca yora jivatatsiri. Isacotaquero quipatsiqui oja, irosati

isompojeitananaca maaroni satoncaajeitarori ivajiro covencatatsiri, aisati maaroni pincatsatorori ishiacantaro. Jo, oshequi isompoyetanaque; opatsayetanaqueri, ishitiyetanaque. ³Impoiji ijataque apitetaintsiri, isacotiro oja anta antearojaqui incajare. Opeanaca, oquempetacaró irirajani camaintsiniri. Icamajeitaque timajeivetachari: shimapee, omanipee, maaroni. ⁴Impoiji ijataque mavatapaintsiri nampirentsi, isacotiro pajoquiniri anta enipeequi aisati nijatenipeequi.

Opeajeitanaca irajantsi. ⁵Impoiji icantiri: —Tasorentsi, oshequi picameetsataque; picantani pitimi: peerani, irosati meeca. Ocameetsataque poasanquetaajeiteri maaroni yontapee, irineashiit tearota; ⁶tempa iriojeitaque oajeitiriri quemisanta jeitimpiri aisati quenquetsatacojeitimpiri. Meeca pipiatacoventajari, poajeitaqueri. Ineacarove iriori, tempa iriojeitaque oayeri.

⁷Aisati itimi itsipa anta itaapinitironta casancapatsari. Icanti iriori:

—Queario, Novincasarite, aviro Tasorentsi mayetirori maaroni. Ocameetsataque poasanquetaajeiteri, irineashiitearotave: piotaquero poasanquetaimentiriri.

⁸Impoiji ijataque itsipa nampirentsi aisati, yora itsipasatitapaintsiri. Isacotiro pajoquiniri anta catsirincaiteriqui, imatantacariri itaajeitaqueri atiripee. ⁹Ari itaajeitaqueri, irosati iquisatsajeitantacariri Tasorentsi: yora tianquiriri oashinoncaajeitiriri. Te inquenqueshirejeiteaji. Te incoajeiteji irojocajero caari cameetsatsi yantayetiri, aisati te incoajeiteji impincatsajeiteri Tasorentsi. ¹⁰Impoiji yora apacorotapaintsiri, isacotiro pajoquiniri anta ivincatsarimentoqui covencatatsiri. Irosati otsitenitananaca anta ipincatsaritinta. Oshequi icavintsajeitanaca, irosati yatsicanenentanacaca.

¹¹Oshequi iquisatsajeitaqueri Tasorentsi,

iquishimentaro isompopée aisati maaroni iquemaatsicayetacari. Iro cantaincha te inquenqueshiretempaji, te incoajeiteji irojocajero caari cameetsatsi yantajeitaqueri. ¹²Impoiji yora itsipa nampirentsi isacotiro ivajonequiniri anta antearojaqui eni pajitachari Eojarateshi, irosati opirijatasanotantanaca, pirijaiteni. Meeca tecatsi ticajeitavaquerine yora pincatsaripee jivajeiterineri maaroni isorarotepée. Imponeajeitanaquea anta iquenapainta catsirincaiteri. ¹³Impoiji noneaqueri aisati yora maranque, yora covencatatsiri, aisati yora amatavitantatsiri; iponeajeitaca ivantepeequi mava camaari, ishiapaaqueri mashero. ¹⁴Queario, icamaaritananotaque; itasoncantaniroveta, imayetaquero caari aneapinijeiti. Ijatashjeitiri maaroni pincatsaripee, icantajeitiri:

—Tsame ancarajeitavacayea, amitacotavacaajeitea amanajeiteri maaroni oijajeitiriri Tasorentsi, antsoncajeiteri, maaroni.

Ja, ariorica impocapaaje Tasorentsi, yora matirori maaroni, irimanatavacajeitea irioripee. Inquemacojeitero maaroni atiripee irantayetapaaqueri Tasorentsi. ¹⁵Incantapaaque:

—Pamene, oquempetaca coshitantatsiri imapoquiri yora icoshitiri, aisati narori, nomapocajeitapaaquempi. Te piojeiteji jaocarica oncarate nompocantajeiri. Nonquimoshiretacaajeitajeri maaroni aamaajeitanari, quempetarori isaaquiti. Nocoaque incameetsajeitanaque, eiro yantapinitirotsi caari cameetsatsi. Inquempetacantea iquitsaata cameetsa, tecatsi neatsempequiterine eiro ipashiventantaja.

¹⁶Iro cantaincha yora camaaripee yapatojeitaqueri maaroni soraropee anta nampitsiqui ipajitiri jorio Aramaqueroni. ¹⁷Impoiji yora nampirentsi sietetapaintsiri: yora caratapaintsiri. Isacotiro

ivajonequiniri anta tampeaqui, irosati noquemantacari timatsiri anta ivancoqui Tasorentsi, savicatsiri ivincatsarimentoqui. Antearojenca icantaque:

—Moncaratapaaca, aitapaji.

¹⁸Impoiji oshequi iporequi, porec, porec; aisati antearojenca itirei, tiiririri. Aisati antearo catsini onicaca quipatsi. Te aneapiniteroji quempetearoneri oca.

Antearo onicaca catsini: nica, nica, nica, nica. ¹⁹Irosati oporocajeitantanaca maaroni pancotsipee anta Vavironiaqui, aisati maaroni otsipapeequi nampitsi, otsoncajeitaca maaroni, poyere.

Iquenqueshiretaquero Tasorentsi maaroni yantajeitaqueniri vavironiasati, irootaque iquisasanojeitantariri, yoashinoncaasanojeitaqueri. ²⁰Opeajeitanaca maaroni ovoyejapee; aisati otishipee, opeajeitanaca, maani. ²¹Jero aisati opariaque iriniqui, iro cantaincha antearo onasano-taque catsini. Otenataque apaitsoquironi 40 quiro. Oponeaca inquitequi, opariaque atiriqui, oshequi otsoncajeitaqueri. Oshequi itsaroacaajeitacaro iriori, irosati iquisatsajeitantariri Tasorentsi.

**Iquenquetsatacotiri vavironiasati,
irashinoncaajeitanaquea, coajica.**

17 ¹Impoiji ipocashitaquena aparoni nampirentsi, sacotirori pajoqui. Icantaquena:

—Caatanaque aca: nonijayempero jaoca incanterori Tasorentsi ora antajeitiriri shirampari, savicatsiri enipeequi, jero nijateenipeequi. Iroasanquetayero.

²Yantajeitaquero ivincatsaritepee itsipapee atiri. Oamejeitaqueri maaroni atiri yantapinitiro caari yai.

³Impoiji yaanaquena anta caaraiteriqui, otimi anta onijaquenari Ishire Tasorentsi. Noneaquero tsinane, oquijacotacari covencatatsiri, quitioncatatsiri: otimi 7 iito, jero itseequi 10. Isatoncaayetaca ivatsapeequi: ocantimatiri Tasorentsi

isatoncaaro. ⁴Oquitsaatacaro tsinane quiraanirori aisati quitioncari. Oaneenca-yetacaro oro, jero mapi shipaquireatsiri aisati quitamaroquiri. Ajiriquiro otsotane, yovetsiqueetiri oro; ojaacaro caari cameetsayetatsi, oshiacaventiro antacaa-jeitiri atiri iquemisantashitaro yovetsi-cane atiri aisati oamejeitiri imayem-pitanti. ⁵Osatoncaataca ovancainaqui: ainiro oshiacantayetaqueeri, iro cantain-cha tequera onconijatasanote. Ocanti: “Antearo oni Vavironia, irootaque oamejeitirori tsinane antayetiri caari ai. Irootaque oamejeitiriri oshequi atiri iquemisantashitaro yovetsicashiyetati”. ⁶Impoiji niotaquero oshinquitaca tsinane. Iro oshinquitacari irirajani quemisanta-veitariniri Jesoshi oajeitaqueri. Oshequi noanaquero cavaco, namenasanotaquero, sorererere. ⁷Iro cantaincha isampitana inampire Tasorentsi:

—¿Paitaquea poantarori cavaco?

Noncamantempero caari piotitiro, aisati noncamantemperi caari piotitiri yora covencatatsiri oquijacotacari. ⁸Itimaveitani yoranqui, te aneeriji meeca, itimi meeca omoroqui tsoompoina, jatatsiri antoo. Coajica iraajeri aisati Tasorentsi, intiancanteariri Sharincaveniqui: anta incantaitatitempani irashinoncayea. Itimaveitani, ipeaca, intimaje aisati; ariorica irineajeitavaqueri tseencajeitatsi-neri, iroajeitavaqueri cavaco. Peerani, iroaquerani yovetsiquiro Tasorentsi quipatsi, isanquenatiro ivajiropee maaroni jatatsineri inquitequi, iro cantaincha te irisanquenateroji ivajiropee yora tseencatatsiri. ⁹Pinquenqueshireta-sanotero oca noshiacantemperi piotantea-rori: ora iitopee caratatsiri 7 oshiacaven-tiro 7 toncaaripee osaviquinta tsinane. ¹⁰Aisati oshiacaventiri 7 pincasaripee. Icamaque apapacaroni, itimi meeca aparo, coajica intime yora caratapaintsi-neri. Eiro osamanititsi impincasariven-

tante yora caratapaintsineri. ¹¹Yora covencatatsiri, iriotaque aparoni pincatsariveitachaniri nocantaquempiri: “Icamaque”. Iro cantaincha intinaanaje aisati, impincatsariventantaje aisati, impoiji irijate Sharincaveniqui. ¹²Aisati ora 10 itseequi pineajeitaqueri: oshiacantiri itsipapee pincatsarijeitatsine coajica. Incarajeiteri covencatatsiri, impincatsarijeivetanaquea, eiro osamanititsi impincatsariventante. ¹³Inquempetavacaajeitea pincatsaripee, incantajeiteri covencatatsiri: “Nompincatsajeitempi avirori, nantajeitempiro paitarica pincoacaajeitenari”. ¹⁴Impoiji inquisajeiteri Ovishatatsiri, aisati oijajeitiriri: irimanajeiveteari, incoajeiveteari intsoncajeiterime. Iro cantaincha impiajeiteari Ovishatatsiri, intsoncajeiteri irinti. Tempa iriotaque anaacojeitiriri pincatsajeitatsiri, ipincatsaritasanoti; iriotaque anaacojeitiriri maaroni savicacantantatsiri, maaroni. Icoyeajeitaqueri maaroni quemisantajeitiriri, ipashinitacaajeitajiri, ari quiso yoajeitanajiri iriori, maaroni.

¹⁵Aisati icantaquena nampirentsi:

—Aisati pineaqueri enipee aisati nijatenipee osavicanitari tsinane. Oshiacantaqueri iriori maaroni atiripee savicajeitatsiri jaocaricapee, jaocarica ocantayetari irineanepee, maaroni. ¹⁶Aisati itseequipee oshiacantaqueri atiripee quisajeitaquerori tsinane: ora antapinitiriri caari ai. Aisati inquempejeiteri yora covencatatsiri, inquisaquero iriori. Iroashinoncayero, irisapoquero, iroyearo ovatsa, intayero. ¹⁷Irio Tasorentsi quenqueshiretacayerineri inquisajeitero, irimatanteorari icoiri iriori. Incantajeite: “Tsame ampincatsajeiteri yora covencatatsiri quitioncatatsiri, anteneri paitapeerica incoacaajeiteeri”. Aitaque incantajeiterori oca omoncaratanteari icantiri Tasorentsi iriori. ¹⁸Oca tsinane pineaqueri oshiacantaajeitaqueri maaroni

savicaajeitatsiri nampitsiquinta: yora anaacojeitiriri itsipapee atiri ipincatsariti.

**Intime oshequi iracojeiterine
vavironiasati.**

18 ¹Impoiji noneavaqueri ipocapaaque itsipa inampire Tasorentsi, iponeanaca inquitequi. Oshequi ipincatsaritapaaque, ishiquaireapaaque, iquitaitetasanotapaaquero quipatsi, yatsioquintapaaquena. ²Antearojenca icajemapaaque:

—Tsoncajeitaca ini maaroni savicajeiveitachaniri Vavironiaqui; oshequi inajeiveitani, oshequi ipincatsariveitani, meca ipoyereajeitaca. Irio timapaajantsiri camaaripee inampiniqui, mamaroni, tsivaniniro, maaroni. Iquempjeitacaro tsinane, antapinitiririni caari ai. ³Te oncameetsaveiteani osavique, aisati oamejeitaqueri maaroni itsipapee atiri iquempjeitantacarori iriori. Yantajeitaqueroni pincatsaripee; oshequi yaarantaque yora pimantirori ovetsicane, caari cameetsayetatsi.

⁴Impoiji noquemaqueri Tasorentsi antajenoqui, icanti:

—Pisoquijajeitanaje, quemisantajeitenari: piquempetarocari, pantirocari avirori caari cameetsayetatsi antiri iroori. Picarajeitirocari, noasanquetaajeiticari. ⁵Oshequi catsini antapinitiro caari cameetsatatsi. Eiro nopeacotarotsi antayetaqueri. ⁶Peerani oshequi oashinoncaajeitaqueri itsipapee, meca pimpiajeitearo, aiqero pijatatiye poashinoncaasanojeitero. Te oncameetsateji antajeitaqueri. ⁷Peerani oshequi oshemetaqueni aisati oshequi antashiye-tacari shiramparipee; meca aisati onquempetea, oshequi pineacatsitacayearo aisati oshequi poashiretacayearo. Oquenqueshirevetaca: “Narotaque pincatsaro, te naro camajimentaaro, eiro noashiretatsi”. ⁸Nomapoqaquero

noashinoncaasanaquero; oneaqueri oshaninca incamajeite, iracojeiteari, onquemero otashe; ontsonquero paamari. Tempa narotaque pivincatsarite, tempa naro Tasorentsi. Ainiro noshintsinca noasanquetantearori.

⁹Yora pincatsaripee antayetirori aisati antavintsayetirori irineajeitero ontaayea, irineero oyachaare; impoiji iriraacojeitero, iroashiretacotearo. ¹⁰Areji incatijaaitanaque; intsaroajeitanaque, iramaaquea iroashinoncaajeiteri Tasorentsi iriori. Incantajeite:

—Oo, vavironiasati, pashinoncaajeitacave. Antearo onaveitani pinampi, oshequi picarajeiveitani savicajeiveitachaniri. Imapocaquempi Tasorentsi, itsoncajeitaquempi, maaroni.

¹¹Ari iriraacojeitaquempi pimantajeitatsiri, iroashiretacojeitaquempi. Peerani oshequi pamanantajeiveitaroni paitapeerica ipayeveitimpiniri, iro cantaincha eiro meeca pamanantajitsi aisati. ¹²Tecatsi incantea impimantempiro oro, perata, shipaquireatsiri mapi, quitamaroquiri mapi, tsivitamaori, quitioncaniromaori, quiripemaori, quiraamaori, inchato casancacotari, itseequi quitamarotseequiri isheronqueetiri, pinatachari inchato yovetsiqueetiri, ashiroyetatsiri, pinatachari mapi, ¹³pochapaneri, conoavanetachari yoari, casancapatsari, casancajayetatsiri, ovaja, quejitsi, tirico, ovane tirico, vaca, ovisha, cavayo, shiacomentotsi, atiri; queario, ipimantaniroyetiri atiri. ¹⁴Incante:

—Eiro pojarotsi aisati chochoqui pinintaveitaniri; eiro otimimotajimpitsi aisati pivaararopee aisati poanencayetajeari: ontsoncaquea coajicani, poyere.

¹⁵Yora pimantapiniveitaroniri maaroni oca vaararontsi yaantapiniveitariniri oshequi quireequi; iro cantaincha meeca incatijaaitanaque arejiqui, intsaroajeitanaque, iramaayea aisati iroashinoncaajei-

teri Tasorentsi iriori. Iriraanaquea aisati irishencatanaquea, jii, jii, jii. Incante:

¹⁶—Oo, vavironiasati, pashinoncaacave. Antearo onaveitani pinampi, oshequi picaraveitani savicajeiveitachaniri. Piquitsaajeiveitaroni tsivitamaori, quitioncaniromaori, aisati quiraamaori, poanencajeiveitaroni oro, mapi shipaquireatsiri, jero aisati quitamaroquiri mapi. ¹⁷Meeca imapocaquempi Tasorentsi, itsonquitaquempiro maaroni, poyere.

Aisati maaroni marinero aisati ashiyetarori pitotsi aapinitirori vaararontsi icatiacojeitaca ivitoqui, arejiqui.

¹⁸Paricoti yamenacojeitaquero oyachaare, povaa, irosati irraajitantanaca. Icantajeiti:

—Oo, ocameetsaveitani nampitsinta, te ontimeniji quempetearoneri.

¹⁹Oshequi yoashirejeitanaca, irosati itijainatantaca quipatsi iitoqui. Oshequi iracojeitacaro aisati yoashiretacotacaro, icajemajeitanaque:

—Oo, pashinoncaajeitacave vavironiasati, antearo onaveitani pinampini, oshequi picarajeiveitani. Oshequi ojatapinitini antearo pitotsi anta, ipimantiro ashitarori oshequi ovaararontsi, yaantariri oshequi quireequi. Iro cantaincha omapocanaca otsoncanaca pinampi, maaroni.

Inquimoshirejeitanaque quemisantajeitatsiri.

²⁰Impoiji noquemaque icanteeti:

—Pinquimoshirejeitanaque, maaroni inquitoesati: quemisantajeitatsiri, itiancanenipee Quirishito, camantantaveitachaniri, maaroni. Peerani oshequi oashinoncaajeitaquempi, irootaque ipiatacoventantaquempiri Tasorentsi.

²¹Impoiji noneaqueri inampire Tasorentsi, shintsitasanotatsiri. Yaaquero antearo mapi, ipishoncaquero antearoajaqui incajare, pocn. Icanti:

—Noviincaquero mapi, opeasanotaca; tecatsi neajeroneri aisati. Aisati inquempeyetajero Vavironia, intsonqueetajero iroori, poyere; tecatsi neajeroneri aisati. ²²Ainiro aquemapinivetari meeca javioquivetachari, pampoyeajeivetachari, shiovivetachari, voerovetachari; iro cantaincha coajica tecatsi quemajerine. Ainiro inaveta meeca vetsicayevetarori paitapeerica, iro cantaincha coajica eiro itimajitsi. Ainiro aquemaqueri meeca tononquirori yoyeetari, tonon, tonon, tonon; iro cantaincha coajica tecatsi quemajerine. ²³Eiro otsiotajatsi aisati itsiomento; eiro itimajitsi aisati aajantsine ijina. Peerani iotacojeitaqueri yora pimantayetatsiri anta Vavironiaqui, oshequi ivioncaqueri iirequite. Yora savicajeitatsiri yamatavijeitaqueri itsipapee atiri, ²⁴aisati yoacantajeitaqueri maaroni quenquetsatacotiririri Tasorentsi, aisati maaroni quemisantatsiniri; irootaque impoyereantajeiteariri Tasorentsi maaroni vavironiasati.

19 ¹Impoiji noquemajeitaqueri oshequi catsini inquiresati, antearojenca ipampoyeajeiti:

Irove, icameetsatasanotaque Tasorentsi: iriotaque oavisacojeiteeri.

Tsame ampincatsatasanojeiteri, tempa itasorentsitanotaque.

²Ocameetsataque yoasanquetaquero antapinitiriri caari ai, iotaquero yantayetiri, tecatsi incomitea.

Oshequi oamejeitaqueri itsipapee atiri yantiro caari yai, irootaque yoasanquetantacarori; tempa oneashiitetacarove.

Aisati oshequi oashinoncaajeitaqueri quemisantajeitiriri, irootaque ipiatacoventantacariri.

³Impoiji yapijeitajiro:

—Icameetsataque Tasorentsi. Otaasanotaca, oncantaitiyempani oncatiajencatanaque cachaa, eiro opeatsi.

⁴Ari isavicaque Tasorentsi anta ivincatsarimentoqui. Itiyeroashijeitacari yora 24 savicacaantatsiri aisati yora apitesati virantsi, oshequi ipincatsajeitaqueri. Icantajeiti:

—Aitaque ancantajeiteari ampincatsajeiteri Tasorentsi, tempa icameetsataque.

⁵Impoiji itimi pashini inquiresati, itimi quempeji Tasorentsi, icanti iriori:

Pineacameetsajeiteri Atasorentsite, maaroni antaveejeitiniriri, aisati maaroni pincatsajeitiriri. Pincatsaripee, pineacameetsajeiteri; caari pincatsarivetacha, pineacameetsajeiteri avirori.

⁶Impoiji noquemajeitaqueri oshequi catsini jenoquisati, antearojenca ineanajeiti, iquempejeitacaro oshequi ovarijare antearojatatsiri aisati iquempejeitacaro antearo itirei. Icantajeiti:

Icameetsataque Tasorentsi: ipincatsariventajeitaquee Avincatsarite, oshequi ishintsinca.

⁷Tsame aveshireimentajeiteari, anquimoshireimentajeiteari maaroni.

Tsame ampincatsajeiteri maaroni. Meeca omoncaratata irayero Ovisha ijina; vetsicaca ijinatsori.

⁸Ishinetaquero oquitsaataro quiripe-maori, cameetsatasanotatsiri, quitamarotasanotatsiri; te ompitsitimateji.

Ora quiripemaori oshiacantaquero cameetsayetatsiri yantajeitaqueri quemisantajeitatsiri.

⁹Impoiji icantaquena nampirentsi:

—Jero oca pisanquenateri: “Irotaintsi iraye Ovisha ijina, aisati inquimoshireventearo, aisati icajemajeitiri oshequi atiri iroimojeiteari. Inquimoshiretasanojeitaque maaroni icajemajeitiri”.

Impoiji icantaquena:

—Oca nocamantaquempiri, irootaque icantasanotaquenari Tasorentsi.

¹⁰Ari notiyeroashivetacari nampirentsi, nompincatsaterime, iro cantaincha icantaquena:

—Eiro pipincatsatanatsi. Tempa aquempetavacaajeitaca: narori, aisati avirori, jeri maaroni piyemisantaririnte quenquetsatacotapinitiriri Jesoshi. Aitaque aquempetavacaajeitaca antajeitiriri icoacaajeitaqueeri. Eiro pipincatsatanatsi, irintiquea Tasorentsi pimpincatsate.

Yora quenquetsatacotiriri Tasorentsi, iriojeitaque quenquetsatacotiriri aisati Jesoshi.

Imanatavacajeitaca anta Aramaqueroqui.

¹¹Impoiji noneaquero inquite tsompoina, jeri noneaqueri cavayo quitamarotasannotatsiri. Ainiro quijacotacariri, ipajiyetiri: Caari Amatavitantatsi; aisati ipajiyetiri: Tampaticatatsiri. Icameetsataque: te iroasanquetashiteaririji atiri, te iroashiteaririji. Ioti paitarica yantiri, te inquisashiteaririji. ¹²Iroqui oquempetacaro paamari amorequi, yamatseetacaro oshequi amatseerentsi. Isatoncaataca ivancainaqu ijaviro, iro cantaincha tecatsi ioterone; apaniro iotiro irinti. ¹³Iquitsaatacaro ajacachari irajantsi; aisati ipajiyetiri: Ashitarori Irineane Tasorentsi. ¹⁴Impoijeitapaaqueri oshequi soraro jenoquiniri, iquijacojeitacari cavayo; iquitsaajeitaro quiripemaori, oquitamarotasannotaque, te ompitsiteji. ¹⁵Otimi ivantequi jivajeitiriri ivesamento, tsampitasannotatsiri impesajeitantariri caari pincatsajeitiri. Impincatsariventasanojeiteri, eiro catsini icavintsaimatiritsi. Yora vetsiquirori ovaja yaaticasanotaquero ova yaajatantacarori oja. Aitaque inquempetaqueriri iriori, iraaticasanojeitaqueri atiri, iriojeitanteari iriori iquisasanojeitaqueri Tasorentsi, yora Shintsitasannotatsiri. ¹⁶Osanquenataca iitsaarequi jivajeitiriri, aisati ivoriqui,

ocanti: “Irio pincatsariventajeitiriri maaroni pincatsaripee, anaacojeitiriri maaroni savicacantajeitatsiri”.

¹⁷Impoiji noneaqueri aparoni inampire Tasorentsi catiainchari catsirincaiteriqui. Antearojenca icajemajeitaqueri maaroni tisonipee:

—Caate, poajeitea. Poajeiteari ivatsa impajeitempiri Tasorentsi; timatsi oshequi poajeiteari. ¹⁸Poyeari ivatsa pincatsari, ivatsa capitanotatsiri, ivatsa savicacaantatsiri, ivatsa cavayo aisati yora quijacovetariri. Poyeari ivatsa maaroni atiri: pimantaari aisati amanantavetajariri, pincatsaritatsiri aisati caari pincatsaritatsi.

^{19,20}Aisati noneajeitaqueri yora covencatatsiri aisati maaroni yora pincatsaripee, yapatojeitaqueri isorarotepee, maaroni. Aisati yojjataqueri covencatatsiri yora atiri, cantavetachari: “Noncamantempi jaoca icantari Tasorentsi”. Oshequi itasoncantayevetaca, yamatavijeitantariri caari quemisantaajeitiri Tasorentsi. Isatoncaajeitaca ivancainaqu yora caari quemisantatsi. Ari ijatashijeivetacari irimanajeiterime yora quijacotacariri iyavayote aisati soraropee iriori. Iro cantaincha yaavaqueri apite: yora covencatatsiri aisati yora amatavitantatsiri, tapi. Aneatsiquera, yojocaqueri anta antearoqui paamari. ²¹Irinti itsipapee, ipesajeitaqueri yora quijacotachari, ipesajeitaqueri maaroni, peti, peti, peti. Iro ipesantacariri ivesamento ivantequiniri. Ari yoajeitacaro tisoni ivatsani, iquemasanotacaro.

Iquenquetsatacotiro 1,000 osarintsi.

20 ¹Impoiji noneavaqueri yaniireapaaque itsipa inampire Tasorentsi, iponeanaca inquitequi. Yajiriquiro iyavireantarori omoro quipatsi, jatatsiri antoo. Aisati yamapaquero antearo

carentsatsa. ²Yaapaaqueri yora maranque, timitachari peerani. Icanteetiri camaari aisati icanteetiri Satanashi. Ari yoisotasanotapaaqueri, oiso, oiso; oncarataque 1,000 osarints iroisoreacotantajeiriri aisati, coajicani. ³Impoiji yojocaqueri omoroqui, yashitacotaqueri, iyavitacotaqueri. Tecatsi incantajea aisati iramatavi-jaitajeri atiripee, oncarataque 1,000 osarints. Iro cantaincha impoiji irisoquijanaje, eiro osamanititsi iramatavitantaje aisati.

⁴Impoiji noneajeitaqueri oshequi savicajeitatsiri ivincatsarimentopeequi: iriojeitaque icantiri Tasorents. “Pincantacoventajeiteri maaroni atiri”. Peerani te impincatsajeiteriji iriori yora covencatsatsiri aisati ishiacantaro. Aisati te irisatoncaateaji ivancainaque aisati iracoqui ivajiro covencatsatsiri. Iquenquetsatacojeitaqueri Jesoshi aisati yoametantajeitiro irineane Tasorents, irootaque ipesantee-tacariri itsanoqui. Meeca itinaajeitanaja, incarajeiteri Quirishito, oncarataque 1,000 osarints impincatsariventantajeite. ⁵Iro cantaincha tequera intinaajeitanaje itsipapee. Ariorica avisanaque 1,000 osarints, ari intinaajeitanaje maaroni. ⁶Oshequi inquimoshirejeitanaque yora jivatasanojeitatsineri intinaajeitanaje: iroameetsatasanoteri Tasorents. Iriotanaque eiro ijatitsi Sharincaveniqui, irointi impincatsajeiteri Tasorents aisati Quirishito, aisati oncarataque 1,000 osarints incarajeiteri impincatsarijeitanaque.

Irivecaratantearori irimanatavacayea.

⁷Ariorica omoncaratapaaquea 1,000 osarints, ari iroisoreajeri Satanashi, iroimisoquijajeri aisati. ⁸Impoiji irijatanaque iriori maaroni nampitsipeequi, intsoteanaquero quipatsi, irampatojeitan-teariri savicajeitatsiri irimanajeitanteariri quemisantajeitatsiri. Icanteetiri yora

oijajeitiriri Satanashi: Co, aisati Maco. Incarajeitanaque oshequi catsini. Oquem-petaca te amateroji amoncarajeitero ovane impanequi, aisati eiro amatirotsi amoncarajeiteri irioripee, jaocarica incarajeiteri. ⁹Inquenajeitanaque anta opampaitetinta, irishoncajeitanaque maaroni quemisantajeitatsiri, aitaque irishoncajeitaquero Jerosare: ora nampitsi anintajeitaqueri. Irimanajeitapaaquerime quemisantajeitatsiri, iro cantaincha omapocanaquea omponeana-quea inquitequi antearo paamari, ontsoncajeitapeeri; ontaajeitapeeri, pomein. ¹⁰Impoiji irayeeteri camaari, yora amatavijeitiriri atiri, irosati irojocanteeteariri anta antearoqui paamari. Anta incarajeiteri yora covencatsatsiri aisati yora amatavitantatsiri, cantavetachari: “Noquenquetsatacotiri Tasorents”. Ari oshequi inquemaatsicajeitearo: quitaiteriqui, aisati tsiteniriqui; incantaitiyempani.

¹¹Impoiji noneaquero antearo ivincatsarimento, oquitamarotaque; aisati noneaqueri yora savicantarori. Opeasano-tanaca quipatsi aisati inquite, maani. ¹²⁻¹⁵Aisati noneaqueri maaroni piincajei-vetachari incajarequi. Itinaajeitanaja tijajeivetachari aisati maaroni jajeitatsiri Sharincaveniqui. Queario, noneajeita-queri: pincatsariveitachaniri aisati caari pincatsaveitachani, icatiimojeitacaro ivincatsarimento Tasorents. Impoiji ipenareetaquero oshequi sanquenarentsi. Osanquenajeitaca sanquenarentsipeequi maaroni yantajeitiriri atiripee. Ariorica ocameetsati yantajeitiriri, icanti Tasorents: “Nompinateri, cameetsa nosavicacayeri”. Terica oncameetsateji yantajeitiriri, icanti: “Noasquetayeri yora”. Otimi otsipa sanquenarentsi aisati, ipenareetaquero. Osanquenataca irointi ivajiropee maaroni savicatsineri inquite-qui. Yora caari sanquenatacotacha

yojoqueetaqueri anta antearoqui
paamari: anta yojoqueetiri maaroni
tseencantatsiri aisati maaroni camaari.
Ipajiyetiro paamari Inampi Ashinonca-
sanotachari: yora caari neajeitajerine
Tasorentsi.

**Iquenquetsatacotaquero Jerosare
iroaquerari.**

21 ¹Impoiji noneaquero pashini
inquite aisati pashini quipatsi,
iroaqueratajantsiri. Aitaque opeasanota-
naca ora intacaroniri, aisati opeaca
incajareni. ²Aisati noneaquero ora
Jerosare iroaqueratajantsiri, ora
cameetsatasanotatsiri, inampi Tasorentsi;
oponeanaca inquitequi, aniireapaque
quipatsiqui. Oshequi oaneencayetaca,
oquempetacaró tsinane, irotaintsirica aye
ojime, oaneencaca. ³Noquemaqueri
jenoquisati, timatsiri quempeji ivincatsa-
rimentoqui Tasorentsi. Antearojenca
icanti:

—Pamenajeite: ijataque Tasorentsi
irisaviquimojeiteri atiri. Quiso iroajeiteri,
irishanincajeitantariri. Eiro yojocajeitaji-
ritsi. ⁴Iriveshireacaajeiteari, eiro ishineti-
ritsi atiri iriraajeitajea aisati; eiro
icamajeitajitsi. Eiro iraacotajaritsi aisati
camajantsineri, eiro ishencatajatsi, eiro
iquematsicatarotsi paitapeerica.
Aitaque ontsonqueari maaroni ocapee.

⁵Impoiji icanti Tasorentsi:

—Pamene, noaqueratacaajeitero
maaroni.

Aisati icantaquena:

—Pisanquenatero oca: queario nocanta-
quempiri, te namatavitempiri.

⁶Aisati icantaquena:

—Moncarataca, nomataquero. Narota-
que intacantarori maaroni, aisati
narotaque vecarayeroneri maaroni.
Intimerica miretatsineri, nompashiteari
irireri; eiro nocoacotiritisi: aitaque
nompajeiteri maaroni coiteimojeitariri.

⁷Ariorica irantajeitenaro maaroni
nocoacaajeitiriri, nompasanojeiteri
maaroni coiteimojeitariri. Nontasonca-
coventapinijeiteri, aisati nontomintasano-
jeiteari. ⁸Irintiquea yora tsaroshenti,
tseencantatsiri, antayetirori caari
cameetsayetatsi, oantatsiri, antirori caari
yai, matsintatsiri, pincatsatashiyetarori
yovetsicayetiri atiri, aisati maaroni
amatavitantatsiri, nojocajeiteri antearo-
qui paamari. Irootaque noshiacantacari-
riri irampiitajea incamajeitaje.

⁹Impoiji ipocashitaquena aparoni
inampire, yora icarajeiteri incaranqui 7
ajiriquirori itsotane jaavetachari oja
oashinoncaajeitiriri atiri. Icantaquena:

—Caate, nonijayempero iroaquera
aatsiri ojime: irootaque ijina Ovisha.

¹⁰Intashiretanaquena anta antearoqui
otishi catsini, inijaapaaquenaro Jerosare:
ora cameetsatasanotatsiri nampitsi.
Oponeanaca Tasorentsiqui anta inquite-
qui, aniireapaque. ¹¹Ishipaquireaca-
quero Tasorentsi, oquempetaca shipaqui-
reasanotatsiri mapi caari aneapiniti,
osaancanatanataque catsini. ¹²Otimi
nampitsiqui tantorentsi shoncarori,
jatatsiri jenoqui. Otimi otantorequi 12
omoropee, yareetapinitantarori nampitsi;
itimi anta 12 inampire Tasorentsi
shentajeitirori. Osanquenataca omoropee-
qui ivajiropee yora 12 itomini Ishirairini.
¹³Otimi mava omoropee anta iquenapai
catsirincateri, otimi aisati mava
omoropee anta iqueanajinta, aisati otimi
omoropee omerequipeequi aisati: jero
mava acaquero, jero mava antaque-
ronta. ¹⁴Otimi ishaaviji antearo mapi
caratatsiri 12, yoanquetantarori oshanin-
capee mapi. Osanquenataca antearoqui
mapi ivajiropee yora 12 itiancaneepe
Ovisha.

¹⁵Ari yajiricaquero nampirentsi
imoncaratantarori nampitsi, yovetsiquee-
tiro oro. Ari imoncarataquero nampitsi

aisati tantorentsi, aisati omoro iroori, iqueapinijeitanti. ¹⁶Ainiro omerequi tantorentsi ocarati otsipasati, omoncaratavacaaca maaroni. Imoncarataquero, ocarataque omerequi 2,200 quirometero. Aisati oquempetaca ojenoquitaque tantorentsi. ¹⁷Imoncarataquero otontapatsati, ocarataque 64 metero. Ari nosanquenataquempiro icantaquenari yora nampirentsi.

¹⁸Iro yovetsicantarori tantorentsi mapi marereayetatsiri, camaranirori. Irointi nampitsi, iro yovetsiqueeyetiri oro, iro cantaincha osaancanataque, maaroni. ¹⁹Ara tantorentsiqui ainiro antearo mapi ishaavijiniri nocamantacotaqueri incaranqui. Oaneencayetacaro marereayetatsiri mapi, pinatasanoyetachari: otimi camaranirori, quisaari, quitamaronirori, quenashiri, ²⁰potsonanirori, quitioncanirori, camarari, cavoreanirori, quiterinirori, quenashinirori, potsonanirori, jero quiraanirori. Ocarataque onashiyeta mapipee 12. ²¹Ora ashitacorontsi anta iqueapinitantaroriquinta tantorentsi yovetsiqueeyetiro mapi quitamaronirori. Iro yovetsiqueetiri ashitacorontsi aparo mapi. Aisati maaroni avotsi anta nampitsiqui yovetsiqueetiro oro, iotaca oro, tecatsi onconoyeari; aisati osaancanatanasotaque.

²²Te noneeroji nampitsiqui ivanco Tasorentsi inquemisantajeitanteari savicajeitatsiri. Aitaque itsoteaquero Tasorentsi aisati Ovisha nampitsi, iquemisantajeitaqueri savicajeitatsiri jaocapeerica. Tempa iriotaque Avincatsarite mayetirori maaroni. ²³Te intimeji catsirincaiteri irooreantearori nampitsi, aisati te intimeji cashiri quitasanteterone: tecatsi incoajeitanteariri. Tempa itimi Tasorentsi, oshequi ishpaquirei oquitaitetantari nampitsi. Aisati iquemeta Ovisha, itsioyetaquero. ²⁴Itsiojeitiri maaroni atiripee; aisati ivincatsaritepee, ipocajeitapaaque, ipincatsajeitapaaqueri, icantajeiti: “Tempa icameetsatasanotaque Tasorentsi”. ²⁵Ametapinijeitaca ashitapinitiro anampi

tsiteniriqui, iro cantaincha anta te irashitapiniteroji: tempa ocantani oquitaiteti, te ontsitenitimateji. ²⁶Queario, ipocajeitaque maaroni atiripee ipincatsajeitaqueri Tasorentsi, icantajeiti: “Tempa icameetsataque Tasorentsi”. ²⁷Iro cantaincha eiro otimitsi anta caari cameetsayetatsi, paitapeerica. Aisati eiro yareetatsi antayetirori caari cameetsayetatsi, jaocarica ocantayetari; aisati eiro yareetatsi amatavitantatsiri. Irintiquea areejeitachane sanquenatacojeitachari anta isanquenarentsitequi Ovisha. Iriojeitaque savicatsineri Tasorentsiqui, incantaitiyempani.

22 ¹Impoiji inijaaquenaro nampirentsi antearoja eni, saancajatsiri, icanteetiro: nija oaneantatsiri. Oponeaca ivincatsarimentoqui Tasorentsi aisati Ovisha, ocontejatapaaque, chararara. ²Oquenajatanaque nampitsiqui nianqui. Otimi otsapijapeequi inchato, oaneantatsiri. Onashiyetaca oitsoqui, ocarajeitaque 12. Maaroni cashiri onashiyetaca oitsoqui timayetatsiri. Irointi oshi oshiaquero aavintarontsi oavisacojeitiriri maaroni atiri. ³Eiro otimitsi nampitsiqui caari cameetsayetatsi; tempa anta isaviqui Tasorentsi aisati Ovisha. Impincatsajeiteri maaroni quemisantajeitiriri. ⁴Irineavorojeiteri maaroni, aisati irisatoncaajeitaquearo ivancainaqu iavajiro, maaroni. ⁵Eiro otsitenitajitsi aisati, eiro icoajeitajitsi intsiojeitanteari aisati catsirincaiteri. Aitaque intsiotacojeiteri iriori Avincatsarite Tasorentsi. Incarajeiteri iriori maaroni, impincatsarijeitanaque.

Ivecarataquero Joa isanquenare.

^{6,7}Impoiji icantaquena inampire Tasorentsi:

—Queariotaque oca icantaqueri Jesoshi, eiro yamatavitimpitsi; icanti: “Eiro osamanititsi nompocantajeari”. Peerani Avincatsarite Tasorentsi yoamejeitaquerini yora camantantatsiniri iquenquetsatantacari. Meeca itiancaquena narori, irootaque

noamejeitantaquempiri jaoca oncanteari coajica: eiro osamanitasanotitsi omoncarantajeiri.

Iroimoshirencajeiteri Tasorentsi quemisantajeiteroneri maaroni ocantiri oca sanquenarentsica. ⁸Nopajita narori Joa. Narotaque quemaquerori aisati neaquerori maaroni oca nosanquenataco-taquerica. Irio onijaquenarori inampire Tasorentsi. Inijantaquenarori, oshequi nopincatsataqueri, notiyeroashivetacari, ⁹iro cantaincha icantaquena:

—Eiro pipincatsatanatsi, aquempetava-caajeitaca: tempa arojeitaca antaveejeitiniriri Tasorentsi. Narori, avirori, aisati piyemisantaririnteni, yora quenquetsatacantantatsiniri, jeri aisati maaroni quemisantajeitirori oca pisanquenatiri: aquempetavacaajeitaca. Eiro catsini pipincatsatanatsi narori, irintiquea Tasorentsi pimpincatsatea.

¹⁰Impoiji aisati icantaquena:

—Eiro pimanirotsi oca pisanquenata-queri, irotaintsi omoncarataquea.

¹¹Eirotsitarica omoncaratatsi nocanta-quempirica, incanteani irampiitapinitero caari cameetsatatsi yantajeitiri, aiqhero irijatatiye. Aisati inquempeteari yora cameetsatatsiri: aiqhero irovaajerori yantayetiri iriori. Yora quemisantasanota-siri incantaitiyempani irimatasanote-neri Tasorentsi maaroni icoacairiri.

¹²Icanti Jesoshi:

—Eiro osamanitasanotitsi irosati nompocantajeiri. Ariorica nareejeitapaa-quempi, nompinajeitapeeri maaroni antajeitaquenarori nocoacairiri. ¹³Narota-que intacantarori maaroni, aisati narotaque vecarayerone maaroni. Nojivatasanotaque notimini, eiro nocami-tsi, irosati noncanteani nontime.

¹⁴Noimoshirencajeiteri maaroni quivajei-tirori iitsaare, impoiji noshineteri iroajeitearo oitsoqui inchato oaneanta-siri, aisati noshinejeiteri irisavicajeite

nonampiqui: inqueajeitapeero omoro iqueapinijeitantari. ¹⁵Anta saiteriqui itimi tseencantatsiri, matsitantatsiri, antayeti-rori caari cameetsayetatsi, oantatsiri, pincatsatorori yovetsicashiyetari atiri, coatsiri iramatavitea irisati, amatavijeiti-riri itsipapee, maaroni. Eiro yareejeitaro-tsi irinti nonampiqui. ¹⁶Narotaque Jesoshi. Notiancaquempiri nonampire, icamantaquempiro noneane povaajeitan-teanariri quemisantajeitanari. Narotaque vetsiqiriri Iravirini, aisati narotaque ishanincani. Noshiacantaqueri impoquiro yora arimampoquitatsiri oquitaitetamani.

¹⁷Ishire Tasorentsi aisati ijinatsori Ovisha, ocantajeitiri:

—Caate, Novincatsarite.

Tsame maaroni quemajeitirori, pinquempejeitearo, pincantajeite:

—Caate, Novincatsarite.

Aisati avirori, jaocarica pisavicajeitiri: ariorica piquemaquero pitashe, paventeari. Janicarica coantsine irire, paventajeitari: impaquempi nija oaneantatsiri, tecatsi incoacojeitempi. ¹⁸Jeroca noncamantajeite-riri maaroni neanateroneri oca sanquenaren-tsica. Moncarataca, ari ocarati. Tecatsiya pisanquenataje aisati. Ariorica povaajero, iroasanquetasanotempi Tasorentsi: iroashinoncaasanotempi onquempetea yoashinoncaasanojeitaqueri maaroni oquenquetsatacoataqueri oca. ¹⁹Aisati oquempetaca, pipeajirocari sanquenaren-tsica. Ariorica pimpeajero paitapeerica, eiro ishinetimpirotsi Tasorentsi oitsoqui inchato oaneantatsiri; aisati eiro pineirotsi inampi Tasorentsi, oca oquenquetsatacotirica.

²⁰Yora oametaquenarori oca icanti:

—Queario, eiro osamanititsi nompian-tajeiri.

Aitaque incanteari. Caate Novincatsarite Jesoshi. ²¹Nocoaque irineshinoncatasanojei-tempi Avincatsarite Jesoshi. Aitaque incantapi-niteani.

Narotaque sanquenatirori: *Joa*